

Yuse Chichame Aarmauri

Yamaram Chicham

El Nuevo Testamento
de nuestro Señor Jesucristo
en el idioma
Achuar-Shiwiar



LA LIGA BIBLICA

LAS SAGRADAS ESCRITURAS PARA TODOS

Crete, IL 60417

EE.UU.

El Nuevo Testamento
de nuestro Señor Jesucristo
en el idioma
Achuar-Shiwiar

Primera edición, 1981
Segunda edición, 1994
Tercera edición, 2008

Publicado por
© LA LIGA BIBLICA 2008

Usted es libre de copiar, distribuir y comunicar públicamente la obra bajo las condiciones siguientes:

- Reconocimiento. Debe reconocer los créditos de la Liga Bíblica (pero no de una manera que sugiera que tiene su apoyo o apoyan el uso que hace de su obra).
- No comercial. No puede utilizar esta obra para fines comerciales.
- Sin obras derivadas. No se puede alterar, transformar o generar una obra derivada a partir de esta obra.

CONTENIDO

Yamaram Chicham Mateo Aarmauri	(Mat.)	5
Yamaram Chicham Marcosa Aarmauri	(Marc.)	75
Yamaram Chicham Lucasa Aarmauri	(Luc.)	115
Yamaram Chicham Juanku Aarmauri	(Juan)	186
Cristo Nuiniatiri Ainau Turamuri (Hechos)	(Hech.)	237
Romanam Papin Akuptukmauri	(Rom.)	300
Corintonam Papin Eemak Akkuptukmauri	(1.Cor.)	330
Corintonam Papin Ataksha Akuptukmauri	(2.Cor.)	360
Gálatas Ainaun Papin Akuptukmauri	(Gal.)	378
Efesonam Papin Akuptukmauri	(Efes.)	389
Filiposnum Papinn Akuptukmauri	(Fil.)	399
Colosasnum Papin Akuptukmauri	(Col.)	406
Tesalónicanam Papin Eemak Akuptukmauri	(1.Tes.)	413
Tesalónicanam Papin Ataksha Akuptukmauri	(2.Tes.)	419
Timoteon Papin Eemak Akuptukmauri	(1.Tim.)	423
Timoteon Papin Ataksha Akuptukmauri	(2.Tim.)	431
Titon Papin Akuptukmauri	(Tito)	437
Filemónkan Papin Akuptukmauri	(Filem.)	441
Hebreos Ainamunam Papin Akuptukmauri	(Hebr.)	443
Santiago Papin Akupkamuri	(Sant.)	465
Pedro Papin Eemak Akupkamuri	(1.Ped.)	473
Pedro Papin Ataksha Akupkamuri	(2.Ped.)	481
Juan Papin Eemak Akupkamuri	(1.Juan)	486
Juan Papin Ataksha Akupkamuri	(2.Juan)	493
Juan Papiin Ukunam Akupkamuri	(3.Juan)	494
Judas Papin Akupkamuri	(Jud.)	496
Jesucristo Juankun wantintukmauri (Apocalipsis)	(Apoc.)	499
Chicham yumtin ainia nu tenap nekaatin	(Glosario)	533

Yamaram Chicham Mateo Aarmauri

Jesucristo Abrahamama wearintai

(Luc. 3.23-38)

1 ¹Ju papikia Jesucristo pachisar aarmawaitai. Jesucristo Davidta wearai ayayi. Tura Davidcha Abrahamama wearai ayayi. Tura Abrahamama wearai ainau, tura Davidta wearai ainau naaringkia ju papinum aarmawaitai.

²Abraham Isaacan yajutmarmiyai. Tura Isaac Jacobon yajutmarmiyai. Tura Jacob Judán tura Judá yachí ainauncha yajutmarmiyai. ³Tura Judá Tamaran nuwatak, ni uchirin Faresan tura chikich uchirin Zara naartinun yajutmarmiyai. Tura Fares Esroman yajutmarmiyai. ⁴Tura Esrom Araman yajutmarmiyai. Tura Aram Aminadaban yajutmarmiyai. Tura Aminadab Naasónkan yajutmarmiyai. Tura Naasón Salmónkan yajutmarmiyai. ⁵Tura Salmón Rahaban nuwatak Boozan yajutmarmiyai.^a Tura Booz Rutan nuwatak Obedan yajutmarmiyai. Tura Obed Isaín yajutmarmiyai.^b ⁶Tura Isáí apu Davidtan yajutmarmiyai. Davidka Israela apuri ayayi. Tura David Uríasa nuwarin nuwatak, ni uchirin Salomónkan yajutmarmiyai.^c

⁷Tura Salomón Roboaman yajutmarmiyai. Tura Roboam Abíasan yajutmarmiyai. Tura Abías Asan yajutmarmiyai. ⁸Tura Asa Josafatan yajutmarmiyai. Tura Josafat Joraman yajutmarmiyai. Tura Joram Oseasan

yajutmarmiyai. ⁹Tura Oseas Jotaman yajutmarmiyai. Tura Jotam Acazan yajutmarmiyai. Tura Acaz Ezequíasan yajutmarmiyai. ¹⁰Tura Ezequías Manasésan yajutmarmiyai. Tura Manasés Amónkan yajutmarmiyai. Tura Amón Josíasan yajutmarmiyai. ¹¹Tura Josías Jeconíasan tura Jeconíasa yachí ainaun yajutmarmiyai. Tura Babilonianmaya apuri Israel ainaun nepetkau asamtai, Israel ainaun achikiar Babilonianam jukiarmiyai.

¹²Tura Jeconías nuni pujus Salatielan yajutmarmiyai. Tura Salatiel Zorobabelan yajutmarmiyai. ¹³Tura Zorobabel Abiudan yajutmarmiyai. Tura Abiud Eliaquiman yajutmarmiyai. Tura Eliaquim Azoran yajutmarmiyai. ¹⁴Tura Azor Sadócan yajutmarmiyai. Tura Sadóc Aquiman yajutmarmiyai. Tura Aquim Eliudan yajutmarmiyai. ¹⁵Tura Eliud Eleazaran yajutmarmiyai. Tura Eleazar Matánan yajutmarmiyai. Tura Matán Jacobon yajutmarmiyai. ¹⁶Tura Jacob Josén, Marí aishrin yajutmarmiyai. Marísha Jesúsán jurermiyai. Tura Jesúska Yus akupkamu asamtai Mesías inaikiamuitai.

¹⁷Tura Jesúsá wearai Abrahamnumia nángkamas Davidnum jeatak catorce (14) wearai inaikiamu armiyai. Tura Davidnumia nángkamas Israel ainau Babilonianam achikmau jeakuri catorce (14) wearisha inaikiamu armiyai. Nuni nángkamas

a 1.5 (Josué 2.1;6.17; Hebr. 11.31; Sant. 2.25) b 1.5 (Rut 4.13-17) c 1.6 (2.Sam. 12.24)

Mesíasjai mash irumram ataksha catorce (14) weari inaikiamu armiaiyi.

Jesucristo akiinamuri etserkamuri

(Luc. 2.1-7)

¹⁸Jesucristo tu akiinamiyai. Jesúsá nukuri Marín nuwatkataj tusa, José niin chichasmiaiyi. Tu chichasar kanakar pujuinai, Yuse Wakani kakarmarijai Marí japrukmiyai. ^d ¹⁹Marí japrukamtai, José nuna nekaa, pengker nintintin asa, aints ainu nuna nekaawarai tusa, takamtaik uuk inaisatas wakerimiya. ²⁰Tu nintimias pujamtai, Yuse awemamuri Josén karanam wantintukmiyai. Tura chicharak: —Joséya Davidta weariya, ame chichasmaurum María japruku wainiatmek natsaamtsuk jeemin jukita. Yuse Wakani aйтkamu asa japruki. ²¹Tura asamtai uchin jurertatui. Turamtai nu uchikia aints ainu tunaanumia uwemtikratin asamtai, nu uchikia Jesús inaikiatme, —timiayi. Nuna naaringkia Uwemtikiartin taku tawai. ^e

²²Nu turunatnunka yaanchuik Yuse chichamen etserin aarmia nunisang umikmiyai. Nu aarmauka nuwaitai:

²³“Antuktaram. Nawan aintsjai tumichu japruktinuitai. Tura asa uchin jurertinuitai. Tura uchin Emanuel inaikiatnuitai.” Nuna ta nuka “Yus iijai pujawai” taku tawai. ^f

²⁴Turamtai José shintar, Yuse awemamuri timiaun miatrusang umikmiyai. Tura Marín ni jeen jukimiyai. ²⁵Tura uchi eemkauri akiintsang, ni jeen jukiyat, nijaingkia tumatsuk pujus, Marí uchin jurermiayi. Tura uchin jurer, naarin Jesúsán inaikiamiyai. ^g

Nekau ainu irasmauri

2 ¹Herodes Judea nungkanam apu pujai, Jesús Belén yaktanam Judea nungkanam akiinamiyai. Jesús akiinai

asamtai, nekau aints ainu tsaá taakmanumanini jiinkiar Jerusalénnum jearmiyai. Tura apu Herodes pujamunam jear, ²Herodesan iniinak:

—¿Judío apuri akiina nusha tuning puja? Iikia tsaá taakmanumanini angkuaji wainkau asar, apu akiinayi tusar: Ameka Apu wajastatme titasar winiji, —tiarmiayi.

³Tinamtai apu Herodes nuna antuk: Wikitjai apunka tusa, napchau nintimramiayi. Turamtai Jerusalénnum pujuinausha mash napchau nintimramiayi. ⁴Tura asaramtai apu Herodeska sacerdote juuntri ainu mash untuk, tura Moisésa chichame nuikiartin ainauncha mash irur:

—¿Tuning akiinatnuita Cristoa? —tu iniasmiyai. ⁵Tu iniam, Yuse chichamen etserin tu aarmau asamtai aiminak:

—Belén yaktanam Judá nungkanam nuni akiinatnuitai. Cristo akiinatniuri pachis aarmauka nuwaitai:

⁶ Yus chichaak: “Judá nungkanam yakat Belén tutai mianchauka achatnuitai. Antsu nu yaktanam juun apu akiinatnua nuka Israela weari ainu inartinuitai. Tura asamtai nu yaktaka chikich yakat Judá nungkanam aa nuna nangkamasang juun atinuitai,”

Yus timiayi. Tu aarmawaitai, —tusar aimkarmiayi. ^h

⁷Tu aiminamtai, apu Herodes nekataj tusa, nekau ainu tsaá taakmanumanini winiarmia nunaka akanak juki:

—¿Angkuajisha nekasumsha warutia wainkamarume? —tu iniasmiyai. ⁸Tura nuna nekaa, Belén yaktanam awemak:

—Nuni wetaram. Turaram uchi pujatsuash tusaram, tenapkesrum nekaataram. Tura wainkaram umisrum

waketkiram winasha ujakataram.
Turakrumin wisha wena uchin: Ameka
apu wajastatme, titasan wakerajai,
—anangkak timiayi.

⁹⁻¹⁰Apu Herodes tu akatramu asar,
nekau ainau apu jeenia jiinkiar,
Belénnum wearmiayi. Tura junta weenak,
angkuajin tsaa taakmanumanini wainkar-
mia nunaka ataksha wainkarmiayi. Tura
nuna wainkar nukap warasarmiayi. Tura
uchi pujamunam tupnik angkuaji ketun
jiisar, nuke wear jean wainkarmiayi.

¹¹Tura jean wainkar nuni wayaawar, uchi
nukuri Marjiai pujuinaun wainkarmiayi.
Tura wainkar tikishmatrar:

—Ameka apu atatme, —tiarmiayi. Tura
kichik kichik ni kajurin urakar, ni
kajurinia kurin, tura keematai kungkur-
man, nunia shirikpin mirra tutain uchin
susarmiayi. ¹²Tura arum kashi kaninam-
tai, Yus nu nekau aints ainaun karanam
chicharak:

—Judfo apuringkia ujatsuk, tupnik
atumi nungkari waketkitaram, —timiayi.
Tu timiau asar, chikich jintak ni nungka-
rin waketkiarmiayi.

Egipto nungkanam wemaui

¹³Nekau ainau waketkiaramtai, Yuse
awemamuri Josén karanam aneachmau
wantintukmiayi. Tura chicharak:

—Joséya nantakta. Tura nantakim uchi
nukurijai jukim, Egipto nungkanam weta.
Apu Herodes uchin eak maatas wakerau
asamtai turata. Tura nuni pujakmin,
waketkita tusan ujaktatjame, —timiayi.

¹⁴Tamati Josésa wári nantaki, uchin
nukurijai juki, kashi Egipto nungkanam
wearmiayi. ¹⁵Tura Egiptonam jear:
Herodes jakamtai waketkimi tusar
nakasarmiayi. Nu turatnunka pachis
yaanchuik Yus ni chichamen etsernun
aamtikramiayi. Yus nuna miatrusang

umikti tusa turamiayi. Nu aarmauka
nuwaitai: “Egipto nungkanmaya wina
Uchirun untukmiyajai.”ⁱ

Uchi ainau maamuri

¹⁶Apu Herodes nekau ainaun taarti tusa
naka nakaka ni tacharamtai, wina
anangkrua tusa, nukap kajekmiayi. Tura
nekau ainaun: “Angkuajin warutia
wainkamarume? nuwik tu iniasu asa,
nuna paan nekaa, ni suntarin akupak:
“Uchi aishmang yamai akiinau ainau tura
yamai wekaarau ainausha, tura yamai
chicharu ainausha, tres musach jeatak
Belén yaktanam pujuinau, tura arakchi-
chu pujuinausha mash amuktaram,” tusa
akupkamiayi. ¹⁷Tu akatramu asar, uchi
ainaun mash maawarmiayi. Nu uchi
ainaun maamurin pachis Yuse chichamen
etserin Jeremías yaanchuik aarmia nuna
miatrusarang umikiarmiayi. Nu
aarmauka nuwaitai:

¹⁸“Ramá yaktanam nuwa kakar
juutmau antuukatnuitai. Nuwa juutu
puja nuka Raquelaitai. Ni uchiri mash
amutkamu asa, jikiamak kakar juutui.
Antsu jikiamsuk asata tinamaitiat
antatsui.” Tu aarmawaitai. Nu aarmauka
apu Herodeska akiintsang, ukunam
atiniun pachis aarmawaitai.

¹⁹Tura apu Herodes jakamtai, José
Egiptonam pujai, Yuse awemamuri
nayaimpinmaya ataksha tari, karanam
wantintuk chicharak:

²⁰“Joséya nantakta. Uchin maatas
wakerimia nuka yanchuk jakau asamtai,
uchi nukurijai jukim Israel nungkanam
waketkita,” timiayi.

²¹Tamati José nantaki uchin nukurijai
juki, Israel nungkanam waketkimiayi.
²²Tura nuni jear, ni aparti jakau asamtai,
Herodesa uchiri Arequelao naartin Judea
nungkanam aints ainaun inawai tamaun

antuk, José nuni wetan shamiayi. Tura karanam: Israel nungkanam weep timiaun antuku asa, Galilea nungkanam wemiayi. ²³Tura Galilea nungkanam pujustas, Nazaret yaktanam wemiayi. Nu turunamuka yaanchuik Yuse chichamen etserin timiaun miatrusang umikmiayi. Nu Jesúsán pachis timiauka nuwaitai: “Nazaretnumia aintsuitai tiartinuítai.”^j

Imiakratin Juanku etserkamuri

(*Marc. 1.1-8; Luc. 3.1-9, 15-17; Juan 1.19-28*)

3 ¹Jesús tuke Nazaretnum pujamtai, imiakratin Juan Judea nungkanam taa, numi atsamunam Yuse chichamen etsermiayi.^k

²Tura aints ainaun chicharak:

—Yus aints ainaun nayaimpinmaya inartin kinta jeau asantai, atumi tunaari inaisaram tuke Yus nemarkataram, —timiayi.^l

³Yaanchuik Juankun pachis Yuse chichame etserin Isaías aarmia nuna miatrusang umikmiayi. Nu aarmauka nuwaitai:

Numi atsamunam aints taa kakar chichaak:

“Aints ainu apu wekaasatniun jintan tupin iwiarina nunisrumek atumi ninti iwiarataram,” timiayi. Tu aarmawaitai.^m

⁴Juan kamiyu uren kachumnuyayi. Tura peetirincha nuwap najanamun peeyayi. Tura manchincha yuyayi. Tura wapasa yumirincha uminuyayi. ⁵Tura Yuse chichamen etsermatai, Jerusalénnumia aints ainu, tura Judea nungkanmaya ainausha, tura Jordán entsanam arakichu pujuinausha untsuri Juan etsermaun antukartas kaunkarmiayi. ⁶Tura aints ainu: Yus wina tunaarun sakturat tusar ni tunaarin etserkaramtai, Juan nu aints ainaun Jordánnum imaimiayi.

⁷Turamtai fariseo ainu, tura saduceo ainausha untsuri Juan aints ainaun imiaamun jiasartas kaunkarmiayi. Tura kaunkaramtai, Juan nu aints ainaun chicharak:

—Atumka napia tumau ainarminchá çyaachia atumin mairam uwemratatrumé turamiarume? Atumka nangkamrum: Wisha mainka uwemrainjapi, tura Yuska winaka wait wajaktinnaka suruschaintapi çtu nintimsarmesha pujarme?ⁿ

⁸Nekasrum uwemratasrum wakera-krumka, atumi tunaaringkia inaisaram ukuktaram. ⁹Atumka nangkamrum: Iikia Abrahamá uchirinji, tura asar Yuse aintsri ainiaji tarume. Antsu wikia tajarme: Yuska ju kaya tepa junaka juki: Juka Abrahamá weari ati tusa, ningki wakerakka turamnawaitai. ¹⁰Atumka numi nerechua nunisketrume. Tura aints jachan juki numi nerechun ajak nuna kanawen charur epeawai. Yuska nu aintsua nunisketai. Atumi tunaari inait nakitakrumka, nekasrum wait wajaktinuitrume.^o ¹¹Atumi tunaari inaisaram Yus umirkataram tusan, wikia aya entsanmak imiajrumé. Antsu wina ukurun winitata nuka wina nangkatusang kakaram atatuí. Wikia mianchau asan, natsaamakun ni sapatrin takuschatnuitjai. Yuse Wakani Yusnau ainautirmi nintin piatramkatatrume. Antsu Yus umirchau ainautirminka ji kajintrashtinnum japramatatrume.^p ¹²Niisha Yusnau ainaun, tura Yusen umirchau ainauncha akantratnuitai. Aints trigon pakawa nunisang turatnuitai. Trigo jingkiainincha, tura saapencha akankatas pear su su umpui jingkiaininjak juwawai tura jeanam ukuawai. Antsu saapen epeawai. Yuscha nunisang niinu ainaunka ni jeen jukiarti-nuitai. Antsu niin umirchau ainaunka ji

kajintrashtinum japatnuitai, —Juan etserak timiayi.

Jesúsa maimuri

(*Marc. 1.9-11; Luc. 3.21-22*)

¹³Nunia Jesús Galilea nungkanmaya jiinki, Jordán entsanam wína imiatti tusa Juankun werimiayi. ¹⁴Tura wainiat Juan Jesúsán imaichmin nekapeak chicharak:

—Ame nekasam wína imiatmin ayatum ¿wína imiatit tusam winam? —timiayi.

¹⁵Tu iniam Jesús ayaak:

—Ja ai, yamaikia imiatia. Yus turataram turamin asamtai, nuka mash umikminuitji, —timiayi. Tamati Juan Jesúsán imaimiayi. ¹⁶Tura imiaim, Jesús entsanmaya jiinki, nayaim uranniun wainkamiayi. Turamtai Yuse Wakani yapangma tumau Jesúsá muuken winitmiayi. ¹⁷Turamtai nayaimpinmaya chichaman antukarmiayi. Nu chichamka nuwaitai.

—Juka wína Uchiruitai, wína aneetiruitai. Niin pengker nintimtusan pujajai, —Yus timiayi.

Jesúsa nekapsamuri

(*Marc. 1.12-13; Luc. 4.1-13*)

4 ¹Yuse Wakani Jesúsán engkemtuau asa, aints atsamunam Jesús Satanás-jai nekapnaisati tusa akupkamiayi. ⁹

²Tura akupkamu asa, nu nungkanam cuarenta (40) kinta ijiarma pujus yaparmiayi. ³Tura timiá tsukamak pujamtai, Satanás nuna wainak: Watska, wína chichamrun umirtukchatpiash tusa, Jesúsán nekapsatas chicharak:

—Nekasam Yuse Uchiritkumka ¿waruka nangkamisha yaparusha pujame? ¿Warukaya kaya tepa ju jukim yuwatasam pang najantsume? —timiayi.

⁴Tamaitiat Jesús ayaak:

—Atsa, turashtatjai. Yuse chichame tu aarmawaitai: “Aints aya yutanak yutanak nintimtinauka tukeka pujuschartinuitai. Antsu Yuse chichamen nintimtinauka nekasar tuke pujusartinuitai,” —timiayi.^r

⁵Nuniangka Satanás Jesúsán ayas, pengker yaktanam Jerusalén tutainum umamiayi. Tura Yus seatai juun jea yakí wajakmanum iwiak, ⁶ataksha nekapsatas chicharak:

—Nekasam Yuse Uchiritkumka, tsekengkim yakiiya ayaarta. Yuse chichamesha tu aarmawaitai: “Yus ni awemamuri irunun amin waitmakarti tusa inartinuitai.

Turamtai nawemin kayan tukumkai tusar, Yuse awemamuri ainau ni uwejejai achirmakartatui” tu aarmau asamtai, tsekengkim yakiiya ayaarta, —timiayi.^s

⁷Tamaitiat Jesús ayaak:

—Atsa, turashtatjai. Chikich aarmausha tu aarmawaitai: “Atumi Yusri atumi Apuri asamtai, nangkamrum nekapsatarum wakerukairap,” —timiayi.^t

⁸Tamati nunia Satanás Jesúsán ataksha ayas, mura nekas juunnum iwiakmiayi. Tura nuni mash nungka aa nuna, tura nu nungkanmaya yakat ainauncha, nekas pengker aa nunasha mash inaktusmiayi.

⁹Tura Satanás chicharak:

—Ju nungka ainau mash winaruitai. Turayatun tikishmatruram: Ameka wína Apuruitme turutkumningkia, junaka mash aminu ati tusan susatatjame, —anangkak timiayi.

¹⁰Tamaitiat Jesús ayaak:

—Satanása weta. Yuse chichame tu aarmawaitai: “Atumi Yusri atumi Apuri asamtai: Ameketme Apum titaram. Turaram atumi Yusri nuke umirkataram,” —timiayi.^u

¹¹Tamati Satanás Jesúsán nepetkatat-kama tujintak ukukmiayi. Turamtai Yuse

awemamuri nayaimpinmaya Jesúsán kakamtikrartas kautkarmiayi.^v

Jesús Galilea nungkanam wekaasamuri
(*Marc. 1.14-15; Luc. 4.14-15*)

¹²Imiakratin Juankun achikiar kársernum engkewaramtai, Jesús Galilea nungkanam waketkimiayi.^w

¹³Tura Nazaretnum jea, nuningkia pujuschamiayi, antsu nunia jiinki Zabalón nungkanam, tura Neftalí nungkanmasha Capernaum yaktanam juun kucha yantamen pujustas wemiayi.^x

¹⁴Tura asa yaanchuik Yuse chichamen etserin Isaías naartin nu nungkanmaya ainaun pachis aarmia nunaka miatrusang umikmiayi. Nu aarmauka nuwaitai:

¹⁵ “Yaanchuik Israela uchiri Zabalón naartinu weari ainausha nunia Neftalí weari ainausha juun kucha yantamen puju armiai. Nu nungkasha Galilea tutayi. Nuni Israelchau ainaun untsuri pujusar, Jordán entsa majincha untsuri pujuinawai. ¹⁶Nunia aints ainaun tunau asar, teenam pujuinawa nunisarang puju armiai. Tura nuni pujuinaun yamaikia uwemratin chichaman antukar, aints paaniun wainawa nunisarang pujusarmiayi. Nu aints ainaun jakawa nunisarang teenam pujuinayat, nu paaniunka wainkarmiayi.”

Tu aarmawaitai.^y

¹⁷Nunia Jesús Yuse chichamen etsertan nangkamamiayi. Tura chichaak:

—Yus nayaimpinmaya aints ainaun inartin kinta jeatak wajasi. Tura asamtai atumi tunaari inasaram tuke Yus nemarkataram, —timiayi.^z

Namakan achiun untsukmauri
(*Marc. 1.16-20; Luc. 5.1-11*)

¹⁸Jesús Galilea nungkanam juun kucha kaanmatkarin wekaas, namakan achiun jimieran wainkamiayi. Nuka namakan achikiartas reden juun kuchanam ujugkarmiayi. Nu aintsu naaringkia Simón Pedroyayi. Nuna yachí naaringkia Andrésuyayi. ¹⁹Tura Jesús nu aintsun wainak chicharak:

—Wína nemartustaram. Tura namak achiarme nutiksarmek aints ainaun wina chichamur ujakmintrum, —timiayi.

²⁰Tamati nuna antukar, ni rederin japawar ukukiar, Jesúsjai tsaniasar wearmiayi.

²¹Tura arakchichu wekaasar, juun Zebedeo naartinuun ni uchiri Santiagojai, tura Juanjai ni rederin kanunam apainak pujuinaun wainkamiayi. Tura wainak Jesús chicharak:

—Wína nemartustaram, —timiayi.

²²Tamati Santiagosha, tura Juansha ayu tusar, kanunmaya jiinkiar ni aparinka ukukiar, Jesúsjai tsaniasar wekaasarmiayi.

Jesús aintsun untsurin nuiniarmauri
(*Luc. 6.17-19*)

²³Tura Jesús Galilea nungkanam wekaas, chikich chikich yaktanam iruntai jeanam waya, nunia aints ainaun nuiniarmiayi. Tura nuiniak: Yus aints ainaun tu inartinuitai tusa, Yusnum uwemratin chichaman etserkamiayi. Tura aints sungkurmakar pujuinaun, tura najaiminak pujuinauncha mash tsuwarmiai.

²⁴Tura asamtai Siria nungkanam pujuinausha Jesús tsuwakratmaun nekawarmiayi. Tura nuna nekawar, jainauncha tura sungkurintin ainauncha,

tura najaiminak pujuinauncha, tura iwianchrintin ainauncha, tura waurinak pujuinauncha, tura wekaichau ainauncha Jesúsnum itaarmiayi. Tura itaaramtai Jesús nu aints ainaun tsuwarmiayi.

²⁵Tura asamtai Galilea nungkanmaya ainau, tura Decápolis yaktanmaya ainausha, tura Jerusalén yaktanmaya ainausha, tura Judea nungkanmaya ainausha, tura Jordán entsa amajin pujuinausha untsuri Jesúsán nemariarmiayi.

Jesús muranam aints ainaun nuiniarmauri

5 ¹Aints timiá untsuri kaunkaru asaramtai, Jesús nu aints ainaun ukuki, mura waka nuni keemsamiayi. Turamtai ni nuiniatiri ainausha nuni wakaar, nijai tsaniasar keemsarmiayi. ²Tura keemsaramtai, Jesús nuiniatan nangkamamiayi.

Aints warastinun pachis etserkamuri
(*Luc. 6.20-23*)

³Nunia Jesús ni nuiniatirin nuiniak: “Aints ainau: Iikia nekasar Yuse Wakani yuumaji, tu nintimsar pujuinauka Yusnum tuke pujusartin asar warasartinuitai.

⁴Tura ni tunaarin nintimsar wake mesekar juutinak pujuinauka Yus ni tunaarin tsangkuramu asar warasartinuitai.

⁵Tura jampechu ainaun Yus yamaram nungkanam pujusarti timiau asar warasartinuitai.^a

⁶Tura yaparinawa nunisarang tura kitaminawa nunisarang Yuse wakeramurin najanawartas wakerinauka, Yus turuwarti tusa yaingmau asar warasartinuitai.

⁷Tura chikich ainaun wait anentin ainaunka Yuscha niincha nunisang wait anentamu asar warasartinuitai.

⁸Tura péngke nintintin ainau Yusnum jear, Yusen wainkartin asar warasartinuitai.^b

⁹Tura aints chikich ainaun: Maanitsuk asataram tinu ainaunka pachis Yus: Wína uchir ainawai timiau asar warasartinuitai.

¹⁰Tura aints Yuse wakeramurin najaninak wait wajainauka tuke nangkan-tsuk Yusnum pujusartin asar warasartinuitai.^c

¹¹Atumka wína umirtuku asakrumin, aints ainau atumin jiyatminak, tura pasé awajtaminak, atumin pachitmasar waitrinak pasé chichainamtaisha warastinuitrume.^d ¹²Yaanchuik atum akiintsurmining, Yuse chichamen etserin ainauncha nunisarang pasé awajin armiayi. Tura asar atumnasha nunisarang pasé awajtaminamtaisha, atumsha nunisrumek wait wajau asaram, nayaimpinam Yusnum pujustinuitrume. Tura asaram pengker nintimsaram pujustaram. Tura nukap warastaram,” Jesús timiayi.^e

Weea tumawaitrume tusa nuikiartamuri
(*Marc. 9.50; Luc. 14.34-35*)

¹³Nunia Jesús ataksha nuiniak: “Atumka weea tumawaitrume. Weesha tuke wakeruktinuitai. Tura wee michumangka ðitiur ataksha yapaktinuita? Wee michumangka, warfksha itiuirkachmin asamtai, aints ainau nuna aanum aints wekaatainam japawar ukukmiaun nawejai najainawai. Turamu asaramtai atumsha Yus umirtsuk pujakrumningkia, Yuska atumin wee michu aanum japamua nunisang japrama ukurmaktinuitrume.

¹⁴“Atumka ju nungkanam paaniuwa nunisrumek pujau asaram, aints ainaun paan nintimtikratnuitrume. Atumka

yakat muranam aa nusha paan wainkat-nuitrume. Tura asamtai atumsha yakta nunisrumek anumkachminuitrume.^f

¹⁵Aints ainau kantiin akawar chingnan-maka engkeenatsui, antsu yakí kentsar jeanam pujuinaun mash paan wainmamtikinawai. ¹⁶Atumsha nunisrumek nekas pengker aa nu turau asaram, aints ainau atumi pengker pujamurmin waitmakar, Yuska juuntaitai tiarat, tu nintimsaram pujustaram,” Jesús timiayi.^g

Moisésa chichamen pachis etserkamuri

¹⁷Nunia Jesús ataksha nuiniak:

“Atumka wina pachitsaram: Nuka Moisésa chichamen sakartas taawitai, tuuka nintimrairap. Tura Yuse chichamen etserin ainau armaaurincha sakartas taawitai, tuuka nintimrairap. Wikia nunaka turashtatjai. Antsu Moisésa armaaurin tura Yuse chichame etserin ainau armaaurincha nekas umiktasan taawitjai. ¹⁸Nunasha tajarme: Nayaimpisha tura nungkasha meseatsaing, Moisésa armauringkia pengké kichkisha yapajinaiyashtinuitai. Antsu mash aarmawa nunisang umiktinuitai.^h ¹⁹Tura aints Moisésa chichamen pengké tuupchincha pachischauka, tura chikich ainan nuiniak: Nu chicham pachischat-nuitrume tauka Yusnum jea, nekas mianchau atinuitai. Antsu Moisésa armauringkia umirak, tura chikich aints ainan nuiniak: Nu chicham umirkatararam tauka Yusnum jea nekas juun atinuitai. ²⁰Nunia atumka fariseo ainan tura Moisésa chichamen nuikiartin ainausha nangkamasrumek pengker pujachkurmeke, Yuse pujutirinka wayaashtinuitrume,” Jesús timiayi.

Kajernaikiamun pachis etserkamuri

(*Luc. 12.57-59*)

²¹Nunia Jesús ataksha nuiniak:

“Yaanchuik juun ainan Moisésa chichamen etserinak: Aints maawairap. Antsu aintsun maunaka yapajikiartinuitai tiarmiayi. Nu tamauka antukmiarume.

²²Tura wainiatnak wikia atumin tajarme: Aints ni yachiin kajerak pujakka, wait wajaktiniun jukitnuitai. Tura ni yachiin suwirpiaku jiis, pasé chichaman chichau-naka junia apu ainausha wait wajaktiniun susartinuitai. Tura aints kichan kajerak katsekeak pujauka ji nekas kajintrashtin-num engkema tuke wait wajaktinuitai.ⁱ

²³“Atumka Yus maaketai titasrum, Yusen waring achat susatasrumsha ni jeen wayaakrumningkia, nuni wayaaram, atumi yachí kajertaminak pujuinau aneakrumka, ²⁴Yus susatasrum wakerarme nuka ukukrum, atumi yachí jiistaram. Tura nijai chichasrum tsangkurnairatararam. Nuniangka waketkiram, Yus susatasrum wakerarme nuka Ni susatararam.

²⁵“Atumka tumaashitkurmeke, chikich aints atumin: Akirkata tusa, apu pujamunam jeetamiartas achirmakaramtaikia, nijai tsaniasrum jinta weakrum chicham iwiatararam. Nu turachkurmeke, apu achirmak suntar ainan akupturmak: Ju aints kársernum engkeatararam titinuitai.

²⁶Nekasan tajarme: Atumi tumaashri mash metek akiimiatsuk pujakrumka, nuniangka pengké jiinkishtinuitrume,” Jesús timiayi.^j

Aishrinuka takaschatnuitai timiauri

(*Marc. 9.43,47*)

²⁷Nunia Jesús ataksha nuiniak:

“Yaanchuik juun ainan chichaman

f 5.14 (Juan 8.12;9.5) **g** 5.16 (Marc. 4.21-23; Luc. 8.16-17; 11.33; 1.Ped. 2.12)

h 5.18 (Luc. 16.17) **i** 5.22 (Ex. 20.13; Lev. 24.17; Deut. 5.17) **j** 5.26 (Yus tunau jiistin kinta jeatsaing, atumi tunaaringkia inaisaram tsangkuturra titaram, taku timiayi.)

etserinak: ‘Nuwa aishrinujai tsanirmawai-rap,’ tinamuka antukmiarume.^k ²⁸Tura wainiatnak wikia atumin tajarme: Aints nuwan jiis, nijai tsanitan wakerau asa, ni nintijai yanchuk tunaun turawai.

²⁹“Tura asamtai atumi jiisha atumin tunau nintimtikramataikia, atumi jii untsurnumanini kut kuinkawa nunisrumek tunaarum japaram ukuktaram. Jii kichik mengkaku wainiatrumek, nayaimpinam tuke pujustinka timiá pengkeraitai. Antsu mai jiintukka namangmesha pengker ayat, ji kajintrash-tinnum engkematnuka nekas pengké paseetai. ³⁰Tura untsur uwejmijai tunau takastarum wakerakrumka, tunau takasai tusaram, atumi uweje met charawa nunisrumek tunaarum japaram ukuktaram. Uwej kichik met charukmau wainiatrumek, nayaimpinam tuke pujustinka timiá pengkeraitai. Antsu namangmeka pengker ayat, mai uwejtukka ji kajintrash-tinnum engkematnuka nekas paseetai,” Jesús timiayi.^l

Nuwa japamun pachis etserkamuri

³¹Nunia Jesús ataksha nuiniak: “Tura yaanchuik juun ainau etserinak: ‘Aints nuwarin ukuktias wakerakka, papin aar: Nuwarun ukuajai tusa, nu papinka nuwarin susatnuitai,’ tinu armiyai.

³²Antsu wikia tajarme: Nuwari kichjai pujachu wainiat, aints ni nuwarin ukuakka, chikich aintsun ninumkamtai, nu aintska nuwarin ukukin asa, nuwarin tunau takamtikui. Tura nuwa japamun nuwatkausha nunisang tunau wajawai,” Jesús timiayi.^m

Yusjai tajai nangkamrikia tichatnuitai

³³Nunia Jesús ataksha nuiniak: “Yaanchuik juun ainau etserinak:

‘Atumka ii Apuri naarin pachisrum: Yusjai tajai, nunaka turatatjai, tarume nuka umitskeka inaisairap,’ tinu armiyai. Nu tamauka antukmiarume. ³⁴Tura wainiatnak wikia atumin tajarme: Nangkamrumka Yusjai tajai, pengké tiirap. Yusjai tajai, nayaimpinmasha tuke nunisang au asamtai, wisha nunisnak waitrutsuk chichajai takurmeka, nayaimpisha Yuse pujutiri asamtai nusha tiirap. ³⁵Tura Yusjai tajai, ju nungkasha tuke nunisang au asamtai, wisha waitrutsuk chichajai takurmeka, ju nungkancha Yus wainu asamtai nuka tiirap. Tura Jerusalén yaktasha pachisrum: Jerusalén nekas Juun Apu yaktari asamtai, wisha waitrutsuk chichajai, Yusjai tajai tiirap.ⁿ ³⁶Atumka jemperuktaj takurmesha, atumkeka jemperukchatnuitume. Tura atumi jemperi ataksha tuke shuwin ati tayatrumek nusha turachminuitume. Tura atumi muuken pachisrum: Nekasnak waitrutsuk Yusjai tajai tiirap. Tura asaram atumek nintimsaram: Wi wakeraknaka nuna turatatjai titasrum: Yusjai tajai tiirap. ³⁷Tura atumin ininminamtaikia: Ja ai titasrum wakerakrumka tupnik: Ja ai titaram. Antsu atsa titasrum wakerakrumka tupnik: Atsa titaram. Nuna nangkamasrumek: Yusjai tajai takurmeka nuka paseetai,” Jesús timiayi.^o

Yapaijkiatnun pachis etserkamuri

(Luc. 6.29-30)

³⁸Nunia Jesús ataksha nuiniak: “Yaanchuik juun ainau Moisésa chichamen etserinak: ‘Aints ijutminak jiimin mesturmaramtaikia, amesha nunismek yapaijkum ni jii mesturta. Tura ni ijutminak naimin akartamkamtaikia, amesha nunismek

yapajkum ni naisha akarkata,' tinu armiyai. Atumka nu etsermau antukmiarume. ³⁹Antsu wikia atumin tajarme: Pasé aints ainau yapajtsuk asataram. Antsu aints atumi yapiin awaturminamtaisha, atumka yapajtsuk atusha awatita tusaram tsangkat-kataram.^p ⁴⁰Aints tumaashnum akirkata tusa, atumi wejmakri jurutramataikia, atumi punchurisha jukiti tusaram tsangkat-kataram. ⁴¹Tura aints atumin inatmak: 'Ju mermaka kichik kilómetro entsatrukta,' turamataikia, jimiarchik kilometroscha pengker nintimsaram nuka entsatkataram. ⁴²Tura aints: Yuumamur surusta turamataikia, ni yuumamuri surittsuk susataram. Tura aints atumin: Warimesha tsangk-trukta turamataisha, surittsuk ikiastaram," Jesús timiayi.

Nemasem aneeta timiauri

(Luc. 6.27-28, 32-36)

⁴³Nunia Jesús ataksha nuiniak: "Yaanchuikia aints ainau chichainak: 'Ame irutkamurmek aneeta. Antsu nemasmeka suwirpiaku jiista,' tinu armiyai. Atumka nu tamau antukmiarume. ⁴⁴Antsu wikia tajarme: Atumi nemase ainau aneetaram. Tura atumin pasé chichartaminamtaisha, Yus yainmakti titaram. Tura atumin suwirpiaku jiiirminamtaisha pengker awajsataram. Tura atumin jiyatminamtaisha, tura pasé awajtaminamtaisha, nu aints pachisrum Yus seattiarum.^q ⁴⁵Tu pujakrumka atumi Apaachiri nayaimpinam puja nuna wakeramuri umiu asaram, nekasrum ni uchiri ainarme. Yus aints ainaun mash wait anentau asa, pasé aints ainamunmasha, tura pengke aints ainamunmasha tsaa tsantrati tusa tuke tsangkatawai. Tura Yusen umirin ainamunmasha, tura Yusen umirchau ainamunmasha yumi jiturti tusa

yumincha tuke akupawai. ⁴⁶Tura asamtai atumin anenminak pujuinau nuke aneakrumningkia, ¿Yus atumin: 'Nekasrum pengke aintsuitrume,' turamta-tuak? Atsa. Antsu kuikian juu ainau tunau ainayat, niin aneenauncha nunisarang aneenawai.^r ⁴⁷Tura atumi weari ainaujaing chichaakrumka ¿Yusen umirchau ainau nuna nangkamasrumek pengker nintimsarmek pujaram? Atsa, Yusen umirchau ainausha ni weari ainaujai chichainawai. ⁴⁸Tura asamtai atumi Apaachiri nayaimpinam puja nujai metek nekas pengker ataram," Jesús timiayi.^s

Pengker aa nu turataram timiauri

6 ¹Nunia Jesús ataksha nuiniak: "Atumka: Aints ainau wina pengker turamurun waikarat tu nintimsarmeka pengker aa nuka turuwairap. Tu nintimsaram chikich ainaun pengker awajsamin wainiat, atumi Apaachiri nayaimpinam puja nuka atumin pengkerka awajtsamsashtinuitrume.^t

²"Tura asamtai yuuminak pujuinau yaingkrumsha, chikich ainausha antukarat tusaram etserkairap. Antsu aints ainau wina mash jiisar: Pengke aintsuitme, turutiarat tu nintimsar, iruntai jeansam wajasar tura jinta wekaasar: Yuuminak pujuinaun yayaajai, tusar etserinawai. Antsu wikia nekasam tajarme: Chikich ainau nuna jiisar: Nuka pengke aintsuitai tinau asaramtai, Yuska nu aintsna pengkerka awajtsashtinuitai. ³Tura asamtai yuuminak pujuinaun yuumamuri susamsha: 'Yuumamurin susamjai,' tutsuk, aints kichkisha ujakairap. ⁴Antsu takamtaik uukrum chikich ainau yuumamuringkia susataram. Turakrumningkia atumi Apaachiri mash aintsun

wainua nuka atum turamuncha wainak, atumin pengker awajtamsatnuitrume,” Jesús timiayi.

Yus seatai nuikiartamu

(Luc. 11.2-4)

⁵Nunia Jesús ataksha nuiniak: “Tura Yus seakrum, anangkartin ainau Yusen seaina nunisrumka Yuska seairap.

Anangkartin ainau wina jiirsarat tusar, iruntai jeanmasha tura aints untsuri wekaatainmasha wajasar Yusen seainawai. Nekasan tajarme: Aints nuna jiisar: Nekas pengke aintsuitai, tu nintimtinau asaramtai, tu seau ainaunka Yuska pengkerka awajsachartinuitai.

⁶Tura Yus seakrum, aints atsamunmasha atumi kanutirincha atumek pujusrum, atumi Apaachiri Yus seataram. Turakrum-ningkia atumi Apaachiri mash aintsun wainua nuka atum turamuncha wainak, atumin pengker awajtamsatatrume.”

⁷“Yus seakrum nangkamrum nukap chichaj pujuirap. Nuka Yusen nekachu ainau tuminawai. Nuka ningki nintimsar: Wikia nukap chichaamtaikia Yuska anturtawapi, tu nintiminawai. ⁸Antsu nu aints ainau Yusen seainawa nunisrumka Yuska seairap. Atumka seatsrumning, atumi Apaachiri Yus atum yuumamuncha mash nekawai. ⁹Tura asamtai atumka Yus tu seataram:

Ii Apaachiri Yus,
nayaimpinam pujame nu
ii nekas Apaachirinme. Aints mash
amin naarmin pachisar:
Ametetme pengkeram
turamiarti.

¹⁰ Ame wakeramuram nayaimpinmasha tura nungkanmasha tuke ati.

¹¹ Ju kintaka ii yutairi yuumaji nu sukartusta.

¹² Tura chikich aints
iin pasé awajtamsaru ainau
tsangkurau akurningkia,
ii tunaarisha iincha nunismek
tsangkukratkata.

¹³ Tura tunaanum jearai tusam
japkartuam ukukratkiip,
antsu iwianchnumia uwemtikiar-
tukta. Maaketai.

Tu Yuska seataram.”

¹⁴“Nuniasha tajarme: Atumin pasé awajtaminausha tsangkurakrumningkia, atumi Apaachiri nayaimpinam puja nusha nunisang atumin tsangkutramratatrume.

¹⁵Antsu atumin pasé awajtaminausha tsangkurchakrumningkia, atumi Apaachiri nayaimpinam puja nusha atumin tsangku-tramrashtatrume,” Jesús timiayi.”

Ijarmar pujustinun pachis etserkamu

¹⁶Nunia Jesús ataksha nuiniak: “Ataksha tajarme: Atum Yus seatasrum ijarmarme-sha wake mesekairap. Anangkartin ainau: Aints wina jiisar: Ijarmayapi turutiarat tusar tuminawai. Tura asamtai wikia nekas tajarme: Chikich aints: Pengke aintsuitai tu nintimtursarat tusar, ijarmawar pujuinaunka Yuska pengkerka awajsashtinuitai. ¹⁷⁻¹⁸Antsu atumka ijarmaram pujakrumsha, aints nekarawai tusaram, atumi yapi nijarum pengker temashmiartaram. Aints ijarmayapi turutiarai tusaram nuka turataram. Chikich aintska nekarminachu wainiat, atumi Apaachiri Yus mash aa nuna nekau asa, atumin pengker awajtamsatatrume,” Jesús timiayi.

**Kuikiartin wajastaj tu nintimtsuk
asaram timiauri**

(Luc. 12.33-34)

¹⁹Nuniasha Jesús ataksha chichaak:
“Wikia nunasha tajarme: Ju nungkanam

warinchu ainau sengka wári mesratin asaramtai, tura warinchusha mengkakar-tin asaramtai, tura kasa ainau jea wayaawar kasamkartin asaramtai, kuik kiauangkairap. ²⁰⁻²¹Antsu nayaimpinmaka warinchu atsuinau asaramtai nuningkia mamurchatnuitrume, tura warinchurmesha mengkakashitnuitai. Tura kasa ainau kasamkartas wayaachartnuitai. Tura asamtai atumka nukap wakerarme nuka atumi nintijai tuke nintimsaram pujarme. Tura asaram ðitiurak nekasan nayaimpinam jeataj? tu nintimsaram pujustaram,” Jesús timiayi.^x

Aintsu jiingkia kantii kapaawa nunisketai timiauri

(Luc. 11.34-36)

²²⁻²³Nunia Jesús ataksha nuiniak: “Atumi jiingkia kantii kapaawa nunisketai. Atumi jii pengkeraitmataikia, paan wainmaktinuitrume. Antsu atumi jii paseetmataikia, teenam pujawa nuniske-trume. Atum waintrume nuka atumi nintijai nintimu wearme. Atumi ninti pengkeraitmataikia paan nintimratnuitrume. Antsu atumi jiingkia pengker ayat, atumi ninti paseetmataikia, atumsha teenam pujawa nunisrumek nintimu-wearme. Atum tu nintimsaram pujakrumka, nekasrum timiá pasé pujarme,” Jesús timiayi.

Apu jimiar tenap umirkashtnuitai timiauri

(Luc. 16.13)

²⁴Nunia Jesús ataksha nuiniak: “Apu jimiar metek nintimsuk pujuinaunka aints kichkisha umirkartatkama tujintinawai. Antsu kichnaka nakitak, kichan aneetnuitai. Tura kichkin umirak kichnaka pachischatnuitai. Tura asamtai atumka warinchu ainau aneakrumka, aya nuke aneetaram. Tura Yus aneakrumka,

aya Yusek aneetaram. Antsu mai aneakrumka nuka yumtinnuitai,” Jesús timiayi.

Yus ni uchirin wainui

(Luc. 12.22-31)

²⁵Nunia Jesús ataksha nuiniak: “Tura asamtai tajarme: Warinak yuwataj, tura warinak umurtaaj, tura warinak entsartaj tusaram, nuke nintimsarmeka pujusairap. Yus tuke iwiaaku pujustaram tusa, pujutan suramu asa, atumi yutairincha, tura atumi entsatirincha suramsatatrume. ²⁶Chingki yakí nanamin ainau itiu pujuinawa tusaram nintimrataram. Nuka araknaka arainatsui. Tura arakan juukar jeanmasha ukuinatsui. Tu pujuinawainiat, atumi Apaachiri nayaimpinam puja nuka ni yuwatniurin suwawai. Yus atumin chingkin nangkamasang nukap anenmau asa ðatum yuumamunka itiu suramsashting? ²⁷Tura utsuri kita pujustaj takurmesha kichik horaksha inangkakchamnawaitrume.

²⁸“Tura ðwarukaya atumi entsatiri pachisrum: Warinak entsartaj tusaram, nangkamrumsha nintimsarmesha pujarme? Yangkur ainau nangkamiar yangkurkar wajainau nintimrataram. Nuka takakminatsui. Tura uruchnasha kutaminatsui. ²⁹Tura apu Salomón yaanchuik pujumia nuka entsatirin timiá pengker entsariat, yangkura nuniskeka timiá pengkerka iwiamarmachmiayi, tusan tajarme. ³⁰Nupaa ainau yamaikia shiiram au waininayat, kashin aints charukar jinum epeawartinun wainiat, Yuska shiirman iwiamarmatikin asa, atumnasha yangkuran nangkamasang entsatincha shiirman suramsatnuitrume. Tura asamtai ðwarukaya Yuska nekasrum nintimsurme? ³¹Tura asaram warinak yuwataj, tura warinak umurtaaj, tura

warinak entsartaj tusaram napchau nintimtsuk asataram. ³²Yusen nekachu ainau tuke inatsuk tu nintimsar pujuinawai. Antsu atumi Apaachiri nayaimpinam puja nuka atumi yuumamurmin mash nekau asantai, tuuka nintimtsuk asataram. ³³Antsu Yuse wakeramuri tura ni nekas pengker awajtamsamuri nuwá eemkaram nintimratarum. Turakrumningkia atumi yuumamurin mash suramsatatrume. ³⁴Tura asantai kinta tsawaatsaing eemkaram: ¿Kashin wi warukatjak? tuuka nintimtsuk asataram. Kashin yumtin atin wainiatrum, yamaikikia nintimtsuk pujustaram. Chikich kinta yumtin amataikia, Yuska winaka waitui, tu nintimsaram pujustaram,” Jesús timiayi.ʸ

**Chikich ainau pachisrum paseeka
chichartsuk asataram**

(*Luc. 6.37-38, 41-42*)

7 ¹Nunia Jesús ataksha nuiniak: “Yus winaka wait wajaktiniun surusai tusaram, chikich aints pachisrum pasé chichakairap. ²Atumka chikich ainau pachisrum pasé chichaakrumningkia, Yuska atumin wait wajaktiniun suramsatnuitrume. Tura atum chikich ainau pengker awajkurminkia Yuscha nunisang atumin pengker awajtamsatatrume. ³Tura chikich aints tunaun jumchik takau asantai, atumka tunau nukap takautiatrumsha ¿waruka nu aintcha tunaawaitai tarume? Tunau pachisrum chichaakrumka, aints ni jiin tsetsee juun engketu wainiat, nunaka waitsuk chikich aintsu jiin tsetseen tuupchin engketun wainak, nuna jijij pujurua tumawaitrume. ⁴Tura atumi tunaari nukap aa nu nintimtsuk pujayatrum ¿chikicha tunaari jumchik aa nuka pachisrumsha atumsha itiuur chichastarmek? Tu pujakrumka aints ni

jiin tsetsee juun engketun wainiat, nunaka waitsuk, chikich aintsu jiin tsetseen tuupchin engketun wainak: ‘Tsetsee jiimin engketun ashiitjai. Wait aneasam tsangkatrukka,’ tu chichaawa tumawaitrume. ⁵Tu chichaakrumka chikich ainau anangkuram: ‘Auka péngke aintsuitai turutiarat,’ tu nintimsaram pujarme. Tura asaram nuwá eemkaram atumi tunaari nukap aa nu inaisaram, nuniangka paan nintimraram, chikich aints chicharkuram: Tunaari jumchik aa nuna inaisati tusaram chichastinuitrume. Tu pujakrumka aints nuwá eemak ni jiinian tsetsee juuntan ashii japa, nunia paan jiiimias, chikich aintsu jiinia tsetsee tuupchin ashiawa tumawaitrume.

⁶“Nuniangka ataksha tajarme: Aints Yuse chichamen nakitinauka Yuse chichamengka ujakairap. Antsu nu aints ainau Yuse chichame ujaakrumningkia, nuka atumin kajertamkatnuitrume. Nu aints ainau yawaa kajeawa nunisarang ainawai. Yawaa kajeu yutan pengker aa nunaka suamaitiat, aintsun esaitas wakerawai. Tura Yuse chichamen antutan nakitinau kúchia nunisarang ainawai. Kúchi nintinchau asar, shaakun najarar tstringmin ainawai. Tura asantai kúchi ainau shaak akik aa nuka susashtinuitai,” Jesús timiayi.

Yus tuke seataram timiauri

(*Luc. 11.9-13;6.31*)

⁷⁻⁸Nunia Jesús ataksha chichaak: “Aints warinak seamina nunaka juwinawai. Tura warinak eaina nunasha waininawai. Tura winájai tinaunaka waitin uratinaawai. Tura asantai tuke Yus seataram. Turakrumningkia atumi yuumamurmin suramsatnuitrume. Tura Yuse wakeramurin nekaatasrum wakerakrumningkia, Yuska nunasha nekantikramatnuitrume.

Tura Yus pujamunam jeatasrum wakera-
krumningkia, Yuska waitin
uratratinuitrume.

⁹“Nusha nintimrataram. ¿Yaachia
uchiri yaparak yurumkan seamaitiat
kayan sua? ¹⁰Tura ¿yaachia uchiri
namakan seamaitiat napin sua? ¹¹Atumka
tunau ayatrume, nekasrum atumi uchiri
pengker aa nuke suwarme. Atumka Yus
seakrumningkia ¿atumi Apaachiri
nayaimpinam puja nu nekas pengker asa,
itiur suritramkating?”

¹²“Aints ainau wina pengker awajtusa-
rat tusaram nu wakerau asaram, atumsha
nunisrumek chikich aints ainausha
pengker awajsataram. Nu chichamnaka
Moiséscha, tura yaanchuik Yuse
chichame etserin puju armia nusha mash
umiktaram tusar aararmiayi,” Jesús
timiayi.^a

Waiti tuupchin pachis etserkamuri

(Luc. 13.24)

¹³⁻¹⁴Nunia Jesús ataksha chichaak:
“Wikia ataksha tajarme: Yusnum
pujustasrum wakerakrumka, waiti
tuupchinam wayaataram. Waiti tuupich
asamtaí, aints ainau nuni wayaawar, jinta
tsererchinam tuke iwiaku pujustinum
weenauka untsurinchuitai. Antsu chikich
waiti wangkaram asamtaí, aints nuni
wayaawar, tungkajin jintanam wait
wajaktinum jeartinka untsurintai,”
timiayi.^b

Anangkartin ainaun pachis etserkamuri

(Luc. 6.43-44)

¹⁵Nunia Jesús ataksha chichaak: “Wikia
nunasha tajarme: Wait chichaman etserin
ainau nangkamiar: Wikia Yuse
chichamen etsernuitjai tinauka wina
anangkruwai tusaram aneartaram. Nuka

uwijaya nunisarang winitraminayat,
yawaa kajeawa nunisarang atumin
mestamrartas winitramiartinuitai.^c

¹⁶Atumka numi neré jiiisrum: ¿Wari
numita? tusaram nekaatnuitrume. Tura
asaram nu aints ainau turamurisha
jiiisrum: ¿Wari aintsiki? tusaram
nekaatnuitrume. Numi jangkirtincha
jiiisrum, uva yurangkenka juukchamna-
waitrume. Tura higo ainau
narajnumianka juukchamnawaitrume.
¹⁷Numi nekas pengker ainia nuka neren
pengkeran nerenawai. Antsu numi pasé
ainauka neren paseen nerenawai. ¹⁸Tura
numi pengker ainauka paseenaka
nerenatsui. Tura numi pasé ainauka
pengkernaka nerenatsui. ¹⁹Tura numi
nere pasé amataikia, aints ainau numin
ajakar kanawen jinum epeenawai. ²⁰Tura
aints ainau numi neren jiiisar: ¿Wari
numiki? tusar nekainawa nunisrumek
atumka aints ainau turamurisha jiiisrum:
¿Wari aintsiki? tusaram nekaatnuitrume,”
Jesús timiayi.^d

**Aints mash nayaimpinmaka
jeachartinuitai timiauri**

(Luc. 13.25-27)

²¹Nunia Jesús ataksha chichaak: “Wikia
nunasha tajarme: Aints ainau nangkamiar:
‘Apurua, Apurua,’ turutinauka mash Yuse
pujutirin nayaimpinmaka jeachartinuitai,
antsu wina Apaachir nayaimpinam puja
nuna wakeramurin najanin ainauka ni
pujutirin jeartinuitai. ²²Nungka amukatin
kinta jeamtaí, aints untsuri wina chichar-
tinak: ‘Apurua, Apurua, iikia amin
pachisar ami chichamim etsernuyaji, tura
ami naaram pachisar aintsnumia iwianch
ainau jiiirnuyaji. Tura ami kakarmarmijai
wainchati takatcha takakmasmijai,’
turutiartinuitai. ²³Tura wainiatnak wikia

ayaakun: ‘Atumin pengké wainchawait-jarme. Tunau takau ainautiram, winíangka jiinkiram wetaram,’ titinuitjai,” Jesús timiayi.^e

Jea jimiar jeamkamun pachis etserkamuri

(*Marc. 1.22; Luc. 6.47-49*)

²⁴Nunia Jesús ataksha chichaak: “Wikia nunasha tajarme. Aints wína chichamrun antuk, tura miatrusang umirtak pujauka aints jea jeamtan nekau nungka pisu amanum jea jeamkamua tumawaitai.

²⁵Tura yumi nukap jituriat, tura entsasha nujangkruayat, tura nasesha kakarman nasentiat, nu jea nungka pisunam jeamkamu asamtai, yumpungatkama tujinkatnuitai. ²⁶Tura aints wína chichamrun antukiat, umirtutsuk pujauka aints nintinchau jean yaikminam jeamua tumawaitai. ²⁷Tura yumi nukap jitak, entsasha nujangkrak, tura nasesha kakarman nasentak nu jeanka pukuukti-nuitai. Turamtai nu jeaka mengkakatnuitai,” —timiayi.

²⁸⁻²⁹Tura chichas umisamtai, Moisésa chichame nuikiartin ainaujai metekchau, antsu Yuse kakarmarijai nuikiartau asamtai, aints Jesús a chichamen antukaruka nukap nintimrarmiayi.^f

Kuchapruku tsuwarmauri

(*Marc. 1.40-45; Luc. 5.12-16*)

8 ¹Jesús nu muranmaya wangkenmatai, aints ainau untsuri nemariarmiayi. ²Turinai aints kuchapruku tari, Jesús wekaamunam tikishmatar seak:

—Apu, ame wakerutakmeke wína tsuwaramnawaitme, —timiayi.

³Tamati Jesús ni uwejejai kuchapruku namangken takas:

—Ja ai, wakerajme. Pengker wajasta, —timiayi. Tamati nu tamaujai metek

tsaar pengker wajasmaiayi. ⁴Turamtai Jesús chicharak:

—Antukta. Ami turunamuram pengké etserkaip. Antsu sacerdotenam weta. Nuni weme namangkem pengker tsuwamaru asam inakmasta. Tura aints ainau mash pengker wajasmaurun nekaawarat tusam, Moisés tímia nunismek turata, —timiayi.^g

Apu inatiri tsuwaramuri

(*Luc. 7.1-10*)

⁵Tura ukuki, Capernaum yaktanam jeamtai, Romanmaya kapitán tari, Jesús an seak:

⁶—Apu, wína inatir jaawai. Pengké nantakchamin kakarman najaimiak jearun juutu tepawai, —timiayi.

⁷Tamati Jesús chicharak:

—Wikia tsuwartasan winitatjai, —timiayi.

⁸⁻⁹Tamaitiat kapitán ayaak:

—Apu, wikia judíocho asan, ameka wína jearun wayaata tichamin nintimjai. Wikia suntara apuri umirnuitjai. Tura wikia suntar ainaun inau asan, kichan: Weta, tama nusha weawai. Tura kichan: Winiti, tama nusha winawai. Tura wína inatirun takatan inamka, miatrusarang umirtinawai. Tura asamtai amesha nunismek apu asam, juni wajasam chichaamning inatirka tsaartatui, —timiayi.

¹⁰Tamati Jesús nuna antuk, nukap nintimias niin namarinaun chicharak:

—Nekasan tajarme. Ju aintsua nunisarang Yus nekas tujinkachuitai tinaunka kichkisha wainkachuitjai.

¹¹Nunasha tajarme: Israel ainau untsuri tsaa taakmanumanini, tura tsaa jeamunmaninisha Yuse pujutirin nayaimpinam kaunkar Abrahamjai, tura Isaacjai, tura Jacobjaisha iruntrar yuwaartinuitai.

¹²Antsu Israela weari ainau Yuse pujutirin wayaamin ainayat, wína nekasampita turutchau asar, nekasar teenam japar ukukmiawa nunisarang wait wajakartinuitai. Tura asar nuni juutinak, nain esainiar katertinak matsamiartinuitai, —Jesús timiayi.^h

¹³Tura kapitanin chicharak:

—Jeemin yamaikia waketkita. Ame wína inatir nekasampi tsuwartinuitme turutu asakmin nuke ati tajame, —Jesús timiayi. Tamati ni tamaujai metek kapitani inatiri pengker wajasmiai.

Jesús Pedro tsatsarin tsuwarmauri
(*Marc. 1.29-31; Luc. 4.38-39*)

¹⁴Nunia Pedro jeen waya, Jesús Pedro tsatsarin tsuweak peaknum tepaun wainkamiayi. ¹⁵Tura nu nuwan wainak Jesús uwejen achikiam, tsuwearurin michatramiayi. Tura michatar wajaki, irasartas taarun yurtan nangkamamiayi.

Jau ainaun untsuri tsuwarmauri
(*Marc. 1.32-34; Luc. 4.40-41*)

¹⁶Tsaa jeamtai iwianchrintin ainaun, tura jau ainauncha untsuri Jesúsnum itaarmiayi. Tura itarim Jesús aya chichasang iwianch ainaun jiikmiayi. Tura jau ainau itamuncha mash tsuwarmaiayi. ¹⁷Yuse chichame etserin Isafas yaanchuik chichaak: “Ii pimpirmaurinha tura ii najaimiamurinha ningki jurutramkimiaji,” tímia nuna umiktas Jesús aints ainaun tsuwarmaiayi.ⁱ

**Jesúsán nemartan wakerinaun
chicharkamuri**
(*Luc. 9.57-62*)

¹⁸Aints ainau tímia untsuri tentakaram, Jesús ni nuiniatiri ainaun akatar akupak: —Tumajin katingmi tusaram kanu umistaram, —timiayi. ¹⁹Tamati Moisésa

chichame nuikiartin tari Jesúsán chicharak:

—Nuikiartinu, ame tuning wekaasatme nunisha amin nemarsatjame, —timiayi.

²⁰Tamati Jesús ayaak:

—Kujancham ainau waanam kaninawai. Tura chingki ainausha keemtairin keemsar kaninawai. Antsu wikia Yus akupkamutiinak, aints ayatun kanurmintruka atsawai, —timiayi.

²¹Nunia chikich nemarnuri Jesúsán chicharak:

—Apuru, jeemin waketkita tusam tsangkamrukta. Antsu wína apar jakamtai, iwiarsan umisan nuniangka amincha nemarsatjame, —timiayi.

²²Tamati Jesús ayaak:

—Atsa, wina umirtukcharu ainau jakawa nunisarang pujuinau asar, ni weari jakaramtai iwiarsarti. Antsu ameka yamaik wína nemartusta, —timiayi.

Kucha tamparaun miaku awajsamuri
(*Marc. 4.35-41; Luc. 8.22-25*)

²³Nunia ukuki Jesús kanunam engkemramtai, ni nuiniatiri ainau nijai tsaniasar engkemawar kuchen katiniarmiayi. ²⁴Tura katinai nase kakarman nasenmiayi. Timia nasenmatai, yumi kanunam yaranak piakmiayi. Turamaitiat Jesúska kanur tepemiayi. ²⁵Kanuramtai Jesúsán shintinak:

—Apuru, uwemtikiaurturta. Ukantatji, —tiarmiayi.

²⁶Tinamtai Jesús ayaak:

—¿Waruka timiatsha shamarme? ¿Waruka Yus nekasampita tutsuksha? —timiayi.

Nunia nantaki nasencha tura kucha tamparauncha chicharkamiayi.

Turamtai nasesha, tura kuchasha miaaku wajasmiai. ²⁷Turamtai kanunam engkemrar pujuinau nintiminak:

—¿Ausha warí aints asamtaiya nasesha tura tampaasha umirinawa? —tunaiyarmiayi.

Iwianch jiikir kuchinam engkeamuri

(Marc. 5.1-20; Luc. 8.26-39)

²⁸Nunia Jesús ni nuiniatiri ainaujai kuchar katingkiar, tumajin jear Gadara nungkanam nujamkar kanunmaya jiinkiaramtai, jimia aints jakau iwiartainumia jiinkiar Jesúsnum winiarmiayi. Nu mai iwianchrintin timiá kajeu asamtai, aints ainau nuke nangkamatnasha shamiarmiayi. ²⁹Tura asaramtai nu jimia iwianchrintin kakarar untsuminak:

—Jesúsa, Yuse uchiriyá ¿waruka iincha waitkartuktasmesha winame? Ii wait wajaktin kinta jeatsaing, ¿waruka iincha wait wajaktinnum akupkartuktasmesha junisha winame? —tiarmiayi.

³⁰Tinamtai arakchichu kúchi untsuri shushungminak wajaarmiayi. ³¹Turinamtai iwianch ainau nu aintsu namangkenia Jesúsán seainak:

—Ju aintsnumia jiikratkumka, au kuchinam engkematarum tusam akupkartukta, —tiarmiayi.

³²Tinamtai Jesús ayaak:

—Ayu, nuni engkematarum, —tamati iwianch ainau nu aintsnumia jiinkiar kuchinam engkemawaramtai, kúchi ainau wakenam mash pisarar, kucharum ayangkar kajingkiarmiayi.

³³Tuminamtai kuchi wainin nuna wainkar, shamkar ampukiar yaktanam jear, ni wainkamurin, tura iwianchrintin turunamurinja mash etserkarmiayi.

³⁴Tura etserinamtai, nunia aints ainau mash ni yaktarinia jiinkiar, Jesúsnum jear niincha jiisar chicharinak:

—Wait aneamam, ii nungkarinia jiinkim weta, —tusar Jesúsán searmiayi.

Pimpirun tsuwarmauri

(Marc. 2.2-12; Luc. 5.17-26)

9 ¹Tu tinam Jesús nunia aints ainaun ukuki, kanunam engkema tumajin kating ni pujamu yaktanam wemiayi.

²Tura nuni jeamtai aints pimpirun Jesús

pujamunam itaarmiayi. Tura pimpirun itaarmia nuka: Jesús nekasampi tsuwara-tatua, tu nintimainau asaramtai, Jesús nuna nekaa pimpirun chicharak:

—Natsachi, napchauka nintimtsuk asata. Tunaarumka yamaikia tsangkura-muitme, —timiayi.

³Tamati Moisésa chichame nuikiartin ainau nu chichaman antukar napchau nintiminak: “¿Juka nangkami Yusetjai tumamtsuash? Nu titinka paseetai,” tu nintimrarmiayi. ⁴Tu nintimraru asaramtai, Jesús nuna nekau asa chicharak:

—¿Waruka timiá napchau nintimsar-mesha pujarme? ⁵¿Warí timiá yumtinuita? ¿Tunaarum tsangkura-muitme titin yumtinkai? Antsu nu turachkursha pimpirun: ¿Wajakim wekaasata titinka yumtinkai? ⁶Wikia aints ayatnak Yus akuptuku asamtai, ju nungkanmaya ainau tunaarin tsangkurat-nuitjai. Tura wi turamawaitjai tusan yamaikia nekamtikiatjarme, —timiayi.

Tura pimpirun chicharak: —Amin tajame:

Nantakim tampuram jukim jeemin waketkita, —timiayi.

⁷Tamati pimpiru wajaki ni jeen waketkimiayi. ⁸Tura waketkiamtai Yus ni kakarmarin aintsun susau asamtai, nuna wainkaru asar shaminak: Yus juuntaitai tiarmiayi.

Jesús Mateon untsukmauri

(Marc. 2.13-17; Luc. 5.27-32)

⁹Jesús nunia jiinki jinta weak winasha waitkamiayi. Wikia Mateowaitjai. Wikia apu akupkamu asan, apu akitinam keemsan, aints ainau kuikiarin apun susatasan juyajai. Wi turamtai Jesús nangkamak wina waitak:

—Wina nemartusam wina nuiniatir ata, —turutmiayi.

Turutmtai wikia: Ayu tusan wajakin Jesúsán nemarkamajai.

¹⁰Tura asan wi Jesúsán: Yuwita tusan wína jearun jeemiajai. Turamtai wína jearun yuwinak pujuinai, Jesúsjai tsaniasar kuikian juu ainau untsuri, tura judío umirkatin chichaman umikchau ainausha, tura Jesúsa nuiniatiri ainausha nijai iruntrar yuwaarmiayi. ¹¹Yuwaar umisaramtai, fariseo ainau wína jearun Jesús iruntramunam yuwaun wainkaru asar, Jesúsa nuiniatiri ainaun iniinak:

—¿Atumin nuitamin warukaya kuikian juu ainaujai iruntrar yuwawa? Tura ¿waruka judío umirkatin chichaman umikchau ainaujai iruntrarsha yuwawa? —tiarmiayi.^j

¹²Tu tinam Jesús nuna antuk aimiak:

—Aints pengker pujuinawaka tsuwakrat-nunka yuuminatsui. Antsu najaiminak pujuinawaka tsuwakratnun yuuminawai.

¹³Wikia pengke aintsuitjai tinaunka: Nintimaurum yapajiataram titasnaka tachawitjai, antsu tunaawitjai tinaun: Nintimaurum yapajiararam Yus umirkataram titasan tawitjai. Tura asamtaí atumsha werum Yuse chichame aarmawa nu nekaaram, nunaka taku tawai tusaram nuimiartaram. Nu chichamka nuwaitai. Yus chichaak: ‘Tangku ainawaka maaram wina surustaram tusanka wakeratsjai. Antsu aints ainau wait anentrataram tusan wikia wakerajai,’ timiayi. Tu aarmawaitai, —Jesús timiayi.^k

**Ijmar pJustin pachisar
Jesúsán iniasmauri**

(*Marc. 2.18-22; Luc. 5.33-39*)

¹⁴Tura Imiakratnu Juanku nuiniatiri Jesúsán jeariar iniinak:

—Iikia Juanku nuiniatiri ainautikia fariseo ainaujai metek Yus nintimrami tusar ijmar yutsuk pujaji. ¿Antsu ami

nuiniatirmeka waruka ijarminatsua? —tiarmiayi.

¹⁵Tu iniinam Jesús aimkatas nuikiartamun etserkamiayi. Tura etserak:

—Aints yamai nuwan nuwatak ni amikrijai tsanias pujamtaí ¿ni amikri ijarumar wake mesekar pujusarminkai? Atsa, antsu aints yamai nuwan nuwatkaun jukiartin kinta jeamtaí, nuniangka ni amikri wake mesekar ijarumarwainuitai. Wikia wína nuiniatiri ainaujai iruntran pujamtaí, nuka ijarminatsui. Antsu wína jurukiarumtaí, nuniangka ijarumarwainuitai.

¹⁶“Chikich chichamsha antuktaram: Wejmak arut jaankamtaí, ju nungkanam aints kichkisha tarachin yamarman nujtuk aparchamnawaitai. Nu turamka nunia nijaram, yamarman tarach setur tuupich wajayi. Tura asa arutri chingkiana, nuna nangkamasang nukap jaankatnuitai. ¹⁷Umuti vino tutai yamai kariakua nuwap aparmau mamurunam yarakchatnuitai. Nu turamka, vino kariak wapakrak nuwap aparmaun pujkatnuitai. Tura pujak nuwap aparmau mesertinuitai, tura vino ukaratnuitai. Antsu vino yamarman aa nu nuwap najanam yamarmanam kantsejai kantsermanum yaraktinuitai. Turamka vino yamarman ayat, nuwapen pujkashtinuitai, tura vino ukarashhtinuitai,” Jesús timiayi.^{lm}

**Jairo nawantri inankimuri tura chikich
nuwasha tsuwarmauri**

(*Marc. 5.21-43; Luc. 8.40-56*)

¹⁸Jesús chichaak pujai, judío juuntri taa, Jesúsán wainak tikishmatramiayi. Tura seak:

—Nawantur yamai jakaun ukukjai. Tura wainiatum ame winim uwejmijai ni

antingmaka iwiaaku pujustatui,
—timiayi.

¹⁹Tamati Jesús: Ayu tusa wári wajaki, ni nuiniatiri ainautijai tsaniasar judfo juuntrijai wemiaji. ²⁰Jinta wearin nuwa doce (12) musach numpan nangkantsuk pujumia nuka Jesúsua wejmakrin antingtas tuntupenini winitmiayi. ²¹Tura wejmakrin antingnaka pengkerapi wajasainja, tu nintimias wejmakrin antimiakmiayi. ²²Tura antingkiam Jesús pajas jiis nuwan wainak:

—Nawantru, napchau nintimtsuk asata. Ameka wina nekasampita turututu asam pengker wajasume, —timiayi.

Nu tamaujai metek nu nuwaka tsaarmiayi.

²³Tura pengker wajasamtaí, Jesús judfo juuntri jeen jea, aints nuni pujuinau wake mesekar nangkun umpuinaun wainak, tura untsuminak juutinak pujuinaun wainak, ²⁴nu aints ainaun chicharak:

—Mash jiinkitaran. Nuwachikia jakachi, antsu kanuri, —timiayi.

Tamati aints ainu: “Nangkami tawai,” tusar wishikiarmiayi. ²⁵Antsu Jesús aints ainaun jiiki nuwawach tepamunam waya uwejen achirkam nuwachikia nantakmiayi. ²⁶Nuwawach jaka nantakin asamtaí, nu nungkanmaya ainu nuna pachisar untsuri etserkarmiayi.

Jesús wainmichun jimieran tsuwarmauri

²⁷Tura nuwachin inanki ukuki, jinta wekai aints wainmichu jimiar Jesúsán nemarsar weenak:

—Apu Davidta weariya, wait anengkratkata, —tu untsuminaun antukmiayi.

²⁸Tu untsuminaun wainiat Jesús jeanam wayaamiayi. Tura jeanam wayaamtaí, wainmichu irunu nemarkaram Jesús chicharak:

—¿Atumka nekasampi iincha pengker tsuwarmartatji turutrumek? —tu iniam aiminak:

—Ja ai, Apuru, —tiarmiayi.

²⁹Tinamtaí Jesús nu aintsu jiin antintak chicharak:

—Atum nekasampita turututu asaram, pengker wainmaktaram, —timiayi.

³⁰Tamati pengker wajasar paan wainmakaramtaí, Jesús akatar akupak: —Pengké kichkisha etserkairap, —timiayi.

³¹Tamaitiat jeanmaya jiinkiar, nu nungkanmaya ainaun mash Jesúsua turamurin pachisar etserkarmiayi.

Aints chichachun tsuwarmauri

³²Nunia jiinkiarantaí, aints chichachun iwianchrukun Jesúsnum itaarmiayi.

³³Tura itaaramtaí Jesús iwianchin jiiki akupkau asamtaí, nu chichachu aints chichatan nangkamamiayi. Tura asamtaí aints ainu nuna wainkar nintimrar: —Israel nungkanam pujautikia nu turamuka kichkisha wainchawaitji, —tiarmiayi.

³⁴Tinau waininayat fariseo ainu chichainak:

—Iwianchi apuri kakarmarijai iwianchin jiiki akupawai, —tiarmiayi.^a

Jesús aints ainaun wait anentramuri

³⁵Jesús wekaa wekaaka chikich chikich yakat juunnumsha, tura tuupchinmasha iruntai jeanam waya, nuni aints ainaun nuiniarmiayi. Tura Yus aints ainaun tu inartinuitai tusa, Yusnum uwemratin chichaman etserkamiayi. Tura sungkurin-tin ainaun, tura najaiminak pujuinauncha tsuwarmaiyi.^o

³⁶Tura uwijaya nunisarang pujuinaun asaramtaí, uwija wainin atsawa nunisarang wait wajainauncha, tura

kuntuchu nintimsar pujuinauncha Jesús wainkau asa, wait anentramiayi.^p

³⁷Tura aints ainaun wait anentak ni nuiniatiri ainautin chichartamak:

—Ju aints ainou nekasar trigo tsamakua nunisarang ainawai. Tura juuktin kita jeau waininayat, juukartin jumchik ainawa nunisarang Yuse chichame etserin jumchik ainawai.

³⁸Tura asamtai Yus ni chichamen etserin ainaun akupkati tusaram Yus seataram, —Jesús turammiaji.^q

Jesús ni nuiniatirin inaikiamuri

(*Marc. 3.13-19; Luc. 6.12-16*)

10¹Tura Jesús ni nuiniatiri doce (12) ainautin untsurmak: “Iwianchrintin jiiirkiram akupkataram, tura sungkurintin ainausha, tura najaiminak pujuinausha mash tsuwartaram,” tusa ni kakarmarin suramsamiaji.

²Jesús nuiniatiri ainautikia ii naaringkia nuwaitji: Simón chikich naari Pedron Jesús inaikiamiayi, tura Pedro yachí Andrés, tura Zebedeo uchiri Santiago, tura Santiago yachí Juan, ³tura Felipe, tura Bartolomé, tura Tomás, tura wi, kuikian juyaja nuwaitjai. Tura Alfeo uchiri Santiago, tura Tadeo, ⁴tura Simón yaanchuik mesetan najanin amia nu, tura Judas Iscariote, Jesúsán ukunam anangka surukmia nuwaitai. Ainchik: Wi akupkatnuitjarme tusa Jesús inaitamkamiaji.^r

Jesús ni nuiniatirin akatar akupkamuri

(*Marc. 6.7-13; Luc. 9.1-6*)

⁵Tura Jesús ni nuiniatiri doce (12) ainautin chichartamak:

“Judfochu nungkarin wekaasairap. Tura Samaria yaktanmasha weerap.

⁶Antsu Israel ainou uwija mengkakawa nunisarang pujuinamunam wína

chichamur etserkatasrum wetaram. ⁷Tura werum: Yus yamaikia nayaimpinmaya aints ainaun inartin kita jeayi tusaram etserkataram. ⁸Turaram jau ainausha tsuwartaram. Tura jakau ainausha inankitaram. Tura kuchaprintin ainausha tsuwartaram. Tura iwianchrintin ainausha jiiirkitaram. Yuse kakarmari akikchaujai jukin asaram akikchaujai turataram.

⁹“Tura junta weakrum, kuik engkearam jukirap. Kurisha, tura jiru kuikiasha jukirap. ¹⁰Tura pitakrumsha jukirap. Tura wejmak kichik entsarum wekaasataram. Tura sapatrumsha takutsuk tura waisha takutsuk aintsarmek wetaram. Atumka Yuse chichame takau asakrumin, aints ainou atumnasha ayurtamatnuitrume.^s

¹¹“Tura asaram chikich yaktanam werum: ¿Yaachia juni pengke nintintin puja? tusaram nekaataram. Tura nekaaram nu yaktanmasha pujusrum, ¹²nu aintsu jeen wayaaram nuning tuke pujustaram. ¹³Tura asakrumin nu jeanam pengke nintintin pujamtaikia atum: ‘Pengker pujustaram,’ tarume nunisang Yus nu aints ainaun pengker awajsatnuitai. Antsu nu jeanam pasé nintintin atumin pengker awajtamtsuk pujuinamtaikia: Yus atumin pengkerka awajtamsashtatui titaram. ¹⁴Tura atumin: Juni wayaawairap turaminamtaikia, tura atumi chichamen antutan nakitinamtaikia, nu jeanmayangka tura nu yaktanmayangka jiiinkiram ukuktaram. Tura ukuakrum atumi nawe japirum: Nu aints ainaun Yus jiiisti tusaram, aints ainou mash nekamtikiataram.^t

¹⁵“Nekasan tajarme: Wait wajakartin kita jeamtai, yaanchuik Sodoma yaktanam pujuinau, tura Gomorra

yaktanam pujuinausha tunau asar, wait wajakarmia nuna nangkamasarang nu yaktanam pujuinausha nukap wait wajakartin ainawai,” Jesús turammiaji.”^u

**Yusen umirkaru ainaunka
nakitrartinuitai timiauri**

¹⁶Nunia ataksha iin chichartamak: “Aneartaram. Wisha atumin uwijaya nunisrumek arumin, juun yawaa pujamunam akupajrume. Tura asaram napia nunisrumek nintip ataram. Tura yapangma nunisrumek chikich ainau pasé awajtsuk asataram.”^v ¹⁷Aints ainau atumin achirmakar, apu ainamunam surutmakartinuitai. Turinantai iruntai jea ainamunam numijai awatamrartinuitai. Tura asaramtai wainkataram. ¹⁸Tura wína umirtin asakrumin, romano apuri ainausha, tura atumi apuri ainausha atumin wait wajakartinuin suramsarat tusar juramkiartinuitai. Tura asaramtai judío apuri ainau, tura judíocho apuri ainausha wína pachitsaram ujaktinuitrume. ¹⁹Tura wína aintsur asakrumin atumin achirmakar, apu ainamunam juraminamtaikia çitiurak chichaktaj? tura çwarintuk aiktaj? tuuka nintimrairap. Antsu aneatchmau Yus chichamtikramkatatrume. ²⁰Tura asaram atumka chichaakrumsha atumek nintimsarmeka chichakchata-trume, antsu atumi Apaachiri Wakani atumin chichamtikramkatatrume.”^w

²¹“Aints ainau ni yachiin waininayat: Maawarat tusar surukartinuitai. Nunia uchirtin ainausha ni uchirin waininayat: Maawarat tusar surukartinuitai. Nuniasha chikich aints ni aparin waininayat: Maawarat tusar surukartinuitai.

²²Atumka wina aintsur asakrumin, aints

ainau atumin mash kajertamkartinuitai. Antsu tunaun nepetkaram jakarmeka, atumka tuke Yusnum pujustinuitrume.”^x

²³“Chikich yaktanmaya ainau atumin mantamawartas wakerutminamtaikia, chikich yaktanam tupikiaktaram. Atumka Israel yakat ainamunam wína chichamur etserat umiatsrumning, wisha aintsutiat-nak Yus akupkamu asan ataksha taratnuitjai. Wi taja nuka nekasaintai.

²⁴“Nuniasha tajarme: Aintsu nuiniatiri ni nuikiartinaka nangkakashtinuitai. Tura aintsu inatiri ni inamurin nangkakashtinuitai. ²⁵Aints nuikiartinuin nakitinamtaikia, ni nuiniatirincha nakitrartinuitai. Tura aints inakratnuncha nakitinamtaikia, ni inatiri ainauncha nakitrartinuitai. Tura asamtai wína pachitsar aujmatrinak: Iwianchi apurintai tinauka wína umirtin ainauncha nunisarang aujmatinak pasé chichasartinuitai,” Jesús turammiaji.”^y

¿Yaachia shamkatnuitji? timiauri
(Luc. 12.2-7)

²⁶Nunia Jesús ataksha iin chichartamak: “Tura asamtai aints ainau shamkairap. Yamai ukar chichakmauncha ukunam paan nekaawartinuitai. Tura yamaikia aintsu turamurin nekaachminun waininayat, ukunam paan nekaawartinuitai.”^z

²⁷“Wikia kashi atumin shishkamsan nekamtikiamiajrume nuka, aints ainau mash antukarti tusaram, tsawaisha paan etserkataram. ²⁸Aints atumin mantaminamtaisha shamkairap. Atumi namangkenka mantaminayat, atumi wakaninka maachartinuitai. Antsu Yuska ni umirchau ainau namangkencha, tura wakanincha ji kajintrashtinnum tuke

u 10.15 (Gén. 19.24-28; Mat. 11.24; Luc. 10.4-12) v 10.16 (Luc. 10.3)

w 10.20 (Marc. 13.9-11; Luc. 12.11-12; 21.12-15) x 10.22 (Mat. 24.9; Marc. 13.12-13;

Luc. 21.16-19) y 10.25 (Mat. 9.34; 12.24; Marc. 3.22; Luc. 6.40; 11.15) z 10.26 (Marc. 4.22; Luc. 8.17)

chumpiatin asamtai, aya Yusek shamka-taram.

²⁹“Atumka chingki jimiaarchik kichik jiru kuikijai sumakminuitrume. Chingki timiá akichchau sumakminun wainiat, atumi Apaachiri surimiamtaikia, chingki kichkisha nungká ayaarchamnawaitai. ³⁰⁻³¹Tura Yuska atumin chingkin nangka-masang timiá anenmau asa, atumi intashi warutmak awa tusa nekapmarmawaitai. Tura asamtai atumin mantamawartas wakerutminamtaisha shamtsuk asataram,” Jesús turammiaji.

Wikia Jesúsawaitjai titaram timiauri
(*Luc. 12.8-9*)

³²Nunia ataksha iin chichartamak: “Nunasha tajarme: Aints ainou wína pachitsar aints antinamunam: Wikia Jesúsawaitjai taunka wisha nunisnak wína Apaachirun nayaimpinam pujaun ujaakun: Juka wína aintsruitai titinuitjai. ³³Antsu aints chikich ainou antinamunam wína pachitsar: Wikia Jesúsawaitjai taunka wisha nunisnak wína Apaachirun nayaimpinam pujaun ujaakun: Juka wína aintsruचितai titinuitjai,” Jesús turammiaji.^a

Jesús aints ainaun akankatnuitjai timiauri
(*Luc. 12.51-53; 14.26-27*)

³⁴Nunia Jesús ataksha iin chichartamak: “Atumka wína pachitsaram: Ju nungkanam pujuinau maanitsuk pengker nintimtisar angkan pujusarat tusa tamiayi, tuuka nintimsairap. Wikia ju nungkanam tau asamtai, aints ainou maanikiartinuitai. ³⁵Wi tau asamtai, aints ni aparijai kajernaikiartinuitai, tura nuwasha ni nukurijai kajernaikiartinuitai. Tura najatisha ni tsatsarijai kajernaikiartinuitai. ³⁶Tura asamtai aints ainou ni wearijai nemasnaikiartinuitai.

³⁷“Aints ni aparincha, tura nukurincha wína nangkatusang aneauka wína aintsur achatnuitai. Tura aints ni uchirincha, tura ni nawantrincha wína nangkatusang aneauka wína aintsur achatnuitai. ³⁸Tura aints wína nemartustas wakerayat, wait wajaktiniun shamauka wína aintsruचितai. ³⁹Nunasha tajarme: Aints wína umirtukiat, jatan shamak wína pachitas: Nuna umirchawaitjai tauka tuke mengkatnuitai. Antsu wína umirtukuka maawarmaitiat, tuke iwiaaku pujusartinuitai,” Jesús turammiaji.^b

Yus ni aintsrin pengker awajsatnuri
(*Marc. 9.41*)

⁴⁰Nunia Jesús ataksha chichartamak: “Nunasha tajarme: Wína umirtuku asakrumin, atumin anturtaminauka winasha anturtinawai. Tura winasha anturtinauka wína akuptukuncha anturinawai.^c

⁴¹“Aints Yuse chichamen etsernun Yus akupkamu asamtai, ni jeen wayaati taunaka Yus ni chichamen etsernun pengker awaja nunisang nu aintsun pengker awajui. Tura aints chikich aints pengke nintinnun: Jearun wayaata taunaka Yus pengke nintinnun pengker awaja nunisang nu aintsun pengker awajui. ⁴²Tura aints mianchaun wainiat, wina nemartin asamtai, nu aintsun yumin shikirak aramtaikia, Yus nu aintsnasha nekas pengker awajsatnuitai,” Jesús turammiaji.

Imiakratin Juan ni nuiniatirin akupkamuri
(*Luc. 7.18-35*)

11 ¹Jesús ni nuiniatiri doce (12) ainautin nuikiartutai chichaman akatamar umisu asa, nunia jiinki nu nungkanam yakat ainamunam aints

ainaun nuiniartas tura Yuse chichamen etserkatas wemiayi.

²Imiakratin Juan kársernum engkeamu pujus, Cristo turamurin pachis chichaman antuku asa, ni nuiniatirin chicharak:

—Jesús wainkaram chicham nekartuataram, —tusa akupkamiayi. ³Akupkamu asar Jesúsán jeariar iniinak:

—¿Yus uwemtikiartinun akupkatnuitjai tímia nuka amekitam? ¿Amechuitkum-ningkia chikichash nakastaj? —tiarmiayi.

⁴Tinamtai Jesús ayaak: “Atumka waketkiram atum wainkarume tura antukmarume nuka Juan mash ujaktaram. ⁵Tura ujaakrum: Wainmichu ainau paan ataksha wainminawai. Tura wekaichau ainausha ataksha wekainawai. Tura kuchaprintin ainausha tsaarar pengker wajainawai. Tura antichu ainausha paan antinawai. Tura jakau ainausha ataksha nantakiar iwiaaku pujuinawai. Tura mianchau ainauncha Yusum uwemratin chichaman ujaawai titaram. ⁶Aints wína turamurun wainkar, nekasampita turutin ainauka nekasar warasartinuitai tusaram Juan ujaktaram,” Jesús timiayi.

⁷Tamati Juanku nuiniatiri waketkiamramtai, Jesús aints nuni juwakaru ainaun Juankun pachis nuikiartutan nangkamamiayi. Tura etserak: “Aints atsamunam Juan wainkatasrum ¿waruka wemiarume? Karis nase umpuam, mai we mai we waja nunisang ¿aints tu pujau wainkatasrumek wemiarum? Atsa.

⁸Turachkurmesha ¿aints wejmakan shiirman akikian entsaru wainkatasrumek wemiarum? Atsa. Aints wejmakan akikian entsaruka apu jeen pujuinawai.

⁹¿Tura warí wainkatasrumea wemiarum? Atumka nekasrum Yuse chichamen etserin wainkatasrum wemiarume. Tura

Juan wainkaram, chikich aints Yuse chichamen etsernun nangkamasang pengke aints wainkamiarume. ¹⁰Juankun pachis yaanchuik Yuse chichame etserin aarmia nuka nuwaitai: ‘Nintimrataram. Yus Mesíasan chicharak: Ame weatsmining jintimin iwiarati tusan, wína akupamurun eemkan akupajai timiayi.’ Tu aarmawaitai.^d

¹¹“Nekasan tajarme: Yuse chichame etserin ju nungkanam puju armia nuka kikhkisha Juankun nangkamaska atsumiayi. Antsu yamaikia Yuse umirin mianchau ainausha wi turatnun wainkartin asar, Juankun nangkamasarang Yuse pujutirin jeartin ainawai, tajarme.

¹²“Nuniasha tajarme: Imiakratin Juan aints ainaun Yus inartinun pachis chichaman etsermia nuni nangkamsar, yamaisha nunisarang kajeu ainausha nu chichaman pengké nakitinawai. Tura kajeu ainu nu chichamnaka nakitinu asar, chikich ainausha Yusum jeacharti tusar suriminawai. ¹³Yaanchuik Juan akiintsang, Yuse chichame etserin ainu tura Moiséscha: Yus aints ainaun tu inartinuitai tusar etserkarmiayi. ¹⁴Tura asaramtai yaanchuik Yuse chichame etserin: ‘Cristo taatsang, Elías eemak tatinuitai,’ timiayi. Tura nu chichaman nekaatasrum wakerakrumka: Juanka Elías tumawaitai titinuitrume. ¹⁵Ju chichaman antinauka nintimrarti.^e

¹⁶“Junia aints ainu itiu nintiminawa nunaka nekamtikiatjarme. Junia aints ainu uchua nunisarang nintiminawai. Uchi ainu ni amikrijai nakurusmi tusar aints aanum iruntramunam chicharnainak: ¹⁷‘Iikia nangkuwach umpuarnisha ¿waruka yaamsurme? Tura nangkamir nakurusmi tusar, aints jakamunam nampearnisha ¿waruka juuttsurme?’ Uchi tu nintimina nunisrumek pujarme. ¹⁸Juan

pangnaka yutsuk, tura vinoncha umutsuk pujamtai, atumka ni chichame antut nakitau asaram: Iwianchrinuitai tarume. ¹⁹Tura wikia Yus akupkamutiatak, chikich aintsua nunisnak yutanacha pachitsuk yuwan, tura umutnasha pachitsuk umin asamtai, wina nakitrin ainau: Ushuitai tura nampewitai turutinawai. Tura tunaarintin ainau amikrintai, tura kuikian juu ainau amikrintai turutinawai. Tura waininayat Yusen umirin ainau Yuse nekamtairin jukin asar: ¿Warukaya nunasha tinawa? tusar nekainawai,” Jesús timiayi.

Pasé yaktanmaya ainaun chicharkamuri
(*Luc. 10.13-15*)

²⁰Nuniangka Jesús chikich chikich yaktanam Yuse kakarmarijai wainchatai takatan untsuri takasu waininayat, nu yaktanmaya ainau ni tunaarin inaisacharu asaramtai, Jesús nu aints ainaun chicharkamiayi. Tura chicharak:

²¹“Corazín yaktanmaya ainautirmin, Betsaida yaktanmaya ainautirmincha aneartaram tajarme. Atumka nukap wait wajaktinuitrume. Tiro yaktanmaya ainau, tura Sidón yaktanmaya ainausha Yusen umirchau ainayat, Yuse kakarmarijai wainchatai takatan atum wainkamarume nunaka wainkachariat, nu wainkarkia yaanchuik: Yus tunaarun japitrurti tusar, entsatin pushun entsarar, tura muuken yukuujai yukuarar Yusnum uwemin armiyai. ²²Tura atumsha wainchatai takatcha wainkayatrume, atumi tunaari inait nakitau asaram, tunau jiiistin kinta jeamtai, atumka Tironmaya ainau, tura Sidónnumia ainau nangkamasrumek nukap wait wajaktinuitrume.^f

²³“Capernaum yaktanmaya ainautirmincha tajarme: Atumka

anangmamkuram: Iikia nayaimpinam pujustajjiapi, ¿tu nintimsarmek pujaram? Antsu atumka jakau matsamtainum mengkakatnuitrume tajarme. Sodoma yaktanmaya ainau Yuse kakarmarijai wainchatai takatan wainkachu ainayat, nuna wainkaramtaikia, ni yaktari yumpuntsuk yamaisha tuke atinuyayi. ²⁴Tura asamtai tajarme: Tunau ainau jiiistin kinta jeamtai, atumka Sodoma yaktanmaya ainau nangkamasrumek nukap wait wajaktinuitrume,” Jesús timiayi.^g

Wini winiram ayamsataram timiauri
(*Luc. 10.21-22*)

²⁵Nuniangka Jesús Yusen seak: “Apaachiru, ameka mash nayaimpinmaya ainau Apurinme. Tura mash nungkanmaya ainau Apurinme. Tura asam aints ningki nintimsar: ‘Wikia nekau aintsuitjai,’ tinauka ju chichaman nekaacharti tusam uukuitme. Antsu uchía nunisarang nintiminau ju chichaman paan nekaawarti tusam nekamtikiawaitme. Tura asakmin maaketai tajame. ²⁶Apaachiru, tu ati tau asakmin, maaketai tajame,” timiayi.

²⁷Tura Yusen sea umis, ataksha aints ainaun chicharak: “Wina Apaachir mash aa nuna wina surusmiayi. Aints kichkisha Yuse Uchiri itiurak awa tusarka nekainatsui. Tura wina Apaachir itiurak awa tusarsha nunasha nekainatsui. Antsu Yuse Uchiri asan, tu awai tusan paan nekajai. Tura aints ainaun: Wina Apaachirka tu awai tusan, wi nekamtikiatasan wakerakana nekamtikiatnuitjai.^h

²⁸“Mash pimpikniutirmesha, tura itiurkachmin pujautirmesha wini winitaram. Turakrumningkia wikia ayamtiksatatajarme. ²⁹⁻³⁰Wikia pengké

f 11.22 (Am. 1.9-10) g 11.24 (Gén. 19.24-28; Mat. 10.15; Luc. 10.12)
h 11.27 (Juan 1.18;10.14-16)

kajechu asan, miajuitjai tumamtsuk pujajai. Tura asamtai wini winiram nuimiartaram. Tura wina chichamrun miatrusarang umirtukartinka yumtichuitai. Tura wina takatrun takainauka itiurkachmin ainawai,” Jesús timiayi.ⁱ

Ayamtai kintati trigo majurar yuwamuri

(Marc. 2.23-28; Luc. 6.1-5)

12¹ Ayamtai kinta tsawaaramtai, Jesús ni nuiniatirijai aja japen nangkaaminak, ni nuiniatiri ainauti yaparakur trigo jingkiain achikiar majurar yukir wemiayi. ² Turarin fariseo irunu nuna wainkar, Jesúsán chicharinak:

— Jiisia, Moisés ayamtai kintati takakmasairap tusa, surimkau waininayat, ami nuiniatiram ainau aunka aitkinawai, —tiarmiayi. ³ Tinamtai Jesús chicharak:

— ¿Waruka tuusha chichaarme? ¿Yaanchuik apu Davidta turamuri pachisrum aujchaukitrum? Nuka ni aintsri ainaujai tsukaminak, ⁴ Yus seati juun jeanam wayaawar, Yus inaktustin pang aya sacerdote yutairi asamtai, chikich aintska nunaka yuwachminun wainiat, Davidcha nuna yuwak ni aintsri ainauncha susamiayi.^j

⁵ ¿Atumsha Moisés umirkatin chichaman aarmia nuka aujchaukitrum? Sacerdote ainauka ayamtai kintati Yus seatai juun jeanam ayamtsuk takainau wainiat, Yuska nuna pachis tunaawitai tatsui.^k ⁶ Tura asamtai nekasán tajarme: Atumka Yus seatai juun jean nintimtarman nuna nangkamasrumek wina nintimtur-satnuitrume. ⁷ Yuse chichamesha tu aarmawaitai. ⁸ Yus chichaak: ‘Tangku ainauka maaram wina surustaram tusanka wakeratsjai. Antsu aints ainau wait anentratarman tusan wikia wakera-

jai,’ timiayi. Nu aarmau antukuitkurmeke, aints tunau takachu ainaun: Nuka tunau turayi tichamnowaitrume.^l ⁸ Wi aints ayatun Yus akupkamau asan, ayamtai kintati tu pujusarti tusan, aints ainaun inartinuitjai, —Jesús timiayi.

Uwejen mutchaun tsuwarmauri

(Marc. 3.1-6; Luc. 6.6-11)

⁹ Nunia jiinki, Jesús iruntai jeanam wayaamiayi. ¹⁰ Tura nuni waya, aints uwejen mutchaun wainkamiayi. Turamtai fariseo ainau: Ju aintsun tsuwaramtaikia, nuka tunau wajasi timi, tu nintimsar Jesúsán iniinak:

— ¿Ayamtai kintati aints tsuwartin pengkerkai? —tiarmiayi.

¹¹ Tu iniinam Jesús aimiak:

— ¿Atumi uwijari waanam ayaaramtaikia atum ainautirmesha ayamtai kintati ashiitai tusarmeka wechaintrumek? Atumka nekasrum nu uwijaka ashiitnuitrume tajarme.^m ¹² Tura aints uwijan nangkamasketai. Tura asamtai ayamtai kintati aints wait anentamuka nekas pengkeraitai, —timiayi.

¹³ Nunia uwejen mutchau aintsun chicharak:

— Uwejem kutsmarta, —timiayi.

Tamati ni uwejen kutsmaramtai, chikich uwejejai metek pengker wajasmiai. ¹⁴ Turamtai fariseo ainau iruntai jeanmaya jiinkiar iruntrar chichainak: Jesús maami tusar chichaman najatiarmiayi.

Isaías Jesúsán pachis timiauri

¹⁵ Turinamtai Jesús nuna nekaa, nunia jiinki weai, aints untsuri niin nemariarmiayi. Turinamtai jainauncha mash tsuwarmaiyi. ¹⁶ Tura aints ainaun akatar

akupak: “Wi turamurka aints kichkisha nekaawarai tusaram, pengké etserkai-rap,” timiayi. ¹⁷Jesúsa turamuringkia yaanchuik Yuse chichame etserin Isafas aarmia nunisang umikmiayi. Nu aarmauka nuwaitai:

¹⁸Yus chichaak: “Juwaitai wína inatir, wi akupkamiaja nuka wína aneetiruitai. Tura asan niin wainkan waraajai. Ni nintin Wakantrun engketatatjai. Wi turamu asa, mash nungkanmaya ainaun uwemratin chichaman etserkatnuitai. Tura nu chichaman umirkaru ainaun uwemtikratnuitai. Tura nu chichaman umikchau ainaunka uwemtikrashtinuitai.

¹⁹“Wína inatirka aints ainaun jiyakchatnuitai. Tura anturtuktaram tusangka untsumkashtinuitai. Tura asamtai jintanam wekainausha ni etsermataisha anturkachartinuitai.

²⁰“Tunau jiistin kinta jeatsaing, kakaichau ainaun yaingtinuitai, tura niin jumchikesh umirnak pujuinaunka japashtinuitai. ²¹Turatin asamtai mash nungkanmaya ainaun niin pachisar: Wári tati tusar nakasartinuitai.” Tu aarmawaitai.

Jesúsán pachisar: Satanása kakarmarijai takaawai timiauri

(*Marc. 3.20-30; Luc. 11.14-23; 12.10*)

²²Nunia aints iwianchrinun Jesús pujamunam itaarmiayi. Nu aintska wainmichu tura chichachuyayi. Tura itarim Jesús niin tsuwarmiayi. Tsuwaaram niisha paan wainmak, chichatnasha paan chichakmiayi. ²³Tura pengker wajakiamtai, aints ainaun nuna wainkar mash nintimrar: “¿Davidta wearin pachis Yuse chichame etserin: Uwemtikiartin tatinuitai tiarmia nuchawashi?” tiarmiayi.

²⁴Tinamtai fariseo ainaun nuna antukar chicharnainak:

—Juka iwianchi apuri Beelzebún umirnuitai. Tura asa nuna kakarmarijai aintsu iwianchrin jiiuru weawai, —tu nintimrarmiayi.^a

²⁵Tu nintiminamtai, Jesús nuna nekau asa chicharak:

—Nintimrataram. Chikich nungkanmaya apu ainu kajernaikiar kanakar pujusar maaninamtaikia, nu nungkanka wári mesratnuitai. Tura aints ainu chikich yaktanam, tura chikich jeansam iruntrar kajernaikiar pujuinauka, nu jeancha tura nu yaktancha wári ukukiar-tinuitai. ²⁶Tura çitiurak Satanása kakarmarijaiingkia Satanása inatiri ainaun jiiki akupkatnuita? Nuka pengké turashtinuitai. Antsu atumka wína pachitsaram: Nuka Satanása kakarmarijai iwianch ainaun jiiuru weawai turutrume nuka nekaschawaitai. Nuka nekasainmatikia, Satanáska ningki nepetmamkatnuitai. Tura nuka nekasainmatikia, Satanása kakarmari wári mengkakatnuitai.

²⁷Atumka wína pachitsaram: Nuka Beelzebú naartinu kakarmarijai aintsu iwianchrin jiiuru weawai turutrume. Antsu nuka nekasainmatikia çatumi nuiniatiri ainaun yana kakarmarijai iwianch ainaun jiiuru weenawa? ¿Atumka nusha Satanása kakarmarijai iwianch ainaun jiiuru weenawai tatsurmeash? Tura nisha: Satanása kakarmarijai turichuitji tinau asaramtai çitiurak winasha: Satanása kakarmarijai turawai turutiarame? Atumka tau asaram nuwaarme. ²⁸Antsu wikia Yuse kakarmarijai iwianch ainaun jiiikin asamtai, atumsha paan nintimsaram: Yuska aints ainaun tu inawai tusaram nekaamnawaitrume.

²⁹“Aints nekas kakaram aa nuka jea waitirin naka pujamtai çnu aints jingkiatskeka, ni jeen wayaar wariri jurukminkai? Atsa, antsu nu aints

jingkiar wariri jurukminuitai. Tura asamtai Satanás jingkiatskeka ninu aa nuka jurukchamnawaitai.

³⁰“Wína amikruchuka wína nemasru-
itai. Tura wína yaintsuk pujauka aints
araka jingkiajin irumtsuk aya mengka-
karti tusa, japua nunisang iwianchin
yayaawai.”^o

³¹“Tura asamtai atumin tajarme: Aintsu
tunaari ainia nunaka mash Yus tsanguku-
ratnuitai. Tura Yusen pachisar pasé
chichainaunka Yus mash tsangkuratnui-
tai. Aintsu Yuse Wakanin pachisar pasé
chichainaunka pengké tsangkurastinui-
tai. ³²Tura wi aints ayatun, Yus akuptuku
waitinayat, wína pachisar pasé chichai-
namtaisha, nu tunaunasha
tsangkuratnuitai. Aintsu Yuse Wakanin
pachisar pasé chichainaunka yamaisha
tuke nu tunaunaka pengké tsangkurashti-
nuitai,” Jesús timiayi.

**Numi jiisar nerekuashi tusar
nekaatnuitai timiauri**

(*Luc. 6.43-45*)

³³Nunia ataksha Jesús chichaak:
“Nunasha tajarme: ¿Numi jiisrum
nerekuashi? tusaram paan nekaatnui-
trume. Numi tenap piantramka pengker
nereeyi. Aintsu numi piantrachmauka
mianchaun nereeyi. Atumsha nuniske-
trume.”^p ³⁴Atumka napi uchiriyá tumau
asaram ¿itiurak pengker aa nusha
chichastarme? Aints ni nintijai nintimina
nunaka páchitsuk chichainawai.”^q

³⁵“Aints pengker aa nuna nintimu asa,
nekas pengker aa nunak chichaawai.
Tura aints pasé aa nuna nintimu asa pasé
aa nunak chichaawai. ³⁶Nunasha tajarme:
Tunau jiistin kinta jeamtai, aints nangka-
miar chichau armia nu chichamnaka
mash Yusen paan ujakartin ainawai.

³⁷Tura asamtai atumsha pengker aa nu
chichaakrumningkia, Yuska atumin
pengker awajtamsatnuitrume. Aintsu pasé
aa nu chichaakrumka wait wajaktinui-
trume,” Jesús timiayi.

**Pasé aints ainau: Wainchati
takat jiismi timiauri**

(*Marc. 8.12; Luc. 11.29-32*)

³⁸Tamati fariseo ainau, tura Moisésa
chichame nuikiartin ainausha Jesúsán
chicharinak:

—Nuikiartinu, ame wainchati takat
turata tusar, iikia wainkatar wakeraji,
—tiarmiayi.

³⁹Tinamtai Jesús aimiak:

—Junia pasé nintintin ainau Yusen
umirchau ainayat, wainchati takatan
wainkartas wakerinawai. Tura wainiatun
wainchati takatnaka turashtatjai. Aintsu
Yuse chichame etserin Jonás turunamia
nunisang wainchati takatnaka wainkarti-
nuitai.”^r

⁴⁰“Jonás kempatam kinta tsawaisha
tura kashisha juun namaka ampujen
engkema, jakawa nunisang pujumia
nunisnak wikia Yus akupkamutiatak
aints asan, jakan kempatam kinta
tsawaisha tura kashisha iwiansamunam
tepestinuitjai. ⁴¹Jonás Nínive yaktanam
Yuse chichamen etsermatai, nunia aints
ainau ni tunaarin mash inaisarmiyai. Wi
Jonásán nangkamasnak pujai waitinayat,
junia aints ainau wi etsermaurunka
antinatsui. Tura Yus tunau jiistin kinta
jeamtai, Nínive yaktanmaya jakaru ainau
nantakiar, yamai pujuinaun pachisar
Yusen: Nu aints tunau armiyai tiartinui-
tai.”^s

⁴²“Nuniasha yaanchuik Yus Salomón-
kan ni nekamtairin susamu asamtai,
chikich nungkanmaya apu nawantri

arakia Salomónka chichamen antuktas tarimiayi. Wikia Salomónka nangkamasanak ai waitinayat, junia nungkanmaya ainawu wi etsermaunaka antinatsui. Antsu Yus tunau ainaun jistin kinta jeamtai, nu nuwaka jakamunmaya nantaki, yamai pujuinaun pachis Yusen ujaak: Nu aints ainawu tunau ainawai titinuitai,” Jesús timiayi.

Iwianch jiinkisha ataksha waketnuitai timiauri

(*Luc. 11.24-26*)

⁴³Tura Jesús ataksha chichaak:

—Iwianch aintsnum engkema pujuu nunia jiinkin asa, aints atsamunam wekaas nuni ayamsatatkama tujintak: Ataksha waketkitaj tu nintimratnuitai. ⁴⁴Tura asa chichaak: Wi jiinkimiaja nuni waketkitajai tusa nu aintsnum waketki, jea itarka tumaun pakuichau pengker iwiamua nunisang nu aintsu nintin wainak, ⁴⁵nunia waketki, chikich siete (7) iwianchin niin nangkamasarang timiá pasé ainaun juki, tura nujai nu aintsu nintin engkemawartinuitai. Tura engkemuam nu aintska nuwik pasé pujumia nuna nangkamasang pasé pujustinuitai. Tura asamtai junia nungkanmaya ainawu wina nakitrinau asar, yaanchuik pasé puju armia nuna nangkamasarang timiá pasé pujusartin ainawai, —Jesús timiayi.^t

Jesusa nukuri ni yachí ainaujai tarimuri
(*Marc. 3.31-35; Luc. 8.19-21*)

⁴⁶Jesús aints ainaun nuiniak pujai, ni nukuri ni yachí ainaujai tariarmiayi. Tura tariar aanum wajasar Jesúsán ajsartas wakerarmiayi. ⁴⁷Tura aanum wajasaramtai, chikich aints Jesúsán ujaak:
—Nukuram yachim ainaujai aanum wajasar, amijai chichasartas wakerinawai, —timiayi.

⁴⁸Tamaitiat Jesús nu aintsun chicharak: —¿Yaa ainawa wina nukursha, tura wina yatsursha? —timiayi.

⁴⁹Tu iniam aimkacharamtai, ni nuiniatiri ainaun inakmas:

—Juka wina yatsur tura wina nukur ainawai. ⁵⁰Aints wina Apaachir nayaimpinam puja nuna wakeramurin umirinauka wina yatsur nunia wina umaar nunia wina nukur ainawai, —Jesús timiayi.

Arakan pachis nuikiartamu

(*Marc. 4.1-9; Luc. 8.4-8*)

13 ¹Nu kintati Jesús jeanmaya jiinki, juun kucha yantamen keemsa-miayi. ²Tura aints untsuri kautkaram, Jesús kanunam engkema nuni keemsa-mtai, aints ainawu kucha kaanmatkarin wajasarmiayi.^u

³Turinamtai untsuri nuikiartutai chichamjai aints ainaun nuiniartas chicharak:

“Anturtuktaram. Aints arakan tsaamratas ni jeenia jiinkimiayi. ⁴Tura arak tsaamam, araka jingkiaji jintá kakeekamiayi. Jintá kakeekamtai, chingki kautkar jingkiajin yuwaarmiayi. ⁵Chikich jingkiaji kayanam nungka jumchik amanum kakeekamiayi. Tura kakeak nungka jumchik ayat kakarmachu tsapaimiayi. ⁶Tura tsapaiyat, tsaai yakí waakak sukuam kaarmiayi.

“Tura kangkape atsau asamtai jakamiayi. ⁷Chikich jingkiajisha jangki amanum kakeekamiayi. Jangki tsakar pempearam, araksha nereckhamiayi. ⁸Chikich jingkiajisha nungka pengker-num kakeekamiayi. Tura nekas pengker tsapai nereckmiayi. Chikich jingkiaji cien (100) nereckmiayi, tura kitcha sesenta (60) nereckmiayi, tura kitcha treinta (30) jingkiajin nereckmiayi. ⁹Aints ainautiram

ju chicham antukrum nintimrataran,”
Jesús timiayi.

**¿Jesús waruka nuikiartamuncha
etserkamiayi?**

(*Marc. 4.10-12; Luc. 8.9-10*)

¹⁰Chichas umisamtai ni nuiniatiri
ainauti Jesús chicharkur:

—¿Waruka aints ainausha nuikiartutai
chichamsha ujaa weame? —timiaji.

¹¹Takurin Jesús iin chichartamak:

—Yus nayaimpinmaya aints ainaun
itiur inartinuita tusar, chikich ainau paan
nekaachmin wainiatrum, atumka paan
nekamtikiamuitrume. ¹²Tura asamtai
Yuse chichamen antinak nekasar pengker
nintinam ukusar, nukap nintimrar
pujuinaunka chikich chichamnasha nuna
nangkamasang Yus paan nekamtikiatnui-
tai. Antsu chikich ainau wina chichamrun
jumchik antinayat, antutan nakitinau
asar, jumchik antukarmia nuka ataksha
wári kajinmakiartinuitai.^v

¹³“Tura asamtai nu aints ainau wina
chichamrun paan nekatan nakitinau asar,
ni jiijaingkia paan waininayat, wainmi-
chua nunisarang ainawai. Tura
antutnasha antinayat jampekua
nunisarang: Warintua tusar nekaawartat-
kamawar yuumatinawai. Turinau
asaramtai, nu aints ainaun wikia aya
nuikiartutai chichaman ujainajai. ¹⁴Nu
aints ainaun pachis Yuse chichame
etserin Isaías tímia nunaka mash umikui-
tai. Nu aarmauka nuwaitai. “Yus Isaíasan
chicharak:

‘Nu aints ainau jiiisam chicharkata:
Atumka paan antayatrume
antukchatnuitrume. Tura paan
wainmatcha wainmayatrume
nekaashtinuitrume. ¹⁵Nu aints
ainau katsuram nintintin asar,

kuwishi epekua nunisarang
antukartatkamawar tujintinawai.
Tura wainmichua nunisarang
wainmaktatkamawar tujintina-
wai. Tu ainiachkungka paan
nekaawarminuitai. Tura nekasar
antukarminuitai. Tura nintijai
paan nintimsar ni tunaarin
inaisaramtaikia, wikia nu aints
ainaun uwemtikratnuitjai,’

Yus Isaíasan timiayi.^w

¹⁶⁻¹⁷“Nekasan tajarme: Yaanchuik Yuse
chichame etserin ainau, tura pengké aints
ainau untsuri atum waintrume nunasha
wainkartas wakerinayat wainkacha-
rmiayi. Tura atum antuwearme nunasha
antukartas wakerinayat antukcharmiayi.
Tura atumka wi turamu wainkau asaram,
tura wina chichamur antuku asaram,
nekasrum warastinuitrume,” Jesús
turammiaji.^x

**Arak tsaamramun taja nunaka
takun tajai tusa etserkamuri**

(*Marc. 4.13-20; Luc. 8.11-15*)

¹⁸Nunia Jesús ataksha iin chicharta-
mak: “Yamaikia nuikiartutai chichamjai
arak tsaamramun pachisan wi takun tajai
tamati anturtuktaram. ¹⁹Yus aints ainaun
nayaimpinmaya inartinun pachisar
etsermaun antinayat ¿warina takua tawa?
tusar, tenapka nekainachu asaramtai,
iwianch tari, ni antukmaurin nintin
ukuscharti, antsu wári kajinmakiarti tusa
kajinmamtikui. Nu aintska árak jinta
kakeekaun chingki kautkar yuwamua
nunisketai. ²⁰⁻²¹Arak kayanam kakeeka-
mia nuka chikich aintsua nunisarang
ainawai. Nu nangkamtaik nu aints ainau
Yuse chichamen pengker nintimsar
antinayat, nuniangka itiurkachmin
amatai, Yusen nakitin ainau wishikinam,

Yuse chichamen umirkachmin nintiminak umirtan wári inainawai. Tura asar árak kayanam kakeekamia nunisarang ainawai. ²²Arak jangki amanum kakeekamia nuka chikich aintsua nunisarang ainawai. Nuka Yuse chichamen paan antinayat, ju nungkanmaya aa nuna nintiminawai. Tura kuikiartin wajastaj tu nintimsar, Yuse chichamen nintimsuk pujuinawai. Tura asar árak jangki amanum kakeekamia nuka pengké nerekchatnuitai. ²³Antsu árak pengke nungkanam kakeekamia nuka chikich aintsua nunisarang ainawai. Nu aints ainau Yuse chichamen antukar nintinam ukuinawai. Tura miatrusarang umirnak, Yusen nintimsar pujuinawai. Tura asar cien (100), tura kitcha sesenta (60), tura kitcha treinta (30) nerekua nunisarang ainawai,” Jesús turammiaji.

**Nupaa trigojai pachimramun
pachis nuikiartamuri**

²⁴Nunia Jesús chikich nuikiartutai chichaman nuitamak: “Yus aints ainaun nayaimpinmaya inartinka aints ni ajarin trigon pengkeran aaramua nunisketai. ²⁵Tura aints ainauka mash kaninamtai, ajartinu nemase kashi tari, nu ajanam nupaa jingkiartin trigoa nunisang tsapaiti tusa araamiayi. Tura araa umis waketi-miayi. ²⁶⁻²⁷Tura trigo tsapaamtai, nupaasha tsapaimiayi. Tura nupaa tsapaamtai, aja takau ainau nuna wainkar, ajartinun weriar iniinak: ‘Apua ¿ameka pengke trigo araachmakum? ¿Tura nupaasha pasé aa nusha itirak tsapaiya?’ tiarmiayi. ²⁸Tu iniinam ajartin aimiak: ‘Wína nemasur aitkayi,’ timiayi. Tamati ni inatiri ainau ataksha iniinak: ‘¿Tura nu nupaa pasé aa nuka waruka uwertaram tatsume?’ ²⁹Tu iniinam nuka

aimiak: ‘Atsa, turuwairap. Nupaa uweakrum trigo uweni tusaram inaisataram. ³⁰Mai metek tsakararti tajarme. Tura mai metek tsakaramtai, juuktin kinta jeamtai, chikich ajan takau ainaun akupkan: Nupaa eemkar uwerar irumrar jingkiawar epeewarti. Nuniasha trigon juukar chumpiwar, jeanam ukusarti tusan akupkatatjai,’ ajartin timiayi.” Jesús tu nuikiartutai chichamjai iin nuitamramiaji.

Mostaza jingkiaji pachis etserkamuri
(*Marc. 4.30-32; Luc. 13.18-19*)

³¹⁻³²Nunia Jesús ataksha chikich nuikiartutai chichaman ujatmak: “Yuse aintsri itiru yujainawa tusan, chikich nuikiartutai chichamnasha nekamtikiatjarme. Anturtuktaram. Mostaza jingkiaji chikich jingkiaji nangkamasang tuupchitai. Aints nuna ni ajarin araan, tsapai tura tsakar chikich arakan nangkamasang numia nunisang juun wajaayi. Tura kanawe timiá saram asamtai, chingki yakiiya kaunkar, mostaza kanawen pasungminawai,” Jesús turammiaji.”

Pang pachimtain pachis etserkamuri
(*Luc. 13.20-21*)

³³Nunia ataksha chikich nuikiartutai chichaman ujatmak: “Nuwa pangkan najanatas trigo sairin nekapmar, pang pachimtaijai pachimui. Yus aints ainaun nayaimpinmaya ina nuka nu nuwa turawa nunisang turawai,” turammiaji.

Jesús nuikiartamun untsuri
aints ainaun ujakmau
(*Marc. 4.33-34*)

³⁴Jesús nuikiartutai chichaman untsuri aints ainaun nuinimiayi. Antsu nuikiartu-

y 13.31 (Yuse aintsri ainausha mianchau ainayat, mostaza nunisarang nukap yujarartinuitai, taku timiayi.)

tai chichamchaujaingkia aints ainaun nuinichmiayi. ³⁵Jesús aints ainaun tu nuiniaru asa, yaanchuik Yuse chichame etserin aarmaurin miatrusang umikmiayi. Nu aarmauka nuwaitai:

“Aints ainaun nuikiartutai chichamjai ujaktinuitjai. Yus nu nangkamtaik nintimramia nuna aints pengké nekaach-minun wainiatnak, wikia aints ainaun chichasan nekamtikiatnuitjai,” tu aarmawaitai.

Nupaa trigojai pachimramun pachis taku tawai tusa etserkamuri

³⁶Jesús aints ainaun ukuki, jea wayaamtaí, ni nuiniatiri ainautisha jea wayaar Jesús chicharkur: “Nupaa trigojai pachimramu ajanam araamu nuikiartutai chichamka nuwaitai tusam ujakratkata,” timiaji.

³⁷Takurin Jesús iin airmak:

“Ayu, anturtuktaram. Wikia aints ayatun Yus akupkamu asan, aints trigo jingkiajin araawa nunisketjai. ³⁸Tura ajan pachisan taja nunaka mash nungkanmaya ainaun takun tajai. Tura trigo jingkiaji taja nunaka Yusen nekasampita tinu ainaun takun tajai. Antsu nupaa pasé aa nuna pachisan taja nunaka Satanásan umirkaru ainaun takun tajai. ³⁹Aints nupaan pasé araamia nuna pachisan taja nunaka Satanásan takun tajai. Tura trigon juukmaun pachisan taja nunaka nungka amuamunam Yus aints ainaun mash irurmanum ni takatrin jiiistin takun tajai. Tura ajan takau ainaun pachisan taja nunaka Yuse awemamuri ainau aints pasé ainaun, tura pengker ainauncha irurtinuitai takun tajai. ⁴⁰⁻⁴¹Wikia aints ayatun Yus akupkamu asan, Yuse awemamuri ainaun akupkan, chikich aintsun tunau takamtikin ainaun,

tura tunau takau ainauncha mash irurarti tusan awematnuitjai. Ajan takau ainau nupaan yaruakar keemakartas jinun japinawa nunisarang Yuse awemamuri ainau tunau ainaun irurartinuitai. Nungka amuamunam tu atinuitai. ⁴²Tura tunau ainaun ji tuke kajintrashstinnunum chumpiawaram, nuni wait wajainak juutinak tura nain katertinak matsamsartinuitai. ⁴³Tura Yuse wakeramuri umirkaru ainau ni Apaachiri Yuse pujutirin jear, tsaa jiiitsumir tsantua nunisarang pujusartinuitai. Atumka wi etsermaur antuku asaram nintimrataram,” Jesús turammiaji.

Kuri uukmaun pachis etserkamuri

⁴⁴Nunia Jesús ataksha iin nuitamak: “Yusnum pujustinun pachis chikich nuikiartutai chicham antuktaram. Yusnum pujustinka kuri kajunam chumpiar nungka taimunam uukmawa tumawaitai. Tura asamtai nu kajun uukmia nuka jakamtaí, chikich aints nungkan tai kajun aneachmaun wainak urak jiiis waras, nunia ataksha epeni nungkajai yukuar ni jeen waketki, ninu aa nuna mash suruk, nunia kuikiancha mash irur, nu kuikijaji ajanka sumawai. Tura ajan sumaku asa, nu kajuka niinuitai,” Jesús turammiaji.^z

Shaak akikian pachis etserkamuri

⁴⁵Nunia Jesús ataksha nuitamak: “Kichnasha tajarme: Yusnum pujustin pachisrum chicham antuktaram. Aints shaakun sumin shaak nekas akik shiiram wawiknumia jukimun eaktinuitai. ⁴⁶Tura wekaa wekaaka kichik shaakun timiá akikian wainak, sumaktatkama kuikiari jeachu asamtai, ninu aa nunaka mash suruk, nujai nu shaakun sumaktinuitai.

z 13.44 (Nu kajuka Yusnum pujustinua tumawaitai. Yusnum pujustinka mash nungkanam aa nuna nangkamasang timiá pengkeraitai, taku timiayi.)

Nu shaakun timiá akikian aints wakerina nuna nangkamasarang Yusnum pujustin-naka nekasar wakerukartinuitai,” Jesús turammiaji.

Reden pachis etserkamuri

⁴⁷Nunia Jesús ataksha iin nuitamak: “Kichnasha tajarme: Yusnum pujustinka red sarma tumawaitai. Kuchanam reden nangkimiawar namaknasha mash pachitsuk achiinawai. ⁴⁸Nunia red piakamtai, namakan achiu ainau japikiar kaanmatkanam tuksar, namakan jiisar, pengker ainaun changkinnum chumpinawai. Antsu yuchatai ainau kuchanam japinawai. ⁴⁹Nungka amumanum aints namakan achiinawa nunisarang Yuse awemamuri tunau nintintin ainaun akankar, tura pengke nintintin ainauncha akankar irurartinuitai. ⁵⁰Tura tunau ainaun ji tuke kajintrashtinum chumpiawaram, nuni wait wajainak juutinak tura nain katertinak matsamsarti-nuitai,” Jesús turammiaji.

Yaanchuik antukmiarume tura yamai antukurme nusha nuiniartaram

⁵¹Nunia ni nuiniatiri ainauti ininmak: —¿Atumsha wi etserkaja nu paantak antukuram? —turammiaji.

Tu ininmamtai:

—Ja ai, Apuru, —timiaji.

⁵²Tu aimkau asakrin ataksha chicharta-mak:

—Yus aints ainaun nayaimpinmaya inawa nuna pachis Yuse chichame nekau chichaman nuimiaru asa, chikich ainaun nuiniartas wakerakka, jeenua tumawaitai. Jeentin ni aintsrin yuumamurin suwak, yaanchuik sumakmia nuna, tura yamai sumakma nunasha ni aintsri yuumamuri-jai metek suawai, —Jesús turammiaji.^a

Jesús Nazaretnum pujusmauri

(Marc. 6.1-6; Luc. 4.16-30)

⁵³Nu nuikiartutai chichaman mash umis, Jesús nunia jiinki, ⁵⁴ni tsakarmaurin wemiayi. Tura nuni jea, iruntai jeanam waya, aints ainaun nuiniatan nangkama-miayi. Tura nuninam aints ainau untsturi Jesúsua chichamen antukar nintiminak:

—¿Junasha yáki ni nekamtairincha nuiniaria? ¿Wainchati takatan turati tusasha, yáki kakarmarincha susaya? ⁵⁵¿Juka tau takakminu uchirinchukai? ¿Ni nukuri Maríchukai? ¿Tura ni yachí Santiago, tura José, tura Simón, tura Judas naartinchukai? ⁵⁶Ni umaji iijai pujuinauka mash wainiaji. ¿Tuniana jusha nekamtairincha tura kakarmarincha juwawa? —tunaiyarmiayi.

⁵⁷Tura asar Jesúsán suwirpiaku jiiinak pachischarmiaji. Pachischaram Jesús chicharak:

—Yuse chichame etsernun aints mash anturinawai. Antsu ni nungkarin pujuinausha ni weari ainausha anturina-tsui, —timiayi.^b

⁵⁸Tura nunia aints ainau niin nekasam-pita tichau asaramtai, Jesús nuningkia wainchati takatnaka untsurinka turachmiaji.

Imiakratin Juankun maamuri

(Marc. 6.14-29; Luc. 9.7-9)

14 ¹Jesúsán pachisar untsuri chichainamtai, Galilea apuri Herodes nu chichamnasha antukmiaji. ²Tura asa ni inatiri ainaun chicharak: “Nekas Imiakratin Juankuitai. Nuka jakayat jakamunmaya nantakin asa, Yuse kakarmarijai wainchati takatan takaawai,” ningki nintimias timiayi.

a 13.52 (Atumsha wína chichamur paan antuku asaram, nu aintsua nunisrumek yaanchuik antukmiarume nusha, tura yamai antukurme nusha chikich ainau nuiniartaram, taku timiayi.)

b 13.57 (Juan 4.44)

³⁻⁵Herodes ni yachí Felipe iwiaaku pujaun wainiat, yachí nuwarin nuwatkamiai. Nu nuwaka Herodías naartinuyayi. Tura asamtai Juan apu Herodesan chicharak: “Yachim iwiaaku pujau wainiatum, ni nuwari nuwatkamiamen nunaka Yus surimiawai,” timiayi. Tamati apu Herodes: Turutam tusa, Juankun maatas wakerayat, aints ainau chichainak: “Juan nekas Yus akupkamu asa, Yuse chichamen etserui,” tinu asaramtai, Herodes aints ainan shamak: Juankun maataj tutsuk ni suntari ainan akupak: “Aya achikrum kársernum engkeataram,” tama suntar ainau Juankun achikiar kársernum engkewarmiai.^c

⁶Turuwaramtai apu Herodesa akiinamuri kinta tsawaaramtai, Herodes: Jiiritaram tusa, ni aintsri ainan untsukmau asar, mash Herodes pujamunam iruntraramtai, Herodíasan nawantri waya ningki jiaamramiai. Tura jiaamak apu Herodesan timiá pengker awajam, ⁷nuka nawantan chicharak: “Yusjai nekasn tajame: Waring achat ame seatkumningkia, nunaka nekasn surittsuk susatatjame,” timiayi.

⁸Tamati ni nukurin weri:

—¿Warinak seataj? —tu iniam, tu tita tusa akatramu asa, nu nawanka apu Herodesan weri:

—Imiakratin Juanku muuke puwatnum engkeam surusta, —timiayi.

⁹Tama nuna antuk, apu Herodes wake mesekiat, irau ainausha mash antinamunam Yusjai tajai tinu asa, ayu timiayi.

¹⁰Tura ni suntarin akatar akupak:

—Juanku muuke akakrum itataram, —tama suntar ainau kársernum weriar muuken akakar, ¹¹puwatnum engkewar nawantan susarmiai. Tura susam nawan puwatun juki nukurin susamiai.

¹²Turamtai Juanku nuiniatiri ainau kaunkar ni namangken jukiar, aints

iwiartainum iwiarsarmiai. Nuna turuwar Jesúsan ujakartas wearmiayi.

Jesús cinco warang aintsun yuramuri
(*Marc. 6.30-44; Luc. 9.10-17; Juan 6.1-14*)

¹³Jesús Galilea nungkanam pujus, Juan maamun chichaman antuk kanunam engkema, ningki aints atsamunam wemiayi. Weamtai aints ainau nuna nekaawar, kucha yantamen Jesús nujamkatnunam wearmiayi. ¹⁴Tura nuni jearamtai, Jesús nujamak aints timiá untsurin wainak wait anentramiai. Tura asa jaun itaarmia nuna tsuwarmiai. ¹⁵Tsaa akaamtai, ni nuiniatiri ainauti Jesús chicharkur:

—Tsaa akaawai. Juni aintsu pujutiri atsau asamtai, yakat arakchichu amaunum werum, yurumak sumaataram tusam aints ainau akupkarta, —timiayi.

¹⁶Tu takurin Jesús chichartamak:

—Ju aints ainauka wecharminuitai. Antsu atume ni yuwatniuri susataram, —turammiaji.

¹⁷Turammatai iikia chicharkur:

—Pang iinuka ju uwejchik nuke arutramji. Namaksha jimiarchik nuke arutramji, —timiayi.

¹⁸Tu takurin Jesús chichartamak:

—Nuka wína surustaram, —turammiaji.

¹⁹Tura aints ainau chirichrinam pujusarat tusa akatram, mash chirichrinam pujusaramtai, Jesús pangkan ju uwejchik takus, tura namaknasha jimiarchik takus nayaimpinmanini pangkai jiiimias, Yusen maaketai timiayi. Nunia pangkan puuk, ni nuiniatiri ainautin suramsamtai, iisha aints ainau mash susarmiai. ²⁰⁻²¹Tura susaram mash yuwaar tutuararmiai. Nuna yuwaruka nuwa ainausha, tura uchi ainausha nekapmatsuk aishmangkuk aishmangkuk

cinco warang (5,000) yuwarniayi. Tura yuwaar umisaramtai, ampintrausha doce (12) changkin chumpiar jukimijai.

Jesús kucha japen nawejai wekaasamuri
(*Marc. 6.45-52; Juan 6.16-21*)

²²Nunia Jesús ni nuiniatiri ainautin chichartamak: “Kanunam engkemaram katingkrum eemajatarum. Wikia aints ainaun aujsan umisan winitajai,” turammijai. ²³Tura aints ainaun aujas ukuki, ningki Yujai chichastas muranam wakamiayi. Tura kashi japeng ningki Yusen seak pujai, ²⁴kanuka kucha japen wemiayi. Tura weai, nase nujinmanini kakar nasenmatai, kucha tamparamuri chaker chaker wajamtai, kanu ukantias wakerimiayi. ²⁵Atash shinutnak wajai, Jesús juun kuchanam nungkanma nunisang nawejai najamas wekaas winimiayi. ²⁶Jesús winamtai, ni nuiniatiri ainauti nu wainkar shamakur kakarar chichaakur:

—Wakanchawashi, —tunaimijai.

²⁷Tu takurin Jesús chichartamak:
—Kakaram wajastaram. Wiiťjai shamrukairap, —turammijai.

²⁸Tama Pedro chicharak:

—Apuur, nekasam ametkumka, ame wekaame ani winasha winita turutta, —timiayi.

²⁹Tama Jesús ayaak:

—Ayu, winita, —timiayi.

Tama Pedro kanunmaya jiinki, kuchanam nawejai najamas wekaas, Jesúsnum jeatas wemiayi. ³⁰Turayat nase kakaram nasentun wainak Pedroka shamkamiayi. Tura shamau asa, kuchanam wayaak untsumak:

—Apuur, uwemtikurta, —timiayi.

³¹Nu tamaujai metek Jesús ni uwejen achik chicharak:

—¿Waruka nekasampita turutsume? ¿Waruka tujinkachuitme tu nintimtur-
tsume? —timiayi.

³²Tura Jesús Pedrojai kanunam engkemawaramtai, nasengka nangkamar-
miayi. ³³Turamtai ni nuiniatiri ainauti Jesús naka tikishmatrar:

—Nekasam Yuse Uchirinme, —timiayi.

Jesús jau ainaun tsuwarmauri
(*Marc. 6.53-56*)

³⁴Tura juun kuchan katingkiar, Genesaret nungkanam nujamkamiayi. ³⁵Tura nujamkakin nunia aints ainu nuna wainkar: “Auka Jesúsaitai,” tusar nuna nekaawar, nu nungkanmaya ainausha mash nekaawarat tusar chichaman akupkaramtai, jau ainaun Jesús pujamunam itarmiayi. ³⁶Tura asaramtai jau ainu Jesús seainak: “Wejmakrumi ninukmaurinak antingtasan wakerajai. Nu tsangkatrukta,” tiarmiayi. Tura nuna antingkiaruka mash tsaarmiayi.

**¿Aintsu tunaari warutmak awa?
tusa etserkamuri**
(*Marc. 7.1-23*)

15 ¹Tura fariseo ainu Moisésa chichame nuikiartin ainuajari Jerusalénnumia tariar, Jesús iniiinak:

²—Ami nuiniatiram ainu ¿waruka yaanchuik ii juuntrin akupkamu umirtsuksha uwejen ikimiatskesha yuwinawa? —tiarmiayi. ³Tinamtai Jesús aimiak:

—Yus: Wína chichamur umirtuktaram tusa, atumin akupturmakmia nu umirtsuk pujayatrumsha ¿waruka aintsu chichamesha juun ainu tinu armia nusha umirume? ⁴Yus chichaak: ‘Aparmesha tura nukurmesha pengker awajsataram. Tura aints ni aparincha, tura ni nukurincha pachis pasé chichaamtaikia, nu aintsnaka maawarti,’ Yus timiayi. ⁵Antsu atumka chichaakrum: Aints ni aparincha, tura ni nukurincha chicharak: ‘Wikia winar aa nunaka mash Yusen susamjai. Tura asan atumin susatasan wakerayatun

yamaikia tujintajai.’ ⁶Tu tinu ainauka ni aparincha, tura ni nukurincha yaaitsuk pujusartinuitai tarume. Tu tinu asaram atumi juuntri tinu armia nu umiktasrum, Yus winia chichamur umirtuktaram tímia nuka inaiyarne. ⁷Waitrin ainautiram, yaanchuik Yuse chichame etserin Isafas atumin pachis aarmia nuka nekasaintai. Nu aarmanauka nuwaitai:

⁸Yus chichaak: ‘Nu aints ainauka aya chichasarang: Ameketme juuntam turutinawai. Antsu nintijai yaja nintimsar, wínaka nintimturinatsui.

⁹Tura aintsu akupamurinak nuininayat wínaka nangkamiar: Ameketme juuntam turutinawai,’ timiayi. Isafas tu aarmiayi, —Jesús timiayi.

¹⁰Nunia fariseo ainaujai tura Moisésa chichamen nuikiartin ainaujaisa chichas umis, ataksha aints ainaun untsuk chicharak:

—Anturtuktaram. Tura wi taja nuka nekaataram. ¹¹Aintsu jangken waring achat waya nujaingkia tunauka wajaschatnuitai. Antsu aintsu nintinia jiinua nuka aints ainaun tunau awajmamtikui, —Jesús timiayi.

¹²Tama ni nuiniatiri ainauti Jesús aujsatasar tarir chicharkur:

—¿Fariseo ainau chicharkum tame nuna antukar kajertamina nu nekamek? —timiaji.

¹³Tu tama Jesús iin airmak:

—Ja ai, nekajai. Nuka wína Apaachir nayaimpinam puja nuna ainsrinchu asaramtai, nupaa kangkaptuk uwerar japatnua nunisarang artinuitai. ¹⁴Inaisataram. Nuka wína chichamrun umitan nakitinau asar, aints wainmichua nunisarang ainawai. Aints wainmichu ayat, chikich wainmichun jintan inaktustas wakera nunisarang ainawai. Aints wainmichu chikich wainmichun jintan

inaktustas wakerayat, jinta weenak mai waanam iyaartinuitai, —turammiaji.^d

¹⁵Turammatai Pedro Jesúsán chicharak: —Aintsu jangken waring achat waya nujaingkia tunauka wajaschatnuitai, tame nuka ¿warí pachismea tame? Nuka paan ujakratkata, —timiayi.

¹⁶Tama Jesús chichartamak:

—¿Atumka nuka nekatsrumek? ¹⁷Aints yurumkan yuwamu jangkenam wayaangka nintinam wayaachu asamtai tunauka wajatsui. Tura wakenam wayau asa, nuniangka ataksha jiini. ¿Nuka nintimtsurmek? ¹⁸Antsu aintsu chichame ni jangkenia jiina nuka nintinia jiinkin asa, nuka aintsun tunau awajmamtikui.^e

¹⁹“Tunau nintimtai ainauka aintsu nintinia jiinui. Tura aints maatnusha, tura aishrintin wakeruktincha, tura nuwentin wakeruktincha, tura tsanirmatnusha, tura kasamkatnusha, tura anangkartuatnusha, tura Yusen pachis, nunia aintsun pachisar pasé chichastincha nintinmaya jiinu asa, ²⁰aintsun tunau awajmamtikui. Antsu ikimiatsuk yuta yuwatniuka aintsu nintin tunau awajmamtiksui, —Jesús turammiaji.

Chikich nungkanmaya nuwa Jesúsán nekasampita timiauri
(*Marc. 7.24-30*)

²¹Jesús ni nuiniatiri ainaujai nu nungkanmaya jiinki, chikich nungkanam Tiro yaktanam, tura Sidón yaktanmasha wemiayi. ²²Tura nuni jea, Canaánumia nuwa judío chutiat, Jesúsán jiistas tari untsuk:

—Apu Davidta weariya, wait anentrurta. Iwianch nawantru namangken engkemuamu asa, nukap wait wajawai, —timiayi.

²³Tamaitiat Jesúska aimtsuke wajamiayi. Turamtai ni nuiniatiri ainauti tarir chicharkur:

—In nemartamas untsumkinij waja juka akupkata, —timiaji.

²⁴Tu takurin Jesús nuwan chicharak:

—Israel ainau uwija mengkakawa nunisarang pujuinau asaramtai, Israelnu-mak wína Yus akuptukmiayi, —timiayi.

²⁵Tama nu nuwaka Jesúsán naka tikishmatar seak:

—Apu, yainkata, —timiayi.

²⁶Tu seamaitiat Jesús nuikiartutai chichamjai ayaak:

—Uchi pangkan yuwinau atankir yawaa uchiri suamuka napchawaitai, —timiayi.

²⁷Tamaitiat nu nuwaka ayaak:

—Nekasam tame, Apuru. Antsu uchi yutairi misa wamketin ayaarunka yawaa uchiri nekasar yuwinawai, —timiayi.^f

²⁸Tama Jesús chicharak:

—Nuwachi, wína nekasampita turutu asam, ame wakerame nunisang ati, —timiayi.

Tama nu chichaamujai metek ni nawantri pengker wajasmiai.

Jesús jau ainaun untsuri tsuwarmauri

²⁹Jesús nu nungkanmaya jiinki, Galilea nungkanam wekaas, juun kucha yantamen nangkamaki, mura waka nuni keemsamiayi. ³⁰Turamtai aints wekaichau ainauncha, tura wainmichu ainauncha, tura chichachu ainauncha, tura uweje kupirkamu ainauncha, tura chikich najaiminak pujuinauncha Jesús pujamunam itaar, nawen ayaamsar pajsarmiai. Nu jau ainaun itaaramtai, Jesús mash tsuwarmiai. ³¹Turamtai aints ainau nuna wainkar chichachu ainausha chichainamtai, tura uweje kupirkamu pengker wajainamtai, tura wekaichau ainausha pengker wekainamtai, tura wainmichu ainausha pengker

wainminamtai, nuna mash wainkar nintimrarmiai. Tura Israel ainau Yusri nekas kakarmaitai tiarmiai.

Jesús cuatro warang ainaun yuramuri (*Marc. 8.1-10*)

³²Nunia Jesús ni nuiniatiri ainautin untsurmak mash irutmar chichartamak:

—Ju aints ainaun wait anentajai.

Kompatam kinta wijai iruntrar pujuinau asar, yutancha yutsuk pujuinawai. Tura asar jinta weenak, tsukarijai juwikcharai tusan, yurtsuk ni jeen awematnaka nakitajai, —turammiai.

³³Turamatai ni nuiniatiri ainauti chicharkur:

—Tura juni aints atsamunmasha aints timiá untsuri yuratasrisha ðtuniang yurumkasha sumaktaij? —timiaji.

³⁴Tu takurin Jesús ininmak:

—¿Pangsha warutma takakrume? —tu ininmamtai iikia aimkur:

—Siete (7) takakji, namakchisha jumchik takakji, —timiaji.

³⁵Tu takurin aints ainaun chicharak:

—Nungkanam mash pujustaram, —tamati ni tímia nunisarang pujusaramtai, ³⁶Jesús pangkan siete (7) amia nuna takus, tura namaknasha takus, Yusen maaketai tusa, pangkan puuk ni nuiniatiri ainautin suramsamiayi. Turamtai iisha aints ainau kichik kichik mash susamiayi. ³⁷Turakrin mash yuwaar tutuararmiai. Tura ampintramuri changkin siete (7) amia nuni chumpiamiai. ³⁸Tura nuna yuwaaruka nuwa ainausha tura uchi ainausha nekapmatsuk, aishmangkuk aishmangkuk cuatro warang (4,000) armiai. ³⁹Nunia Jesús nu aintsun: Weajai tusa kanunam engkema Magdala nungkanam wemiayi.

f 15.27 (Nu chichamka Israel ainau Yuse aintsri asaramtai, Israel ainaun yaingtinka inaitsuk winasha yainkata, taku timiayi.)

Fariseo ainau saduceo ainaujai: Wainchati takat wainkatar wakeraji timiauri
(*Marc. 8.11-13; Luc. 12.54-56*)

16 ¹Jesús nuni jeamtai, fariseo ainau saduceo ainaujai iisha nekaatai tusar taarmiayi. Tura taar Jesúsán seainak:

—Nayaimpinmaya kakarmarijai wainchati takat turata. Iisha wainkatar wakeraji, —tiarmiayi.^g

²Tu tinam Jesús ayaak: “Atum chichaa-krum: ‘Tsaa jeaak nayaim kapantin wajasamtai, kashin kinta pengker tsawartatui,’ tinuitrume. ³Tura tsawaar-kuram: ‘Mukunit nukap au asamtai, tura nayaim kapantin wajasamtai yumi jitungatui,’ tinuitrume. Nayaim jiisrumka: Kinta tu atatui tusaram nekaamnawai-trume. Antsu wi turaja nuka wainkayatrume, Yus atumin nekamtik-ramatas wakera nuka nintimtsurme.

⁴Junia pasé nintintin ainau Yusen umirchau ainayat, wainchati takatan wainkartas wakerinawai. Tura wainiat-nak wainchati takatnaka turashtatjai. Antsu Jonása turunamuriya tumau wainchatai takatnaka nunak wainkarti-nuitai,” tusa ukuki tumajin katingmiayi.^h

Fariseo ainau pasé nintimaurin pachis etserkamuri
(*Marc. 8.14-21*)

⁵Tura Jesús ni nuiniatiri ainautijai tumajin katingkiar, pang kajinmakir jukichmiaji.ⁱ ⁶Turakrin Jesús chichartamak:

—Fariseo pang pachimtai jurukirap, tura saduceo pang pachimtai risha jurukirap, —turammiaji.

⁷Turamkurin ni nuiniatiri ainauti chicharnaiyakur:

—Pang kajinmakin asakrin turamtsu-jiash, —tunaimiaji.

⁸Tu chichaakur pujarin Jesús nuna antuk iin chichartamak:

—¿Waruka pang kajinmakmiau pachisrumsha chichaarme? ¿Waruka wina chichamrusha nintimtsuksha pujarme? ⁹¿Pang cinco (5) amia nujai cinco warang (5,000) aints yuramuka nuka aneaktsurmek? Tura ampinramuri ¿warutam changkina jukimiarume nusha aneaktsurmek?^j

¹⁰“¿Nuniasha pang siete (7) amia nujai cuatro warang (4,000) aints yuramuka nuka aneaktsurmek? ¿Tura ampinramuri warutam changkina jukimiarume nuka aneaktsurmek?^k

¹¹“¿Waruka wina chichamur nintimtsuksha pujarme? Fariseo pang pachimtai jurukirap, tura saduceo pang pachimtai risha jurukirap, taja nuka wikia pangnaka tatsujrume, —Jesús turammiaji.

¹²Turammatai ni nuiniatiri ainauti paan nintimrar: “Pang pachimtai pachiska turamtsuji, antsu fariseo ainau, tura saduceo ainauka anangkartin asaramtai, ni nuikiartamuka anturkairap tusa turamji,” tusar nekaamiaji.

Pedro Jesúsán: Mesiasaitme timiauri
(*Marc. 8.27-30; Luc. 9.18-21*)

¹³Nunia Jesús ni nuiniatiri ainautijai Cesarea Filipos nungkanam junta weamunam Jesús iin ininmak:

—Wikia aints ayatun Yus akupkamu asan, chikich aints ainau wina pachitsar: ¿Warí aintsuita turutinawa? —tu ininmasmiaji.

¹⁴Tu iningkratmatai aimkur:

—Chikich ainau amin pachitmasar: Imiakratin Juankun maawarmia

nuchawashi turaminawai. Tura chikitcha Elíaschawashi turaminawai. Tura chikitcha: Jeremíaschawashi turaminawai, antsu nuchawaitkusha, chikich yaanchuik Yuse chichame etserin pujumia nuwashi turaminawai, —timiayi.

¹⁵Tu tinu asakrin Jesús ataksha ininmak:

—¿Tura atumsha winasha warintru-trume? —turammiaji.

¹⁶Tu iniam Simón Pedro aimiak:

—Ameke Mesiasaitme. Yus tuke iwiaaku puja nuna Uchirinme, —timiayi.^l

¹⁷Tama Jesús chicharak:

—Nekasam tame, Jonása uchiri Simónka. Aints kichkisha aminka nunaka nekantikramacharmayi, antsu wina Apaachir nayaimpinam puja nu amin nekantikramau asamtai tame. Ame turutin asakmin, Yus amincha waramtikramsati tajame. ¹⁸Tura nunasha tajame: Ameke kaya tumau asakmin Pedro inaikiamuitme.^m Tura aints ainu kaya pisujai jean jeamina nunisnak wina nekasampita turutin ainauka wina aintsur arti tusan inaikiatnuitjai. Tura Yuse nemase ainausha tuke mengkakatnunam weenausha wina aintsur ainaun maawartin ainayat, niin nepetkartatkamawar pengké tujinkartinuitai.

¹⁹Tura asamtai ameka aints waiti yawikmaun urawa nunismek ju nungkanam pujuinau wina chichamur nayaimpinam jeatin pachisam etserkuningkia, aints ainu nu chichaman nekasampita tinauka nayaimpinmasha jeartinuitai. Tura nayaimpisha yawikmawa nunisang au asamtai, ju nungkanam nu chichaman nekasampita ticharu ainauka nayaimpinmaka jeachartin ainawai, —Jesús timiayi.ⁿ

²⁰Nunia ni nuiniatiri ainautin chichar-tamak:

—Wina pachitsaram: Auka Mesiasaitai tusarmeka aints kichkisha ujakairap, —turammiaji.

Jesús ni jakatniurin pachis etserkamuri
(*Marc. 8.31-9.1; Luc. 9.22-27*)

²¹Nu kintati Jesús ni nuiniatiri ainautin ni jakatniurin pachis ujatmatan nangkamamiayi. Tura ujatmak:

—Wikia Jerusalénnum wetin ajai. Tura nuni wi jeamtai, judío juuntri ainu, tura sacerdote juuntri ainausha, tura Moisésa chichame nuikiartin ainausha nukap wait wajakti tusar, wina mantuwartatui. Tura wainiatnak kempatam kinta jakan tepayatun, ataksha nantaktatjai, —turammiaji.^o

²²Tama Pedro Jesúsán akanak juki chicharak:

—Apuru, Yus surimramkati. Aminka nunaka turutmacharti, —timiayi. ²³Pedro Satanása nunisang chichau asamtai, Jesús Pedron ayanmatar chicharak:

—Satanása weta. Ameke winaka itit awajtame. Ameke Yuse wakeramuringkia nintimsume, antsu aints wakerina nuke nintimme, —timiayi.

²⁴Nunia ni nuiniatiri ainautin chichar-tamak:

—Aints wina nemartustas wakerakka ni wakeramurinka inais, wikia mianchawaitjai tusa, aya winak nemartusti. Tura wina nemartakka, aints ni krusrin juwawa nunisang ni jakatniurin shamtsuk winak nemartusti. ²⁵Aints ningki nintimias: Wikia jakashtatjai tauka jakatnuitai. Antsu aints wina anentak jakatata nuka jakayat tuke iwiaaku pujustinuitai.^p

l 16.16 (Juan 1.49;6.68-69) **m 16.18** (Pedroka kaya taku tawai.) **n 16.19** (Juan 20.23)
o 16.21 (Mat. 17.23;20.19;27.63; Marc. 8.31;9.31;10.33-34; Luc. 9.22;18.31-32)
p 16.25 (Mat. 10.38-39; Luc. 14.27)

²⁶“Nintimrataram. Aints ju nungkanam aa nuna mash sumak, pengké yuumatsuk pujayat, ni wakani tuke mengkakamtai-kia, čitiurak tuke iwiaakusha pujusting? Tura aints nekas uwemratas wakerakka, tura tuke Yusnum pujustas wakerakka čwarutam kuikianak akiimiak uwemrat-nuita? ²⁷Wisha aintsutiatnak Yus akupkamu asan, wína Apaachiru kakarmarijai winakun, tura ni awemamurijai winakun, aints ainaun mash ni turamurijai metek pengker ainauncha pengker awajstartinuitjai, tura tunau ainauncha wait wajaktinnasha susartinuitjai.^q

²⁸“Nekasan tajarme: Wikia aints ayatun Yus akupkamu asan, Yuse kakarmarijai aints ainaun inartatja nunaka wijai juni tsaniasar pujuinauka jatsuk waitkartatui, —Jesús turammiaji.

Jesúsa yapaijmiamamuri
(Marc. 9.2-13; Luc. 9.28-36)

17 ¹Seis (6) kinta nangkaramantai, Jesús Pedroncha, tura Santiagoncha, tura ni yachiin Juannasha akanak juki, mura juunnum wakarmiyai. ²Tura wakaarai, Jesús aneachmau yapaijmiamajiiitsumir wajaun wainkarmiyai. Tura yapiisha tsaa tsantua nunisang tura entsatirisha nekas puju tsaa tsantua nunisang jiiitsumir amiyai. ³Nunia Moisésnasha, tura Elíasnasha, Jesúsjai chichainaun wainkarmiyai. ⁴Nuna wainak Pedro Jesúsan chicharak: —Apu, juni ii pujustinja nekas pengkeraitai. Ame wakerakminkia, kempatam jeawach jeamkami, kichik aminu, tura kitcha Moisésnau, tura kitcha Elíasnau ati, —timiayi.

⁵Pedro tu chichaak wajai, yurangkim nekas puju winimiayi. Turamtai

mikinum wajainai, nu yurangminmaya chichaun antukarmiyai. Yus niin chicharak:

—Juka wína Uchiruitai, wína aneetiruitai. Junaka pengker nintimtusan pujajai. Juka nekasrum anturkataram, —timiayi.^r

⁶—Yus tamati nu chichaman antukar, Jesúsna nuiniatiri ainau nukap shaminak pinakumrar tepesarmiyai. ⁷Tuminamtai Jesús taa, ni nuiniatiri namangken anting chicharak:

—Shamkairap, antsu wajaktaram, —timiayi.

⁸Tama pangkainiar jiiisar, aya Jesúsna wainkarmiyai.

⁹Nunia muranmaya kuankiar, Jesús ni nuiniatiri ainaun akatar akupak:

—Aints ayatun Yus akupkamu asan, wikia jakamunmaya nantaatsain atum waitkarume nuka pengké etserkairap, —timiayi.

¹⁰Tama ni nuiniatiri ainausha Jesúsna iniinak:

—čMoisésa chichame nuikiartin ainausha warukaya Mesáaska taatsaing, Elías eemak tatinuitai tinawa? —tiarmiyai.

¹¹Tu tinam Jesús aimiak:

—Nekas Elías eemak taa mash iwiaratnuitai. ¹²Tura wisha atumin tajarme: Elíaska yaanchuik tamiayi. Tura waininayat aints ainau: Juwaapita tusar pengké nekaacharmiyai. Antsu pasé asar, niin pasé awajstas wakeriarmia nunaka mash turuwarmiyai. Tura wínaka Yus akuptuku waitinayat aints asamtai, winasha nunisarang wait wajakti tusar, pasé awajtukartatui, —Jesús timiayi.^s

¹³Tama ni nuiniatiri ainau nintimsar: Imiakratin Juankun pachisampi tawa tusar nekaawarmiyai.^t

Jesús uchinmaya iwianch jiikmiauri*(Marc. 9.14-29; Luc. 9.37-43)*

¹⁴Ataksha aints pujuinamunam jearam-tai, aints tari Jesúsán naka tikishmatramiayi. Tura chicharak:

¹⁵—Apu, uchir wait anentrata. Nukap wait wajawai. Tuke wichi wajaki, nuniangka ji kapaamunam ayaaweawai.

Tura entsanmasha pe ayaaweawai.

¹⁶Tura asamtai ami nuiniatiram ainaun uchirun tsuwaturarat tusan itarmiajai. Turayat tujinkari, —timiayi.

¹⁷Tama Jesús chicharak:

—Maj, Yus nintimchau asaram, winasha nekasampita turutarat tusanka çwarutam musachik atumjaisha pujustaj? Tura tupin nintimrataram tusanka çwarutam musachik atumnasha nakastaj-rume? Watska, uchi itartitaram, —timiayi.

¹⁸Tama uchin itarim, Jesús uchi namangkenia iwianchin jiiki jiyak akupkamiayi. Turam nu uchikia pengker wajasmiaayi.

¹⁹Turamtai jumchik arus ni nuiniatiri ainauti Jesúsjai kanakar iik pujusar Jesús chicharkur:

—çWarukakrik iikia iwianch jiiktatka-marsha tujinkamji? —timiaji.

²⁰Tu takurin Jesús chichartamak:

—Yus miatrusrumek nintimtachu asaram, iwianch jiiktatkamaram tujintarme. Nekasan tajarme: Mostaza jingkiayi timiá tuupich ayat nuka tsapai, chikich nupaa nangkamasang nekas juun wajaayi. Atumsha mianchau ayatrumek, winaka nintimtursaram: Nekasam tujinkachuitme turutkurminkia, wi turataram tinu asamtai, mura nekas juun wainkaram, nu mura chicharkuram: ‘Juni mengkakam ataksha atu tsapuitia,’ takurminkia turunamnawaitai. Aints

wína: Nekasampi tujinkachuitme turutuka ni tujinkamuringkia pengké atsutnuitai. ²¹Antsu ijiarmaram Yus nukap seatkuram nu iwianch ainau jiiktinuitrume, —turammiaji.^u

Jesús ataksha ni jakatniurin pachis etserkamuri*(Marc. 9.30-32; Luc. 9.43-45)*

²²Nunia jiinkir Galilea nungkanam iruntrar wekaasar, Jesús ni nuiniatiri ainautin chichartamak:

—Wikia Yus akupkamutiatnak aints asamtai, aints ainau wína mantuwartas achirkartatui. ²³Tura maamaitiatnak kampatam kinta tepayatun ataksha nantaktatjai, —turammiaji.^v

Turamin asamtai ni nuiniatiri ainauti nu chicham antukar nukap wake mesekmiaji.

Yuse jee iwiarami tusar akiimiakmauri

²⁴Nunia jiinkir Jesús ni nuiniatiri ainautijai Capernaum yaktanam jeamiaji. Tura nuni jearin, Yus seatai juun jea iwiarami tusar kuikian juu ainau Pedron jiisar iniinak:

—çYuse jee iwiaratnun akiimina nunasha atumi nuitamnusha akiimiaktim-piash? —tiarmiayi.

²⁵Tu iniam Pedro:

—Ja ai, —timiayi.

Tura jea waya chichaatsaing, Jesús niin chicharak:

—Simónka çamesha itiur nintime? çJunia apu ainausha yana kuikiarina juwinawa? çNinu aintsri kuikiarinak juriina? çAntsu turachkungka chikich aintsu kuikiarinak juriina? —timiayi.

²⁶Tu iniam Pedro aimiak:

—Nekasar chikich ainau kuikiarin juriinawai, —tamati Jesús chicharak:

—Nekasam tame. Ii nungkarin akiinau-tikia akiimiakchatnuiti. ²⁷Antsu iin

kajertamkarai tusar akiimiakmi. Ame tsau jukim kuchanam weta. Tura nangkimiam namak nu nangkamtaik tsaun yuwa nu wakemim, jangke iwiankam kuik engketu wainkatatme. Nu kuik jukim, Yus seatai jeanam weme, jean iwiararti tusam, aminusha tura winarusha ati tusam akiimiakta, —Jesús timiayi.

**Yaachita chikich ainaun
nangkamakesha timiauri**
(*Marc. 9.33-37; Luc. 9.46-48*)

18 ¹Nu kintati ni nuiniatiri ainauti Jesús tarir chicharkur:
—¿Yuse pujutiri nayaimpinmaka aints ainau jeartinnua nuka chikich ainaun nangkamasarkesha ya ainia? —timiaji.^w
²Tu iniam Jesús uchin untuk japen awajas ni nuiniatiri ainautin ³chichartamak:

—Nekasan tajarme: Atumi nintimtaiiri yapajiarum uchua nunisrumek wina nintimturachakrumka, Yuse pujutirin nayaimpinmaka jeashtinuitrume. ⁴Tura asamtai aints miajuitjai tutsuk, antsu ju uchua nunisang nintimturas pujauka chikich ainaun nangkamasang Yuse pujutirin jeatnuitai. ⁵Aints wina nintimturas pujauka ju uchua nunisang aints mianchau ainaun nekas pengker awajuka winasha nunisang pengker awajutawai, —Jesús turammiaji.^x

Tunaanum jeai tusaram aneartaram
(*Marc. 9.42-48; Luc. 17.1-2*)

⁶Nunia Jesús nuikiartutai chichamjai iin nuitamak: “Tura aints uchin wina umirtinak pujuinaun tunaun takamtikma-taikia, nuna turashti tusar, tunau takamtiknu kuntujen kaya juuntan jingkiatawar, juun kunanam ujungkaram-

taikia, timiá pengker atinuitai. ⁷Chikichan tunau takamtikin ainauka tuke irunui. Antsu tunau takamtikin ainau tuke wait wajakartin ainawai.

⁸“Tura asamtai atumi uweje tunau takamtikramataikia, ataksha tunau takasai tusaram, atumi uweje met charawa nunisrumek tunaarum japaram ukuktaram. Tura tunaanum wekaakur-meka, atumi nawe met charawa nunisrumek tunaarum japaram ukuktaram. Nekasrum kichik uwejjai, tura kichik nawejaisha tuke iwiaaku pujustinnum jeatin timiá pengkeraitai. Antsu mai uwejtuk, tura mai nawentuk ji kajintrashtinnum jeatnuka timiá paseetai. ⁹Tura atumi jiijaisha tunau aa nu jiiakrumka, atumi jii kuinua nunisrumek tunaarum japaram ukuktaram. Nekasrum kichik jiijai tuke iwiaaku pujustinnum jeatnuka timiá pengkeraitai. Antsu mai jiiintuk ji kajintrashtinnum jeatnuka timiá paseetai,” Jesús turammiaji.^y

Uwija mengkakaun pachis nuikiartamuri
(*Luc. 15.3-7*)

¹⁰Nunia Jesús ataksha iin nuitamak: “Tura asamtai atumin tajarme: Yuse awemamuri aints mianchau ainaun wainin asar, wina Apaachir nayaimpinam puja nuna nakaj pujuinawai. Tura asar atumi turamurincha wina Apaachirnasha ujainawai. Tura asaramtai mianchau ainu ju uchua nunisarang pujuinauka nakitairap. ¹¹Wisha aints ayatun Yus akuptuku asamtai, aints mengkakaruru ainaun uwemtikratasan tamiajai.^z

¹²“Nintimrataram. Aints cien (100) uwijartin ayat, uwijari kichik menakam-tai, kichik noventa y nueve (99) mengkakacharu ainu muranam pujusarat tusa ukuki, kichik mengkakaun

wainkataj tusa eawai. ¹³Tura nu uwija mengkakaun wainak nukap waraawai. Antsu chikich noventa y nueve (99) mengkakacharu ainaun wainkangka miatruska waraatsui. ¹⁴Tura atumi Apaachiri nayaimpinam puja nusha nunisang aints mianchau kichkisha mengkakarti tusangka wakeratsui,” Jesús turammiaji.

**¿Cristo namarin itiurak
tsangkuratnuita? timiauri**
(*Luc. 17.3-4*)

¹⁵Nunia ataksha Jesús iin nuitamak: “Aints Yusen namarin amin pasé awajtamatikia, amek ningki akankam chichasta. Tura nijai chichaakum, ni pasé turamuri ujakta. Turakum ni anturtamkamtaikia, nu aintska uwemrati tusam yaingkume. ¹⁶Antsu amin anturtamkamchamtaikia, aints kichik tura jimiarchiksha jukim, ataksha jiiastarum weritaram. Tura chichaman paan nekaati tusaram iruntrarum chicharkataram. ¹⁷Tura pengké anturtamkamchamtaikia, Yuse aintsri iruntramunam nu aints pachisrum chicharkataram. Tura nuni chicharmaitiat, tuke antukchamtaikia, nuka Yusen umirkachua nunisketai tusaram, tura kuikian kasamnua nunisketai, tu nintimsaram inaisataram.

¹⁸“Nekasan tajarme: Atumka ju nungkanmaya ainau tunaari tsangkura-krumningkia, nayaimpinmasha ni tunaarisha tsangkuratnuitai. Tura ju nungkanmaya ainau tunaarin tsangkur-chakrumningkia, nayaimpinmasha ni tunaarinka tsangkurashinuitai.”^a

¹⁹⁻²⁰“Ataksha tajarme: Aints jimiarchiksha, tura kampatmaksha wina nintimtursar iruntrar pujuinamtaikia, wisha nijai tsaniasan pujustinuitjai. Tura asamtai ju nungkanmasha wina

nintimtursaram pujautirmeka, jimiarchiksha metek nintimsaram pujusrum wina Apaachir nayaimpinam puja nu seakrumningkia, atum searme nunaka mash umiktinuitai,” Jesús turammiaji.

²¹Tama nunia Pedro Jesús an weri iniak:

—Apu, wina yatsur pasé awajtus pujamtaisha ¿warutmanak tsangkurataj? ¿Sietenkeash tsangkurataj? —timiayi.

²²Tu iniam Jesús ayaak:

—Atsa. Sietik tsangkurata tatsujme, antsu pachitsuk tsangkurata tajame, —timiayi.

**Aints tsangkukratan nakitaun
pachis nukiartamu**

²³Nunia Jesús ataksha nuitamak: “Tura asamtai Yus aints ainaun nayaimpinmaya inawa nuka junia apua tumawaitai. Nu apuka ni inatiri ainaun untuk: ‘Tumashnum akirkataram,’ timiayi. ²⁴Tura untuam, nu nangkamtaik nukap tumashmiaun itaarmiayi. Nuka pengké akiimiakchamniaun tumashmiamiayi. ²⁵Tura itaaram nu aints ni tumashrin akiimiaktakama tujinkau asamtai, nu apuka chikich inatiri ainaun chicharak: ‘Tumashrin akiimiakti tusaram, nuwartuk tura uchirtuk, tura warinchurtuk mash surutkataram,’ timiayi. ²⁶Tama nu aintska apurin nakaj tikishmatar: ‘Apu, wait aneasam nakarsata. Tumashnumka mash akiktatjame,’ timiayi. ²⁷Tama nu aintsun wait anentar tumashrin mash tsangkur: ‘Akirtsuksha weta,’ tusa inatirin angka akupkamiayi.

²⁸“Akupamu asa, nu aintska jiinki, aneachmau ni apuri inatirin kichan wainkamiayi. Tura wainak, nu aintska jumchik tumashmiau asamtai, tsekengki suwenam achik chicharak: ‘Tumashmiame nuka yamaik akirkata,’ timiayi. ²⁹Tama nu

aintska tikishmatar: ‘Wait aneasam nakarsata. Tumashnumka mash akiktatjame,’ timiayi. ³⁰Tamaitiat pachischamiayi, antsu wait anentsuk nu aintsun juki: ‘Tumashnum mash akiimiak jiinkiti,’ tusa kársernum engeamiayi.

³¹Turamtai nu apu inatiri chikich ainau nuna wainkar napchau nintimrarmiayi. Tura apurin weriar, nu aintsu turamurin mash ujakarmiayi. ³²Mash ujakaram, apuka nuna antuk, nu aints utitaram tusa, ni aintsrin akupkamiayi. Tura itaaramtai, nu aintsun chicharak: ‘Netsetme. Wína wait anentrurta turutu asakmin, tumashnum mash akirtsuk asata tusan inaisamjame. ³³¿Wi amin wait anentajme aintsamek chikich amin tumashmiarmasha waruka wait anentsuksha waitkame?’ timiayi. ³⁴Tura nu aintsun kajerak suntarin untsurak: ‘Juka achikrum tumashrin akiimiakchau asamtai, tuke wait wajakti tusaram awatrataram,’ tusa ni aintsrin akatar akupkamiayi,” Jesús turammiaji.

³⁵Nunia inangnamunam chichaak:

—Atumnasha tajarme: Nu aintsua nunisrumek atumi yachí ainau tuke napchau nintimtusrum tsangkurtsuk pujakrumningkia, nu apua nunisang wína Apaachir nayaimpinam puja nuka atumnasha tsangkutramrashtinuitrume, —Jesús turammiaji.

Nuwa japashtinun pachis etserkamuri
(*Marc. 10.1-12; Luc. 16.18*)

19 ¹Jesús nuna tina ukuki Galilea nungkanmaya jiinki, Jordán entsa amajin Judea nungkanam wemiayi.

²Tura nuni jeamtai, aints untsuri Jesúsán nemarkarmiayi. Turinamtai Jesús jau ainauncha tsuwararmiayi. ³Tura fariseo ainau Jesúsán nekapsartas iniinak:

—¿Aints ni nuwarin pachitsuk japa ukukminkai? —tiarmiayi.

⁴Tu iniinam Jesús ayaak:

—Atsa. ¿Atumka Yuse papiri aarmauringkia aujchaukitrum? Tu aarmawaitai: ‘Nu nangkamtaik Yus aishmangnasha, tura nuwancha najanamiayi.’^b

⁵“Tura nusha aarmawaitai: ‘Tura asamtai aishmang ni aparincha, tura ni nukurincha ukuki, nuwarijai tsaning jimiaraitiat kichkia nunisang atinuitai.’
⁶Tu aarmau asamtai, jimiar ayat kichkia nunisketai. Tura Yus tu tinu asamtai, aints kichkisha nuwarin japashtinuitai, tura nuwasha kichkisha aishrin ukukchatnuitai, —Jesús timiayi.^c

⁷Tama chicharinak:

—Tura Moisés chichaak: Aints papin aar: Nuwarun ukuajai tusa, nuna nuwarin nu papin susa ukuktinuitai ¿waruka nuka timiayi? —tiarmiayi.

⁸Tu tinam Jesús aimiak:

—Atumi nintijai timiá katuram nintimu asakrumin, Moisés nunaka tsangkatrakamiarume. Antsu nu nangkamtaikia nuniska achamiayi. ⁹Tura asamtai atumin tajarme: Aints ni nuwarin kichjai pujachu wainiat, niin ajapa ukuki chikich nuwan nuwatkungka, tunau wajastinuitai. Tura aints nuwan ajapamun nuwatkungka, nusha nunisang tunau wajastinuitai, —Jesús timiayi.^d

¹⁰Tama ni nuiniatiri ainauti Jesús chicharkur:

—Nekas nuwa ajapar ukukchamnawaitmatikia, nuwasha nuwatkachminuitai, —timiaji.

¹¹Tu takurin Jesús airmak:

—Nuwan nuwatsuk pujustin pachis chichamnaka aints mash antukminka ainatsui. Antsu Yus nekamtikiamu ainauka ju chichaman antukmin ainawai. ¹²Chikich aints uchin yajutmarchamnau-sha akiinawaru ainawai. Tura kitcha uchin yajutmarchami tusar kaamtikiamu

ainawai. Antsu kitcha Yuse takatrin takakmasartas nuwan tuke nuwatsuk pujuinawai. Ju chichaman antukarmin ainauka antukarti tajarme, —turammiaji.

Uchi ainau wini winiarti timiauri
(*Marc. 10.13-16; Luc. 18.15-17*)

¹³Nunia aints ainau uchi irunun itariar, Jesúsán seainak:

—Ame uchi muuken achikiam Yus seatrita, —tusar itariarmiayi. Tinamtai ni nuiniatiri ainauti chicharkur:

—¿Waruka apusha waitkarme?
—timiayi. ¹⁴Tu tarin wainiat Jesús chichartamak:

—Uchi irunu wini winiariat tusaram tsangkatraktaram. Aints ju uchía nunisarang nintimsar pujuinawau Yuse pujutirin nayaimpinam jeartinuitai. Tura asaramtai suritrukairap, —turammiaji.

¹⁵Tura uchi muuken kichnasha kichnasha achik, Yusen seati umis, nuniangka jiinki wemiayi.

Natsa kuikiartin Jesúsái chichasmauri
(*Marc. 10.17-31; Luc. 18.18-30*)

¹⁶Nunia natsa Jesúsán jistas jeari chicharak:

—Nuikiartinu, nekas pengkeraitme. Tura asakmin iniajme: Pujut nangkankashtinun jukitasnasha ¿warí pengker aa nuna takakmasminuitja? Nu ujatkata, —timiayi.

¹⁷Tama Jesús ayaak:

—¿Waruka pengkeraitme turutme? Nekas pengker aa nuka kichkitai. Nuka Yusketai. Ameka tuke iwiaaku pujusmi takumka Yus: Wína chichamur umirtuktaram tímia nuka miatrusmek umirkata, —timiayi.

¹⁸Jesús tama nu natsaka iniak:

—¿Tu chichama nekas umiktinuita?
—tama Jesús ayaak:

—Nu umiktin chichamka nuwaitai: Mangkartuwairap. Tura tsanirmawairap. Tura kasamkairap. Tura aints kichkisha pachisrum tsanurairap. ¹⁹Tura aparmesha tura nukurmesha umirkataram. Tura atumi namangke anearme nunisrumek chikich aints ainousha aneetaram, tu aarmawaitai, —timiayi.^e

²⁰Jesús tama nu natsa chicharak:

—Ame tame nunaka uchiwach asanak tuke mash umikuitjai. ¿Nuniasha warina umiktinuitja? —timiayi. ²¹Tu iniam Jesús ayaak:

—Nekas pengker ata takumka, ame wariram aa nu mash surukta. Tura kuikian yuuminaw susata. Nunia wína nemartusta. Turakum nekasam nayaimpinam yuumsatuk pujustinuitme, —timiayi.

²²Jesús tama nu natsaka nuna antuk, nekas kuikiartin asa, kuikiarin aneak wake mesek nunia jiinki wemiayi.

²³Tura ukukim Jesús ni nuiniatiri ainautin chichartamak:

—Nekas tajarme: Kuikiartin ainaw Yus pujamunam wayaawartatkamawar nekasar tujinkartinuitai. ²⁴Ataksha tajarme: ¿Kamiyusha juun asa, akusha jiin wayaam-naukai? Atsa, nuka pengké yumtinuitai. Tura kuikiartinka Yus pujamunam wayaatnuka timiá yumtinuitai, —turammiaji.

²⁵Tu turamin asamtai ni nuiniatiri ainauti nu antukar nukap nintimrar chicharkur:

—Tu amataisha ¿yaachik nuniasha uwemramnawaita? —timiayi. ²⁶Tu iniam Jesús mash jimias chichartamak:

—Aints ningki nintimsangka uwemrachminuitai. Antsu Yuska pengké tujinkachu asa, aints ainaw uwemtikrat-nuitai, —turammiaji.

²⁷Turammatai Pedro chicharak:

—Apuru, iinu amia nuka mash ukukir, ame nemarkamiaji. ¿Iincha waring arutramtaij? —timiayi.

²⁸Tu iniam Jesús ayaak:

—Nekasan tajame: Ukunam ju nungka aa nuka mash yamaram najanatin awai. Nuniangka wikia aints ayatun, Yus akupkamu asan, mash aints ainaun inartinuitjai. Tura wikia juun apu keemtairin keemsamtaí, atumsha wína nemartuku asaram, Israela uchiri doce (12) amia nuna weari ainau inartasrum, atumsha nunisrumek apu keemtairin doce (12) atinua nuni keemsatnuitrume.^f

²⁹Tura aints ainau wína anentu asar, ni jeencha ukukiar, tura yachiincha, tura umajincha, tura aparincha, tura nukurincha, tura uchirincha, tura nungkarincha ukukin asar, ni ukukiarmia nuna nangka-masarang untsuri wainkartin ainawai, tura ukunmasha pujut nangkankashtinun jukiartin ainawai. ³⁰Aints untsuri ningki nintimsar: Wikia chikich ainaun nangkamasketjai tinu ainau nu kinta jeamtaí mianchau artinuitai. Tura yamai mianchau ainauka ukunam chikich ainaun nangkamasarang artinuitai, —Jesús timiayi.^g

Aja takau ainaun pachis nuikiartamu

20 ¹Nunia Jesús ataksha nuitamak: “Yus aints ainaun nayaimpinmaya inawa nuka ajartinua tumawaitai. Uva yurangke tsamaramtaí, ajartin uva yurangken juuktas, aints ainaun ipiaatas kashik jiinkimiayi. ²Tura jiinki aints ainaun wainak: ‘Ju kinta wína ajarun takakmastaram tusan, kichik kuik denario tutain akiktatjarne,’ tama niisha ‘ayu’ tusar ajanam takakmasartas wearmiayi. ³Tura nuni wearamtaí, tsaa yakí wajasai, ataksha jiinki yaktanam weak, jea aarin nangkamiar wajainaun wainak chicharak: ⁴‘Atumsha wína ajarun werum, uva yurangke juwaakrum yainkataram. Turakrumningkia atumi

takatrín metek akiktatjarne,’ tama nusha nunisarang ‘ayu,’ tusar takakmasartas wearmiayi. ⁵Wearamtaí tsaa tupin wajasamtaí, nunia tsaa yantantiamtaí, ajartin ataksha jiinki aints ainaun: ‘Atumsha takakmastaram,’ tusa akupkamiayi. ⁶Nunia tsaa nungka wajasai, ataksha ajanmaya jiinki yaktanam we, nuni aints nangkamiar wajainaun wainak: ‘¿Waruka pengké takakmatskesha wajarme?’ tu iniasmiayi. ⁷Tu iniam aiminak: ‘Maj, aints kichkisha ipiatminachu asaramtaí takakmatsji,’ tinamtaí ajartin chicharak: ‘Atumsha wína ajarun werum takatur yainkataram. Turakrumningkia atumi takatríncha metek akiktatjarne,’ tama nusha nunisarang ajanam wearmiayi.

⁸‘Kintamramtaí ajartin ajan wainiun untsuk: ‘Ajan takau ainau untsukam akikiarta. Tsaa nungká wajasai nangkamarawu ainau nuwá eemkam akikiarta, tura kashik nangkamarawu ainauka inangnamunam akikiarta,’ tusa akupkamiayi. ⁹Tama ajan takau ainaun untsuk, angkuanmataí nangkamarawu ainaun nuná eemak kichik kichik kuikian denario tutain akikmiayi. ¹⁰Nuniasha takatan kashik nangkamarawu ainau: Iiyá takatka nangkamau asakrin, ¿iincha nukap akirmakchatjiash? tu nintiminawu wainiat, chikich ainaun akikmia nunisang nu aints ainauncha kichik kuikianak akikmiayi. ¹¹Tura nunak jukiaru asar, napchau nintimrar ajartinun jiasartas weriarmiayi, tura jeariar ajartinun jiyainak: ¹²‘¿Waruka aйтkame? Uku takakmasaru ainau aya kichik uranak takakmasaru wainiatmesha ¿warukaya meteksha akikratkame? Antsu iikia kintajai metek tsaa sukutmau wainiatu takakmakur wait wajakmaji,’ tu jiyakarmiayi. ¹³Tinamtaí ajartin nu aintsun chicharak: ‘Sairua, wikia aminka

pengké kasartsujme. Kichik denario akiktatjame, wi tama čameka ayu tichamkum? ¹⁴Pai, kuikiaram jukim weta. Tura wi ukunam takakmasaru ainaun amijai metek akiktasan wakerajai. ¹⁵Wina kuikiar asamtai, wi wakeramurun turamnawaitjai. Wikia pengker asan, chikich ainaun wait anentrai wainiatmessa čwaruka winasha suwirpiaku jiirsamsha napchau nintintursamsha pujame?’ timiayi,” Jesús turammiaji.

¹⁶Jesús nu nuikiartamun iin nuitamak: “Yuse aintsri ainausha aja takakminua nunisarang ainawai. Eemkar Yusen nemarkaru ainau ukunam nayaimpinam jeartnuitai. Tura ukunam Yusen nemarkaru ainau nuwá eemkar nayaimpinam jeartnuitai,” taku turammiaji.^h

Jesús ni jakatniurin ataksha etserkamuri
(*Marc. 10.32-34; Luc. 18.31-34*)

¹⁷Jesús Jerusalénnum jinta wekaak, ni nuiniatiri ainautin akantamak chichartamak:

¹⁸—Anturtuktaram. Jerusalénnum weaji. Tura Yus akupkamutiatnak aints asan, sacerdote juuntri ainamunam tura Moisésa chichame nuikiartin ainamunam wina surutkar: Maataram turutiartatui. ¹⁹Tura romano ainau wina wishikrurar, nunia katumrukur numi winangmanum maawarti tusar surutkartatui. Tura mantuwaramtai kempatam kinta jakan tepayatun ataksha nantaktatjai, —turammiaji.ⁱ

Santiago nukuri Jesúsán seamuri
(*Marc. 10.35-45*)

²⁰Nunia Zebedeo uchiri Santiago, nunia Juansha ni nukurijai Jesúsnum jear, ni nukuri Jesúsán seatas tikishmatramiayi. ²¹Turamtai Jesús iniak:

—čWari itiuurtukat tusamea wakeru-tame? —timiayi. Tu iniam ni ayaak:

—Wi wakeramurka nuwaitai: Ami pujutrumin Apu pujakminkia wina uchir kichka ami untsurumnini pujus, kitcha menarminini pujus, mai apu arti tusan seajme, —timiayi.

²²Tamaitiat Jesús Santiagon, tura Juannasha chicharak:

—Atumka wina seatrume nuka warimpita tusaram nekatsrume. čWi wait wajaktatja nunisrumeash atumsha wait wajaktaram? —tu iniam:

—Ja ai, turunamnawaitji, —tiarmiayi.

²³Tu aimkaramtai, Jesús chicharak:

—Nekasrum tarume. Wi wait wajaktatja nunisrumek atumsha wait wajaktinuitrume. Antsu wina untsuruni-nisha, tura wina menarninisha atum keemsatnunka tsangkatkashtinuitjarme. Antsu wina Apaachir nuni keemsartinun tsangkatkamu ainauk keemsartin ainawai, —timiayi.

²⁴Jesús tama chikich diez (10) nuiniatiri ainauti nu antukar, Santiagosha tura Juansha kajerkamiaji. ²⁵Tura kajerakrin Jesús ni nuiniatiri ainautin mash untsurmak, irutmar chichartamak:

—Atumka nekarme: Mash nungkan-maya apu ainau ni aintsrin akatrar pe akupinawai. Tura ni juuntri ainausha miajuitjai tusar, ni aintsri ainauncha tuke inarartas wakerinawai. ²⁶Antsu atumka nuka turashtinuitrume. Tura chikich ainau nangkakatasrum wakerakrumka, chikich aintsu inatiria nunisrumek atinuitrume. ²⁷Tura apu wajastasrum wakerakrumka, chikich ainau umirin atinuitrume.^j

²⁸“Wikia Yus akupkamutiatnak aints asan, aints ainau wina yainkarat tusanka tachamiajai, antsu aints ainaun yaingtaj

tusan taawitjai. Tura aintsun unturi angkanmamtikiawartasan mantuwarti tusan taawitjai, —Jesús turammiaji.^k

Wainmichun jimiar tsuwarmauri

(*Marc. 10.46-52; Luc. 18.35-43*)

²⁹Jesús Jericó yaktanmaya jijnmatai, aints unturi niin nemarkarmiayi. ³⁰Nuni wekaamunam aints wainmichu jimiar jinta yantamen keemsar, Jesús winawai tamaun antukar untuminak:

—Apurua, Davidta weariya, iincha wait anengkratkata, —tiarmiayi.

³¹Tu untuminamta aints irunu niin jiyainak: Itatkaram tinamaitiat nuna nangkamasarang kakar untuminak:

—Apurua, Davidta weariya, iincha wait anengkratkata, —tiarmiayi.

³²Miatrusar untumkaramtai, Jesús nuni wajas, wainmichun mai winiarti tusa untukmiayi. Tura iniak:

—¿Itiurtukat tusarnea wakerutarme? —timiayi.

³³Tamati aiminak:

—Apuru, wainmachkur wainmaktasar wakeraji, —tiarmiayi.

³⁴Tinamta Jesús wait anentar ni jiin antinkamiayi. Turam mai paan wainmarmiaji. Tura Jesús nuni nemarkarmiayi.

Jesús Jerusalénnum wemaury

(*Marc. 11.1-11; Luc. 19.28-40; Juan 12.12-19*)

21 ¹Jesús ni nuiniatiri ainautijai Jerusalénnum weakur Betfagé yaktanam jeamijai. Nu yaktaka Olivo Muranam yaatkauyayi. Tura nuni jear, Jesús ni nuiniatiri jimieran akupak:

²—Atunini yaktachinam werum, nuni jearam burro juun jingkiamu, tura uchiri yama tsakamach wainkatatrumé. Nu wainkaram atiaran mai itataram. ³Nu turakrumin aints kichkisha ininminak: ‘¿Warukaya atiarne?’ turaminamtaikia:

‘I Apuri yuumanu asamtai juwaji. Tura wári wainkitatui,’ titaram, —Jesús timiayi.

⁴Yuse chichame etserin yaanchuik Jesús nuni pachis tímia nunaka miatrusnak umiktaj tusa, nunaka timiayi. Ni timiauri tu aarmawaitai:

⁵“Sión yaktanmaya ainan antukarat tusaram titaram: Jiistaram. Atumi Apuri wikia miajuittjai tumamtsuk, burrochinam keemas winitramui. Nuka apua nuniska winitramtsui, antsu burro uchiri warinchi jutainum keemas winitramui,” tu aarmawaitai.^l

⁶Tura akupkamu asar ni nuiniatiri wear, Jesús tímia nunisarang turuwarmiayi. ⁷Tura yaktanam wear burron wainkar, uchirtuk mai jukiari Jesúsnum itaar, ni wejmakrin aimiakar burronam awantsarmiayi. Turuwaramtai Jesús keemsamiayi. ⁸Tura jinta weamta, aints unturi jintanam wajainau: I Apurinme tiartas, ni wejmakrin aimiakar, jinta jepen burro wetinnum aitkarmiayi. Chikich ainausha chapi nuké tumaan charukar jintanam aitkarmiayi. ⁹Tura eemkar wearmia nusha tura uku winiarmia nusha warainak Jesús nuni pachisar untumiamarmiayi. Tura untuminak:

—Ii juuntri Davidta weari nekas juuntaitai. Yus akupkamu winá nuka nekas pengkeraitai. Yus nayaimpinam puja nuka nekas juuntaitai, —tiarmiayi.

¹⁰Tura Jesús Jerusalénnum jeamta, aints mash taetet wajainak inintrinak:

—¿Ausha yaachita? —tiarmiayi.

¹¹Tu inintrinamta chikich aints aiminak: —Auka Yuse chichame etserin Jesúsaitai. Nazaret yaktanmayaintai. Tura Galilea nungkanmayaintai, —tiarmiayi.

Yuse jeengka kasa jeenchuitai timiauri
(*Marc. 11.15-19; Luc. 19.45-48; Juan 2.13-22*)

¹²Jesús Yus seatai juun jeanam waya, aints ainan nuni surinak tura suminak

wajainaun aanum jiiki akupkamiayi. Tura kuikian yapajinau misarin ayanturmiayi. Tura kayuk suwen surinaun tutangkrincha ayanturmiayi. ¹³Tura chicharak:

—Yuse chichame tu aarmawaitai. Yus chichaak: ‘Wina jearka Yus seatai jeitai,’ tu aarmau wainiatrum atumka kasa aints juni kuikian kasamkarat tusaram tsangkatkarume, —Jesús timiayi.

¹⁴Nuna tura inais nuni wajai, wainmichu ainau tura wekaichau ainausha wayaawaramtai, Jesús mash tsuwarumiayi. ¹⁵Turamtai sacerdote juuntri ainausha, tura Moisésa chichame nuikiartin ainausha Jesús wainchati takatan turaun wainkar, tura uchi ainau Yuse jeen wayaawaru asar: Juun apu Davidta weari nekas juuntaitai tu untsuminamtai Jesúsan kakerkarmiayi. ¹⁶Tura iniinak:

—¿Ju uchi tina nu antamek? —tiarmiayi.

Tu tinam Jesús ayaak:

—Ja ai, antajai. ¿Atumka Yuse chichame juna pachis aarmawa nuka aujchaukitrum? Tu aarmawaitai. David Yusen chicharak:

‘Uchi ainau tura kuwirach ainausha amin nekasar pengker awajtam-sartas maaketai turamiarti tusam tsangkatu weame,’ timiayi.

Tu aarmawaitai, —Jesús timiayi.^m

¹⁷Nuna tusa ukuki, Jerusalénnum jiinki, Betania yaktanam we nuni kanurmiayi.

Jesús higueraan yumingkramuri

(Marc. 11.12-14, 20-26)

¹⁸Kashin tsawaar, Jesús Jerusalénnum wetaj tusa junta weak yaparmiayi. ¹⁹Tura numi higuera tutain junta yantamen wajaun wainak, neren akarmaktaj tusa werimiayi. Turamaitiat nukak nukak

nerenchaun wainkamiayi. Tura numin chicharak:

—Ameke tuke nerechu atatme, —timiayi.

Tu tinu asamtai nu tamaujai metek numikia kukarmiayi. ²⁰Turamtai ni nuiniatiri ainauti nu wainkar Jesús chicharkur:

—¿Warukaya kakarmachusha kukari? —timiaji.

²¹Tu iniam Jesús chichartamak:

—Nekasan tajarme: Yus nekasrum nintimtakrumka tura: Nekasash turat, tu nintimtsuk pujakrumka, higueraan aitkaja aintsarmek atumsha ainkamnawaitrume. Tura ju murasha chicharkuram: ‘Juni wajatsuk juun entsanam ayangta,’ takurmeka nusha turamnawaitrume.

²²Tura Yus nekas turuatatuapi, tu nintimsaram seakrumningkia, nunaka mash turuatnuitai, —turammiaji.ⁿ

¿Yáki Jesúsan ni kakarmarin susaya?

(Marc. 11.27-33; Luc. 20.1-8)

²³Nunia Yus seatai juun jeansa waya, Jesús aints ainaun nuiniak pujamtai, sacerdote juuntri ainau, tura judío juuntri ainausha Jesúsan tariar chicharinak:

—¿Ame aitkame? ¿Tura yaachia aitkata tusasha amincha akuptamkama? —tiarmiayi.

²⁴Tu iniinam Jesús aimiak:

—Wisha atumnasha kichan iniastaj-rume. Nu aimkakrumningkia, yaki winasha akuptukma tusan nunasha ujaktatjarme. ²⁵Watska ¿yáki Juankun aints imaita tusasha akupkaya? ¿Yuseash akupkaya? ¿Turachkusha aintsuash akupkaya? —tu iniam mai nuwamtak chicharnainak:

—¿Iisha warintajik? Yus akupkamuitai takurningkia ¿waruka ni nekasampita

tichamiarume? iincha turami tusar tichamnawaitji. ²⁶Antsu aints akupkamui-tai takurningkia, aints mash: Juan Yus akupkamuitai tinau asar, iin kajertamkarai tusar shamaji, —tunaiyarmiayi.

²⁷Tura Jesús an ainnak:

—¿Juan aints ainau imaita tusasha yáki akupkaya? tusarsha iikia nekatsji, —tiarmiayi.

Tinamtai Jesús aimiak:

—Ayu, tu tau asakrumin, yáki wina akuptukia tusancha, wisha nunisnak atumnasha ujakchatatjarne, —timiayi.

Uchi jimiaran pachis timiauri

²⁸Tura Jesús ataksha chicharak:

—Ju nuikiartutai chicham nintimrataram. Aintsu uchiri jimiar pujú armiayi.

Tura asaramtai nu aintska uchirin kichkin chicharak: ‘Uchiru, ajarun weme uva yurange juuta,’ tusa akupkamiayi.

²⁹Tu akupam uchiri ayaak: ‘Atsa, nakimijai,’ tayat atak nintimiar ajanam wemiayi. ³⁰Turamtai chikich uchirin nunasha nunisang: ‘Amesha ajarun weme uva yurange juuta,’ tamati nuka: ‘Ayu apaachi, wetajai,’ tayat wechamiayi. ³¹Nu uchi jimiaran pachisan taja nuna čtua ni apari wakeramurin umirkamia? —tu iniam aiminak:

—Eemak nakimijai tayat, nunia wemia nuwaitai, —tiarmiayi.

Tinamtai Jesús chicharak:

—Nekasan tajarme: Kuikian juu ainau, tura kungkatip ainausha ni tunaarin mash inaisar, atumin nangkamasarang Yuse pujutirin wayaawartin ainawai.

³²Imiakratin Juan chichaak: ‘Pujutrum tu yapajiaran uwemratnuitrume,’ tusa atumin nuitamratas winitramu wainiatrum nekasampita tichamiarume. Antsu kuikian juu ainau tura kungkatip ainausha Juanku chichamen antukar

nekasampita tiarmiayi. Atumka nuka nekayatrume, ni umirkatasrumka atumi tunaaringkia inaisachmiarume, —Jesús timiayi.^o

Pasé takau ainaun pachis nuikiartamu

(*Marc. 12.1-12; Luc. 20.9-19*)

³³Nunia Jesús ataksha aints ainaun nuiniak: “Chikich nuikiartamu antuktarum: Aints uva naekrin ni ajarin araamiayi. Tura ajanka wenurmiayi. Tura uva yumiri juutai nu ajanmak najanamiayi. Tura ajan wainkatnun wenurmaunum yáki wajatirin najatamiayi. Tura mash pengker iwiar, aints ainaun eak: ‘Ajar waitruktaram,’ tusa ukuki, chikich nungkanam wemiayi.

³⁴Tura juuktin kinta jeamtai, ni inatiri ainaun akatar akuptak: ‘Yamaikia werum, ajarun takau ainau uva yumiri winar aa nunaka akupturkarti,’ tawai tita tusa akupkamiayi. ³⁵Akuptukmaitiat ajan takau ainau ajartinu inatiri ainaun achikiar, kichnaka katsumkar, tura kichnasha maawar, tura kichnasha kayajai tukuarmiayi. ³⁶Turinamtai ajartin ataksha ni inatirin nuna nangkamasang untsurin akuptukmiayi. Akuptukmaitiat nu ajan takau ainau nunisarang turuawarmiayi.

³⁷“Nuna turuawaramtai nuniangka: ‘Wina uchnaka nekasar anturkarchanpiash,’ tu nintimias ni uchirin akupkamiayi. ³⁸Apari akupkamu waininayat, ajan takau ainau ajartinu uchirin wainkar chicharnainak: ‘Auka ajartinu uchirintai. Apari jakamtai, ju ajaka ninu atatu. Watska maatai. Au maarkia ajaka iinu achaintak,’ tunaiyarmiayi. ³⁹Tura ajartinu uchirin achikiar ajanmaya jiiikar maawarmiayi,” Jesús timiayi.

⁴⁰Tura nu nuikiartamun antukaru ainaun iniak:

—¿Atumsha itiur nintimrume? ¿Ajartin taa, nu ajan takau ainaun itiurkatnuita? —timiayi.

⁴¹Tu iniam aiminak:

—Nu aints timiá pasé asaramtai, wait anentsuk maawartinuitai. Nunia nu ajartin chikich ajan takau ainaun eak: ‘Ajar waitruktaram. Tura juuktin kinta jeamtai, winar aa nuka surustaram,’ tusa ajarin takakmasarti tusa akupkatnuitai, —tiarmiayi.

⁴²Tinamtai Jesús chicharak:

—Nekasrum tarume. ¿Nu pasé aints ainau pachisrum atumka Yuse papirin aujchaukitrum? Tu aarmawaitai:

‘Jeamin ainau kaya jean jeamkar, chikich kayan wainkar chichainak: Ju kayaka paseetai tusar japawarmiayi. Japinau wainiat Yuska: Nu kayaka timiá pengkeraitai timiayi. Apu Yus nunaka wakeruku asamtai, iisha nu nintimsar pujaji.’ Tu aarmawaitai. ⁴³Tura asamtai tajarme: Yusnum tuke pujustinka atumin suritramak, chikich nungkanmaya ainau tuke Yusnum pujustinka tsangkamkamuitai. ⁴⁴Aints ainau nu kaya nekas pengker aa nunaka tukumkar kupinakar-tinuitai. Tura nu kaya aintsnum ayaarkungka, nu aintsun tsairtinuitai, —Jesús timiayi.

⁴⁵Tama sacerdote juuntri ainau, tura fariseo ainausha Jesús nuikiartamun antukar: Iin pachitmas turamji tusar nintimrarmiayi. ⁴⁶Tura yamaik achiktai tinayat, chikich aints ainau Jesúsán pachisar: Yus akupkamu asa, nu chichamnaka etselui tinau asaramtai, shamkar inaisarmiayi.

Nuwa nuwatkamu fiestan pachis nuikiartutai chicham

(Luc. 14.15-24)

22 ¹Nunia Jesús ataksha nuikiartutai chichamjai etsertan nangkamamiayi. Tura chichaak:

²—Yus aints ainaun inawa nuka junia apua nunisketai. Apu uchiri nuwan nuwatkatin asamtai, fiestan najanamiayi.

³Tura ni inatiri irunun aints ainau untsukarti tusa akupkamiayi. Untsuamaitiat nakiararmiayi. ⁴Ataksha chikich inatiri ainaun akatar akupak: Ataksha werum untsukmau ainau ujatruktaram: Waaka ainausha mau asar, tura tangku jaerusha mau asar, atum yuwatin yanchuk mash umismawaitai. Tura asamtai nuwenmaunum winiarti, tawai titaram timiayi. ⁵Tamaitiat untsukmau ainau nakiararmiayi. Antsu chikich ni ajarin jiistas wemiayi. Tura kitcha sumatinam wemiayi. ⁶Tura chikich ainauka apu inatiri ainaun achikiar pasé awajsarmiayi, tura kichnasha maawarmiayi. ⁷Turinamtai apu nuna antuk kajek, ni suntari ainaun chicharak: ‘Wina aintsrun mau irunu mash maataran. Tura ni jeesha mash keematkataram,’ tusa akupkamiayi. ⁸Ni suntari ainaun akupkam jiinkiarantai, nunia ni inatiri ainaun ataksha chicharak: ‘Nuwenmau fiesta mash umismawaitai. Antsu nuwik untsukmau ainauka pasé aints asar winicharmin ainawai. ⁹Tura asaramtai yakta jinti ainamunam werum, aints atum wainmauka: Nuwenmaunum winiarti tusaram untsuktaram,’ timiayi. ¹⁰Tama ni inatiri ainau jiinkiar, yakta jintin wekajinaun pasé ainauncha tura pengker ainauncha mash untsukarmiayi. Tura asar apu jeen piakarmiayi.

¹¹Jea piakaramtai nu apuka untsukmau ainau jiistaj tusa wayaamiayi. Nuni waya jiis, aints nuwenkur entsatinka entsatsuk pujaun wainkamiayi. ¹²Tura nu aintsun chicharak: ‘Sairua ¿waruka nuwenkur entsati entsatskesha junisha wayaame?’ timiayi. Tamaitiat nu aintska aintsuke pujumiayi. ¹³Turamtai apu yurumkan surin ainaun untsuk: ‘Juka achikrum, nawencha tura uwejencha

jingkiaram aanum jiiikrum, tee amanum japataram. Nuni juutak, tura nain katertak nintimratatui,' timiayi.^p

¹⁴Nu nuikiartutai chichaman wi taja nuka: ¿Warina takua tawa? tusaram yamaikia nekaataram. Aints untsuri nayaimpinam wayaawarti tusa Yus untsukmau ainayat jumchik wayaawartin ainawai, —Jesús timiayi.

¿Juun apu akikchatnukai? timiauri

(*Marc. 12.13-17; Luc. 20.20-26*)

¹⁵Tama fariseo ainau nuna antukar, nunia jiiinkiar kanakar pujusar, chichaman najatawar: Aints ainau Jesúsá chichamen antukar: Nunaka timiayi tusar tsanumrarmi, tu nintimtiarmiayi. ¹⁶Tura ni aintsri ainausha tura apu Herodesa nemarin ainausha Jesús iniam, ¿nisha warintintak? tusar, ni chichamen anturkar, nuna jukiarat tusar akupkar-miayi. Tura akupkamu asar, Jesúsán jeariar chicharinak:

—Nuikiartinu, ameka nekas chicham chichaame. Iikia nuka nekaji. Chikich ainauka antutsuk, ameka nekasam Yuse jinti tu awai tusam tupin nuikiartame. Tura aints ainau wína pengker nintimtur-sarat tusamka ameka pachiatme. ¹⁷Tura asakmin itiuur nintime tusar, nekaatasar taji. ¿Apu César ni aintsrin akupak: Kuik irumratararam tamati, ii kuikiari akiimiaktin pengkerkai? ¿Antsu akiimiatsuk pujustinka timiá pengkerkai? Nu nekaata-sar wakeraji, —tiarmiayi.

¹⁸Tu iniinam Jesús ni pasé nintimaurin-cha nekau asa chicharak:

—Anangkartin ainautiram ¿waruka winasha anangkruram nekaprustasrum-sha wakerarme? ¹⁹Watska, apu César akiktin kuik itataram, —timiayi.

Tama nu kuikian itaarmiayi. ²⁰Itaaram-tai nuna jiis, Jesús iniak:

—¿Jusha yana yapiya nakumkamuita? Tura ¿yana naariya aarmawaita? —timiayi.

²¹Tu iniam aiminak:

—Apu Césarnawaitai, —tiarmiayi.

Tinamtai Jesús chicharak:

—Tu tinu asaram, juun apu Césarnau aa nuka ni susataram. Tura Yusnau aa nuka Yus susataram, —timiayi.

²²Tama nuna antukar nukap nintimrar-miayi. Tura Jesúsán ukukiar waketkiarmiayi.

¿Aints jakau nantaktinuashi? timiauri

(*Marc. 12.18-27; Luc. 20.27-40*)

²³Nu kintati saduceo ainau: Aints jakamunmaya nantakchatnuitai, tinu ainauka Jesúsán tariarmiayi.^q Tura Jesús warintintak tusar chicharinak:

²⁴—Nuikiartinu, Moisés chichaman aarmia nu chichamka nuwaitai: 'Aints uchin yajutmartsuk jakamtaikia, yachí uchin yajutmarts wajerin nuwatkatí. Tura uchin yajutmarsa nuka ni yachí jakau uchiriya nunisang atinuitai,' tu aarmawaitai.^r

²⁵Ayu, juni iijai iruntrar siete (7) yachintin pujú armiayi. Tura eemkauri nuwan nuwatak, uchin yajutmartsuk jakamtai, chikich yachiisha wajerin nuwatkatí, ²⁶nusha nunisang uchin yajutmartsuk jakamiayi. Tura nusha nunisang jakamtai, chikich yachí wajerin nuwatkatí, nusha nunisang uchin yajutmartsuk jakamiayi. Tura kitcha kitcha siete (7) yachintin nu nuwan nuwatinayat, mash uchin yajutmartsuk kajingkiarmiayi. ²⁷Nunia nuwasha ukunam jakamiayi. ²⁸Tura nu siete (7) yachintin mash nu nuwan nuwatkaru asar ¿jakamunmaya nantakiar nu nuwaka yana nuwariya atinuita? —tu iniasarmiayi.

²⁹Tu iniinam Jesús ayaak:

—Yuse chichame nekachu asaram, tura Yuse kakarmarisha wainkachu asaram, jakamunmaya nantaktin atsawai takuram pe nuwaarme. ³⁰Nintimrataram.

Jakamunmaya nantakiaru ainauka nuwanka nuwatkachartinuitai. Tura nuwasha aintsun ninumkachartinuitai. Antsu Yuse awemamuri nayaimpinam pujuina nunisarang nuwartichu artinuitai.

³¹Tura ¿Yus jakau ainau nantakiartinun pachis turammia nuka aujchaukitrum? Yus chichaak: ³²‘Abrahama Yusrinka wiitjai. Tura Isaaca Yusrinka wiitjai. Tura Jacobo Yusrinka wiitjai,’ timiayi. Tura Yus nu aints yaanchuik jakaru ainayat, tuke iwiaaku ainawai timiayi. Tu tinu asamtai, Yuska jakau ainau Yusrintai tarume nuka tuchuitai. Antsu tuke iwiaaku ainau Yusrintai, —Jesús timiayi.⁵

³³Tama aints ni nuikiartamun antukar nukap nintimrarmiayi.

**Chicham umiktin nekas pengker
aa nuna pachis etserkamuri**

(Marc. 12.28-34)

³⁴Jesús saduceo ainaun itatmamtikiau asamtai, fariseo ainau nuna antukar iruntrarmiayi. ³⁵Turuwar kichik fariseo Moisésa chichamen nuikiartin asa, Jesúsán nekapsatas yuumatkat tusa iniastas werimiayi. Tura Jesúsán jeari iniak:

³⁶—Nuikiartinu ¿chicham umiktin chikich chichaman nangkamasang pengker aa nuka tuni aarmawaita? —timiayi.

³⁷Tu iniam Jesús ayaak:

—Chikich umiktin chicham ainia nuna nangkamasang nuná eemak umiktinka juwaitai: ‘Ami Yusrum aminu Apuram asamtai, tuke nintimaurumjai aneen ata. Tura asam tuke inaitsuk Yus nintimsam aneeta.’^t

³⁸Juka chikich umiktin chicham ainia nuna nangkamasketai. Nuwá eemkar umiktinka juwaitai. ³⁹Tura chikich chicham jujai metek tausha juwaitai: ‘Ami namangkem aneame nunismek chikich aints ainausha aneeta.’^u

⁴⁰Ju jimiar umiktin chicham umirkamka, Moisés chichaman akupkama nusha, tura yaanchuik Yuse chichame etserin ainau tiarmia nusha pachitsuk umirkatnuitrume, —Jesús timiayi.^v

¿Mesíascha yana wearinta? timiauri

(Marc. 12.35-37; Luc. 20.41-44)

⁴¹Tura fariseo ainau tuke iruntrar pujuinai, ⁴²Jesús iniak:

—¿Yuse chichame etserin ainau Yus akupkatnun Mesías tutain pachisar aarmia nuka yana weariya atinuita? ¿Atumsha warinrume? —timiayi.

Tu iniam aiminak:

—Mesíaska Davidta weari atinuitai, —tiarmiayi.

⁴³Tinamtai Jesús chicharak:

—Tura Yuse Wakani tu aamtikramu asa, Davidcha papinum aak: ¿Yus akupkatnun Mesíasan warukaya Apuru timiayi? Mesías ni Apuri asamtai nunaka timiayi. Tura papinum aak:

⁴⁴Apu Yus wína Apurun chicharak: ‘Juni wína untsurunini apu keemtainum keemsam nakarsata. Tura nakarkumin ami nemasem ainaun mash nepetkatatjai,’ timiayi.

⁴⁵Davidka Yus akupkatnun Mesíasan pachis: Wina Apuruitai tinu wainiatrumsha ¿waruka Davidta uchirintai tarume? —tu iniasmiayi.

⁴⁶Tu iniamaitiat, aints kichkisha aimkacharmiayi. Tura nuniangka aints kichkisha Jesúsán nekapsartas chichaman pengké iniascharmiayi.

**Fariseon tura Moisésa chichame nuikiartin
ainauncha Jesús chicharkamuri**

(*Marc. 12.38-40; Luc. 11.37-54; 20.45-47*)

23 ¹Nunia Jesús ni nuiniatiri
ainautin tura chikich aints
ainauncha chicharak:

²—Moisésa aarmauri nuikiartin
ainausha, tura fariseo ainausha: ¿Moisésa
aarmauri warina takua tawa? tusar
nekamtikin ainawai. ³Tura asaramtai ni
timiauri mash umirkuram atumin
turamina nuka mash turataram. Antsu ni
timiaurin ningki umitsuk pujuinamtaisha,
ni pujuina nunisrumka pujusairap. ⁴Ni
chikich ainaun: Nu chicham umirkataram
tinayat, nu chichaman umitsuk pujuina-
wai. Tura asar aints chikich ainaun: Ju
meram aa juka entsastaram tinayat,
kichik uwejejaisha yaiitan nakitinawai.

⁵Antsu tuke mash wína jiirsarat tusar, ni
turina nunaka turinawai. Turinaun asar,
Yuse chichame aarmaurincha sarman ni
nijajin nujkar, tura ni kunturinha
jingkiawar wekainawai. Tura ni
wejmakrin chikich ainaun nangkamasa-
rang sarman entsainawai. ⁶Tura
miajuittjai tusar, iruntrar yutai yuwamun-
masha apu keemtairin keemsartas
wakerinawai. Tura iruntai jeanmasha
wayaawar, keemtai pengkernum
keemsartas wakerinawai. ⁷Tura junta
ingkungkar, chikich ainausha mash: Wína
jiirsar aujtusarat tusar, tura nuikiartinu
turutiarti tusar wakerinawai.^w

⁸Tura mash aints ainu atumi yachiiya
nunisarang asaramtai: Nuikiartinu
turutiarat tuuka nintimsairap. Atumin
nuitamnuka kichkitai. ⁹Tura nuikiartin
ainu kichkisha: Apaachi tiirap. Atumi
Apaachiri kichkitai: Nayaimpinam puja
nuketai. ¹⁰Tura Apuru turutiarat tusaram

wakerukairap. Atumi Apuringkia
Cristoketai. ¹¹Antsu atumin nangkama-
kuka mash chikich ainu inatiri atinuitai.

¹²Tura asamtai aints ningki nintimias
miajuittjai tumamunka Yuska miancha-
waitai tawai. Antsu mianchawaitjai
tumamunka Yuska miajuittai tawai.^x

¹³“Maj, Moisésa chichame nuikiartin
ainautiram, fariseo ainautirmesha
aneartaram. Atumka anangkartin asaram,
chikich aints uwemrarai tusaram, tura
chikich aints nayaimpinam wayaawarai
tusaram, waiti epenmiawa nunisketrume.
Tura atumka nayaimpinam wayaashtin
asaram, chikich ainausha wayaawarai
tusaram suritarme.

¹⁴“Maj, Moisésa chichame nuikiartin
ainautiram, fariseo ainautirmesha
aneartaram. Atumka anangkartin asaram,
waje jee atantin aiyatrumek, aints ainu
wína pengker nintimtursarat tusaram,
Yus seakrum saram searme. Tura
asaram nukap wait wajaktinuitume.

¹⁵“Maj, Moisésa chichame nuikiartin
ainautiram, fariseo ainautirmesha
aneartaram. Atumka anangkartin asaram,
chikich aints wína nemartusarat tusaram,
yaja nungkanmasha arák wekainuitume.
Tura atumin nemartamsaruka atumin
nangkamasarang ji kajintrashtinnum
engkemawar wait wajakarti tusaram
pasemamtikrume.

¹⁶“Atumka aneartaram. Chikich aints
nuinin ayatrumek Yuse chichame
nintimtichu asaram wainmichua
tumawaitrume. Atumka nuikiartakrum:
‘Aints: Yusjai tajai, Yuse jeen pachisan:
Nunaka wikia turatatjai tayat, nunaka
umitsuk ukukminuitai’ tarume. Antsu
Yusjai tajai titas, Yuse jee kuri aa nuna
pachis: ‘Ju kurikia Yus susamu asamtai,
wikia nuna turatatjai tauka nunaka

miatrusang umiktinuitai' tarume.

¹⁷Nintinchau asaram, wainmichua tumawaitrume. Kuri Yuse jeen pujsamu aa nuka mash Yusnawaitai. Tura asamtai kuri Yuse jeen nangkamasketai, tuuka nintimtsuk pujusminuitrume tajarme.

¹⁸Tura atumsha chichaakrum: 'Aints tangku epeatniun pachis: Nekasan nunaka turatatjai, Yusjai tajai tayatrum, nu chichamka umitsuk ukukminuitrume,' tarume. Antsu tangku Yus susatniun pachis chichaakrum: 'Yusjai tajai: Tangku epetinam patasmau asamtai, nunaka turatatjai tauka nu chichamka miatrusrumek umiktinuitrume,' tarume. ¹⁹Tu tinu asaram wainmichua tumawaitrume.

Tangku Yus susamu aa nuka Yusnawaitai. Tura tangku epetisha nunisang Yusnawaitai. Tura asamtai tangku Yus susamu tangku epetin nangkamasketai, tuuka nintimtsuk pujusminuitrume tajarme.

²⁰Nintimrataram. Aints chichaak: 'Yuse jeen tangku epetin tuke au asamtai, wikia nunaka turatatjai, Yusjai tajai,' tauka nuka tangku epetinka pachiska tatsui, antsu tangku epetinam patasmau asamtai, nunasha pachis tawai. ²¹Tura aints Yuse jeen pachis chichaak: 'Yuse jee tuke au asamtai, wikia nunaka turatatjai, Yusjai tajai,' tauka Yuse jeenkeka pachis tatsui, antsu Yus ni jeen tuke au asamtai, Yusnasha pachis tawai. ²²Tura aints nayaimpin pachis chichaak: 'Nayaim Yuse pujutiri asamtai, wikia nunaka turatatjai, Yusjai tajai,' tauka nayaimpinkeka pachiska tatsui, antsu Yusnasha pachis tawai.'

²³"Maj, Moisésa chichame nuikiartin ainautiram, fariseo ainautirmesha aneartaram. Atumi ajarinia árak menta tutain, tura chikich áraksha anís tutain, tura chikich áraksha cominos tutain timiá tuupich au wainiatrum, diez (10)

juukrum kichik Yus susatasrum akanuwearme. Nuka tuke inaitsuk turataram. Turayatrum nuna nangkamasrumek chikich chichaman Yus umiktaram tímia nuka umiatsrume. Nekas Yus nintimtustincha, tura chikich aints wait anentratnusha, tura nekas pengker aa nu turatnusha umiktinuitrume. ²⁴Atum chikich aints ainausha nuiniayatrume, Yuse chichamen nintimtichu asaram wainmichua tumawaitrume. Tura asaram atumi umutiri teté tuupich engketu wainkuram, nuna umurai tusaram japrume. Antsu kamiyu nekas juun wainiatrumek, nuka kujarua tumawaitrume.

²⁵"Maj, Moisésa chichame nuikiartin ainautiram, nunia fariseo ainautirmesha aneartaram. Atumka anangkartin asaram, aints piningkia nitkari nijatsuk, tura puwatu nitkarisha nijatsuk, aya patatkeng nijarmawa tumawaitrume. Tura aints wina jirsar: Auka pengke aintsuitai, turutiarat tu nintimsaram pujayatrum, atumi nintin tunau piaku asamtai, kichnau aa nu timiá wakerarau asaram, pachitsuk kasarmume. ²⁶Fariseo ainautiram, atumka wainmichua tumau asaram, atumi tunaari nintimtsurme. Piningkia nitkari, tura puwatu nitkarisha nijarmawa nunisrumek nuwá eemkaram tunau nintimtaurum inaisaram iwarataram. Turakrumningkia aints ainu atumi pujutrin wainkar: Juka nekas pengke aintsuitai turamiartinuitai.

²⁷"Maj, Moisésa chichame nuikiartin ainautiram, fariseo ainautirmesha aneartaram. Atumka anangkartin asaram, jakau iwiartaiya tumawaitrume. Jakau iwiartai aari nekas shiiram at tusar iwiarin armiai. Antsu aints iwiartai nitkarinka jakau ukunchi piakuitai, tura jakau namangke kauru piakuitai.

²⁸Atumka jakau iwiartaiya tumawaitrume. Aints ainau atumi pujutrin wainkar: Pengke aintsuitai, tu nintimtur-masar pujuinawai. Tura wainiatrumek atumi nintin tunau piaku asamtai, aints ainau tuke anangkuwearme.

²⁹“Maj, Moisésa chichame nuikiartin ainautiram, fariseo ainautirmesha aneartaram.

Atumka anangkartin asaram, yaanchuik atumi juuntri Yuse chichame etserin ainaun mau wainiatrumek, nu iwiarsamu pengker nintimsaram iwiaruwearme. Tura pengke aints ainaun yaanchuik mau wainiatrumek, nu iwiarsamu ainausha nekas shiiram at tusaram iwiaruwearme. ³⁰Tura nangkam-rum chichaakrum: ‘Iikia ii juuntrijai pujuwaitkurkia, iikia Yuse chichame etserin ainau maawarti tusarkia yaingchatnuyaji,’ tarume. ³¹Tu tayatrum Yuse chichame etsernun maawarmia nunisrumek turin asakrumin: Nijai metek ainawai tusar, paan nekarmawartin ainawai. ³²Watska, atumi juuntri jakaru ainau nangkamawarmia nuka atumka umiktaram.” Jesús ni jakatniurin pachis tumammiaiyi.

³³Nunia ataksha chicharak:

“Atumka napia tumawaitrume. Tu pujau asaram ¿Yus aints ainaun ji kajintrashtinnun akupamtaisha itiurak uwemratrume?”

³⁴“Tura wainiatun wikia atumin Yuse chichame etserin ainaun, tura Yuse chichame nekau ainauncha, tura Yuse chichame nuikiartin ainauncha akuptuktatjarme. Turamaitiatrum chikich ainausha numinam ajintaram maatnuitrume. Tura chikich ainausha iruntai jeanam awatratnuitrume. Tura chikich yaktanam tupikiakiamtaisha atumka papektinuitrume. ³⁵Turatin asaram, wait

wajaktinuitrume. Nu nangkamtaik Caín ni yachí Abel péngke aintsun wainiat maamiayi. Nuniasha ukunam Berequíasa uchiri Zacarías naartin Yuse jeen tangku epetinam ayaamas wajaun waininayat maawarmiaiyi. Tura atumi juuntri péngke aints ainau numpen ukararu asaramtai, atumsha nunisrumek turatin asaram wait wajaktinuitrume. ³⁶Tura atumi wearri yamai iwiaaku ainausha wait wajakartin ainawai. Nunaka nekasas tajarme,” Jesús timiaiyi.

**Jesús Jerusalénnum pujuinaun
aneak juutmiauri
(Luc. 13.34-35)**

³⁷Nunia Jesús Jerusalénnumia aints ainaun chicharak:

—Jerusalénnumia ainautirmin tajarme: Atumka Yuse chichame etserin main aiyarume. Tura Yus wína chichamur etserkataram tusa, akupturmaku wainiatrumek, kayajai tukuram mainuyarume. Atash ni uchirin nanapejai tektuktas untsuawa nunisnak: Uwemrataram tusan ¿wikia warutmak untsuyajrum? Turai wainiatrumek nakitrinuyarme. ³⁸⁻³⁹Antsu wi ukukmiaka, atumi yaktaringkia itiarak atinuitai. Tura asamtai aneartaram. Nunasha nekasas tajarme. Atumka: Yus akupkamu wináuka nekas pengkeraitai tutsuk pujakrumka, wínaka pengké waitkashtinuitrume, —Jesús timiaiyi.

**Yus seatai juun jea yumpunkatnun
pachis etserkamuri
(Marc. 13.1-2; Luc. 21.5-6)**

24 ¹Jesús Yus seatai jeanmaya jiinki weai, ni nuiniatiri ainauti tarir, Yus seatai jea jiisar: Juka nekas juuntapita tusar, Jesús inaktusmiaji. ²Takurin Jesús iin chichartamak:

—Nekasan tajarme: Ju waintrume juka ukunmaka mash yumpunkatnuitai. Tura yumpunkamtai kaya kichkisha chikich kayanmasha patamkashtinuitai, —turam-miaji.

Nungka mesertinun pachisar etserkamu
(*Marc. 13.3-23; Luc. 21.7-24; 17.22-24*)

³Nunia olivo muranam weri, nuni Jesús waka keemsamtaí, ni nuiniatiri ainautisha nuni jearir, nijai kanakar pujusar iniakur:

—¿Ju jea yumpunkatnusha warutik at, tura ame tatintrumsha warutik at? Tura ju nungka amukatin kinta jeatak wajasamtaísha, nekas jeatak wajasi tusarsha çitiurak nekaataij? Tu atinuitai tusam ujakratkata, —timiaji.

⁴Takurin Jesús chichartamak:

—Aints kichkisha wína anangkruwai tusaram aneartaram. ⁵Aints untsuri chichainak: ‘Wíitjai Mesfasaitjai, Yus akupkamuitjai,’ tusar aints untsuri anangmawartinuitai. ⁶Turinamtai maaniamu pachisrum chicham antakrumsha, tura mesetan najaninawai tamau antakrumsha shamkairap. Nungka meseatsaing maaniamuka untsuri artinuitai. Antsu nungka mesertinka tewarikia achatnuitai. ⁷Aints ainau chikich nungkanmaya ainaujai maania-wartinuitai. Tura apu ainausha kajernaikiar mesetan najanawartinuitai. Nuniasha tsukasha nukap atinuitai. Tura sungkur jatai ainausha yujartartinuitai. Nuniasha uusha untsuri uurkatnuitai. Nuka chikich chikich nungkanmasha turonatnuitai. ⁸Antsu nu turonatniun nangkamawar, aints ainau wait wajainayat, nuna nangkamasarang wait wajakartiniun yamaik nangkamawartinuitai.

⁹“Nunia atumnasha achirmakar pasé awajtamsarat tusar surutmakartinuitai.

Tura mantamawartinuitai. Tura wína umirtau asakrumin, aints ainau mash kajertamkartinuitai. ¹⁰Nu kinta jeamtai, aints untsuri wína umirtutan inaisartinuitai, tura mai nuwamtak kajernaikiar: Achiktaram tusar surunikiartinuitai.

¹¹Tura anangkartin ainau untsuri waitrinak: Wikia Yuse chichaman etsernuitjai tusar, aintsun untsurin tsanurartinuitai. ¹²Tura tunau nukap atin asamtaí, aints ainau aneenitan inaisartinuitai. ¹³Antsu aints ainau Yusen tuke inaitsuk umirkaruka uwemrartinuitai.^a

¹⁴“Yus aints ainaun inartinuitai tusar Yusnum uwemratin chichaman mash nungkanmaya ainau nekaawarat tusar etserkartinuitai. Turinamtaí nuniangka nungka amukatin kinta jeatnuitai.

¹⁵“Aints ju chichaman aujinauka nintimrarti: Yuse chichame etserin Daniel naartin nekas pasemamtikiartinun pachis nunia aints ainaun mesratniuncha pachis aarmiayi. Nu pasemamtikiartin Yus seatai juun jeanam wayaamtai, ¹⁶aints Judea nungkanam pujuinauka muranam tupikiakiartinuitai. ¹⁷Tura wári tupikiakiartin asar, aints jea jimia pata jeamkamunam yakí pujauka wári kuanak waririncha jutsuk tupikiakiartinuitai.

¹⁸Tura ajanam takakminausha jeanmasha waketsuk, tura entsatirincha jutsuk wári tupikiakiartinuitai. ¹⁹Nu wait wajakartin kinta jeamtai, nuwa jamtin ainausha tura kuwirchin muntsak pujuinausha nukap wait wajakartin asaramtaí wait anentina-jai,” Jesús timiayi.^b

²⁰⁻²¹Nunia ataksha chicharak:

“Nu tupikiakiartin kinta yumanch achati tusaram, tura ayamtaí kinta achati tusaram Yus seatarum. Maj, nu kintati aints ainau nukap wait wajakartinuitai. Nu nangkamtaik nungka najanamunmayangka timiá wait wajamuka atsuyayi.

Tura ukunmasha ataksha timiá wait wajaktinka atsutnuitai. ²²Tura asamtai nu wait wajaktinaka Yusek: Ainik ati tusa amuktinuitai. Nuna turachmataikia aints kichkisha uwemrachimnuitai. Antsu Yus ni aintsri uwemrartin ainaun aneau asa, nu wait wajaktinaka amuktinuitai.

²³“Turamtai aints atumin chichartaminak: ‘Jiista, juwaitai Mesías,’ turaminamtaikia tura: ‘Ani Mesías pujawai,’ turaminamtaisha anturkairap.

²⁴Aints unturi anangkaminak: Mesíasaitjai tusar wantinkartinuitai. Chikich ainausha anangkaminak: Yus akupkamu asan, Yuse chichame etsernuitjai turamiartinuitai. Tura aints ainaun anangkataj tusar, aints tujintamu takatnasha, tura aints wainchati takatnasha takasar, Yuse aintsri ainaun anangkamin amataikia anangkawartinuitai. ²⁵Nu aints ainaun atumin anangkramawarai tusan, eemkin yamaik ujaajrume.^c

²⁶“Tura asamtai aints atumin chichartaminak: ‘Jiistaram, Mesías ani aints atsamunam pujawai,’ turaminamtaisha nuka jiisairap. Tura: ‘Jiistaram, juni jea tesaamunam uumak pujawai,’ turaminamtaisha nuka anturkairap. ²⁷Wi aints ayatun Yus akupkamu asan, peem newarat tsantar tsaa taakmanumanini, tura tsaa jeamunmaninisha mash nungkanam wainta nunisnak paan wantinkatnuitjai. ²⁸Jakau tepamunam chiwiang kautinawai,” Jesús turammiaji.^d

Jesús ni tatintrin pachis etserkamuri

(Marc. 13.24-37;

Luc. 21.25-33;17.26-30, 34-36)

²⁹Nunia ataksha iin chichartamak:

“Nu wait wajaktiniun wi etserja nu nangkamaramtai, tsaangka tsantrashtinuitai. Tura nantusha kajinratnuitai. Yaa

ainausha nayaimpinmaya kakeerartinuitai. Tura nayaimpinam muchichu ainausha muchitrartinuitai.^e

³⁰“Nunia aints ayatun, Yus akupkamu asan wi wantinmatai, mash nungkanmaya ainaun ni wait wajaktintrin shaminak juutiartinuitai. Tura yurangmijai Yuse kakarmarijai, nunia Yuse paaniurijai nayaimpinmaya winamtai, wínaka paan waitkartinuitai.^f ³¹Nunia wi winakun, wína umirtukaru ainaun wi uwemtikrartasan wakerau asan, wína awemamur ainaun akupkan: Pupun kakaram pupuntruataram tusan, mash nungkanmayan irurat tusan akupkartinuitjai.^g

³²“Numi higuera tutai nintimrataram: Numi tsaraptur ataksha nukarmatai ju nungkanam pujuinautiram: ‘Esat jeatak wajasi,’ tarume. ³³Tura atumsha wi tajarmena nusha mash wainkurmeke: ‘Tatintri jeatak wajasi,’ tusaram nekaamnawaitrume. ³⁴Nekasan tajarme: Wi taja nunaka mash umiatsaing, aints juni iwiaaku pujuinauka pengké jakachartinuitai. ³⁵Nayaimpisha tura nungkasha mengkakartinuitai. Antsu wína chichamruka pengké mengkakashartinuitai.

³⁶“Tura nu turunatin kinta warutik at tusarka aints kichkisha nekainatsui. Yuse awemamuri ainausha nunaka nekainatsui. Wisha Yuse Uchiri ayatnak nekatsjai. Antsu wína Apaachiruk nuke nekawai.

³⁷“Wi tatin kintar jeamtai, yaanchuik Noé pujumia nuni aints ainaun pasé puju armia nunisarang pujusartinuitai.^h ³⁸Nu kintati yumi jitatsaing, aints ainaun Yusen nintimtsuk yutancha yuj, tura umutincha umuj puju armiaiyi. Tura nuwatnaikiarmiayi. Tura nawantrincha aintsun ninumkarat tusar surin armiaiyi. Tumaj pujuinai, Noé juun kanunam engkema-

c 24.25 (2.Tes. 2.9) d 24.28 (Luc. 17.23-24, 37; Apoc. 19.17-18) e 24.29 (Apoc. 6.12-13)
f 24.30 (Apoc. 1.7) g 24.31 (1.Tes. 4.15-17) h 24.37 (Gén. 6.5-8)

miayi. ³⁹Tura waininayat, nu aints ainauka tuke Yusen pachischaru asaramtai, nujang aneachmau mash amukmiayi. Wi tatin kintasha nunisang atinuitai.ⁱ

⁴⁰“Nu kinta jeamtai, jimia aints ajanam tsaniasar takakminamtaisha kichik jukitnuitai, antsu kichka juwaktinuitai.

⁴¹Nuwasha jimiar tsaniasar trigo jingkiajin nekenak pujuinauncha kichik jukitnuitai, antsu kichka juwaktinuitai.

⁴²“Turunatin asamtai, atumka winaka kajinmatrutsuk: ¿Apu ru tatintri warutik at? tusaram nekachu asaram aneartaram.

⁴³Nusha nintimrataram: Jeenuka kasa aints tatinun nuna eemak nekawait-kungka kanutsuk anear, kasartukai tusa, tura jearun wayaawai tusa nakastinuitai.

⁴⁴Tura wikia aints ayatun, Yus akupkamu asan, aneachmau tatin asamtai, atumsha nunisrumek anearum pujustaram,” Jesús turammiaji.^j

Aintsu inatiri jimiaran pachis etserkamuri
(Luc. 12.41-48)

⁴⁵Nunia Jesús ataksha iin chicharta-mak:

“Ju nuikiartutai chichamsha nintimrataram. Aints arák irastas wetanak wajak: Wína jearun pujuinau yurumatin jeamtai zyáki ni yuwatniurin susat? tusa aintsun eawai. Tura nekas pengker umiun, tura paan nintimniun eak: Nu turati titinuitai.

⁴⁶Nu aintsu inatiri ni takatrin miatrusang umirak pujamtaikia, ni inamin taa nuna wainak, ni inatirin waramtiksatnuitai.

⁴⁷Nekasan tajarme: Nu aintsu inatiri ni apurin miatrusang umirmau asa, mash ninu aa nuna wainin ati tusa inaikiatnuitai. ⁴⁸Antsu takatan wainin pasé aints asa: Apurka wárikia tachatnuitai, tu nintimias pujakka, ⁴⁹chikich takau ainaun pasé awajak, tura nampeku ainaujai iruntrar yutancha nukap yuwar,

tura umutincha nukap umurar niisha nampea nampeaka, ⁵⁰¿ni apuri warí kintatik tat? tura ¿warí uratik tat? tusa nekachu asamtai, aneachmau tari ni inatirin nakachmaun wainak, ⁵¹anangkartin ainau ji kajintrashtinnum wait wajakarti tusa akupawa nunisang nu pasé aintsun nuni akupkatnuitai. Turamtai pasé ainau nuni engkemawar, wait wajainak juutinak, tura nai katertinak matsamsartinuitai,” Jesús turammiaji.

Nawan diez amia nuna pachis nuikiartamu

25 ¹Nunia Jesús ataksha iin nuitamak: “Yusnum nayaimpinam jeatnuka nunisketai tusan, ju nuikiartutai chichaman ujaajrume: ‘Umaar nuwan nuwatmatai jiiistai,’ tusar ni umaji diez (10) armia nuka untsukmau asar, namparingkian takusar: ‘Umaar nakastai,’ tusar wearmiayi. ²⁻⁴Tura nawan cinco (5) irunuka umikcharu asar, namparingkian takusar weenayat olivo machari amukamtai, ataksha yarakmi tutsuk kajinmakiar aintsarang wearmiayi. Antsu chikich nawan cinco (5) irunu kajinmakcharu asar, namparingkian umisar, olivo macharin mutinam yarakar takuarmiayi. ⁵Tura nákinak umaji wári tachau asamtai, kari nepetinam mash kanurarmiayi. ⁶Nunia kashi japeng aints untsamak: ‘Pai, nuwan nuwatkatnuka winawai. Jiinkiram ingkungtaram,’ timiayi. ⁷Tamati umaji irunu nuna antukar wári nantakiar, namparingkian keematan umisarmiayi. ⁸Nunia nawan cinco (5) irunu olivo macharin kajinmakiaru asar, chikich nawan cinco (5) kajinmakcharu ainaun seainak: ‘Kaichirua, winasha olivo machari jumchiksha yaratrucktaram. Ii namparingkri kajinui,’ tiarmiayi. ⁹Tu seainamaitiat chikich kajinmakcharu ainau aiinak:

‘Atsa, japchirin japchirin yarakriki, iincha jeartamkashtatji. Tura atumnausha wári kajintratatu. Nekasrum sumatinam werum nuni sumaataram,’ tiarmiayi.

¹⁰Tinam cinco (5) nawan irunu olivo macharin sumakartas wearai, ukunam nuwan nuwatkatin amia nuka tamiayi. Taamtai nawan kajinmakcharu ainauka nijai jeanam wayaawaramtai waitin epeniarmiayi. ¹¹Turuawarai chikich nawan olivo macharin sumakartas wearusha taar: ‘Apurua, Apurua, waiti uratrita,’ tiarmiayi. ¹²Tinamaitiat jeentin nitkaya ayaak: ‘¿Yaachitrum e atumsha? Nekasam tajarme: Atumin pengké nekatsjarne,’ timiayi, —Jesús turammiaji.^k

¹³Nu nuikiartuti chichamnasha pachis ataksha iin chichartamak:

—Atumsha winasha kajinmatrutsuk, atumi Apuri tatintri ¿warutik at? tusarmeka nekachu asaram aneartaram, —turammiaji.^l

Kuik suwamu pachis nuikiartamu

(*Luc. 19.11-27*)

¹⁴Ataksha Jesús iin nuitamak: “Yus aints ainaun inawa nuka kuikiartinua nunisketai. Kuikiartin arák nungkanam wetas, ni inatiri ainaun untuk, ni kuikiarin kichik kichik akantuk susamiayi. ¹⁵Tura kichkin cinco warangkan susa, tura kichnasha jimia warangkan susa, tura kichnasha kichik warangkan susa: ‘Ju kuikijai sumakrum, tura surukrum kuik kiaungkataram,’ tusa ukuki, chikich nungkanam yaja wemiayi. ¹⁶Tura nu aintsu inatiri kuikian cinco

warang jukimia nuka nu kuikijai sumak tura suruk takaa takaaka, ataksha kuikian cinco warangkan juki irurmiayi. ¹⁷Chikitcha nunisang kuikian jimia warangkan jukimia nuka nu kuikijai sumak, tura

suruk takaa takaaka, ataksha kuikian jimia warangkan juki irurmiayi. ¹⁸Antsu chikich aints kichik warangkan jukimia nuka ni apuri kuikiarin waa taimunam uuk inaisamiayi.

¹⁹“Tura nukap arus ni apuri ataksha jeamiayi. Tura jea ni inatiri ainaun untuk: ‘¿Kuikian wi susamiajrum nusha iturkamarume?’ tu iniasmiayi. ²⁰Tu iniam nu nangkamtaik cinco warangkan jukimia nuka nuna wangtak: ‘Pai apuru, kuik cinco warang surusmiam nuna ataksha cinco warangkan kiaungkajai. Juna kiauntukjame ju jukita,’ timiayi.

²¹Tamati ni apuri chicharak: ‘Ayu, maaketai. Nekasam pengker takatrusume. Tura nekasam miatrusmek umirtukume.

Wikia jumchik susamiajme nujai pengker takakmasume. Tura asakmin nuna nangkamasnak nukap susatjame.

Jearun wayaata. Tura wayaam wijai nukap warasta,’ timiayi. ²²Nunia chikich inatiri jimia warangkan jukimia nusha nunisang apurin wangtak: ‘Pai apuru, kuik jimia warang surusmiam nuna ataksha jimia warangkan kiaungkajai. Juna kiauntukjame ju jukita,’ timiayi.

²³Tamati ni apuri nu aintsnasha nunisang chicharak: ‘Ayu, maaketai. Nekasam pengker takatrusume. Tura nekasam miatrusmek umirtukume. Wikia jumchik susamiajme nujai pengker takakmasume. Tura asakmin nuna nangkamasnak nukap susatjame. Jearun wayaata. Tura wayaam wijai nukap warasta,’ timiayi.

²⁴“Nunia chikich aints kichik warangkan nunak jukimia nuka tari, ni apurin chicharak: ‘Apu, ameka nekasam kakaram takamtikin asam, árak araachiatum: Juurtuktaram tinu asakmin, wisha nunaka nekau asan, ²⁵shamakun ami kuikiarmin nungkan tain uukmiajai. Pai juwaitai. Ame surusmiam e ju jukita,’

timiayi. ²⁶Tamati ni apuri chicharak: ‘Maj, ameka paseetme. Tura nakitme. Wi arakan araachiatnak: Juurtuktaram taja nuka nekyatmesha, ²⁷¿waruka kuik irumtainum kuikiarka ukurtuschamiame? Turakminkia chikich aints ainau wina kuikiarjai takakminamtai, wisha ataksha tana kuikian susamiamje nuna nangka-masnak nukap jukimnawaitjai. ²⁸⁻²⁹Aints nekas nukap takakmasu asa nukap tákakui. Tura nukap takakmasu asa, nuna nangkamasang nukap jukitnuitai. Tura asa ampirtinuitai. Antsu tákakchauka takatan jumchiksha nakitau asamtai, jumchik tákaka nuka juruktinuitai. Tura asamtai ju aintsu kuikiari jurukrum, chikich aints diez (10) warangkan takaku susataram. ^m ³⁰Antsu ju takatan umichu aints jukiram, aanum tee amaunum japataram. Nuni wait wajak nain esai katertak juutinuitai,’ apu timiayi.” Jesús nu nuikiartutai chichaman nuitamak turammiaji. ⁿ

Nungka meseamunam aints ainau akankatnun pachis etserkamuri

³¹Jesús ataksha iin nuitamak: “Wikia aints ayatun, Yus akupkamu asan, Yuse awemamuri ainau wina tentatkaramtai, wi winaknaka apu wajasan, Yuse keemtairin nekas juunnum keemsaatnuitjai. ^o

³²⁻³³“Turamtai mash nungkanmaya ainau wini winár irunrartinuitai. Turinamtai uwija wainin uwija ainaunka untsurinini mash irur, tura chipu ainaunka menanmanini mash irur akanua nunisnak wína aintsur ainauncha, tura wina aintsuru chu ainauncha akankarti-nuitjai. ³⁴Tura Apu asan, wina untsurunini wajainaun chicharkun: ‘Wína Apaachir atumin pengker awajtamsau

asamtai, atumka winitaram. Yus nungkan najanak atum pujustinaka yaanchuik umismawaitai. ³⁵Wi tsukamamtaisha, atum yuwatniur surusmiarume. Tura wi kitamamtaisha, wína umutirsha surusmiarume. Tura wi jeenchau wekaamtaisha, atumi jeen jeetiram: Iijai pujusmi turutmiarume. ³⁶Tura entsatir atsamtaisha atumka surusmiarume. Wi jaakun tepamtaisha, wína jiirsatasrum winitrimiarume. Tura wína achirkar kársernum engketawaramtaisha, atumka winiram jiirsamiarume,’ titinuitjai. ^p

³⁷“Wi tamati nusha inintinak: ‘Apu ru ¿warutia yaparakincha yuramiamje? ¿Tura warutia kitamamnisha umutincha aarmiamje? ³⁸¿Tura warutia irakmincha, ii jeen pujusta timiaji? ¿Tura entsatiram yuumamnisha warutia susamiamje? ³⁹Tura jaakun tepamnisha, tura kársernum achirmakar engketminamtaisha, ¿warutia amin jiistasrisha winimiamji?’ ⁴⁰Turutinamtai wikia Apu asan ayaakun: ‘Nekasan tajarme: Wína yatsur mianchau irunu juni wajaina nuna kichkinak wait anentakrum nu turutau asaram, nekasrum wína anentu asaram turamiarme,’ titinuitjai.

⁴¹“Tura Apu asan, wína menarnini wajainaun chicharkun: ‘Pasé takau ainautiram, wini iruntsuk junia jiinkiram, tuke ji kajintrashtinnun wetaram. Satanás ni awemamuri ainaujai tuke wait wajaktin umismanum nujai iruntrataram. ⁴²Wi tsukamamtaisha, atumka wínaka yurtuachmiarume. Tura wi kitamamtaisha umutisha aatrachmiarume. ⁴³Tura wi jeenchau wekaamtaisha atumka: Iijai pujusmi turutchamiarume. Tura wi entsatiram yuumamtaisha, atumka suruschamiarume. Wi jaakun tepamtaisha, tura wína

achirkar kársernum engketawaramtai-sha, atumka jiirsachmiarume,' titinuitjai. ⁴⁴Wi tamati nusha inintinak: 'Apu, ame tsukamamnisha, tura ame kitamamnisha, tura jeenchau irakmincha, tura entsatiram yuumamnisha, tura jaamnisha, tura kársernum engketkumnisha ¿warutia wisha yaaitskesha pachischamiajme?' turutiartinuitai. ⁴⁵Turutinamtai wikia Apu asan ayaakun: 'Nekasan tajarme, ju mianchau ainau juni wajaina ju wait anentsuk yaingchau asaram, nekasrum winasha umirtukchamiarume,' titinuitjai. ⁴⁶Nu aints tuke wait wajakartinum weartinuitai. Antsu wini wayaataram timiau ainauka tuke Yusnum iwiaaku pujustinum wayaawartinuitai," Jesús turammiaji.

Jesús maatarar chicham najatamuri
(*Marc. 14.1-2; Luc. 22.1-2; Juan 11.45-53*)

26 ¹Jesús nu nuikiartutai chichaman mash umis, ni nuiniatiri ainautin ataksha chichartamak:

²—Atumsha nekarme: Pascua fiesta jeatin jimiaarchik kinta wajasi. Nunia wi Yus akupkamutiatnak aints asamtai, numi winangmanum mantuwartas achirkar surutkartatui, —turammiaji.

³Nu kintati sacerdote juuntri ainau, tura Moisésa chichame nuikiartin ainausha, tura judío juuntri ainausha, sacerdote apuri Caifása jeen kaunkar, jea aarin iruntramiaji. ⁴Tura nuni iruntrar Jesús anangkawar achikiar maawarat tusar chichaman najatiarmiayi. ⁵Tura chicharnainak:

—Aints untsuri iruntrar jiyaaaninak maanitan wakerukarai tusar, fiesta kintatikia turachminuitai, —tunaiyar-miaji.

Nuwa Jesús an kungkutijai ukatramuri
(*Marc. 14.3-9; Juan 12.1-8*)

⁶Jesús Betania yaktanam we, Simónka jeen pujumiayi. Nu Simónka yaanchuik kuchapruk pujuti at nuniangka tsaarmiayi. ⁷Tura nuni pujai nuwa taa, muti kaya alabastro tutai najanamunam kungkuti nekas akikian engkea itiamiayi. Tura Jesús misanam yuwatas pujamtai, Jesús a muuken nu kungkutijai mash ukatramiaji.⁷

⁸Turamtai Jesús a nuiniatiri ainauti nu wainkar kajerakur chicharnaiyakur:

—¿Waruka kungkuti timiá akiknasha nangkamisha ajapua? ⁹Au surukrikia kuik nukap jukir, ¿kuikiartichu ainau susamka pengkerchaukai? —tunaimiaji.

¹⁰Tu takurin Jesús nuna antuk iin chichartamak:

—¿Waruka ju nuwasha kajerarme? Wina aitkara juka nekas pengker aitkarayi. ¹¹Kuikiartichuka tuke atumjai pujuinawai. Antsu wikia atumjaingkia tukeka pujuschatatjai. ¹²Ju nuwaka kungkutijai ukatrura juka wi iwiarnatnurun umistas, iwiaaku pujaing ukatruri. ¹³Nekasan tajarme: Mash nungkanam Yusnum uwemratin chichaman etserinauka tuke ju nuwa turamurinha etserkartinuitai. Tura asaramtai ju turamunka pengké kajinmakchartinuitai, —Jesús turammiaji.

Judas Jesús an surukmauri
(*Marc. 14.10-11; Luc. 22.3-6*)

¹⁴Tamati Jesús a nuiniatiri doce (12) ainamunmaya kichik Judas Iscariote naartin Jesús anangka suruktaj tusa, sacerdote juuntri ainaun chichastas wemiayi. ¹⁵Tura nuni jea chicharak:
—Wi Jesús an achikian atumin surukamtaikia ¿warutmak akirkaintrum?

—tu iniam treinta (30) kuikian akiimia-karmiaiyi. ¹⁶Nu akikiam Judas: ¿Itiurak Jesús anangkan surukaintaj? tu nintimias pujumiayi.

Jesús Pascua fiestatin yuwamuri

(*Marc. 14.12-25; Luc. 22.7-23; Juan 13.21-30; 1.Cor. 11.23-26*)

¹⁷Pang pachimrachmau yuwatin fiesta nu kinta atin asamtai, ni nuiniatiri ainauti Jesús iniakur:

—¿Pascua fiestati ame yuwatin tuni umismi tusamea wakerame? —timiayi.^r

¹⁸Tu iniam Jesús iin chichartamak:

—Juun yaktanam wetaram. Tura nurum, nunia aints wainkaram ni jeen wayaaram: ‘Iin nuitamin amin chichaman akupturmak: Wína kintar jeatak wajasi. Tura asan wina nuiniatir ainaujai Pascua fiestatin ami jeemin yuwatasan wakerajai turamui,’ titaram, —turammiaji.

¹⁹Turammatai ni nuiniatiri ainauti weri, Jesús tímica nunisrik Pascua fiestatin yuwatin umismiaji.

²⁰Kintamatai Jesús ni doce (12)

nuiniatiri ainautijai misanam yuwatasan keemsamiaji. ²¹Tura yuwakur pujarin Jesús iin chichartamak:

—Anturtuktaram, nekasam tajarme:

Kichik aints atumniang wína anangkrua surutkatatui, —turammiaji.

²²Turammatai nu antukar wake mesekar nintimrar, kichik kichik iniakur:

—Apuru ¿wiyashitaj? —timiayi.

²³Tu iniam Jesús chichartamak:

—Wi nu tachaunumak tsaniasan yuwaja juwaitai. Ju wína anangkrua surutkatatui.^s ²⁴Wi Yus akupkamutiatnak aints asan, Yuse chichame aarmaun miatrusnak umiktinuitjai. Turayatnak wína surutkatnunka nukap wait amentajai. Ju aintska akiinachuikungka

wait wajakchamin ayat, akiinau asa nukap wait wajaktinuitai, —turammiaji.

²⁵Turammatai Judas ni nekas suruktin ayat iniak:

—Nuikiartinu ¿nusha yaita? ¿Wikaitaj? —timiayi.

Tu iniam Jesús ayaak:

—Ja ai, ametme, —timiayi.

²⁶Tura yuwakur pujarin Jesús yurumkan achik Yusen maaketai timiayi. Nunia puuk ni nuiniatiri ainautin suramak:

—Ju yuwataram. Juka wína namangkrua tumawaitai, —turammiaji.

²⁷Tura piningnasha achik, Yusen maaketai tusa, ni nuiniatiri ainautin suramak:

—Jusha mash umurtaram. ²⁸Juka wína numparua tumawaitai. Wína mantinam-tai, untsuri aints ainau tunaarin sakartaj tusan numpartajai. Tura wina numpar numparamtai, yamaram chichaman wi etserkaja nunaka nekasam umiktatjai.^t

²⁹Yamaikia atumin ujaajrume: Wikia ju uva yumirin yamaikikia ataksha umurchatatjai. Antsu wína Apaachiru pujutirin jean atumjai iruntran, nuni uva yumirin nekas yamarman umurtinuitjai, —turammiaji.

Pedron: Wína natsantrurtatme tusa ujakmauri

(*Marc. 14.26-31; Luc. 22.31-34; Juan 13.36-38*)

³⁰Tura kanta kantamar umisar, Olivo Muranam wemiayi. ³¹Tura nuni jearin Jesús iin chichartamak:

—Ju kashia juwi atum wína mash natsantrurtatrume. Yuse chichame nunaka pachis tu aarmawaitai: ‘Uwija wainiun maawartinuitai. Turamtai uwija irunu tupikiarartinuitai.’^u ³²Antsu jakan

nantakin Galilea nungkanam weatsrum-ning wiyá eemkitatjai, —turammiaji.

³³Turammatai Pedro Jesúsán chicharak:

—Mash amin natsantraminamtaisha, wikia pengké natsantrashtatjame, —timiayi.

³⁴Tamaitiat Jesús ayaak:

—Nekasan tajame: Ju kashia juwi atash shinatsaing, ame kempatam waitrakum wína pachitsam: Nu aintsnaka wainchawaitjai tusam uurtuktatme, —timiayi.

³⁵Tamaitiat Pedro chicharak:

—Atsa, amin mantaminamtaisha wikia: Iijai jakami tau asan nekasam nunaka tichatatjai, —timiayi. Pedro tamati, chikich ainautisha nunisrik timiaji.

**Jesús arakmau Getsemaní
tutainum Yus seamuri**

(*Marc. 14.32-42; Luc. 22.39-46*)

³⁶Tura numi arakmau Getsemaní tutainum wemiaji. Tura nuni jearin, Jesús ni nuiniatiri ainautin chichartamak:

—Juni pujusrum nakarsataram. Turakrumin wikia auni Apaachirun aujsatasan weajai, —turammiaji.

³⁷Tura Pedroncha, tura Zebedeo uchirin mai ayas juki, arakchichu wear, Jesús napchau nintimias wake mesekmiayi. ³⁸Tura chicharak:

—Timiá wake meseakun jata nekapeajai. Atumsha wijai pujusrum kanutsuk asataram, —timiayi.

³⁹Tura arakchichu we, nungka pinakumar tepes, Yusen seak: “Apaachi, ame wakerakmek, wi wait wajaktinka tsangkamrukaip. Turayat wi wakera-murka achati, antsu ame wakerame nuke ati,” Jesús timiayi.

⁴⁰Tura ni nuiniatiri pujuinamunam waketki taa, kanú tepeenaun wainak, Pedron shintar chicharak:

—¿Atumka kichik horaksha wijai kanutsuk pujutka tujintarmek? ⁴¹Tunau nepetukai tusaram, kanutsuk Yus seataram. Atumi nintijai nintimsaram: Tunaanaka nepetkatatjai tayatrumek, atumkeka tunau nepetkashtatrumek, —Jesús timiayi.

⁴²Tura ataksha we Yusen seak: “Apaachi, wi wait wajaktin jurutchakmek, ame wakeramuram miatrusmek umikta,” timiayi.

⁴³Nunia waketki, ni nuiniatiri ainaun ataksha kari nepetinam, kanú tepeenaun wainkamiayi. ⁴⁴Kaninamtai Jesús jiis ukuki, ataksha Yusen seatas we, nuwik Yusen seamia nunisang ataksha seamiaiyi. ⁴⁵Tura sea umis, ni nuiniatiri ainauti tepamunam taa iin shintamar chichartamak:

—¿Yamaikia tuke kanurtasrum tura ayamratasrum wakerarmek? Wikia Yus akupkamutiatnak aints asamtai, tunaarintin ainamunam wína surutkartin hora yanchuk jeayi. ⁴⁶Nantaktaram. Wína surutkatnuka yanchuk winitrawai. Nijai ingkiunikmi, —Jesús turammiaji. v

Jesús achikiar jukimuri

(*Marc. 14.43-50; Luc. 22.47-53; Juan 18.2-11*)

⁴⁷Jesús tuke chichaak wajai, Judas ni nuiniatiritiat Jesúsán anangka suruktas tarimiayi. Tura nijai wininauka saapin takusar, tura numin takusar winiarmiayi. Nu aints ainauka sacerdote juuntri ainau, tura judío juuntri ainausha akupkamu armiaiyi. ⁴⁸Kauninamtai Jesúsnum jeainatsaing Judas nu aints ainaun chicharak:

—Wi juwaitai tusan mejeetatjai. Turamtai achikrum jukitaram, —timiayi.

⁴⁹Tu tinu asa, Jesús wajamunam jea Jesúsán mejeak:

—Nuikiartinu winajai, —timiayi. ⁵⁰Tamati Jesús chicharak:

—Amiku, ame wina achirkatasam winame nuka yamaikia achirkata, —timiayi.

Tamati kautkaru ainau Jesúsan tap achikiar metawarmiayi.

⁵¹Metawaramtai Jesúsa nuiniatiri kichik ni saapirin kuinak sacerdote juuntri inatirin kuwishin met charutkamiayi. ⁵²Turamtai Jesús ni nuiniatirin chicharak:

—Saapiram engketirin engkeata. Saapijai maanin ainauka saapijai jakartin ainawai. ⁵³Wi wakeraknaka, wína Apaachirun seamka, yamaik ni awemamuri ainaun untsuri warangkan uchir ayamruktaram tusa akupturkamnawaitai. ¿Nuka nekatsmek? ⁵⁴Antsu wi Apaachirun tu seanka, ¿yamai wi jakatniun pachisar Yuse chichame etserin yaanchuik aararmia nunaka itirak umiktaj? —timiayi.

⁵⁵Nunia Jesús nu aints ainaun chicharak:

—¿Waruka kasa aints achiktasrum winitua nunisrumsha, saapisha tura numisha takusrumsha tarutniurme? Wikia kashincha kashincha Yus seatai juun jeanam atumjai pujusan aints ainaun nuininuyajai. Tura waitiatrum nuningkia achirkachmarume. ⁵⁶Tura yaanchuik Yuse chichame etserin aararmia nu umiktasrum aitkarame, —timiayi.^w

Tamati ni nuiniatiri ainautikia mash Jesúska ukukir tupikiakmijai.

Sacerdote juuntri pujamunam jukimuri

(*Marc. 14.53-65; Luc. 22.54-55, 63-71; Juan 18.12-14, 19-24*)

⁵⁷Antsu Jesúsan achikiaru ainau sacerdote apuri Caifás naartinu jeen umaarmiayi. Moisésa chichame nuikiartin ainau, tura judío juuntri ainausha

nuni iruntrararmiayi. ⁵⁸Tura Jesúsan ayasar weenamunam Pedroscha uku nemas sacerdote apuri jeen jeamiayi. Tura jeanmaka waaitsuk wenuknunak waya ¿Jesúsan itiuurkarting? tusa, Yus seati jea wainujai tsanias pujusmiayi.

⁵⁹Nunia sacerdote juuntri ainau, tura judío apuri ainaujaisha mash iruntrar: Nekas Jesús tunau turayi tiarat tusar, chichaman tsanumin ainaun eakarmiayi. Tura nu antukrikia maatai tu nintimrararmiayi. ⁶⁰Aints untsuri Jesúsan tsanuminayat, Jesús maatnunka nekaacharmiayi. Nunia nukap arus inangnamunam jimia aints taar, ⁶¹etserinak:

—Ju aintska chichaak: ‘Yus seatai juun jean yumpungnasha, ataksha kempatam kintatik jeamkamnawaitjai,’ tu chichasmayi, —Jesúsan tsanuminak tiarmiayi.^x

⁶²Tinamtai sacerdote apuri wajaki Jesúsan chicharak:

—¿Waruka airtsume? ¿Amin pachitmasar etserturmina nuka warimpita? —timiayi.

⁶³Tamaitiat Jesúska aimkachmiayi. Tura aimtsuk wajamtai, sacerdote apuri ataksha chicharak:

—Yus nekas iwiaaku puja nuna naarin pachisan nekasan tajame: Waitruakminka Yus jiirmastatui. Wi iniastatjame nuka yamaikia ujatkata: ¿Nekasmek Mesíasaitam? ¿Yuse Uchirintam? —tu iniasmiayi.

⁶⁴Tu iniam Jesús ayaak:

—Ja ai, ame tame nuka nuwaitjai. Tura asan nunasha tajame: Aints ayatun Yus akupkamu asan, nekas kakaram aa nuna untsurinini keemsan, nunia nayaimpinmaya yurangmijai winamtai, winaka waitkatnuitrume, —timiayi.

⁶⁵Tamati sacerdote juuntri nuna antuk kajerak wejmakrin japiki jaak:

—Pai, ju aintska Yusen pachis: Nuna Uchirinjai nangkami tinu asa pasé

chichasi. ¿Tura warí chicham antuktasrik nakastaj? Atumsha Yusen pachis pasé chichaamuka antukurme. ⁶⁶¿Itiur nintimtarne? —tu iniam mash aiminak:

—Juka Yuse Uchirinjai tinu asamtai maawarti, —tiarmiayi.

⁶⁷Tura yapiin usukrarmiayi. Tura awatrarmiayi. Tura tarachjai jiin jingkiatawar yapiin awatinak tura wishikinak:

⁶⁸—¿Ame Mesíaskitam? Watska, ame nekamin akumka ¿yáki aikara? tusam nekaata, —tiarmiayi.ʸ

Pedro: Jesúsna wainchajai timiauri

(*Marc. 14.66-72; Luc. 22.56-62;*

Juan 18.15-18, 25-27)

⁶⁹Jesúsán awatinamtai, Pedroka anum wajai, nuwa sacerdoté inatiri amia nu tari Pedron wainak chicharak:

—Amesha Galileanmaya aints Jesús naartinjai wekainuyame nuwaapitne, —timiayi.

⁷⁰Tamaitiat Pedro mash aints antinamunam chichaak:

—Atsa, antsu ame turutme nunaka pengké nekatsjai, —timiayi.

⁷¹Nunia jiinkitas waitinam wajamtai, chichik nuwa nuni wajainaun chicharak:

—Ju aintska Nazaretnumia Jesúsjai wekainuyayi, —timiayi.

⁷²Tamaitiat Pedro ataksha kakar chicharak:

—Atsa, Yusjai tajai: Nu aintsna pengké wainchawaitjai, —timiayi.

⁷³Tamati jumchik arus nuni wajainau Pedron tariat chicharinak:

—Galileanmaya aintsua nunismek chichau asakmin, nekasmeapi amesha aujai wekainuyame tusar nekaji, —tiarmiayi. ⁷⁴Tinamaitiat Pedro aimiak:

—Wikia nekasan Yusjai tajarme: Nu aintsna pengké wainchawaitjai. Yusjai

tajai, waitchawaitjai, —nangkami waitrak timiayi.

Nu tamaujui metek atash shinimiayi. ⁷⁵Atash shinamtai, Jesús tímia nunaka Pedro nintimramiayi. “Atash shinatsaing, ame kempatam waitrakum wina pachitsam: Nu aintsna wainchawaitjai tusam uurtuktatme,” Jesús tinu asamtai, Pedro nu chichaman nintimiar, nunia jiinki kakar juutmiayi.

Pilato pujamunam jukimuri

(*Marc. 15.1; Luc. 23.1-2; Juan 18.28-32*)

27 ¹Tura tsawaarai sacerdoté juuntri ainau judfo apuri ainuajai mash: Jesús maatai tusar chichaman najanawar-tas iruntrararmiayi. ²Tura chichaman najanawar Jesúsán jingkiawar, romano apuri Pilato pujamunam jeeniarmiayi.

Judasa jakamuri

³Judas Jesúsán surukmia nuka Jesúsán maatai tinamun antuk napchau nintimias, sacerdoté juuntri irunu judfo apuri irunujai pujuinamunam taa, treinta (30) kuikian wainkimiayi. ⁴Tura chicharak:

—Wikia aints tunaarinchau wainiatun: Achiktaram tusan suruku asan, tunaun turajai, —timiayi.

Tamaitiat aiminak:

—¿Ilisha ititurkatjik? Amek nintimrata, —tiarmiayi.

⁵Tinamtai Judas Yus seatai juun jeanam nu kuikian nangkimiá japa ukuki, nunia jiinki we, naekjai kuntujen jingkiama, nunia tsekengki nema iyaar jakamiayi.

⁶Judas kuikian Yus seatai jeanam japa ukukin asamtai, sacerdoté juuntri ainu nu kuikian jukiar chicharnainak:

—Ju kuikijai aints maataram tusa suruku asamtai, kuik engketinam engkeachminuitai, —tunaiyarmiayi.

⁷Tura chikich nungkanmaya ainau ju yaktanam jakaramtai, nuni iwiarsami tusar, nu kuikiajai nungka Nuwe Najantai tutain sumakarmiyai. ⁸Tura aints maataram tusar, kuik jukimujai nu nungkan sumakaru asaramtai, yamaisha tuke 'Numpa Nungka' tinawai.^z

⁹Nu nungka sumaktinun pachis yaanchuik Yuse chichame etserin Jeremías naartin eemak aarmia nunaka miatrusang umikmiyai. Nu aarmauka nuwaitai: ¹⁰“Israela weari ainau treinta (30) kuikian akiimiaktinuitai timiau asar, nu kuikian jukiar, Apu Yus tímia nunisarang nujai Nuwe Najantai nungkan sumakarmiyai,” tu aarmawaitai.^a

Pilato Jesúsán iniasmauri

(*Marc. 15.2-5; Luc. 23.3-5; Juan 18.33-38*)

¹¹Tura Jesúsán jukiar, romano apuri Pilato pujamunam jeeniarantai, nuka Jesúsán iniak:

—¿Nekasmek judío apurintam? —tu iniam Jesús ayaak:

—Ame turutme nuka nekasam tame, —timiayi.

¹²Tamati sacerdote juuntri ainau, tura judío apuri ainausha Jesúska tsanumina-maitiat aintsuk wajamiyai. ¹³Turamtai Pilato iniak:

—¿Amin chichaman untsurin aujmatra-mina nuka antatsmek? —timiayi.

¹⁴Tamaitiat Jesús pengké aikchamiyai. Tura asamtai romano apuri nukap nintimias: ¿Warinak titaj? takusha nintimrachmiyai.

**Pilato Jesúsán maawarti
tusa tsangkamkamuri**

(*Marc. 15.6-20; Luc. 23.13-25;
Juan 18.38-19.16*)

¹⁵Tura Pascua fiesta jeatak wajai, musachjai metek romano apuri aints

achikmau kársernum engketun kichik jiiki akupnuyayi. ¿Tura yáki jiinkit? tu iniam: Nu aintska jiikim akupkata tu seainamka jiiki akupnuyayi. ¹⁶Nu kársernum aints juun tunau Barrabás naartin engketu asamtai, nu aintsu turamurin aints mash nekaawarmiyai. ¹⁷Tura asamtai Pilato nu aints iruntrarun iniak:

—¿Yana jiikit tusarnea wakerarme? ¿Barrabásnash jiikin akupkataj? Antsu nu nakitakrumningkia, ¿Jesús Mesíasaitai tina nunash jiikin akupkataj? —timiayi.

¹⁸Sacerdote juuntri ainau Jesúsán nangkamiar suwirpiaku jiinak niin itaarmia nunaka nekau asa, Pilato nuna timiayi.

¹⁹Tura Pilato chichaman nekaatas inintrak pujai, ni nuwari aishrin chichaman akuptak: “Nu aintska nekas tunaarinchau waininayat pasé awajinam-taisha ameka pachinkaip. Kashi nu aintsun pachis mesekran ipiatrukmayi,” timiayi.

²⁰Tura sacerdote juuntri ainau, tura judío apuri ainausha aints irunun akatinak:

—Barrabásan jiikti, antsu Jesúsán maawarti titaram, —tu chichaarmiyai.

²¹Tinamtai romano apuri ataksha iniak:

—Ju jimiar aints pachisrum ¿yanak akupkataj? ¿Atumsha warintrume? —tu iniam:

—Barrabás jiikim akupkata, —tiarmiayi.

²²Tinamtai Pilato ataksha iniak:

—¿Tura Jesúsán Mesíasaitai tina nunasha ititurkatjak? —timiayi.

Tu iniam mash aiminak:

—Numi winangmanum ajinkam maata, —tiarmiayi.

²³Tinamtai Pilato chicharak:

—¿Warí tunauna turini? —tu iniamaitiat ataksha kakarar chichainak:

—Numi winangmanum ajinkam maata, —tiarmiayi.

²⁴Tura aints ainau Pilaton pachítsuk timiá kakarar chichakaramtai, Pilato yumi ikimiartin itataram tusa akupkamiayi. Tura yumin itaaramtai, aints ainau mash jiiminai ikimiak:

—Ju aints nekas tunaarinchau maatniunka wikia pachinkashtatjai. Nuka atumnawaitai. Tura atumka ju nekaataram tusan, uwejrún ikimijai, —timiayi.

²⁵Tamati aints ainau mash aiminak:

—Iikia ii weatak ju aints maamuka jiiestatji. Tura asamtai nu aints numpe numparamtai, iisha ii weari ainausha wiasmamtikiatatji, —tiarmiayi.^b

²⁶Tinamtai Pilato Barrabásan karsernunia jiiki akupkamiayi. Tura suntar ainau Jesisan katsumkarat tusa, tura numi winangmanum ajinkarti tusa akupkamiayi.^c

²⁷Akupkamtai suntar ainau ni pujutirin Jesúsán jukiar, ni wajamunam suntar ainau mash irunturarmiayi.

²⁸Tura wejmakrin aitkar wishikínak, yamaikia apu ati tusar, apu wejmakrin kapantakun antsarmiayi. ²⁹Tura tsengkrutin jangkin najatawar tsengkrumtikiar tura nangkia tumaun karisan untsurinini taksarmiayi. Nunia nangkamiar wishikrami tusar tikishmarar:

—Judío apuriya, pengker pujusta, —tiarmiayi.

³⁰Tura usukrarmiayi. Tura karisan jurukiar muuken awatiarmiayi. ³¹Nuna turuwar wishikrar umisar, apu wejmakrin aitkar, ni wejmakrin ataksha antsarmiayi. Tura numi winangmanum maatai tusar Jesúsán jukiarmiayi.

Numi winangmanum maamuri

(Marc. 15.21-32; Luc. 23.26-43; Juan 19.17-27)

³²Tura Jesúsán jukiar jinta weenak, Cirene nungkanmaya aintsun Simón naartinun wainkar, Jesúsá krusrin nanarsat tusar achikiarmiayi.

³³Nunia mura Gólgota tutainum wearmiayi. Gólgotaka ii chichamejaingka muuk ukunch taku tawai. ³⁴Tura nuni jear, najaimiashti tusar, umuti vino tutain yapaujai pachimrar umurat tusar susarmiayi. Jesús suamaitiat nuna nekapes nakitak umurchamiayi.

³⁵Turamtai numi winangmanum jinkar umisar, yakí takuiniar nenaawar suntar ainau nakuruti suerten tutain nakurinak: ¿Yáki iin nepetamak Jesúsá entsatirin jukit? tusar nakurusarmiayi.^d ³⁶Tura: Nakasmi tusar, Jesúsán jiiij pujuriarmiayi. ³⁷Tura aints ainau: ¿Waruka maamuita? tu inintrinauka mash nekaawarat tusar tatangkan aarar, Jesúsá muuke yakinini numi winangmanum nujtukarmiayi. Nu aarmauka nuwaitai: “Juka Jesúsaitai, judío apurintai.”

³⁸Nuniasha kasa aintsun jimiaran, kichik Jesúsá untsurinini, tura kichnasha Jesúsá menarininisha numi winangmanum nenaawarmiayi. ³⁹Turuwaramtai aints ainau nangkaaminak Jesúsán wishikínak muuken pearar pasé chicharinak:

⁴⁰—¿Ame Yus seati juun jean yumpungtatjai, turan kempatam kintati ataksha jeamkatatjai tichamkum? Watska, yamaikia amek uwemrata. Yuse Uchirinkumka, numinmaya kuankita, —tiarmiayi.^e

⁴¹Sacerdote juuntri ainau, tura Moisésá chichame nuikiartin ainausha, tura

fariseo ainausha, tura judío apuri
ainausha mash Jesúsán wishikinak, mai
nuwamtak chicharnainak:

⁴²—Chikich ainaun uwemtiknuyayi,
antsu ningki uwemratatkama tujintawai.
Israela apurinkungka, nekas numinmaya
kuankiamtaikia, iikia nekasampita tiinji.

⁴³Yusnaka nekas nintimnuyayi.
¿Nangkami wikia Yuse Uchirinjai
tichamasha? Watska, Yus nekas
wakerakka, yamaikia uwemtikrati,
—tiarmiayi.^f

⁴⁴Kasa aintcha nijai metek ajintamuka
nunisang Jesúsán pasé chicharkamiayi.

Jesúsa jakamuri

(*Marc. 15.33-41; Luc. 23.44-49; Juan 19.28-30;*
Hebr. 9.1-10.22)

⁴⁵Tsaa tupin wajasamtaí, mash nungka
te wajasmiai. Tura kempatam hora
nangkamaramtaí, tsaa yantanti ataksha
tsantramiayi. ⁴⁶Turamtaí Jesús hebreo
chichamejai kakar unsumak:

—Elí, Elí, lema sabactani, —timiayi.
Nuka ii chichamejai “Yusru, Yusru
¿waruka ajapruamsha ukurme?” taku
timiayi.^g

⁴⁷Tamati aints nuni wajainau nuna
antukar:

—Antuktaram. Yuse chichame etserin
Elías yaanchuik pujumia nu tati tusa
untsuawai, —tiarmiayi.

⁴⁸Tinamtaí aints kichik ampuki we,
vino churiniun uruchjai chupir sapapjai
iju, mukunat tusa áapamiayi. ⁴⁹Turamtaí
chikich aints ainau chicharinak:

—Inaisata. ¿Elías taa uwemtikrashtim-
piash? Nu wainkami, —tiarmiayi.

⁵⁰Tinamtaí Jesús ataksha kakar
unsumak nuniangka jakamiayi. ⁵¹Jesús
jakamtaí, Yus seataí juun jeanam
aparmau netimia nu ningki yakíya tseu
jaankamiayi. Tura nungka uurkamiayi.

Uurmataí pampa ainausha puuntrar-
miayi. ⁵²Tura aints iwiartai ainausha
ningki urankaru asaramtaí, Yuse umirin
jakaru ainau untsuri nantakiarmiayi.

⁵³Tura kempatam kinta nangkamarai,
Yus Jesúsán eemak inankiamtaí, nu
jakaru ainau iwiarsamunmaya jiinkiar,
Yuse yaktarin Jerusalénnum wayaawa-
ramtaí, aints untsuri niin wainkamiayi.

⁵⁴Jesús jakamtaí nungka urmataí,
suntar ainau Jesúsán nakarmia nusha,
tura ni kapitangkrisha nuna wainkar,
tura chikich shamrumtin amia nunasha
wainkar shamkarmiayi. Tura shaminak:

—Juka nekas Yuse Uchiri ayayi,
—tiarmiayi.

⁵⁵Tura nuwa ainau untsuri arák jii
wajatiarmiayi. Nu nuwa ainau Galilea
nungkanmaya taar, Jesúsán nemarsar
yaingkiarmiayi. ⁵⁶Nu nuwa irunu
Magdalanmaya Maríjai, tura José nukuri
Maríjai, tura Zebedeo nuwarijai nuni
wajaarmiayi.^h

Jesúsa iwiarsamuri

(*Marc. 15.42-47; Luc. 23.50-56; Juan 19.38-42*)

⁵⁷Kintamati Arimateanmaya aints
kuikiartin José naartin tamiayi. Nusha
Jesúsán nemarnuyayi. ⁵⁸Tura Pilatonam
we, Jesúsá namangken iwiarsatas
iniimiayi. Tamati Pilato: Susataram tusa
chichaman akuptukmiayi. ⁵⁹Turamtaí José
Jesúsa namangken juki, tarach yamarmajai
kangkarmiayi. ⁶⁰Tura ni iwiarsatnunam
pampa taimu yamarmanam iwiarsamiayi.
Tura nuni iwiaras umis, waitirín kaya
juun najanamujai epenmiayi. ⁶¹Turamtaí
nuni Magdalanmaya Marí chikich Maríjai
iwiarsamun nákainak jii pujuriarmiayi.

Suntar ainau Jesús iwiarsamun nakasmauri

⁶²Kashin tsawaar, ayamtaí kinta
kintamaunum sacerdote ainau fariseo

ainaujai Pilaton jiasartas weriarmiayi.

⁶³Tura chicharinak:

—Apu, nu wait chichaman etserin yaanchuik iwiaaku pujak chichaak: ‘Wi jakan kempatam kinta tepayatun ataksha nantaktatjai,’ tinuyayi.ⁱ

⁶⁴“Tu tinu asantai ni nuiniatiri ainau kashi tariar, ni namangken kasamkarai tusam, kempatam kinta suntarum iwiarsamun wainkarti tusam akupkarta. Nu turachkumningkia, ni namangken kasamkar, aints ainau anangminak: ‘Nekas jakamunmaya nantakni,’ tariar tusam turata. Nu chichamjaingkia aints ainau yaanchuik anangmawarmia nuna nangkamasarang anangmawartinuitai, —tiarmiayi.

⁶⁵Tinamtai Pilato aimiak:

—Atum wakerakrumka aints ainau iwiarsamun urakarai tusaram suntar ainau atumek akupkataram, —timiayi.

⁶⁶Tamati ayu tusar weriar, iwiarsamun urakarai tusar, epentairin kaya najanamun sentajai kantserar, apu aarmaurin sello tutaijai nujtukarmiayi. Tura suntar ainau iwiarsamun wainkarat tusar ukurkiarmiayi.

Jesúsa nantakmiauri

(*Marc. 16.1-8; Luc. 24.1-12; Juan 20.1-10*)

28 ¹Judío ayamtai kinta nangkamarantai, tumíng kintati kashik Magdalanmaya Marí chikich Maríjai iwiarsamun jiasartas wearmiayi. ²Tura weenai nungka kakarman uirkamiayi. Tura uurmatai Yuse awemamuri nayaim-pinmaya tari, epenmiaurin kaya ututun urak nuni keemsamiayi. ³Yuse awemamuri peema timianu paan tsantramiayi. Tura ni entsatiri nekas puju jiiitsumir amiayi.

⁴Tumamtai suntar ainau nuna wainkar shaminak kura kura wajaarmiayi. Tura

jakawa nunisarang ayaarar nungkanam tepesarmiayi. ⁵Turinamtai Yuse awemamuri nuwa taaru ainaun chicharak:

—Shamrukairap. Atumka nekasrum Jesús nuni winangmanum maawarma nu earme tusan nekajrume. ⁶Juningkia tepatsui. Jakayat ni tímia nunisang nantakni. Ni iwiarsamuri jiiistaram. ⁷Turaram wári werum ni nuiniatiri ainau jiiisrum: ‘Jesús jakayat jakamunmaya nantakni. Tura atum weatsrumning, niyá eemak Galilea nungkanam wetatui. Tura asantai nuni weriram wainkatatrumetawai, ni ujatruktaram.’ Nunak tajarme, —timiayi.

⁸Tamati nu nuwa ainau shaminayat, nukap warasar iwiarsamun ukukiar: Jesús nuiniatiri ainau ujakmi tusar ampukiar waketkiarmiayi. ⁹Waketinai Jesús wantintukmiayi. Tura wantintuk: —¿Pujarmek? —tamati, Jesús nuni tariar tikishmatrar nawencha takarsar:

—Ameketme juuntam, —tiarmiayi.

¹⁰Tinamtai Jesús chicharak:

—Shamrukairap. Yamaikia werum wína yatsur ainau ujatruktaram: Galileanam wearti. Tura nuni jear wína waitkartatui tawai tusaram ni ujatruktaram, —timiayi.

Suntar ainau etserkamuri

¹¹Nuwa ainau waketkiaramtai, suntar iwiarsamu wainin ainau yaktanam wear, sacerdote juuntri ainaun ni wainkamurin mash ujakarmiayi. ¹²Ujakaram niisha nuna antukar çitiurkamnawaita? tusar, judío juuntri ainaun jiasartas weriarmiayi. Tura chichasar umisar metek nintimrar, suntar ainaun kuikian nukap susar chicharinak:

¹³—Anturtuktaram. Aints ininminamtai tu ujaakrum: Kashi ii kanakur teparin, ni nuiniatiri ainau tariar Jesús nuni namangken

kasamkar jukiari, anangkuram titaram.
¹⁴Turakrumningkia juun apu Pilato nu chichaman antuk, atumin pasé awajtam-sarai tusar, ii weri chichamka iwiaratatji, —tiarmiayi. ¹⁵Tinamtai suntar ainau ayu tusar kuikian jukiari, judío juuntri tina nunisrik titai tusar wearmiayi. Tura asar judío ainau yamaisha tuke nunisarang tu etserin ainawai.

**Jesús ni nuiniatiri ainaun
 akatar akupkamuri**
*(Marc. 16.14-18; Luc. 24.36-49;
 Juan 20.19-23)*

¹⁶Nunia Jesúsua nuiniatiri once (11) ainauti Galileanam wemiaji. Tura Jesús nu muranam wakataran timiau asar, nuni wakamiaji.

¹⁷Tura Jesús wainkar tikishmatrar: “Ameketme juuntam,” timiaji. Antsu chikich ainausha: ¿Nekasash Jesúsai? tu

nintimrarmiayi. ¹⁸Tuminamtai Jesús ni nuiniatiri ainauti wajainamunam tejuwach taa iin chichartamak:

—Yus wína chichartak: Nayaimpinam tura nungkanmasha wína kakarmarjai mash ainia nu inarta turutmiayi.

¹⁹Turutin asamtai, mash nungka ainamunam werum, wína nuiniatir wajasarti tusaram, aints ainau nuiniartaram. Tura wína Apaachiru Yuse naari pachisrum, tura Yuse Uchiri naari pachisrum, tura Yuse Wakani naari pachisrum aints ainau imiaitaram.

²⁰Turaram wína chichamur wi akupkamiajrume nuka chikich aints ainau miatrusarang umirkarat tusaram nuiniartaram. Tura nusha kajinmakirap: Nungka amuachmataikia wikia kintajai metek, kashincha kashincha tuke atumjai tsaniasan pujustinuitjai tajarme, —Jesús akatamak turammiaji.

Yamaram Chicham Marcosa Aarmauri

Imiakratin Juan Yuse Chichamen etserkamuri

(Mat. 3.1-12; Luc. 3.1-9, 15-17; Juan 1.19-28)

1 ¹Yuse Uchiri Jesucriston pachis pengker etserkamu tu nangkamamiayi.

²Yaanchuik imiakratin Juan akiintsaing, Yuska niin pachis ni chichamen etsernun Isaías naartinun ni chichamen aamtikramiayi. Nu aarmauka nuwaitai:

“Nintimrataram. Yus chichaak: Ami wetintrumin weti tusan, tura ami jintimin iwiarati tusan, wína akupamurun eemkan akupajai,” timiayi.

³Nisha numi atsamunam taa aints ainaun chicharak: “Juun Apu wekaasatniun jintan tupin iwiarina nunisrumek atumi nintisha iwiarataram.” Tu aarmawaitai.^a

⁴Yaanchuik aarmawa nunisang Juan numi atsamunam aints ainaun entsanam imaimiayi, tura chicharak:

—Wína tunaarun Yus sakturati tusaram, atumi nintimauri yapajiataram. Tu nintimraram maaitaram, —timiayi.

⁵Tura Yuse chichamen etserkau asamtai, Judea nungkanmaya ainu mash anturkantai tusar, Juan pujamunam wearmiayi. Tura Jerusalén yaktanmayasha aints unturi kaunkarmiayi. Tura Jordán entsanam taar ni tunaarun etserkaramtai, Juan nu aints ainaun imaimiayi.

⁶Juan kamiyu uren kachumnuyayi. Peetirinha nuwap najanamun peeyayi. Tura manchinha yuyayi. Tura wapasa yumirincha uminuyayi. ⁷Tura aints ainaun ujaak:

“Wína ukurun winá nuka nekas wína nangkatusang kakaram atatu. Wikia nekas mianchau asan, tsuntsumruan sapatri jingkiamurin atiataj tayatun, natsaamau asan atiachminuitjai. ⁸Wikia aya entsanmak imiajrume, antsu ningkia Yuse Wakani atumi nintin engketramatnuitrume,” Juan timiayi.^b

Jesúsa maimuri

(Mat. 3.13-17; Luc. 3.21-22)

⁹Juan aints ainaun imiaak pujai, Jesús Nazaret yaktanmaya Galilea nungkanmaya jiinki: Jordán entsanam wína imiatti tusa Juankun werimiayi. ¹⁰Tura maai entsanmaya jiinki, nayaim uranniun wainkamiayi. Tura Yuse Wakani yapangma tumau ni muuken winaun wainkamiayi. ¹¹Tura nayaimpinmaya chichaman antukmiayi. Nu chichamka nuwaitai:

“Ameka wína uchiruitme, wína anetiruitme. Amin pengker nintimtusan pujajme,” timiayi.^c

Jesúsán nekapsamuri

(Mat. 4.1-11; Luc. 4.1-13)

¹²Nunia Yuse Wakani Jesúsán aints atsamunam ayamiayi. ¹³Nuni pachim pujuinamunam cuarenta (40) kinta iwianchi apuri Satanásjai nekapnaisatas

a 1.3 (Isa. 40.3; Mal. 3.1) b 1.8 (Juan 1.6-8, 32-34; Hech. 1.5) c 1.11 (Mat. 17.5; Marc. 9.7)

pujumiayi. Turantai Yuse awemamuri ainau Jesúsan wainkartas tariarmiayi.

Jesús Galilea nungkanam ni takatrin nangkamamuri

(Mat. 4.12-17; Luc. 4.14-15)

¹⁴Suntar ainau Juankun achikiar, kársernum engkewaramtai, Jesús: Yus aints ainaun tu inartinuitai tusa, Yusnum uwemratin chichaman etserkatas Galilea nungkanam tamiayi. ¹⁵Tura chichaak: “Yuse kintari jeayi. Tura ni aintsri inartin kinta jeatak wajasu asamtai, yaanchuik pasé nintimtaingkia yapajiam, Yusnum uwemratin chicham nekasampita tusaram umirkataram,” Jesús timiayi.^d

Namakan achiu ainaun untsukmauri

(Mat. 4.18-22; Luc. 5.1-11)

¹⁶Jesús Galileanam juun kucha kaanmatkarin wekaas, namakan achiun Simón naartinun ni yachí Andrésjai nuni pujuinaun wainkamiayi. ¹⁷Tura wainak chicharak:

—Wína nemartustaram. Turaram namak achiarme nunisrumek aints ainau wína chichamur ujakmintrum, —timiayi.

¹⁸Tamati nuna antukar arutsuk ni rederin japawar ukukiar Jesúsan nemarkarmiayi.

¹⁹Turinamtai Jesús kucha kaanmatkarin arakchichu wekaas, Zebedeo uchirin Santiagon ni yachí Juanjai kanunam engkemsar rederin apainak pujuinaun wainkamiayi. ²⁰Tura wainak:

“Wína nemartustaram,” tusa untsukmiayi. Tamati ni aparin tura ni aintsri ainauncha kanunam ukukiar Jesúsan nemarkarmiayi.

Jesús iwianchin aintsnumia jiiki akupkamuri

(Luc. 4.31-37)

²¹Nunia Capernaum yaktanam jearmiayi. Tura ayamtai kinta asamtai,

Jesús iruntai jeanam waya, aints ainaun Yuse chichamen nuiniarmiayi. ²²Tura nuiniamtai aints ainau ni chichamen antukar nintiminak: “Juka Moisésa chichamen nuikiartin ainaun nangkama-sang iincha Yuse kakarmarijai timiá pengker nuitamji,” tiarmiayi.^e

²³Nu iruntai jeanam aints iwianchrintin pujus kakar untsamak:

²⁴—Nazarenumia Jesúsá ¿warukaya iincha amukratkatasmesha winame? Wikia nekajme. Yus akupkamuitme. Nekasam pengké tunaarinchau aa nuwaitme, —tu jiyakmiayi.

²⁵Tamati Jesús iwianchin kakar chicharak:

—Chichatsuk asata. Tura ju aintska ukuktia, —timiayi.

²⁶Tama iwianchkia nu aintsna kura kura awajki, kakar untsamak jiinkimiayi.

²⁷Tura jiinkiamtai aints ainau nuna wainkar nintimrar mai nuamtak iniininak:

—¿Ausha waringki? ¿Ju yamaram chichamsha waringki? Juka timiá kakaram asa, iwianch ainaun jiiki akupawapi. Tura akupamu asar, niincha umirinawapi, —tunaiyarmiayi.

²⁸Tura asaramtai wári Galilea nungkanam Jesúsá turamurin pachisar etserkarmiayi.

Jesús Pedro tsatsarin tsuwarmauri

(Mat. 8.14-15; Luc. 4.38-39)

²⁹Nunia iruntai jeanmaya jiinkiar Jesús Simónjai, nunia Andrésjai Simónka jeen wayaawarmiayi. Santiagosha tura Juansha Jesúsán nemariarmiayi. Nu jeaka Simónka pujutiri, tura yachí Andrésu pujutiri ayayi. ³⁰Jesús jea wayaamtai: Simónka tsatsari tsuweak peaknum tepawai tusar ujakarmiayi.

³¹Tura ujakaram Jesús ni tepamunam

weri, uwejen tap achik inankimiayi. Turamtai tsuweamuri karmachu michatramiayi. Tura michatar wajaki irasartas taarun yuramiayi.

Untsuri aints ainaun pengker tsuwarmauri
(*Mat. 8.16-17; Luc. 4.40-41*)

³²Tsaa nungká wajasai, jau ainauncha tura iwianchrintin ainauncha mash Jesúsán itariarmiayi. ³³Tura Jesús pujamunam waiti aarin nu yaktanmaya ainau mash kaunkarmiayi. ³⁴Tura kaunkaramtai Jesús najaiminauncha untsuri tsuwarmaiyi. Tura iwianchrintin ainauncha iwianchnasha untsuri jiirkimiayi. Tura iwianch ainau Jesúsán pachisar: Juka Yuse Uchirintai tusar nekainau asaramtai, ni naarin pachisar chichakarai tusa:
—Chichatsuk jiinkitaram, —timiayi.

**Judío iruntai jeanam Yuse
chichame etserkamuri**
(*Luc. 4.42-44*)

³⁵Nunia kashin tsawaatsaing Jesús nantakmiayi. Tura jeanmaya jiinki aints atsamunam Yusen seatas wemiayi.

³⁶Turamtai Simón ni amikri ainaujai čtuning puja? tusar eakartas jiinkiar-miayi. ³⁷Tura Jesúsán wainkar:

—Amin mash eatminawai, —tiarmiayi.

³⁸Tinamtai Jesús chicharak:

—Chikich chikich yaktanam tejuwach ainamunam Yuse chichame etserkataras weartai. Nuna turatasan taawitjai, —timiayi.

³⁹Nunia Galilea nungkanam mash iruntai jea ainamunam Yuse chichamen etserkamai-kiak wekaikinij, tura iwianch ainauncha jiiki akupkamaikiak wekaimiayi.^f

Jesús aints kuchaprinun tsuwarmauri
(*Mat. 8.1-4; Luc. 5.12-16*)

⁴⁰Nunia aints kuchaprintin Jesúsán seatas tarimiayi. Tura taa tikishmatar seak:

—Ame wakerutakmeka namangkrusha tsuwaramnawaitme, —timiayi.

⁴¹Tamati Jesús wait anentar uwejejai ni namangken takaras chicharak:

—Ja ai, wakerajme. Pengker wajasta, —timiayi.

⁴²Tamati nu tamaujui metek tsaar pengker wajasmiai. ⁴³⁻⁴⁴Turamtai Jesús akatak:

—Antukta. Ameka juka kichkisha etserkaip. Antsu sacerdotenam weta. Tura nuni weme namangkem inakmasta. Tura pengker wajasu asam, aints ainau pengker wajasmaurumin nekaawarat tusam, Moisés tímia nunismek turata, —Jesús tusa akupkamiayi.

⁴⁵Tamaitiat ni Jesúsnumia jiinki ni turunamurin pachitsuk aints ainaun mash ujakmiayi. Tura nuna mash antukaru asaramtai, Jesús kichik yaktanmasha paan wainkaram wayaataatkama tujinkamiayi. Antsu yakta aarin aints atsamunam pujumiayi. Turamtai mash yaktanmaya aints ainau jiinkiar Jesúsnum taarmiayi.

Jesús pimpirun tsuwarmauri
(*Mat. 9.1-8; Luc. 5.17-26*)

2 ¹Jumchik kinta nangkamaramtai, Jesús ataksha Capernaum yaktanam jeamiayi. Tura jeamtai aints ainau ni amikri jeen pujaun nekaawarmiayi. ²Tura asaramtai aints untsuri jeanam wári kautkarmiayi. Tura jeanam kak piakaramtai, waaitinmasha wayaachmin angkanchauyayi. Tura Jesús Yuse chichamen nu aints ainaun ujaak pujurmiayi. ³Tura ujaak pujai, cuatro aints pimpirun tampumruwar itarmiayi.

⁴Tuminamtai aints untsuri jeanam iruntraru asaramtai, Jesúsnum jeatatkamar tujinkar jea yakí wakaar patan urakar, pimpirun tampunam engketun

Jesús pujamunam yakiya itararmiyai.

⁵Tura nu cuatro aints pimpirun akupinak: Jesús nekasampi tsuwartatua, tu nintimraru asaramtai, Jesús nuna nekaa, pimpirun chicharak:

—Natsachi, tunaarum mash tsangkura-muitme, —timiayi.

⁶Tamati Moisésa chichamen nuikiartin ainau nuna antú pujuarmiyai. Tura ni nintijai nintiminak: ⁷“¿Jusha waruka tuusha chichaawa? ¿Ningki Yusetjai tumamtsuash? ¿Yusek tunaunaka sakarminchaukai?” tu nintimrarmiyai.

⁸Tuminamtai Jesús ni nintimaurin nekaamiayi. Tura chicharak:

—¿Waruka tuusha nintimsarmesha pujarme? ⁹¿Warí timiá yumtinuita? ¿Ami tunaarum tsangkuramuitme titin yumtinkai? Antsu nu tachakrishna pimpiru: ¿Wajakim wekaasata titin yumtinkai?

¹⁰Tura wikia aints ayatun Yus akupkamu asan, ju nungkanam aints ainau tunaarin tsangkuratnuitjai. Tura wi turamnawaitjai tusan, yamaikia nekamtikiatjarne, —timiayi.

Tura pimpirun chicharak:

¹¹—Amin tajame: Nantakim tampuram jukim jeemin waketkita, —Jesús timiyai.

¹²Tamati nu tamaujai metek aints ainau mash jiminai, pimpiru wajaki tampurin juki jiinkimiayi. Turamtai aints ainau mash nintiminak:

—Yus nekas kakarmaitai. Ju turamuka pengké kichkisha wainchawaitji, —tiarmiyai.

Jesús Levín wína nuiniatir ata timiauri

(*Mat. 9.9-13; Luc. 5.27-32*)

¹³Jesús jeanmaya jiinki, ataksha kucha kaanmatkarin wekaimiyai. Tura asamtai aints ainau mash niin kautkaram nuiniarmiyai. ¹⁴Nunia ukuki, apu akitinam nangkamak, Alfeo uchiri Leví naartinun nuni pujaun wainkamiayi. Nuka romano apuri akatramu asa, aints ainau apun

akikiarti tusa kuikian juyayi. Tura Levín wainak Jesús chicharak:

—Wína nuiniatir ata, —tama Leví ayu tusa wajaki ni takatrinka mash ukuki Jesúsán nemarsamiayi.

¹⁵Tura Leví Jesúsán: Yuwita tusa ni jeen jeemiayi. Turamtai Jesús nuni yuwak pujai, kuikian juu untsuri, tura chikich tunaarintin ainausha untsuri nijai iruntrar misanam yuwiarmiyai. Ni nuiniatiri ainausha Jesúsjai tsaniasar wekajiarmia nusha untsuri nuni yuwaarmiyai. ¹⁶Tura Jesús kuikian juu ainaujai, tura chikich tunaarintin ainaujaisha iruntrar yuwinam-tai, fariseo ainausha, tura Moisésa chichame nuikiartin ainausha nuna wainkar, Jesúsá nuiniatiri ainau iniinak:

—¿Maj atumi nuitamin waruka kuikian juu ainaujai tura chikich tunaarintin ainaujaisha yuwawa? —tiarmiyai.

¹⁷Tinamtai Jesús nuna antuk aimiak:

—Aints pengker pujuinauka tsuwakratnunka yuuminatsui. Antsu najaiminak pujuinau tsuwakratnun yuuminawai. Wikia pengke aintsuitjai tinaunka: Pasé nintimaurum yapajiataram titasna tachawitjai, antsu tunaawitjai tinaun: Pasé nintimaurum yapajiam Yus umirkataram titasan tawitjai, —timiayi.

Ijarmatin pachisar Jesúsán iniasmauri

(*Mat. 9.14-17; Luc. 5.33-39*)

¹⁸Juanku nuiniatiri ainau, tura fariseo nuiniatiri ainausha Yus seami tusar yutsuk pujuarmiyai. Turinamtai chikich aints ainau tariat, Jesúsán iniinak:

—Juanku nuiniatiri tura fariseo nuiniatiri ainausha ijarmawar yutsuk Yusen seinawai. ¿Antsu ami nuiniatiram ainau Yus seami tusar waruka ijarmatskesha pujuinawa? —tiarmiyai.

¹⁹Tu ininam Jesús nuikiartamun nuikiartak:

—¿Aints yamai nuwan nuwatkau ni untsukmau ainaujai iruntrar pujuinauka

yutsukek pujuina? Atsa, nunaka tumina-tsui. Antsu aints nuwan nuwatak ni untsukmau ainaujaj pujamtaí, untsukmau ainau warainak yutanka yutsukka pujuschartinuitai. ²⁰Antsu aints nuwan yamai nuwatkamun jukiartin kinta jeamtaí, nuniangka untsukmau ainau wake mesekar ijarmawartinuitai. Wikia wína nuiniatir ainaujaj pujamtaí, nusha nunisarang warainak yutsukka pujuschartin ainawai. Antsu wína jurukiaramtaí, nuniangka ijarmawartinuitai, —timiayi.

²¹Nunia Jesús yamaram chichaman ni nuiniarmia nuna pachis ataksha etserak: “Wejmak arut jaankamtaí, ju nungkanam aints kichkisha tarachin yamarman nujtk apainatsui. Antsu nu turamka, nunia nijaram yamaram tarach setur tuupich wajaayi, tura asa arutrin chingkiana nuna nangkamasang nukap jaankatnuitai. ²²Nuniangka amuti, vino tutai, yamai kariauka nuwap aparmau mamurunmaka yarakhatnuitai. Nu turamka vino kariak wapakrak nuwap aparmaunaka pujkatnuitai. Tura vino ukaratnuitai, tura nuwap aparmausha pasemartinuitai. Antsu vino yamaram aa nu nuwap aparmau yamarmanam yaratayi,” Jesús timiayi.^g

Ayamtaí kintati trigo majurar yuwamuri
(*Mat. 12.1-8; Luc. 6.1-5*)

²³Chikich ayamtaí kintati Jesús ni nuiniatiri ainaujaj aja japeng nangkami-nak, ni nuiniatiri trigo jingkiajin achikiar majurar yukiar wearmiayi. ²⁴Turinamtaí fariseo nuna wainkar, Jesúsán chicharinak:

—Ayamtaí kintati Moisés takakmatsuk asataram tusa surimkau wainiatcha ¿warukaya ami nuiniatirmeka aitkinawa? —tiarmiayi.

²⁵Tinamtaí Jesús aimiak: —¿Atumka ii juuntri Davidta turamuri pachisrum Yuse Papiri aujchaukitrum? ¿Nuka yurumkan yuumak ni aintsri ainaujaj tsukaminak turuwarmia nuka aujchaukitrum?

²⁶Sacerdote apuri, Abiatar naartin pujaj, David Yus seataí juun jeansam waya, nuni Yus inaktustin pang Yus susamu, aya sacerdote yutairi au wainiat, nisha sacerdotechutiat yuwamiayi. Tura nijaj wekainauncha: Yuwataram tusa susamiayi. Antsu Yus nu turamu pachiska tunaawitai tichamiayi, —timiayi.

²⁷Tura ataksha chicharak:

—Yus ayamtaí kinta aints ainau ayamrarti tusa najanamiayi. Antsu aints ainau wait wajakarti tusangka, Yus ayamtaí kintanka najanachmiayi. ²⁸Wi aints ayatun Yus akupkamu asan, aints ainaun ayamtaí kintati tu pujusarti tusan inartinuitajai, —Jesús timiayi.^h

Uwejen mutchaun tsuwarmauri
(*Mat. 12.9-14; Luc. 6.6-11*)

3 ¹Chikich ayamtaí kintati Jesús ataksha iruntai jeansam wayaamiayi. Tura nuni waya, aints uwejen mutchaun wainkamiayi. ²Turamtaí fariseo ainau Jesúsán jiisar: Ayamtaí kintati ju aintsun tsuwaramtaikia, Jesús tunau wajasi timi, tu nintimsar jiiij pujuriarmiayi. ³Tuminamtaí Jesús uwejen mutchaun chicharak:

—Wajakim japen wajasta, —timiayi.

⁴Tura nu aints japen wajasamtaí, Jesús aints ainaun iniak:

—¿Ayamtaí kintatisha pengker aa nuka turatnukai? ¿Nu turachkursha pasé aa nuka turatnukai? ¿Tura ju kintatisha aints jakashti tusarsha uwemtikratnukai? ¿Nu turachkursha ju kintatisha aints maatnukai? ¿Atumsha itiur nintimrume?

g 2.22 (Tura asa yamaram chicham umirkurmeka, arut chicham etsermaka inaisatnuitrume, taku timiayi.) h 2.28 (Gén. 2.2-3; Ex. 20.8-11; Lev. 19.3)

—Tu iniamaitiat Jesúsán aitske pujuarmiayi. ⁵Tura nu aints pasé nintintin asaramtai, Jesús mash jiis kakerak wake mesekmiayi. Tura uwejen mutchaun chicharak:

—Uwejem kutsmartá, —timiayi. Tama uwejen kutsmar pengker wajasmiai. ⁶Turamtaí fariseo aináú jiiinkiar, arutsuk Herodesa nemanin aináújai iruntrar: Jesús maami tusar chichaman najatiarmiayi.

Aints Jesúsnum untsuri kaunkamuri

⁷Nunia Jesús ni nuiniatiri aináújai kucha kaanmatkarin wemiayi. Turamtaí Galilea nungkanmaya aináú untsuri Jesúsán nemariarmiayi. ⁸Tura Judea nungkanmayasha, tura Jerusalén yaktanmayasha, tura Idumea nungkanmayasha, tura Jordán entsa majiniasha, tura Tiro yaktanmayasha, tura Sidón yaktanmayasha aints untsuri Jesús wainchatai takat turamun nekaawaru asar, Jesúsnum kaunkarmiayi. ⁹⁻¹⁰Jesús untsuri aintsun tsuwaru asamtaí, jáú aináú mash: Jesús antingmi tusar shitaniikiar wajarmiayi. Aints untsuri kautkaram, chanuntawarai tusa, Jesús ni nuiniatiri aináú: Kanu umistaram tusa akupkamiayi.ⁱ

¹¹Tura iwianchrintin aináú Jesúsán wainkar, naka tikishmatrar untsuminak:

—Ameka nekasam Yuse Uchirinme, —tiarmiayi.

¹²Tinamtaí Jesús iwianch aináú surimiak:

—Nuka pengké etserkairap, —tusa chicharkamiayi.

Jesús ni nuiniatiri inaikiamuri

(Mat. 10.1-4; Luc. 6.12-16)

¹³Nunia Jesús mura waka: Aints wína nuiniatir arti tusa, aints aináú ni

wakerimia nuna untsukmiayi. Tura untsukaram Jesúsán tariarmiayi. ¹⁴Tura asamtaí doce (12) aints irunún níjai wekaasarat tusa, tura Yuse chichamen etserkarat tusa akupkatas inaikiamiayi. ¹⁵Tura jáú aináú tura tsuwararat tusa, tura iwianchrintin aináú iwianchrintin jiiirkiar akupkarat tusa, Jesús ni nuiniatiri aináú ni kakarmarin susamiayi. ¹⁶Nu doce (12) aintsu naaringkia nu ainawai: Simón, chikich naari Pedron Jesús inaikiamiayi. ¹⁷Nuniasha Zebedeo uchiri Santiago, nuna yachí Juanjai, mai Boanerges inaikiamiayi. Nuka “ipiamta tumáú ainiarme” taku tawai. ¹⁸Nunia Andrésnasha, nunia Felipencha, nunia Bartolomééncha, nunia Mateoncha, nunia Tomásnasha, nunia Alfeo uchirin Santiagoncha, nunia Tadeoncha, nunia Simón yaanchuik mesetan najanin amia nu, ¹⁹nunia Judas Iscariotencha: Wina nuiniatir ata tusa Jesús inaikiamiayi. Antsu nu Judaska ukunam Jesúsán anangka surukmiayi.^j

Jesúsán pachis pasé chichasmauri

(Mat. 12.22-32; Luc. 11.14-23; 12.10)

²⁰Tura jeanam waketkiaramtaí, aints aináú ataksha kaunkaru asaramtaí, Jesús ni nuiniatiri aináújai yuwartatkamawar tujinkarmiayi. ²¹Turinamtaí Jesúsá wearisha aináú nekaawar: ¿Waurtsuash? tu nintimsar Jesúsán jukiartas tariarmiayi.

²²Turinamtaí Moisésa chichamen nuikiartin aináú Jerusalénnumia taar pasé chicharinak:

—Iwianchi apuri Beelzebú kakarmarijai iwianch aináú jiiiru weawai, —tiarmiayi.^k

²³Tu tinamtaí, Jesús nu aints aináú winitaram tusa untsukmiayi. Tura nuikiartutai chichaman nuiniak:

“¿Iwianchi apuri Satanáska itieur ningkisha japmaming? ²⁴Nintimrataram. Chikich nungkanmaya apu ainau kajernaikiar kanakar pujusar maaninamtaikia, nu nungkaka wári mesertinuitai.

²⁵Tura aints ainau kichik jeanmasha iruntrar kajernaikiar pujuinakka nu jeancha wári ukukiartinuitai. ²⁶Tura Satanás ni inatiri ainaujai kajernaikiar maaninakka ¿itiur tukesha pujusarting? Nekasar amunikiartinuitai.

²⁷“Nintimrataram. Aints nekas kakaram ni jeen pujamtaikia, jeentin jingkiatskeka ni waririn ainia nunaka pengké kichkisha kasarkachartinuitai. Antsu jeeniun jingkiawar waririn jurukiartinuitai.

²⁸“Nekasan tajarme: Aintsu tunaari ainia nunaka mash tsangkuratnuitai. Tura Yusen pachisar pasé chichaamuncha tsangkuratnuitai. ²⁹Antsu Yuse Wakanin pachisar pasé chichainaunka pengké tsangkurashartinuitai, antsu nu aintska tuke wait wajakartinuitai,” Jesús timiayi.

³⁰Jesús iwianchrinuitai tinu asaramtai nunaka timiayi.

Jesúsá nukuri ni yachí ainaujai tarimuri

(*Mat. 12.46-50; Luc. 8.19-21*)

³¹Nunia Jesúsá yachí ainau ni nukurijai Jesús pujamunam taarmiayi. Tura aanum wajasar, Jesús untsutrutu tusar, chikich aintsun akupkarmiayi. ³²Turinamtai aints niin tentewarmia nu Jesúsán chicharinak: —Nukuram yachim ainaujai aanum wajasar amin aujtamsartas untsurminawai, —tiarmiayi.

³³Tu tinam Jesús chicharak:

—¿Yaa ainawa wína nukursha tura wína yatsursha? —timiayi.

³⁴Tu iniam aimkacharamtai, niin tentewarmia nuna jiis chicharak:

—Juka wína yatsur ainawai. Tura wína nukur ainawai. ³⁵Aints Yuse wakeramu-

rin umirinauka wína yatsur tura wína umaar tura wína nukur ainawai, —Jesús timiayi.

Arakan pachis nuikiartamu

(*Mat. 13.1-9; Luc. 8.4-8*)

4 ¹Jesús ataksha kucha kaanmatkarin aints ainaun nuiniartas nangkama-miayi. Aints untsuri iruntraramtai, kanunam engkema pujamtai, aints ainau kucha kaanmatkarin pujusarmiayi.¹

²Turinamtai Jesús nuikiartutai chichaman untsuri ujakmiayi. Tura aints ainaun nuiniartas chicharak:

³“Anturtuktaram. Aints arakan tsaamratas jiinkimiayi. ⁴Tura tsaamam, araka jingkiaji jinta kakeekamtai, chingki yakiiya kautkar yuwarmiayi. ⁵Chikich araka jingkiaji kayanam nungka jumchik amanum kakeekamiayi. Tura kakeek nungka jumchik ayat kakarmachu tsapaimiayi. ⁶Antsu tsapaiyat tsaá sukuam kaarmiayi. Tura kangkape asau asamtai jakamiayi. ⁷Chikich araka jingkiajisha jangki amanum kakeekamiayi. Tura jangki pempearam araksha nerekchamiayi. ⁸Chikitcha nungka pengkernum kakeekamiayi. Tura tsapai pengker nerekmiayi. Tura nu árakka treinta (30), tura kitcha sesenta (60), tura kitcha cien (100) nerekmiayi. ⁹Aints ainautiram, ju chicham antukrum nintimrataram,” Jesús timiayi.

¿Waruka Jesús nuikiartamuncha etserkamiayi?

(*Mat. 13.10-17; Luc. 8.9-10*)

¹⁰Nunia aints untsuri jiinkiamramtai, Jesúsjai juwakarmia nu tura ni nuiniatiri ainausha Jesúsán iniinak: “¿Nu nuikiartutai chichamsha warimpita?” tiarmiayi.

¹¹Tu tinam Jesús aimiak: “Yus aints ainaun itieur inartinuita tusar, chikich

aints ainaw paan nekaacharmin wainiatrum, atumka paan nekamtikia-muitrume. Antsu Yusen umirtan nakitnauka nuikiartutai chichamak ujakmawaitai. ¹²Nuka Yusen umirtan nakitinau asar, ni jiijaingkia paan waininayat, wainmichua nunisarang wajasarti tusan, tura antutnasha antinayat nekaacharti tusan, ni tunaaurin tsangkurai tusan tu ujarajarai,” Jesús timiayi.^m

Arak tsaamramu taja nunaka takun tajai tusa etserkamuri
(*Mat. 13.18-23; Luc. 8.11-15*)

¹³Jesús ataksha chicharak: “¿Ju nuikiartutai chichamka wi taja juka warinkung taj tusaram nekatsrumek? Ju nekachkurmeka ¿itiur chikich nuikiartutai chichamsha mashcha nekaatrumek? ¹⁴Aints arakan tsaamramia nuka Yuse chichamen etsernua nunisketai. ¹⁵Tura árak jinta kakeeramia nuka chikich aintsua nunisarang ainawai. Nuka chichaman antinayat, iwianchi apuri Satanás naartin wári tari, nu chicham-naka ni nintinian jurawai. ¹⁶⁻¹⁷Chikich árak kayanam kakeeramia nuka chikich aintsua nunisarang ainawai. Nuka Yuse chichamen antukar, warasar wári umirinawai. Antsu árak kayanam kakeeramia nuka, kangkape atsau asamtai, wári jaawa nunisarang nintimnawai. Tura itiuirkachmin amatai tura Yusen nakitin ainaw wishikinam, Yuse chichamen umirkachmin nintiminak umirtan wári inainawai. ¹⁸Tura árak jangki amanum kakeeramia nuka chikich aintsua nunisarang ainawai. Nu aints ainausha Yuse chichamen antinawai. ¹⁹Tura paan antinayat ju nungkanmaya aa nuna nintiminawai. Tura kuikiartin

wajastaj tu nintimsar, mash iruna nuna wakerinawai. Tura asar Yuse chichamen nintimtsuk pujuinawai. Jangki amanum árak kakeeramia nuka nerekchatnuitai. Nu aintska jangki amanum árak kakeerawa nunisarang ainawai. ²⁰Antsu árak pengke nungkanam kakeeramia nuka chikich aintsua nunisarang ainawai. Nuka Yuse chichamen antukar pengker umirinawai. Tura asar chikich aints ainaw treinta (30), tura kitcha sesenta (60), tura kitcha cien (100) nerekuwa nunisarang ainawai,” Jesús timiayi.

Kantiin keemakmaun pachis nuikiartamu
(*Luc. 8.16-18*)

²¹Ataksha Jesús chikich nuikiartamun etserak: “¿Aints kichkisha kantiin keemak itaa muitsnum engkeawak? Atsa, tura paan ati tusa, ¿peaka wamketin pujsatnukai? Atsa, antsu paan ati tusa, yaki kentsatnuitai.” ²²Tura yamai uukmau aa nunaka ukunam mash paan inakmastinuitai. Tura yamai nekaachmin ainia nunaka ukunam mash paan nekaawartinuitai. ²³Aints ainautiram, ju chicham antukrum nintimrataram,” Jesús timiayi.^p

²⁴Tura ataksha chicharak: “Atum antu wearne nu nintimrataram. Yuse chichame jumchik antukrumka jumchik nekaatnuitrume. Antsu Yuse chichame nukap antukakrumningkia, Yuska atumin nuna nangkamasang nukap nekaataram tusa nekamtikramatnuitrume. ²⁵Tura asamtai Yuse chichamen nekas pengker nintimtusar pujuinaunka Yuska nuna nangkamasang paan nekamtikiatnuitai. Antsu Yuse chichamen nintimtachunka antukmaurin kajinmamtkui,” Jesús timiayi.^q

Arak tsapaamun pachis nuikiartamu

²⁶Nunia Jesús ataksha chicharak: “Yus aints ainaun inawa nuka aints arakan

tsaamua nunisketai. Aints arakan arakmak tsaamui. ²⁷Tura arak tsaamrar umisam, kanaisha tura iwiaisha kashisha tura tsawaisha árak tuke tsakaawai. Tura itiur tsakaawa tusangka nekatsui. ²⁸Arak nungkanam tsaamram, ningki pengker tsapaayi. Tura tsapai nukarui, nunia chiikruk árakka katsuawai. ²⁹Tura mash katsuaramtai, juuktin kinta jeayi tusar, aints ainu arakan juwinawai,” Jesús timiayi.

Mostaza jingkiaji pachis nuikiartamu

(Mat. 13.31-32; Luc. 13.18-19)

³⁰Ataksha Jesús chicharak: “¿Yuse aintsri ainu itiur yujainawa? tusan, nuikiartutai chichamjai nuiniartajrume. Anturtuktaram. ³¹Mostaza jingkiajiya tumawaitai. Nuka chikich araka jingkiajiya nuna nangkamasang tuupchitai. ³²Antsu nuka araam tsapai, chikich arakan nangkamasang juuntaitai. Tura kanawe saram tsakaramtai, nuna kanawen mikin amanum chingki pasungminawai,” Jesús timiayi.

Jesús nuikiartamun ni nuiniatiri ainaun nekamtikiamuri

(Mat. 13.34-35)

³³⁻³⁴Tura nuna antukmin ainu nekaawarti tusa, Jesús nuikiartutai chichamchaujaingkia aints ainaunka pengké ujakchamiayi. Antsu ni nuiniatiri ainaujai kanakar pujusar: Nuna takun tajai tusa, nuikiartutai chichaman nekamtiknuyayi.

Jesús kucha tamparaun miaaku awajsamuri

(Mat. 8.23-27; Luc. 8.22-25)

³⁵Chikich kintati kiarai Jesús ni nuiniatiri ainaun chicharak:
—Atumajin katingtai, —timiayi.
³⁶Tamati ayu tusar, aints ainaun ukukiar kanunam engkemawar, Jesúsán

jukiar katingkiarmiayi. Turinamtai chikich aints ainausha kanunam engkemawar wearmiayi. ³⁷Tura katinai nasesha nukap nasentan nangkamamiayi. Tura yumi kanunam yaranak ukantias wajamiayi. ³⁸Turai Jesús kanu tatangken kanur tepemiayi. Kanuru asamtai Jesúsán shintinak:

—Nuikiartinua, ukantiatji. ¿Ameka nuka pachiatmek? —tiarmiayi.

³⁹Tinamtai Jesús nantaki nasen chicharkamiayi. Tura kucha tamparaun chicharak:

—Miaaku asata, —timiayi.

Tama nasesha majanmiayi. Tura kuchasha miaaku wajasmiai. ⁴⁰Turamtai Jesús ni nuiniatiri ainaun chicharak:

—¿Waruka timiatcha shamarme?

¿Waruka wina nintimturtsurme?

—timiayi.

⁴¹Tama timiá shaminak:

—¿Ausha warí aints asamtaiya nasesha, tura tampaasha umirinawa? —tiarmiayi.

Iwianch jiikir kuchinam engkeamuri

(Mat. 8.28-34; Luc. 8.26-39)

5 ¹Kucha atumajin katingkiar Gerasa nungkanam nujamkarmiayi. ²Tura nuni nujamkar Jesús kanunmaya jiinkiamtai, aints iwianchrintin jakau iwiartainumia waurki winimiayi. ³Nu iwianchrinnuka jakau iwiartainum tuke pujuyayi. Tura asamtai jirujai jingkiawar-tatkamawar tujinkarmiayi. ⁴Tura timiá kakaram asamtai, aints ainu nepetkamniauka atsuyayi. Jirujai nawencha tura uwejencha jingkiatamaitiat tuke nepetmakmiayi. Tura ataksha jirujai jingkiawarmaitiat, ataksha putirkaja tsurinuyayi. ⁵Tura tuke tsawaisha, tura kashisha aints jakau iwiartainum tura muranmasha kayajai tukumakmaikiak wekainuyayi. ⁶Tura Jesúsán arák winau wainak, ampuki tari naka tikishmatramayi. ⁷⁻⁸Tikishmatram Jesús chicharak:

—Iwianchia, ju aintsnumia jiinkita tajame, —timiayi. Tama iwianchkia aintsnumia kakar chicharak:

—Jesúsa, Yus yakí puja nuna Uchiriya, ¿waruka winasha tarutniume? Yusjai tajame: Winaka waitkaip, —tu jiyamiayi. ⁹Tu untsumkamtai Jesús iniak:

—¿Amesha yaachitme? —tu iniam nu aintsu namangken engkemaui aimiak:

—Untsuri asar, wikia untsuri naartinuitjai, —timiayi.

¹⁰Tura iwianch ainu nu nungkanmaya akuptukai tusa, Jesúsán nukap seamiayi.

¹¹Nu muranmasha ayaamsar kuchi untsuri shushungminak wajaarmiayi.

¹²Tura asaramtai iwianch ainu Jesúsán chicharinak:

—Au kuchinam engkematarum tusam akupkartukta, —tu searmiayi.

¹³Tinamtai Jesús ayu tusa tsangkatkamiayi. Turamtai iwianch ainu nu aintsnumia jiinkiar, kuchinam engkemawaramtai, nuka wakenam pisarar, kuchanam ayangkar, kijiakar mash kajingkiarmiayi. Nu kuchikia jimia warang achayawash.

¹⁴Tuminamtai kuchi wainin ainu nuna wainkar ampukiar wear, yaktanam pujuinauncha tura ajanam pujuinauncha kuchi turunamurin etserkarmiayi. Tura asamtai aints ainu: Nekaami tusar nu yaktanmaya jiinkiarimiayi. ¹⁵Tura jiinkiar Jesúsnum taar, aints nuwik iwianchrintin pujuya nu pengker wajas wejmakan entsar, pengker nintimias pujaun wainkar shamkarmiayi. ¹⁶Tura iniinam iwianch-ruku pujuun turunamuncha, tura kuchi turunamuncha wainkaru ainu mash etserkarmiayi. ¹⁷Tura asamtai nunia aints ainu: Jesús ii nungkarinia jiinkiti tusar searmiayi.

¹⁸Tu seainam, Jesús ayu tusa wetas kanunam engkemamiayi. Engkemamtai nuwik iwianchrintin pujuya nuka pengker wajasu asa, Jesúsán chicharak:

—Wisha winitjai, —tusa iniimiayi. ¹⁹Tu iniamaitiat Jesús surimiak:

—Atsa, antsu jeemin wakatkim Apu Yus amin wait anentramra nuka, ami wearam mash ujakarta, —timiayi.

²⁰Tama nu aintska ayu tusa, Decápolis nungkanam wakетки, Jesús niin pengker awajsamurin etserkamiayi. Turamtai nu nungkanmaya ainu nuna antukar mash nukap nintimrarmiayi.

**Jairo nawantri inankimuri,
tura chikích nuwasha tsuwarmauri**
(*Mat. 9.18-26; Luc. 8.40-56*)

²¹Jesús ataksha kanujai katingkiamtai, aints untsuri nijai iruntrarmiayi. Tura kucha kaanmatkarin iruntraramtai, Jesús nuni wajasmiayi. ²²Tura nuni wajamtai, iruntai jea wainu apuri, Jairo naartin tamiayi. Tura taa Jesúsán wainak pinakumar tepesmiayi.

²³Tura pinakumar Jesúsán nukap seak:

—Wína nawantur jarutui. Tura asamtai wait aneasam wári winita. Tura tsaar pengker pujusat tusam, uwejmijai antinrukta, —timiayi.

²⁴Tama Jesús nijai wemiayi. Weamtai aints untsuri niin nemarkiar Jesúsna teawar wearmiayi. ²⁵Nu aints ainamunam nuwa doce (12) musach numpan nangkaantsuk numpamia nusha pachinkamiayi. ²⁶Nuka tsuwakratin ainu untsuri jiiutiat numpan nangkantsuk nukap wait wajayayi. Tura kuikiarín mash japiat pengké tsuwamichuyayi.

²⁷⁻²⁸Nu nuwaka Jesúsá turamurin antuku asa, tuntupenini taa: “Wejmakrin antingnaka pengkerapi wajasaintja,” tu nintimias Jesúsá wejmakrin antingmiayi. ²⁹Tura anting numpamurinka nangkankamiayi. Numpamuri nangkankau asa, pengker nekapramiayi. ³⁰Turamtai Jesús ni kakarmarijai nu nuwa tsuwarmaurin nekapmamramiayi. Tura nekaa pajas jiis:

—¿Yákí wejmakrun antinkama? —tu inintrimiayi.

³¹Tu iniam ni nuiniatiri ainau Jesúsan chicharinak:

—Aints timiá untsuri amin etenmawaru wainiatmesha éwaruka yáki antinkama tame? —tiarmiayi.

³²Tinamaitiat Jesús aints ainaun: éYáki antinkama? tusa mash jiimsamiayi.

³³Turamtaí nu nuwaka ni numpe nangkankau asamtai, shamak kuraimiayi. Tura Jesús wajamunam tikishmatramiayi. Tura tikishmatar ni turunamurin Jesúsan mash paan ujakmiayi. ³⁴Turamtaí Jesús chicharak:

—Nawantru, wína nekasampita turutu asam, pengker wajasume. Pengker nintimsam weta. Numpem yamaikia numparchatatui, —timiayi.

³⁵Tu chichaak wajai, Jairo aintsri ainau tariar chicharinak:

—Nawantrumka yanchuk jakayi. Nuikiartin nemarkini awajip, —tiarmiayi.

³⁶Tu tinamtaí Jesús ni tiarmia nuna antayat, iruntai jea wainu apurin chicharak:

—Shamkaip, antsu nekasampita tusam wína nintimtursata, —timiayi.

³⁷Tura untsuri aints: Iijai jiismi tinamaitiat, Jesús surimkamiayi. Antsu Pedron, nunia Santiagoncha, nunia Santiago yachí Juannasha: Wijai wayaawarti tusa tsangkatkamiayi. ³⁸Tura iruntai jea wainu apuri jeen jear, aints juutkamaikiak unsuminaun wainkarmiayi. ³⁹Tura Jesús jeanam waya, nuna jiis:

—éWaruka timiá juutusha pujarme? Nuwachikia jakachi, antsu kanuri, —timiayi.

⁴⁰Tamaitiat Jesúsán: Nangkami tawai tusar wishikiarmiayi. Tinamtaí Jesús aintsna mash aanum jiiir akupkamiayi. Antsu aparincha, tura nukurincha, tura nijai taaruncha: Iijai wayaami tusa

nuwawach tepamunam wayaawarmiayi.

⁴¹Tura nuwachi uwejen achirak:

—Talita kum, —timiayi. Nuka ii chichamejaingkia: “Nawantru, nantaktia tajame,” taku tawai.

⁴²Tu chicharam nu nuwachikia nantakmiayi. Tura nantaki wekaasamiayi. Nuka doce (12) musachrinuyayi. Tura asamtaí aints nuna wainkar nukap nintimrar-miayi. ⁴³Tura Jesús chicharak:

—Ju aйтkamuka aints kichkisha pengké ujakairap, —timiayi. Nuniasha:

—Nuwawach yurataram, —timiayi.

Jesús Nazaretnum pujusmauri

(Mat. 13.53-58; Luc. 4.16-30)

6¹Jesús nunia jiinki Nazaret yaktanam ni tsakarmaurin wemiayi. Tura weamtaí, ni nuiniatiri ainausha nemariarmiayi. ²Tura ayamtaí kinta jeamtaí, iruntai jeanam waya, aints ainaun nuiniatam nangkamamiayi. Tura nuininam aints untsuri Jesúsá chichamen anturkar nintiminak:

—éJunasha yáki ni nekamtairincha nuiniaria? éWainchataí takatan turati tusasha yáki kakarmarincha susaya?

³éJuka tau takakminchaukai? éMarí uchirinchkai? éTura ni yachí Santiago, nunia José, nunia Judas, nunia Simón naartinchaukai? Ni umajisha iijai pujuinauka wainiaji, —tiarmiayi. Tura asar Jesúsan suwirpiaku jiiinak pachischarmamiayi. ⁴Tura pachischaram Jesús chicharak:

—Aints ainau Yuse chichame etsernun mash anturinawai. Antsu ni nungkarin pujuinausha, tura ni wearí ainausha anturinatsui, —timiayi.^r

⁵Aints pachischarmau asa, Jesús ni nungkarinka Yuse kakarmarijaingkia wainchataí takatan turachmiayi. Antsu jau ainaun jumchik ni uwejejai achik

tsuwarmiyai. ⁶Tura ¿warukaya wínaka nekasampita turutinatsua? tu nintimramiyai.

**Jesús Yuse chichame etserutaram
tusa ni nuiniatirin akupkamuri**
(*Mat. 10.5-15; Luc. 9.1-6*)

Nunia Jesús chikich chikich yaktachinam aints ainaun Yuse chichamen nuiniak wekaimiyai. ⁷Tura nuni wekaas ni nuiniatiri doce (12) amia nuna untsuk:

—Jimíarchik jimíarchik werum, Yuse chichame etserutaram, —timiayi. Tura iwianch ainaun nepetkarat tusa, ni kakarmarin susamiayi. ⁸Tura chicharak:

—Jinta weakrumsha pang nunia pitakrumsha jukirap. Tura uyuntrumin kuikiasha engketsuk wetaram. Antsu aintsarmek wai takusrum wetaram. ⁹Tura sapat wampuwach wejkarum, wejmak kichik entsarum wetaram. ¹⁰Tura chikich yaktanam werum nuni pujusrum, jea wayaarmeka tuke nuning kanurtaram. ¹¹Antsu chikich yaktanam werum, aints nuni pujuinai ni jeen suritraminak: Juni wayaawairap turaminamtaikia, tura atumi chichamen antutan nakitinamtaikia, nunia jiinkuram atumi nawe japimiarum nu yaktaka ukuktiam. Turaram ju aints ainaun Yuse jiisti tusaram, mash nuna nekaawarti tusaram turatarum, —Jesús timiayi.^s

¹²Tamati Jesúsua nuiniatiri ainai Jesúsua ukukiari wekaasar: Aints ainai nu pasé nintimaurin yapajiwarti tusar Yuse chichamen etserkarmiyai. ¹³Nunia aints ainamunmaya iwianchin untsuri jiikiar akupkarmiyai. Tura jau ainauncha olivo macharijai yakarar tsuwararmiyai.

Imiakratin Juankun maamuri
(*Mat. 14.1-12; Luc. 9.7-9*)

¹⁴Jesúsua naarin pachisar aints mash etserinau asaramtai, apu Herodescha nuna antukmiayi. Tura chichaak:

—¿Imiakratin Juan jakamunmaya nantakchayash? Tura asa nu wainchati takatan takaawai, —timiayi.

¹⁵Antsu chikich ainai:

—Yuse chichame etserin Elíasaitai, —tiarmiyai. Tura chikich ainausha chichainak:

—Atsa, yaanchuik Yuse chichamen etserin pujuarmia tumawaitai, —tunai-yarmiyai.

¹⁶Tu tinamtai Herodes nuna antuk:

—Atsa, nuka nekas Juankuitai. Wi nuwik muuken akarkatarum tusan, aintsun akuptukmiaja nuka nekasampi ataksha jakamunmaya nantaki, —timiayi.

¹⁷⁻¹⁹Herodeska ni yachí Felipen iwiaaku pujau wainiat, nuna nuwarin nuwatkamiyai. Nu nuwaka Herodías naartinuyayi. Tura asamtai Juan apu Herodesan chicharak: “Yachim iwiaaku pujau wainiatum, ni nuwari nuwatkamiamen nunaka Yuska surimiawai,” timiayi.

Nuna tama nu nuwaka, Herodías naartin, nuna antuk Juankun kajerkamiayi, tura maawarat tusa wakerimiayi. Tura wainiat apu Herodes surimkamiayi. Antsu: “Juan achikrum kársernum engkeatarum,” tusa ni suntarin akupkamiayi. ²⁰Juan nekas pengke aints asa, nunia Yusen miatrusang umirkau asamtai, Herodes nuna nekau asa, Juankun shammiayi. Tura asa ni nuwarin pachischamiayi. Tura Juanku chichamen pengker nintimias anturkamiayi. Tura Juanku etsermaurin antayat: Itiurkainjak tusangka nintimrachimiyai. ²¹Turamtai nu nuwaka Herodías naartin: ¿Juankun iturkanak maamtikiawaintja? tu nintimias pujai, apu Herodesa akiinamuri kinta jeamiayi. Turamtai Herodes juun ainauncha, tura suntara apuri ainauncha, tura Galilea nungkanmaya kuikiartin ainauncha: Mash yuwitaram tusa chichaman akupkamiayi.

²²Mash iruntrar yuwinai, Herodíasa nawantri ningki waya yaamramiayi. Tura yaamak apu Herodesan pengker awajsamiayi. Tura nijai tsaniasar yuwinak pujuinauncha pengker awajsamiayi. Tura asamtai apu nu nawantan chicharak:

—Ame warí wakerame nuka pachitsuk seattia. Turakminka susatatjame. ²³Wi Yusjai nekasana tajame: Ame waring achat mash seatkumningkia, nunaka nekasana suritkashtatjame. Tura nungkar wakerakminkia japen akanan susatatjame, —timiayi. ²⁴Tama Herodíasa nawantri jiinki ni nukuri pujamunam waya iniak:

—¿Warinak seataj? —timiayi.

Tu iniam nukuri chicharak:

—Imiakratin Juanku muuken wakerajai tita, —timiayi.

²⁵Tama nu nuwachikia wári waketki, apu Herodesan chicharak:

—Imiakratin Juanku muuke puwatnum engkeam yamaik surusta tusan wakerajai, —timiayi.

²⁶Nuna tama apu napchau nintimramiayi. Turayat: Yusjai nekasana tajame tinu asa, tura ni untsukarmau ainau mash nuna antukaru asaramtai, surimkatakama yuumatkamiayi. ²⁷Tura ni suntarin wári untsuk:

—Juanku muuke akakam itata, —tusa akupkamiayi. ²⁸Turamtai suntar kársernum we, Juanku muuken chik akak puwatnum engkea itamiayi, tura pai tusa nawantan susamiayi. Tura susam nawan puwatun juki nukurin susamiayi.

²⁹Turamtai Juanku nuiniatiri ainau: Juankun maawari tamaun antukar tariah, ni namangen iwiansatai tusar jukiarmiayi.

Jesús aints cinco warang yuramuri
(*Mat. 14.13-21; Luc. 9.10-17; Juan 6.1-14*)

³⁰Jesús akupkamu ainau Jesúsnum ataksha iruntrarmiayi. Tura ni turamurin,

tura aints ainaun nuiniarmaurinchá Jesúsán mash ujakarmiayi. ³¹Tura aints untsuri nijai chichasartas kauninamtai, nisha angkan pujusartatkamawar tujinkarmiayi. Tura yuwartatkamawar tujinkarmiayi. Tura asaramtai Jesús ni nuiniatiri ainaun chicharak:

—Aints atsamunam ijai wemi. Auni jumchik ayamrami, —timiayi. ³²Tura Jesús ni nuiniatiri ainaujai kanunam engkemawar aints atsamunam wearmiayi. ³³Tura weenamtai aints untsuri jiisar: “Au weana auka Jesúsaitai,” tusar ampukiar chikich chikich yaktanmaya jiinkiar, eemkiar Jesús nujamkatnunam jear nakasarmiayi.

³⁴Tuminamtai Jesús nujamak kanunmaya jiinki, aints untsuri uwijaya nunisarang pujuinaun wainkamiayi. Tura ni wainin aturmawa nunisarang ainamtai wait anentramiayi. Tura asa nukap nuiniarmiayi.[†]

³⁵Tsaa akaamatai, ni nuiniatiri Jesúsán tariah chicharinak:

—Yanchuk tsaa akaawai, antsu juni aintsu pujutiri pengké atsawai. ³⁶Tura asamtai ju aints ainau wári akupkam, yakat arakchichu amanum aints pujuinamunam yurumkan sumakararat tusam akupkarta, —tiarmiayi.

³⁷Tinamtai Jesús ayaak:

—Atumek ni yutairi susataram, —timiayi.

Tama niisha aiminak:

—Amesha ju aints ainau yuratin éjimia pachak kuikijai yurumak sumaataram tamek? —tiarmiayi.

³⁸Tinamtai Jesús iniak:

—¿Pang warutma takakrume? Jiistaram, —timiayi.

Tamati niisha nekapmarar:

—Pangka cincoitai. Tura namaksha jimiaarchitai, —tiarmiayi.

³⁹Tinamtai Jesús: Aints ainau angkan angkan chirichrinam pujusarti tusa akatram, ⁴⁰aints kichik pachak junini, tura chikich pachaksha atunini pujusar, tura cincuenta (50) cincuenta (50) kanakar pujusarmiyai. ⁴¹Mash pujusaramtai, Jesús pangkan cinco (5) achik, nunia namaknasha jimiaarchik takus, nayaimpinmanini jiiimias Yusen maaketai timiyai. Tura pangkan puuk, ni nuiniatiri ainaun susa, nunia namaknasha puuk: Aints mash susataram tusa, ni nuiniatiri ainaun susamiyai. ⁴²Tura susaram mash yuwaar tutuararmiyai. ⁴³⁻⁴⁴Nuna yuwaruka nuwa ainausha, tura uchi ainausha nekapmatsuk aishmangkuk aishmangkuk cinco warang yuwaarmiyai. Tura yuwaar umisar, pang ampintrauncha tura namak ampintrauncha changkin doce (12) amia nuni chumpiawar jukiarmiyai.

Jesús kucha japen nawejai wekaasamuri
(*Mat. 14.22-27; Juan 6.16-21*)

⁴⁵Nunia ni nuiniatiri ainaun chicharak: “Kanunam engkemaram katingkrum tumajin Betsaida yaktanam eemajatararam. Wikia ju aints ainaun ausan akupkartatjai,” timiyai. ⁴⁶Tura aints ainaun aujas umis, ningki Yusjai chichastas muranam wakamiyai. ⁴⁷Tura kashi aing, Jesús ningki kukarnum wajai, kanu juun kucha japen wemiya. ⁴⁸Tura nase nujinmanini kakar nasenmatai, Jesús nuiniatiri ainau kawi kawinmaka pimpikiarmiyai. Tuminamtai Jesús muranam wajas nuna wainkamiyai. Tura atash shinutnak wajai, Jesús juun kuchanam nungkanma nunisang nawejai najamas wekaas, aints nangkamaktias wea nunisang wemiya. ⁴⁹Tura Jesús juun kuchanam winamtai, ni nuiniatiri ainau nuna wainkar: ¿Wakanchawashi? tu nintimrar untsumkarmiyai. ⁵⁰Tura nuna wainkar mash nukap shamkarmiyai. Tuminamtai Jesús chicharak:

—Kakaram wajastaram. Wiitjai, shamrukairap, —timiyai.

⁵¹Tura Jesús kanunam engkemamtai, nasengka nangkamarmiyai. Turamtai ni nuiniatiri ainau nukap nintimrar shamkarmiyai. ⁵²Antsu nintinchau asar, aints timiá untsuri pangkan yuwinak mash tutuararmia nunaka nintimtsuk: Jesúska pengké tujinkachuitai ticharmiyai.

Jesús Genesaretnumia ainau tsuwarmauri
(*Mat. 14.34-36*)

⁵³Tura juun kuchan katingkiar Genesaret nungkanam nujamkarmiyai. Tura nuni nujamkar, kanun jingkiawarmiyai. ⁵⁴Tura kanunmaya jiinkiarantai, nunia aints ainau Jesús an wainkar: Auka Jesúsaitai tusar nekaawarmiyai. ⁵⁵Tura chikich ainau: Jesús iinu nungkarin tayi tinamun antukar, jau ainaun tampumruwar Jesús pujamunam itaarmiyai. ⁵⁶Tura Jesús wekaasamia nuni yakat tuupich ainamunam, tura yakat juun ainamunmasha, tura aints ajanam pujuinamunmasha jau ainaun itaar jintanam pujsarmiyai. Tura ni wejmakri ninukmaurin antingtaj tusar, Jesús an searmiyai. Tura nuna antingkiaruka pengker wajasarmiyai.

¿Aintsu tunaari warutmak awa?
(*Mat. 15.1-20*)

7 ¹Fariseo ainausha, tura Moisésa chichame nuikiartin ainausha Jerusalénnumia Jesús an tariarmiyai. ²Tura Jesús nuiniatiri ainau uwejen kijmiatsuk yutan yuwinaun wainkar: Nuka paseetai tiarmiyai. ³Fariseo ainau tura chikich judfo ainausha mash ni juuntri tuke nuiniarmau asar, tunaarinchau pujusartas tu pujutayi tusar, nukap kijmiarar yuwinawai. ⁴Tura sumatinmaya waketkiar, nekasar pakuichau wajastaj tusar, maatskeka yuwashtinuitji tu weenawai. Nunia pining ainaun, tura

muits ainauncha, tura jirumang ainauncha, tura peaknasha tu nijararti-nuitai tinawai. Tura judío ainau chikich turamurin untsuri tu nuiniarmau asar, nunaka tuke mash umirinawai. ⁵Tura asar fariseo ainau, tura Moisésa chichame nuikiartin ainausha Jesúsán iniinak:

—¿Ami nuiniatiram ainau waruka ii juuntri nuikiarturmaurinha umirina-tsua? ¿Tura waruka kijmiatskesha yuwinawa? Nuka tunaawitai, —tiarmiayi.

⁶Tinamtai Jesús aimiak:

—Waitrin ainautiram, yaanchuik Yuse chichame etserin Isaías aarmia nunaka atumin pachitmas nekas tu aarmiayi:

Yus chichaak: ‘Nu aints ainauka nangkamiar aya chichasarang wínaka: Ameketme juuntam turutinawai. Antsu ni nintijai yaja nintimsar wínaka nintimturinatsui.

⁷Nangkamiar Yus juuntaitai tinayat, tura aintsu chichamen nuininayat: Yuse chichamen nuiniaji tinawai,’ Yus timiayi. Tu aarmawaitai. ⁸Tura atumka Yuse chichame inaisaram, aintsu chichame atumi juuntri tinu aarmia nu umirume.

⁹Tura atumi juuntri chichame umirkatai tusaram, Yus wína chichamur umirtuktaram tusa akupkamia nuka inaisarume. ¹⁰Moisés nekas chichaak: ‘Aparam tura nukurmesha pengker awajsataram. Tura aints ni aparincha tura ni nukurincha pachis pasé chichaam-taikia, nu aintsna maawarti,’ timiayi.

¹¹Antsu atumka chichaakrum: Aints ni aparincha tura ni nukurincha chicharak: ‘Winar aa nuka corbánaitai,’ tawai. Nuka Yus susamuitai taku tawai. Tura Yus susamu asamtai, atumin susatasan wakerayatun, susatatkaman tujintajai ta nuka, ¹²ni aparin tura ni nukurincha yaingtas wakerau wainiatrumek atumka suritu wearne. ¹³Tura asaram, atumi juuntri ainau tinu armia nu chichamka

nekas umirkatnuitai takayatrum Yuse chichamengka umirtsuk pujusminuitji tarume. Tura aintsu chichame wainiatrumek, nu chichamka Yuse chichame nangkamasrumek umirume tajarme, —Jesús fariseo ainaun tura Moisésa chichame nuikiartin ainauncha timiayi.

¹⁴Nunia Jesús aints ainaun ataksha untsuk:

—Mash wína anturtuktaram. Tura wi taja nuka nekaataram. ¹⁵Aintsu jangken waring achat waya nujaingkia tunauka wajaschatnuitai. Antsu aintsu nintinia jiina nuka aints ainaun tunau awajmamtikui. ¹⁶Aints ainau ju chichaman antukar nintimrarti, —timiayi.

¹⁷Nunia aints ainaun ukuak, jea wayaamtai ni nuiniatiri ainau Jesúsán iniinak:

—¿Ju nuikiartutai chichamsha warimpita? —tiarmiayi. ¹⁸⁻¹⁹Tu iniinam Jesús aimiak:

—¿Atumka nuka nekatsrumek? Aints yurumkan yuwamu jangkenam wayaangka, nintinam wayaachu asamtai, nujaingkia tunauka wajaschatnuitai. Antsu wakenam waya, ataksha jiinkitnuitai, —timiayi.

Tu tinu asa, yurumkaka waring achat mash pachitsuk yuwamnawaitai, Jesús timiayi. ²⁰Tura ataksha chichaak:

—Aintsu nintinia jiina nuka aintsun tunau awajmamtikui. ²¹Tunau nintimtai ainauka aintsu nintinia jiiinui. Nuniangka natsanpiaku nintimratnusha, tura tsanirnatnusha, tura kasamkatnusha, tura aints maatnusha, ²²tura aishrintin wakeruktincha, tura nuwentin wakeruktincha, tura kichnau aa nu wakeruktincha, tura pasé aa nu turatnusha, tura anangkartuatnusha, tura ni wakeramurin tuke nintimratnusha, tura chikich ainaun suwirpiaku jiiistincha, tura Yusen pachis nunia aintsun pachisar pasé chichastincha, tura nangkamiar: Wikia miajuitjai tumamtincha, tura nintimchamu

turatnusha nuka mash aintsu nintinia jiinui.

²³Nu tunau ainauka mash aintsu nintinia jiinu asar, aintsun tunau awajmamtikui, —Jesús timiayi.

Chikich nungkanmaya nuwa Jesúsan nekasampita timiauri

(*Mat. 15.21-28*)

²⁴Nunia Galilea nungkanmaya jiinki, Jesús chikich nungkanam Tiro yaktanam, tura Sidón yaktanmasha wemiayi. Tura nuni jea, jeansam waya nuni pujus, nu nungkanmaya ainau: Pujamurun nekarawarai tusa nakitmiayi. Turayat anumkatakama tujinkamiayi. ²⁵Tura nu nungkanmaya nuwa: Jesús tayi tamaun antuk, arumak Jesúsan weri, ni nawenini pinakumar tepesmiayi. Tura nu nuwa nawantri iwianchrinuyayi. ²⁶Nu nuwaka Sirofenicia nungkanmaya asa judíocho uyayi. Tura Jesúsan seak:

—Wait aneasam, nawantrunia iwianch jiiktia, —timiayi. ²⁷Tamaitiat Jesús nuikiartutai chichamjai chicharak:

—Uchi pangkan yuwinau atankir yawaa uchiri suamuka napchawaitai. Tura asamtai uchiá eemkar yuwaarti tusam tsangkatkata, —timiayi.

²⁸Tama nu nuwasha nunisang nuikiar-tutai chichamjai ayaak:

—Apuru, nekasam tame. Tura uchi yutairi misa wamketin ayaaramtaikia, nekasar yawaa uchiri yuwinawai, —timiayi. ²⁹Tamati Jesús chicharak:

—Tu tinu asam, pengker nintimsam waketkita. Nawantrumniangka iwianch yanchuk jiinkini, —timiayi.

³⁰Tamati nu nuwaka ni jeen waketki-miayi. Tura ni jeen waketki, iwianch nawantrinia jiinkin asamtai, nawantrin peaknum pengker nintimias tepaun wainkamiayi.

Jesús antichun tura chichachun tsuwarmauri

³¹Nunia Jesús ataksha Tiro yaktanmaya jiinki, Sidón yaktan nangkaiki, Decápolis nungkanam wekaas, Galilea kuchanam wemiayi. ³²Nuni aints antichu, tura tenap chichachu pujumiayi. Tura nu aintsun Jesús tsuwarat tusar itaarmiayi. Tura itaar:

—Uwejmijai antingta, —tusar searmiayi. ³³Tu seinam, Jesús nu aintsnasha akanak juki, tsaranchikijai kuwishin mai inurkamiayi. Nunia tsaranchikin usukir, nu aintsu inajin antinkamiayi. ³⁴Tura nayaimpinmanini jiiimias wait anentak mayairuk: “Efata,” timiayi. Nuka “uraita” taku tawai.

³⁵Nu tamaujai metek kuwishi uranin asamtai, nu aintska pengker antukmiayi. Tura ni inaji wewe ayat pengker wajasamtai paan chichakmiayi. ³⁶Turamtai aints irunun Jesús chicharak:

—Ju aintsu turunamuri kichkisha etserkairap, —tu akatramiayi. Tamaitiat aints ainau pachischarmiayi. Antsu nuna nangkamasarang untsurin ujakarmiayi. ³⁷Tu ujakaram, aints ainau nuna antukar nukap nintimrar:

—Tuke mash pengker turayi. Antichu ainauncha antumtikiayi. Tura chichachu ainauncha chichamtikiayi, —tiarmiayi.

Cuatro warang ainaun yuramuri
(*Mat. 15.32-39*)

8 ¹Chikich kintati aints timiá untsuri iruntrar pujuinamtai, ni yutairi atsumiayi. Tura asamtai, Jesús ni nuiniatiri ainaun untsuk mash irur chicharak:

²—Ju aints ainaun wait anentajai. Kampatam kinta wijai iruntrar pujuinau

u 7.28 (Nu chichamka Israel ainau Yuse aintsri asaramtai, Israel ainaun yaingtinka inaitsuk winasha yainkata taku timiayi.)

asar yutsuk pujuinawai. ³Tura ju aints arakia kaunkaru asar, jinta weenak tsukarijai juwikcharai tusan, yurtsuk ni jeen wematnaka nakitajai, —timiayi.

⁴Tamati ni nuiniatiri ainak:

—¿Tura juni aints atsamunmasha ju aints yuratasrisha tuning yurumkasha sumaktai? —tiarmiayi.

⁵Tinamtai Jesús chicharak:

—¿Pang warutma takakrume? —tu iniam:

—Siete (7) takakji, —tiarmiayi.

⁶Tinamtai Jesús aints ainaun

chicharak:

—Nungkanam pujustaram, —timiayi. Tura pangkan siete (7) amia nuna takus, Yusen maaketai tusa, pangkan puuk ni nuiniatiri ainaun:

—Ju aints ainaun mash susataram, —tusa susamiayi. Turamtai niisha aints irunun mash susarmiyai. ⁷Nunia namaknasha jumchik wainkarmia nunasha Jesús takus, Yusen maaketai tusa: Aints ainaun mash susarat tusa, ni nuiniatiri ainauncha susamiayi. ⁸Turam-tai mash yuwaar tutuararmiyai. Tura ampintramurin changkin siete (7) amia nuni chumpiwar pasuiniarmiyai. ⁹Tura nuna yuwaaruka cuatro warang armiyai. Tura yuwaar umisaramtai, Jesús nu aints ainaun: Atumi jeen waketkitaram tusa akupkamiayi. ¹⁰Nunia ni nuiniatiri ainaujai kanunam engkemrar, Dalmanuta nungkanam wearmiayi.

Fariseo ainau: Wainchatai takat wainkatasar wakeraji timiauri
(*Mat. 16.1-4; Luc. 12.54-56*)

¹¹Jesús nuni jeamtai, fariseo ainau tariar, iisha nekaatai tusar Jesúsán chicharinak:

—Yus nayaimpinam puja nuna kakarmarijai wainchatai takat turata.

Iisha nu wainkatasar wakeraji, —tiarmiayi. ¹²Tinamtai Jesús napchau nintimias mayairuk:

—¿Waruka ju aints ainauka Yuse kakarmarijai wainchatai takatan wainkatas wakerinawa? Nekasan atumin tajarme: Nuka pengké wainkashtatrume, —timiayi.^v

¹³Nunia fariseo ainaun ukuki, ataksha kanunam engkema tumajin katingmiayi.

Fariseo ainau pasé nintimaurin pachis etserkamuri
(*Mat. 16.5-12*)

¹⁴Tura yutan sumatnasha kajinmakiaru asar, kanunam kichik pangkan takainakuyayi. ¹⁵Turinamtai Jesús ni nuiniatiri ainaun chicharak:

—Fariseo pang pachimtaii jukii tusaram, tura Herodesa aintsri pang pachimtaii jukii tusaram wainkataram, —timiayi.^w

¹⁶Tama ni nuiniatiri ainaun chicharnainak:

—¿Pang kajinmakin asakrin turamtsujjash? —tunaiyarmiayi.

¹⁷Tunainamtai nuna nekaa Jesús chicharak:

—¿Warukaya pang atsawai tunaiyarme? ¿Yamaisha tuke nintimu weatsrumek? ¿Tura asaram nekatsrumek? ¿Atumi nintinkia mengkakaukai? ¹⁸Tura atumi jii au wainiatrumsha ¿warukaya wainmatsrumek? ¿Tura atumi kuwishi au wainiatrumsha warukaya antatsrumek? ¿Atumka aneaktsrumek? ¹⁹Wi pangkan cinco (5) puuran, cinco warang aintsun yuramtai ¿ampintrau warutam changkina jukimiarume? —tu iniam:

—Doce (12) changkin jukimji, —tiarmiayi.

²⁰Tinamtai Jesús ataksha chicharak:

—Tura wi pangkan siete (7) puuran, cuatro warang aintsun yuramtai, ¿ampin-

tramurisha waruta changkina jukimiarume? —tu iniam:

—Siete (7) changkin jukimji, —tiarmiayi.

²¹Tinamtai Jesús chicharak:

—Wikia pang pachimtai pachisnaka chichaatsjai. ¿Tura wainiatrumsha waruka nintimu weatsrume? —timiayi.

Jesús wainmichun wainmamtikiamuri

²²Nunia Betsaida yaktanam jearamtai, wainmichun tsuwarat tusar, Jesúsnum itaarmiayi, tura Jesúsán chicharinak: “Antingta,” tusar searmiayi. ²³Turinamtai Jesús wainmichu uwejen tap achik, yaktanmaya jiiki ayamiayi. Nunia ni uwejen usukir, mai uwejejai wainmichu jiin antintak: “¿Wainmamek?” tu iniasmiayi. ²⁴Tu iniam pangkai jiiimias:

—Aintsun wainiatun numi wekainawa tumaun wainjai, —timiayi.

²⁵Tamati Jesús mai uwejejai wainmichu jiin ataksha antinkamiayi. Tura antinkam ataksha pangkai jiiimias, nuniangka tsaar mash paan wainmakmiayi. ²⁶Paan wainmakamtai, Jesús chicharak:

—Yaktanmaka waitsuk, tura aintcha kichkisha ujatsuk, jeemin tupnik waketskita, —tusa akupkamiayi.

Pedro Jesúsán: Mesíasaitme timiauri

(*Mat. 16.13-20; Luc. 9.18-20*)

²⁷Nunia ni nuiniatirijai yakat Cesarea Filipos tutainum jintá weenak, Jesús ni nuiniatiri ainaun iniak:

—Tura aints ainu wína pachitsar: ¿warí aintsuita turutinawa? —tu iniasmiayi.

²⁸Tu iniam aiminak:

—Chikich ainauka: Imiakratin Juanchawashi turaminawai. Tura chikich ainauka: Elíaschawashi turaminawai.

Tura chikich ainauka: Yaanchuik Yuse chichamen etserin irunmia nuwaashi turaminawai, —tiarmiayi.

²⁹Tu tinam Jesús iniak:

—¿Tura atumsha winasha warintru-trume? —timiayi.

Tu iniam Pedro ayaak:

—Ameka Mesíasaitme. Yus akupka-muitme, —timiayi.

³⁰Tamati Jesús chicharak:

—Nuka pengké etserkairap, —timiayi.

Jesús ni jakatniurin pachis etserkamuri

(*Mat. 16.21-28; Luc. 9.22-27*)

³¹Nunia ataksha ni nuiniatiri ainaun nuiniak:

—Wikia Yus akupkamutiatnak aints asan, nukap wait wajaktatjai. Wi turamtai judío juuntri ainu, tura sacerdote juuntri ainausha, tura Moisésa chichame nuikiartin ainausha wína nakitrinak mantuwartatui. Turayatnak kampatam kinta jakan tepayatun ataksha nantaktatjai, —timiayi.^x

³²Paan etseru asamtai, Pedro Jesúsán akanak juki: “Tuuka chichatsuk asata,” tusa chicharkamiayi. ³³Turamtai Jesús chikich nuiniatiri ainaun ayanmatar jiis, Pedronka jiitsuk chicharak:

—Satanása weta. Ameka Yuse wakera-muringkia nintimtsume, antsu aints ainu wakerina nuke nintime, —timiayi.

³⁴⁻³⁵Nunia aints ainaun mash untsuk, tura ni nuiniatirincha mash untsuk chicharak:

—Aints wína umirtuktas wakerakka, ni wakeramurinka inais, tura wikia mianchawaitjai tusa, aints ni krusrin juwawa nunisang ni jakatniurin shamtsuk wínak nemartusti. Aints ningki nintimias: Wikia jakashtatjai tauka jakatnuitai. Antsu aints wína anentu asa, tura uwemratin chichaman aneau asa,

jakatata nuka jakayat tuke iwiaaku pujustinuitai.^y

³⁶Nintimrataram. Aints ju nungkanam aa nunaka mash sumak pengké yuumatsuk pujayat, ni wakani tuke mengkakamtaikia ðitiurak tuke iwiaaku-sha pujusting? ³⁷Tura aints nekas uwemratas wakerakka, tura tuke Yusnum pujustas wakerakka, ¿warutam kuikianak akiimiak uwemratnuita? ³⁸Aints wína natsantrinak, tura wína chichamruncha natsantinamtaikia, wi Yus akupkamu asan, wína Apaachir pujamunmaya ni kakarmarijai winakun, tura ni awemamuri ainaujai tsaniasan paaniunam winakun, wína natsantrurmia nuna pachisan: Nuka wína aintsruchuitai titinuitjai, —Jesús timiayi.

9 ¹Nunia ataksha ni nuiniatirin chicharak:

—Nekasan tajarme: Aints juni wijai tsaniasar pujuinauka Yus ni kakarmarijai ni aintsri ainaun inartata nunaka jatsuk wainkartatui, —timiayi.

Jesúsa yapaijmiamamuri
(*Mat. 17.1-13; Luc. 9.28-36*)

²Tura seis (6) kinta nangkamaramtai, Jesús Pedron nunia Santiagoncha, nunia Juannasha akanak juki, mura juunnum wakarmiayi. Tura wakarai, aneachmau Jesús yapaijmiamama jiiitsumir wajasun wainkarmiayi. ³Tura ni wejmakrincha jiiitsumir aun wainkarmiayi. Ju nungkanam wejmak timiá pújuka atsawai. ⁴Nuni Elías tura Moiséscha Jesúsán wantintuk nijai chichaun wainkarmiayi.^z

⁵⁻⁶Tura nuna wainkar Jesúsá nuiniatiri shamkarmiayi. Tura Pedrosha ¿warintajak? tusa nintimrachmiayi. Tura asa Jesúsán chicharak:

—Nuikiartinu, juni ii pujustinchá nekas pengkeraitai. Juni kempatam jeawach

jeamkami, kichka aminu, tura kitcha Moisésnau, tura kitcha Elíasnau ati, —timiayi. ⁷Tamati yurangkim mikin wajasmiai. Tura mikinum wajainai, yurangminmaya Yus chicharak: “Juka wína uchiruitai, wína aneetiruitai. Juka nekasrum anturkataram,” timiayi. ⁸Tama Jesúsá nuiniatiri pangkainiar jiisar, aya Jesúsán wainkarmiayi.^a

⁹Tura muranmaya kuankiar, Jesús ni nuiniatiri ainaun akatar akupak:

—Wikia aints ayatun Yus akupkamu asan, jakamunmaya nantaatsaing atum yamai wainkarume nuka pengké etserkai-rap, —timiayi. ¹⁰Tamati miatrusarang umikiarmiayi. Antsu mai nuwamtak:

—¿Jakamunmaya nantaktincha warimpita? —tu ininisarmiayi. ¹¹Tura Jesúsán iniinak:

—Moisésa chichame nuikiartin ainausha ¿warukaya Mesíaska taatsaing, Elías eemak tatinitai tinawa? —tiarmiayi.

¹²Tu iniinam Jesús aimiak:

—Nekas Elías eemak taa mash iwiaratnuitai. ¿Yus akupkamun pachis Yuse chichame itiu aarmawaita? Nukap wait wajaktinuitai. Tura niin suwirpiaku jiisar nakitartinuitai. ¿Tu aarchamukai?

¹³Tura wisha atumin tajarme: Elíaska yaanchuik tamiayi. Tura waininayat aints ainau Yuse chichame aarmawa nunisarang niin nekasar pasé awajartas wakeriarmia nunaka mash turuwarmiayi, —Jesús timiayi.^b

Iwianch uchinmaya jiiikmiauri
(*Mat. 17.14-21; Luc. 9.37-43*)

¹⁴Tura muranmaya kuankiar waketkiar, chikich nuiniatiri pujuinamunam jear, aints untsuri niin tenteawar wajainau wainkarmiayi.

Tura Moisésa chichame nuikiartin ainausha Jesús a nuiniatiri ainaujai chichainaun wainkarmiayi. ¹⁵Tura Jesús winamtai, aints ainau niin wainkar warasar mash pengker nintim-sar Jesús chichasmi tusar ampukiar wearmiayi. ¹⁶Turinamtai Jesús chicharak:

—¿Warimpia aujaisha chichaarme? —timiayi.

¹⁷Tu iniinam chikich aints nuni wajuu ayaak:

—Nuikiartinu, uchir iwianchrintin asa chichachuitai. Tura asamtai amin itiarjame. ¹⁸Tura iwianch uchirun engkemtua nungkanam ujuweawai. Tura jangkenia sauran itaweawai. Tura nain te esaweawai. Tura asa pimpi pimpi wajuweawai. Turamtai ami nuiniatirmin uchirun iwianchrin jiitrukiarat tusan searmajai. Turamaitai tujintrutkari, —timiayi.

¹⁹Tama Jesús chicharak:

—Maj, Yus nintimtichu ainautiram: ¿Winasha nekasampita turutaram tusancha warutam musachik atumjaisha pujustaj? ¿Tura warutam musachik atumniasha nakastajrume? Uchikia itartitaram, —timiayi.

²⁰Tamati uchir itariarmiayi. Tura itaramtai iwianch Jesús a wainak, uchir wewerkaja jakramiayi. Turamtai wichiptur nungkanam ayaarmiayi. Tura nungkanam tepes, mai yanta mai yanta wajak, sauran jangkenia itakmiayi. ²¹Turamtai Jesús uchi aparin iniak:

—¿Ju aintancha warutia nangkama-mia? —tu iniam:

—Uchichik ainkawaitai. ²²Tura asamtai maataj tusa, jinum tura entsanam unturi ujuinuitai. Ame ni yangntin tujintach-kumka, wait anentrurta tura yangnta, —timiayi.

²³Tama Jesús ayaak:

—¿Waruka tujintachkumka yangnta turutme? Aints Yusen nekasampita tauka mash tujinkachminuitai, —timiayi.

²⁴Tura uchi apari Jesús a kakar chicharak:

—Nekasan amin nintimtajme. Yus tujinkashtimpiash tayatun, amin nuna nangkamasnak nekasampita titasan yainkata tajame, —timiayi.

²⁵Tama aints unturi kaunkaru asaram-tai, Jesús nuna wainak iwianchin jiyak:

—Iwianchi, ameka ju uchi jampeku tura chichachu awajsau asam, ni namangkenia jiinkimka, nuniangka ataksha engkemawaip, —timiayi.

²⁶Tamati iwianch uchir wewerkaja, ataksha wewerkaja unturi jakramiayi. Tura nuniangka untsumak jiinkimiayi. Tura jiinkiamtai uchikia jakawa nunisang tepesmiayi. Turamtai aints unturi: Jakayi tiarmiayi. ²⁷Tinamtai Jesús uchi uwejen tap achik inankimiayi. Turamtai uchikia nantaki wajasmiai.

²⁸Turamtai ni nuiniatiri ainau Jesúsjai jeanam wayaawar, kanakar pujusar Jesús a iniinak:

—¿Warukarik iikia iwianch jiiktatka-marsha tujinkamji? —tiarmiayi.

²⁹Tu iniinam Jesús aimiak:

—Ju iwianch jiiktasrum wakera-krumka, Yus seatkuram jiiktinuitrume, —timiayi.

Jesús ataksha ni jakatniurin pachis etserkamuri

(Mat. 17.22-23; Luc. 9.43-45)

³⁰Nunia jiinkiar Galilea nungkanam nangkamakiar wearmiayi. Tura weenak Jesús chikich aints ainau wi pujamurun nekarawarai tusa nakitmiayi. ³¹Tura wekaasar Jesús ni nuiniatirin ainaun nuiniak:

—Wikia Yus akupkamutiitnak aints asamtai, wina mantuwartas aints ainau achirkartatui. Tura maamaitiatnak

kampatam kinta tepayatun ataksha nantaktatjai, —timiayi.^c

³²Tamati nu chichamnaka antinayat çwarinkung taj? tusar pengké nekaacharmiayi. Tura nekainachiat çwaringki? tusar iniasartatkamawar arantukarmiayi.

**çYaachita chikich ainaun
nangkamaskesha? timiauri**

(Mat. 18.1-5; Luc. 9.46-48)

³³Nunia Capernaum yaktanam jearmiayi. Tura Jesús jea pujus ni nuiniatiri ainaun iniak:

—çJinta weakrumsha warí chichasmarume? —timiayi.

³⁴Tamaitiat jinta weenak: çYaachita chikich ainaun nangkamaskesha? tiaru asar natsaaminak aimkacharmiayi.^d

³⁵Aimkacharamtai Jesús keemas ni nuiniatiri doce (12) amia nuna: Antuitaram tusa untsukmiayi. Tura kaunkaramtai chicharak:

—Aints nekas juun wajastas wakerakka, uchua nunisang nintimrati, tura mash aints ainu inatiri ati tajarme, —timiayi.^e

³⁶Tura uchin wainak japen pujsamiayi. Tura uchin minakas ni nuiniatiri ainaun chicharak:

³⁷—Aints winia nintimturas pujauka ju uchua nunisang aints mianchau ainaun pengker awajuka winasha nunisang pengker awajawai. Tura wína pengker awajtauca, wína akuptukmia nunasha nunisang pengker awajui, —timiayi.^f

**Aints iin nakitramachkungka
iincha yainmaktinuitji**

(Mat. 10.42; Luc. 9.49-50)

³⁸Tama Juan Jesúsán chicharak:

—Nuikiartinu, chikich aints amin naarmin pachis iwianchin jiiki akupausha

wainkamji. Tura iijai tsanias wekaachu asamtai, iwianch jiikim akupkaip tusar suritkamji, —timiayi.

³⁹Tamaitiat Jesús chicharak:

—Antsu suritkairap. Aints wína naarun pachis wainchati takatan turakka, wína pachitas pasé chichakchatnuitai. ⁴⁰Aints iin nakitramachkungka iincha yainmaktinuitji.^g

⁴¹Nekasan tajarme: Atum wína umirtuku asakrumin, aints yumi amurtinun atumin suramsamtaikia, Yus nu aintsna nekas pengker awajsatatui, —Jesús timiayi.

**Tunaanum jeiram tusaram
aneartaram timiauri**

(Mat. 18.6-9; Luc. 17.1-2)

⁴²Nunia ataksha chichaak: “Uchi wína umirtak pujaun aints tunau takamtikmatikia, nuna turashti tusar, tunau takamtiknu kuntujen kaya juuntan jingkiatawar, juun kunanam ujongkaramtaikia, timiá pengker atinuitai. ⁴³Atumi uwejejai tunau takastarum wakera-krumka, tunau takasai tusaram, atumi uweje met charawa nunisrumek tunaarum japaram ukuktaram. Nekasrum kichik uwejmijai juni pujusrum, nunia jakaram nayaimpinam wetinka timiá pengkeraitai. Antsu ji kajintrashtinum mai uwejtuk jeatnuka nekas paseetai.

⁴⁴Nuningkia akasha jakachartinuitai. Tura jisha tuke kajintrashtinuitai. ⁴⁵Tura tunaanum wekaakurmeka, atumi nawe charawa nunisrumek tunaarum japaram ukuktaram. Nekasrum kichik nawejai juni pujusrum, nunia jakaram nayaimpinam wetinka timiá pengkeraitai. Antsu ji kajintrashtinum mai nawentuk jeatnuka nekas paseetai. ⁴⁶Nuningkia akasha

c 9.31 (Mat. 16.21;20.19;27.63; Marc. 8.31;10.33-34; Luc. 9.22;18.31-33) d 9.34 (Luc. 22.24)
e 9.35 (Mat. 20.26-27;23.11; Marc. 10.43-44; Luc. 22.25-26) f 9.37 (Mat. 10.40; Luc. 10.16)
g 9.40 (Mat. 12.30; Luc. 11.23)

jakachartinuitai. Tura jisha tuke kajintrashtinuitai. ⁴⁷Tura atumi jiisha atumin tunau nintimtikramataikia, atumi jii kuinkawa nunisrumek tunaarum japaram ukuktaram. Nekasrum kichik jiijai Yuse pujutirin jeatnuka timiá pengkeraitai. Antsu ji kajintrashtinnum mai jiintuk jeatnuka nekas paseetai.

⁴⁸Akasha nuningkia jakachartinuitai. Tura jisha tuke kajintrashtinuitai.

⁴⁹“Tura asantai nuni engkemawaru ainauka mash jinum epenawartinuitai. ⁵⁰Weesha nekas pengkeraitai. Tura weesha michumarka, çitiur ataksha yapakting? Kuntinu namangke kaurai tusaram, weejai yakarme nunisrumek atumsha mengkakai tusaram, pengker nintimtusirum maanitsuk pujustaram,” Jesús timiayi.^h

Nuwa japashtinun pachis etserkamuri
(*Mat. 19.1-12; Luc. 16.18*)

10 ¹Jesús Capernaum yaktanmaya jiinki, Judea nungkanam nangkamaki, Jordán entsa tumajin katingmiayi. Tura nuni pujai, aints untsuri ataksha ni pujamunam iruntrarumiayi. Turinamtai Jesús tuke turin asa, aints ainaun ataksha nuinimiayi. ²Turamtai fariseo ainau Jesúsán jeariar nekapsartas iniinak:

—¿Aints ni nuwarin pachitsuk ajapa ukuktinkai? —tiarmiayi. ³Tu iniinam Jesús chicharak:

—¿Moisés nuna pachischa warí chichamna akupkamia? —timiayi.

⁴Tama chicharinak:

—Moisés chichaak: ‘Aints papin aar: Nuwarun ukuajai tusa, nuwarin nu papin susa ukuktinuitai,’ tusa tsangkamkamiayi, —tiarmiayi.

⁵Tinamtai Jesús ayaak:

—Atumi nintijai timiá katuram nintimsaram pujau asakrumin, Moisés

nunaka tsangkamkamiayi. ⁶Antsu nu nangkamtaik Yus mash najanamia nuni aishmangnasha tura nuwancha najanamiayi.ⁱ

⁷Tura asantai aishmangka ni aparincha, tura ni nukurincha ukuki, ni nuwarijai tsaningtinuitai. ⁸Tura aishmang ni nuwarijai jimiariatit kichkia nunisang atinuitai. ⁹Yus tu tinu asantai, aints ni nuwarinka ukukchatnuitai, —timiayi.^j

¹⁰Tura ataksha jeanam wayaawar, ni nuiniatiri ainau nu chichaman nekaawartas Jesúsán iniasarmiayi. ¹¹Tu iniinam Jesús chicharak:

—Aints ni nuwarin ajapa ukuki, nunia chikich nuwan nuwatkungka, eemak nuwatkamia nuna ukukin asa tunau turawai. ¹²Tura nuwasha aishrin ajapa ukuki, nunia chikich aintsun ninumkau asa, nusha nunisang tunau turawai, —Jesús timiayi.^k

Jesús: Uchi ainau wini winiarti timiauri
(*Mat. 19.13-15; Luc. 18.15-17*)

¹³Tura aints ainau Jesúsán: Uchin takasat tusar itariarmiayi. Turinamtai ni nuiniatiri ainau nu aints ainaun jiyainak:

—¿Waruka aitkarme? —tiarmiayi.

¹⁴Tinamtai Jesús nuna antuk kajekmiayi. Tura chicharak:

—Uchi ainau wini winiarti tusaram tsangkatraktaram. Aints ju uchua nunisarang nintimsar pujuinauka Yuse pujutirin jeartin ainawai. Tura asaramtai suritrukairap. ¹⁵Nekasan tajarme: Aints Yuse pujutirin wayaawartas wakerinauka ju uchua nunisarang nekasampita turutin ainauka Yuse pujutirin jeartin ainawai, —Jesús timiayi.^l

¹⁶Tura uchi ainaun minakas muuken achik:

—Yus yainmakarti, —timiayi.

Kuikiartin Jesúsjai chichasmauri

(*Mat. 19.16-30; Luc. 18.18-30*)

¹⁷Nunia Jesús ataksha jiinki weai, aints ampuki tarimiayi. Tura tari tikishmatar Jesúsán aujak:

—Nuikiartinu, ameka pengkeraitme. Tura asakmin iniajme: ¿Pujut nangkankashtinun jukitasnasha warinak itiurkataj? nu ujatkata, —timiayi.

¹⁸Tama Jesús chicharak:

—¿Waruka winasha pengkeraitme turutme? Nekas pengker aa nuka kichkitai. Nuka Yusketai. ¹⁹Yus aints ainaun: Wína chichamur umirtuktaram, tímia nuna chichamengka ameka nekame. Nu aarmauka nuwaitai: Mangkartuwairap, tura tsanirmawairap, tura kasamkairap, tura chikich aintcha tsanurairap, tura anangkawairap, tura aparmesha tura nukurmesha umirkataran, tu aarmawaitai, —timiayi.^m

²⁰Tama nu aintska chicharak:

—Nuikiartinu, ame tame nunaka uchiwach asanak tuke mash umikuitjai, —timiayi.

²¹Tama Jesús niin jiis aneemiayi, tura chicharak:

—Kichik chicham umikchau asam, yamaikia waketchim, ami wariram aa nu mash surukam, kuikian yuuminau susata. Turakum nekasam nayaimpinam yuumatsuk pujustinuitme. Nunia wína nemartustasam winita, —timiayi.

²²Tama nu aintska nuna antuk kuikiartin asa, nukap wake mesekmiayi. Tura Jesúsán ukukmiayi.

²³Tura ukukim Jesús niin tentakarmaun mash jiis, ni nuiniatiri ainaun chicharak:

—Kuikiartin ainan ni kuikiarin aneenau asar, Yus umirtan nekasar yuumatinawai, —timiayi.

²⁴Tama ni nuiniatiri ainan nuna antukar nukap nintimrarmiayi. Tura asaramtai Jesús ataksha chicharak:

—Uchir ainautiram anturtuktaram. Ni kuikiarinak nintimtinauka Yusen umirtan nekasar yuumatinawai.

²⁵¿Kamiyusha akusha jiin wayaamnaukai? Atsa, nuka pengké yumtinuitai. Tura kuikiartinka Yus pujamunam wayaatnuka timiá yumtinuitai, —timiayi.

²⁶Tama nuna antukaru ainan nukap shamkarmiayi, tura iniinak:

—¿Tu amataisha yaachik nuniasha uwemramnawaita? —tiarmiayi.

²⁷Tu iniinam Jesús mash jiis chicharak:

—Aints ningki nintimsangka uwemrachminuitai. Antsu Yuska pengké tujinkachu asa, aints ainaun uwemtikratnuitai, —timiayi.

²⁸Tama Pedro Jesúsán chicharak:

—Iinu amia nuka mash ukukir ame nemarkamijai, —timiayi.

²⁹Tama Jesús ayaak:

—Nekasam tame. Antsu wikia atumin tajarme: Aints wína anentu asa, Yusnum uwemratin chichaman etserkatas ni pujutirin ukuki, tura yachiincha, tura umajincha, tura nukurincha, tura aparincha, tura uchirincha, tura ajarincha ukuki, ³⁰iwiaaku pujus ni pujustinrincha kichik pachak wainkatnuitai. Tura yachiincha, tura umajincha, tura nukurincha, tura uchirincha kichik pachak wainkatnuitai, tura ajarincha untsuri wainkatnuitai. Turamtai Yusen nakitin ainan niincha pasé awajartinuitai. Nunia jaka nantaki Yusnum tuke iwiaaku pujustinuitai. ³¹Tura aints untsuri ningki nintimsar: Wikia miajuitjai tinu ainauka nu kinta jeamtai, ukunam mianchau artinuitai. Tura yamai mianchau ainauka ukunam

chikich ainaun nangkamasarang pengker pujusartinuitai, —Jesús timiayi.ⁿ

Jesús ni jakatniurin pachis ataksha etserkamuri

(Mat. 20.17-19; Luc. 18.31-34)

³²Tura ni nuiniatiri ainaujai Jerusalénnum wetai tusar, junta wekaasar, Jesús eemak weamtai, ni nuiniatiri ainau nintimrarmiayi. Tura chikich ainau nemarkinayat shamkarmiayi. Tura ni nuiniatiri ainaun kanak pujas Jesús ni turunatnurin ujakmiayi. ³³Tura ujaak: —Anturtuktaram. Jerusalénnum weaji. Wikia Yus akupkamutiatnak aints asan, sacerdote juuntri ainamunam, tura Moisésa chichame nuikiartin ainamunam wina surutkaramtai, maataran tusar judiochu ainamunam surutkartatui. ³⁴Tura wishikrurar, tura usukrurar, tura katsumrukar wina mantuwaramtai kempatam kinta jakan tepayatun ataksha nantaktatjai, —timiayi.^o

Santiago Juanjai Jesúsán seamuri

(Mat. 20.20-28)

³⁵Nunia Zebedeo uchiri Santiago Juanjai Jesúsán jeariar chicharinak: —Nuikiartinu, çii seatatji nuka ame nutiksamek turamnaukitam? —tiarmiayi.

³⁶Tu iniinam Jesús chicharak: —¿Warí itiurtukat tusarimea wakerutarme? —timiayi.

³⁷Tu iniam aiminak:

—Ami pujutirmin Apu pujakminkia, iisha apu naamkar amijai tsaniasar ami untsurumninisha, tura menarmininisha pujustasar wakeraji. Nu tsangkamkar-tukta, —tiarmiayi.

³⁸Tinamtai Jesús ayaak:

—Atum wina seatrume nuka warimpita tusaram nekatsrume. ¿Wi wait wajaktatja

nunisrumeash atumsha wait wajaktaram? —tu iniasmiayi.^p

³⁹Tu iniam aiminak:

—Ja ai, turunamnawaitji, —tiarmiayi. Tu tinam Jesús chicharak:

—Nekasrum tarume. Wi wait wajaktatja nunisrumeak atumsha wait wajaktinuitrume. ⁴⁰Antsu wina untsurunninisha, tura wina menarminisha atum keematsnunka tsangkatkashtinuitjarme. Antsu Yus nuni keemartinun tsangkatkamu ainauk keemartin ainawai, —timiayi.

⁴¹Tamati chikich diez (10) nuiniatiri nuna antukar, Santiagoncha tura Juannasha kajerkarmiayi. ⁴²Turinamtai Jesús ni nuiniatirin mash untsuk irur chicharak:

—Mash nungkanmaya apu ainau ni aintsrin akatrar pe akupinawai. Tura ni juuntri ainausha miajuitjai tusar, ni aintsri ainauncha tuke inartas wakerinawai. Atumsha nuka nekarme. ⁴³Antsu atumka nuka turashtinuitrume. Tura chikich ainau nangkakatasrum wakerakrumka, mash aintsu inatiria nunisrumeak atinuitrume. ⁴⁴⁻⁴⁵Nintimrataram. Wikia Yus akupkamutiatnak aints asan, aints ainau wina yainkarat tusanka tachamijai, antsu aints ainaun yaingtaj tusan taawitjai. Nuniasha aints ainau wina mantuwarat tusan, aints ainaun untsurin angkanmamtikiawartasan taawitjai. Tura asamtai aints apu wajastas wakerakka, mash aints ainau inatiri atinuitai, —Jesús timiayi.^q

Jii kusurun Bartimeo naartinun tsuwarmauri

(Mat. 20.29-34; Luc. 18.35-43)

⁴⁶Nunia Jesús ni nuiniatiri ainaujai Jericó yaktanam jearmiayi. Tura nunia jiiinkiar, aints untsuri Jesúsán nemarkarmiayi. Tura junta weenai, aints

wainmichun, Timeo uchiri Bartimeo naartinun jinta yantamen pujaun wainkarmiayi. Nu aintska tuke aints nangkaaminaun kuikiarin seauyayi.

⁴⁷Turinamtai nusha: Nazaretnumia Jesús winawai tamaun antuk untsamak:

—Jesúsa, Davidta weariya, wína wait anentrurta, —timiayi.

⁴⁸Tu untsumatai aints ainu untsuri:

—Itatkata, —tiarmiayi. Tinamaitiat nuna nangkamasang kakar untsamak: —Davidta weariya, wait anentrurta, —timiayi.

⁴⁹Tamati nuna Jesús antuk wajas:

—Untsuktaram, —timiayi. Tama jii kusurun untsukar:

—Pengker nintimsam wajakta. Jesús untsurmawai, —tiarmiayi.

⁵⁰Tinamtai nisha tsekengki wajaki, punchurin japa ukuki, Jesúsnum winimiayi. ⁵¹Tura winamtai Jesús iniak:

—¿Itiurtukat tusamea wakerutame?

—timiayi. Tu iniam wainmichu aimiak:

—Nuikiartinu, wainmachkun wainmak-tasan wakerajai, —timiayi.

⁵²Tama Jesús chicharak:

—Ayu, yamaikia weta. Wína nekasam-pita turutu asam, pengker wajasume, —timiayi.

Nu chichamuik paan wainmakmiayi.

Tura Jesúsán nemarkamiayi.

Jesús Jerusalénnum wemaui

(Mat. 21.1-11; Luc. 19.28-40; Juan 12.12-19)

11 ¹Nunia Jerusalén yaktanam arakchichu wear, Betfagé yaktan-masha, tura Betania yaktanmasha arakchichu Olivo Mura tutainum jeatak wajasar, Jesús ni nuiniatirin jimiaran akupkamiayi. ²Tura chicharak:

—Atunini yaktachinam wetaram. Tura nuni jearam, burro jingkiamu wainkata-trume. Nuka entsakrachawaitai. Nu atiararam juni itataram. ³Tura ininminak: ¿waruka atiarame? turaminamtaisha: Apu

yumau asamtai juwaji. Tura wári wainkitatui titaram, —Jesús timiayi.

⁴Tama ayu tusar wearmiayi. Tura wear burron jinta yantamen jea waittiri yantamen jingkiamun wainkarmiayi. Tura wainkar atiwarmiayi.

⁵Turinamtai aints nuni pujuinau chicharinak:

—¿Warukaya burrosha atiarame? —tiarmiayi.

⁶Tinamtai Jesús tímia nunisarang ujakaram suritkacharmiayi. ⁷Turinamtai burron jukiar Jesúsnum jear, ni wejmakrin aimiakar Jesús keemsati tusar awantsam keemsamiayi. ⁸Tura Jesús jinta weamtai: linu Apurinme tiartas, aints untsuri ni wejmakrin aimiakar jinta japen aitkarmiayi. Chikich ainausha chapi nukea tumaun charukar jintanam aitkarmiayi. ⁹Tura Jesúsjai eemkiar wearmia nusha, tura ukunam winiarmia nusha warasar untsuminak:

—Yus juuntaitai. Yus akupkamu winá nuka nekas pengkeraitai. ¹⁰Ii juuntri David aints ainaun inarmia nunisang juka aints ainaun inartatui. Yus nayaimpinam puja nuka nekas juuntaitai, —tiarmiayi.

¹¹Nunia Jesús Jerusalénnum jea, Yus seatai juun jeansam wayaamiayi. Tura mash jiis umis, kintamrai tusa, ni doce (12) nuiniatiri ainaujai Betania yaktanam wearmiayi.

Jesús higuera numin yumingkramuri

(Mat. 21.18-19)

¹²Kashin tsawaar Betanianmaya jiiinkiar, Jesús jinta weak yaparmiayi.

¹³Tura numi higuera tutain arák wajaun wainak: Nerekchayash tusa, jiiistas werimiayi. Turayat higuera neretiri jeachu asamtai, aya nukak nukak nerenchaun wainkamiayi. ¹⁴Tura higuera chicharak:

—Tuke nerechu atatme, tura asakmin aints ainu neremin pengké yuwacharta-

tui, —timiayi. Tamati ni nuiniatiri ainau nuna antukarmiayi.

Yuse jeengka kasa jeenchuitai timiauri
(*Mat. 21.12-17; Luc. 19.45-48; Juan 2.13-22*)

¹⁵Nunia Jerusalén yaktanam jearmiayi. Tura jear, Jesús Yus seatai juun jeanam waya, aints numi surinak, tura suminak wajainaun wainak, mash aanum jiiki akupkamiayi. Tura kuikian yapajinak pujuinau misarin tura kayuk suwen surinau tutangkrincha yanturmiayi.

¹⁶Tura Yus seatai juun jeanam warinchu entsaakinaun: Juningkia aitkawairap tusa suritkamiayi. ¹⁷Tura chikich ainaun nuiniak:

—Yus chichaak: “Wina jearka mash nungkanmaya aints ainau Yus seatai jeaitai,” timiayi. Tu aarmau wainiatrum, atumka aints kuikian juni kasamkarti tusaram tsangkatkarume, —Jesús timiayi.

¹⁸Tamati aints ainau Jesús chichamen antukar nukap nintimraru asaramtai, sacerdote juuntri ainausha, tura Moisésa chichame nuikiartin ainausha nuna antukar Jesús shaminak: ¿Jesús itiurak maawaintai? tusar chichaman najatawarmiayi. ¹⁹Nunia kintamramtai Jesús juun yaktanmaya jiinkimiayi.

Higuera kukarun wainkamuri
(*Mat. 21.20-22*)

²⁰Kashin tsawaar jinta weenak, numi higuera yaau wainkarma nuna nángkainak, kangkaptuk kukarun wainkarmiayi.

²¹Tura Pedro nuna wainak Jesús chichak-mau nintimias Jesús chicharak:

—Nuikiartinu jiisia. Ame higuera tuke nerechu atatme timiame nuka yanchuk kangkaptuk jakayi, —timiayi.

²²Tama Jesús chicharak:

—Tuke Yus nintimsaram nekasampita titaram. ²³Nekasan tajarme. Yuska

pengké tujinkachuitai, aints tu nintimias pujakka, tura Yuska nunaka nekas turatatui, tu nintimias pujakka: ‘Ju mura waja juka juni wajatsuk antsu juun kuchanam ayangti,’ tamaka nekas turunamnawaitai.^r

²⁴Tura asamtai tajarme: Yus seakrumka, wi seaja nunaka nekas surustatuapi, tu nintimsaram seakrumningkia, mash suramsatatrume. ²⁵Tura Yus seakrumka chikich aintsjai kajernaikiaram pujakrumsha, atumi Apaachiri Yus nayaimpinam puja nu wina tunaaruncha mash tsangkrurti tusaram tsangkurnairataram.

²⁶Antsu tsangkurnaitsuk pujakrumningkia, atumi Apaachiri nayaimpinam puja nu atumi tunaaruncha tsangkutramrashtatrume, —Jesús timiayi.^s

¿Jesús an yáki kakarmarincha susaya? timiauri

(*Mat. 21.23-27; Luc. 20.1-8*)

²⁷Nunia ataksha Jerusalénnum wearmiayi. Tura nuni jear, Jesús Yus seatai juun jeanam wayaamtai, sacerdote juuntri ainausha tura Moisésa chichame nuikiartin ainausha, tura judfo juuntri ainausha Jesús tariarmiayi. ²⁸Tura chicharinak:

—¿Ame aitkame jusha yana chichamejia aitkame? ¿Tura yaachia aitkata tusasha amincha akuptamkama? —tu iniasarmiayi.

²⁹Tu iniinam Jesús aimiak:

—Wisha atumnasha kichan iniastajrume. Nu aimkakrumningkia yáki winasha akuptukma tusan nunasha ujaktatjarme. ³⁰Watska. ¿Yáki Juankun aints imaita tusasha akupkaya? ¿Yuseash akupkaya? Turachkusha ¿aintsuash akupkaya? Nu airkataram, —timiayi.

³¹Tamati mai nuwamtak chicharnainak:

—¿Ilisha warintajik? Yus akupkamuitai takurningkia ¿waruka ni nekasampita tichamiarume? iincha turami tusar tichatnuijti. ³²Antsu aints akupkamuitai takurningkia, aints mash: Juan Yus akupkamuitai tinau asar, iin kajertamkarai tusar shamaji, —tunaiyarmiayi.

³³Tura asar Jesús aninak:

—Juankun imiakratia tusasha yáki akupkaya tusarsha iikia nekatsji, —tiarmiayi. Tinamtaí Jesús chicharak:

—Tu tau asakrumin, yáki wína akuptukia tusancha, wisha nunisnak ujachatatjarme, —timiayi.

Pasé takau ainaun pachis nuikiartamuri

(*Mat. 21.33-46; Luc. 20.9-19*)

12 ¹Nunia Jesús nuikiartamun aints ainaun nuiniartas nangkamamiayi. Tura chicharak:

“Aints uva naekrin ajanam araamiayi. Tura kasamkaraí tusa wenurmiayi. Tura nu ajanam kayan juki, uva yumiri jutain najanamiayi. Tura ajan wainkatnun wenurmaunum yakí wajatirin najatamiayi. Tura aints ainaun eak: Ajar waitruktaram tusa ukuki, chikich nungkanam arák wemiayi. ²Tura juuktin kinta jeamtaí, ni inatirin akupak:

Yamaikia ajarun takau ainaun: Uva juukrum akankaram winar aa nunaka akupturkarti tawai tita tusa akupkamiayi. ³Akuptukmaitiat nu ajan takau ainu ajartinu inatirin achikiar katsumkarmiayi. Tura katsumkar uvancha sutsuk akupkarmiayi. ⁴Turinamtaí ajartin ataksha chikich inatirin akupkamtaí, nusha ajanam jeamtaí, ni muukencha awatrar pasé chichasarmiayi. ⁵Turinamtaí ajartin ataksha chikich inatirin akupkamia nunaka maawarmiayi. Turinamtaí chikich chikich aintsrin untsuri akupkamiayi. Tura akupkamu waininayat ajan takau ainu chikich ainauncha awatrar, antsu kichnaka maawarmiayi. ⁶Turinam-

tai ajartinu aintsri kichik nijai tsanias pujumiayi. Nuka ni aneamuri uchiri ayayi. Tura wína uchirnaka anturkarchatpiash, tu nintimias ni uchirin akupkamiayi. ⁷Apari akupkamu waininayat, nu aja takau ainu ajartinu uchirin wainkar chicharinak: ‘Auka ajartinu uchirintai. Ni apari jakamtaí, ju ajaka ninu atatui. Watska, maatai. Au maarkia ajaka iinu achaintak,’ tiarmiayi. ⁸Tura ajartinu uchirin achikiar maawar, namangkencha ajanmaya jiikiar iwiartsuk ajapawarmiayi.

⁹Tura asamtaí ¿ajartin taa ititurkatnuita? ¿Atumsha itiuur nintimrume? Niisha taa nu aja takau ainaun mash maatnuitai. Tura ajarincha chikich ainu takakmasarti tusa susatnuitai.

¹⁰¿Atumka Yuse chichame aarmawa nu aujchaukitrum? Tu aarmawaitai:

‘Jeamin ainu kaya jean jeamkar, chikich kayan wainkar chichainak: Ju kayaka paseetaí, tusar japawarmiayi. Japinau wainiat Yuska: Nu kayaka timiá pengkeraitai timiayi. ¹¹Apu Yus nuna wakerau asamtaí, iisha nu nintimsar pujaji,’ tu aarmawaitai,” Jesús timiayi.

¹²Tamati nu nuikiartamun iin pachitmas turamji tu nintimsar, sacerdote juuntri ainu, tura Moisésa chichame nuikiartin ainausha, tura judío juuntri ainausha: Jesús achiktaí tu nintiminayat, aints ainu shaminu asar, Jesús an ukukiar wearmiayi.

¿Juun apu akikchatnukai? timiauri

(*Mat. 22.15-22; Luc. 20.20-26*)

¹³Nunia fariseo ainaun tura Herodesa aintsri ainaun akupinak: Jesús iniam ¿niisha warintintak? tusaram nekaataram. Nunia nekaaram tsanumrataram tusar akupkarmiayi. ¹⁴Turinamtaí Jesús an jeariar chicharinak:

—Nuikiartinu, ameka nekas chicham chichaame. Iikia nuka nekaji. Tura

chikich ainau chichaina nuka antutsuk, ameka nekasam Yuse jinti tu awai tusam tupin nuikiartame. Tura aints ainau wina pengker nintimtursarti tusamka pachiamsme. Tura asakmin çitiur nintime? tusar nekaatasar taji. Juun apu César ni aintsrin akupak: Kuik irumrataram tamati, çii kuikiari akiimiaktin pengkerkai? ¿Nu akiimiaktajia? ¿Turachkursha surimkatjia? Nu nekaatasar wakeraji, —tiarmiayi.

¹⁵Tu tinam, Jesús ni pasé nintimaurin nekaru asa chicharak:

—¿Waruka winasha anangkruram nekaprustasrumsha wakerutarme? Kuik itataram. Wisha jiištaj, —timiayi.

¹⁶Tama kuikian itariaram Jesús kuikian jiiš chicharak:

—¿Jusha yana yapiya nakumkamuita? ¿Tura yana naariya aarmawaita? —tu iniam:

—Juun apu Césarnawaitai, —tiarmiayi.

¹⁷Tinamtaí Jesús ayaak:

—Tu tinu asaram, juun apu Césarnau aa nuka ni susataram. Tura Yusnau aa nuka Yus susataram, —timiayi. Tamati ni aimkamurin antukar nukap nintimrar-miayi.

¿Aints jakau nantaktinuashi? timiauri

(Mat. 22.23-33; Luc. 20.27-40)

¹⁸Nunia saduceo ainau Jesúsá chichamen nekaawartas tariarmiayi. Saduceo ainauka: Aints jakauka jakamun-maya nantakchatnuitai tinawai. Tura Jesús warintintak tusar niin tariar chicharinak:

¹⁹—Nuikiartinu, Moisés chichaman aarmia nu chichamka nuwaitai: Aints uchin yajutmatsuk jakamtaikia, ni yachí uchin yajutmartas wajerin nuwatkatí. Tura uchin yajutmartas, nuka ni yachí jakau uchiriya nunisang atinuitai, tu

aatramramiayi. ²⁰Ayu, juni ijai iruntrar siete (7) yachintin puju armiayi. Tura eemkauri nuwan nuwatak, uchin yajutmatsuk jakamtaí, ²¹jakau yachí wajerin nuwatkatí nusha nunisang uchin yajutmatsuk jakamiayi. Tura jakau asamtaí, chikich yachiisha wajerin nuwatak, nusha nunisang uchin yajutmatsuk jakamiayi. ²²Turamtaí kitcha kitcha siete (7) yachintin amia nu nuwan nuwatinayat, mash uchin yajutmatsuk kajingkiarmiayi. Nunia ukunam nuwasha jakamiayi. ²³Tura nu siete (7) yachintin mash nu nuwan nuwatkaru asar, jakamunmaya nantakiar ¿nu nuwaka yana nuwariya atinuita? —tu iniasarmiayi.^t

²⁴Tu iniinam Jesús ayaak:

—Yuse chichame nekachu asaram, tura Yuse kakarmarisha wainchau asaram, jakamunmaya nantaktin atsawai, takuram pe nuwá wearme. ²⁵Jakamunmaya nantakiaru ainauka nuwanka nuwatkachartinuitai. Tura nuwasha aintsun ninumkachartinuitai, antsu Yuse awemamuri nayaimpinam pujuina nunisarang nuwartichu artinuitai. ²⁶Tura jakamunmaya nantaktin pachisrum nekaatasrum wakerakrumka ¿atumka jakaru ainan pachis Moisés papin aarmia nu aujchaukitrum? Numi jangkirtin kapaarmia nuni Yus Moisésan chicharak: “Abrahama Yusrinka wiitjai. Tura Isaaca Yusrinka wiitjai. Tura Jacobo Yusrinka wiitjai,” timiayi. Nu aints yaanchuik jakaru ainayat, tuke iwiaaku ainawai, Yus timiayi. ²⁷Tu tinu asamtaí, Yuska jakau ainan Yusrintai tarume nuka tuchuitai, antsu tuke iwiaaku ainan Yusrintai. Atumka jakau ainan nantakchartinuitai tinu asaram pe nuwá wearme, —Jesús timiayi.

**Chicham umiktin nekas pengker
aa nuna pachis etserkamuri**

(Mat. 22.34-40)

²⁸Nunia Moisésa chichame nuikiartin Jesús saduceo ainaujai chichaamun anumak antuku asa, tura Jesús nekas pengker aimkau asamtai, Jesúsán iniak:

—¿Chicham umiktin chikich chichaman nangkamasang nekas pengker aa nusha tuwaita? —timiayi. ²⁹Tu iniam Jesús ayaak:

—Umiktin chicham nuwá eemkar umiktinka juwaitai: ‘Israel ainautiram, antuktaram. Ii Yusri kichkitai. Nuka iinu Apurintai. ³⁰Tura ami Yusrum ami Apuram asamtai, tuke nintimaaurumjai anen ata. Tura asam tuke inaitsuk Yus nintimsam aneeta. Tura Yus ami kakarmarmijai tuke umirkata.’ ³¹Tura junajai metek tausha juwaitai: ‘Ami namangkem aneame nunistmek chikich aints ainausha aneeta.’ Nuna nangkamasang chicham umiktin pengké atsawai, —timiayi.^u

³²Tamati Moisésa chichame nuikiartin Jesúsán chicharak:

—Ayu nuikiartinu, Yus kichkitai, tura asamtai chikich Yuska atsawai tame nuka nekasaintai. ³³Tura Yus tuke nintijai aneakrikia, tura tuke Yus nintimsar pujakrikia, tura ii kakarmarijai Yus tuke umirkurkia, tura chikich ainausha ii namangkea nunisrik aneetnuitji tame nuka nekas pengkeraitai. Tura iinu tangkuri Yus susataj tusar maar epeakrikia mianchawaitai, —timiayi.

³⁴Tura ni pengker aimkau asamtai, Jesús nuna antuk chicharak:

—Tuke Yusnum pujustaj takumka, tuke tu nintimsam pujusta, —timiayi. Tamati aints mash nintimrar iniasartatkamawar arantukarmiayi.^v

¿Mesíascha yana wearinta? timiauri

(Mat. 22.41-46; Luc. 20.41-44)

³⁵Jesús Yus seatai juun jeansam aints ainaun nuiniak:

—Moisésa chichame nuikiartin ainau Yus akupkatnun Mesías tutain pachisar ¿waruka Davidta wearintai tinawa?

³⁶Davidcha, Yuse Wakani tu aarta yaanchuik timiau asa, nuka papinum aak: ‘Apu Yus wína Apurun chicharak: Juni wína untsurunini apu keemtainum pujusam nakarsata. Tura nakarkumin ami nemasem ainaun mash nepetkatatjai,’ timiayi. ³⁷Davidka Yus akupkatnun Mesíasan pachis: Wína Apuruitai tinu wainiatrumsha ¿waruka Davidta uchirintai tarume? —timiayi.

Jesús tu chichaamtai, aints mianchahu ainau kaunkarmia nuka mash warawarat ni chichamen antukarmiayi.

**Moisésa chichame nuikiartin
ainaun pachis etserkamuri**

(Mat. 23.1-36; Luc. 11.37-54; 20.45-47)

³⁸Jesús aints ainaun nuiniak:

—Moisésa chichame nuikiartin ainau wainkataram. Ni entsatirin sarman entsarar: Wisha nekasán papi nekau aintsuitjai tusar, jampesarang yaktanam wekajinak: Wína jiirsar ajjtusarat, tu nintimsar wekajin armayi. ³⁹Tura iruntai jeansam wayaawar, wína jiirsarat tusar, keemtai nekas pengkernum keemsartas wakerinawai. Tura fiesta najanmaunumsha eemkar keemsa yuwartas wakerinawai. ⁴⁰Tura waje jeencha atantin ainayat anangminak wína: Pengke aintsuitai turutiarat tusar, aya jangkejai Yusen sarman seinawai. Tuminau asaramtai, Yus chikich ainaun nangkamasarang niin nukap wait wajaktiniun susartiniuitai, —Jesús timiayi.

Waje kuikiarin Yusen mash susamuri

(*Luc. 21.1-4*)

⁴¹Jesús Yus seatai juun jeansam kuik engketi kajurin nakaj pujumiayi. Tura nu kuik engketinam aints ni kuikiarin engkeenaun wainkamiayi. Turamtai kuikiartin utsuri tariar, ni kuikiarin nukap engkewarmiayi. ⁴²Turinamtai waje kuikiartichu tari, jiru kuikian jimiaran engkeamiayi. ⁴³Tura engkeamtai, Jesús nuna wainak, ni nuiniatiri ainaun untsuk:

—Nekasan tajarme: Ju wajeka nekas kuikiartichutiati, mash aints ainaun nangkamasang nukap engkeayi. ⁴⁴Kuikiartin ainau aya kuik ampirmauri-nak engkeenawai. Antsu ju wajeka ninu aa nunaka mash ampitsuk engkeayi, —Jesús timiayi.

Jesús Yus seatai jea yumpungtinun pachis timiauri

(*Mat. 24.1-2; Luc. 21.5-6*)

13 ¹Jesús Yus seatai juun jeansamaya jiinkiamtai, kichik nuiniatiri chicharak:

—Nuikiartinu jiista. Kaya au pengkera-pita, tura Yuse jee juuntapita, —timiayi.

²Tamati Jesús ayaak:

—¿Ju jea kaya jeamkamuka juuntak jiam? Ju wainme juka ukunmaka mash yumpunkatnuitai, tura kaya kichkisha chikich kayanmasha patamkashtinuitai, —Jesús timiayi.

Nungka mesratnun pachis etserkamuri

(*Mat. 24.3-28; Luc. 21.7-24; 17.22-24*)

³Nunia Olivo Muranam wear, Yus seatai juun jea arakchichu amanum jear, Jesús mura waka keemsamiayi. Tura keemsamtai, Pedro nunia Santiago, nunia Juan, nunia Andrés Jesúsjai kanakar keemsar Jesúsani iniinak:

⁴—¿Juun jea yumpunkatnusha warutik at? Tura nu turunatin kinta jeatak wajasamtaisha ¿waring wantinkatnui? —tiarmiayi.

⁵⁻⁶Tu tinam Jesús ayaak:

—Aints untsuri chichainak: Wiitjai Yus akupkamuitjai tusar, aintsun untsuri anangkawartinuitai. Tura asamtai aints ainau wina anangkruwarai tusaram aneartaram.

⁷⁻⁸“Aints ainau chikich nungkanmaya ainaujai maaniawartinuitai. Tura apu ainausha kajernaikiar mesetan najanawartinuitai. Nuniasha chikich chikich nungkanam ussha untsuri uurkatnuitai. Tura tsukasha nukap atinuitai. Antsu nuna turuna nangkama-ramtai, nuna nangkamasang wait wajakartiniun nuniangka nangkamawar-tinuitai. Tura asamtai maaniamu chicham antakrumsha, tura meset atatu tamau antakrumsha shamkairap. Nungka meseatsaing maaniamu untsuri artinuitai. Antsu nungka mesertinka tewarikia achatnuitai.

⁹“Tura ii juuntri iruntramunam atumin juramkiartinuitai. Tura iruntai jeansamsha awatamrartinuitai. Tura wina aintsur asakrumin, atumin judío apuri ainamun-masha, tura romano apuri ainamunmasha chicham nekaarami tusar juramkiartinui-tai. Tura asaramtai aneartaram. ¹⁰Tura nungka meseatsaing, uwemratin chichaman mash nungkanmaya ainamu-nam etserkartinuitai. ¹¹Tura atumin achirmakar, apu pujamunam jeetami-namtai shamkairap. Tura chichastin jeatsaing ¿warinak titaj? tuuka nintimsai-rap. Tura chichastin amatai, Yus atumin chichamtikramkatnuitrume. Tura atumek nintimsarmeka chichakchatnuitrume, antsu Yuse Wakani atumin chichamtik-ramkatata nuke chichaktinuitrume.”

¹²“Nu kinta jeamtai, aints ni yachiin wainiat: Maawarat tusar surukartinuitai. Tura chikich ainausha ni uchirin: Maawarat tusar surukartinuitai. Tura chikich ainausha ni aparincha, tura ni nukurincha kajerinak: Maawarat tusar surukartinuitai. ¹³Tura wína aintsur asakrumin, aints mash atumin kajertamkartinuitrume. Antsu aints Yusen tuke umirkaruka uwemrartinuitai.^x

¹⁴“Aints ju chichaman aujinauka nintimrarti. Yaanchuik Yuse chichame etserin Daniel naartin papinum aak, nekas pasemamtikiartinun pachis armiyai. Nu pasemamtikiartin Yus seatai juun jeanam wayaachmin ayat nuni wayaamtai, Judea nungkanam pujuinauka muranam tupikiakiartinuitai. ¹⁵Tura wári tupikiakiartin asar, aints jea jimia pata jeamkamunam yakí patanam pujuinauka wári kuankinak, waririncha jutsuk tupikiakiartinuitai. ¹⁶Tura ajanam takakminausha jeanam waketsuk entsatirincha jutsuk wári tupikiakiartinuitai.^y

¹⁷“Nu wait wajaktin kinta jeamtai, nuwa jamtin ainauka tura kuwirchin muntsak pujuinausha nukap wait wajakartin asaramtai wait anentinajai. ¹⁸⁻¹⁹Nu nangkamtaik Yus nungkan najanamunmayangka timiá wait wajamuka atsuyayi. Tura ukunmasha ataksha timiá wait wajaktinka atsutnuitai. Tura asamtai nu wait wajaktin yumanch nantuti turunashti tusaram Yus seatararam. ²⁰Nu wait wajaktinaka Yusek: Ainik ati tusa amuktinuitai. Nu turachmataikia, aints kichkisha pengké uwemrashntinuitai. Antsu Yus ni aintsri uwemrartin ainaun aneau asa, nu wait wajaktinaka amuktinuitai.

²¹“Turamtai aints atumin anangkraminak: Jiista, juwaitai Mesías

turaminamtaikia, tura chikich aints anangkraminak: Jiistaram, ani pujawai turaminamtaisha anturkairap. ²²Antsu aints untsuri anangkraminak: Wiitjai Mesías tusar wantinkartinuitai. Tura chikich ainausha: Yus akupkamu asan, Yuse chichamen etsernuitjai, anangkraminak turamtiartinuitai. Nusha aints ainaun anangkawartas aints wainchati takatnasha, tura aints tujintamu takatnasha turuwar, Yuse umirin ainaun anangkamin amataikia nuna anangkawartinuitai. ²³Nu aints ainau atumin anangkramawarai tusan, eemkin yamaik ujaajrume. Atumka aneartaram,” Jesús timiyai.

Jesús ni tatintrin pachis etserkamuri
(*Mat. 24.29-35, 42-44; Luc. 21.25-36*)

²⁴Jesús tuke chichaak:

“Nu wait wajaktiniun wi etserja nu nangkamaramtai tsaasha tsantrashtinuitai. Tura nantusha kajinratnuitai. ²⁵Yaa ainausha nayaimpinmaya kakeerartinuitai. Tura nayaimpinam muchichu ainausha muchitkartinuitai.^z

²⁶“Tura wi aints ayatun, Yus akupkamu asan, nayaimpinmaya yurangmijai Yuse kakarmarijai nunia Yuse paaniurijai winamtai, wínaka paan waitkartinuitai. ²⁷Tura wína awemamur ainaun akupkan, wína umirtukaru ainaun wi uwemtikratas wakerau asan, mash nungkanmayan tura nayaimpinmayan irurat tusan akupkartinuitjai.

²⁸“Numi higuera tutai nintimrataram. Numi tsaraptur ataksha nukarmatai, ju nungkanam pujuinautiram: Esat jeatak wajasi tarume. ²⁹Tura asaram wi tajarme nuka mash wainkarmeka, atumsha: Tatintri jeatak wajasi tusaram nekaamna-waitrume. ³⁰Nekasan tajarme: Wi taja nunaka mash umiatsaing, aints nuni

iwiaaku pujuinauka jakachartinuitai.

³¹Nayaimpisha tura nungkasha mengkartartinuitai. Antsu wína chichamruka pengké mengkashtinuitai.

³²“Tura nu turunatin kinta warutik at tusanka, aints kichkisha nekainatsui. Yuse awemamuri ainausha nunaka nekainatsui. Wisha Yuse Uchiri ayatnak nekatsjai. Antsu wína Apaachiruk nuke nekawai.

³³“Tura asamtai aneartaram, tura wainkataram. Nu kinta warutik at tusaram nekachu asaram, Yus tuke searam pujustaram. ³⁴Tura wikia junia apua nunisketjai. Apu arák irastas wetas, ni inatiri ainaun untsuk, kichik kichik ni takatrin akanak suawai. Tura jea wainuncha: Jear tenapkesam waitrukta tusa ukuawai. ³⁵Atumsha nunisrumek winaka kajinmatrutsuk: ¿Apuru tatintri warutik at? tusaram nekachu asaram aneartaram. ¿Kintamramtaiyash tat? tusaram tura: ¿Japkeash tat? tusaram tura: ¿Atash shinayash tat? tusaram tura: ¿Kashikiash tat? tusaram anearum pujustaram. ³⁶Tu nintimtsuk pujakrumningkia, atumi apuri aneachmau taa, atum kanurua nunisrumek teparmin waitmakarai tusaram wainkataram. ³⁷Wi atumin tajarme nunaka mash aintsun ju chichamnasha antumtikun tajarme: Anearum pujustaram,” Jesús timiayi.^a

Jesús maataras chicham najatamuri

(Mat. 26.1-5; Luc. 22.1-2; Juan 11.45-53)

14 ¹Pascua fiesta tura pang pachim-rachmau yuwatin fiesta jimiarchik kinta ai, sacerdoté juuntri ainau, tura Moisésa chichame nuikiartin ainausha Jesús anangkawar achikiar, maawarat tusar mesetan najatiarmiayi. ²Tura chichainak:

—Aints ainau untsuri iruntrar jijaainak maanitan wakerukarai tusar, fiesta kintatikia turachminuitai, —tunaiarmiayi.

Nuwa Jesús kungkutijai ukatramuri

(Mat. 26.6-13; Juan 12.1-8)

³Jesús Betania yaktanam we, Simónka jeen misanam yuwak pujumiayi. Nu Simónka yaanchuik kuchapruk pujuutiat, nuniangka tsaarun waininayat tuke Kuchapruku Simón inaikiamuyayi. Tura Jesús nuna jeen pujai, nuwa taa muti kaya alabastro tutainum kungkutin engkea itamiayi. Nu kungkutikia nekas akik ayayi. Tura muti taparin intakar, Jesús muuken nu kungkutijai mash ukatramiayi.^b

⁴Turamtai aints irunu nuna wainkar nu nuwan kajerinak:

—¿Waruka kungkuti timiá akiknasha nangkamisha ajapua? ⁵Kichik musach takakmasar nu kuik jukir ju kungkutikia sumakminuitai. Tura ju surukrikia, ¿nu kuik jukir kuikiartichu ainau susamka pengkerchaukai? —tunaiarmiayi.

Tura nuwan kajerker jiyakarmiayi.

⁶Tinamtai Jesús chicharak:

—Inaisataram. ¿Waruka ju nuwasha kajerarme? Wína aitkara juka nekas pengker aitkarayi. ⁷Kuikiartichuka tuke atumjai pujuinawai. Atum wakerakrumka ni tuke pengker awajsatnuitrume. Antsu wikia atumjaingkia tukeka pujuschatatjai. ⁸Ju nuwaka ni wakeramurin mash umiki. Tura asa wi iwiarnatnurun umistas, iwiaaku pujaing wína namangkrun kungkutijai ukatruri. ⁹Nekasan tajarme: Aints ainau kajinmakiarai tusan, mash nungkanam Yusnum uwemratin chichaman etserinauka ju nuwa turamurinja tuke etserkartinuitai, —Jesús timiayi.

Judas Jesúsán surukmauri*(Mat. 26.14-16; Luc. 22.3-6)*

¹⁰Nunia Jesúsá nuiniatiri doce (12) ainamunmaya kichik Judas Iscariote naartin: Jesúsán anangkan suruktaj tusa, sacerdote juuntri ainaun chichastas werimiayi. ¹¹Turamtai nu aints ainau warasar: Ayu, ame tame nuka turata. Nu turakminka kuik akiimiaktatji tiarmiayi. Tu tinamtai Judas: ¿Itiurak Jesúsán anangkan surukaintaj? tu nintimias pujumiayi.

Jesús Pascua fiestati yuwamuri*(Mat. 26.17-29; Luc. 22.7-23; Juan 13.21-30; 1.Cor. 11.23-26)*

¹²Pang pachimrachmau yuwatin fiesta nu kinta atin asamtai, tura uwija maatin asamtai, ni nuiniatiri Jesúsán iniinak:

—Pascua fiestati yuwatin ¿tuni umismi tusamea wakerame? —tiarmiayi.^c

¹³Tu iniinam Jesús ni nuiniatiri jimiaran akatar akupak:

—Juun yaktanam wetaram. Tura nuni jearam, aints muitsan yumin shikik yanas weau wainkatatrume. Turaram nu aints nemarsataram. ¹⁴Tura ni jeen wayaamtai, nuni atumsha wayaaram, jeentin chicharkuram: Iin nuitamin amin chichaman akupturmak: ¿Wína nuiniatir ainaujai Pascua fiestati yuwatniusha jea tesaamusha tuwaita? turamui titaram.

¹⁵Takurmin nu jeentin pata yakí amaunum jea tesaamun yanchuk umismaun inakturmastatrume. Nuni ii yuwatin umistaram, —timiayi.

¹⁶Tamati ni nuiniatiri ayu tusar jiinkiar juun yaktanam jear, Jesús tímia nunisarang wainkarmiayi. Tura asar nuni Pascua fiestati yuwatniun umisarmiayi.

¹⁷Kiarai Jesús taa ni doce (12) nuiniatiri ainaujai iruntrarmiayi. ¹⁸Tura nuni yuwinak pujuinai, Jesús chicharak:

—Nekasan tajarme: Kichik aints wijai yuwa juka wína anangkrua surutkatatui, —timiayi.

¹⁹Tamati nuna antukar wake mesekar nintimrar kichik kichik:

—¿Wiyashitaj? ¿Wiyashitaj? —tiarmiayi.

²⁰Tu iniinam Jesús ayaak:

—Wi nu tachaunumak tsaniasan yuwaja juwaitai. Juka wína anangkrua surutkatatui. ²¹Wikia Yus akupkamutiatak aints asan, aatramua nunisnak jakatniunam weajai. Turayatnak wína anangkrua surutkatnunka nukap wait anentajai. Ju aintska akiinachuitkungka, wait wajakchamin ayat akiinuu asa, nukap wait wajaktinuitai, —timiayi.

²²Tura yuwinak pujasar, Jesús Yusen maaketai tusa, yurumkan achik puurak:

—Ju yuwataram. Juka wína namangkrua tumawaitai, —timiayi.

²³Tura piningnasha achik, Yusen ataksha maaketai tusa, ni nuiniatiri ainaun susamiayi. Tura susaram mash amurarmiayi. ²⁴Amuraramtai Jesús chicharak:

—Juka wína numparua tumawaitai. Aintsun untsurin uwemtikratasan numpar-tajai. Tura wína numpar numparamtai, yamaran chichaman wi etserkaja nunaka mash umiktatjai. ²⁵Nekasan tajarme: Wikia ju uva yumirin juni ataksha amurchat-tajai. Ansu Yuse pujutirin jean, ataksha nekas yamarman amurtinuitjai, —Jesús timiayi.^d

Pedron: Wína natsantrurtatme tusa ujakmauri*(Mat. 26.30-35; Luc. 22.31-34; Juan 13.36-38)*

²⁶Tura kantan kantamawar umisar, Olivo Muranam wearmiayi. ²⁷Tura nuni jear Jesús chicharak:

—Ju kashia juwi atum wína mash natsantrurtatrume. Yuse chichame nekas

tu aarmawaitai: ‘Uwija wainiun maawar-tinuitai. Turamtai uwija irunu tupikiartinuitai.’^e ²⁸Antsu jakan nantakin Galilea nungkanam weatsrumning, wiyá eemkitatjai, —timiayi.^f

²⁹Tamati Pedro chicharak:

—Mash amin natsantraminamtaisha, wikia pengké natsantrashtatjame, —timiayi.

³⁰Tamaitiat Jesús ayaak:

—Nekasan tajame: Yamai ju kashia juwi atash jimiaran shinatsaing wina pachitsam kempatam waitrakum: Nu aintsna wikia wainchawaitjai tusam uurtuktatme, —timiayi.

³¹Tamati Pedro kakar chicharak:

—Atsa, amin mantaminamtaisha wikia: Iijai jakami tau asan, amincha pengké natsantrashtatjame, —timiayi. Pedro tamati chikich nuiniatiri mash nunisarang tiarmiayi.

**Jesús arakmau Getsemaní
tutainum Yus seamuri**

(Mat. 26.36-46; Luc. 22.39-46)

³²Nunia numi arakmau Getsemaní tutainum wearmiayi. Tura nuni jear, Jesús ni nuiniatiri ainaun chicharak:

—Juni pujusrum nakarsataram.

Turakrumin wikia Apaachirun aujsatasan weajai, —timiayi.

³³Tura Pedroncha, nunia Santiagoncha, nunia Juannasha ayas juki, arakchichu wear, Jesús wake mesek napchau nintimramiayi. ³⁴Tura chicharak:

—Timiá napchau nintimran jata nekapeajai. Juni wijai pujusrum kanutsuk asataram, —timiayi.

³⁵Tura arakchichu we, nungká pinakumar tepes Yusen seak:

—Apaachiru, ame wakerakmeka, wi wait wajaktinka tsangkatrukaip. ³⁶Apaa-chi, mash tujinkachuitme. Ame

wakerakmeka wi wait wajaktinka tsangkamrukaip. Turayat wi wakera-murka ahati, antsu ame wakerame nuke ati, —Jesús timiayi.

³⁷Tura waketki ni nuiniatiri kanú tepeenaun wainkamiayi. Tura Pedron shintartas chicharak:

—Simónka ¿kanamek? ¿Kichik horaksha kanutsuk iwiasatkamarmeka tujintarmek? ³⁸Tunau nepetukai tusaram, kanutsuk Yus seataram. Atumi nintijai nintimsaram, tunaanaka nepetkakatjai tayatrumek, atumkeka tunauka nepetkashtatrome, —timiayi.

³⁹Tura Jesús ataksha we, seamia nunisang Yusen seamiayi. ⁴⁰Nunia waketki, ni nuiniatiri ainau ataksha kari nepetinam, kanú tepeenaun wainkaram, nuka kuraat shintarar: ¿Warintinjik? tinaksha nintimracharmiayi. ⁴¹Tuminam-tai Jesús ataksha we Yusen sea, tura waketki ni nuiniatiri irunun chicharak:

—¿Yamaikia tuke kanurtasrum tura ayamratasrum wakerarmek? Maaketai. Wi Yus akupkamutiatnak aints asamtai, tunaarintin ainamunam wina surutkartin hora yanchuk jeayi. ⁴²Nantaktaram. Wina surutkatnuka yanchuk winitrawai. Nijjai ingkiunikmi, —Jesús timiayi.^g

Jesús achikiar jukimuri

(Mat. 26.47-56; Luc. 22.47-53; Juan 18.2-11)

⁴³Jesúska tuke chichaak wajai, Judas ni nuiniatirintiat, Jesúsán anangka suruktas tarimiayi. Tura aints untsuri nijai wininauka saapin takusar tura numincha takusar winiarmiayi. Nu aints ainauka sacerdote juuntri ainausha, tura Moisésa chichame nuikiartin ainausha, tura judío juuntri ainausha akupkamu asar winiarmiayi. ⁴⁴Tura wininamtai Jesúsnum jeainatsaing, Judas nu aints ainaun chicharak:

—Wainkataram. Wi juwaitai tusan mejeestatjai. Turamtai awaapita tusaram achikrum metataram, tura jukitaram, —timiayi. ⁴⁵Tura taa wári Jesúsán jeari mejeak:

—Nuikiartinu, winajai, —timiayi.

⁴⁶Tamati kautkaru ainu Jesúsán tap achikar metawarmiayi.

⁴⁷Tura metawaram Jesúsá nuiniatiri kichik ni saapirin kuinak, sacerdote apuri inatirin kuwishin met charutkamiayi.

⁴⁸Turamtai Jesús sacerdote aintsri ainaun chicharak:

—¿Waruka kasa aints achiktasrum winitua nunisrumsha, saapisha tura numisha takusrumsha tarutniurme?

⁴⁹Wikia kashincha, kashincha Yus seatai juun jeanam atumjai pujusan aints ainaun nuininuyajai. Tura wainiatrum nuningkia achirkachmarume. Tura Yuse chichame wína pachitas aarmawa nu umiktasrum aitkararme, —Jesús timiayi.^h

⁵⁰Tamati ni nuiniatiri ainu mash Jesúsnaa ukukiar tupikiakiarmiayi.

⁵¹Tura natsa ni sekmatirin penumar, Jesúsjai tsanias wajasmiai. Turamtai suntar ainu nu natsanka achikiartas tariarmiayi. ⁵²Tura achinam, ni sekmatirin ajapa ukuki misu tupikiakmiayi.

Sacerdote apuri pujamunam jukimuri

(*Mat. 26.57-68; Luc. 22.54-55, 63-71;*

Juan 18.13-14, 19-24)

⁵³Nunia Jesúsán sacerdote apuri jeen umaarmiayi. Tura sacerdote juuntri ainausha, tura judío apuri ainausha, tura Moisésa chichame nuikiartin ainausha nuni iruntrararmiayi. ⁵⁴Turinamtai Pedroska uku nemas, sacerdote apuri jeen jeamiayi. Tura jeanmaka waaitsuk wenuknumak waya, aanum Yus seatai jean wainin ainaujai pachinak jiiin ayamak pujumiayi.

⁵⁵Turai sacerdote juuntri ainu judío apuri ainaujai mash iruntrar: Jesús nekas juun tunau turayi tiarat tusar, chichaman tsanumin ainaun eakarmiayi. Tura chicharinak:

—Nu warintimpi tusar nakasmi. Tura nu antukrikiu ninu chichamejai maatnuitji, —tinayat aints nuna tiarat tusar wainkartatkamawar wainkacharmiayi. ⁵⁶Tuminai aints unturi Jesúsán tsanuinak wait chichaman etserinayat, yapajiasarang yapajiasarang chichainak metekka chichascharmiai. ⁵⁷Nunia chikich ainu wajakiar tsanuinak:

⁵⁸—Ju aintsu timiauri iisha antukmaji.

Ju chichaak: ‘Yus seatai juun jean aints ainu jeamkarmia nuna yumpungnasha, nunia ataksha chikich jean aintska jeamchamu wainiatnak kempatam kintatik jeamkatatjai’ tau antukmaji, —tiarmiayi.ⁱ

⁵⁹Antsu tu tinayat metekka chichak-charmiami.

⁶⁰Tu chichainamtai, sacerdote apuri jepen wajas Jesúsán iniak:

—¿Aimkatatkamam tujintamek? ¿Amin pachitmasar etserturmina nuka warimpita? —timiayi.

⁶¹Tamaitiat Jesús aimkachmiayi. Tura aintsuk wajamtai, sacerdote apuri ataksha chicharak:

—¿Nekasmek Mesíasaitam? ¿Nekas pengker aa nuna Uchirinkitam? —tu iniasmiayi.

⁶²Tu iniam Jesús ayaak:

—Ja ai, ame tame nuka nuwaitjai. Aints ayatun Yus akupkamu asan, nekas kakaram aa nuna unturinini keemsan, nunia nayaimpinmaya yurangmijai winamtai, wínaka waitkatnuitrume, —timiayi.

⁶³Tamati sacerdote juuntri nuna antuk, kajek wejmakrin japiki jaak:

—Pai éwarí chicham antuktasrik nakastaj? ⁶⁴Atumsha Yusen pachis pasé chichaamuka antukurme. éltiur nintimtarne? —tu iniam mash aiminak:

—Maawarti, —tiarmiayi.

⁶⁵Tura kichik kichik Jesúsán usukrarmiayi. Tura ni jiiin tarachjai jingkiatawar yapiin awatinak:

—Watska éyáki aitkara? tusam nekaata, —tiarmiayi. Turinai Yus seatai jean wainin ainausha Jesúsá yapiin awatiarmiayi.

**Pedro nu aintsnaka
wainchawaitjai timiauri**
(*Mat. 26.69-75; Luc. 22.56-62;
Juan 18.15-18, 25-29*)

⁶⁶Pedroka aanum pujaun nuwa tarimiayi. Nu nuwaka sacerdoté apuri inatiri ayayi. ⁶⁷Tura nusha Pedron jiiin ayamak pujaun wainak:

—Amesha Nazaretnumia Jesúsjai tsaniasam wekainuyame nuwaapitme, —timiayi.

⁶⁸Tamaitiat Pedro aimiak:

—Atsa, nu aintsnaka wikia wainchawaitjai, ame tame nunaka nekatsjai, —timiayi. Nunia wenurmanumia jiiinkitas weamtai, atash shinimiayi. ⁶⁹Atash shinamtai, nu nuwasha Pedron ataksha wainak nuni pujuinaun chicharak:

—Juwaapita ni aintsri, —timiayi.

⁷⁰Tamaitiat Pedro ataksha:

—Atsa, nuchawaitjai, —timiayi. Tamati jumchik arus nuni wajainau ataksha Pedron chicharinak:

—Nekasmeapi aujai amesha wekainuyame. Galileanmaya aints asam, nunia aintsua nunismek chichaame, —tiarmiayi.

⁷¹Tinamaitiat Pedro kakar chicharak:

—Nangkamrum tarume. Yusjai tajai: Atum nu aints pachisrum chichaawearme nunaka nekatsjai, —waitrak timiayi.

⁷²Tamati ataksha atash shinamtai, Pedro Jesúsá timiaurin nintimramiayi.

Jesúsá timiauringkia nuwaitai: “Atash jimieran shinatsaing, wína pachitsam: Nu aintsnaka wainchawaitjai tusam, ameka kempatam waitrakum uurtuktatme.” Tura Pedro nu chichaman nintimiar kakar juutmiayi.

Pilato pujamunam jukimuri
(*Mat. 27.1-2, 11-14; Luc. 23.1-5;
Juan 18.28-38*)

15 ¹Tura tsawaarai sacerdoté juuntri ainau judfo juuntri ainaujai tura Moisésa chichame nuikiartin ainaujai tura chikich judfo apuri ainaujai chichaman nekaawartas iruntrarmiayi. Tura chichaman najanawar, Jesúsán jingkiawar jukiar Pilato pujamunam jeeniarmiayi. ²Jeeniaramtai Pilato Jesúsán chicharak:

—éNekasmek judfo apurintam? —tu iniam Jesús ayaak:

—Ame turutme nuka nekasam tame, —timiayi.

³Tamati sacerdoté juuntri ainau chichaman untsuri tsanumriarmiayi. ⁴Tu tsanuminamtai Pilato ataksha iniak:

—éAimtaka nakitamek? éAmin chichaman untsuri aujmatramina nuka antatsmek? —timiayi. ⁵Tamaitiat Jesús aikchamiayi. Tura aitsuk wajamtai Pilato nintimramiayi.

**Pilato Jesúsán maawarti
tusa tsangkamkamuri**
(*Mat. 27.15-31; Luc. 23.13-25;
Juan 18.38-19.16*)

⁶Tura Pascua fiesta jeatak wajasai, romano apuri tuke kichik aints achikmau kársernum engketun jiiki akupnuyayi.

Tura aints ainau: Nu aints jiikim akupkata tu seainamka, jiiki akupnuyayi.

⁷Nu musachti kichik aints Barrabás naartin chikich aintsjai mesetan najanawar aintsun mau asar, kársernum engkeamu pujuarmiayi. ⁸Tura asamtai

aints untsuri Pilatonam kaunkar chicharinak:

—Ii seakrinkia musachjai metek kichik aints karsernumia jikim akupnuyame nunismek ataksha ju fiesta kintati turata, —tiarmiayi. ⁹⁻¹⁰Sacerdote juuntri ainau Jesúsán suwirpiaku jiiinak, nangkamiar achikiar itaarun Pilato nekau asa, aints ainaun chicharak:

—Judío apurin jiiikin akupkatjai. ¿Nu wakerarmek? —timiayi. ¹¹Tu tinam sacerdote juuntri irunu aints ainaun kichik kichik weriar akatrar akupinak:

—Barrabásan jiiiki akupkati titaram, —tiarmiayi. Tu tinam aints ainau nunisarang tiarmiayi. ¹²Tu chichainamtai, Pilato ataksha chicharak:

—¿Tura Jesús, atum judío apurintai tu wearme nunasha iturkatjak? —timiayi.

¹³Tu iniam ataksha kakarar chichainak:

—Numi winangmanum ajinkam maata, —tiarmiayi.

¹⁴Tu tinamtai Pilato chichaak:

—¿Waruka? ¿Warí tunauna turini?

—tu iniam nuna nangkamasarang kakarar untsuminak:

—Numinam ajinkam maata, —tiarmiayi.

¹⁵Tinamtai aints ainau wina pengker nintimtursarat tusa, Pilato Barrabásan karsernumia jiiiki akupkamiayi. Tura suntar ainau Jesúsán katsumkarat tusa, tura numi winangmanum ajinkarti tusa akupkamiayi.^j

¹⁶Suntar ainau akupkamu asar, Jesúsán ni pujutirin jukiarmiayi. Tura chikich suntar ainaun mash untsukarmiayi. ¹⁷Tura mash kaunkaramtai, apu wejmakrin kapantaku amia nuna antsrarmiayi. Tura tsengkrutin jangkin najatawar tsengkrum-tikiarmiayi. ¹⁸Nunia wishikinak:

—Judío apuriya, pengker pujusta, —Jesúsán tiarmiayi.

¹⁹Tura Jesúsá muuken sapapjai awatiarmiayi, nunia usukrarmiayi. Tura wishikrami tusar tikishmatrarmiayi.

²⁰Tura Jesúsán wishikrar umisar, apu wejmakrin aitkar, ni wejmakrin ataksha antsrarmiayi. Tura numi winangmanum maatai tusar jukiarmiayi.

Numi winangmanum maamuri

(Mat. 27.32-44; Luc. 23.26-43; Juan 19.17-27)

²¹Nunia Jesúsán jukiar, jinta weenak, Cirene nungkanmaya aintsun Simón naartinun ajanmaya winauun wainkarmiayi. Nuka Alejandro nunia Rufo apari ayayi. Simón ajanmaya winamtai, Jesúsá krusrin nanarsat tusar achikiarmiayi.^k

²²Nunia Jesúsán nasha, mura Gólgota tutainum jukiarmiayi. Gólgotaka ii chichamejaingkia muuk ukunch taku tawai. ²³Tura nuni jear, najaimiashti tusar, amuti vino mirrajai pachimrar amurat tusar Jesúsán susarmiayi. Turamaitiat amurchamiayi.

²⁴⁻²⁵Tsaa yakí wakamtai, nuni numi winangmanum Jesúsán nenawar umisar, suntar ainau nakuruti suerte tutain nakurinak: ¿Yáki iin nepetamak Jesúsá entsatirin jukit? tusar nakurusarmiayi.

²⁶Tura aints ainau: ¿Waruka maamuita? tu inintrinauka nekaawarat tusar, tatang aarmaun numi winangmanum nujtukarmiayi. Nu aarmauka nuwaitai: “Judío apurintai.” ²⁷Nunia kasa aintsun jimiaran chikich Jesúsá untsurinini, tura chikitnasha Jesúsá menarininisha numi winangmanum nenaawarmiayi. ²⁸Nu turunamuri Yuse chichame aarmawa nunisang umikmiayi. Yuse chichame Jesúsán pachis tu aarmawaitai: “Tunau aintsua nunisarang wainkarmiayi.”^l

²⁹Tura aints ainau nangkaaminak Jesúsán wishikinak, muuken pearar pasé chicharinak:

—Jiisia ñamesha Yus seatai juun jean yumpungtatjai, tura ataksha kempatam kintati jeamkatatjai tichamkum?

³⁰Watska, yamaikia numinmaya kuankim uwemrata, —tiarmiayi.^m

³¹Sacerdote juuntri ainausha, tura Moisésa chichame nuikiartin ainausha wishikinak, mai nuwamtak chicharnai-nak:

—Chikich ainaun uwemtiknuuyayi, antsu ningki uwemratatkama tujintawai.

³²¿Mesiasashi? ¿Tura Judío apuriyashi? Watska, yamai numinmaya kuankiamtai-kia, iisha nu wainkar nekasampita timi, —wishikinak tiarmiayi.

Tura kasasha Jesúsjai jintamusha nunisang timiayi.

Jesúsa jakamuri

(*Mat. 27.45-56; Luc. 23.44-49; Juan 19.28-30; Hebr. 9.1-10.22*)

³³Tsaa tupin wajasai, mash nungka tee kajintramiayi. Nunia kempatam hora nangkamaramtai, tsaa yantanti ataksha tsantramiayi. ³⁴Turamtai Jesús kakar untsumak:

—Elí, Elí, lema sabactani, —timiayi. Nuka ii chichamejaingkia: “Yusru, Yusru ¿waruka japruamsha ukurme?” taku timiayi.ⁿ

³⁵Jesús nuna tamati, aints nuni wajainau nuna antukar:

—Antuktaram, Elíasan untsuawai, —tiarmiayi.

³⁶Tinamtai aints kichik ampuki we, vino churiniun uruchjai chupir, sapapjai iju mukunat tusa aapamiayi. Nuna susa chicharak:

—Turustaram. ¿Elías taa, niin kuaki jukishtimpiash? Nu wainkami, —timiayi.

³⁷Tinamtai Jesús kakar untsumak jakamiayi. ³⁸Tura jakamtai Yus seatai juun jeanam aparmau netimia nu ningki

yakiya tseu jaankamiayi. ³⁹Jesús kakar untsumak jakamtai, suntara kapitantri Jesúsán jijj wajamia nuka:

—Juka nekas Yuse Uchiri ayayi, —timiayi.

⁴⁰Tura nuwa ainausha arák wajasar, Jesús maamun jiisarmiayi. Nu nuwa irunujai Magdalanmaya Marí, tura Santiago nunia José nukuri Marísha, tura Salomésha wajasarmiayi. ⁴¹Jesús Galilea nungkanam yaanchuik pujamtai, nu nuwa ainau Jesúsán nemarsar yaingkiarmiayi. Nunia jiinkiar niin Jerusalénnum nemarsar chikich nuwa irunujai taarmiayi.^o

Jesúsa iwiersamuri

(*Mat. 27.57-61; Luc. 23.50-56; Juan 19.38-42*)

⁴²⁻⁴³Kiarai ayamratin kinta jeatak wajasamtai, Arimateanmaya aints, José naartin, judío juuntri chicharin ayat, shamtsuk Pilato jeen waya, Jesúsá namangken iwiersataj tusa werimiayi. Nuka Yus aints ainaun inarti tusa tuke nakauyayi. ⁴⁴Tura iniam Pilato chicharak:

—¿Yanchkek jakama? ⁴⁵—tu iniam kapitán aimiak:

—Ja ai, apuru, yanchuk jakami, —tamati, Jesúsá namangken José jukiti tusa tsangkatkamiayi. ⁴⁶Turamtai José tarach lino najanamun sumak, Jesúsá namangken numinmaya kuaki tarachjai kangkarmiayi. Tura waa pampa taimunam iwiersamiayi. Tura iwieras umis waitiri kaya juun najanamujai epenmiayi. ⁴⁷Turamtai Magdalanmaya Marí, José nukuri Maríjai ¿tuning iwiersarat? tusar jijj wajatiarmiayi.

Jesúsa nantakmiamiuri

(*Mat. 28.1-10; Luc. 24.1-12; Juan 20.1-10*)

16 ¹Ayamtai kinta nangkamaramtai, Magdalanmaya Marí, tura Santiago nukuri Marísha, tura Salomésha,

Jesúsa namangken yakaarami tusar kungkutin sumakarmiayi. ²Tura tumingti tsaá yama jiinai, iwiarsamunam wearmiayi. ³Tura weenak chichainak:

—¿Iwiarsamu epenmiaun kaya juun ututkamusha yajaing uraktaij? —tunai-yarmiayi.

⁴Tura nuni jear iwiarsamun jiisar, kaya juunjai waan epeniarmia nuna urankaun wainkarmiayi. ⁵Tura iwiarsamunam wayaawar, ni wajainamunam untsurinini natsa entsatin pújun sarman entsar pujaun wainkarmiayi. Tura wainkar shamkarmiayi. ⁶Shaminamtai nusha chicharak:

—Shamrukairap. Nazaretnumia Jesús numi winangmanum maawarma nu earne. Nuka jakayat nantakni. Juningkia tepatsui. Ni iwiarsamuri jiiistaram. ⁷Tura werum ni nuiniatiri ainau jiiisrum: ‘Atum weatsrumning, niyá eemak Galilea nungkanam weawai tusaram etserkataram. Tura atum weriram, Jesús atumin turammia nunisrumek nuni wainkatarume, tura Pedroscha ujatruktaram,’ —Yuse awemamuri timiayi.^p

⁸Tamati nuwa ainau nuna antukar shaminak kurainak, iwiarsamunmaya jiiinkiar ampukiar waketkiarmiayi. Tura timiá shamkaru asar, junta wekajinaun wainkarsha, pengké kichkisha ujakcharmiayi.

**Jesús Magdalanmaya
Maríjai wainaikiamuri**

(Juan 20.11-18)

⁹Jesús tumingti kashik jaka nantaki, Magdalanmaya Marín nuná eemak wantintukmiayi. Nu Marínaka yaanchuik iwianchrin siete (7) jiiirkimiayi. ¹⁰Jesús wantintukam, Marísha nuwik Jesúsjai tsaniasar wekaasarmia nuna jiiistas wemiayi. Tura wake mesekar juutu

pujuinaun wainak ni wainkamurin mash ujakmiayi. ¹¹Tura: “Jesús iwiaakuitai, wisha wainkajai” tu ujaamaitiat, nekasampita pengké ticharmiayi.

Ni nemarnurin jimiaran

Jesús wantintukmauri

(Luc. 24.13-35)

¹²Nunia jimiar aints tsaniasar wekainai, Jesús wantinkamiayi. ¹³Turamtai nisha Jesúsán wainkaru asar, waketkiar ni nuiniatiri ainau ujainamaitiat, nusha nunisarang nekasampita ticharmiayi.

Jesús ni nuiniatiri ainau akatramuri

(Mat. 28.16-20; Luc. 24.36-49; Juan 20.19-23)

¹⁴Jumchik arus, ni nuiniatiri once (11) misanam yuwinak pujuinai, Jesús wantintukmiayi, tura chikich ainau niin jaka nantaknun wainkarmia nuna timiaurin nekaschawaitai tinu asaramtai chicharak:

—¿Waruka nekasampi jakamunmaya nantaki turutsurme? ¿Tura warukaya timiá nintimturtsurme? —Jesús timiayi. ¹⁵Tura akatak:

—Mash nungkanam wetaram. Tura werum Yusnum uwemratin chicham mash aints ainau ujaktaram.^q

¹⁶Aints nu uwemratin chichaman nekasampita tinauka mainiar uwemrartin ainawai. Antsu nu uwemratin chichaman nekaschawapita tinauka tuke wait wajakartin ainawai. ¹⁷Tura wína nekasampita turutinauka Yuse kakarmarijai inakmamuncha turuwartinuitai. Tura wi akupkamu asar, wína naarun pachisar, iwianch ainau jiiinkiar akupkartinuitai. Tura chikich aintsu chichamen nekachu ainayat, niish niish chichasartinuitai. ¹⁸Tura aneachmau napin achikiariat jakachartinuitai. Tura amuti jatain amurarsha jakachartinuitai. Nunia jau

ainaun ni uwejejai antingkiaram
tsaarartinuitai, —Jesús timiayi.

Jesús nayaimpinam wakamuri
(*Luc. 24.50-53*)

¹⁹Nunia ni nuiniatiri ainaun aujas
umisamtai, Yus ii Apuri Jesúsán nayaim-
pinam iwiakmiayi. Tura iwiakam ni

Apaachiri Yuse untsurinini keemsamiayi.^r
²⁰Turamtai ni nuiniatiri ainau waketkiar,
mash nungkanam Yuse chichamen
etserkarmiayi. Tura asaramtai aints ainau
Yuse chichamen nekasaintai tiarti tusa, ii
Apurisha wainchatai takatnasha
turuwarti tusa takamtiksamiayi.
Maaketai.

Yamaram Chicham Lucasa Aarmauri

Lucas Teófilon chichaman akuptukmauri

1 ¹⁻³Wína aneetir Teófilo: Aints ainau Jesúsan wainkarmia nuka iin nuitamrau asar, tura chikich aints untsuri ujakarmau asar: Miatrusnak aartaj tiarmiayi. Tura asaramtai wisha nunisnak nu nangkamkenia nangkaman, Jesúsan pachisan mash nekaan, amincha miatrusnak aatratasan nintimtinuyajme. ⁴Tura asan nekas chichaman amincha nuitamrarmia nuna tenap nekamtikiatasan aatjame.^a

Imiakratin Juan akiinatniun pachis etserkamuri

⁵Yaanchuik Herodes Judea nungkanam apu pujai, nu nungkanam sacerdote Zacarías naartin pujuyayi. Nuka Abías ainaujai Yus seatai juun jeanam iruntrar takakmin armiayi. Tura Zacarías nuwari Elisabet naartinuyayi. Nuka yaanchuik sacerdote juuntri Aarón naartinu weari ayayi. ⁶Zacaríascha, tura Elisabetcha mai nekasar Yusen pengker umirin armiayi. Tura Yus umirkatin chichaman mash miatrusarang umirin armiayi. Tura asaramtai aints kichkisha niin pachisarka paseeka chicharchau armiayi. ⁷Tura Elisabet kaa asa uchinka jurechuyayi. Tura aishrijai mai juuntach wajakiarmiayi.

⁸⁻⁹Tura sacerdote Zacaríasjai takau ainau takakmasartin jeau asamtai,

Zacaríascha chikich sacerdote ainaujai nuni jear, Zacarías Yuse jeen waya kungkutin keemakat tusar akupkarmiayi. ¹⁰Turinamtai Zacarías Yus seatai juun jeanam ningki waya, nuni kungkutin keemakamtai, aints mash aanum wajainau Yusen searmiayi. ¹¹Tura Yusen seinamtai, Zacarías kungkutin keemak wajai, kungkuti keemakmanum untsurini Yuse awemamuri aneachmau wantintukmiayi. ¹²Tura wantintukam Zacaríascha nuna wainak nukap shamkamiayi. ¹³Turamtai Yuse awemamuri chicharak:

—Zacarías shamrukaip. Yuska ami seamurmin anturtamkayi. Nuwaram Elisabet uchin jurertatui. Turamtai nu uchikia Juan inaikiatmatme. ¹⁴⁻¹⁵Ami uchiram akiinatnua nuka Yusen miatrusang umirkatin asa, chikich ainaunka nangkatnuitai. Tura ni akiinamtai, ame nekasam nukap warastinuitme. Turamtai aints ainau untsuri warasartinuitai. Ami uchiram vínoncha, tura amuti kariaunasha amurchatnuitai. Tura ni akiintsang, Yuse Wakaningkia ni nintin engkemtuatnuitai. ¹⁶Tura asamtai ni tsakar Yuse chichamen etsermatai, Israel ainau untsuri ni Yusri wakeramurin ataksha umirkartinuitai. ¹⁷Yaanchuik Yuse chichame etserin Elías naartinu nintin Yuse Wakani engkemtuamu asa, Yuse kakarmarijai aints ainaun Yuse chichamen ujakmia nunisang ami

a 1.4 (Hech. 1.1-2)

uchiram ni Apuri taatsaing, Yuse chichamenka etserkatnuitai. Tura juun ainau ni uchirijai pengker nintimtusar pujusarat tusa, tura Yuse chichamen umirtan nakitin ainausha Yusen miatrusarang umirkarat tusa, tura aints ainau ni nintin iwiarar, ni Apuri tatintrin nakasarat tusa, Yuse chichamen etserkatnuitai, —Yuse awemamuri timiayi.^b

¹⁸Tamati Zacarías iniak:

—Wisha juuntach asan, nuwarsha juuntach asamtai çame tame nunaka nekasampi turunatatua itiuur titajak? —timiayi.

¹⁹Tu iniam Yuse awemamuri ayaak:

—Wikia Gabrielitjai. Yuse inatirinjai. Tura asan wina akuptukamta, wikia pengke chichaman ami uchiram akiinatniun pachisan amin ujaktasan tarijme. ²⁰Tura wi taja nuka nekasampita turutchau asam, ami uchiram akiintaing chichachu atatme. Tura uchiram akiinatmai, ataksha chichakatme. Ni akiinatniun kinta jeamtai, wi taja nunaka Yuska miatrusang umiktinuitai, —timiayi.^c

²¹Tu chichaamtai aints ainau aanum nakainak wajainau: çWaruka taatsua? tu nintimrarmiayi. ²²Tu nintimrar wajainamta, Zacarías jiinki, aints ainaun ujaktatkama yumatkamiayi. Tura chichakchamin nekapeak aya uwijmiarmiayi. Turamta aints ainau nintimrar: “Yuse jeen wajamta çwarintsuk wantintuka?” tiarmiayi.

²³Tura Yuse jeen takakmastin kinta amukamta, Zacaríaska ni jeen waketki-miayi. ²⁴Tura waketkiamtai jumchik arus ni nuwari Elisabetka japrukmiayi. Tura japruk cinco (5) nantu jeanmayangka jiintsuk pujumiayi. ²⁵Tura jeanam pujus nintimias: “Yamaikia aints ainau: Juka

uchin jurechuitai turutiarai tusa Yuska aitkarayi,” timiayi.

Jesús akiinatniun pachisar etserkam

²⁶Seis (6) nantu nangkamaramtai, Yus ni awemamurin Gabriel naartiniun Galilea nungkanam Nazaret yaktanam akupkamiayi. ²⁷Nu yaktanmaka nawan aintsjai tumichu Marí naartin pujuyayi. Nu nawannaka aints José naartin: Wi nuwatkamjinam tusa chichas ukukmiayi. Joséka apu Davidta weari ayayi.^d

²⁸Tura Yuse awemamuri Marí pujamunam waya chicharak:

—María, Yuse aneetiriya çpujamek? Apu Yus amincha pengker nintimturmau asamta winitjame. Yuska amin chikich nuwa ainaun nangkamasang timiá pengker awajtamui, —timiayi.

²⁹Tamati Marísha Yuse awemamurin wainak: çWarukang turuta? tusa nintimramiayi. ³⁰Turamta Yuse awemamuri chicharak:

—María shamkaip. Yus aminka pengker nintimturmawai. ³¹Antukta. Ame japrukatme. Tura japrukam uchi jurertatme. Tura jureram nu uchikia Jesús inaikiatme.^e

³²⁻³³Yus yakí puja nuka nuna pachis: Wina uchiruitai titin asamta, chikich aints ainaun nangkamasang pengker atinuitai. Tura Yuska yaanchuik atumi juuntrin Davidtan apu ati tusa, pengker awajsamia nunisang ami uchirmincha juun Apu ati tusa pengker awajsatnuitai. Tura Israel ainautirmin tuke inarti timiau asa, ni aintsri inartinka tuke nangkankashtinuitai, —timiayi.^f

³⁴Tamati nuna antuk Marí chicharak:

—Wikia aintsjai tsanirmichu asan çitiuuchincha jurertajak? —tu iniasmiayi.

³⁵Tu iniam Yuse awemamuri ayaak:

—Yuse Wakani tarutmitatui. Tura yurangmia nunisang Yuse kakarmarijai amin tarutmiamtai japrukmatme. Tura asamtai uchi akiinatata nuka nekas Yusnau asamtai Yuse Uchirintai tiartinuitai. ³⁶⁻³⁷Yuska pengké tujinchau asamtai, ami kana kaim Elisabetcha juunchitiat japruki. Aints ainau niin pachisar: Uchinka jurerchatnuitai tinamaitiat, ni japrukmauringkia seis nantu awai, —timiayi.

³⁸Tamati Marí chicharak:

—Ayu, wikia Yuse inatirinjai. Ame wína turutme nunisang Yuse wakeramuri ati —timiayi.

Tamati Yuse awemamuri niin ukukmiayi.⁸

Marí Elisabetnum irasmauri

³⁹⁻⁴⁰Jumchik arus, Marí Elisabetan jiiistaj tusa, Judea nungka murarin wári wemiayi. Tura Zacarías pujamunam waya, Elisabetan: ¿Pujamek? timiayi. ⁴¹Tamati Elisabet nuna antamta, uchi ampujnum engketu muchitkamiayi. Turamtai Yuse Wakani Elisabeta nintin piatkamiayi. ⁴²Tura nintin piatkamu asa, Marí japrukmauri nekaa Elisabet kakar chicharak:

—Yus chikich nuwa ainaun nuna nangkamasang aminak timiá pengker awajtamsau asa, ami uchiram akiinatata nunasha nekas pengker awajsatnuitai.

⁴³Kairu, wikia mianchau aisha, wína Uwemtikrurtinu nukuri ayatmesha winasha jiirsatasmesha tarutniume.

⁴⁴Ame wína aujtakmin, uchi nuna antuk waraak ampujrunia muchitkayi. ⁴⁵Apu Yus amin turamia nu nekasampi umiktatua tinu asakmin, Yus aminka waramtikramsataui, —Elisabet timiayi.

⁴⁶Tama Marí chicharak:

“Wikia tuke nintirjai

Yuska timiá juuntapita tajai.

⁴⁷ Tura Yuska wína Uwemtikrurtin asamtai, nukap warajai.

⁴⁸⁻⁴⁹ Wikia ni inatiri mianchau aing, Yus timiá juun aa nuka ni wakeramurin umiktas winaka pengker awajtusi. Tura asamtai yamai nangkamasang mash nungkanmaya ainau wina pachisar: Yuska nekas pengker awajsayi tuke turutiartinuitai. Yuse naarin pachisan nekas pengkerapita tajai.

⁵⁰ Yuska niin umirkartas wakerin ainaunka tuke inaitsuk wait anentratnuitai.

⁵¹ Nuka timiá kakaram asa, chikich ainau tujintina nunasha ningki turamiayi. Antsu ningki nintimsar: Wikia miajuitjai tumaminaunka nepetkamiayi.

⁵² Nunia inakratin ainauncha nepetkamiayi. Tura mianchau ainau inakratin arti tusa pengker awajsamiayi.

⁵³ Yuuminak pujuinauncha yuumamurin nukap susamiayi. Antsu kuikiartin ainaunka aintsangsha pujusarti tusa inaisamiayi.^h

⁵⁴⁻⁵⁵ Yaanchuikia ii juuntri ainauncha, tura Abrahamnasha, tura ni weari ainauncha nunaka wi turatatjai tímia nunisang Israel ainautin Yuse inatiri asakrin, tuke inaitamsuk wait anentramak yainmakaruitji,” Marí timiayi.

⁵⁶Tura Maríkia Elisabetjai kempatam nantun pujus, nuniangka ni jeen waketki-miayi.

Imiakratin Juanku akiinamuri

⁵⁷Nunia ni jurertin kinta jeamtai, Elisabet uchin aishmangkun jureremiayi. ⁵⁸Tura Yus Elisabetan wait anentak uchin susau asamtai, ni weari ainausha, tura ni irutramu ainausha nuna nekaawar, njai iruntrar warasarmiayi. ⁵⁹Uchi akiinamuri ocho kinta nangkamaramtai, nu kinta tuke ni nuwapchirin charuktin kinta asamtai, aints ainau uchi jiiistai tusar, tura naari inaikiami tusar, Zacaríasa jeen kaunkarmiayi. Tura asar ni aparinak Zacaríasan inaikiartas wakeriarmiayi. ⁶⁰Tura wainiat ni nukuri aints ainaun chicharak:
—Atsa, ni naaringkia Juan atatui, —timiayi.
⁶¹Tamati iniinak:
—¿Warukaya Juan ati tame? Ami wearam nu naartinka kichkisha atsawai, —tiarmiayi.
⁶²Tura Zacarías chichakchamin asamtai, aints irunu aya uwejejai uchin inakmasar: ¿Uchi warí inaikiatasmea wakerame? tusar ni aparin iniasarmiayi. ⁶³Tu iniinam uchi apari uwijmiak: Tatang aatai tepaun nu surustaram tusa, aya uwejejai inakmasmiayi. Tura susam: Uchi naaringkia Juankuitai, tu aarmiayi. Tu aaramtai nuna wainkar: ¿Warukaya uchincha tuusha inaiyawa? tu nintimrarmiayi. ⁶⁴Tinamtai Zacaríaska chichachu ayat nuniangka chichakmiayi. Tura:
—Yuska nekas pengkerapita, —timiayi. ⁶⁵Tamati nijai irutraru ainauka nuna wainkar mash shamkarmiayi. Tura Judea nungka murarinia ainau mash Zacaríasa turunamurin pachisar etseriarmiayi. ⁶⁶Tinamtai nu etsermaun antukar, nukap nintimrar mai nuwamtak iniinak:
—¿Nu uchisha nampuarsha warukuk ati? —tunaiyarmiayi. Yus nekas uchin pengker awajsau asamtai tu nintimrarmiayi.

Zacaríasa kantari

⁶⁷Nuniangka Zacarías, Yuse Wakani piatkamu asa, tura Yus tita timiau asa chichaak:
⁶⁸ “Israel ainauti iinu Apuri Yuska maaketai tiarmi. Ni uchiri ainiaji. Tura iin uwemtikramrartas tarutramiarji.
⁶⁹ Ii yaan chuik juuntri David Yuse inatiri asamtai, ni weari ainautin Yus iin Uwemtikramratin nekas kakaram aa nuna akupturmakji.
⁷⁰ Yaan chuik Yuse chichame etserin nekas pengker armia nu Yuse wakeramurin juna pachisar nekamtikramawarmiarji.
⁷¹ Ii nemase ainauncha, tura iin kajertaminak pujuinauncha nepetak uwemtikramratnuitji.
⁷² Yuska yaan chuik ii juuntri ainaun chicharak: ‘Wikia atumin tuke wait anentratnuitjarme, tura nekasan atumin pengker awajsatnuitjarme, timiaja nunaka pengké inaitsuk umiktinuitjai,’ timiayi.
⁷³⁻⁷⁵ Ii yaan chuik juuntrin Abrahaman Yuska chicharak: ‘Wikia nekasan tajame: Ami wearam ainau nemasen nepetkan atumniaka uwemtikratnuitjarme. Wi turamtai atumka iwiaaku pujusrum, shamtsuk pengké tunaarinchau wínaka tuke miatrusrumek umirtukti-nuitrume,’ timiayi. Iisha Abrahama weari asakrin, Yus niin tímia nunaka iin pachitmas timiayi.
⁷⁶ Tura uchiru amincha tajame:

Yus nekas yakí puja nuka
aminka: Wína chichamur etsernuitme
turamtinuitai. Tura Apu tatintri
iwiarata tusa,
ame eemkir akupkamuitme.ⁱ

⁷⁷ Tura Israel ainau

Yuse chichame ujaakum:

Atumi tunaari tsangkuramu asaram
uwemramnawaitrume titinuitme.

⁷⁸⁻⁷⁹ Aints ainautikia jakatin asar,
teenam pujakur tsawaarti tusar

nakaji nunisrik ii Apuri tatintri
nakaji.

Tura asakrin ii Yusri timiá wait
anentramau asa, tsaá jiiinua
nunisang wantinturmak
iincha uwentikramratnuitji.

Tura angkañ tuke pengker nintimsa-
ram pujustaram tusa
nintimtikramratnuitji,” tu
Zacaríañ timiayi.^j

⁸⁰Turamtai uchisha Yusen nintimki
tsakarmiayi. Tura Israel ainaun chichar-
katin kinta jeatsaing, aints atsamunam
pujuyayi.

Jesúsa akiinamuri

(Mat. 1.18-25)

2 ¹Juan akiinamia nu musachti
mash nungka ainamunam aints ainau
naarin papinum aatrarti tusa, chichaman
akupkamiayi. ²Nu nekapmartinnaka
yaanchuik turushtain, yamai turuwarti
tusa inamramiayi. Tura Siria nungkanam
apu Cirenio pujai turuwarmiayi. ³Tura
juun apu akupkamu asar, aints ainau
mash ni weari yaanchuik puju armia nuni
ni naarin aamtikrartas wearmiayi.

⁴Tura asaramtai Josésa Galilea
nungkanam pujau, Nazaret yaktanmaya
jiinki, Judea nungkanam yakat Belénnum
wemiayi. Joséka apu Davidta weari asa,

David akiinamu yaktanam, Belénnum
weak, Marín ayas, ⁵ni naarin aatmamrar-
tas wearmiayi. Tura Marí Joséjai
tumachiat, Yuse kakarmarijai japruku asa
jamtinuyayi. ⁶Tura nuni Belénnum
pujuinai, Marí jurertin kinta jeamiayi.
⁷Turamtai uchin eemkaurin jurermiayi.
Tura tarachjai pempearmiayi. Antsu
iraakur kanutai jea angkañchau asamtai,
uchin tangku ayurtainum tuksamiayi.

Yuse awemamuri wantinkamuri

⁸Marí uchin jererai, Belén yaktanam
arakchichu uwija wainin kashi tangkurin
waininak aanum pujuarmiayi. ⁹Tura aanum
pujuinai, Yuse awemamuri nayaimpinmaya
wantinmatai, uwija wainin pujuinamunam
Yuse paaniuri tsantramiayi. Turamtai nuna
wainkar nukap shamkarmiayi. ¹⁰Tura
shaminamtai Yuse awemamuri chicharak:

“Shamrukairap. Antuktaram. Aints
ainau mash nukap warasarat tusan, nekas
pengker chichaman ujaktasan winitjarne.
¹¹Yaanchuik apu David akiinamia nu
yaktanam yamai kashia juwi atumin
Uwentikramratin akiinturmarume. Nuka
atumi Apuri Mesíasaitai. ¹²Tura asamtai
atum werum yaktanam jearam, uchi
tangku ayurtainum tarachjai pempear-
mau tepau wainkatatrume. Tura
wainkaram nekasrum: Juwaapita
titatrume,” Yuse awemamuri timiayi.

¹³Nu tamaujai metek nayaimpinmaya Yuse
awemamuri untsuri kaunkarmiayi. Tura mash
iruntrar Yus juuntaitai tusar chichainak:

¹⁴“Yus nayaimpinam puja nuka nekas
kakarmaitai. Tura mash nungkanam
pujuinaun Yuska pengker awajatsas
wakerau asamtai, nekasar pengker
nintimsar angkañ pujusarti,” tiarmiayi.

¹⁵Tura Yuse awemamuri ainau nayaim-
pinam wakеткиaramtai, uwija wainin mai
nuwamtak chicharnainak:

—Watska, Belénnum weartai. Tura chichaman Apu Yus iin nekantikramaji nu nekaatai, —tiarmiayi.

¹⁶Nuna tiar wári yaktanam wear, nuni eakar Maríncha, tura Joséncha pujaun wainkarmiayi, tura uchincha tangku ayurtainum tepaun wainkarmiayi. ¹⁷Tura uchin wainkaru asar, Yuse awemamuri uchin pachis tímia nuna mash etserkarmiayi. ¹⁸Etserkaramtai uwija wainu timiaurin antukaruka mash nintimrarmiayi. ¹⁹Tura Maríkia uwija wainu timiaurin antuku asa, nintijai kajinmarchamin nintimiayi. ²⁰Tura uwija wainin ainau uwija matsatmaunum waketkiar, Yuse awemamuri uchin pachis tímia nunisarang wainkaru asar, ni antukmauríncha tura ni wainkamuríncha nintimsar: “Yuska nekas juuntapita,” tiarmiayi.

Jesús Yuse jeen itamuri

²¹Uchi akiinamuri ocho (8) kinta nangkamaramtai, nuwapchirin charutkar-miayi. Tura Marí japratsaing, Yuse awemamuri tu inaikiataram, tinu asamtai, uchin Jesúsan inaikiar-miayi.^k

²²⁻²³Moisés yaanchuik chichaman akupak: Uchi eemkauri tuke Yusnau atinuitai, tu aarmiayi. Nunia nuwa uchin jureru cuarenta (40) kinta nangkamach-mataikia Yuse jeen wayaachmin amiayi. Nu kinta nangkamaramtai, Marí ni aishrijai Yuse chichame aarmawa nunisarang Jerusalénnum Yus seatai juun jeanam Jesúsan itaarmiayi. ²⁴Tura Moisés yaanchuik chichaman akupak: Nuwa aishmangkun jurerka, yampitsan jimianan Yusen susaarti, tura yampits atsamtaikia yapangan jimianan susaarti, tu aarmau asamtai miatrusarang umikiar-miayi.^l

²⁵⁻²⁷Nu kintati Marí ni aishrijai uchin itaar: Moisés aarmia nunisrik umiktai

tusar, Yus seatai juun jeanam wayaawar-miayi. Tura wayaawaramtai, nekas pengke aints Simeón naartin, Yuse umirkau Jerusalénnum pujú asa, Yuse Wakani: Yus seatai juun jeanam weta timiau asa nuni wemiayi. Nuka Yus Israel ainaun uwentikrartinun nakauyayi. Tura Yuse Wakani ni nintin engkentuamu asa: Apu Yus Mesíasan akupkatata nuka waintsukka jakashtatme tusa, yaanchuik nekantikiamu asa, nu kintati Yus seatai juun jeanam wayaamiayi. ²⁸Tura waya uchin wainak juki minakas Yusen maaketai tusa seak:

²⁹—Apu, yamaikia jaaknasha nekas an pengker nintimsan jakatatjai. Ame turutmiam nuka miatrusmek umikume.

³⁰⁻³¹Mash nungkanmaya ainaun uwentikratnunka yamaikia nekas an wína jiiirujai wainkajai.

³²Chikich nungkanmaya ainau teenam pujuinau asar, paaniunam pujusarti tusa ju uchikia uwentikratnuitai. Tura Israel ainautincha nekas pengker awajtamsatnuitji. Turatin asamtai ju uchinka wainkau asan, yamaikia jaaknasha pengker nintimsan jakatatjai, —timiayi.

³³Simeón uchin pachis tu chichaamtai, Joséscha tura Jesúsa nukurisha nuna antukar nukap nintimrarmiayi. ³⁴Tura uchin chichas umis: Atumnasha Yus yainmakarti timiayi. Nunia Marín chicharak:

—Nintimrata, uchiram Yuse kakarmari-jai wainchati takatan turamtai, ³⁵Israel ainausha untsuri niin nakitrartinuitai. Antsu ju uchi pengker nintimtusar pujuinautinka Yuska pengker awajtamsatnuitji. Uchirmín nakitinamtai, aints ainau kichik kichik itiur nintiminawa nuka paan nekaatnuitme. Tura nangkijai ijumua nunismek nintim najamrutmitnuitai, —tu ujak Simeón Marín ukukmiayi.

³⁶⁻³⁷Nunia nuwa juuntach ochenta y cuatro (84) musachrintin, Yusen pachis aints ainaun ujaya nuka, Ana naartin nuni pujuyayi. Nu nuwaka Fanuéla nawantri ayayi, tura Jacobo uchiri Aser naartinu weari ayayi. Nuka yamai tsakaru aintsuninumak, siete (7) musach nijai tsanias pujus wajemamiayi. Tura wajema pujus, Yus seatai juun jeanam tsawaisha, tura kashisha tuke jiintsuk Yusen seak pujuyayi. Tura yurumkanka yutsuk ijiarma pujus, Yusen tuke seayayi. ³⁸Tura Ana tuke Yuse jeen pujusu asa, Jesúsán wainak, Yusen maaketai timiayi. Tura Jerusalénnumia ainaun Yus uwentikrarti tusar nakainaun nu uchin pachis: “Nekasar ii ainautinka Uwentikramratin tatatui tusar nakaji nuka nuwaitai,” tusa chichasmiayi.

³⁹Tura Yus umirkatin chichaman miatrusarang umirkau asar, Josésa tura Marísha uchirijai Galilea nungkanam ni pujutirin Nazaret yaktanam wakеткиarmiayi.^m

⁴⁰Tura nuni pujuinai, Yus Jesúsán pengker awajmau asa tsakaki wemiayi. Tura kakaram wajaki, Jesús nekatnasha pengker nekaki tsakamiayi.

Jesús Yuse jeen wemaui

⁴¹Musachjai metek Pascua fiesta jeatak wajamtai, José Jesúsá nukurijai Jerusalénnum weu armiayi. ⁴²Tura Yus tuke turataram tusa aamtikramu asamtai, Jesús doce (12) musach aun ayasar wearmiayi.ⁿ

⁴³Tura nuni jear, fiestan inangkarartas pujusar, fiesta nangkamaramtai, ni nukuri Joséjai waketinai, Jesúska waintsachmak Jerusalénnum juwakmiayi.

⁴⁴Antsu José tura Marísha: “Eemkar weenamunam wechayash,” tu nintimsar, Jesúsna eatsuk kichik kinta wekaasarmiayi. Tura jinta weenak ni weari

ainamunmasha eainaksha, tura ni waintairi ainamunam eainaksha, ⁴⁵wainkartatkamawar wainkacharmiayi. Tura Jerusalénnum eakmi tusar ataksha waketrukiarmiayi.

⁴⁶Tura kempatam kinta waintsuk waintsuk Yus seatai juun jeanam wayaawar, nuni Moisésa chichame nuikiartin ainau chichamen antuk, tura niisha inintrak nuni pachiinak pujaun Jesúsán wainkarmiayi. ⁴⁷Tura Jesúsá chichamen anturkarmia nuka mash: “Nekasampi nekawa, tura aimentancha nekas pengkerapi aimua,” tu nintimsarmiayi.

⁴⁸Tuminamtai José Maríjai Jesús tuma pujaun wainkar, nusha nunisarang nukap nintimrarmiayi. Tura nukuri chicharak: —Uchirua ¿warukaya juwakmame? Iisha aparmijai wake mesekar mengkakakmin eaknij awajame, —timiayi.

⁴⁹Tama Jesús chicharak:

—¿Waruka winasha eatrume? ¿Wikia Apaachirinau turatin aja nuka nekatsrumek? —timiayi.

⁵⁰Tamaitiat ¿warukakung taj? tusar pengké nekaacharmiayi.

⁵¹⁻⁵²Nunia Jesús ni nukurijai tura Joséjai Nazaretnum wakеткиarmiayi. Tura ni jeen jear, Jesús Joséncha, tura ni nukurincha tuke umirnuyayi. Tura Jesús tsakaki wemiayi, tura nekaki tsakamiayi. Turamtai Yuscha Jesúsán pengker nintimtimiayi. Tura aints ainausha niin pengker nintimtiarmiayi. Tura Marí Jesús Jerusalénnum wekaasamunka mash kajinmatsuk ni nintin ukusmiayi.

Imiakratin Juanku etserkamuri

(Mat. 3.1-12; Marc. 1.1-8; Juan 1.19-28)

3¹Juun apu Tiberio quince (15) musach romano apuri pujamtai, Judea nungkanam Poncio Pilato apu pujuyayi. Tura Galilea nungkanam Herodes apu

pujuyayi. Tura yachí Felipe Iturea nungkanam, tura Traconite nungkanmasha apu pujamtai, Abilinia nungka apuri Lisania naartin pujuyayi. ²Tura nu musachti Anás Caifásjai sacerdote apuri pujuarmiayi. Nu musachti Zacarías uchiri Juan aints atsamunam ningki pujamtai Yus nijai chichasmiayi. ³Tura Yus akupkamu asa, Juan Jordán entsa yantamen yakat amaunum wekaas, tsupias pujuinaun chicharak: “Atumka: Yus wína tunaarun sakturat tusaram, atumi pasé nintimtaiiri yapajiam maitiam,” timiayi.^o

⁴Yaanchuik Juan akiintsang, Yuse chichame etserin Isaías naartin Juankun pachis aarmia nunaka miatrusang umikmiayi. Nu aarmauka nuwaitai.

“Numi atsamunam aints taa kakar chichaak: Apu wekaasatniun jintan tupin iwiarina nunisrumek atumi ninti iwiarataram. ⁵Jinta wake amatisha, nungkan yaruakar pakamina nunisrumek atumi nintisha iwiarataram. Tura mura ainauncha yumpuwarar pakamina nunisrumek turataram. Tura junta tuniaru ainauncha tupin ati tusar, iwiarina nunisrumek turataram. Tura junta japaku amataisha paka ati tusar, iwiarina nunisrumek atumi nintisha iwiarataram. ⁶Tura asakrumin mash nungkanmaya ainautirmin Yus atumin uwentikramratnun akupturmak-tata nu wainkatnuitrume.” Yaanchuik Isaías Juankun pachis tu aarmiayi.^p

⁷Tura Juan aints ainaun imiaamtai, aints untsuri pachitsuk: Winasha imiatti tusar taarmia nuna Juan chicharak: “Atumka napia tumau pasé ayatrumeke çyaachia atumin maairam uwemratrume turamiarume? Atumka nangkamrum: Wisha mainka uwemrainjapi, tura Yuska winaka wait wajaktinaka suruschatnua-pita çtu nintimsarmek pujaram?^q

⁸“Atumka uwemratrum wakera-krumka, nekasrum atumi pasé nintimtaiirngkia yapajiataram. Atumka nangkamrum: Iikia Abraham wearai asar, Yuse aintsrinji tiirap. Antsu wikia atumin tajarme: Yuska ningki wakerak ju kaya tepa juna juki, juka Abraham wearai arti tusa, ningki wakerakka najanamwaitai. ⁹Atumka numi nerechua nunisketrume. Tura aints jachan juki, numi nerechun aják nuna kanawen charuk jinun epeawai. Yuska numi kanawen epeawa nunisketai. Atumi tunaari inait nakitakrumka, atumka wait wajaktinuitrume,” timiayi.^r

¹⁰Tamati aints ainu nuna antukar Juankun iniinak:

—¿Tura iisha imiaimu asar warukatjik? —tiarmiayi.

¹¹Tu tinam Juan aimiak:

—Aints wejmakri jimiari amataikia, chikich wejmakrinchaun kichik susati. Tura yurumkan takaku yurumkan yuumaun susati, —timiayi.

¹²Tamati nunia kuikian juu ainausha Juan imiatit tusar jiisartas weriar iniinak: —Nuikiartinu, çwisha warukatjak? —tiarmiayi.

¹³Tu tinam Juan aimiak:

—Kuik apu irumrataram ta nu nangkamasmrumka jukirap, —timiayi.

¹⁴Tama suntar ainausha tariar Juankun iniinak:

—Juunta çwisha warukatjak? —tu iniinam Juan aimiak:

—Atumka chikich ainausha awaakaram ninu aa nuka atankirap. Tura tsanumrairap. Tura atumi apuri akirmina nuke jukiram: Maaketai tusaram, nuna nangkamasmrumka wakerutsuk asataram, —timiayi.

¹⁵Tu chichaamtai aints ainu nintiminak: “¿Juka Mesíaschaukai? ¿Yus aints ainaun uwentikrat tusan akupkatatjai timia

nuchaukai?” tusar nekaawartas wakeriar-miayi. ¹⁶Juan tu iniam, nuna antuk aints ainaun mash chicharak: “Wikia aya entsanmak imiajrume. Antsu wína ukurun winitata nuka Yuse Wakani atumin nintin jiya tumaun engketramatatrume. Tura Yusen umirchau ainautirmin ji tuke kajintrashtinnun japramatnuitrume. Nuka wína nangkatusang kakaram atatui. Ni nekas timiá kakaram asamtai wikia mianchau asan, tsuntsumruan sapatri jingkiaamurin atitaj tayatun, natsaamau asan atiachminuitjai. ¹⁷Niisha Yusen umirkau ainauncha, tura Yusen umirchau ainauncha aints trigon pakawa nunisang akankatnuitai. Trigo jingkiajincha nunia saapencha akankartas su su umpuiniar juwinawai. Tura jingkiajinak jeanam ukuinawai. Antsu saapen jinum epeenawai. Yuscha nunisang niin umirinaunaka ni jeen jukitnuitai. Antsu niin umirchau ainaunka ji kajintrashtinnun japatnuitai,” Juan timiayi.

¹⁸Yusnum uwemratin chichaman Juan aints ainaun ujaak: Nekasrum Yus tuke nintimratarum tusa nukap chicharkamiayi. ¹⁹Tura apu Herodes ni yachí Felipe nuwarin Herodías naartinun kasamak nuwatkau asamtai, tura chikich tunaunasha turau asamtai, Juan Herodesan chicharkamiayi. ²⁰Tamaitiat Herodes Juanku chichamenka anturtsuk, chikich tunaunasha untsuri turamiayi. Tura ni suntarin akupak: Juan achikrum kársernum engkeatarum timiayi.^s

Jesúsa maimuri

(*Mat. 3.13-17; Marc. 1.9-11*)

²¹Nuna turatsaing Juan kársernum achikcham pujus, tura nu nungkanmaya ainaun untsurin imiaak pujus, Jesús nasha imaimiayi. Tura Jesús imiaim, Yusen seak pujai, nayaim uranniun wainkamiayi. ²²Turamtai Yuse Wakani yapangma tumaun Jesúsa muuken paan winitmiayi.

Tura nayaimpinmaya chichaman antukar-miayi. Yus uchirin chicharak:

—Ameka wína Uchiruitme, wína aneetiruitme. Amin pengker nintimtusun pujajme, —timiayi.^t

Jesúsa yaanchuik weari ainau naari inaikiamuri

(*Mat. 1.1-17*)

²³Jesús treinta (30) musach pujus, Yuse chichamen etsertan nangkamamiayi.

Turamtai aints ainau nangkamar: Jesús José uchirintai tu nintimtusarmiayi.

Jesúsa apachri Elí naartinuyayi. ²⁴Elí Matata uchiri ayayi. Nunia Matat Leví uchiri ayayi. Nunia Leví Melqui uchiri ayayi.

Nunia Melqui Jana uchiri ayayi. Nunia Jana José uchiri ayayi. ²⁵Nunia José Matatías uchiri ayayi. Nunia Matatías Amósa uchiri ayayi.

Nunia Amós Nahúma uchiri ayayi. Nunia Nahúm Esli uchiri ayayi. Nunia Esli Nagaiya uchiri ayayi.

²⁶Nunia Nagai Maata uchiri ayayi. Nunia Maat Matatías uchiri ayayi. Nunia Matatías Semeiya uchiri ayayi.

Nunia Semei Joseca uchiri ayayi. Nunia Josec Judá uchiri ayayi. ²⁷Nunia Judá Joanána uchiri ayayi.

Nunia Joanán Resa uchiri ayayi. Nunia Resa Zorobabela uchiri ayayi.

Nunia Zorobabel Salatiela uchiri ayayi. Nunia Salatiel Neri uchiri ayayi.

²⁸Nunia Neri Melqui uchiri ayayi. Nunia Melqui Adi uchiri ayayi. Nunia Adi Cosama uchiri ayayi.

Nunia Cosam Elmadama uchiri ayayi. Nunia Elmadam Era uchiri ayayi. ²⁹Nunia Er Josué uchiri ayayi.

Nunia Josué Eliezera uchiri ayayi. Nunia Eliezer Jorimia uchiri ayayi. ³⁰Nunia Matat Leví uchiri ayayi.

Nunia Leví Simeónka uchiri ayayi. Nunia Simeón Judá uchiri ayayi.

Nunia Judá José uchiri ayayi. Nunia José Jonamka uchiri ayayi. Nunia

Jonam Eliaquima uchiri ayayi. ³¹Nunia Eliaquim Melea uchiri ayayi. Nunia Melea Mena uchiri ayayi. Nunia Mena Matata uchiri ayayi. Nunia Matata Natánka uchiri ayayi. ³²Nunia Natán Davidta uchiri ayayi. Nunia David Isaí uchiri ayayi. Nunia Isaí Obeda uchiri ayayi. Nunia Obed Booza uchiri ayayi. Nunia Booz Sala uchiri ayayi. Nunia Sala Naasónka uchiri ayayi. ³³Nunia Naasón Aminadaba uchiri ayayi. Nunia Aminadab Arama uchiri ayayi. Nunia Aram Esroma uchiri ayayi. Nunia Esrom Faresa uchiri ayayi. Nunia Fares Judá uchiri ayayi. ³⁴Nunia Judá Jacobo uchiri ayayi. Nunia Jacob Isaaca uchiri ayayi. Nunia Isaac Abrahamama uchiri ayayi. Nunia Abraham Taréa uchiri ayayi. Nunia Taré Nacora uchiri ayayi. ³⁵Nunia Nacor Seruga uchiri ayayi. Nunia Serug Ragauwa uchiri ayayi. Nunia Ragau Pelegka uchiri ayayi. Nunia Peleg Hebera uchiri ayayi. Nunia Heber Sala uchiri ayayi. ³⁶Nunia Sala Cainánka uchiri ayayi. Nunia Cainán Arfaxada uchiri ayayi. Nunia Arfaxad Sema uchiri ayayi. Nunia Sem Noé uchiri ayayi. Nunia Noé Lamecka uchiri ayayi. ³⁷Nunia Lamec Matusalénka uchiri ayayi. Nunia Matusalén Enoca uchiri ayayi. Nunia Enoc Jareda uchiri ayayi. Nunia Jared Mahalaleela uchiri ayayi. Nunia Mahalaleel Cainánka uchiri ayayi. ³⁸Nunia Cainán Enósa uchiri ayayi. Nunia Enós Seta uchiri ayayi. Nunia Set Adánka uchiri ayayi. Tura Adánka Yus najanamiayi.

Jesúsa nekapsamuri

(Mat. 4.1-11; Marc. 1.12-13)

4 ¹Jesús Jordán entsanmaya jiinkiam-tai, Yuse Wakani ni nintin engkemtuau asa, aints atsamunam weta tusa Jesúsan ayamiayi. ²Tura nuni

pujamtai Satanás: Watska, tunau turuwaintash tusa nekapsatas tarimiayi. Turamtai Jesús cuarenta (40) kinta yurumkan yutsuk pujau asa yaparmiayi. ³Timiá tsukamak pujamtai Satanás chicharak:

—Nekasam Yuse Uchiritkumka, ju kaya tepa au jukim, kaya wainiatmek pang najanata, —timiayi.

⁴Tamati Jesús ayaak:

—Atsa, turashtatjai. Yuse chichame tu aarmawaitai: ‘Aints aya yutanak yutanak nintimtinauka tukeka pujuschartinuitai. Antsu Yuse chichamen nintimtinauka nekasar tuke pujusartinuitai,’ —timiayi.

⁵Tura Jesúsan ayas, mura juunnum iwiakmiayi. Tura nuni pujus, mash nungka ainaun inaktusmiayi. ⁶⁻⁷Tura mash inaktus umis chicharak:

—Ju nungkaka mash wainme juka, tura ni apuri ainausha, tura warinchu nekas pengker ainia nuka warinuitai. Tura wi wakeraknaka kichan nunaka mash susatnuitjai. Tura asamtai tikishmatruram: Wína apuruitme turutkumningkia, junaka mash aminu ati tusan susatjame, —anangkak timiayi.

⁸Tamaitiat Jesús ayaak:

—Satanása weta. Yuse chichame tu aarmawaitai: ‘Atumi Yusri atumi Apuri asamtai: Ameketme Apum titaram. Turaram atumi Yusri nuke umirkataram,’ —timiayi.

⁹⁻¹¹Nuniasha Jesúsan Satanás ayas, Jerusalén yaktanam umamiayi. Tura Yus seatai juun jea, yakí wajakmaunum iwiak, ataksha nekapsatas chicharak:

—Yuse chichame tu aarchamukai: ‘Yus ni awemamuri irunun amin waitmakarat tusa inatmartatui. Tura nawemin kayan tukumkai tusar, ni uwejejai achirmakartatui,’ tu aarmau asamtai, nekasam Yuse Uchiritkumka, watska, yakiiya tsekengkim ayaarta, —timiayi.⁴

¹²Tamaitiat Jesús ayaak:

—Atsa, turunashtatjai. Chikich aarmau-sha tu aarmawaitai: ‘Atumi Yusri atumi Apuri asamtai, nangkamrum nekapsatas-rum wakerukairap,’ —timiayi.

¹³Tu tau asamtai, Satanás Jesúsán nepetkatatkama pengké tujintak: Chikich kintati ataksha nekapsami, tusa Jesúsán ukukmiayi.

Jesús ni takatrin nangkamamuri

(*Mat. 4.12-17; Marc. 1.14-15*)

¹⁴Nunia Jesús Yuse Wakani kakarmari-jai Galilea nungkanam waketkimiayi. Tura nuni jeamtai, nu nungkanmaya ainauka niin pachisar chichasarmiayi.

¹⁵Tuminamtai Jesús nuni chikich chikich yaktanam wekaas, iruntai jeanam waya, aints ainaun nuiniarmiayi. Turamtai ni chichamen antukarmia nuka untsuri niin pachisar pengker chichasarmiayi.

Jesús Nazaretnum pujusmauri

(*Mat. 13.53-58; Marc. 6.1-6*)

¹⁶Tura Jesús Nazaret yaktanam ni tsakarmaurin wemiayi. Tura tuke turin asa, ayamtai kintati iruntai jeanam waya, Yuse chichamen aujsatas wajakmiayi.

¹⁷Turamtai yaanchuik Yuse chichame etserin Isaías aarmaurin susarmiayi. Tura susaram Jesús nuna urak nu aarmaunka wainkamiayi. Tura aujak:

¹⁸—Yuse Wakani wini pujurtawai. Tura asa wínaka: Nekas mianchau ainaun uwemratin chicham ujakta tusa akuptuk-miayi. Tura jingkiama nunisarang pujuinausha: Angkan pujustaram tita tusa akuptukmiayi. Tura wainmichun jímítkisata tusa akuptukmiayi, tura pasé awajtamú ainausha pengker awajsata tusa akuptuk-miayi. ¹⁹Tura yamaikia Apu Yus aints ainaun wait anentawai tusam, etserkata tusa akuptukmiayi. Isaías tu aarmiayi, —timiayi.^v

²⁰Tura nu aarmaun aujas umis papin nukukmiayi. Tura iruntai jean wainiun papin wangtuki keemsamiayi. Keemsam-tai aints nuni ketinauka mash niin jijjam wajiarmiayi. ²¹Tuminamtai Jesús chicharak:

—Yuse chichame yamai antukurme nuka aarmawa nunisnak ju kintaka umikjai, —timiayi. ²²Tamati aints ainau mash Jesúsá pengker chichaamurin antukaru asar, niin pachisar pengker chichasarmiayi. Tura nintimrar chichar-nainak:

—¿Juka José uchirinchukai? —tiarmiayi.

²³Tu tinam Jesús chicharak:

—Junia aints ainau: ‘Tsuwakratnu, amek tsuwarata,’ tina nunisrumek: Capernaum yaktanam wainchatai takat turamiame nunismek junisha turata ¿atumsha turutiatrumek? ²⁴Tura nekasan tajarme: Yuse chichame etserin ni nungkarin taa, Yuse chichamen etserma-tisha, pengké anturinatsui.^w ²⁵Atumsha wi wear ayatrum, wína chichamur antutka nakitarme. Tura asan tajarme: Yaanchuikia Yuse chichame etserin Elías naartin pujai, kempatam musach nunia japchiri yumi jitachu asamtai, Israel nungkanam aints ainau mash tsukajai nukap waitnasarmia nuni waje untsuri iruniarmiayi. ²⁶Waje untsuri atumi nungkarin iruninau wainiat, Yus Elíasan nu waje ainaun yaingti tusangka akuptukchamiayi, antsu chikich nungkan-maya wajen Sarepta yaktanam Sidón nungkanam pujaun yaingti tusa akupka-miayi.^x ²⁷Tura Yuse chichamen etserin Eliseo pujai, Israel nungkanam kuchaprintin untsuri iruniarmiayi. Antsu nu nungkanmak kuchaprintin untsuri iruninau wainiat, Yus nu aints ainaunka mashkia tsuwarchamiayi. Antsu Siria

nungkanmaya aintsun Naamán naartinun nunak tsuwarmiayi, —Jesús timiayi.^y

²⁸Tamati iruntai jeanam pujuinau nu chichaman antukar, Jesúsán nukap kajerkarmiayi. ²⁹Tura wajatkjar, Jesúsán yaktanmaya jiikiar, mura arakchichu amanum iwiakar: “Wakenam shitakar ujuartai,” tusar jukiarmiayi. ³⁰Turinamaitiat Jesús ni wininamunmak japen temraktaj jiinki wemiayi.

**Jesús iwianchin aintsnumia
jiiki akupkamuri**
(*Marc. 1.21-28*)

³¹Tura Galilea nungkanam Capernaum yaktanam jeamiayi. Tura nuni pujus, ayamtai kintati tuke turin asa, nuni aints ainaun nuiniarmiayi. ³²Tura Yuse kakarmarijai aints ainaun nuinau asamtai, nuna antukaru ainu nintimrar: Nuka Yuse kakarmarijai iincha timiá pengker nuitamji tiarmiayi.^z

³³Chikich kintati Jesús iruntai jeanam wayaamtai, aints iwianchrintin nuni engkema pujus, Jesúsán kakar chicharak:

³⁴—Nazaretnumia Jesúsá ¿waruka iincha amukratkatasmesha winame? Wikia nekajme. Ameka Yus akupkamuitme. Nekasam pengké tunaarinchau aa nuwaitme, —tu jiyakmiayi.

³⁵Tamati Jesús iwianchin kakar chicharak:

—Chichatsuk asata. Tura ju aintska ukukta, —timiayi.

Tama iwianchkia aintsnumia jiiinak, nungkanam peet nangkimiamiayi.

Turayat jumchiksha najuarchamiayi.

³⁶Turamtai aints ainu nuna wainkar shamkar chichainak:

—¿Juna chichamesha waringki?

Chichamenka iwianchka anturinawapi. Ju aintska Yuse kakarmarijai iwianch ainaun jiiki akupawapi. Tura akupamu

asar niincha umirinawai, —tunaiyar-miayi. ³⁷Tura nu nungkanam pujuinau mash Jesúsá turamurin pachisar etserkarmiayi.

Jesús Pedro tsatsarin tsuwarmauri
(*Mat. 8.14-15; Marc. 1.29-31*)

³⁸Nunia iruntai jeanmaya jiinki, Jesús Simónka jeen wayaamiayi. Tura jea wayai Simónka tsatsari nukap tsuwemiayi. Tura asamtai:

—Tsuwaturta, —tiarmiayi. ³⁹Tinamtai Jesús Simónka tsatsari tsuweak tepamunam weri tsunsumrua: Tsuweamuram michatrata, tama kakarmachu michatramiayi. Tura wári wajaki irasartas taarun yuramiayi.

Aints untsuri tsuwarmauri
(*Mat. 8.16-17; Marc. 1.32-34*)

⁴⁰Tsaa nungka wajasai, aints ainu ni weari sungkurintin ainaun Jesúsán itariarmiayi. Tura itarim kichik ni uwejejai anting Jesús tsuwarmiayi.

⁴¹Tura iwianchrintin ainaun iwianchrintin jiiirki japruamiayi. Turamtai iwianch ainu jiiinkiar untsuminak:

—Ameka Yuse Uchirinme, —tiarmiayi.

Tura niisha: Jesúska Mesíasaitai, Yus akupkamuitai tusar nekainau asaramtai, Jesús: Itatkataram tusa kakar chicharkamiayi.

Iruntai jeanam Yuse chichame etserkamu
(*Marc. 1.35-39*)

⁴²Kashin kashik tsawaarak, Jesús nu yaktanmayangka jiinki, aints atsamunam wemiayi. Turamtai aints ainu eakar ni pujamunam jeariarmiayi. Tura jear: Waketkip, antsu iijai tuke pujusmi, tusar tuke pujusartas wakeriarmiayi. ⁴³Tinamaitiat Jesús chichaak:

—Wikia juningkia tukeka pujuscham-nawaitjai. Antsu Yus chikich yakat

ainamunam wína chichamur etserkata tusa akuptuku asamtai, wisha wena nunia aints ainauncha: Yuska aints ainaun inartas wakera nu chichaman etserkatatjai, —timiayi.

⁴⁴Tura nuna tusa ukuak, Galilea nungkanam wekaas, chikich chikich yaktanam iruntai jeanam waya, Jesús tuke Yuse chichamen etserkamaikiak wekaimiayi.^a

Namak untsuri achikmauri

(*Mat. 4.18-22; Marc. 1.16-20*)

5¹Chikich kintati Jesús juun kucha Genesaret tutainum nuna kaanmatkarin aints ainaun nuiniak wajai, aints timiá untsuri Yuse chichamen antukartas wakerinak Jesúsnum kawengkar kae wajasarmiayi. ²Tuminamtai Jesús jimia kanu kucha kaanmatkarin tepaun wainkamiayi. Kanurтин ainou rederin nijartas jiinkiaru asaramtai, kanuka mai angkan nanatiarmiayi. ³Tura asaramtai Jesús Simónka kanurin engkema: Jumchik japen nanaastajai, tamati Simón utsukmiayi. Tura kanu japen nanaasamtai, Jesús kanunam keemas aints kaanmatkanam pujuinaun Yuse chichamen nuiniarmiayi.^b ⁴Tura nuiniar umis Simónkan chicharak:

—Kanu kucha kunarin jukim, namak achiktasam rederam ujungta, —timiayi.

⁵Tamaitiat Simón ayaak:

—Nuikiartinu, namak achiktai tusar, kashi rede ujua ujuaka tsawaayatur kichkisha achikchaji. Antsu ame turutu asakmin ujungtajai, —timiayi.

⁶Tura reden japen kunanam ujungkar, namak untsuri chumpimiaou asamtai, redcha jaankamiayi.^c ⁷Tura ningkikia jiiiktakamawar tujintinak, ni amikri chikich kanunam engketinaun: Yaintitaran tusar uwejejai untsukarmiayi.

Turinamtai niisha tariar, kanunam namakan met chumpiawar, kanuka mai yarantanak wajasarmiayi. ⁸⁻⁹Namak timiá untsuri kanunam chumpiamu wainkar, Simón ni amikri ainaujai shamkarmiayi. Tura Simón Pedro Jesúsán tikishmatar:

—Apuu, wikia nekas tunau asamtai çitiurak wijaisha pujustam? Wait aneasam ukurkita, —timiayi. ¹⁰Tamati Jesús Simónkan chicharak:

—Shamrukaip. Yamai nangkamsamek namakka achitsuk: Aints ainou Yusnau arti tusam, Yuse chichame etserkum aints achiu atatme, —timiayi. Tura Zebedeo uchiri Santiagosha, tura Juansha, Simónjai kanunam engkemawar pujuarmia nusha mash shamkarmiayi.

¹¹Tura nuka mash ni kanurinka kukarnum ukukiar, ni rederincha mash ukukiar, Jesúsán nemarsar wekaasarmiayi.

Jesús aints kuchaprinun tsuwarmauri

(*Mat. 8.1-4; Marc. 1.40-45*)

¹²Nunia Jesús chikich yaktanam we nuni pujai, aints kuchaprintin tari, Jesúsán wainak, ni muuke nungka antitnak tsuntsumrua, nunia pangkai jiiis Jesúsán chicharak:

—Apuu, ame wakerakmeke tsuwaramnawaitme, —timiayi.

¹³Tama Jesús ni uwejejai ni namangken takaras chicharak:

—Ja ai, wakerajme. Pengker wajasta, —timiayi.

Tama nu aintska nu tamaujui metek tsaar pengker wajasmiayi.

¹⁴Tura pengker wajasamtai Jesús chicharak:

—Ame turunamuram pengké etserkaip. Antsu sacerdotenam weta. Tura nuni weme namangkem pengker tsuwamaru asam inakmasta. Tura aints ainou mash

pengker wajasmaurum nekaawarat tusam, Moisés tímia nunismek turata, —timiayi.

¹⁵Tamaitiat Jesúsá turamurin pachisar aints ainu nukap chichasarmiayi. Tuminamtai ni chichamen anturkartas aints unturi kautkarmiayi. Tura sungkurintin ainausha tsuwaamartai tusar unturi kautkarmiayi. ¹⁶Tuminamtai Jesús aints atsamunam we, nuni ni Apaachirin seamiayi.

Jesús pimpirun tsuwarmauri

(Mat. 9.1-8; Marc. 2.1-12)

¹⁷Chikich kintati Jesús aints ainaun nuiniak pujai fariseo ainauka, tura Moisésa chichame nuikiartin ainausha, tura Galilea nungkanmaya tura Judea nungkanmaya tura Jerusalénnumia kaunkaru ainauka Jesúsá chichamen antú pujuinai, Jesús Yuse kakarmarijai jau ainaun tsuwarmaiyai. ¹⁸Turamtai aints ainu tariar, aints pimpirun tampumruwar itaarmiayi. Tura Jesús pujamunam wayaawartas wakerinayat, ¹⁹jeanam aints unturi piaku asamtai, wayaawartatka-mawar tujinkarmiayi. Tura asar jea yakí pata amanum wakar, patan urakar, aints ainu kak piak pujuinamunam Jesús wajamunam pimpirun tampunam engketun yakiya itararmiayi. ²⁰Tura pimpirun itaarmia nuka: Jesús nekasampi tsuwartatua, tu nintimainu asaramtai, Jesús nuna nekaa pimpirun chicharak:

—Aishmangkua, tunaarum mash tsangkuramuitme, —timiayi.

²¹Tamati Moisésa chichame nuikiartin ainausha, tura fariseo ainausha ni nintijai: ¿Yusek tunaunaka sakarchatnukai? ¿Nangkami ningki Yusetjai tumamtsuash? ¿Yuschautiat Yusetjai tumama ausha warí aintsuita? tu nintimtusarmiayi.

²²Tu nintiminamtai, Jesúska ni nintimaaurin nekau asa chicharak:

—¿Waruka tuusha nintimrume?

²³¿Warí timiá yumtinueita? ¿Tunaarum tsangkuramuitme, titin yumtinkai? Antsu nu tachakrishá pimpirun: ¿Wajakim wekaasata titin yumtinkai? ²⁴Wikia aints ayatun Yus akupkamu asan, ju nungkanam pujuinai tunaarin tsangkuratnuitjai. Tura wí turamawaitjai tusan yamaikia nekamtikiatjarme, —timiayi. Nunia pimpirun chicharak:

—Amin tajame nantakim tampuram jukim jeemin waketkita, —timiayi.

²⁵Tama nu tamaujai metek aints mash jiiiminai, pimpirun wajaki tampurin juki: Yus kakarmaitai tusa, ni jeen waketki-miyai. ²⁶Turamtai nuna mash jii pujuinauka nintimrar: Yuska kakarmaitai, tusar shamkarmiayi. Tura shaminak:

—Yamaikia aintsti tujintamu tsuwaruka wainkaji, —tiarmiayi.

Jesús Levín wina nuiniatir ata timiauri

(Mat. 9.9-13; Marc. 2.13-17)

²⁷Nunia jiinki Jesús jinta weak apu akitinam jea nangkamak, aints Leví naartinun, chikich naari Mateo, nuni pujaun wainkamiayi. Nuka romano apuri akatramu asa, aints ainu apun akikiarat tusa kuikian juuyayi. Tura Levín wainak chicharak:

—Wína nuiniatir ata, —Jesús timiayi.

²⁸Tamati Leví: Ayu tusa wajaki ni takatrinka mash ukuki, Jesúsán nemarsamiayi.

²⁹Nunia fiestan najana, kuikian ju ainu Jesúsán wainkarat tusa untsukmiayi. Tura untsukmau asar, kuikian ju ainu unturi, tura chikich aints ainausha, tura Jesúsá nuiniatiri ainausha nijai iruntrar misanam yuwinak pujuarmiayi.

³⁰Turinamtai fariseo ainausha, tura Moisésa chichame nuikiartin ainausha Jesúsá nuiniatiri ainaun iniinak:

—Maj ¿waruka atumsha kuikian juu ainaujaisha tura chikich tunaarintin

ainaujaisha iruntramesha yuwarme?
¿Tura waruka nijjai iruntramesha
amutisha amarmer? —tiarmiayi.^d

³¹Tu tinam Jesús aimiak:

—Aints pengker pujuinauka tsuwakrat-
nunka yuuminatsui. Antsu najaiminak
pujuinauka tsuwakratnun yuuminawai.

³²Wikia péngke aintsuitjai tinaunka: Pasé
nintimaurum yapajiarum Yus umirkata-
ram titasnaka tachawitjai. Antsu
tunaawaitjai tinaun: Tunaarum inaisata-
ram titasan tawitjai, —timiayi.

Ijarmatin pachisar Jesúsán iniasmauri

(*Mat. 9.14-17; Marc. 2.18-22*)

³³Jesús tamati fariseo ainau tura
Moisésa chichamen nuikiartin ainausha
ataksha iniinak:

—Juanku nuiniatiri ainausha, tura ii
nuiniatiri ainausha nukap ijarmawar
yutsuk Yuskana seainawai. ¿Antsu ami
nuiniatiram ainau waruka tuke yuwinak
tura aminak pujuinawa? —tiarmiayi.

³⁴Tu tinam Jesús nuikiartamun etserak:

—¿Aints yamai nuwan nuwatkau ni
untsukmau ainaujai iruntrar pujuinamtai,
yutsukek pujuina? ³⁵Atsa, antsu aints
yamai nuwan nuwatkamun jukiartin
kinta jeamtai, nuniangka untsukmau
ainau wake mesekar ijarmawartinuitai.
Wína nuiniatirka wijai pujuinau asar,
yamaikia ijarmawarka pujuinatsui. Antsu
wína jurukiaramtai, nuniangka
ijarmawartinuitai, —Jesús timiayi.

³⁶Nunia chikich nuikiartutai chichaman
nuiniarmiayi. Tura chicharak:

—Aints kichkisha wejmak yamarman
charuk arutchinam nujtinatsui. Antsu
aints nuna turakka, wejmakri yamaram
aa nuna mesramnawaitai. Tura arut
wejmaksha yamarmajaingkia tenap
nujukchamnawaitai. ³⁷Nuniasha amuti

vino tutai yamai kariauka nuwap
aparmau mamurunmaka yarakchamna-
waitai. Nu turamka vino kariak
wapakrak nuwap aparmaun pujkatnui-
tai. Tura asa vinosha ukaratnuitai, tura
nuwap aparmausha pasemartinuitai.

³⁸Tura asamtai vino yamai kariauka
nuwap najanamu yamarmanam yarakti-
nuitai. Nu turamka mai metek
meserchatnuitai. Tura asamtai yamaram
chicham umirkurmeka, arut chicham
etserkamuka inaisatnuitrume. ³⁹Tura
aints vino arut najanamun umin
ainauka yamarman nakitinawai. Tura
nakitinak: ‘Vino arut najanamuka timiá
pengkeraitai’ tinawai, —Jesús timiayi.^e

Ayamtai kintati trigo majurar yuwamuri

(*Mat. 12.1-8; Marc. 2.23-28*)

6¹Chikich ayamtai kinta tsawaaram-
tai, Jesús ni nuiniatiri ainaujai aja
japeng nangkaminak, ni nuiniatiri ainau
yaparinak trigo jingkiain achikiar
majurar yukiar wearmiayi. ²Turinamtai
fariseo nuna wainkar chicharinak:

—Ayamtai kintati takakmaschatnuitai
tusa Moisés surimkau wainiatrumsha
¿warukaya aitkarme? —tiarmiayi.

³Tinamtai Jesús chicharak:

—¿Yaanchuik apu Davidta turamuri
pachisrum ajchaukitrum? Nuka ni
aintsri ainaujai tsukaminak pujuinam-
tai, ⁴Yus seatai juun jeansam ningki
waya, Yus inaktustin pang aya
sacerdote yutairi asamtai, chikich
aintska yuwachminun wainiat,
Davidcha nuna yuwak ni aintsrincha
susamiayi. Antsu Yuska nu turamun
pachiska tunaawitai pengké tichamiayi.
Tura wína nuiniatirsha nunisarang
tunaanaka takaschari. ⁵Wi aints ayatun
Yus akupkamu asan, aints ainaun

ayamtai kintati tu pujusarti tusan inartinuitjai, —timiayi.^f

Uwejen mutchaun tsuwarmauri

(Mat. 12.9-14; Marc. 3.1-6)

⁶Chikich ayamtai kintati Jesús iruntai jeanam waya, aints ainaun nuiniak pujai, aints untsur uwejen mutchau nuni pujumiayi. ⁷Turamtai Moisésa chichame nuikiartin ainausha, tura fariseo ainausha: Jesús ayamtai kintati ju aintsun tsuwaramtaikia iikia: Tunau wajasi timi tusar, jiij pujuriarmiayi. ⁸Tuminamtai Jesús ni nintimaurin nekau asa, uwejen mutchaun chicharak:

—Wajakim japen wajasta, —tama un aintska wajaki japen wajasmiai. ⁹Tura japen wajasamta, Jesús aints jiij pujuinam chicharak:

—Wi atumin iniastrume: ¿Ayamta kintatisha pengker aa nuka turatnukai? ¿Nu turachkursha nu kintati pasé aa nuka turatnukai? Tura ¿nu kintatisha aints jakashti tusar uwemtikratnukai? Nu turachkursha ¿nu kintatisha aints maatnukai? ¿Atumsha itiu nintimrume? —tu iniamaitiat Jesúsán aitske pujuarmiayi.

¹⁰Tuminamtai Jesús niin tentewar pujuarmia nuna mash jiis, uwejen mutchaun chicharak:

—Uwejem kutsmarta, —timiayi.

Tama ni uwejen kutsmar, nuniangka pengker wajasmiai. ¹¹Nu aints pengker wajasamta, fariseo ainu kajerinak: ¿Jesús itiu katjik? tusar mai nuwamtak chichasarmiayi.

Jesús ni nuiniatiri ainaun inaikiamuri

(Mat. 10.1-4; Marc. 3.13-19)

¹²Chikich kintati Jesús Yusen seatas mura waka, nu kashi Yusen seaseaka kanutsuk tsawaarmiayi. ¹³Tura tsawaar

ni nuiniatiri ainaun mash untsuk, nu aints ainamunmaya aya doce (12) aints wi akupkatin arti tusa Jesús inaikiamiayi. ¹⁴Nu aintsu naaringkia nu ainawai: Simón chikich naarin Pedron Jesús inaikiamiayi, nunia Pedro yachi Andrés, nunia Santiago, nunia Juan, nunia Felipe, nunia Bartolomé, ¹⁵nunia Mateo, nunia Tomás, nunia Alfeo uchiri Santiago, nunia Simón yaanchuik mesetan najanin amia nu, ¹⁶nunia Santiago uchiri Judas, nunia chikich Judas Iscariote naartin, ukunam Jesúsán anangka surukmia nuna: Wi akupkatin arti tusa Jesús inaikiamiayi.^g

Jesús aints untsurin nuiniarmuri

(Mat. 4.23-25)

¹⁷Nunia Jesús ni nuiniatiri ainaujai muranmaya kuankiar paka nungkanam pujuarmiayi. Tura nuni pujuinamta, Judea nungkanmaya ainausha, tura Jerusalén yaktanmaya ainausha, tura juun entsa yantamenia Tironmaya tura Sidónnumia ainausha untsuri: Jesúsá chichame antuktai tusar, tura tsuwarat tusar kaunkarmiayi. ¹⁸Tura kaunkaramtai nu aints ainaun tsuwarmai. Iwianchrintin ainauncha iwianchri jiiirki akuptukam pengker wajasarmiayi. ¹⁹Jesús ni kakarmarijai aints ainaun timiá untsuri tsuwaru asamta, aints mash niin antingtai tusar wakeriarmiayi.

¿Ya aints ainauna Yuscha waramtiksatnuita? timiauri

(Mat. 5.1-12)

²⁰Tura aints ainaun tsuwar umis Jesús ni nuiniatiri ainaun jiis chicharak:

“Atumka kuikiartichutiaturum: Yusnum pujustin asaram warastinuitrume.

²¹“Yamaikia tsukamakrum pujayatrume, ukunmaka tsukamtsuk pujustin asaram warastinuitrume.

“Yamaikia juutu pujayatrumek, ukunmaka wishirtin asaram warastinuitrume.

²²“Wikia aintsutiataknak, Yus akupkamu asamtaí, atumka wína nekasampita turutu asaram, atumin nakitraminamtaisha, tura iruntai jeanmaya jiirmakiar japraminamtaisha, tura atumin katsekraminamtaisha, tura atumi naarin pachisar pasé chichartaminamtaisha warastinuitrume.^h

²³“Junia nungkanmaya pasé aintsu juuntri ainau yaanchuik Yuse chichame etserin ainaun pasé awajiarminia nunisarang atumin pasé awajtaminau asaramtaí, atumsha nayaimpinam Yusnum pujustin asaram, pengker nintimsaram pujustaram. Tura nukap warastaram.

²⁴“Antsu kuikiartin ainautirmin wait anentajrume. Yamaikikia nakurayatrume, ukunmaka wait wajaktinuitrume.

²⁵“Yamaikikia pengké yuumatsuk pujajai tu nintimiatrumek, ukunmaka yuumaktinuitrume. Tumaktin asakrumin wait anentajrume.

“Yamaikikia wishiyatrume, ukunmaka wake mesekrum juutinuitrume. Tumaktin asakrumin wait anentajrume.

²⁶“Yaanchuik nangkamiar: Wikia Yuse chichame etsernuitjai tinu ainaunka waitrau waininayat pengker awajarmiayi. Yamaisha nunisarang aints ainausha mash atumin pachitnasar pengker chichartaminamtaikia, atumsha wainkataram tajarme,” Jesús timiayi.

Ii nemase aneetnuitji timiauri

(*Mat. 5.38-48; 7.12*)

²⁷Nunia Jesús ataksha chichaak: “Wína chichamur anturtakrum pujautirmin nunasha tajarme: Atumi

nemase aneetaram. Tura atumin nakitraminamtaisha pengker awajsataram.

²⁸Tura atumin pasé chichartaminamtaisha: Yus yainmakti titaram. Tura atumin katsekraminamtaisha, nu aints pachisrum: Yus yaingti tusaram seattiararam. ²⁹Antsu atumi yapiin awataminamtaisha atumka kajertsuk: Atuninisha awaturta tusaram tsangkatkataram. Tura atumi wejmakrin jurutramataikia, atumi punchurisha jukiti tusaram tsangkatkataram.ⁱ

³⁰“Aints ni yuumak seatminamtaisha awangturkita tutsuk susataram. ³¹Aints wína pengker awajtusat tusaram wakerau asaram, atumsha nunisrumek chikich aints ainausha pengker awajsataram.^j

³²“Tura atumin pengker awajtaminau nuke aneakrumka, nekasrum pengker aa nuka turatsrume. Pasé aints ainausha nunisarang niin pengker awajina nunak aneenawai. ³³Tura atumin pengker awajtaminau nuke pengker awajkurmeka, nekasrum pengkerka nintimtsurme. Pasé aints ainausha nunisarang niin pengker awajina nunak pengker awajinawai. ³⁴Tura nu ikiatsata turaminamtaisha, ataksha awangturkitatuapi tu nintimtsurum suakrumka, nekasrum pengkerka nintimtsurme. Pasé aints ainausha nunisarang: Awangturkita tusar, chikich pasé ainauncha sunain ainawai. ³⁵Yus nekas anengkratchau ainaun, tura pasé aints ainauncha mash wait anentau asamtaí, atumi nemase ainausha aneetaram tura pengker awajsataram. Tura ikiatsata turaminamtaisha: Nekas awangturkitatuapi tuuka nintimtsuk susataram. Turakrunningkia Yus atumnasha pengker awajtamsatnuitrume. Tura Yus nekas yakí puja nuna uchiri atinuitrume. ³⁶Atumi Apaachiri Yus aints ainaun mash wait anentawa

nunisrumek atumsha chikich ainausha wait anentrataram,” Jesús timiayi.

**Chikich aints pachisrum
aujmatkairap timiauri**

(Mat. 7.1-5)

³⁷Nunia ataksha Jesús chichaak:

“Yus winaka wait wajaktiniun surusai tusaram, chikich ainau pachisrum paseetai tiirap. Tura Yus winasha jinum akuptukai tusaram, chikich aintcha pachisrum: Nu aintsun Yus jinum akupkati tiirap. Antsu tsangkurataram.

Turakrumningkia Yuscha nunisang atumnasha tsangkutramatnuitrume.^k

³⁸“Chikich ainau yuumamurisha susataram. Turakrumningkia Yuska atum yuumamuncha suramsatatrume. Atumka chikich ainaun surittsuk suwakrum pengker nekapmarum, tura nuna nangkamasang nukap ati tusaram, aintsu pitakrin chumpiraram shitaram, nunia ataksha chumpiraram, aints ainau suarme nunisang Yuska atum yuumakrumnisha turutmatnuitrume,” Jesús timiayi.

³⁹Nunia ataksha chikich nuikiartutai chichaman nuiniak:

“¿Aints wainmichu chikich wainmichun jintanam wekaasati tusar wekaastinkai? ¿Mai metek waanam ayarcharaintak?^l ⁴⁰Nuimiausha ni nuiniamurin nangkamaskeka achatnuitai. Antsu niisha nukap nuimiar ni nuiniamurijai metek nekaamnawaitai.^m

⁴¹“Tura atumi tunaari nukap aa nu nintimtsuk pujakrumka, chikich aintsu tunaari jumchik aa nu wainiatrumek çitiur nusha pachisrum chichastarmek? Chikicha tunaari pachisrum chichaa-krumka, aints chikich aintsu jiiin tsetsee tuupich engketu wainiatrum paan wainua tumawaitrume. Antsu aints ni jiiin tsetsee juun engketunka wainchawa

tumawaitrume. ⁴²Tsetsee juun atumi jiiin engketu wainchayatrumek, atumi yachí chicharkuram: ‘Yatsuru, tsetsee jiiimin engketun ashiirtajme, wait aneamam tsangkamkata’ çitiur nusha titarmek? Anangkartin ainautiram, nuwá eemkaram atumi jii tsetsee juun engketua nunisrumek atumi tunaaringkia japaram, nuniangka paan jiiimua nunisrumek chikich aintsun ni tunaaringkia pachisrum chichastinuitrume,” Jesús timiayi.

**Numi nere jiiisrum pengkerashi tusaram
nekaamnawaitrume timiauri**

(Mat. 7.17-20;12.34-35)

⁴³⁻⁴⁴Nunia Jesús tuke nuikiartak: “Ju nungkanmaya ainau numi neren jiiisar, çwarí numita? tusar nekainawai. Numi jangkirtin amataikia, higuera nerenka juwinatsui. Tura narajnumiangka uva nerenka juwinatsui. Tura asamtai numi pengker ainauka napchaunaka nereenatsui. Tura numi napchau ainauka pengkernaka nereenatsui. ⁴⁵Aints ainausha nunisarang ainawai: Pengke nintintin ainauka pengker aa nuna chichainawai. Tura pasé nintintin ainauka pasé aa nuna chichainawai. Nekas paan nekaamnawaitai: Aints warina nintimias pujawa nuka ni nintin piatkamu asa, nunaka pachitsuk chichawai,” Jesús timiayi.

Jeja jimiar jeamkamun pachis etserkamu
(Mat. 7.24-27)

⁴⁶Nunia Jesús ataksha chichaak: “Wi taja nuka umiachiatrumsha çwaruka Apurua Apurua turutrume? ⁴⁷Aints wini wininauka wina chichamrun antinak, tura umirtinak pujuinauka çya aintsua tumawaita? tusan nekamtikiatjarme. ⁴⁸Nu aintska nungka pisunam jea jeamka-

mua tumawaitai. Tura nukap taimu asamtai, entsa nukap nujangkrak, nujang nukap ukatmaitiat, nungka pisu amanum jea jeamkamua asamtai, yumpungatkama tujinkatnuitai. ⁴⁹Antsu chikich aints wína chichamrun anturtukiat umirtutsuk pujakka, aints yaikminam patatek jea jeamkamua tumawaitai. Tura asamtai entsa nukap nujangkrak, nujang nukap ukatam, jea pukuktinuitai, tura tuke iwiarachmin atinuitai,” Jesús timiayi.

Suntara apuri inatiri tsuwaramuri
(*Mat. 8.5-13*)

7 ¹Jesús aints ainaun nuiniar umis ukuki Capernaum yaktanam wemiayi. ²Nuni Romanmaya kapitán pujumiayi. Nuna inatiri jatanak wajas tepemiayi. Nuka nekas ni aneetiri inatiri ayayi. ³Turamtai Jesúsán pachisar chichainaun antuk, kapitán judío juuntri ainaun chicharak:

—Jesúsnum werum: Kapitani inatiri jaawai. Tura wait aneas, inatirun tsuwatriti tawai titaram, —tusa akupkamiayi. ⁴⁻⁵Tamati Jesúsán weriar nukap seainak:

—Nu kapitanka chikich nungkanmayaintiat, ii ainautinka pengker nintimturmajai. Tura asa ii iruntai jearin jeartamkamiayi. Tura asamtai ni inatiri jaak tepa nu tsuwaram ukuita, —tiarmiayi.

⁶Tinamtai Jesús: Ayu tusa nijai wemiayi. Tura jeansam jeatasar weenamtai, kapitán ni amikri ainaun akatar: “Nijai ingkiunikrum tu titaram,” tusa akupkamiayi. Tura akupkamua asar, Jesúsán chicharinak: “Apuru, tsangukururta. Kapitán chichaman akupturmak: Wikia judíocho asan, jearun wayaata tichamin nintimjai. ⁷Tura wikia mianchau asan amin jiistatkaman natsaamajai. Tura wainiatum wína inatir pachisam: Pengker wajasti takumningkia

nuka pengker wajastatui. ⁸Wikia nekasununtara apuri umirnitjai. Tura suntar ainaun inau asan, kichan weta tama nusha weenawai. Tura kichan winita tama nusha wininawai. Tura wi inatirun takatan inam, nusha miatrusarang umirtinawai. Tura amesha nunismek Apu asam juni wajasam chichaamning inatir tsaartatui tawai titaram,” Jesúsán tiarmiayi.

⁹Tinamtai Jesús nuna antuk nu aintsu chichamen nintimias niin nemarinaun chicharak:

—Nekasan tajarme: Juni Israela nungkarin pujuinauka nu aintsu nunisarang: Yus tujinkachuitai tinaunaka kichkisha wainkachuitjai, —timiayi.

¹⁰Tamati kapitán akupkamua ainaun ni jeen wakеткиar, kapitani inatiri yanchuk pengker wajasun wainkarmiayi.

Waje uchiri jakau inantukmiauri

¹¹Jumchik arus Jesús ni nuiniatiri ainaujai, tura chikich aints untsuri ainaujai tsaniasar chikich yaktanam Naín tutainum wearmiayi.

¹²Tura nu yaktanam jeatak wajasar, aints jakaun iwiarsartas weenaun wainkarmiayi. Nu jakau nukuringkia wajeyayi. Tura uchirisha jakamia nukeyayi. Turamtai jakaun iwiarsatai tusar, nu yaktanmaya ainau untsuri nemarsarmiayi. ¹³Turinamtai Jesús nu wajenka wainak wait anentar:

—Juutip, —timiayi.

¹⁴Tura jakau engkermaun antiamtai, jakaun nanaakinauka wajasarmiayi. Nunia jakaun chicharak:

—Natsachi, nantakta tajame, —timiayi.

¹⁵Tama niisha nantaki pujus chichasmiayi. Tura nantaki chichaamtai, Jesús nukurin chicharak: “Uchiram jukita,” timiayi. ¹⁶Jesús nuna tamati, nuna wainkaru ainauka mash shamkarmiayi. Tura Yus juuntaitai tusar chichainak:

—Yuse chichame etserin nekas juun wantinturmakji. Tura Yus ni aintsri

ainautin yainmaktas ju aintsun akuptur-makji, —tiarmiayi.

¹⁷Tura Judea nungkanmaya ainausha, tura nuna nangkamasarang timiá arák pujuinausha Jesúsá turamurin mash nekaawarmiayi.

**Imiakratin Juan chicham
nekaataram tusa akupkamuri
(Mat. 11.2-19)**

¹⁸Juanku nuiniatiri ainou Jesús aints jakau inankimun antukaru asar Juanna-sha ujakarmiayi. Tura ujakam nusha antuk ni nuiniatirin jimieran untsuk: ¹⁹Atumka Jesúsnum werum chichaakrum: ¿Yus uwemtikartinun akupkatnuitjai tímia nuka amekitam? ¿Amechuitkumningkia chikichash nakastaj? tu iniastaram, tusa akupkamiayi. ²⁰Tura akupkam niisha Jesúsán weriar, nuni jeariar chicharinak:

—Imiakratin Juan iin akatamar: ¿Yus uwemtikartinun akupkatnuitjai tímia nuka amekitam? ¿Amechuitkumningkia chikichash nakastaj? tu iniastaram tusa akuptamkaji. Nu nekaatar wakeraji, —tiarmiayi.

²¹Juanku nuiniatiri ainou nuni jearai, Jesús jau ainauncha tura najaiminak pujuinauncha untsuri tsuwarniayi. Iwianchrin ainoucha iwianchrin jiriki akupkamiayi. Tura wainmichu ainauncha untsuri wainmamtikiamiayi. ²²Tura asa Juanku nuiniatirin Jesús chicharak:

—Waketkiram atum wainkarume tura antukurme nuka Juan mash ujaktaram. Tura ujaakrum wainmichu ainou paan ataksha wainminawai, tura wekaichau ainausha ataksha wekainawai, tura kuchaprintin ainausha tsaarar pengker wajainawai, tura antichu ainausha paan antinawai, tura jakau ainausha ataksha nantakiar iwiaaku pujuinawai, tura

mianchau ainauncha Yusnum uwemratin chichaman ujaawai titaram. ²³Aints wína turamurun wainkar, tuke inaitsuk nekasampita turutin ainou nekasar warasartinitai, tawai tusaram Juan ujaktaram, —timiayi.

²⁴Tama Juanku nuiniatiri waketkiram-tai, Jesús nuni juwakuu ainaun Juankun pachis nuikiartutan nangkamamiayi. Tura nuikiartak:

—Aints atsamunam Juan wainkatarum ¿waruka wemiarume? Karis nase umpuam mai we, mai we waja nunisang ¿aints tu pujau wainkatarumek wemiarum? Atsa. ²⁵Turachkurmesha ¿aints wejmakan akikian entsaru wainkatarumek wemiarum? Atsa. Antsu wejmakan timiá shiirman akikian entsarinou apu jeen pujuinawai. Atumsha nuka nekarme. ²⁶Tura ¿wari wainkatarumea wemiarume? Nekasrum Yuse chichame etserin wainkatarum wemiarume. Tura Juan wainkar, chikich Yuse chichame etserin ainou nangkamasang péngke aints wainkamiarume. ²⁷Juankun pachis yaanchuik Yuse chichame etserin aarmia nuka nuwaitai: ‘Nintimrataram. Yus Mesíasan chicharak: Ame weatsmining jintimin iwiarati tusan, wína akupamurun eemkan akupajai timiayi,’ tu aarmawaitai.ⁿ

²⁸Nekasan tajarme: Yuse chichamen etserin ju nungkanam puju armia nuka kichkisha Juankun nangkamaska pengké atumiayi. Antsu yamaikia Yuse umirin mianchau ainausha wi turatnun wainkar-tin asar, Juankun nangkamasarang nuwá eemkar Yuse pujujirin jearin ainawai tajarme.

²⁹Tura Juanku chichamen antukaru ainou, kuikian ju ainausha, tura chikich aints ainausha imiakratin Juan imiaimu asar, mash Yus nekas pengkeraitai

tiarmiayi. ³⁰Antsu fariseo ainausha, tura Moisésa chichame nuikiartint ainausha Juan imiaichmau asar, Yus niin pengker awajsatas wakerinamaitiat pachischarmiayi, —Jesús timiayi.^o

³¹Tura Juanku chichamen pachischaru asaramtai, Jesús nu aints ainaun chicharak: “Junia aints ainau, itiur nintiminawa nuna nekamtikiatjarme.

³²Junia aints ainau uchua nunisarang nintiminawai. Uchi ainau ni amikrijai nakurusmi tusar aints aanum iruntramunam chicharnainak: ‘Iikia nangukwach umpuarnisha ¿waruka yaamturme? tunainawai. Tura nangkamir nakurusmi tusar, aints jakamunam nampearnisha ¿waruka juuttsurme? Uchi tu nintimina nunisrumek pujarme. ³³Juan taa, pangnaka yutsuk, tura vinoncha umutsuk pujamtai, atumka ni chichame antut nakitau asaram: Iwianchrinuitai tarume.

³⁴Tura wikia Yus akupkamutiatnak, chikich aintsua nunisnak yutancha pachitsuk yuwan, tura umutnasha pachitsuk umin asamtai, wina nakitrin asaram, wina pachitsaram: Ushuitai tura nampewitai turutrume, tura tunaarintin ainau amikrintai, tura kuikia juu ainau amikrintai turutrume. ³⁵Tura waininayat Yusen umirin ainau Yuse nekamtairin jukin asar ¿warukaya nunasha tinawa? tusar nekainawai, —Jesús timiayi.

Fariseo Jesúsán: Yuwita tusa untsukmauri

³⁶Fariseo aints yuwita tusa untsukmau asa, Jesús fariseo jeen waya, misanam yuwataj tusa keemsamiayi. ³⁷Tura yuwak pujai, nu yaktanmaya tunau nuwa: Jesús fariseo jeen yuwatas weyi tamaun antuk, kungkuti muti alabastro tutainum engkea takus fariseo jeen wayaamiayi. ³⁸Tura waya, ni tunaarin nintimias juutkamai-kiak Jesúsá nawenini pujuras, nawen ni

neaikirijai nijaramiayi. Nunia intashijai nawen japiramiayi. Tura Jesúsán timiá aneau asa, nawen mejeas kungkutijai ukatramiayi.^p

³⁹Turamtai fariseo aints Jesúsán yuwita tusa untsukmia nu nuwa turamurin wainak ningki nintimias: Juka nekas Yuse chichame etsernuitkungka ¿ju nuwa ni nawen takaa nuna warí nuwaki? tusa nekaawaintai. ¿Juka nekas tunau nuwachukai? tu nintimramiayi. ⁴⁰Tu nintimias pujamtai, Jesús ni nintimaurin nekau asa chicharak:

—Simónka, amin chichaman titasan wakerajme, —Jesús tama niisha ayaak:

—Ayu turuttia, nuikiartinu, —timiayi.

⁴¹Tama Jesús chicharak:

—Jimia aints kuikian ikiamsar tumashmawarmiayi. Kichik cinco pachak (50) kuikian tumashmamiayi. Chikitcha aya cincuenta (50) kuikian tumashmamiayi.

⁴²Tura akiimiaktin kinta jeamtai, mai metek akiimiakartatkamawar tujinkarmiayi. Turinamtai kuikian ikiasu nu aintsu tumashrin mai metek nangkami sakarti tusa inaisamiayi. Tura asamtai ¿amesha nu aints jimiar pachismesha itiur nintimme? ¿Nu jimia aints tumashmawaru ainau mai metek tumashnum akirkairap timiau asar, tu aintsna nekas timiá anea? —timiayi.

⁴³Tu iniam Simón aimiak:

—¿Kuikian nukap tumashmamia nuchawashi? —timiayi. Tamati Jesús ayaak:

—Nekasam tame, —timiayi.

⁴⁴Tura nu nuwan jiis Jesús Simónkan ataksha chicharak:

—Wi ami jeemin wayaamtai, ii jeakrin tuke turina nunismek nawer nijartinka yaratruckhamame. ¿Antsu ju nuwa turamuka waintsumek? Juka nawerun ni neaikirijai nijatruri, tura ni intashijai

gapitruri. ⁴⁵Wi jeemin wayaamtai, ameka pengker awajtustasmeka mejentsachmame. Antsu ju nuwaka nawerun tuke inaitsuk mejentrusi.

⁴⁶Wi jeemin wayaamtai, pengker awajtustasmeka olivo macharijaingkia muukruka ukatrurchamame. Antsu juka nawerun kungkutijai ukatruri. ⁴⁷Ju turutau asamtai tajame: Juka wina nukap anentu asamtai, ni tunaari nekas nukap aa nuka mash tsangkuramuitai. Antsu tunaar jumchik awai ta nuna tunaari jumchik tsangkuramu asa, nuka Yusen jumchik aneawai, —Jesús Simónkan timiayi.

⁴⁸Nuniangka nuwan chicharak:

—Ami tunaarumka mash tsangkura-muitme, —timiayi.

⁴⁹Tamati Jesúsjai tsaniasar yuwarmia nuka nintimsar:

—¿Jusha ya asa, aints ainau tunaarin tsangkuratnuita? —tunaiyarmiayi.

⁵⁰Nuna tinamtai Jesús nuwan chicharak:

—Ame wina uwemtikrurtinuitme, tu nintimturu asam uwemrawaitme. Pengker nintimsam weta, —timiayi.

Nuwa ainau Jesúsán yaingmauri

8 ¹Nunia Jesús ni nuiniatiri doce amia nujai untsuri yakat ainamunam wekaakamaikiak Jesús Yusnum uwemratin chichaman etserak: Aints ainau Yusen tu umirkartinuitai tusa etserki wekaimiayi. ²Turamtai nuwa ainausha Jesúsán nemariarmiayi. Nu nuwa ainausha Jesús yaanchuik tsuwarmau asar, chikich iwianchrintin pujuutiat iwianchrin jiirkir akuptukmau asar, Jesúsán nemariarmiayi. Magdalanmaya Marísha iwianchrin siete (7) jiirkimia nusha Jesúsjai tsanias wekaimiayi.

³Chikitcha Cuza nuwari Juana naartinu-

yayi. Nu Cuzaka apu Herodesa jeen wainuyayi. Chikich nuwa Susana naartinuyayi. Chikich nuwa ainausha untsuri ni kuikiarijai Jesúsá yuumamurinchá, tura ni nuiniatiri yuumamurinchá sumarkar yaingkiarmiayi.⁴

Arak pachisar nuikiartamu

(Mat. 13.1-9; Marc. 4.1-9)

⁴Untsuri yaktanmaya ainau Jesúsán jiiisartas kautkarmiayi. Tura kautkaram, nuikiartutai chichamjai etsermiayi, tura etserak: ⁵“Anturtuktaram. Aints arakan tsaamratas wemiayi. Tura tsaamam, araka jingkiaji jintanam kakeekamiayi. Tura jintanam kakeekau asamtai, aints ainau jintanam wekajinak arakan najararmiayi. Tura chingki ainau yakiya kautkarmiayi. Tura jingkiaji yuwaarmiayi. ⁶Chikich jingkiajisha kaya irunmaunum kakeekamiayi. Tura tsapaiyat nungka mujukash asamtai kaarmiayi. ⁷Chikich jingkiajisha jangkinam kakeekamiayi. Tura jingkiajisha jangkijai mai metek tsapain asar pempearam jakamiayi. ⁸Tura chikich jingkiajisha nungka pengkernum kakeekamiayi. Tura tsapai jingkiaji kichkitiat cien (100) nerekamiayi,” Jesús timiayi.

Tura ataksha kakar chichaak: “Aints ainautiram, ju chicham antukrum nintimrataram,” timiayi.

¿Jesús waruka nuikiartamun etserkamia?

(Mat. 13.10-17; Marc. 4.10-12)

⁹Tamati ni nuiniatiri ainau Jesúsán iniinak: “¿Ju nuikiartamu tame nusha warí pachismeá tame?” tiarmiayi. ¹⁰Tu tinam Jesús aimiak: “Yus aints ainaun itiu inawa tusan, chikich aints ainau paan nekaachmin wainiatrum, atumka paan nekamtikiamuitrume. Antsu chikich aints ainau wina chichamrun antutan

nakitinau asar, ni jiijaingkia paan waininayat, wainmichua nunisarang wajasarti tusan, tura antutnasha antinayat, nekaawartatkamawar tujinkarti tusan, aya nuikiartutai chichaman ujainajai,” Jesús timiayi.^r

Arak tsaamramun taja nunaka takun tajari tusa etserkamuri
(*Mat. 13.18-23; Marc. 4.13-20*)

¹¹Nunia ataksha etserak: “Wi árak tsaamramu taja nuka takuampi tawa tusaram nekaataram. Arakan taja nuka Yuse chichamen takun tajari. ¹²Tura árak jintanam kakeekamia nu jintaka aintsu nintiya nunisketai. Nu aints ainau chichaman antukar Yus nekasampita tiarai tusa, tura uwemrarai tusa, Satanás nu chichaman nintinian jurawai. ¹³Tura arak kayanam kakeekamiayi taja nuka chikich aintsu nintiya nunisarang ainawai. Chikich aints ainau Yuse chichamen pengker antukar, nekasampita tusar warainawai. Antsu iturkachmin amataikia, Yuse chichamen umirtan inainawai. Tura asar árak kayanam kakeekamia nuka kangkape atsau asamtai, wári jaawa nunisarang nintiminawai. ¹⁴Tura arak jangkinam kakeekamiayi taja nuka chikich aintsu nintiya nunisarang ainawai. Nu aints ainauka Yuse chichamenka paan antinayat, ju nungkanmaya ainau nintimina nunisarang nintiminawai. Tura kuikian nukap wakerinak, tura nakurutan tuke nintiminak Yuse chichamenka nintimsuk pujuinawai. Tura asar árak jangkinam kakeekamia nunisarang ainawai. Jangkinam árak kakeekauka nerekchamin ainawai. ¹⁵Tura árak péngke nungkanam kakeekamia nuka chikich aintsu nintiya nunisarang

ainawai. Nu aints ainauka nekasar pengke nintintin asar, Yuse chichamen antukar nintin ukuinawai, tura tuke inaitsuk miatrusarang umirinawai. Tura asar cien (100) nerekua nunisarang ainawai,” Jesús timiayi.

Kantiin keemakmaun pachis nuikiartamu
(*Marc. 4.21-25*)

¹⁶Nunia chikich nuikiartamun Jesús etserak: “Aints kichkisha kantiin keemak nukukchatnuitai. Tura peaka wamketinka puusashtinuitai. Antsu aints jeanam waiina nuka paan wainkarat tusa yakí kentsatnuitai. ¹⁷Tura yamai uukmau aa nunaka ukunam mash paan inakmastinuitai, tura yamai nekaachmin ainia nunaka ukunam mash paan nekawartinuitai.^s

¹⁸“Yuse chichamen nekas pengker nintiminak pujuinaunka Yuska nuna nangkamasang paan nekamtikiatnuitai. Antsu Yuse chichamen nintimtachunka ni antukmaurin kajinmamtikui. Tura asamtai nekasrum pengker antuktaram,” Jesús timiayi.^t

Jesús nukuri ni yachí ainaujai tarimuri
(*Mat. 12.46-50; Marc. 3.31-35*)

¹⁹Jesús nuna tusa nuikiartak pujai, ni nukuri ni yachí ainaujai taarmiayi. Tura aints timiá untsuri Jesúsnum iruntrarur asaramtai, Jesúsán jiiisartatkamawar tujinkarmiayi. ²⁰Tura asaramtai Jesúsán ujainak:

—Nukuram yachim ainaujai aanum wajasar, amin jiiimasartas wakerutminawai, —tiarmiayi. ²¹Tinamaitiat Jesús chicharak:

—Aints Yuse chichamen antukar umirinak pujuinauka wína nukur tura wína yatsur tura wína umaar ainawai, —timiayi.

r 8.10 (Isa. 6.9-10) **s 8.17** (Mat. 5.15-16; Marc. 4.21-23; Luc. 11.33)
t 8.18 (Mat. 13.12;25.29; Luc. 19.26)

Kucha tamparaun miaku awajsamuri*(Mat. 8.23-27; Marc. 4.35-41)*

²²Chikich kintiati Jesús ni nuiniatiri ainaujai kanunam engkemawar:

—Atumajin katingtai, —timiayi.

Tamati ayu tusar katiniarmiayi. ²³Tura katinai Jesúska kanunam kanur tepemiayi. Turamtai aneachmau nase kakar nasenmatai, yumi kanunam yaranak ukantanak wajasmiai.

²⁴Tumamtai Jesúsán shintinak:

—Apurua, apurua, ukantatji, —tiarmiayi.

Tinamtai Jesús nantaki, nasencha tura kuchancha chicharkamiayi. Ni chichaamtai nasesha majaanmiayi. Nunia kuchasha miaaku wajasmiai. ²⁵Turamtai ni nuiniatiri ainaun chicharak:

—¿Waruka winaka timiá nintimtur-surme? —timiayi.

Tamati niisha shamkar nukap nintimrar:

—¿Ausha warí aints asamtaiya nasesha, tura tampaasha umirinawa? —tunaiyar-miai.

Iwianch jiikir kuchinam engkemamuri*(Mat. 8.28-34; Marc. 5.1-20)*

²⁶Nunia Galilea nungka tumajin katingkiar, Gerasa nungkanam nujamkarmiayi. ²⁷Tura nujamkaramtai Jesús kanunmaya jiinai, nu yaktanmaya aints tarimiayi. Nu aintska nukap musach iwianchrintin pujuyayi. Tura misu pujus, jeanmaka pujutsuk aints jakau iwiartainum pujuyayi. ²⁸⁻²⁹Iwianch nu aintsun ataksha ataksha achik nepetnuyayi. Tura asamtai uwejencha, tura nawencha jirujai jingkiamaityat, niisha jiruncha tsuriau asamtai, metawartatkamawar tujinkarmiayi. Turinamtai iwianch nu aintsun jukiari, aints atsamunam umaarmiayi. Tura asamtai Jesús nu aintsun wainak, iwianch nu aintsu namangken engkem-tuau ainaun chicharak:

—Jiinkiram ju aintska ukuktiamar, —timiayi. Tamati nu aintska Jesúsán tikishmatar kakar chicharak:

—Jesúsa, Yus yakí puja nuna uchiriya ¿warukaya winasha tarutnime? Wait aneamas winaka waitkaip, —timiayi.

³⁰Tamati Jesús iniak:

—¿Amesha yaachitme? —tu iniam iwianch untsuri ni namangken engkem-tuau asar aiminak:

—Ii naaringkia untsurintai, —tiarmiayi.

³¹Tura iwianch ainau Jesúsán seainak:

—Juun waanmaka akupkartukaip, —tiarmiayi. ³²Nu muranmasha kuchi untsuri shushungminak wajainau asaram-tai, iwianch ainau Jesúsán seainak:

—Au kuchinam engkematararam tusam akupkartukta, —tiarmiayi. Tu seainam Jesúska ayu tusa tsangkatkamiayi.

³³Turamtai iwianch ainau nu aintsnumia jiinkiar, kuchinam engkemawaramtai, kuchi ainau wakenam mash pisarar, kuchanam ayangkar kijiakar kajingkiarmiayi.

³⁴Tuminamtai kuchi wainin nuna wainkar ampukiari yaktanam pujuinauncha, tura ajanam pujuinauncha kuchi turunamuncha etserkarmiayi. ³⁵Tura etserinamtai aints untsuri nu yaktanmaya jiinkiar: Jiimi tusar Jesúsnum jear, aints nuwik iwianchrintin pujuya nu pengker wajas wejmakan entsar, pengker nintimias Jesúsá nawenini pujaun wainkar shamkarmiayi. ³⁶Tura nuwik iwianchrintin pujuya nuna pengker pujaun wainkaru asar, yamai taaruncha ujakarmiayi. ³⁷Tu ujakaram Gerasa nungkanmaya aints kaunkarmia nusha mash nukap shamkar Jesúsán seainak:

—Wait aneamas ii nungkarinia jiinkim weta, —tiarmiayi. Tu tinam Jesús ayu tusa wetas kanunam engkemamiayi. ³⁸Turamtai nuwik iwianchrintin pujuya nuka pengker wajasu asa Jesúsán chicharak: Wisha winitjai tu iniamaitiat Jesús chicharak:

³⁹—Atsa, antsu jeemin waketkim, Yus amin nekas pengker awajtamsau asamtai, mash aints ainau ujakarta, —timiayi.

Tama: Ayu tusa waketki, Jesús niin pengker awajsamurin nu yaktanmaya ainaun mash ujakmiayi.

**Jairo nawantri inankimuri,
tura chikich nuwasha tsuwarmauri**
(*Mat. 9.18-26; Marc. 5.21-43*)

⁴⁰Jesús katiamtai Galileanmaya ainau mash: Ni tati tusar nakainau asar, niin wainkar warasarmiayi. ⁴¹⁻⁴²Turai iruntai jea wainu apuri Jairo naartin tamiayi. Ni nawantri kichik doce (12) musachrintin amia nuka jatanak wajasamtai, nuka tari Jesús wajamunam tikishmatar:

—Wait aneasam wína jearun winita, —timiayi.

Tamati Jesús: Ayu tusa weai, aints untsuri nemarkar niin teawarmiayi.

⁴³Nu aints ainamunam nuwa doce (12) musach numpun nangkantsuk numpamia nusha pachinkamiayi. Nuka tswakrat-nun untsuri jiiutiati, kuikiarin mash amuaksha tswamichuyayi. ⁴⁴Tura tuntupenini tari, Jesús a wejmakri ninukmaurin antingmiayi. Tura anting numpamurinka nangkankamiayi.

⁴⁵Turamtai Jesús inintrak:

—¿Yáki wína antinkama? —timiayi.

Tu iniamaitiat mash:

—Pengké antingchajme, —tinamtai Pedro chicharak:

—Nuikiartinu, amin aints timiá untsuri etenmawaru asar ¿yáki amincha antinmakma? nuka pengké nekaachminuitai, —timiayi.

⁴⁶Tamati Jesús ayaak:

—Atsa, nekas wína kichik antinkau asamtai, wína kakarmarjai tswarjai tusan nekajai, —timiayi.

⁴⁷Tama nu nuwasha: Nekarayapi tusa kurangki tari, Jesús wajamunam tikishmatramiayi. Tura aints mash

antinamunam warukang antingma tura itiurak pengker wajasma tusa ujakmiayi.

⁴⁸Tu ujaam Jesús chicharak:

—Nawantru, wína nekasampita turutu asam, nekasam pengker wajasume. Pengker nintimsam yamaikia weta, —timiayi.

⁴⁹Tu chichaak wajai, Jairo aintsri ni jeenia tari apurin chicharak:

—Nawantrumka yanchuk jakayi. Nuikiartin nemarkini awajip, —timiayi.

⁵⁰Tamati Jesús nuna antuk chicharak:

—Shamkaip, antsu nekasampita tusam, wína nintimtursata. Turakminka nawantrumka pengker wajastatui, —timiayi.

⁵¹Tura jeanam jear, Jesús untsuri aints ainau jeanam wayaawartas wakerinaiu wainiat, aya Pedron, nunia Santiagoncha, nunia Juannasha, nunia nuwachi aparincha, nunia nukurincha wayaawarti tusa tsangkatkamiayi. ⁵²Tura jeanam wayaawar, untsuri juutkamaikiak untsuminaun wainkarmiayi. Tura Jesús nu aints ainaun wainak chicharak: —Juutsuk asataram. Nu nuwachikia jakachi antsu kanuri, —timiayi.

⁵³Tau wainiat nuwawach nekas jakau asamtai, nuna nekawaruka: ¿Warukakung taj? tusar wishikiarmiayi. ⁵⁴Turinamaitiat Jesús jakau uwejen achik kakar chicharak: —Nawantru nantaktia, —timiayi.

⁵⁵Tama ni wakani ataksha engkemtuamu asa, niisha jakayat ataksha nantakmiayi. Nantakiamtai Jesús: Ayuratararam timiayi.

⁵⁶Jairo nawantri jakayat nantakiamtai, ni aparisha tura ni nukurisha nukap nintimramtai, Jesús chicharak:

—Ju aitkamuka aints kichkisha pengké ujakairap, —timiayi.

**Jesús ni nuiniatiri ainaun
akatar akupkamuri**
(*Mat. 10.5-15; Marc. 6.7-13*)

9¹Chikich kintati Jesús ni nuiniatiri doce (12) amia nuna untsuk wína chichamrujai iwianchrintin ainaun

iwianchrin jiirkiarti, tura jau ainauncha tsuwararti tusa, ni kakarmarin susamiayi.

²Tura Yus aints ainaun tu inawai titaram, tura jau ainausha tsuwartaram tusa akatar akupkamiayi. ³Tura chicharak:

—Jinta wekaakurmesha aintsarmek wetaram. Waisha takutsuk, tura pitakrumsha takutsuk, tura yurumkasha takutsuk, tura kuikiasha takutsuk wekaasataram. Tura wejmakrumsha jimiarka takutsuk wekaasataram. ⁴Tura chikich yaktanam werum aints: Iijai pujusmi tamati, nuni wayaaram nu aintsjai pujustaram. Tura nu yaktanmasha pujusrum, jeanam wayaarmeka nuni tuke kanurtaram. ⁵Tura atumin: Juni wayaawairap tusar suritrami-namtaikia, nu yaktanmayangka jiinkiram ukuktiaram. Tura ukuakrum atumi nawe japimiarum: Ju aints ainaun Yus jiisti tusaram, aints ainau mash nekantikiataram, —tusa Jesús ni nuiniatirin akupak timiayi.^u

⁶Tamati nunia jiinkiar mash yakat ainamunam Yusum uwemratin chichaman etserkiar wearmiayi. Tura jau ainauncha tsuwararmiyai.

Herodes Jesúsán pachis yáki tusa nekaatas wakeramuri
(*Mat. 14.1-12; Marc. 6.14-29*)

⁷Aints ainau Jesúsá turamurin pachisar etserkaru asaramtai, apu Herodes nuna antuk nukap nintimramiyai. Chikich aints ainauka Jesúsán pachisar:

—Juan jakamunmaya nantaki wekaawai, —tiarmiayi. ⁸Chikich ainausha chichainak:

—Elías yaanchuik Yuse chichame etserin pujumia nuka ataksha wantinak wekaawai, —tiarmiayi. Tura chikich ainausha chichainak:

—Atsa, chikich aints Yuse chichame etserin yaanchuik pujumia nuka

jakamunmaya nantaki wekaawai, —tusa pachimian chichaarmiyai.^v

⁹Tu tinamtai Herodes nuna antuk:

—Wikia Juanku muuken akaktaram timiajai. ¿Tura nu aintsun pachisar nukap chichaina nusha yáki? —tu nintimu asa Jesúsán jiistas wakerimiayi.

Jesús cinco warang aintsun yuramuri
(*Mat. 14.13-21; Marc. 6.30-44; Juan 6.1-14*)

¹⁰Nunia Jesús akupkamu ainu ataksha Jesúsnum waketkiar, ni turamurin ujakarmiyai. Tura kaunkaramtai Jesúsá niin mash yaruak, aints atsamunam Betsaida yaktanam arakchichu amanum wearmiayi. ¹¹Turinamtai Jesús nu aints ainaun aujas: Yus aints ainaun tu inawai tusa nuiniarmiyai. Tura jau ainauncha tsuwararmiyai.

¹²Tura tsaa akaamtai, ni nuiniatiri doce (12) irunmia nuka Jesúsán tariar chicharinak:

—Juni aintsu pujutiri aya atsau asamtai, yakat arakchichu amanum aints pujamunam yurumkan sumakarat tusam, tura nuni kanurarat tusam, aints ainau akupkarta, —tiarmiayi. ¹³Tinamtai Jesús ayaak:

—Atumek ni yutairi susataram, —tamati ni nuiniatiri chicharinak:

—Pang iinuka ju uwejchik arutramji. Namaksha jimiarchik arutramji. Antsu iikia yurumak sumatskesha ¿itiurak ju aints ainausha yuratjik? —tiarmiayi.

¹⁴Aishmang cinco warang iruntrarur asaramtai nunaka tiarmiayi. Tinamtai Jesús ni nuiniatiri ainaun chicharak:

—Atumka aints cincuenta, (50) cincuenta (50) kanákrum pujustaram tusaram chichastaram, —timiayi.

¹⁵Tamati ni tímia nunisarang mash pujusarmiyai. ¹⁶Mash pujusaramtai, Jesús pangkan ju uwejchik takus, tura

namaknasha jimiaichik takus, nayaimpinmanini pangkai jiiimias, Yusen maaketai timiayi. Nunia pangkan puuk ni nuniatiri ainaun susam, nusha aints ainaun mash susarmiayi. ¹⁷Tura susaram mash yuwaar tutuararmiayi. Tura yuwaar umisar ampintraun doce (12) changkinan chumpiawarmiayi.

Pedro Jesúsán: Mesíasaitme timiauri

(*Mat. 16.13-19; Marc. 8.27-29*)

¹⁸Chikich kintati aints atsamunam ni nuniatirijai iruntrar pujuinau asar, Jesús Yusen sea umis iniak:

—Aints ainau wína pachitsar ¿wari aintsuita turutinawai? —tu iniasmiayi.

¹⁹Tu iniam aiminak:

—Chikich ainau amin pachitmasar: Imiakratin Juankun maawarmia nuwaashi turaminawai. Tura chikitcha Elíasashi turaminawai. Tura chikitcha Yuse chichame etserin yaanchuik pujumia nuka jakamunmaya nantaki wekaatsuash turaminawai, —tiarmiayi.^w

²⁰Tinamtai Jesús ataksha iniak:

—¿Tura atumsha winasha warintru-trume? —timiayi.

Tu iniam Pedro ayaak:

—Ameke Mesíasaitme. Yus akupka-muitme, —timiayi.

Jesús ni jakatniurin pachis etserkamuri

(*Mat. 16.21-28; Marc. 8.31-9.1*)

²¹Pedro tamati Jesús chicharak:

—Nuka pengké etserkairap, —timiayi.

²²Nunia ataksha chicharak:

—Yus akupkamutiinatnak aints asan, nukap wait wajaktatjai. Wi turamtai judfo juuntri ainau, tura sacerdoté juuntri ainausha, tura Moisésa chichamen nuikiartin ainausha wína nakitrinak mantuwartatui. Tura wainiat-

nak kempatam kinta jakan tepayaton ataksha nantaktatjai, —timiayi.^x

²³Nunia mash aints ainaun chicharak:

—Aints wína nekas umirtuktas wakerakka, ni wakeramurin inais, mianchawaitjai tusa, aints ni krusrin juwawa nunisang ni jakatniurinka shamtsuk kintajai metek wina nemartusti.

²⁴Tura asamtai aints ningki wakerak:

Wikia jakashtatjai tauka jakatnuitai. Antsu aints wína anentak jakatata nuka jakayat tuke iwiaaku pujustinuitai.

²⁵Nintimrataram: Aints ju nungkanam aa nuna mash sumak, pengké yuumatsuk pujayat, ni wakani tuke mengkaakamtakia, ¿itiurak tuke iwiaakusha pujusat?

²⁶Aints wína natsantrinak, tura wína chichamruncha natsantinamtaikia, wi aintsutiinatnak Yus akupkamu asan, wína Apaachiru kakarmarijai winakun, tura ni awemamuri ainaujai paaniunam winakun, wína natsantrurmia nuna pachisan: Nuka wína aintsruchuitai titinuitjai. ²⁷Tura nekasan tajarme: Aints juni wijai tsaniasar pujuinauka, Yus ni kakarmarijai ni aintsri ainaun inartata nunaka jatsuk wainkartinuitai, —Jesús timiayi.^y

Jesúsá yapaijmiamamuri

(*Mat. 17.1-8; Marc. 9.2-8*)

²⁸Nunia chikich semantin Jesús Yusen seatas Pedroncha, nunia Santiagoncha, nunia Juannasha juki muranam wakaarmiayi. ²⁹Tura Jesús Yusen seak wajai, ni yapi aneachmau yapajmiamaa jiitsumir wajasmiai. Ni entsatirisha nunisang nekas puju jiitsumir amiai. ³⁰Turamtai aints jimiar Jesúsán wantintukar nijai chichainaun wainkarmiayi. Nuka Moisésayayi. Tura chikitcha Elíasayayi.

³¹Nusha paaniunam jiitsumir

wajaarmiayi. Tura Jesúsjai chichainak Jerusalénnum ni waitnas jakatniurin pachisar chichaarmiayi. ³²Tuminamtai Pedro ni tsaniakmaurijai kari nepetinam kanuru asar, kuraat shintarar, Jesúsán jimiá aintsjai wajaun wainkarmiayi.

³³Tura nu aints jimiar Jesúsán ukukiar wearantai, Pedro Jesúsán chicharak:

—Nuikiartinu, ii juni pujustincha nekas pengkeraitai. Juni kampatam jeawach jeamkarmi, kichka aminu, nunia kichka Moisésnau, nunia kichka Eliasnau ati, —timiayi.

Antsu ni tímia nunaka tenapka nintimtsuk timiayi. ³⁴Pedro tu chichaak pujai yurangkim mikin wajasmiai. Turamtai shamkarmiayi. ³⁵Tura yurangminmaya chichaun antukarmiayi. Yus chichaak: “Juka wína uchiruitai, wína aneetiruitai. Juka nekasrum anturkataram,” —timiayi.^z

³⁶Yus tamati nu chichaamun antukar umisar, aya Jesúsnaq ningki wajaun wainkarmiayi. Tura ni wainkarmia nunaka aintsnaka kichkincha ujakchar-miayi.

Uchinmaya iwianch jiiikmiauri

(Mat. 17.14-21; Marc. 9.14-29)

³⁷Kashin tsawaarar Jesús ni nuiniatiri ainajai muranmaya taar, unsuri aintsjai ingkunikiarmiayi. ³⁸Nu aintsnumia kichik jiiintuki, Jesúsán kakar chicharak:

—Nuikiartinu, wait aneasam uchir jiiitrusta. Uchirsha juuchikitai. ³⁹Iwianch uchirun engkemtua kakar untsuntiku weawai. Tura wichiptur wajasti tusa tura jangkan sauran kapukja apaati tusa, pasé awajuweawai. Tura pengké akupuwea-tsui. ⁴⁰Turamtai ami nuiniatirmin iwianchrin jiiirkit tusan seamjai. Turamatiat tujinrutkari, —timiayi.

⁴¹Tamati Jesús chicharak:

—Maj, Yus nintimchau asaram, winasha nekasampita turutiaran tusanka ¿warutam musachik atumjaisha pujustaj? Tura tupin nintimrataram tusanka ¿warutam musachik atumniasha nakastaj-rume? Watska, uchiram juni itata, —timiayi.

⁴²Tama uchin itaaramtai, iwianch uchin nungka ujuar, wewerkaja jakramiayi. Turamtai Jesús iwianch kakar chicharkamiayi. Nunia uchin pengker awajas ni aparin awangtukmiayi. ⁴³Turamtai nuna wainkaru ainauka nukap nintimrar: Yuska nekas juuntapita tiarmiayi.

Jesús ni jakatniurin pachis ataksha etserkamuri (Mat. 17.22-23; Marc. 9.30-32)

Aints mash ni turamurin nintimsar pujuinai, Jesús ni nuiniatiri ainaun chicharak:

⁴⁴—Wi tajarme nuka pengker antukrum kajinmatsuk asataram. Wikia Yus akupkamu ayatnak aints asamtai, pasé aints ainamunam surutkartinuitai, —timiayi.

⁴⁵Antsu ni nuiniatiri ainu paan nekaawarai tusa surimkau asamtai, Jesús tímia nuna ¿warinkung taj? tusarka nekaacharmiayi. Tura waringki tuser iniasartatkamawar arantukarmiayi.

Yaachita chikich ainaun nangkamakesha timiari (Mat. 18.1-5; Marc. 9.33-37)

⁴⁶Nunia Jesúsá nuiniatiri ainu mai nuwamtak:

—¿Yaachita chikich ainaun nangkamakesha? —tunaiyarmiayi.^a

⁴⁷Tu tinam Jesús ni nintimaurin nekaru asa, uchin juki nijai tsanias wajas, ⁴⁸ni nuiniatirin chicharak:

—Aints wína anentuka ju uchi ai mianchauchin wainiat pengker awajkungka, winasha nunisang pengker awajtaiwai. Tura wína pengker awajtauka wína akuptukmia nunasha nunisang pengker awajui. Atumek nintimsarmeka: Juka nekas mianchawaitai tarume juka mash aints ainaun nangkamasketai, —Jesús timiayi.^b

**Aints iin nakitramachkungka
iincha yainmaktinuitji**
(*Marc. 9.38-40*)

⁴⁹Tamati Juan Jesúsan chicharak:

—Nuikiartinu, chikich aints amin naarmín pachis iwianchin jiiki akupausha wainkamji. Tura iijai tsanias wekaachu asamtai, iwianch jiikim akupkaip tusar suritkamji, —timiayi.

⁵⁰Tamaitiat Jesús chicharak:

—Antsu suritkairap. Aints iin nakitramachkungka iincha yainmaktinuitji, —timiayi.

Santiagon nunia Juannasha chicharkamuri

⁵¹Jesús nayaimpinam waketkitnuri jeatak wajasamtai, shamtsuk Jerusalénnum wetan wakerimiayi. ⁵²Tura Samaria nungkanam wekaak, ni nuiniatiri ainaun kanurintrin eakarar tusa, yaktanam eemki akupkamiayi. ⁵³Jesús akupkamu waininayat, Samarianmaya aints ainau Jesúsan pachisar: Junia jiinki Jerusalénnum wetatui tusar, nuna nekainau asar: Juningkia kanurchatatrume tusar suritkarmiayi. ⁵⁴Tura suritinam Jesús a nuiniatiri Santiago tura Juansha nuna antukaru asar, Jesúsan iniinak:

—Apuru, ¿Yus jiin nayaimpinmaya akupak, Samarianmaya ainaun amukat tusar seatjiash? —tiarmiayi.

⁵⁵Tu tinam Jesús niin jiis kakar chicharak:

—¿Atumi ninti warukuki tusarmeka nekaamatsrumek? Wikia aintsutiatnak Yus akupkamu asan, aints ainaun mesratanaka tachamiajai. Antsu aints ainaun uwemtikratanan tawitjai, —timiayi.

⁵⁶Nuniangka chikich yaktanam wearimiayi.

**Jesúsan nemartan
wakerinaun chicharkamuri**
(*Mat. 8.19-22*)

⁵⁷Jinta weenai, chikich aints Jesúsan chicharak:

—Apuru, ame tunia wekaasatatme nunisha amin nemarsatasan wakerajme, —timiayi.

⁵⁸Tama Jesús ayaak:

—Kujancham ainau waanam kaninawai. Chingki ainausha pasungminawai. Antsu wikia Yus akupkamutiatnak aints asan, kanurmintruca atsawai. Tura asamtai wijai wekaakmeka wait wajakainme, —timiayi.

⁵⁹Nunia chikich aintsnasha chicharak:

—Nemartusta, —timiayi.

Tamati chicharak:

—Ayu Apuru, turayat wína apar jakamtai, iwiarsan umisan nuniangka aminka nemarsatjame. Nu tsangka-trukta, —timiayi.

⁶⁰Tamati Jesús ayaak:

—Atsa, wína umirtukcharu ainau jakawa nunisarang pujuinau asar, ni weari jakamtai iwiarsarti. Antsu ameka Yus umirkatin warukuita tusam etserkata, —timiayi.

⁶¹Tama nunia chikich aints Jesúsan chicharak:

—Apuru, amin nemarsatasan wakerajme. Tura wína jeurun waketkin, wína aintsur ainaun: Weajai tusan aujsan ukukin, nuniangka amin nemarsatjame, —timiayi.

b 9.48 (Mat. 10.40; Luc. 10.17; Juan 13.20)

⁶²Tamati Jesús ayaak:

—Waaka nungka tsaitin japiinamtai, waakartin nungkan tsaikmaikiak wekaayat, tuntupenini jiiimkungka, nu takatan pengkerka umikchamnawaitai. Tura asamtai aints Yuse chichamen etsertan wakerayat, ni wearin ukukchamin nekapeakka, Yus aints ainaun inawa nuna takatrinka takaschamnawaitai, —timiayi.

**Jesús setenta y dos (72)
aintsun akupkamuri**

10 ¹Nunia Jesús chikich aints setenta y dos (72) niin nemari-naun wainak:

—Mash yakat ainamunam wi wetatja nuni jimiarchik jimiarchik tsaniasrum eemajatarum, —tusa akupkamiayi.

²Tura chicharak:

“Nekasan tajarme: Nu aints ainau trigo yanchuk tsamakua nunisarang ainawai. Tura juuktin kinta jeau waininayat, juukartin jumchik irunua nunisarang Yuse chichamen etserin ainausha jumchik asaramtai, Yus ni chichamen etserin ainaun wári akupkat tusaram Yus seataram.^c

³“Tura atumsha wetaram. Atum uwija uchiriya nunisrumek pujarmin wainiat-nak, wisha aints juun yawaaya nunisarang pujuinamunam akupajrume.^d

⁴Tura kuikiasha takutsuk, tura yutaisha entsatsuk, tura sapatcha takutsuk wetaram. Tura jinta wekaakuram, aints ainaujai aujmatnaisuk asatarum. ⁵Tura jeanam wayaakrum: Ju jeanam pujuinau-tirminka Yus atumin pengker awajtamarti titaram. ⁶Nu takurmin nu jeanam pujuinau pengker nintimsar pujuinamtaikia, nu jeanam pujuinaunaka

Yuska pengker awajsatatu. Antsu nu jeanam pujuinau pengker nintimsuk pujuinamtaikia, Yuska pengkerka awajsashtatu. ⁷Tura jeanam wayaarume nuning kanurtaram. Antsu chikich chikich jeanmaka kanukni wajairap. Tura takakminauka tuke akiktin asaramtai, atumin yutanha suramina nuke yuwatarum. Tura amutincha suramina nuke amurtaram.^e

⁸“Atumka chikich yaktanam jeakrumka, jeentin atumin wayaatarum tusa juraminamtaikia, nu jeanmaya yutan suramina nuke yuwatarum. ⁹Jau ainausha tsuwartaram. Nunia Yus atumin inatmartas wakerawai titaram. ¹⁰Tura chikich yaktanam jeakrumin, atum chicham etsermaun antutan nakitinamtaikia, jinta wajasrum titaram: ¹¹“Chicham ii etserji nu antut nakitau asakrumin, atumi nungkari ii nawen nujata nu japimiarar, atumin japar ukuaji. Antsu Yus atumin inatmartas wakerawai tajirme nu chichamka aneaku ataram,^g tusaram nu yaktanmayangka jiiinkiram ukuktiam.^f

¹²“Tura wait wajaktin kinta jeamtai, yaanchuik Sodoma yaktanam pujuinau tunau asar, nukap wait wajakarmia nuna nangkamasarang nu yaktanam pujuinasha timiá wait wajakartin ainawai tajarme,” Jesús timiayi.^g

**Yusen umirchau ainau
yaktarin pachis etserkamuri
(Mat. 11.20-24)**

¹³Nunia Jesús ataksha chicharak:

“Nu yaktanmaya ainau titaram: Corazín yaktanmaya ainautirmin, Betsaida yaktanmaya ainautirmincha aneartaram tajarme. Atumka nukap wait wajaktinui-trume. Tiro yaktanmaya ainau, tura

c 10.2 (Mat. 9.37-38) d 10.3 (Mat. 10.16) e 10.7 (1.Cor. 9.14; 1.Tim. 5.18)

f 10.11 (Luc. 9.3-5; Hech. 13.51) g 10.12 (Gén. 19.24-28; Mat. 10.15; 11.24; Marc. 6.8-11; Luc. 9.3-5)

Sidón yaktanmaya ainausha Yusen umirchau ainayat, Yuse kakarmarijai wainchati takatan atum wainkamarume nuna wainkachariat nu wainkarkia, yaanchuik ni nintimaurin yapajiawar Yus tunaarun japitrurti tusar, entsatin pushun entsarar, tura muuken yukuujai yukuarar, Yusnum uwemin armiaiyi. ¹⁴Tura atumsha wainchati takat wainkayatrumek, atumi tunaari inait nakitau asaram, tunau ainau jiiistin kinta jeamtai, atumka Tiro yaktanmaya ainausha, tura Sidón yaktanmaya ainausha nangkamasrumek nukap wait wajaktinuitrumek.^h

¹⁵“Capernaum yaktanmaya ainautirmincha wikia tajarme: Atumka anangmamkuram: ‘Iikia nayaimpinam pujustatjiapi,’ ÷tu nintimsarmek pujaram? Antsu atumka jakau matsamtainum mengkakatnuitrumek tajarme, —Jesús timiaiyi.

¹⁶Nunia ni nuiniatirin ataksha chicharak: “Atum wína umirtuku asakrumin, atumin anturtaminauka winasha anturtinawai. Tura atumin nakitraminauka winasha nakittrinawai. Tura wína nakittrinauka wína akuptukuncha nunisarang nakitinawai,” Jesús tu chicharak ni aintsri ainaun akupkamiyai.ⁱ

Setenta y dos (72) aints waketkimuri

¹⁷Nu setenta y dos (72) aints Jesús akupkamu asar, Yuse chichamen etserkar wakеткиar Jesúsnum kaunkar warasar chicharinak:

—Apu, iikia ami naaram pachisar iwianch ainau jiiikir akupamsha iincha umirtamkamji, —tiarmiayi.

¹⁸Tu tinam Jesús chicharak:

—Nekasrum tarume. Wisha nunisnak Satanásan nayaimpinmaya charpia nunisang akaikinun wainkamiyai.^j

¹⁹Tura asan atumi nemase Satanás nepetkataram tusan, atum aneachmau napi nájakrumsha, tura titing nájakrumsha najaimiatsuk pujusmintrum tusan, wína kakarmarun susamjarme. ²⁰Tura wainiatrum iwianch ainau atumin umirtaminamtaisha warasairap. Antsu atumi naari nayaimpinam aarmau asamtai warastaram, —timiaiyi.^k

Jesús waraamuri (Mat. 11.25-27; 13.16-17)

²¹Nuniangka Yuse Wakani Jesús a nintin waramtikmau asa Yusen seak:

—Apaachiru, maaketai tajame. Ameka mash nayaimpinmaya ainau Apurinme. Tura mash nungkanmaya ainau Apurinme. Tura asam aints ningki nintimsar: Wikia nekau aintsuitjai tinauka ju chichaman nekaacharti tusam uukuitme. Antsu uchichia nunisarang nintiminau ju chichaman paan nekaawarti tusam nekamtikiawaitme. Apaachiru, nekasam tu ati tau asakmin maaketai tajame, —timiaiyi.

²²Nunia Yusen sea umis ataksha chichaak:

—Wina Apaachir mash aa nuna wina surusmiyai. Aints kichkisha Yuse Uchiri ititurak a tusarka nekainatsui. Tura wína Apaachir ititurak a tusarsha nunasha nekainatsui. Antsu wikia Yuse Uchiri asan, tu awai tusan, paan nekajai. Tura aints ainaun: Wina Apaachirka tu awai tusan, wi nekamtikiatasan wakeraknaka nekamtikiamnawaitjai, —Jesús timiaiyi.^l

²³⁻²⁴Nunia nu chichaman ujak ukuki, ni nuiniatiri ainaunak chicharak: “Nekasan tajarme: Yaanchuik Yuse chichame etserin ainau, tura apu ainau unsuri atum waintrume nunasha wainkartas wakerinayat wainkacharmiayi. Tura

atum antuwearme nunasha antukartas wakerinayat antukcharmiayi. Tura atumka wi turamu wainkau asaram nekasrum warastinuitrume, —Jesús timiayi.

**Samarianmaya aintsun
pachis nuikiartamuri**

²⁵Nunia Moisésa chichame nuikiartin Jesúsani tari, warintintak tusa, nekapsatas chicharak:

—Nuikiartinu ¿wi pujut nangkankashtinun jukitaj tusancha, warinak turuwaintaj? —timiayi.

²⁶Tu iniam Jesús ayaak:

—Moisésa aarmaurisha ¿warintusa aarmawaita? ¿Nu aukumsha itiuur nintimme? —timiayi.

²⁷Tu iniam Moisésa chichame nuikiartin aimiak:

—Nekas tu aarmawaitai: ‘Yusrum aminu apuram asamtai, nekasam ami nintimjai tuke aneen ata, tura ami kakarmarmijai tuke aneen ata, tura ami nintimaurumjaisha tuke aneen ata. Tura ami namangkem aneame nunismek chikich ainausha aneen ata,’ tu aarmawaitai, —timiayi.

²⁸Tamati Jesús chicharak:

—Pengker aimkame. Nu chicham umirkumka, Yusnum tuke iwiaaku pujustinuitme, —timiayi.^m

²⁹Tama Moisésa chichamen timiatruska umirkachu asa, nu aintska Jesúsani iniak:

—¿Chikich aintcha itiuur aneetnuitji? —timiayi.

³⁰Tu iniam Jesús chicharak:

—Wi nuikiartamu etsermatai, ame anturtukam nekaata. Judío aints Jerusalénnumia jiinki, Jericó yaktanam jeatas jinta weak, kasa aints ainaujaj ingkunik nu aints katsú katsumka ni waririncha, tura entsatirincha mash

atankiarmiayi. Tura jakawa nunisang kajinmakamtai, nu aintsun jinta yantamen japawar ukukiarmiayi.

³¹Turamtai jumchik arus sacerdote nu jinta weak, nu aintsun wainak aya ikiang jiiis ukukmiayi. ³²Nunia jumchik arus sacerdote yaintrisha, Levita tutai, nu jinta weak, nuni aints jinta yantamen tepaun wainkayat, nusha nunisang tupnik nangkaikimiayi. ³³Nunia Samarianmaya aints nu jintak winimiayi. Tura nu aintsun wainak wait anentramiayi.

³⁴Tura olivo macharijai tura vinojai ni charuraurin yakaramiayi. Tura tarachjai penuntramiayi. Tura ni entsamtairin kenas juki, irau kanutinam jea tenap wainkamiayi. ³⁵Kashin tsawaar wetas jeeniun jimia kuikian suwak: ‘Pai, ju aintska pengker waitrukta. Tura ju jeachamtaikia, waketkun ni tumashrinka akiimiaktatjai,’ timiayi. ³⁶Ayu watska. ¿Ju kampatam aints pachismesha itiuur nintimme? ¿Tu aintsua kasa ainau katsumkamuncha ni namangkea nunischa aneemiayi? —Jesús timiayi.

³⁷Tu iniam Moisésa chichame nuikiartin aimiak:

—Katsumkamun wait anentramia nuwaitai, —timiayi. Tamati Jesús chicharak:

—Nekasam tame. Amesha nunismek turata, —timiayi.

Marta kai Maríjai pujamunam jeamuri

³⁸Nunia Jesús jinta weak, chikich yaktanam jeamiayi. Tura nu yaktanmaya nuwa, Marta naartin Jesúsani: Jearun wayaata, tusa untukmiayi. ³⁹Marta kai Maríka nu jeanmak pujau asa, Jesúsani ayaamrus ni chichamen antú pujurmiayi.ⁿ ⁴⁰Antsu Martaka ni takatrin timiá nintimtausa, Jesúsani jiiis chicharak:

—Apurua, ¿wína kair takatan winák winák inaitursa juka nintimtumek? Amesha yaiita tita, —timiayi.

⁴¹Tamaitiat Jesús ayaak:

—Maj, Marta, takatrum timiá untsuri aa nuke nintimtame. ⁴²Turayatum kichik aa nuke yuumatame. Maríka antú puja juka nekas pengker aa nuna turawai. Tura asamtai antukchati tusan pengké surimkashtajai, —timiayi.

Yus tu seataram tusa nuikartamuri

(Mat. 6.9-15;7.7-11)

11 ¹Chikich kintati Jesús aints atsamunam Yusen seak pujumiayi. Tura sea umisamtai, ni nuiniatiri kichik Jesúsán chicharak:

—Apu, imiakratin Juan ni nuiniatiri ainaun nuiniarmia nunismek Yus seat nuikiarturta, —timiayi.

²Tama Jesús chicharak:

—Yus seatasrum wakerakrumka tu seataram:

‘Ii Apaachiri Yus, nayaimpinam pujame nu ii nekas Apaachirinme.

Aints mash amin naarmin pachisar: Ameketme pengkeram turamiarti.

Ame aints inartin kinta wári jeati.

Ame wakeramuram nayaimpinmasha, tura nungkanmasha tuke ati.

³Ju kintaka ii yutairi yuumaji nu sukartusta.

⁴Tura chikich aints iin pasé awajtam-saru ainu tsangkurau akurningkia, ii tunaarisha nunismek tsangkukratkata. Tura tunaunum jearai tusam japkartuam ukukratkiip, antsu iwianchnumia uwemtikiartukta. Maaketai.’ Tu Yuska seataram, —timiayi.

⁵⁻⁶Nunia ataksha ni nuiniatiri ainaun chicharak:

—Aints ni amikrin itiurkamnawaita tusar nintimrarmi. Atumsha amikrintin

akurmeka, amikrum kashi japeng yajaya irastas taamtai, chikich amikrumi jeen weakrum, waiti kiramunam jearam chicharkuram: ‘Amikchi, aints arakia aneachmau wina jearun irastas tayi. Tura wainiatun yuwatniuri winaruka pengké atsau asamtai, pang kampatmachik tsangkatrukta’ tu seamaitiat, ⁷atumi amikri waiti kiramunam chichartamak: ‘Wina waittsuk asata. Jearka kiramuitai. Tura uchirsha wijai mash kanurar tepeenawai. ¿Tura asaramtai wisha nantakin amaschamin tepajai’ turamin-tash? Atsa. ⁸Antsu nekasam tajarme: Nuka atumi amikrintiat yuumamurmin suramsatas nantaachmataikia, atumka nekasrum yuumakrum seaj pujakrumningkia, yuumamurmin suramsatnuitrume. ⁹⁻¹⁰Aints warina seamina nunaka juwinawai, tura warina eainawa nunaka waininawai. Tura winajai tinaunka waitincha uratinawai. Tura asamtai wikia atumin tajarme: Yus tuke seataram. Turakrumningkia yuumamurmincha suramsatatrume. Tura Yuse wakeramurin nekaatasrum wakerakrumningkia, Yuska nunasha nekamtikramatatrume. Tura Yus pujamunam jeatasrum wakerakrumningkia, Yuska waitin uratramtinuitrume.

¹¹Uchirtin ainautirmesha nintimrataram: ¿Yaachia uchiri yaparok yurumkan seamaitiat, yurumkanka sutsuk kayan sua? ¿Tura yaachia uchiri namakan seamaitiat, namaknaka sutsuk napin sua?

¹²¿Tura yaachia uchiri nujintan seamaitiat titingkin sua? ¹³Atumka tunau ayatrume, nekasrum atumi uchiri pengker aa nuke suarme. Atumka tuke turau asakrumin, atum Yus seakrumningkia, atumi Apaachiri nayaimpinam puja nuka nekas timiá pengker asa ¿ni Wakanin nekas pengker aa nunaka itiu suritramkating? —Jesús timiayi.^o

**Jesúska iwianchi kakarmarijai
iwianchnaka akupawai timiauri**
(*Mat. 12.22-30; Marc. 3.20-27*)

¹⁴Nuna tusa ukuki, aints iwianch engkemtuam chichachu pujaun wainak, Jesús iwianchin jiiki akupkamiayi. Tura iwianch jiinkiamtai, chichatnasha paan chichakmiayi. Turamtai nuna wainkaru ainauka nintimrarmiayi. ¹⁵Antsu chikich aints ainau chichainak:

—Juka iwianchi apuri Beelzebú kakarmarijai iwianch ainaun jiiki akupuweawai, —tiarmiayi.^p

¹⁶Tinamtai chikich ainausha nekas Yus akupkamuashi tusar, Jesúsán nekapsartas Yuse kakarmarijai wainchatai takat turata tusar iniasarmiayi.^q ¹⁷Tu iniinam Jesús tu nintiminaun nekau asa chicharak:

“Nintimrataram. Chikich nungkanmaya apu ainau kajernaikiar kanakar pujusar maaninamtaikia, nu nungkaka wári mesertinuitai. Tura chikich jeanam iruntrar kajernaikiar pujuinauka nu jeancha wári ukukiartinuitai. ¹⁸Tura Satanáscha nunisang ni inatirijai kajernaikiar maaninamtaikia ¿ni inatirisha itiurak tuke Satanásnasha umirkarting? Tura atumka wína pachitsaram: Nuka Beelzebú kakarmarijai iwianch ainaun jii weawai, turutu asakrumin nunaka tajarme. ¹⁹Antsu nu nekasainmatikia ¿atumi nuiniatiri ainau yana kakarmarijia iwianch ainaun jiikiar akupinawa? Tura nisha Satanása kakarmarijai turichuitji tinu asaramtai, atumka pe nuwaarme tusar nekamtikina-wai. ²⁰Antsu wikia Yuse kakarmarijai iwianch ainaun jiikin asamtai, atumsha paan nintimsaram: Yuska aints ainaun tu inawai tusaram nekaamnawaitrume.

²¹“Aints nekas kakaram aa nuka saapin takus ni jeen nakaj pujamtai, ni jeen waririn ukusmaunaka kasarkachartinuitai. ²²Antsu nu aintska saapin takaku asa, ningki nintimias: Aints ainaun saapijai mash nepetkatatjai tau wainiat, nu aintsun nangkamasang kakaram aa nuka winák, niin nepetki saapirin juruki, nunia waririn yarurak jiinki, ni kasamkamuririn chikich ainaun suawai.

²³“Tura asamtai amikruchuka wína nemasruitai. Tura wína yaintsuk pujauka aints araka jingkiijin irumtsuk, antsu mengkakarti tusa, ajapua nunisang iwianchin yayaawai,” Jesús timiayi.^r

**Iwianch aintsnumia jiinkisha
waketkitnuitai timiauri**
(*Mat. 12.43-45*)

²⁴Nunia Jesús ataksha nuikiartak:

“Iwianch aintsnum engkema pujuu, nunia jiinkin asa, aints atsamunam wekaayat, nuni ayamsatatkama tujintak ataksha waketkitas aintsun eaknij wajatnuitai. Tura pengker pujusminun wainchaka nintimias: Aintsnum pujayatun wi jiinkimiaja nuni ataksha waketkitjai titinuitai. ²⁵Tura ataksha waketki, nu aintsu nintin wainak angkan japimkamu shiiram iwiamua nunis atun wainkatnuitai. ²⁶Tura nuna wainak, ataksha chikich iwianchin siete (7) niin nangkamasang pasé ainaun juki mash nu aintsu nintin engkema-wartinuitai. Tura iwianch ainau nu aintsu nintin engkemtuamka, nuwik pasé pujumia nuna nangkamasang pasé nintimias pujustinuitai. Tura asamtai iwianch atumi ninti engkemawai tusaram wainkataram,” Jesús timiayi.^s

¿Nekas warastin warimpita? timiauri

²⁷Aints iruntramunam Jesús chichaach wajai, nuwa kichik Jesúsán kakarman chicharak:

—Nukuram amin juretmaria nuka mumuntstamka tsakatmarmaru asa nekas warastinuitai, —timiayi.

²⁸Tamaitiat Jesús ayaak:

—Antsu Yuse chichamen antukar miatrusarang umirinauka nuna nangka-masarang timiá warastinuitai tajame, —timiayi.

**Pasé aints ainau wainchatai
takat jiismi timiauri**

(*Mat. 12.38-42; Marc. 8.12*)

²⁹Aints ainau untsuri kautkaram, Jesús chicharak:

“Aints yamai pujuinauka pasé ainawai. Tura Yusen umirchau ainayat wainchati takatan wainkartas wakerinawai. Antsu yaanchuik Jonás turunamia nunisarang wainchati takatnaka wainkartinuitai.^t

³⁰Yus Jonásan chicharak: Nínivenmaya aints ainau uwentikrarti tusa, akupkamia nunisnak yamai pujuinauncha uwentik-rartasan aintsutiatak Yus akupkamuitjai.^u

³¹⁻³²“Jonás Nínive yaktanam Yuse chichamen etsermatai, nunia aints ainau ni tunaunin mash inaisarmiyai. Wi Jonásan nangkamasnak pujai waitinayat, junia aints ainau wi etsermaunin antinatsui. Antsu Yus tunau jiistin kinta jeamtai, Nínive yaktanmaya jakaru ainau nantakiar, yamai pujuinaun pachisar Yusen: Nu aints tunau ainawai tiartinuitai. Nuniasha yaanchuik Yus Salomónkan ni nekamtairin nukap susamu asamtai, chikich nungkanmaya apu nawantri arakia Salomónka chichamen antuktas tarimiayi. Wikia Salomónkan nangkamasnak ai waitinayat, junia nungkanmaya ainau wi etsermaunaka antinatsui. Antsu Yus tunau ainaun jiistin kinta jeamtai, nu nuwaka jakamunmaya nantaki, yamai

pujuinaun pachis Yusen ujaak: Nu aints ainauka tunau ainawai titinuitai,” Jesús timiayi.

Paaniun pachis timiaurin

(*Mat. 5.15;6.22-23*)

³³Nunia Jesús ataksha nuikiartak:

“¿Aints kantiin akaa chingnanam uuktinkai? Atsa, aints kichkisha nunaka turinatsui, antsu jeanam wayaawaru ainau paan wainmakarti tusar yakí kentsartinuitai.^v

³⁴“Atumi jingkia kantii kapaawa nunisketai. Atumi jii pengkeraitmatikia, paan wainmaktinuitrume. Antsu atumi jii paseetmatikia, teenam pujuinawa nunisketrume. ³⁵Tura asaram aneartaram. Atumi nintijai paan nintimuwearme nuni tee ahati tusaram wainkataram. ³⁶Atumi nintijai tunau nintimsuk antsu nekas paan nintimsaram pujakrumka, aints kashi kantiin takus wekaawa nuniske-trume. Tura asakrumin aints ainau mash itiu purame tusar nunaka paan wainkar-tinuitai,” Jesús timiayi.

**Jesús fariseo ainaun tura Moisésa chichame
nuikiartin ainauncha chicharkamuri**

(*Mat. 23.1-36; Marc. 12.38-40; Luc. 20.45-47*)

³⁷Chichas umisamtai, fariseo aints Jesúsán jearun yuwita tusa untsukmiayi. Turamtai Jesús jeanam waya, misanam yurumkan yuwatas keemsamiayi. ³⁸Tura judío ainau nangkamiar: Yus pengker awajatai tusar, tuke kijmiarar yuwatnuitji tu nintimainau wainiat, Jesúska kijmiatsuk pujamtai, fariseo nuna wainak: Maj ¿waruka aitkawa? tu nintimramiyai. ³⁹Tu nintimmatai Jesús chicharak:

—Fariseo ainautirmeka, atumka pining tura puwat aya patatkeng nijarmawa

tumawaitrume. Antsu atumi nintinkia tunau piaku asamtai, kasamtasha kasamuwearme. Tura pasé aa nuka mash turuwearme. ⁴⁰Atumka nintinchawai-trume. ¿Yuska aintsu namangken ii wainji nuna najanachmakia? ¿Tura aintsu ninti ii waintsuji nunasha najanachmakia? ⁴¹Tura asamtai atumka pengker nintimsaram chikich ainau wait anentakrum ni yuumamuri susataram. Antsu: Uwejrún kijmiarnaka nekasan Yusen pengker awajsatatzapi tuuka nintimrashtinuitrume.

⁴²“Maj, fariseo ainautiram aneartaram. Atumi ajarinia árak menta tutain, tura chikich áraksha ruda tutain, tura chikich yurumak pachintai irunusha timiá tuupich wainiatrum diez (10) juukrum, kichik Yus susatasrum akanuwearme. Nuka tuke inaitsuk turataram. Antsu tunaarinchau pujutka, tura Yus aneetka pachiatrume. Tura asaram nusha turataram tusan tajarme.

⁴³“Maj, fariseo ainautiram aneartaram. Atumka mijajuitjai tusaram, iruntai jeanmasha wayaaram, apu keemtainum timiá pengkernumsha keemsatsrum wakerarme. Tura jinta wekaakuram, aints ainausha mash: Wína jiirsar aujtusarat tusaram wakerarme.

⁴⁴“Maj, atumka aneartaram tajarme. Atumka jakau iwiarsamu wainchatiya tumawaitrume. Tura asaram aints iwiarsamun paan wainchau asar nájainawai. Tura aints ainausha nunisarang atumi chichamen antinayat, itiur nintimrume tusarka nekainatsui,” Jesús timiayi.

⁴⁵Tamati Moisésa chichame nuikiartin kichik nuna antuk chicharak:

—Nuikiartinu, ame tu chichaakmeka, iin pachikratsam: Atumka pasé ainiarme tusam tukartakum tame —timiayi.

⁴⁶Tama Jesús ayaak:

—Atumsha Moisésa chichame nuikiartin asaram aneartaram tajarme. Atumka aints chikich ainaun: Nekas meram aa nuka entsaktaram tayatrum, kichik uwejmijaisha yayit nakitawa nunisketrume. Tura asaram atumek nintimsaram chicham pengké umikchamin akupkaram atumsha umiachiatrum chikich ainau: Ju chichamka pachitsuk umiktaram tuwearme.

⁴⁷“Atumi juuntri ainau Yuse chichamen etsernun maawarmia nuna iwiarsamuri shiiram ati tusaram iwiaruwearme. Tura asaram aneartaram. ⁴⁸Atumi juuntri Yuse chichamen etsernun mau wainiatrumek, atumka nu iwiarsamu shiiram iwiarau asaram, atumi juuntri turuwarmia nuka pengkeraita tarume.

⁴⁹“Tura asakrumin Yus mash nekawa nuka atumin pachis ju chichamnaka aamtikramiayi. Yus chichaak: ‘Wína chichamrun etserin ainaun, wína chichamrun akatran: Tu etserkataram tusan aints ainaun akupkatnuitjai. Wi turamta chikichnaka maawartinuitai. Tura chikichnaka papeekiar pasé awajarsatinuitai,’ timiayi. ⁵⁰Tu aarmau asamtai nu nangkamtaik Yuse chichamen etserin ainaun maamurin, tura yamai kintatisha Yuse chichamen etserin ainaun maamurinja pachis, Yus yamai pujautirmin ininmastinuitrume. ⁵¹Nu nangkamtaik Abelan ni yachí maamiayi, tura chikich Yuse chichamen etserin ainauncha maawarmiayi, tura Zacaríasnasha Yuse jeen ayaamas tangku epetinam takakmak pujaun maawarmiayi. Nu aints ainau maamurin pachis yamai pujautirmin Yuska ininmastinuitrume tajarme.”

⁵²“Moisésa chichame nuikiartin ainautirmincha: Aneartaram tajarme. Aints ni jeen epeni, aints ainau nuni wayaacharti tusa, surimiak yawirin jurukmiawa nuniske-

trume. Tura asaram atumka nayaimpinmaka wayaashtinuitrume. Tura aints ainau nayaimpinam wayaatnun nekaawartas wakerinauka nekaacharti tusaram suritarme,” Jesús timiayi.

⁵³⁻⁵⁴Jesús nuna tamati, Moisésa chichamen nuikiartin ainau, tura fariseo ainausha kakarman kajerkarmiayi. Tura suwirpiaku jiisar tsanumratai tusar: ¿Waring chichakaintai? tusar unturi inintriarmiayi.

Pasé nintiminaun pachis etserkamuri

12 ¹Nunia aints unturi warang kaunkaru asar, nawen mai najatnai wajaarmiayi. Turinamtai Jesús ni nuiniatiri ainaun chicharak:

“Fariseo ainau nangkamiar: Nekas chicham nuikiatiji tinayat anangkartin ainawai. Ni chichamengka pang pachimtaiya nunisarang ainawai. Pang pachimtai tuupich ayat pangnum pachimram pangkan mangkamtikui. Tumamtai pang apu ayat nitkangka tantaayaintai.^x ²Aintsu chichamesha nunisarang ainawai. Yamai chicham uukar chichakmauncha ukunam paan nekaawartinuitai. Tura yamaikia aintsu turamurin nekaachminun waininayat, ukunam paan nekaawartinuitai.^y

³“Tura asamtai kashi teeti chichawearme nunaka tsawai mash paan nekaawartinuitai. Tura atumi kanutirin pujusrum, yaitasrum chichawearme nunasha aints mash paan nekawarti tusar, aanum etseerartinuitai,” Jesús timiayi.

¿Yanak shamkartinuita? timiauri

(Mat. 10.26-31)

⁴Nunia Jesús ataksha chicharak:

“Amikur ainautirmin atumin tajarme: Aints atumin mantamawartas wakerutmi-

namtaisha shamkairap. Atumin mantaminayat, atumi wakaninka maachartinuitai. ⁵Tura yáki nekasrum shamkatnuitrume tusan ujektajrume. Atum jakaram ji kajintrashtinnun chumpimiatin asaram aya Yusek shamkataram.

⁶“Atumka chingki cinco (5) ainia nusha jimiaarchik jiru kuikiajai surukminuitrume. Tura wainiat Yuska nu chingkinka kichkisha pengké kajinmatsui. ⁷Tura atumin unturi chingkin nangkamasang Yuska timiá anenmau asa, atumi intashi warutmak awa tusa nekapmarmawaitai. Tura asamtai atumin mantamawartas wakerutminamtaisha shamtsuk asataram,” Jesús timiayi.

Tunau pengké tsangkurashthinun pachis timiauri

(Mat. 10.32-33; 12.32; 10.19-20)

⁸Nunia Jesús ataksha chichaak:

“Nunasha tajarme: Aints wína pachitas chikich aints antinamunam: Wikia Jesúsawaitjai taunka wisha aintsutiatnak Yus akupkamu asan, Yuse awemamuri antinamunam: Nuka wína aintsruitai titinuitjai. ⁹Antsu aints wína pachitas chikich aints antinamunam: Wikia Jesúsnauchuitjai taunka wisha nunisnak Yuse awemamuri antinamunam: Nuka wína aintsruchuitai titinuitjai.^z

¹⁰“Tura wikia aintsutiatnak Yus akupkamu asan, wína pachitsar pasé chichainaunaka tsangkuratnuitjai. Antsu Yuse Wakanin pachisar pasé chichainaunka pengké tsangkurashthinuitjai.^a

¹¹⁻¹²“Atumka wína aintsur asakrumin, atumin achirmakar iruntai jea ainamunmasha, tura tunau nekatinmasha, tura apu ainamunmasha juraminamtaikia,

tura atumin ininminamtaisha, Yuse Wakani apu aiktinun atumin chichamtikramkatnuitrume. Tura asamtai ¿warintuk aimkataj? tura ¿warintuk chichaktaj? tuuka nintimrairap,” Jesús timiayi.^b

Kuikiaka nintimsashtinuítai timiauri

¹³Jesús aints untsuri iruntramunam chichaak pujamtaí, aints Jesúsari tari chicharak:

—Nuikiartinu, wína apar jakau asamtaí, wína yatsur aparu kuikiarín akanak surusti tusam chichartusta, —timiayi.

¹⁴Tamati Jesús chicharak:

—Aints yachiijai kuikian suritnainamtaí ¿yaachia ame susata tita tusasha inaitukma? —timiayi. ¹⁵Nunia aints ainaun mash nuiniartas chicharak:

—Aneartaram. Aints kuikiartín tura untsuri warirtin pujayat tukeka pujuschamnawaitai. Tura asamtaí atumka kuikiartín wajasatan wakerajai tuuka nintimsairap, —timiayi.

¹⁶Nunia nuikiartutai chichaman nuikiartak:

“Aints kuikiartín arakan ni ajarinian nukap juukmiayi. ¹⁷Tura juuk nukap au asamtaí: ¿Itiurkatjak? ¿Tura tuning ukustaj? tu nintimmiayi. ¹⁸Nunia nukap nintimias: ‘Yamaikia nekasán nintimrajai. Jea árak ukutai nekas tuupich asamtaí, nunaka yumpungan, nekas nampurman jeamkatjai. Tura nuna jeamkan yurumkan juukan, tura araknasha juukan, tura warinchurnasha juukan, nuni mash matsaran, ¹⁹nunia takakmatsuk pujusan, tura nukap yuwan, tura nukap umuran, tura nukap nakurusan untsuri musach pengké yuumsuk pujustajai,’ tu nintimramiayi. ²⁰Tu nintimmataí Yus chicharak: ‘Ameka nintinchawaitme. Ju kashiti jakatatme.

¿Turakmin warinchurmesha ame ukusmame nusha yanawa atata?’ timiayi.

²¹Tura asamtaí aints kuikianak nintimtinak nukap ukuinayat, Yusnaka nintimtinachu asar, nu aintsua nunisarang ainawai,” Jesús timiayi.

Yus ni uchiri yuumamurín nekawai timiauri

(Mat. 6.25-34)

²²Nunia ni nuiniatiri ainaun Jesús ataksha chicharak:

“Nunasha tajarme: ¿Warí yuwanak pujustaj, tura warinak entsartaj? tusaram, nuke nintimsarmeka pujusairap. ²³Yus tuke iwiaaku pujustaram tusa pujutan suramu asa, tura atumi namangken najanau asa, atumi yutairincha tura atumi entsatirincha suramsatatrume.

²⁴Chingki ainau jiisrum: ¿Itiur pujuinawa? tusaram nintimrataram. Nuka araknaka arainatsui. Tura arakan juukar jeanmasha ukuinatsui. Tu pujuinawainiat, Yus ni yuwatniurin suwawai. Yus atumin chingkin nangkamasang timiá anenmau asa ¿atumi yuumamuríncha itiur suramsashting?

²⁵Tura wikia untsuri kinta pujustaj takurmesha, kichik horaksha inangkachamnawaitrume. ²⁶Nu turunatatkamaram tujintayatrumsha ¿warukaya yuta pachisrumsha, tura entsati pachisrumsha nukap nintimsarmesha pujarme?

²⁷“Yangkur ainau nangkamiar yangkurkar wajainau nintimrataram. Nuka takakminatsui. Tura uruchnasha kutaminatsui. Tura apu Salomón yaanchuik pujumia nuka entsatirin timiá pengker entsariat, yangkura nuniska pengkerka iwiamamrachmiayi tusan tajarme. ²⁸Nupaa ainausha yamaikikia shiiram ainayat, kashin tsawaar aints

ainau charukar jiinum epeawartinun wainiat, Yuska timiá pengker iwiarmam-tikin asa, atumnasha entsatincha nuna nangkamasang shiirman suramsatnuitrume. Tura asamtai ¿warukaya Yuska nekasrum nintimtsurme? ²⁹⁻³⁰Yusen nintimtichu ainau mash nungkanam pujuinauka tuke inaitsuk: ¿Warinak yuwataj tura warinak amurtaj? tusar tuke nintimsar pujuinawai. Antsu atumka tuuka nintimtsuk asataram. Atumi Apaachiringkia atumi yuumamurin pachis mash nekau asamtai, atumi yutairisha, tura atumi amutirisha pachisrum napchau nintimtsuk asataram. ³¹Antsu Yuse wakeramuri nekasrum nintimratararam. Turakrumningkia atumi yuumamurincha mash suramsatatrume,” Jesús timiayi.

**Nayaimpinmaka yuumatsuk
pujustinuitrume timiauri
(Mat. 6.19-21)**

³²Nunia ataksha Jesús chichaak:
“Wína aintsur ainautirmeka shamtsuk asataram. Atumka jumchik arumin wainiat, atumi Apaachiri nekas: Wijai pujustaram tusa wakerutmarme. ³³Tura asamtai atumnau aa nuka surukrum yuuminak pujuinau susataram. Turakrum nayaimpinmaka kasa ainauka wayachartin asaramtai, tura entsatiram mamurchatin asaramtai: Nekasan nayaimpinam jeatasan wakerajai, tu nintimsaram pujustaram. ³⁴Atum warí wakerarme nuka tuke atumi nintijai nintimsaram pujustatrume,” timiayi.

**Atumi Apuri tuke aneakrum
pujustaram timiauri**

³⁵⁻³⁶Nunia ataksha chicharak:
“Ju nuikiartamusha nintimratararam. Apu aints nuwenmaun jiistaj tusa

weamtai, ni inatiri pengker umiu asa, jeanam pujus: Apur fiestanmaya taa waiiti uratrita tamati, waiitin wári uratiasan wakerajai, tu nintimias kantiin keemak nakaj pujawai. Atumka nu aintsu inatiriya nunisrumek atumi Apuri tatintri nakasrum pujustaram. ³⁷Nu aintsu apuri waketki taa, ni inatirin kanutsuk iwiaj pujaun wainak waramtiksatnuitai. Nekasan tajarme: Nuka jea waya, ni wejmakrin aik yapajia, ni inatiri ainaun chicharak: Misanam pujustaram tusa, ni yutairin susatnuitai. ³⁸Apu kashi japeng winak, turachkusha tsawaarai winak, ni inatiri iwiaj pujaun wainak nekas waramtiksatnuitai.^c

³⁹“Nusha nintimratararam: Jeenniuka kasa aints tatinun niyá eemak nekawait-kungka, kanutsuk iwiaj pujus anear: Kasartukai tusa, tura jearun wayaawai tusa nakastinuitai. ⁴⁰Wi aints ayatun Yus akupkamu asan, wisha nunisnak aneachmau tatin asamtai, atumsha anearum pujustaram,” Jesús timiayi.^d

**Aintsu inatiri jimiaran pachis etserkamu
(Mat. 24.45-51)**

⁴¹Tamati Pedro iniak:
—Apuru ¿ju nuikiartamu etserme nuka iin tukartakmek tam? Turachkumsha ¿aints ainau mash nekaawarat tusamek tam? —timiayi.

⁴²Tu iniam Jesús aimiak:
“Ju nuikiartamusha nintimratararam. Atumka takatan wainua tumawaitrume. Aints arák irastas wetanak wajak: Wína jearun pujuinau yurumatini jeamtai, ¿yáki ni yuwatniurin susat tusa aintsun eawai. Nekas pengker umiaun tura paan nintimniun eak: Nu turati titinuitai. ⁴³Nu aintsu inatiri ni takatrin miatrusang umik pujamtai, inamin taa nuna wainak inatirin waramtiksatnuitai. ⁴⁴Nekasan

tajarme: Ni inatiri miatrusang umiio asamtai, ni inakratin mash ninu aa nuna wainin ati tusa inaikiatnuitai. ⁴⁵Antsu takatan wainin pasé aints asa: Apurka wárikia tachatatui, tu nintimias pujakka, chikich takau ainauncha, tura nuwa ainauncha pasé awajak, tura yutancha nukap yuj, tura amutincha nukap amuj nampea nampeaka ni apuri tatintri nakachmau asa, ⁴⁶ni apuri aneachmau tari, inatirin nakachmaun wainak, chikich chichaman umichu ainaujai metek wait wajaktiniun susatnuitai.

⁴⁷“Tura aintsu inatiri ni apuri wakera-murinka pengker nekayat umikchangka iwiaaku pujus nukap wait wajaktinuitai. ⁴⁸Antsu chikich inatiri ni apuri timiaurincha antukchau asa, napchau takakmak pujaksha iwiaaku pujus jumchik wait wajaktinuitai. Yus aints ainaun nukap susau asa ataksha: ¿Nusha itiurkamame? tusa ukunam iniastinuitai. Tura ni uchiri ainaun ni nekamtairin nukap susau asa ataksha: ¿Nusha itiurkamame? tusa nunisang ukunam iniastinuitai,” Jesús timiayi.

Jesús aints ainaun akankatnuitjai timiauri
(*Mat. 10.34-36*)

⁴⁹Ataksha Jesús chichaak: “Aints ainau wína umirtukarti tusan wakerakun taawitjai. Tura asan yamaikia wína umirtukarat tusan wakerajai. ⁵⁰Wikia nukap wait wajaktatjai. Tura nu wait wajaktinka wári jeat tusan wakerajai. ^e⁵¹Atum wína pachitsaram: Aints ainau mash pengker nintimtunisar maanitsuk pujusarat tusa taawitai ¿tu nintimurtsurmek? Antsu wikia tajarme: Ju nungkanam tau asamtai aints ainauka kanakartinuitai. ⁵²Yamai nangkamas kichik jeanam cinco (5) aints pujuinaw kanakartinuitai. Kampatam wína

umirtukcharu ainauka chikich jimiaran wína umirtukaru ainaun kajerartinuitai. Turachkusha wína jimiar umirtukcharu ainauka kempatam wína umirtukaru ainaun kajerartinuitai. ⁵³Tura asar aintska ni uchirin nakitrartinuitai. Tura uchisha ni aparincha nakitrartinuitai. Tura nuwasha nunisarang ni nawantrincha nakitrartinuitai. Tura nawantrisha ni nukurincha nakitrartinuitai. Tura chikich nuwasha ni najatin nakitrartinuitai. Tura najatisha ni tsatsarincha nakitrartinuitai,” Jesús timiayi.

Kinta tu tsawaartatui tusa timiauri
(*Mat. 16.1-4; Marc. 8.11-13*)

⁵⁴Nunia aints ainaun chicharak: —Junia aints ainautiram, tsaa akaamunmanini yumi kajintramtai, yumi jituratui tusaram nekarme. Takurmin atum tarume nunisang jitawai. ⁵⁵Tura surnumia nasenmataikia, esat atatui tarume. Takurmin atum tarume nunisang esatrawai. ⁵⁶Anangkartin ainautiram, nayaim jiiisrum yumi jiturtincha nuwá eemkaram nekayatrumsha, ju kintati wi chichaman atumin ujaajrume juka pachisrum: ¿Warina takua tawa tusaram waruka nintimtsurme? —Jesús timiayi.

**Kársernum engkeatnun
pachis nuikiartamuri**
(*Mat. 5.25-26*)

⁵⁷Nunia ataksha Jesús chicharak: “Tura atum nekas pengker pujustinun pachisrumsha ¿waruka atumek nekartsurme? ⁵⁸Atumka tumaashitkurme, chikich aints atumin: Yamaik akirkata tusa tukumramak: Antsu akirchakminkia kársernum engketmawaratui tamatikia, apu pujamunam jeetamiartas, nijai tsaniasrum jinta weakrum, apu jeenkia jeetamtsaing,

chicham iwiarataram. Nu turachkurmek, apu achirmak suntar ainaun akupturmak: Ju aintska kársernum engkeataram titinuitai. ⁵⁹Tura nekasan tajarme: Atumi tumaashri mash metek akiimiatsuk pujakrumka, nuniangka pengké jiinkishti-nuitrume,” Jesús timiayi.^f

**Atumi nintimauri yapajiachkurmek
wait wajaktinuitrume**

13 ¹Nu kintati aints ainau Jesús ujaktai tusar tariarmiayi. Tura ujainak: Galilea nungkanmaya ainau waaka uchirin Yus susatai tusar mainak pujuinai, apu Pilato ni suntarin akupkam, nu aints ainaun maawar, nunia ni numpen waaka uchiri numpejai pachim-rarmiayi. Nuna pachisar Jesús an ujakarmiayi. ²Tu ujainam Jesús chicharak:

—¿Atumka itiuur nintimrume? ¿Atum nintimsarmeka: Nu aints jakaaruka chikich Galileanmaya ainaun nuna nangkamasarang timiá tunaarintin asaramtai maawari tarumek? ³iAtsa! Antsu atumi nintimauri yapajiachkurmek, atumsha nunisrumek jakatnuitrume tusan tajarme. ⁴Tura yaanchuik Siloénam yakí wajatiri kaya najanamu “torre” tutai ningki yumpunak ayaaramtai ¿dieciocho (18) aints jakaarmia nuka Jerusalénnumia ainau nuna nangkamasarang timiá tunaarintin asar jakarmiayi tarumek? ⁵iAtsa! Antsu atumi nintimauri yapajiachkurmek, atumsha nunisrumek jakatnuitrume tusan tajarme, —Jesús timiayi.

Numi higuera tutain pachis nuikiartamuri

⁶Nunia Jesús ataksha nuikiartamun etserak:

—Aints ni ajarin numi higuera tutain araamiayi. Tura nukap musach arus: Nerekchayash tusa jiistas werimiayi. Tura wainiat nerekchamiayi. Ataksha jiimaitiat atsumiayi. Nunia ataksha jiimaitiat atsumiayi. ⁷Tura nunia ajan wainiun chicharak: ‘Antukta. Musachjai metek nereatsuash tusan jiistasan tarijai. Turayatun wainkachjai. Yamaikia ajakta. ¿Warukang nangkamnasha wajasat?’ timiayi. ⁸Tamati ajan wainin ni apurin chicharak: ‘Atsa apuru, ju musachkeka wajasti. Yamaikia nu numi nantujen aangtuan, tangku ijiincha matsatratjai. ⁹Turamka nerekchatpiash. Antsu tuke nereachmataikia, nuniangka ajaktatme,’ timiayi.⁸

**Ayamtai kintati Jesús nuwa
punuapan tsuwarmauri**

¹⁰Nunia chikich ayamtai kintati Jesús iruntai jeanam waya, aints ainaun nuiniak pujumiayi. ¹¹Nunia aints ainau iruntramunam nuwasha pujumiayi. Nu nuwaka yaanchuik iwianch engkemtuanu asa, dieciocho (18) musach punus wekainuyayi. Tura asa nakuintancha pengké yumatnuyayi. ¹²Tu pujamtai Jesús nu nuwan wainak untsuk:

—Umaaru, punusam wekaayatun yamaikia angka wajasume, —timiayi. ¹³Nuna tusa uwejejai nuwan takasmiayi. Turam nuwasha nakuinia tupin wajasmiayi. Tura pengker wajas, Yus juuntaitai timiayi. ¹⁴Tura Jesús nu nuwanka ayamtai kintati tsuwaru asamtai, iruntai jea juuntri kajek aints ainaun chicharak:

—Seis kinta aa nu takakmastinuitai. Nu kintati tsuwaamartaj tusaram tatinuitrume. Antsu ayamtai kintati

f 12.59 (Yus tunau jiistin kinta jeatsaing, atumi tunaaringkia inaisaram tsangkuturra titaram, taku timiayi.) **g 13.9** (Jesús: Aints wina chichamrun umirtutsuk pujauka numi higuera neretsuk wajawa nunisketai, taku timiayi.)

tsuwaamartaj tusarmeka tachamnawai-trume, —tusa Jesúsán antumtikiak timiayi.

¹⁵Tamati apu Jesús chicharak:

—Chicham umichu ainautiram,

ayamtai kintati tsuwamarairap tayatrum-sha ¿ayamtai kintati atumi waakarisha, tura atumi burrorisha yumin aartaj tusaram atiarum juwatsrumek? ¹⁶Ju nuwaka Abrahamá wearí ayat, iwianch engkemtuamu asa, dieciocho (18) musach tuke jingkiama nunisang punus wekaju asamtai, ayamtai kintati pengker wajasti tusanka ¿warukanak aitkashtaja? —timiayi.

¹⁷Jesús nuna tamati, ni nemase ainau natsaararmiayi. Tura chikich aints ainau mash Jesúsá pengker turamurin wainkar warasarmiayi.

Mostaza jingkiaji pachis nuikiartamuri

(*Mat. 13.31-32; Marc. 4.30-32*)

¹⁸Nunia Jesús ataksha etserak:

—¿Atumsha itiuur nintimrume? Yuse aintsri itiuur yujainawa tusan, atumin ujaktinuitjarme. ¹⁹Anturtuktaram. Yuse aintsri ainau mostaza jingkiajiya nunisarang ainawai. Aints mostaza jingkiajin ni ajarin araa, nuka tsapai nunia tsakar, nunia nekas juun wajaayi. Tura kanaji timiá saram asaramtai, nanamtin ainau mostazan kanajin pasungminawai, —Jesús timiayi.

Pang pachimtai pachisar etserkamuri

(*Mat. 13.33*)

²⁰Nunia Jesús ataksha chikich nuikiartamun etserak:

—Yuse aintsri ainau itiuur yujainawa tusan ujaktinuitjarme. ²¹Yuse aintsri ainau pang pachimtaiya nunisarang yujainawai. Pang pengker at tusa, nuwa

pang pachimtaijai pangkan pachimui. Turam mash wapakrawai, —timiayi.^h

Waiti tuupchin pachis etserkamuri

(*Mat. 7.13-14; 21-23*)

²²Nunia Jesús Jerusalénnum jeataj tusa, yakat juunnasha tura tuupchincha nangkaatsuk kichik kichik yaktanam aints ainau nuiniaki wemiayi. ²³Tura weamtai, aints Jesúsán iniak:

—Apuru ¿Yusnum uwemratin ainia nu jumchikiashi? —timiayi. Tu iniam Jesús aimiak:

²⁴—Nekasam tame. Yus pujamunam pujustasrum wakerakrumka, waiti tuupchinam wayaataj tusaram wakeruktaram. Antsu aints untsuri nuni wayaawartas wakerinayat, wayaawartatkamawar tujinkartinuitaj tajarme.

²⁵Jeentin waitin epeniamtai, atumsha aanum wajasrum, waiti awatkuram: ‘Apurua uratrita,’ takurmincha, atumin airmak: ‘¿Tuniantskitrum? Wikia wainchawaitjarme,’ turamtinuitrume.ⁱ

²⁶“Turamatai atum chicharkuram: ‘Antsu iisha amijai iruntrar yurumak yuwakur, tura amuti amakur pujuyaji. ¿Tura waruka nekartsume? Ii yaktarin wekaasam, nuikiartutcha ame nuikiarti-nuyame,’ titinuitrume. ²⁷Atum takurmin jeentin atumin airmak: ‘Ataksha tajarme: ¿Atumsha tuniantskitrum? ¿Wikia wainchawaitjarme tajarme nuka waruka antatsrume? Tunau takau ainautiram mash winingkia winitasuk waketkitaram,’ atumin turamtinuitrume.^j

²⁸“Tura jeentin turamu asamtai Abrahamsha, tura Isaacsha, tura Jacobsha, tura Yuse chichamen yaanchuik etserin ainausha mash Yus pujamunam pujuinau wainkaram, antsu atumka aanum japamu pujusrum nukap

h 13.21 (Yuse aintsri ainausha mash nungka ainamunam tu yujartin ainawai, taku timiayi.)

i 13.25 (*Mat. 25.11-12*) **j 13.27** (*Sal. 6.8*)

juutkuram naim esairam katertakrum kanaktinuitrume. ²⁹Tura judfochu ainau tsaa taakmanumaninisha, tura tsaa pajeninisha, tura tsaa jeamunmaninisha tura atu pajeninisha, mash metek kaunkar Yus pujamunam yuwaartinuitai.^k

³⁰Tura yamai mianchau ainausha ukunam Yusnum chikich ainaun nangkamasarang artinuitai. Tura: Wikia chikich ainaun nangkamasketjai tumamin ainau ukunam mianchau artinuitai,” Jesús timiayi.^l

Jerusalénnum pujuinaun aneak juutmiauri
(Mat. 23.37-39)

³¹Nunia nu kintati fariseo ainau jumchik Jesúsán tariat chicharinak:
—Apu Herodes amin mantamatas wakerawai. Tura asamtai juniangka jiinkim yajá nungkanam weta,
—tiarmiayi.

³²Tu tinam Jesús chicharak:
—Yamaikia weriram nu pasé nintintin ujaakrum: Antukta, wikia yamaisha, tura kashincha jumchik kinta pujusan, iwianch ainaun jiikin akupkatatjai. Tura jau ainauncha tsuwartatjai. Tura wína kintar jeamtai inaisatatjai, tawai titaram.
³³Turayat Yuse chichamen etserin ainaun chikich nungkanmaka maacharmiayi, antsu tuke Jerusalénnumak maawarmiayi. Winasha nunisarang Jerusalénnum mantuwartin asaramtai, jumchik kinta arusan nuni jeatatjai.

³⁴“Jerusalénnumia ainautirmin tajarme: Atumka Yuse chichamen etserin main aiyarume. Tura Yus wína chichamur etserkataram tusa, akupturmaku wainiatrumek, kayajai tukuram mainuyarme. Atash ni uchirin nanapejai tektuktas untsuawa nunisnak: ¿Yusnum

uwemratarum tusan warutmak untsuyajirum? Tura wainiatrum nakitrinuyarme.

³⁵Antsu wi jakamtai atumka: Yus akupkamura nekas pengkeraitai tutsuk pujakrumka, winaka pengké waitkashtinuitrume. Wi ukukmiaka, atumi yaktari itarak atinuitai. Tura asamtai aneartaram tajarme,” Jesús timiayi.

Jesús aints jaun tsuwarmauri

14 ¹⁻²Nunia chikich ayamtai kintati fariseo juuntri Jesúsán yuwita tusa untsuam, Jesús ni jeen wemiayi. Tura nuni jea, aintsu namangken imiurun wainkamiayi. Turamtai chikich fariseo irunu ¿itiurkanpi? tusaar jiiij pujuriarmiayi. ³Tuminamtai Jesús Moisésa chichamen nuikiartin ainauncha tura fariseo ainauncha iniak:

—¿Atumsha itiru nintimrume? ¿Ayamtai kintati aints tsuwarminkai?
¿Turachkusha tsuwarchamnaukai?
—timiayi.

⁴Tamati aimtsuk pujuarmiayi. Tuminai Jesús jaun takas tsuwararmiayi. Nunia: Jeemin waketkita tusa akupkamiayi.

⁵Nunia fariseo ainaun Jesús chicharak:
—Atumi uchiri tura atumi waakarisha nungka taimunam ayaaramtai, ¿ayamtai kinta au wainiatrumek wári jiiikchamnaukitrum? —timiayi.^m

⁶Tu tamaitiat aimkartatkamawar pengké aimkacharmiayi.

**Nuwenmanum untsukmau
ainaun pachis etserkamuri**

⁷Tura nu jeanam untsukmau ainau wikia miajuitjai tusa, keemtai nekas pengkerum keemsartas wakerinamtai, Jesús nuna wainak nu aints ainaun nuiniak:

⁸⁻⁹—Aints atumin nuwa nuwatmanum untsurmakaramtaikia, keemtai nekas

pengkernumka keemsairap. Keemtai nekas pengkernum keemsakrumningkia, chikich aints atumin nangkatamsang juun taamtaí, atumin untsurmakma nuka tarutmi chichartamak: ‘Ju aints juni keemsati tusam wajaktia,’ turamatai atumka natsaarum wajakrum, nu keemtainkia ukukrum, chikich keemtai mianchau amanum keemsatnuitrume.

¹⁰Antsu nuna turunawai tusaram, aints atumin untsurmakaramtaikia, keemtai mianchau amanum keemsataram. Nuni keemsakrumningkia, atumin untsurmakma nuka tarutmi chichartamak: Amikru, au nekas pengker keemtainum keemsata turamtinuitrume. Turamu asamtaí chikich untsukmau ainau nuna antukar: Juka nekas pengke aintsuitai turamiartinuitai. ¹¹Tura asamtaí aints ningki nintimias: Wikia miajuitjai taunka Yuska: Mianchawaitai tawai. Antsu aints: Mianchawaitjai tumamunka Yuska: Miajuitai tawai, —Jesús timiayi.ⁿ

¹²Nunia niin untsukmaurin chicharak:

—Ameka aints ainau yuwitaram tusam untsuktasmeka, niisha winasha iiksang untsurkami tusamka, amikrumsha, nunia yachim ainausha, nunia chikich wearam ainausha, nunia amijai patasar kuikiartin irunusha: Wina jearun yuwita tusamka untsukaip. Ame nu aints miaju ainaun untsuamka, niisha amincha nunisarang yuwita tusar untsurminamtaikia, ni yutairingkia akiimiakmawa nunisang atinuitai. ¹³Antsu yuwitaram tusam, aints ainau untsuktasam wakerakmeka, kuikiartichu ainausha, nunia uweje mutchau ainausha, nunia wekaichau ainausha, nunia wainmichu ainausha yuwitaram tusam untsukta. ¹⁴Nu turakminka niisha akirmakchartinuitai. Antsu pengke aints ainau jakamunmaya

nantakiartin kinta jeamtaí, Yus aminka akirmaktinuitai. Turatin asamtaí warastinuitme, —Jesús timiayi.

Yuta yuwamu fiesta pachisar nuikiartamu
(Mat. 22.1-10)

¹⁵Tamati chikich aints nu misanam yuwak pujus Jesúsán chicharak:

—Yus pujamunam yutan yuwinauka nekasar warainawai, —timiayi.

¹⁶Tamati Jesús nuikiartutai chichaman etserak:

—Antukta. Aints fiestan najanatas nu kintati yuwitaram tusa, aintsun untsurin chichaman akuptukmiayi. ¹⁷Tura mash umisamtaí, ni inatirin akupak: ‘Yamaikia winitaram. Yanchuk mash umismawaitai, tawai tita,’ tusa untsukmau ainamunam akupkamiayi. ¹⁸Turamaitiat untsukmau ainau mash: ‘Wait aneam tsangku-trurta, wikia winichmin nekapejai,’ tusar apu inatirin ujakarmiayi. Tura nu nangkamtaik untsukmauka chicharak: ‘Ajan yamai sumaku asan, jiitaj tusan wetatjai. Wait aneam tsangku-trurta tawai tita,’ timiayi. ¹⁹Tura chikitcha chicharak: ‘Wikia waakan diez (10) sumarmaku asan çjimiarchik jimiarchik apatkan itiur wekaasaintak? tusan nekapsatasan weajai. Tura asan winichminuitjai. Wait aneam tsangku-trurta tawai tita,’ timiayi.

²⁰Tura chikitcha chicharak: ‘Wikia pengké yamai nuwan nuwatkau asan winichmin nekapejai,’ timiayi. ²¹Tu tinam apu inatiri waketki, ni apurin jea ni timiaunaka mash ujakmiayi. Tu ujaam, apu kajak ni inatirin ataksha chicharak: ‘Yamaikia yaktanam tungkajin junta ainamunam, tura junta tsererchinmasha wári weme, nuni kuikiartichu ainausha, tura uweje mutchau ainausha, tura wainmichu ainausha, tura wekaichau ainausha, mash juni ikiankata tusa

akupkamiayi. ²²Tura akupkam, inatiri ayu tusa we, aints ainaun ikiankau asa, apurin weri chicharak: ‘Apu, ame turutmiame nunaka miatrusnak umikjai. Tura chikich aints keemsamin angkantaitai,’ timiayi. ²³Tamati apu chicharak: ‘Ayu, yamai ataksha jiinkim, jinta tsererchinam weme, tura ajanam pujuinamunmasha weme, aints irunu wainkam nusha untsukam juni itata. Wína jear piakat tusan wakerajai, apu timiayi. Nunia ni inatiri ainaun ataksha chicharak: ²⁴Wikia nekasan atumin tajarme: Aintsun eemkan untsukarmaja nuka wijaingkia kichkisha yuwacharti-nuitai,’ timiayi, —Jesús timiayi.^o

Jesús ni aintsri ainu pujustintrin pachis etserkamuri
(Mat. 10.37-38)

²⁵Nunia aints untsuri Jesúsán nemariarmiayi. Tuminamtai pajas jiis, Jesús nu aints ainaun chicharak: ²⁶“Aints ni aparincha, tura nukurincha, tura nuwarincha, tura uchirincha, tura yachiincha, tura umajincha wína nangka-masarang aneau asa, tura winasha nemartak wait wajatan nakitajai tauka wínaka nemartuschatnuitai. ²⁷Tura aints wína nemartustas wakerayat, mantuwarai tusa shamak nemartutan nakitakka wínaka nemartuschatnuitai.^p

²⁸“Atum ainautiram, juun jea kayajai jeamkatasrum wakerakrumka, nuka nángkamtsuk ðkuikian warutnak japawaintaj? ðKuikiar jeatpiash? tu nintimsaram jeamu wearme. ²⁹Aints nuna nintimtsuk waurtus jean jeamkatas nangkamayat, antsu kuikiarin amuak, jean jeamtan umitsuk inaisamtaikia, aints ainu nuna wainkar wishikinak:

³⁰“Jiistaram. Ju aintska jean jeamkatas nangkamayat umiktatkama tujinkayi,’ tiartinuitai. ³¹Chikitcha nintimrataram: Apu chikich nungkanmaya apurijai mesetan najanatas wakerak maanitan nangkamtsaing, ni suntari ainaun mash irumrar diez warang (10,000) amataikia, chikich apu veinte warang (20,000) suntarjai winawa nuna nepetkainjash tusa nintimui. ³²Tura nepetkachmin nekapeak, wína nepetukai tusa, ni nemasen arák pujaunak: Maaniachmi tusa chichaman akupawai. ³³Atum ainautirmesha nunisrumek, wína nemartustasrum wakerayatrum, atumnau aa nu mash inait nakitakrumka, winaka nemartuschatnuitrume,” Jesús timiayi.

Weea tumawaitrume tusa nuikiartamuri
(Mat. 5.13; Marc. 9.50)

³⁴Nunia Jesús ataksha nuikiartamun etserak: “Weeka nekas pengkeraitai. Tura wee michumangka ðitiur ataksha yapaktinuita? ³⁵Wee michumangka, árak pengker tsapait tusar, nujaingkia nungka-sha iwiarashtinuitai, tura numi pengker tsakarti tusar, nantujencha matsatrashtinuitai. Antsu wariksha itiurkachmin asamtai, aya japatnuitai. Aints ju chichamnaka antukar nintimrarti,” Jesús timiayi.^q

Uwija mengkakaun pachis nuikiartamuri
(Mat. 18.10-14)

15 ¹Jesús chichaamtai, kuikian juu ainausha tura chikich tunaarintin ainausha mash antukmi tusar kautkarmiayi. ²Tura asaramtai fariseo ainausha, tura Moisésa chichame nuikiartin ainausha Jesúsán pachisar ujmatinak:

o 14.24 (Yus aints ainaun wini winitaram tusa untsuamaitiat anturkarchatnun pachis nunaka timiayi.) **p 14.27** (Mat. 16.24; Marc. 8.34-35; Luc. 9.23; Juan 12.24) **q 14.35** (Atumsha wína umirtutsuk pujakrumka, winaka nemartuschatnuitrume taku timiayi.)

—Auka tuke tunaarintin ainaun pengker awajui. Tura tuke nijai iruntrar yuweenawai, —tunaiyarmiayi.⁷

³Tu aujmatinam Jesús nuna antuk nuikiartutai chichaman uwija wainiun pachis etserkamiayi. Tura etserak:
⁴“Atum ainautiram nintimrataram. Aints kichik pachak uwijartin kichik mengkatukam, noventa y nueve (99) uwija matsatunka ukuki, uwijarin mengkakaun eaktas werawapi. ⁵Tura we uwijarin wainak, yakajin wangkeas nukap warawawai. ⁶Tura ni jeen waketki, ni amikri ainaun, tura ni irutkamurincha ikiaanank untsuk: ‘Uwija mengkakaun wainkajai. Tura asantai wijai warastaram,’ tawai. ⁷Tura Yuscha nunisang aints noventa y nueve (99) wina tunaaruka atsawai tinaun wainkangka miatruska waraatsui. Antsu kichik tunaarintin ni nintimaurin yapajia Yusen: tsangkuturta tamatikia, Yuska nu aintsun wainak, kichik au wainaiti, noventa y nueve nangkamasang warastinuitai tajarme,” Jesús timiayi.⁸

Kuik mengkakamun pachis nuikiartamuri

⁸Tura ataksha chicharak:

“Chikich nuikiartutai chichamnasha tajarme: Nuwa diez (10) kuikian takaku nunia kichik mengkakamun, wainkataj tusa kantiin keemak, jean mash japimiak nu kuikianka eawai. ⁹Tura kuikiarin wainak ni amikri ainauncha untsuk, tura ni irutkamurincha untsuk: ‘Kuikian mengkakamun nunaka wainkajai. Tura asantai wijai warastaram,’ tawai. ¹⁰Tura asantai tajarme: Kichik tunaarintin ni nintimaurin yapajia Yusen tsangkuturta tamatikia, Yuse awemamuri ainan nu aintsun wainkar, nuwa kuik mengkakaun wainak warawawai nunisarang warawawai,” Jesús timiayi.

Aints ni uchirin tsangkuramun pachis etserkamuri

¹¹Nunia Jesús ataksha nuikiartutai chichaman etserak:

“Aints jimia uchirtin pujumiayi. ¹²Tura ekeri amia nu ni aparin chicharak: ‘Apaachia, ame jakaakmin kuikiar winar atata nu yamaik surusta,’ timiayi. Tu seam ni apar: Ayu tusa, japen akantuk ninu aa nuna susamiayi. ¹³Tura jumchik kinta nangkamaramtai, nu natsaka ninu aa nuna mash suruk, kuikiarin chumpia chikich nungkanam yajá wemiayi. Tura chikich nungkanam we nuni jea, nangkami pujus ni wakeramurijai kuikiarin mash amukmiayi. ¹⁴Tura kuikiari mash amukamun, nu nungkanmasha tsuka asantai, nisha yuwatatkama yuumakmiayi. ¹⁵Tura asa: Takatan eaktaj tusa, aints kuchirtinum jeamun, nu aintska: Kuchir waitrukta tusa natsan akupkamiayi. ¹⁶Tura kuchin yurin pujuinamunam jea, yaparak kuchi yutairincha yuwatas wakerau wainiat suritinak pengké susacharmiayi. ¹⁷Tura suritinam wake mesek nintimias: ¿Wina aparun jeen ni inatirisha warutmak pujuina? ¿Tura yutairisha warutmak ampun wea? Antsu wikia juni tsukajai wait wajajai. ¹⁸Tura wina aparun waketkin titatjai: ‘Apaachi, wikia Yusjai tura amijaisha tunau wajasjai. ¹⁹Tura asan yamaikia ami uchiram wajatnaka natsaamajai. Antsu ami inatiram takakmina nunisnak wisha takakmastajai titatjai, tu nintimramiayi. ²⁰Nunia ni aparun jeen waketkimiai. “Turamun ni aparin uchirin winaun wainak wait anentramiayi. Tura ampuki weri uchirin minakas mejeasmiayi. ²¹Turam nu natsa aparin chicharak: ‘Apaachi, wikia Yusjai tura amijaisha

tunau wajasjai. Tura asan yamaikia ami uchiram wajatnaka natsaamajai,' timiayi.

²²“Tamaitiat apari ni inatirin chicharak: ‘Wári wejmak nekas shiiram aa nu anstrami tusaram itaram. Tura uwejnium wetaisha wemamtikiami tusaram itaram. Nunia sapatcha wemamtikiami tusaram itaram. ²³Nunia waaka uchiri nekas apu aa nu maatarum. Tura maaram wári inaratarum. Turar iruntrar yuwar nunia nakurusmi. ²⁴Juka wína uchir jakawa nunisang pujuyayi. Antsu yamaikia ataksha iwiaakun wainkajai. Juka mengkatarkamiayi timiaja nunaka yamaikia wainkajai,’ timiayi. Tu tinamu asar fiestan najanawarmiayi.

²⁵“Tura jeanam nakurinak pujuinai, nu aintsu uchiri eemkaurisha ajanam takakmak pujumiayi. Tura takatan umis taa, nangku umpuamuncha antuk, nunia arawir tuntuyamuncha antuk, tura yaaminauncha antuk: Jiitaj tusa tarimiayi. ²⁶Tura tari anumak wajas, ni apari inatirin untuk: ‘¿Waruka aitkinawa?’ tusa iniasmiayi. ²⁷Tu iniam nusha chicharak: ‘Yachim tayi. Tura yachim jatsuk tau asamtai, aparam waaka uchiri nekas apu aa nu maatarum turamji. Tamati fiesta najankur aitkaji,’ timiayi. ²⁸Tu ujaam uchiri kajek jea waaitnasha nakitmiayi. Turamtai aparisha ni uchirin weri chicharak: ‘Uchirua wayaata. Tura wayaam yachim jiista,’ timiayi. ²⁹Tamaitiat uchiri ayaak: ‘Apaachia anturtukta. ¿Wikia aminka miatrusnak umirkun ami inatirnea nunisnak tuke takakmakun warutum musachik pujaja? Nusha amesha nekarme. Turayatum ameka: Amikrumjai fiesta najanatarum tusamka, chipu uchiri kichikisha suruweatsme. ³⁰Antsu aminu

uchirmeka ami kuikiarmin nuwa kungkatip ainaujai tura ni wakeramurijai mash amukusha ¿waruka waaka uchiri apu aa nusha maamsha aitkame?’ kajes timiayi. ³¹Tamaitiat apari chicharak: ‘Uchiru, ameka wijai tuke pujame. Tura winar aa nuka mash aminuitai. ³²Yachimka jakawa nunisang pujuya nu yamaikia iwiaaku ataksha tayi. Nuka mengkatarkamiayi timiaja nunaka yamaikia wainkajai. Tura asamtai nekasar fiesta najankur warastinuitji,’ uchirin timiayi.”

Jesús tusa nu nuikiartutai chichaman nuikiartimiayi.^t

Jea wainiun pachis nuikiartamu

16 ¹Nunia Jesús ni nuiniatiri ainaun chikich nuikiartamun nuiniak:

“Aints kuikiartin ni inatirin: ‘Jear waitrukta,’ tusa ukukmiau waininayat aints ainu kuikiartinun ujinak: ‘Jeemin wainuka kuikiarmin nangkami japui,’ tiarmiayi. ²Tu tinam ni jeen wainuncha untuk: ‘¿Amincha pachitmasar warina turaminawa? Yamaikia wína jear wainuka achatatme. Tura asamtai ¿wína kuikiarjai surukmausha iturkamame? tusam nu aaram surusta’ timiayi. ³Tamati ningki nintimias: ‘Maj, apur takatrun jurutrau asamtai, ¿wisha iturkatjak? Tura wína kakarmar atsau asamtai, nungka tautnasha takakmaschamawaitjai. Tura aints ainaun kuik nangkamrum surustaram tusan seamkinij wajatnaka natsaamajai. ⁴Tura yamaikia nunaka turatatjai. Wina takatur atsau asamtai, aints ainu wína jearun pujuita turutiarti tusan, yamaikia nintimratjai’ timiayi. ⁵Tu nintimias ni apurin tumaashmiakaru ainaun mash kichik kichik winitaram tusa untukmiayi. Tura eemak jearmia nuna chicharak: ‘¿Wína apur warutma

^t 15.32 (Aints ni tunaarin inais, Yusen tsangkuturta tamatikia, Yuscha warawai taku timiayi.)

tumashitme?’ timiayi. ⁶Tu iniam nisha aimiak: ‘Olivo macharin cien (100) tarrun tumashmiamjai,’ timiayi. Tamati kuikian wainin chicharak: ‘Pai, ju papikia tumaashrum aarmawa juka jukim, wári keemsam chikich papinum: Cincuenta (50) tarrun tumashmiamjai tusam aattrurta,’ timiayi. ⁷Nuna tusa ukuki, chikich aints taamtai: ‘¿Amesha warutam tumaashitme?’ tu iniam, nusha aimiak: ‘Trigon cien (100) sakan tumaashmiamjai,’ tamati, nunasha chicharak: ‘Pai, ju papikia tumaashrum aarmawa juka jukim, chikich papinum: Ochenta (80) sakan tumaashmiamjai tusam aattrurta,’ timiayi. ⁸Nunia jean wainu apuri nuna nekaa chichaak: ‘Timiá anangkartinka timiá nintipiapi awita,’ timiayi.”

Jesús nu nuikiartamun umis paan etserak: “Yusen umirchau ainau Yuse uchiri ainau nangkamasarang nintip ainawai. ⁹Kuikian wakerinauka tuke tunau takau ainawai. Tura asamtai tajarme: Atumka chikich ainau atumi kuikiarijai yaingtararam. Turaram atumi kuikiari amukamtai Yus: Wína jearun tuke pujustaram tusa atumin juramkitnuitrume.

¹⁰“Aints jumchik takakiat nujai pengker aa nuna turakka, nukap tákaka nujai metek turatnuitai. Antsu aints jumchik tákaka nujai pengker aa nuna turachkungka, nukap tákaka nujaisa pengker aa nunaka turashtinuitai. ¹¹Tura asamtai ju nungkanmaya kuikiartin ainau chikichan anangkinawa nunisrumek pujakrumka ¿nayaimpinam nekas pengker pujustin takatcha itiuurak takakmastaram? ¹²Tura atum ikiamsamu tenapkesrum wainchakrumngkia ¿Yus atumin suramsatas wakera nunaka itiuur suramsatrume?”

¹³“Apu jimiar metek nintimtsuk pujuinaunka aints kichkisha umirkartatkama

tujintinawai. Antsu kichnaka nakitnak kichan aneeniartinuitai. Tura kichkin umirnak, kichnaka pachischartinuitai. Tura asamtai atumka warinchu ainau aneakrumka aya nuke aneetaram. Antsu Yus aneakrumka aya Yusek aneetaram. Antsu mai aneakrumka nuka yumtinuitai,” Jesús timiayi.”

¹⁴Tamati fariseo ainau nuna antukar, kuikian tuke aneenau asar, Jesús an wishikrarmiayi. ¹⁵Tuminamtai Jesús chicharak:

“Atumka wína pengke aintsuitme turutiarat tusaram, aints ainau anangu wearme. Yuska atumi nintinka nekartarume. Tura asa aints ainau nekasar wínaka: Miajuitme turutiarat tu nintiminaunka Yuska nakitawai,” Jesús timiayi.

Yaanchuik Yuse chichame etserkamun tura yamai etserkamuncha pachis timiauri

¹⁶Nunia Jesús ataksha etserak: “Juan Yuse chichamen etsertsaing, aints ainau Moisésa chichamen antuku armiai. Tura yaanchuik Yuse chichamen etserin ainau etseriarmia nunasha antuku armiai. Tura Juan taa, Yus itiuur pujawa tusa, yamaram chichaman etsertan nangkamamiayi. Tura nu chichamnasha yamaisha tuke etserjai. Tura asamtai aints ainau Yus pujamunam pachitsuk wayaatar wakerinawai.”

¹⁷“Tura nayaimpisha tura nungkasha meseatsaing, Moisésa aarmauringkia pengké tuupchiksha yapaijniashtinuitai. Antsu mash aarmawa nunisang umiktinuitai,” Jesús timiayi.”^x

Nuwa japashtinun pachis etserkamu
(Mat. 19.1-12; Marc. 10.1-12)

¹⁸Nunia Jesús ataksha chichaak: “Aints ni nuwarin ajapa ukuki kichan nuwatkungka, nekas tunau wajawai. Tura

aints nuwan ajapamun nuwatkausha nunisang tunau wajawai,” timiayi.^y

Jimia aints jakamurin pachis etserkamu

¹⁹Tura Jesús ataksha chikich chichaman etserak:

“Aints kuikiartin wejman akikian entsar shiirman pujuyayi. Tura kintajai metek fiestan najanak nakuru pujuyayi. ²⁰Tura chikich aints kuikiartichu Lázaro naartin kuchaprintin asa, kuikiartinu jee aarin ayaamas pujuyayi. ²¹Tura timiá yaparau asa, kuikiartin yuwamu misanmaya kakeekaun yuwatas wakerimiayi. Tuma pujaun yawaa ainau ni kuchaprin nukatarmiayi. ²²Tura kintari jeamtai, kuikiartichuka jakamiayi. Tura jakamtai, Yuse awemamuri tariar, ni wakani Abrahamjai tsanias pujusti tusar, Yusen umirkau jakaru matsamtai-num jukiarmiayi. Kuikiartichu jakau ai, kuikiartincha ukunam jakamiayi. Tura jakamtai namangken iwiarsaniamiyi.

²³Tura kuikiartinu wakaningkia tunau ainau wait wajainamunam jeamiayi. Tura nuni jea, nukap waitnas pujus pangkai jiiimias, Abraham arák pujaun wainkamiayi, tura Lázaroncha nijai tsanias pujaun wainkamiayi. ²⁴Tura wainak kakar untsuak: ‘Apaachiru Abraham, wait anentrurta. Turam juni Lázaro akupturkata. Wikia juni ji kajintrashtinum waitnasan pujajai. Tura asamtai juni taruti, tura tsaranchikijai yumin chupir inairun jumchikia michatmamtikrutati,’ timiayi. ²⁵Tamaitiat Abraham ayaak: ‘Uchiru nintimrata. Ameka iwiaaku pujakum, yuumatsuk wait wajatsuk pujuyame. Antsu Lázaroka nukap wait wajaaj pujuyayi, tura yamaikia juni ayamui. Tura ame atak iiksamek wait wajame. ²⁶Tura mura waach juun wakachmin asamtai, junia atumin

winitramiartatkamawar tujintraminawai, tura atumniasha juni winiartatkamawar tujintinawai,’ Abraham timiayi.

²⁷Tamati kuikiartin ataksha chicharak: ‘Antsu Apaachiru Abraham wait aneamam, Lázaroka aparú jeen akupturkata tusan tajame. ²⁸Nuni wína yatsur cinco (5) pujuinawai. Niisha juni wait wajamunam winicharti tusan ujakat tusan tajame,’ timiayi. ²⁹Tamaitiat Abraham chicharak: ‘Moisésa aarmaurinchacha tura yaanchuik Yuse chichamen etserin aarmaurinchacha takakinawai. Nuna antukar umirkarti,’ timiayi. ³⁰Tamati kuikiartin Abrahaman ayaak: ‘Apaachir Abraham nekasam tame. Antsu aints jakamunmaya nantaki, nuni we chichaman etsermataikia, ni tunaarin inaisar nintin yapajiwarchaintash’ timiayi. ³¹Tamaitiat Abraham ayaak: ‘Antsu Moisésa aarmaurinchacha tura yaanchuik Yuse chichame etserin ainau aarmaurinchacha antinachkungka, aints jakau nantaki weaun waininayat, niin nekasampita tichartin ainawai,’ tusa Jesús nu chichaman etserkamiayi.

Tunaanum jeai tusaram aneartaram timiauri

(Mat. 18.6-7; 21-22; Marc. 9.42)

17 ¹Jesús ni nuiniatiri ainaun chicharak:

“Chikichan tunaun takamtikin ainauka tuke irunui. Antsu tunaun takamtikin ainauka nukap wait wajakartin ainawai. ²Tura aints uchin tunau takamtikmatikia nuna turashti tusar, tunau takamtiknu kuntujen kaya juuntan jingkiatawar, juun kunanam ujugkaramtaikia, timiá pengker atinuitai. ³Nekasrum chikich ainaun tunaun takamtiksai tusaram wainkataram.

“Chikich aints Yusen umirkau atumin pasé awajtaminamtaikia atumka chichar-

kataram. Tura niisha tunaar tsangkururta turaminamtaikia, tsangkuratararam. ⁴Kichik kintatik tunaun siete (7) túrumtikramayat ataksha: ‘Tunaar tsangkururta, ataksha turashtatjame,’ tusa siete (7) tarutrami turammataikia, tuke tsangkuratararam,” Jesús timiayi.

Yusen nekasampita tusar nintimtinauka tujintinatsui timiauri

⁵Tamati Jesúsá nuiniatiri ainau niin chicharinak:

—Apuru, iikia Yus nekasampita tusar nintimtaji. Tura nuna nangkamasrik nintimtustincha yaimkartukta, —tiarmiayi.

⁶Tu tinam ni Apuri chicharak:

—¿Mostaza jingkiayi timiá tuupchichukai? Turayat nuka tsapai, nekas chikich nupaa nangkamasang juun ayi. Atumsha mianchau ayatrumek, wina nintimtursaram: Nekasam tujinkachuitme turutkurminkia, wi: Turataram tinu asamtai, ju numi morera tutain chicharkuram: Junia kangkaptuk kuimiakam, ataksha juun entsa japen wajasta takurminkia nekas turunamnawaitai, —Jesús timiayi.

Yuse inatiri ainaun pachis etserkamuri

⁷Nunia Jesús ataksha chicharak:

“Atumi inatiri waaka ainaujai nungkan tsaiinak wekaa wekaaka, tura chikich inati waakan wainuka ni takatrin umisar jeansam taaramtai, ¿atumi inatiri chicharkuram: ‘Winita, tura keemsam yuwita’ timinkitrum? ⁸Atsa, antsu atumi inatiri chicharkuram: ‘Yurumak inaturata. Tura wajasam, wi yuwatniursha tura wi amurtincha surusminam umista. ¿Wiyá yuwamtai, ameka arum ukunam yuwamnum,’ tichaintrumek? ⁹Atumi inatiri atumin miatrusarang umirtaminak yutan yurtamawaramtaisha atumka: Maaketai, pengker umikume pengké tatsurme.

¹⁰Tura Yus turamia nuka mash umisrum: ‘Nekasan Yusen pengker umirkajai’ atumsha tichamnawaitrume, antsu atumi Apuri turamin asamtai: ‘Iikia ni inatiri asar, iin turammiaji nuke umirkaji, tura asar mianchawaitji’ titinuitrume,” Jesús timiayi.

Jesús diez kuchaprintin ainaun tsuwarmauri

¹¹Jesús Jerusalénnum wetas Galilea nungkanmaya jinki, Samaria nungkanam nangkamakmiayi. ¹²Tura chikich yaktanam jeamtai, kuchaprintin diez (10) irunmia nuka arák wajasar, ¹³untsuminak: —Nuikiartinua Jesúsá, wait anengkrat-kata, —tiarmiayi.

¹⁴Tu tinam Jesúscha niin wainak:

—Atum sacerdote pujamunam wetaram. Turakrumin ni jiirmasti, —timiayi.

Tamati ayu tusar, sacerdoten jiitasar wekamawar, jinta weenak pengker wajasarmiayi. ¹⁵Tura kichik kuchaprintin ni pengker wajasaurin wainak kakar chichaak: Yus juuntaitai tusa, nunia ningki waketki ataksha Jesúsán tarimiayi. ¹⁶Nuka Samarianmaya aintsuyayi. Tura Jesúsán tari tikishmatar tsuntsumrua nungkan antitak wajas Jesúsán maaketai timiayi. ¹⁷Tumamtai Jesús chicharak:

—¿Pengker wajasaruka diezchakai? ¿Chikich nueve (9) aintcha warukawarma? ¹⁸¿Ju chikich nungkanmaya aintska jukek Yus juuntaitai titas waketki taj? —timiayi.

¹⁹Tura nu aints tikishmarun chicharak:

—Wajakim weta. Wina nekasampita turutu asam pengker wajasume, —timiayi.

Jesús ni tatintrin pachis etserkamuri

(Mat. 24.23-28, 36-41)

²⁰Fariseo ainau Jesúsán iniinak:

—¿Yuska ju nungkanmaya ainaun inartin kinta warutik at? —tiarmiayi. Tu tinam Jesús aimiak:

—Yus aints ainaun inartin kintaka paanka nekaachminuitrume. ²¹Tura Yuska yamaisha tuke atumjai pujaw asamtai, aints ainau nangkamiar: Yuska juni pujawai, tura anisha pujawai tichamnawaitai, —timiayi.

²²Nunia ni nuiniatiri ainaun chicharak:

—Wikia aintsutiatnak Yus akupkamu asamtai, atumsha winasha pachitsaram, kichik kintaksha wainkatar wakeraji titinuitrume. Turayatrum winaka waitkashtinuitrume. ²³Chikich aintcha nangkamiar chichartaminak: Juni pujawai tura ani pujawai turaminau wainiatrumek nuni werirap. Tura nu aints ainausha nemarkairap. ²⁴Wikia aintsutiatnak Yus akupkamu asan, wi tatin kintar jeamtai, peem newarat tsantak nayaim mash paan wajawa nunisnak wi winamurka nekas paan atinuitai. ²⁵Tura nu kinta jeatsaing, wi ju nungkanam pujusan nukap wait wajaktatjai. Turamtai junia aints ainau winaka nakitrurartatui. ²⁶Wi tatin kintar jeamtai, yaanchuik Noé pujamunam aints tunau puju armia nunisarang pujusartinuitai. ²⁷Nu aints ainau Yusen nintimtsuk yutancha yuj, tura umutnasha umuj puju armiyai. Tura nuwan nuwatnaikiarmiyai. Tura nawantrincha aintsun ninumkati tusar surin armiyai. Tuma pujuinai kintari jeamtai, Noé juun kanunam engkemamiayi. Turamtai nujang aneachmau aints ainaun mash amukmiayi. ²⁸Tura yaanchuik aints Lot naartin pujus, nu yaktanmaya ainausha nunisarang Yusen nintimtsuk yutancha yu armiyai, tura umutnasha umin armiyai, tura waririncha sumin armiyai, tura surin armiyai, tura yurumkancha arau armiyai, tura jeanचा jeamin armiyai. ²⁹Tura Lot

Sodoma yaktanmaya jiinkiamtai, Yus yakiya kayan jiya tumaun kapainaun azufrejai pachimramun akupak, nu aints ainaun mash amukmiayi. ³⁰Tura asamtai aints ainau winasha nintimturtsuk pujuinamunam wi tatin kintarsha nunisang aneachmau atinuitai. ^c

³¹“Nu kinta jeamtai, aints jea jimia pata jeamkamunam yakí pujauka wári kuanak waririncha jutsuk tupikiaktinuitai. Tura aints ajanam takakmausha ni jeen waketsuk tupikiaktinuitai. ^d ³²Lota nuwari turunamuri nintimrataram. ^e ³³Aints ju nungkanam aa nunaka nintimias tuke iwiaaku pujustas wakerayat tuke mengkakatnuitai. Antsu aints wina umirtuku asa, niin mainamsha, jakayat ataksha nantaki tuke iwiaaku pujustinuitai. ^f

³⁴“Nunasha tajarme: Nu kintati kashi jimia aints kichik peaknumak kanú tepeenauncha kichik jukitnuitai, antsu kichka juwaktinuitai. ³⁵Tura nuwasha jimiar tsaniasar trigo jingkiajian nekenak pujuinauncha kichik jukitnuitai, antsu kichka juwaktinuitai. ³⁶Tura aishmangsha jimiar ajanam tsaniasar takakminamtaisha kichik jukitnuitai, antsu kichka juwaktinuitai,” Jesús timiyai.

³⁷Tamati nuna antukar:

—Apu ru nusha nekascha tuning turunatnuita? —tiarmiyai.

Tu tinam Jesús ayaak:

—Jakau tepamunam chiwiang kauninawai, —timiayi. ^g

Aints ainau tuke yawetsuk Yusen searti timiauri

18 ¹Aints ainau tuke yawetsuk Yusen searti tusa, Jesús ataksha nuikiartamun etserkamiayi. ²Tura nuikiartak:

z 17.24 (Mat. 24.26-27) a 17.26 (Gén. 6.5-8) b 17.27 (Gén. 7.6-24)

c 17.30 (Gén. 18.20-19.25) d 17.31 (Mat. 24.17-18; Marc. 13.15-16) e 17.32 (Gén. 19.26)

f 17.33 (Mat. 10.39;16.25; Marc. 8.35; Luc. 9.24;17.33; Juan 12.25) g 17.37 (Mat. 24.28; Apoc. 19.17-18)

—Chikich yaktanam apu chichaman iwiarin pujuyayi. Nuka Yusnaka shamchayuyayi. Tura aints ainauncha pachichuyayi. ³Tura nu yaktanmasha nuwa waje pujuyayi. Niisha chichaman iwiarniun jiistas weri chicharak: ‘Wait aneasam, aints wína pasé awajtusú chicharkata,’ tusa waketrú pujuyayi. ⁴Nu nuwaka chichaman iwiarniun tuke waketrú pujurmasha yayitnasha nakitmiayi. Tura waje nukap waketrámu asa, nuka nintimias: ‘Wisha Yusen shamachiatnak, aints ainauncha pachichutiatnak, ⁵nu nuwaka tuke wína waitkangka turutu asamtai, ataksha winamtai kajertukai tusan yaingtajai’ timiayi, —Jesús timiayi.

⁶Nu nuikiartamun etsertan umis, ii Apuri ataksha chichaak:

—¿Nu chichaman iwiarin pasé ayat tímia nuka antukurmek? ⁷Tura Yuse aintsri ainau tsawaisha, tura kashisha Yusen sea seamka, Yus nu chichaman iwiarniun nangkamasang pengker asa ¿ni aintsri ainau anturtsuk inaisatniukai, tura yaitsuk inaisatniukai? ⁸Atsa, antsu wári yaingtinuitai tajarme. Tura wikia aintsutiatnak Yus akupkamu asan, ataksha ju nungkanam winaknaka ¿aints ainau wina nekasampita turutinaunka wainkatjash? —Jesús timiayi.

Jimia aints Yusen seamuri

⁹Tura aints ainau: Wikia pengkeraitjai tumamsar, antsu chikich aints pasé ainawai, tu nintiminaun wainak, Jesús chikich nuikiartamun nuikiartak:

¹⁰—Aints kuikian juu tura fariseo aintcha mai Yusen seartas Yus seatai juun jeanam wayaawarmiayi. ¹¹Tura fariseo wajaki nuwá eemak Yusen seak: ‘Yusru, wikia tunau ainaujai metekchawaitjai. Kasamtancha pengké kasamchawaitjai.

Tura nuwajaisha tsanirmichuitjai. Antsu aints kuikian juu waja auka wijaingkia metekchawaitai. Tura asan maaketai tajame. ¹²Tumingjai metek jimia kintan yutsuk ijiarmaan aminka seaweajme,’ ningki nintimias tu seamiai. ¹³Tu seam, aints kuikian juu arák wajas, natsaamak tsuntsuma pangkaisha jiiimtsuk, wake mesek netsepen uwejejai awatkamaikiak: ‘Yusru, wikia tunau asamtai, wait anentrurta,’ tu Yusen seamiai. ¹⁴Tura wikia tajarme: Aints kuikian juu tu seam, Yus ni tunaarin tsangkuramu asa, pengker nintimias ni jeen waketkimiayi. Antsu fariseoka nangkami: Wikia pengkeraitjai tinu asamtai, Yuska niinka tsangkurachmiayi. Tura asamtai tajarme: Aints ningki nintimtasang: Wikia miajuitjai taunka Yuska: Ameka mianchawaitme tawai. Tura nekas mianchawaitjai tumamunka Yuska: Ameka nekasam miajuitme tawai, —Jesús timiayi.^h

Uchi ainau wini winiarti timiauri

(Mat. 19.13-15; Marc. 10.13-16)

¹⁵Tura aints ainau: Jesús uchin takasat tusar itariarmiayi. Turinamtai Jesúsá nuiniatiri ainau nuna wainkar: Uchi itairap tusar surimiarmiayi. ¹⁶Tinamtai Jesús niin untsuak:

—Uchi wini winiarat tusaram tsangka-truktaram. Aints ju uchia nunisarang nekasampita turutin ainauka Yuse pujutirin jeartinuitai. Tura asaram suritrukairap. ¹⁷Nekasan tajarme: Aints Yuse pujutirin wayaawartas wakerinauka uchi nekasar ititirkachmin nintimtsuk pujuinau asar nuni wayaawartinuitai, —Jesús timiayi.ⁱ

Kuikiartin Jesúsjai chichasmauri

(Mat. 19.16-30; Marc. 10.17-31)

¹⁸Apu ainau iruntramunam kichik apu Jesúsán chicharak:

—Nuikiartinu, nekas pengkeraitme. Tura asakmin iniajme: ¿Pujut nangkan-kashtinun jukitasnasha warinak itiurkataj? nu ujatkata, —timiayi.

¹⁹Tama Jesús ayaak:

—¿Waruka winasha pengkeraitme turutme? Nekas pengker aa nuka kichkitai. Nuka Yusketai. ²⁰Tura asamtai Yus wína chichamur umirtuktaram tǎmia nuka nekame. Nu aarmauka nuwaitai: ‘Tsanirmawairap, tura mangkartuwairap, tura kichnau aa nuka kasamkairap, tura aints kichkisha pachisrum tsanumrairap. Tura aparmesha, tura nukurmesha umirkataram,’ tu aarmawaitai, —Jesús timiayi.^J

²¹Tamati nu aintska chicharak:

—Ame tame nunaka uchiwach asanak tuke mash umikuitjai, —timiayi.

²²Tama Jesús nuna antuk ayaak:

—Kichik chicham umikchau asam, nusha turata: Ami wariram aa nusha mash surukam, yuuminau susata. Nunia nemartusta. Turakum nekasam nayaimpi-nam yuumsasuk pujustinuitme, —Jesús timiayi.

²³Tamati nuna antuk nekas kuikiartin asa, nukap wake mesekmiayi. ²⁴Wake mesekamtai Jesús nuna wainak chichaak:

—Kuikiartin ni kuikiarin aneenu asar, Yus pujamunam wayaawartatkamawar nekasar tujintinawai. ²⁵¿Kamiyusha akusha jiin wayaamnaukai? Atsa, nuka pengké yumtinitai. Tura kuikiartin ainausha nunisarang Yus pujamunam wayaatnuka pengké yumtinitai, —Jesús timiayi.

²⁶Tamati aints nuna antukaru ainau chicharinak:

—Tu amataisha ¿yaachik nuniasha uwemramnawaita? —tiarmiayi.

²⁷Tu tinam Jesús ayaak:

—Aints ningki nintimsangka pengké uwemrachminuitai. Antsu Yuska pengké tujinkachuitai, —timiayi.

²⁸Tamati Pedro chicharak:

—Apuru, ii ainautikia iinu amia nuka mash ukukir, ame nemarsamiayi, —timiayi. ²⁹Tamati Jesús ayaak: —Nekasam tame. Antsu wikia atumin tajarme: Aints Yusen umirkatas ni jeencha, tura nuwarincha, tura yachiincha, tura umajincha, tura aparincha, tura nukurincha, tura uchirincha ukuakka, ³⁰ju nungkanam pujus ni ukukmia nuna nangkamasang untsurin wainkatnuitai. Nuniangka jaka nantaki, tuke Yusnum iwiaaku pujustinuitai, —timiayi.

Ni jakatniurin pachis ataksha etserkamuri

(*Mat. 20.17-19; Marc. 10.32-34*)

³¹Jesús ni nuiniatirin doce (12) amia nuna akanak juki, nunia chicharak:

—Yamaikia Jerusalénnum weaji. Tura wi aintsutiatnak Yus akupkamu asamtai, yaanchuik Yuse chichamen etserin ainau wína pachitsar aatrurarmia nunisnak umiktatjai. ³²Tura romano ainamunam wína surutkaramtai, wína wishikrinak nunia pasé chichartinak usukurartatui. ³³Tura katsumrukar nunia mantuwartatui. Tura mantuwaru wainiatnak, kampakam kinta jakan tepayatum, ataksha nantaktatjai, —timiayi.^K

³⁴Paan etserkau waininayat, ni nuiniatiri ainau nu chichamnaka nekaawartatkamawar pengké nekaacharmiayi. Tura Jesús a chichamen antinayat: Nekas nunaapi taku tawa tusar nintimracharmiayi.

Jesús Jericónmaya aintsun wainmamtikiamuri

(*Mat. 20.29-34; Marc. 10.46-52*)

³⁵Jericó yaktanam jeatas jintá weak, Jesús wainmichun jinta yantarin pujaun

wankamiayi. Nu aintska aints nangkaaminau kuikiarin tuke seauyayi. ³⁶Tura aints untsuri nangkaaminamtai, nuna antuk: Yaachita, tu inintrusmiayi. ³⁷Tu iniam:

—Nazaretnumia Jesús nangkaamawai, —tiarmiayi. ³⁸Tu tinam, nuna antuk untsamak:

—Jesúsa, Davidta weariya, wína wait anentrurta, —timiayi.

³⁹Tu untsuam eemkar wearmia nuka jiyainak:

—Itatkata, —tiarmiayi. Tinamaitiat nuna nangkamasang kakar untsamak:

—Davidta weariya, wait anentrurta, —timiayi. ⁴⁰Tu untsuam, Jesús nuni wajas:

—Au juni itataram, —tusa, akupkam wainmichun itaaramtai, Jesús iniak:

⁴¹—¿Iiturtukat tusamea wakerutame? —timiayi. Tu iniam wainmichu aimiak:

—Apu, wainmachkun wainmaktasan wakerajai, —timiayi.

⁴²Tamati Jesús chicharak:

—Paan jiiimtia. Ame wína nekasampita turutu asam, pengker wajasume, —timiayi.

⁴³Nu chichamuik paan wainmakmiayi. Tura asa Yus juuntapita tusa Jesúsán nemarsamiayi. Tura aints nuna wainkarka mash: Yus juuntapita tiarmiayi.

Jesús Zaqueojai chichasmauri

19 ¹Nunia Jesús Jericó yaktanam waya wekakiniy wajamiayi. ²Nuni kuikiartin Zaqueo naartin pujumiayi. Nuka aintsu kuikiari juu apuri ayayi. ³Zaqueoka Jesúsán wainkatas wakerayat satarach asa, aints untsuri Jesúsán jiiisartas kawengkaramtai, wainkatatkama pengké wainkachmiayi. ⁴Tura Jesús nu jintanam nangkamaktin asamtai, Zaqueo jiiistaj tusa eemak ampuki we numinam

wakamiayi. ⁵Tura numinam keemas nakaj pujamtai, Jesús nuke nangkamak, pangkai jiiis chicharak:

—Zaqueowa, wári tarata. Yamaikia jeemin kanurtasan winajai, —timiayi.

⁶Tamati Zaqueo wári tara pengker nintimias Jesúsán ni jeen jeemiayi.

⁷Turamtai aints ainu nuna wainkar:

—Maj, auka nekas tunau aintsu jeen wayaayi, —tusa ujmatiararmiayi. ⁸Tura jea waya pujamtai, Zaqueo wajaki Jesúsán chicharak:

—Apu anturtukta. Kuikian tákakja nuna japen akanan kuikiartichu ainaun susatjai. Tura aints ainaun anangkan, kuikiarin kichik kasamkamun ataksha cuatron awangtukiartajai, —timiayi.

⁹Tamati Jesús chicharak:

—Ayu, turata. Ju jeenam pujuinautiram yamaikia uwemrau asaram, yaanchuiksha nangkamrum Abrahama wearinji tinuyarme. Antsu yamaikia nekasrum Abrahama weari wajasurme.

¹⁰Wisha aintsutiatak Yus akupkamu asan, mengkakarua ainaun eakan, Yusnum uwemtikrataj tusan taawitjai, —Jesús timiayi.¹

Kuikian pachis nuikiartamu

(Mat. 25.14-30)

¹¹Jesús Jerusalénnum jeatak wajasu asamtai, aints ainu ni etsermaurin antukaru ainu nintiminak: Ni Jerusalénnum jea, wári aints ainaun inatan nangkamatatu, tu nintimrarai tusa, chikich nuikiartamun etserkamiayi.

¹²Tura nuikiartak:

—Aints chikich ainaun nangkamasang juun asa, apu naamkatas chikich nungkanam wemiayi. ¹³Tura nu nungkanam weatsaing, ni inatirin diez (10) amia nuna untsuk, kuik jimia pachak kinta takakmasmaun akiimiakminun kichik

kichik susa chicharak: ‘Kuikiar yujarti tusaram, ju kuikiajai takakmajataram. Tura wi taamtai wangturkimmuram’ tusa ukuki, chikich nungkanam wemiayi.

¹⁴Turamtai ni nungkarinia ainu nu aintsun nakitinau asar, chikich nungkanmaya apun ujakarti tusar: Nu aintska ii apuri ati tutaka nakitaji titaram, tusar aints ainu akupkarmiayi.

¹⁵“Tinamaitiat nu aints apu naamkau asa, ataksha ni nungkarin tamiayi. Tura taa ni inatiri ainu: ¿Kuikian warutmak kiauunkara? tusa nekaatas untsukmiayi.

¹⁶Apu untsukam, ni inatiri kichik taa chicharak: ‘Ami kuikiarmijai takakmasu asan, mash irumram jimia warang kinta takakmasmau akiimiakminun kiauuntukjame, nu jukita,’ timiayi. ¹⁷Tamati apu chicharak: ‘Ayu, maaketai. Nekasam pengker takakmasume. Wikia jumchik susamijme nujai wi timiaja nunismek pengker takakmasu asakmin, diez (10) yakat ainia nu wainin ata tusan inaikiatjame,’ timiayi.^m

¹⁸“Nuna tusa ukukiamtai, kitcha tari chicharak: ‘Apu, ame kuik surusmiame nujai takakmasu asan, mash irumram kichik warang kinta takakmasmau akiimiakminun kiauuntukjame,’ timiayi.

¹⁹Tamati nu aintsnasha apu chicharak: ‘Ame cinco (5) yakat ainia nu wainin ata tusan inaikiatjame,’ timiayi.

²⁰⁻²¹“Nuna tusa ukukiamtai, chikitcha tari chicharak: ‘Apu, ameka nekasam kakaram takamtikin asam, tura kuik ukuschayatun achiu asam, tura árak araachiatum juutrukta tinu asakmin, wisha nunaka nekau asan amin shamakun, ami kuikiarmin panuijai ijaan ukusmiajai. Pai, kuikiarmeka,’ timiayi.

²²Tamati apu chicharak: ‘Maj, ameka nakitme. Ame turutme nunisketjai. Wi kakarman takamtikin asam, tura kuikian

ukuschayatun achiu asan, tura arakan araachiatnak: Juutrukta taja nuka nekayatmesha ²³¿warukaya kuik irumtainum kuikiarka ukutruschamiamé?

Turakminka chikich aints ainu wina kuikiarjai takakminamtai, wi ataksha tana, kuikian susamijme nuna nangkasmasnak nukap jukimnawaitjai,’ timiayi.

²⁴Nunia aints nuni wajainaun chicharak: ‘Kuikian takaka nu jurukrum, chikich aints jimia warang kinta takakmasmau akiimiakminun kiauunkamia nu susataram,’ timiayi. ²⁵Tamati nu aints ainu apurin chicharinak: ‘Apu ¿ju aints yanchuk timiá untsuri takakusha warukarik ataksha susatji?’ tiarmiayi.

²⁶Tu tinam apu aimiak: ‘Aints nukap takakmasuka nukap takakui. Tura nukap takakmasu asamtai, nuna nangkasmasrik susatnuitji. Antsu tákakchauka takatan pengké nakitau asamtai, jumchik tákaka nuka juruktinuitai.’ⁿ ²⁷Tura wina nemasur ainu: Apu wajaschati tusar nakituru asaramtai, yaruakrum mash juni itataram. Tura itaram wisha jiiang maataran,’ apu timiayi,” Jesús tusa ni tatintrin pachis nu nuikiartamun etserkamiayi.

Jesús Jerusalénnum wemaui

(*Mat. 21.1-11; Marc. 11.1-11; Juan 12.12-19*)

²⁸Nuna tusa umis, Jesús nunia jiinki Jerusalénnum wemiayi. ²⁹Tura wea weaka Betfagé yaktanmasha, tura Betania yaktanmasha arakchichu mura Olivo tutainum jeatak wajasar Jesús ni nuiniatirin jmiarman akupak:

³⁰—Atunini yaktachinam arakchichu aa nuni werum, tura nuni jearan burro entsakrachau jingkiamu wainkatatrumé. Tura nu wainkaram atiarman juni itataram. ³¹Tura ¿waruka aitkarme? turaminamtaisha, ‘Apu yumau asamtai juwaji’ titaram, —timiayi.

³²Tamati ni nuiniatiri ayu tusar wear, Jesús tímia nunisarang wainkarmiyai.

³³Tura burron wainkar atinamtai, burrortin chicharinak:

—¿Waruka burrosha atiarne?

—tiarmiyai.

³⁴Tu tinam aiminak:

—Apu yumau asamtaí juwaji, —tiarmiyai.

³⁵Tura burron jukiari Jesúsnum itaar, ni wejmakrin aimiakar, burronam awantsar Jesúsán kentsarmiyai. ³⁶Turinamtaí Jesús burronam keemas weamtaí, junta wetinum aints ainau: Ii Apurinme tiartas ni wejmakrin aimiakar nungkanam aítkarmiyai. ³⁷Tura ni namarin ainau untsuri Jesúsjaí tsaniasar Olivo Muranmaya wangkenmanum arakchichu wekaasar, Jesús aints ainau wainchataí takatan mash turaun wainkaru asar, nuna nintimsar warainak kakarar untsumkarmiyai. ³⁸Tura:

—Yus akupkamu winá nuka nekas ii Apurintai. Tura Yus nayaimpinam puja nuka nekas juuntapita, —tiarmiyai.

³⁹Tinamtaí fariseo untsurinchau nu aintsnumak pachinkar wajarmia nuka Jesúsán chicharinak:

—Nuikiartinu, amin nemartamina nuka itatkataram tusam chicharkata, —tiarmiyai.

⁴⁰Tinamaitiat Jesús ayaak:

—Ju aints ainau itatkaramtaikia, kaya ainausha untsumkartatui, —timiyai.

⁴¹Tura Jerusalénnum jeatak wajas, nu yaktan ukunam suntar ainau amukartin asaramtaí, Jesús nuna nekau asa juutmiyai. ⁴²Tura chichaak: —Jerusalénnum pujuinautiram, atumi kintari jeatsaing, angkañ pujustiniun sukartin nekaataram tusan wakerin ayajai. Turayat yamaikikia uukmawa nunisang asamtaí, nekaatatkamaram tujintarme.

⁴³Kinta nekas shamai atumin jeartamti-nuitrume. Nu kinta jeamtaí, atumi nemase ainau kaunkar, atumi yaktarin tentakar, mesetan najanawartas nungka-jaí wenurartinuitai. ⁴⁴Yuska atumin uwemtikramratas irawa nunisang tarutramin wainiatrum, atumka nintinchau asakrumin, atumi uchirincha maawar, tura atumnasha mantamawar, yakat kayajai jeamkamu waininayat mash yumpungkartinuitai, —Jesús timiyai.

Yuse jeengka kasa jeenchuitai timiauri
(*Mat. 21.12-17; Marc. 11.15-19; Juan 2.13-22*)

⁴⁵Nunia Jesús Yus seataí juun jeanam waya, tangku ainaun Yusen susartas surinaun wainak, aanum jiiki akupkarmiyai. ⁴⁶Tura chicharak:

—Yuse chichame yaanchuik tu aarmawaitai. Yus chichaak: ‘Wína jearka Yus seataí jeaitai,’ tu aarmau wainiatrum, atumka kasa aints juni kuikian kasamkarti tusaram tsangkatkarume, —timiyai.

⁴⁷Nunia Jesús Yus seataí jeanam waya, aints ainaun kintajai metek Yuse chichamen nuiniarmiyai. Turamtaí sacerdote juuntri ainausha, tura Moisésa chichame nuikiartin ainausha, tura judío juuntri ainausha mash iruntrar: “¿Itiurak Jesús maawaintai?” tu nintimrarmiyai.

⁴⁸Tu nintiminayat, aints mash Jesúsá chichamen pengker nintimsar anturinaun asaramtaí, maawartatkamawar arantukarmiyai.^o

¿Yáki Jesúsán ni kakarmarin susaya?
(*Mat. 21.23-27; Marc. 11.27-33*)

20 ¹Chikich kintati Jesús Yus seataí jeanam waya, aints ainaun Yusnum uwemratin chichaman nuiniak pujamtaí, sacerdote juuntri ainau, tura

Moisésa chichame nuikiartin ainausha, tura judfo juuntri ainausha Jesúsán tariar, ²chicharinak:

—¿Ame aitkame jusha yana chichamejia aitkame? ¿Tura yaachia aitkata tusasha amincha akuptamkama? Iikia nu nekaatasar wakeraji. Nu ujakratkata, —tiarmiayi.

³Tu tinam Jesús aimiak:

—Wisha atumnasha kichik chichaman iniastasan wakerajrume. Nu airkataram.

⁴Watska. ¿Yáki Juankun aints imaita tusasha akupkaya? ¿Yuseash akupkaya. Turachkusha aintsuash akupkaya? —timiayi.

⁵Tu iniam mai nuwamtak chicharnainak:

—¿Iikia warintajik? Yusek akupkamuitai takurningkia, ¿waruka niin nekasampita tichamiarume? iincha turami tusar tichamnawaitji. ⁶Antsu aints akupkamuitai takurningkia, aints mash: Juan Yus akupkamuitai tinau asar, iin kayajai tukurmiar mantamawarai tusar shamaji, —tunaiarmiayi. ⁷Tura Jesúsán ainnak:

—¿Juan aints ainaun imaita tusasha yáki akupkaya? tusarsha iikia nekatsji, —tiarmiayi. ⁸Tu tinam Jesús chicharak:

—Ayu, tu tau asakrumin, yáki wina akuptukia tusancha, wisha nunisnak atumnasha ujakchatatjarne, —timiayi.

Tunau takau ainaun pachis nuikiartamuri
(*Mat. 21.33-44; Marc. 12.1-11*)

⁹Nunia Jesús aints ainaun chikich nuikiartamun nuiniak:

—Aints ni ajarin uva naekrin araamiayi. Tura araa umis, aints ainou takartusarti tusa ukukmiayi. Tura tatsuk arák puja pujakka, ¹⁰juuktin kinta jeamtai, ni inatirin akatar akuptak: ‘Yamaikia weme, ajarun takau ainou ujaakum: Ajarin chichaman akupturmak: Uva yumiri winar aa nunaka akupturkarti

tawai tita,’ timiayi. Tura akuptukmaitiat ajan takau ainou ajartinu inatirin katsumkar, uva yumirinka sutsuk akupkarmiayi.

¹¹Turawaramtai ajartin ataksha chikich inatirin akuptukmaitiat, nu aintsnasha nunisarang katsekar, nunia katsumkar uva yumirinka sutsuk akupkarmiayi. ¹²Nuna turuwaramtai, ajartin ataksha chikich inatirinha akuptukmaitiat, nunasha nunisarang charu charu najanawar ajanmaya jiikiarmiayi.

¹³“Turinamtai nuniangka ajartin nintimias: ‘¿Yamaisha itiurkainjak? Yamaikia wína uchirun aneetirun akuptuktajai. Niin wainkar nekasar anturkachartimpiash,’ timiayi. ¹⁴Tura apari akupkamu waininayat, ajan takau ainou ajartinu uchirin wainkar chicharnainak: ‘Ni apari jakamtai, ju ajaka uchirinu atinuitai. Watska, maatai. Ju maarkia, nuniangka ju ajaka iinu achaintak,’ tunaiarmiayi. ¹⁵Tura ajartinu uchirin achikiar, ajanmayan jiikiar maawarmiayi,” Jesús timiayi.

Nunia nu nuikiartamun antukaru ainaun iniak:

—¿Atumsha itiur nintimrume? ¿Ajartin taa nu takau ainaun itiurkatnuita?

¹⁶Niisha taa, nu pasé takau ainaun maatnuitai. Nunia chikich aints ainaun eak: ‘Ajarun takakmasarti’ tusa susatnuitai, —Jesús timiayi.

Tamati nuna antukaru ainaun chicharnainak:

—Atsa, pengké turachminuitai, —tiarmiayi.

¹⁷Tu tinam Jesús nuna antuk nu aints ainaun pangkai jiis ayaak:

—¿Tura Yuse chichame etserin ainou aararmia nuna warina takua tawa tusarmeka nintimtsurmek? Nu aarmauka nuwaitai: ‘Jeamin ainou kaya jean jeamkar, chikich kayan wainkar chichainak: Ju kayaka paseetai tusar japawarmiayi. Japinau wainiat Yuska:

Nu kayaka timiá pengkeraitai timiayi.’

¹⁸Tu aarmau asamtai, aints ainau nu kaya nekas pengker aa nunaka tukumkar kupinartinuitai. Tura nu kaya aintsnum ayaarkungka, nu aintsun tsairtinuitai, —Jesús timiayi.

¹⁹Tama sacerdote juuntri ainau, tura Moisésa chichame nuikiartin ainausha nu nuikiartamun antukar: Iin pachitmas turamji tusar Jesúsán kajerinak: Yamaik achiktai tu nintimtinayat, aints ainaun shaminau asar achikcharmiayi.

¿Juun apu akikchatnukai? timiauri
(*Mat. 22.15-22; Marc. 12.13-17*)

²⁰Tura Jesús romano apurin suruktai tu nintiminak, chichaman najatawar, Jesús tsanurtai tusar, aints ainaun eakar: Nuka iikia pengke aintsuitji tinayat, Jesús iniam, niisha warintintak tusar, ni chichamen anturkar, nuna jukiarat tusar akupkarmiayi. ²¹Tura akupkamu asar, Jesúsán jeariar chicharinak:

—Nuikiartinu, ameka nekas chicham chichaame. Iikia nuka nekaji, tura aints ainau wina pengker nintimtursarat tuuka nintimtsuk pujame, tura nekasam Yuse jinti tu awai tusam, tupin nuikiartame.

²²Tura asakmin ¿itiur nintime? tusar nekaataras wakeraji. Juun apu César ni aintsrin akupak: Kuik irumrataram tamati ¿ii kuikiarin akiimiaktin pengkerkai? ¿Antsu akiimiatsuk pujustinka pengkerkai? Nu nekaataras wakeraji, —tiarmiayi.

²³Tu iniinam Jesús ni pasé nintimaurin nekaru asa chicharak:

—¿Waruka anangkruram winasha nekaprustasrumsha wakerutarme?

²⁴Watska, kuik inaktursataram, —timiayi. Tura inaktusam Jesús chicharak:

—¿Jusha yana yapiya nakumkamuita? ¿Tura yana naariya aarmawita? —timiayi.

Tu iniam ainak:

—Apu Césarnawaitai, —tiarmiayi.

²⁵Tinamtai Jesús chicharak:

—Tu tinu asaram, juun apu Césarnau aa nuka ni susataram. Tura Yusnau aa nuka Yus susataram, —timiayi.^p

²⁶Aints mash antinamunam nuna tamati, nu chichaman antukaru ainau ni chichamejai achikiartatkamawar tujinkarmiayi. Antsu nintimrar chichatsuk wajasarmiayi.

¿Aints jakau nantaktinuashi? timiauri
(*Mat. 22.23-33; Marc. 12.18-27*)

²⁷Nunia saduceo ainau: Aints jakaua jakamunmaya nantakchatnuitai tinu asar, chichaman nekaawartas tariarmiayi. Tura Jesús warintintak tusar chicharinak:

²⁸—Nuikiartinu, Moisés chichaman aarmia nu chichamka nuwaitai: ‘Aints uchin yajutmatsuk jakamtaikia, ni yachí uchin yajutmartas ni wajerin nuwatkatnuitai. Tura uchin yajutmarta, nuka ni yachí jakau uchiriyá nunisang atinuitai,’ tu aarmawaitai. ²⁹Ayu, juni iijai iruntrar siete (7) yachintin pujuarmiayi. Tura eemkauri nuwan nuwatak, uchin yajutmatsuk jakamtai, ³⁰jakau yachí wajerin nuwatkayat, nusha nunisang uchin yajutmatsuk jakamiayi. ³¹Tura nusha nunisang jakamtai, chikich yachiisha wajerin nuwatak, tura chikitcha chikitcha siete (7) yachintin nu nuwan nuwatinayat, mash uchin yajutmatsuk kajingkiarmiayi. ³²Nunia nuwasha ukunam jakamiayi. ³³Tura nu siete (7) yachintin mash nu nuwan nuwataru asar ¿jakamunmaya nantakiar nu nuwaka yana nuwariya atinuita? —tu iniasarmiayi.^q

³⁴Tu iniinam Jesús ayaak:

—Ju nungkanam pujuinauka nuwatnakiatin ainawai. ³⁵Tura Yusen umirin

ainau jakaar ju nungkanka ukukiar, nuniangka jakamunmaya nantakiar, ataksha jakachartin ainawai. Antsu Yusnum tuke pujuinau asar, nuwanka nuwatkachartinuitai. Nunia nuwasha aintsun ninumkachartinuitai. ³⁶Antsu Yuse awemamuriya nunisarang nuwartin-chu artinuitai. Tura jakamunmaya nantakiaru asar, Yuse uchiri artinuitai. ³⁷Tura jakaru ainaun pachis Moiséscha tu awai tusa, iin nekamtikramamiaji. Tura aints atsamunam numi jangkirtin kapaayat kajintsuk wajantai, Apu Yus Moisésan chicharak: 'Abrahama Yusrinka wiitjai. Tura Isaaca Yusrinka wiitjai. Tura Jacobo Yusrinka wiitjai,' timiayi. ³⁸Tura aintsu wakani tuke jakachartin asaramtai, Yuska jakau ainau Yusrinchuitai, antsu iwiiaaku ainau Yusrintai. Yuska aints jakaru ainaun mash iwiiaakua nunisang jiiawai, —Jesús timiayi.^r

³⁹Tamati Moisésa chichame nuikiartin ainau chicharinak:

—Nekasam pengker tame, —tiarmiayi.

⁴⁰Tura nuniangka iniasartatkamawar arantukarmiayi.

¿Mesíascha yana wearinta? timiauri

(*Mat. 22.41-46; Marc. 12.35-37*)

⁴¹Nunia Jesús nu aints ainaun iniak:

—Aints ainau Yus akupkatniun, Mesías tutain pachisar ¿waruka Davidta wearintai tinawa? ⁴²Davidcha Yuse chichamen Salmo tutainum ningki tu aarmiayi:

Apu Yus wina Apurun chicharak:

'Juni wina untsurunini apu keemtai-num keemsam nakarsata.

⁴³Tura nakarkumin ami nemasem ainaun mash nepetkatatjai,' timiayi.

⁴⁴Davidka Mesíasan pachis: Wina Apuruitai tinu wainiatrumsha ¿waruka Mesíaska Davidta uchirintai tarume? —timiayi.

Moisésa chichame nuikiartin ainau chicharkamuri

(*Mat. 23.1-36; Marc. 12.38-40; Luc. 11.37-54*)

⁴⁵Tura mash aints antinamunam Jesús ni nuiniatiri ainaun chicharak:

⁴⁶—Moisésa chichame nuikiartin ainau wainkataram. Niisha nekau aintsuitjai tusar, entsatirin sarman entsarar jampesarang wekajin armiayi. Tura yaktanam wekainak: Wina jiisar ajutusarat tusar wekainawai. Tura iruntai jeanmasha keemtai nekas pengkernum keemsartas wakerinawai. Tura fiesta amanumsha eemkar keemsar yuwartas wakerinawai. ⁴⁷Tura waje jeen atantin ainayat anangminak wina pengke aintsuitai turutiarat tusar, aya jangkejai Yusen sarman seainawai. Tuminau asaramtai, Yus chikich ainaun nangkamasang niin nukap wait wajaktiniun susartinuitai, —Jesús timiayi.

Waje ni kuikiarin Yusen mash susamuri

(*Marc. 12.41-44*)

21 ¹Jesús Yus seatai juun jeanam waya, kuikiartin ainau kuik engketinam kuikiarin engkeenaun wainkamiayi. ²Tura waje kuikiartichu jimia jiru kuikian engkeauun wainkamiayi. ³Tura nuna wainak aints ainaun chicharak:

—Nekasan tajarme: Ju wajeka kuikiartichu-tiat, chikich aints ainaun mash nangkamasang nukap engkeayi. ⁴Chikich aints ainauka nekasar kuik ampirmaurinak engkeenawai. Antsu ju wajeka ninu aa nunaka mash ampitsuk engkeayi, —Jesús timiayi.

Yus seatai juun jea yumpungtinun pachis etserkamuri

(*Mat. 24.1-2; Marc. 13.1-2*)

⁵Chikich aints ainau Yus seatai juun jeanam wajasar, kaya ainaun shiirman iwiarinaun jiisar, tura warinchi shiirman Yus susamun jiisar chicharnainak:

—Yus seatai juun jea juka shiirmapita, —tunaiyarmiayi. Tu tinamtai Jesús chicharak:

⁶—Ju mash waintrume juka ni kintari jeamtaikia mash yumpunkatnuitai. Tura yumpunkamtai, kaya kichkisha chikich kayanmasha patamkashtinuitai, —Jesús timiayi.

Nungka mesertin pachisar etserkamu

(*Mat. 24.3-28; Marc. 13.3-23*)

⁷Jesús tamati nunia iniinak:

—Nuikiartinu ¿nusha warutik ati? Tura nu turunatin kinta jeatak wajasamtaisha ¿waring wantinkatnui? —tiarmiayi.

⁸Tu tinam Jesús chicharak: —Wina anangkruwarai tusaram, aneartaram. Aints untsuri nangkamiar: ‘Wiitjai Yus akupkamuitjai,’ tiartinuitai. Tura: ‘Nungka yumpunkatin yamaikia jeayi,’ tiartinuitai. Tu tinamtaisha nu aintska nemarkairap. ⁹Tura maanium atatu, tura mesetan najanawai tamau antakumsha shamkairap. Nusha eemak turunatnuitai. Antsu nungka mesertinka tewarikia achatnuitai, —timiayi.

¹⁰Nunia Jesús tuke chicharak:

“Aints ainau chikich nungkanmaya ainaujai maaniawartinuitai. Tura apu ainausha kajernaikiar mesetan najanawartinuitai. ¹¹Nunia uusha untsuri uurkatnuitai, tura tsukasha nukap atinuitai, tura sungkur ainausha yujarartinuitai. Nayaimpinmayasha shamrumtin wantinkartinuitai. Tura asamtai Yuse kakarmarin aints ainau wainkartinuitai.

¹²“Tura nuka jeatsaing, atumin achirmakar wait wajaktiniun suramsartinuitai. Tura chicham nekarami tusar, iruntai jeanmasha juramkiartinuitai. Nuniangka kársernum engketmawartinuitai. Tura engketmawarsha wina aintsur asakrumin, judío apuri ainamunmasha,

tura romano apuri ainamunmasha atumin juramkiartinuitai. ¹³Tura nuni juraminamtaisha, wina pachitsaram chichaktinuitrume. ¹⁴⁻¹⁵Tura atumi nemase: Waitaitai turamiarai tusan, wina nekamtairun atumin susan chichamtikiatnuitjarne. Tura asamtai atumin apunam juraminamtai, apu ininmamtaisha ¿itiurak aimkataj? tusarmeka, nuwá eemkarmeka nintimsairap.^s

¹⁶“Atumi aparisha, tura atumi yachiisha, atumi weari ainayat, tura atumi amikrisha nunisarang atumin anangkramawar apunam surutmakartinuitai. Tura chikich ainautirmincha mantamawartinuitai.^t ¹⁷Tura wina aintsur asakrumin, aints mash atumin kajertamkartinuitai. ¹⁸Tura kajertaminaun wainiat, Yus atumi intashin kichkisha mengkakashti tusa waitmaktinuitrume. ¹⁹Tura asaram wait wajayatrumek, tuke inaitutsuk wina umirtakrum pujakrumka, pujut nangkankashtin jukitnuitrume.

²⁰“Ju yakat Jerusalénna suntar ainau tenteawaramtai, atumka nu wainkurmesha, wáriapi ju yaktan yumpungkartatua tusaram nekaataram. ²¹Nu yaktan yumpungkartin asaramtai, Judea nungkanam pujuinauka muranam anumkartas tupikiaktinuitai. Tura juni Jerusalénnum pujuinauka juniangka jiiinkartinuitai. Tura ajanam takakminak pujuinauka yaktanmaka waketkichartinuitai. ²²Nu kintati Yuse chichame aarmawa nunisang mash umiktas niin umirchau ainaun Yus wait wajaktiniun susartinuitai. ²³Tura Yuska ju nungkanam pujuinauka nukap wait wajaktiniun susatin asamtai, nuwa jamtin ainaunka, tura uchin muntsak pujuinaunka wait anentinajai. ²⁴Junia aints ainaun untsurin mesetnum maawartin ainawai. Tura

chikich aints ainau achikiar metawar mash nungkanam jukiartin ainawai. Tura judiochu ainau Jerusalénnum taar, ju yaktan yumpungkar mesartinitai. Yus tsangkamkamu asamtai turuwartinuitai. Antsu Yus nuke ati tamati, nuniangka inaisartinitai,” Jesús timiayi.

Ni tatintrin pachis etserkamuri

(Mat. 24.29-35, 42-44; Marc. 13.24-37)

²⁵Nunia Jesús ataksha etserak:

“Nuniangka tsaanmasha, tura nantun-masha, tura yaanmasha aints pengké wainchati wantinkartinitai. Tura juun entsa kakar tamparuktinitai. Tura mash nungkanmaya ainau juun entsa uutmaur-riacha antukar, pachimian nintimrar nukap shamkartinitai.”^u

²⁶“Tura nayaimpinam tuke muchichu ainausha muchitrartinitai. Tura asamtai aints ainau nuna wainkar: Nungkaka yamaikia meseawapi tusar, nukap shaminak mayajin tak enerar jakawa nunisarang tepesartinitai. ²⁷Nunia wikia aintsutiatak Yus akupkamu asan, Yuse kakarmarijai yurangmijai winamtai, winaka paan waitkartinitai. ²⁸Nu turunatin wainkatin asaram kakaram wajastaram. Tura atumi uwemtikramra- tin wári tatin asamtai, pengker nintimsaram pujustaram,” Jesús timiayi.

²⁹Nunia nunasha takun tajai tusa, nuikiartamun nuikiartak:

“Numi higuera tutai tura chikich numi ainausha nintimrataram. ³⁰Numi tsaraptur nangkamar nukarmatai, atumka: Esat jeatak wajasi tusaram nekarme. ³¹Tura asaram wi tajarme nuka mash wainkurmeke, atumsha nunisru- mek: Yus aints ainaun inartin kinta jeatak wajasi tusaram nekaamnawaitrume.

³²“Nekasan tajarme, nunaka mash umiatsaing, aints ju nungkanam iwiaaku

pujuinauka pengké jakarchatnuitai.

³³Nayaimpisha, tura nungkasha mengka- kartinitai. Antsu wína chichamrun taja nuka umitskeka inaisastinitai.

³⁴⁻³⁵“Mash nungkanmaya ainau nu kinta wári jeatatuapi tusarka, nunaka nintimsuk pujuinai, nu kintaka aneachmau tsawaartinitai. Antsu atum pasé aa nu turakrumka, tura nampet wakerakrumka, tura ju nungkanam sumin ainia nu nintimsaram pujakrumka, paan nintimsaram pujustakamaram tujintarme. Nu shamrumtin kinta awaktu- kai tusaram, anearum pujustaram. ³⁶Tura Yusen umirchau ainau turunatnurin mash iisha turunawai tusaram, Yus tuke seataram. Tura aintsutiatak Yus akupkamu asan ataksha wi winamtai, atumsha wijai pujusmi tusaram, Yuska tuke seataram, tura anearum pujustaram tusan tajarme,” Jesús timiayi.

³⁷Jesús tsawai Yus seatai jeansam waya aints ainaun nuinimiayi. Tura kashiti Olivo Muranam pujustas, Jerusalénnumia jjiinkimiayi. ³⁸Tura tuke tumin asamtai, aints ainau Jesús a chichamen antukartas Yus seatai jeansam kashik tariarmiayi.

Jesús an maawartas chicham najatamuri

(Mat. 26.1-5, 14-16; Marc. 14.1-2, 10-11; Juan 11.45-53)

22 ¹Pascua fiesta tura pang pachim- rachmau yuwatin fiesta jeatak wajasmiai.”^v

²Tura asamtai sacerdote juuntri ainausha, tura Moisés a chichame nuikiar- tin ainausha Jesús an anangkawar achikiar maawarat tusar chicham najatiarmiayi. Tura Jesús an maatar wakerinayat, aints ainaun shamiarmiayi.

³Nuniangka Judas Iscariote Jesús a nuiniatiri wainiat, iwianchi apuri Satanás ni nintin engkemtumiayi. ⁴Satanás

engkemtuam, Judas sacerdote juuntri ainamunam, tura Yus seatai wainin ainau iruntrar pujuinamunam we: Jesúska tu achikminuitai tusa etserkamiayi. ⁵Tu etsermatai, nuna antukar warainak:

—Ame anangkakminkia akiimiaktatji, —tiarmiayi. ⁶Tu tinam Judas: Ayu tusa çaints atsamunam itiur akanakanak surukaintaj? tu nintimiayi.

Pascua fiestati yuwamuri
(*Mat. 26.17-29; Marc. 14.12-25;*
Juan 13.21-30; 1.Cor. 11.23-26)

⁷Pang pachimrachmau yuwatin fiesta nu kinta jeau asamtai, nu fiesta Pascua tutainum uwija uchirin maawar yu armiai. ⁸Tura asamtai Jesús Pedroncha, tura Juannasha akupak:

—Atum werum Pascua fiestati yuwatin umistaram, —timiayi.

⁹Tamati niisha iniinak:

—¿Pascua fiestati yuwatniusha tunia umisarti tusamea wakerame?
—tiarmiayi.

¹⁰Tu tinam Jesús aimiak:

—Juun yaktanam werum, nuni jearam aints muitsan yumin shikik yanas weau wainkaram nu aints nemarsataram. Nu aints jeanam wayaamta, ¹¹jeentin wainkaram: ‘Ii nuitamin amin chichaman akupturmak: ¿Wina nuiniatir ainaujai Pascua fiestati yuwatin jea tesaamusha tuniinta? turamui,’ titaram. ¹²Takurmin jeentin pata yakí amanum jea tesaamun yanchuk mash umismaun inakturmastatrume. Nuni ii yuwatin umistaram, —Jesús timiayi.

¹³Tamati ayu tusar wear, Jesús tímia nunisarang wainkarmiayi. Tura wainkar nuni Pascua fiestati yuwatniun umisarmiayi.

¹⁴Yurumak yuwatin jeamta, Jesús ni nuiniatiri ainaujai misanam yuwartas

keemsarmiayi. ¹⁵Mash keemsaramtai, Jesús chicharak:

—Wína mantinatsaing, nekasan atumjai iruntran, ju fiestatin yurumkan yuwatasan nukap wakerinuyajai.

¹⁶Yamaikia atumjai ju fiestati yuwaja junaka ataksha yuwashatjai. Antsu Yuse pujutirin jean, mash umisan nuni ataksha atumjai iruntran yuwatnuitjai, —timiayi.

¹⁷⁻¹⁸Nuna tina piningkian achik, Yusen maaketai tusa, ni nuiniatiri ainaun suak:

—Ataksha ju nungkanam uva yumirin amurchatnuitjai. Antsu Yuse pujutirin jean ataksha amurtinuitjai tajarme. Tura asamta ju pining jukiram sunaisaram amurtaram, —timiayi.

¹⁹Nunia yurumkan achik, Yusen maaketai tusa, nunia puurak, ni nuiniatiri ainaun suak:

—Juka wína namangkrua tumawaitai. Atumin uwemtikratin asamta, winaka mantuwartatui. Turutawartin asaramta, wína nintimtursaram yuwataram, —timiayi.

²⁰Tura yutan umisaramta, Jesús piningkian ataksha achik chicharak:

—Ju piningnum amuti yarakmau wína numparua tumawaitai. Wína mantinamta, atumin uwemtikratan wína numparka numpartatui. Tura wi jakan, yamaram chichaman etsernuyaja nunaka mash umiktatjai.™

²¹Tura wína surutkatini wijai tsanias ju misanam ni uwejejai yurumkan achik yuwawai. ²²Wikia aintsutiatak Yus akupkamu asan, Yuse wakeramurin miatrusnak umiktinuitjai. Turayatnak wína anangkrua surutkatniunka nukap wait anentajai, —Jesús timiayi.

²³Tamati nuna antukar ni nuiniatiri ainau:

—¿Ni suruktincha yakí at? —tunaiyar-miayi.

**¿Yáki chikich ainaun nangkamakesha
atinuita? timiauri**

(*Mat. 20.25-28; Marc. 10.42-45*)

²⁴Nunia Jesúsa nuiniatiri ainau
chicharnainak:

—¿Yáki iin nangkatamsangsha ati?
—tunaiarmiayi.^x

²⁵Tu tunainamtai Jesús chicharak:

—Ju nungkanmaya apu ainauka ni
aintsri ainaun akatrar pe akupin armiayi.
Tura aintsu akupin ainaun pachisar:
‘Pengker turinuitai,’ tinawai. ²⁶Antsu
atumka tuuka nintimrashtinuitrume. Atum
eemkau ainautirmeka uchi ekeria nunisru-
mek atinuitrume. Tura inakratin
akurmesha miajuitjai tumamtsuk, antsu
aintsu inatiria nunisrumek atinuitrume.

²⁷Nintimrataram. Aints misanam yuwak
pujau, tura chikich aints ainaun yutan sua
nujai apatkam étuá nekas timiá nangkama-
kuita? Yuta yuwa nu nekas
nangkamakuitai, antsu wikia aintsu
inatiria nunisnak atumjai iruntran pujajai.^y

²⁸“Wi wait wajamtaisha atumsha tuke
wijai iruntraram pujuyarme. ²⁹Tura
asakrumin apu atiniun wína Apaachir
wína tsangkatrukmiá nunisnak atumna-
sha tsangkatkatnuitjarme. ³⁰Tura wína
pujutirun pujusrum wijai yuwatnuitrume,
tura wijai umurtinuitrume. Tura apu
keemtairi doce (12) ainamunam
pujusrum, Israela weari inartinuitrume,”
Jesús timiayi.^z

Pedron: Wína natsantrurtatme timiauri
(*Mat. 26.31-35; Marc. 14.27-31; Juan 13.36-38*)

³¹Nunia Apu Jesús Simón Pedron
chicharak:

—Simónka wainkata. Aints trigo
jingkijain juuk pakar peawa nunisang

Satanás atumin pachimian nintimtikram-
ratas Yusen iniasi. ³²Tura wainiatnak
wikia amin pachisan: Ame tuke
inaitutsuk wina nekasampita turutminam
tusan Yusen seatmiajme. Tura ataksha
wina umirtukam wína umirtin ainau
kakamtikrarta, —Jesús timiayi.

³³Tamati Simón ayaak:

—Apu, kársernum engketminamtai-
sha, wisha nunisnak amijai tsaniasan
engkematatjai. Tura amin mantaminam-
taisha, winasha mantuwarat tusan
wakerajai, —timiayi.

³⁴Tamaitiat Jesús chicharak:

—Pedro, nekasan tajame: Yamaik atash
shinatsaing, wina pachitsam: Nu aintsnaka
wainchawaitjai tusam, ameka kampatam
waitrakum uurtuktatme, —timiayi.

Nekaprustin jeatak wajasi timiauri

³⁵Nunia Jesús ataksha ni nuiniatiri
ainau iniak:

—¿Wi yaanchuik yurumak entsatsuk,
nunia kuikiasha takutsuk, tura sapatcha
takutsuk wetaram tusan akupkamaajrume
nuni yuumakmakiarum? —Tu iniam
aiminak:

—Atsa, pengké yuumakchamijai,
—tiarmiayi.^a

³⁶Tinamtai Jesús chicharak:

—Antsu yamaikia yurumkan takakuka
nuka takusti. Tura kuikiancha nunisang
takusti. Tura saapin takakchauka ni
wejmakrin suruk, saapin sumakti
tajarme. ³⁷Yuse chichame etserin
yaanchuik aararmia nunaka mash
umiktin asamtai, ju aarmauka: ‘Pasé aints
ainaujai maawarmiayi,’ wína pachitas
aarmawa junaka umikiartatui, —timiayi.^b

³⁸Jesús tamati ni nuiniatiri chichari-
nak:

x 22.24 (Mat. 18.1; Marc. 9.35; Luc. 9.46) y 22.27 (Juan 13.12-15)

z 22.30 (Mat. 19.28;25.31) a 22.35 (Mat. 10.9-10; Marc. 6.8-9; Luc. 9.3;10.4)

b 22.37 (Isa. 53.12)

—Apu, juni saapikia jimiar takakji,
—tinamtai, Jesús ayaak:

—Ayu, maaketai, nuke ati, —timiayi.

**Jesús arakmau Getsemaní
tutainum Yus seamuri
(Mat. 26.36-46; Marc. 14.32-42)**

³⁹Nunia Jesús jiinki, tuke tumin asa,
Olivo Muranam wemiayi. Ni weamtai
nuiniatiri ainausha nemarkarmiayi.
⁴⁰Tura mura wakaar, Jesús nuiniatirin
chicharak:

—Tunau nepetukai tusaram Yus
seataram, —timiayi.

⁴¹Nunia kaya nangkimiamsha ayaarmi-
num Jesús ai arakchichu wemiayi. Tura
we Yusen seak:

⁴²—Apaachi, ame wakerakmekka, wi
wait wajaktinka tsangkamrukaip. Antsu
wi wakeraja nuka achati, antsu ame
wakerame nuke ati, —timiayi.

⁴³Tamati Yuse awemamuri nayaimpin-
maya Jesúsán kakamtikratas tarimiayi.

⁴⁴Tura Jesús ni wait wajaktintrincha
nintimias shamak nuna nangkamasang
kakar Yusen seak, seekirisha numpa
tumau nungká kitaamiayi.

⁴⁵Tura Yusen sea umis wajaki, ni
nuiniatiri ainaun jiistas werimiayi. Turam
timiá wake mesekar napchau nekapinak,
kari nepetinam kanú tepearimiayi.

⁴⁶Kaninamtai nuna wainak Jesús
chicharak:

—¿Waruka kanusha teparame? Tunau
nepetukai tusaram nantakrum Yus
seataram, —timiayi.^c

**Jesúsán achikiar jukimuri
(Mat. 26.47-56; Marc. 14.43-50; Juan 18.2-11)**

⁴⁷Jesús tuke chichaak wajai, aints
untsuri tariarmiayi. Tura Jesúsá nuiniatiri
Judas niyá eemkak Jesúsán mejeastas
tarimiayi. ⁴⁸Turamtai Jesús chicharak:

—Judasa, wikia Yus akupkamu
ayatnak, aints akiinai waitiatmek ¿wína
mejentsam surutum? —timiayi.

⁴⁹Tamati Jesúsjai pujuarmia nuka nuna
wainkar:

—Apu, ¿saapijai maaniktajiash?
—tiarmiayi.

⁵⁰Tura aints Jesúsjai wajau saapirin
kuinak, sacerdote apuri inatiri kuwishin
untsurinini met charutkamiayi. ⁵¹Turam-
tai Jesús chicharak:

—Maaketai, inaisataram, —timiayi.
Nunia nu aintsu kuwishin ataksha nujtuk
pengker najanamiai. ⁵²Nunia sacerdote
juuntri ainau, tura Yus seatai wainin
ainausha, tura judó apuri ainausha
Jesúsán achikiartas taarmia nuna
chicharak:

—¿Waruka kasa aints achiktasrum
winitua nunisrumsha saapisha, tura
numisha takusrumsha tarutniurme?

⁵³Wikia kashincha kashincha Yus seatai
juun jeanam atumjai tuke pujasan aints
ainaun nuininuyajai. Tura wainiatrumsha
nuni achirkachmarume. Turayatrum tuke
teenam puja nuna inatiri asaram, ni
kakarmarijai yamai kintati aitkararme,
—Jesús timiayi.

**Pedro Jesúsna wainchajai timiauri
(Mat. 26.57-58, 69-75; Marc. 14.53-54, 66-72;
Juan 18.12-18, 25-27)**

⁵⁴Nunia Jesúsán achikiar metawar
sacerdote apuri jeen umaarmiayi. Turinam-
tai Pedrosha ukunam yaitas nemarki
wemiayi. ⁵⁵Tura nuni weri, sacerdote inatiri
ainau anum jin yaminak pujuinamtai,
Pedrosha nu aints ainaujai pachinak
keemsamiayi. ⁵⁶Tura nuni pujamtai, nuwa
sacerdote inatiri, Pedron jin ayamak pujaun
wainak tari jijij wajatmiayi. Tura chicharak:

—Ju aintska Jesúsjai wekainuyayi,
—timiayi.

⁵⁷Tamaitiat Pedro aimiak:
—Atsa nuwachi, nangkami tame. Nu aintsnaka wainchajai, —timiayi.

⁵⁸Tamati jumchik arus chikich aintcha niin wainak:

—Amesha au aintsjai pachitkauyame, —timiayi.

Tamaitiat Pedro aimiak:

—Atsa aishmangku, wichawaitjai, —timiayi.

⁵⁹Tura kichik hora nangkamaramtai, chikich aints nuni iruntrar pujuinaun chicharak:

—Juka nekas aujai wekainuyayi. Juka nekas Galilea nungkanmaya aintsuitai, —timiayi.

⁶⁰Tamaitiat Pedro aimiak:

—Aishmangku ¿warintsuk turutrum? nunaka nekatsjai, —timiayi.

Tura chichaak pujai atash shinimiayi.

⁶¹Atash shinamtai, Apu Jesús Pedron ayanmatar jijj wajatmiayi. Turamtai Pedro Apu Jesús a timiaurin nintimramiayi. Ni timiauringkia nuwaitai: Atash shinatsaing, nu aintsnaka wainchawaitjai tusam, ameka kempatam waitrakum uurtuktatme. ⁶²Nu timiau asa, Pedro nuna nintimias jiinki kakar juutmiayi.

Jesúsán wishikramuri

(Mat. 26.67-68; Marc. 14.65)

⁶³Aints Jesúsán wainkarmia nuka wishikrami tusar awatiarmiayi. ⁶⁴Tura Jesús a jiinka tarachjai jingkiatawar awatinak:

—Watska, ame ¿yáki aitkara? tusam jiitsuk nekaata, —tiarmiayi. ⁶⁵Tura katsekinak chichaman untsuri chichariarmiayi.

Judío apuri iruntramunam jukimuri

(Mat. 26.59-66; Marc. 14.55-64; Juan 18.19-24)

⁶⁶Tsawaaramtai judío juuntri ainau, tura sacerdote juuntri ainausha, tura

Moisésa chichame nuikiartin ainausha mash iruntrar chicham nekaaratai tusar, Jesúsán judío apuri iruntramunam umaarmiayi. Tura nuni jeeniar iniinak:

⁶⁷—¿Nekasmek Mesíasaitam? ¿Yus akupkatnuitjai tímia nukítam? Nu paan etserkata, —tiarmiayi.

Tu iniinamaitiat Jesús ayaak:

—Wikia nekas Mesíasaitjai tamatisha, atumsha nekasampita turutchatatrome. ⁶⁸Tura wi atumin iniamsha, winaka airkashtatrome. ⁶⁹Tura wikia aintsutiatnak Yus akupkamu asan, jumchik arusan Yus nekas kakaram aa nuna untsurinini pujustatjai, —timiayi.

⁷⁰Tamati mash iniinak:

—¿Nekasmek ame Yuse Uchirintam? —tiarmiayi.

Tu tinam Jesús aimiak:

—Ja ai, atum wína turutrome nuka nuwaitjai, —timiayi.

⁷¹Jesús tamati chicharinak:

—Pai, ii antarin nuwaitjai ningki tumamusha ¿warí chicham antuktasrik nakastaj? —tunaiyarmiayi.

Pilato pujamunam jukimuri

(Mat. 27.1-2, 11-14; Marc. 15.1-5; Juan 18.28-38)

23 ¹Nunia mash wajakiar Jesúsán romano apuri Pilato pujamunam jeeniarmiayi. ²Tura Pilatonam jeeniar tsanuminak:

—Ju aintska ii aintsri ainaun pachimian nintimrarti tusa chicharu anturkamji. Tura romano apurin kuik akikchamna-waitji tau anturkamji. Tura wiitjai Mesíasaitjai tau anturkamji. Nuka judío ainauti apurinjai taku tawai, —tiarmiayi.

³Tu tinam Pilato Jesúsán iniak:

—¿Nekasmek judío apurintam? —timiayi.

Tama Jesús ayaak:

—Ame turutme nuka nekasam tame, —timiayi.

⁴Tamati Pilato sacerdote juuntri ainaun, tura aints iruntrarun chicharak: —Ju aintsu tunaarinka kichkisha nekarachjai, —timiayi.

⁵Tamaitiat nuna nangkamasarang kakarar chicharinak:

—Antsu juka mash judío nungkanmaya ainaun nuiniak: Atumka apu umirtsuk asataram tusa tsanumnuyayi. Yanchuk Galilea nungkanam nangkama tsanu tsanumka junisha tamayi, —tiarmiayi.

Jesúsán apu Herodesnum jeemiauri

⁶Tu tinamtai Pilato nuna antuk iniak: —¿Ju aintska nekas Galileanmayangkai? —timiayi. ⁷Tu iniam:

—Ja ai, —tinamtai, apu Herodes chichaman nekaati tusa, Pilato Jesúsán Herodesnum akupkamiayi. Herodeska Galilea apuri ayayi. Turayat Jerusalénnum irastas taa, nu kintati nuni pujumiayi. ⁸Tura Herodes yaanchuik Jesúsán pachisar chichainamun antuku asa, Jesús aints wainchatai takatan turamtai, wisha wainkataj tusa wakerukmiayi. Tura asa Jesúsán jeeniaramtai, Herodes niin wainak warasmiayi. ⁹Tura inintramun untsurin iniasmiayi. Tura wainiat Jesúska pengké aitsuk wajamiayi. ¹⁰Herodes Jesúsán infamtai, sacerdote juuntri ainau tura Moisésa chichame nuikiartin ainausha antú wajarmiayi. Tura Jesús aintsuk wajamtai, niisha nangkamiar chichaman najatinak nukap tsanumiarmiayi. ¹¹Turinamtai Herodescha ni suntari ainaujai iruntrar Jesúsán: Ainusha tusar wishikinak, apu entsatirin shiirman antsrarmiayi. Nunia Herodes: Ataksha Pilatonam wakетки tusa Jesúsán akupkamiayi. ¹²Yaanchuikkia Herodeska Pilatojaingkia kajernaikiar wainaitsuk puju ainayat, nu kintati amikmawarmiayi.^d

Pilato Jesúsán maawarti tusa tsangkamkamuri

(*Mat. 27.15-26; Marc. 15.6-15; Juan 18.39-19.16*)

¹³Nunia Jesúsán ataksha itarim, Pilato sacerdote juuntri ainaun, tura judío juuntri ainauncha, tura chikich aints ainauncha mash irurmiayi. ¹⁴Nunia juun ainaun chicharak:

—Atumka ju aints: Apu umirtsuk asataram tusa, aints ainaun tsanuyayi tusaram wini itaarume. Tura wainiatun atumsha antarmin, wi iniaknasha ju aintsu tunaarin pachisrum chichaa wearne nunaka nekaratatkaman pengké tujinkajai. ¹⁵Herodescha nunisang ni tunaarinchá nekarachu asa, ataksha juni akupturmakji. Tura asamtai ju aintsnaka maawarti tichamnawaitjai. Atumsha nusha nekarme. ¹⁶Tura asan tajarme: Suntar awatraramtai nuniangka akupkatjai, —Pilato timiayi.

¹⁷Musachjai metek Pascua fiesta jeamtai, Pilato kichik aintsun karsernumia jiiki akupnuyayi. Tura asa aints ainaun iniak:

—¿Ju aintsnaka jiiKin akupkatjash? —timiayi. ¹⁸Tamaitiat aints mash iruntrar kakarar chichainak:

—Atsa, juka nakitaji. Antsu Barrabás akupkata, —tiarmiayi.

¹⁹Nu Barrabáska romano apurin umirtan nakitak, Jerusalén yaktanam chikich aints irunujai mesetan najana, aintsun mau asa kársernum engkeamu pujuyayi. ²⁰Tura asamtai Pilatoka aints ainaun ataksha chicharak:

—Antsu nekasnaka Jesúsán akupkatjai, —timiayi. ²¹Tau waininayat nuna nangkamasarang kakarar chicharinak:

—Atsa, antsu numi winangmaunum ajinkam maata, —tiarmiayi.

²²Nunia Pilato ataksha aints ainaun chicharak:

—¿Waruka? ¿Warí tunauna turini? Ju aintsun maawarti tusanka, ni tunaarinka pengké nekarachjai. Tura asan suntar awataramtai, nuniangka akupkatatjai, —timiayi.

²³Tamaitiat tuke kakarar chicharinak:

—Juka numi winangmaunum ajinkam maata, —tusar wakerinau asar, Pilatonka nepetkarmiayi. ²⁴Tinamtai Pilatoka:

—Ayu, nuniangka suntar numi winangmaunum ajinkar maawarti, —tusa aints ainau seainam tsangkamkamiayi. ²⁵Antsu mesetan najanin tura mangkartin akupkata tinau asaramtai, Pilato nu aintsun karsernumia jiiki akupkamiayi. Tura: Aints ainau ni wakeramurin turuwar, Jesúsna maawarti tusa tsangkamkamiayi.^e

Numi winangmanum maamuri

(*Mat. 27.32-44; Marc. 15.21-32; Juan 19.17-27*)

²⁶Nunia Jesúsna jukiar junta weenak, Cirene nungkanmaya Simón naartiniun ajanmaya winaun wainkar, suntar ainau niin achikiar, numi winangmaun yanas Jesúsna nemarsati tusar nijai wekaasarmiayi.

²⁷Turinamtai aints ainau untsuri jiiistai tusar nemariarmiayi. Tura nuwasha untsuri Jesúsna wainkar, napchau nintimrar juutiarmiayi, tura wake mesekar untsumkiar Jesúsna nemariarmiayi. ²⁸Tuminamtai Jesús nuwa irunun jiis chicharak:

—Jerusalénnumia nuwa ainautiram, wína anenkurmeka juutirap. Antsu atumek nintimtumasrum, tura atumi uchiri nintimsaram juutiar. ²⁹Atum wait wajaktin kintaka jeartinuitai. Nu

kinta jearamtai, aints ainau chichainak: Nuwa kaa ainau, uchin jurechu asar, tura uchin munchau ainausha chikich nuwa ainaun nangkamasarang warasartin ainawai, tiartinuitai. ³⁰Tura nukap wait wajainau asar, nu kintati aints ainau muran chicharinak: ‘Mura ainautiram, yakíya ayaarum iin tukukratkataram,’ tiartinuitai.^f ³¹Tura asamtai wikia pengké tunaarinchautiatnak, timiá wait wajau asamtai, tunaarintin ainawa wina nangkamasarang wait wajakartin ainawai, —Jesús timiayi.

³²Turamtai mangkartin ainaun jimiaran Jesúsjai maami tusar jukiarmiayi. ³³Tura mura muuk ukunch tutainum jear, suntar ainau Jesúsna numi winangmanum ajinkar yakí nenaawar, mangkartin aintsnasha nunisarang Jesúsna untsurinini, tura Jesúsna menarininisha numi winangmanum ajinkar nenaawarmiayi.

³⁴Turinamtai Jesús Yusen seak:

—Apaachi, ju aints aitkarinia juka nintimnachu asaramtai tsangkurarta, —timiayi.^g

Tamati Jesúsna entsatirin jurukiar, suntar ainau ¿Yáki juna jukit? tusar nakuruti “suerte” tutain nakuriarmiayi.^h ³⁵Turinamtai aints irunuka Jesúsna jijj wajatiarmiayi. Tura judío juuntri ainau wishikinak:

—Chikich ainaun uwemtiknyuyai. Nekas Yus akupkamuitkungka ningki uwemrati, —tiarmiayi.ⁱ

³⁶Suntar ainausha nunisarang wishikinak, vino churiniun mukunat tusar aapawarmiayi. ³⁷Tura chicharinak:

—Ame nekasam judío apurinkumka amek uwemrata, —tiarmiayi.

³⁸Tura Jesúsna muuken yakinini griego chichamjai, tura romano chichamjai, tura hebreo chichamjai tatangnum aarmaun

numi winangmanum nujtukarmiayi. Nu aarmauka nuwaitai: Juka judío apurintai.

³⁹Mangkartin aints nuni netimia nuka Jesúsán jiyaa:

—Ame Yus akupkamu Mesíasaitkumka, watska amek uwemrata. Tura iincha uwemtikiarturta, —timiayi.

⁴⁰Tamati kichka ni tsaniakmaurin chicharak:

—Ameka jakatin kinta jeau wainiatmek ¿Yus tuke shamatum? ⁴¹Iikia nekasar tunau asar wait wajakminuitji. Tura asar ii tunaari akiimiakur waitnaji. Antsu ju aintska tunaunaka pengké kichkisha turichuitai, —timiayi.

⁴²Nunia Jesúsán chicharak:

—Jesúsa, ami pujutirmin jeam, aints inau wajasam kajinmatrukiip, —timiayi.

⁴³Tama Jesús ayaak:

—Nekasan tajame, yamai kintaka Yuse umirin jakaru matsatmanum wijai pujustatme, —timiayi.

Jesúsa jakamuri

(*Mat. 27.45-56; Marc. 15.33-41; Juan 19.28-30*)

⁴⁴Tsaa tupin wajasamtaí, mash nungka tee wajasmiayi. Tura kempatam hora nangkamaramtaí, tsaa yantanti ataksha tsantramiayi. ⁴⁵Tsaa mushatmaramtaí, Yus seataí juun jeanam aparmau netimia nu ningki yakiya tseu jaankamiayi.

⁴⁶Turunamtaí Jesús kakar untsumak:

—Apaachia, wína wakantruca ame waitrukta, —tusa mayajin tak nangkankamiayi.^j

⁴⁷Turamtaí suntara kapitangkri Jesúsá jakamurin wainak, Yus juuntapita tusa chichaak:

—Ju aintska nekas pengké tunaarin-chauyayi, —timiayi.

⁴⁸Jesús jakamtaí, aints ainau nuna wainkar, mash napchau nintimsar

netsepen awatmaminak: “Pengké nangkamiapi ju aintsun maawari,” tunaiyarmiayi. ⁴⁹Tura Jesúsán wainkaru ainausha tura nuwa ainausha Galileanmaya niin nemarkarmia nusha arák wajasar jiiij wajatiarmiayi.^k

Jesúsa iwiarsamuri

(*Mat. 27.57-61; Marc. 15.42-47; Juan 19.38-42*)

⁵⁰⁻⁵²Jesús jakamtaí, aints José naartin pengke aints asa, Pilaton weri:

—Jesúsa namangke surusta, —tusa seamiyayi. Nuka judío nungkanmaya Arimatea yaktanmaya aintsuyayi. Joséka judío juuntri chicharin ayat, judío apuri iruntramunam mash Jesús maataí tiarmia nunaka pengké nakitmiayi. Antsu Yus aints ainaun inarti tusa nakauyayi.

⁵³Pilato Joséén:

—Jesúsa namangke jukita, —tamati, José we Jesúsá namangken numinmaya kuaki, tarachjai kangkarmiayi. Nunia jakau iwiartai pampa taimunam iwiarsamiayi. Nu iwiartainum aints kichkisha iwiarsachmauyayi. ⁵⁴Tura kashin tsawaarka ayamtaí kinta atin asamtaí, kintamraí tusa José Jesúsá namangken wári iwiarsamiayi.

⁵⁵Tura iwiarsamtaí Galileanmaya nuwa ainau Jesúsán nemarsarmia nusha iwiarsamunam wear: ¿Jesúsa namangken tuning iwiarsarma? tusar jiiij wajatiarmiayi. ⁵⁶Tura jiiisar ni jeen wakеткиar, Jesúsá namangke chikich kintati yakaarami tusar kungkutin pachimrarmiayi.

Jesúsa nantakmiauri

(*Mat. 28.1-10; Marc. 16.1-8; Juan 20.1-10*)

Tura nu kintati aints kichkisha takakmascharti Moisés tu aarmau asamtaí, nu chichaman umiinak ayamsarmiayi.

24 ¹Tuming kintati kashik nu nuwa ainauka kungkuti pachimramun jukiar, chikich nuwa irunujai tsaniasar, Jesús iwiarsamunam wearmiayi. ²Tura nuni jear kaya juuntan iwiarsamu waarin ututkarmia nuna urankaun wainkarmiayi.

³Tura wayaawariat ii Apuri Jesúsua namangkenka wainkacharmiayi. ⁴Tura wainkacharu asar: Warukatjik tusar shamkarmiayi. Tura shaminak, Yuse awemamuri jimia aintsua tumaun entsatin pujun winchaan jiischamniaun entsarun wainkarmiayi. ⁵Nuna wainkar nukap shamkar tsuntsumawaramtai, Yuse awemamuri chicharinak:

—Jesús iwiaaku pujausha ¿waruka iwiarsamusha jiarne? ⁶⁻⁷Juningkia tepatsui. Antsu jakamunmaya nantaki. Nisha Galileanam pujus atumin chichartamak: ‘Wikia Yus akupkamu waitinayat, winaka tunau aints ainamunam surutkar-tinuitai. Tura numinam ajinkar mantuwaramtai, kempatam kinta jakan tepayatnak nantaktinuitjai,’ ¿ni tímia nuka nintimtsurmek? —tiarmiayi.¹

⁸Tu tinam Jesúsua timiaurin nintimrarmiayi. ⁹Nunia iwiarsamunmaya waketkiar, Jesúsua nuiniatiri once (11) amia nuna wainkar, tura chikich irununcha wainkar, nu turunamun mash etserkarmiayi. ¹⁰Jesúsua nuiniatirin ujakaru ainauka nu ainawai: Magdalan-maya Marí, nunia Juanasha, nunia Jacobo nukuri Marísha, tura chikich nuwa irunusha nu turunamun etserkarmiayi. ¹¹Tura nuwa irunu tinaun antukariat, Jesúsua nuiniatiri ainau nekasampita tutsuk: Nangkamiar waurinak tinatsuash, tu nintimrarmiayi.

¹²Antsu Pedro jiinki iwiarsamunam ampuki wemiayi. Tura nuni jea tekana jiikma tarachik tepaun wainkamiayi.

Tura wainak nukap nintimiar jeanam waketkiymiayi.

Emaús jintanam Jesús wantinkamuri
(*Marc. 16.12-13*)

¹³Nu kintati Jesúsua nemarnuri jimiar Emaús yaktanam wearmiayi. Nu yakat Jerusalénnumia once (11) kilómetros ayayi. ¹⁴Tura jinta weenak mai nuwamtak Jesús turunamun pachisar chicharmiayi. ¹⁵Tura chichakiar weenai, Jesús wantintuk nuni pachinak nijai tsanias wekaasamiayi. ¹⁶Tura Jesús wantinkaun ni namangkencha paan waininayat, Jesúsapita tusarka nekaacharmiayi. ¹⁷Tura nekaacharam Jesús nijai tsanias jinta weak chicharak: —¿Jinta weakrumsha, warí chichakrumsha wearne? ¿Tura waruka timía wake mesekrumsha wearne? —timiayi.

¹⁸Tu iniam aints Cleofas naartin ayaak: —Jerusalénnum turunamunka aints ainau mash nekainawai. ¿Amekek nu chicham antichumka pachitkam? —timiayi. ¹⁹Tamati Jesús chicharak: —¿Waruka? ¿Warí chichama awa? —timiayi.

Tu iniam aiminak:

—Iikia Nazaretnumia Jesúsua turunamuri taji. Nisha Yuse chichame etserin asa, Yuse kakarmarijai chichauyayi. Tura Yus wainmamunmasha tura aints mash wainminamunmasha wainchatai takatan takauyayi. ²⁰⁻²¹Tura waininayat sacerdote juuntri ainau, tura judío juuntri ainausha chichainak: Tunau takasu asamtai jakati tusar, tura numi winangmanum maawarti tusar, romano apurin surukarmayi. Tura ni maamuri yamaikia kempatam kinta nangkamari. Antsu iikia Israel ainautin uwemtikramrashtajiash tu nintimrarmiayi. ²²⁻²³Antsu nuwa ainau iijai iruntrar

pujuina nuka yamai kashik iwiansamunam wear, Jesúsna namangken wainkartatkamawar wainkachari. Tura wainkacharu asar, ii pujamunam taar chichainak: Iikia iwiaayatrik karanma nunisrik Yuse awemamuri wainkaji. Tura nuka: Jesúska iwiaakui tusa ujatmakji. Nuwa tu ujatminamtai iisha shamkamji. ²⁴Tu etserkaru asaramtai, iijai iruntrar pujuinausha iwiansamunam wear, nuwa tiarmia nunisarang wainkari. Antsu Jesúsna wainkachari, —tiarmiayi.

²⁵Tu tinam Jesús chicharak:

—Nintinchau ainautiram ÷yaanchuik Yuse chichame etserin ainau tiarmia nusha waruka nekasampita tutsuksha pujarme? ²⁶¿Mesíasan pachisar aararmia nuka nekaschaukai? Yus akupkamutiat nayaimpinmaka watsuk ¿nekas wait wajakchatnukai? —timiayi.

²⁷Tura Moisés niin pachis aarmia nuna nangkamsang, tura Yuse chichamen etserin aararmia nusha taku tiarmiayi tusa, Jesús Yuse chichamen niin pachisar aararmia nunaka mash nekamtikiamiayi.

²⁸Tura chichaa chichaaka nu yaktanam jearmiayi. Tura Jesúska nangkamaki wetaj tusa wajamiayi. ²⁹Tura waininayat nu jimia aints chicharinak:

—Atsa, nangkamakip. Iijai pujusta.

Tsaa yanchuk nungká wajasi, —tiarmiayi.

Tu tinam Jesús ayu tusa, nijai pujustas jeanam wayaamiayi. ³⁰Tura nijai iruntrar jeanam pujus, pangkan achik Yusen sea: Maaketai tusa, puurak niincha susamiayi.

³¹Turamtai ni jii uranua nunisarang: Nekasampi Jesúsaita tusar paan nekaawarmiayi. Paan nekaawaram Jesúska mengkakamiayi. ³²Tura mengkamkamtai mai nuamtak chicharnainak:

—Ii jinta winarin, Yuse chichame tu awai tusa iin ujatmamtai, ii ninti kapaawa nunisrik tsuwer nekapmaramji. ¿Nuka nekaschaukai? —tunaiyarmiayi.

³³Tura arutsuk wajakiar jeanmaya jiinkiar, wári Jerusalénnum waketkiarmiayi. Tura waketkiar, Jesúsna nuiniatiri once (11) ainau chikich nemarnuri irunujai iruntrar pujuinaun wainkarmiayi. ³⁴Tura wainaikiar jeanam pujuarmia nuka yamai wininaun chicharinak:

—Ii Apuri nekas nantaki. Tura Simónkan wantintuki, —tusar ujakarmiayi.

³⁵Tu ujainam nisha chichainak:

—Iisha waketkur jinta weakur nekasar Jesús wainkamji. Tura pangkan achik puurtamak iin suramsamta, nekas Jesúsapita tusar nekaamji, —tiarmiayi.

Jesús ni nuiniatiri ainaun wantintukmauri

(*Mat. 28.16-20; Marc. 16.14-18;*

Juan 20.19-23)

³⁶Tu chichainak pujuinai, Jesús aneachmau jafen wajas:

—Penger nintimsaram pujustaram, —timiayi.

³⁷Tamati nuna antukar shaminak:

—¿Wakanchawashi? —tu nintimrarmiayi. ³⁸Tu nintiminamtai Jesús chicharak:

—¿Waruka shamrarme? ¿Waruka winasha wakanchawashi tuusha nintimrurume? ³⁹Jiirsataram. Wiitjai. Tura uwejrusha tura nawersha takarsaram jiirsataram. Wakankia nekas namangtichuitai. Tura ukunchtichuitai, —timiayi.

⁴⁰Nuna tii ni uwejencha, tura mijiarincha inakmasmiayi. ⁴¹Turamtai iijumurin wainkar warainayat timiá shamkaru asar, nekasampita tichamin nekapiarmiayi. Tu nintiminamtai Jesús iniak:

—¿Juni yuta awak? —timiayi.

⁴²Tamati namak inaramun yuwati tusar susarmiayi. ⁴³Tura susaram Jesús nuna achik, ni nuiniatiri jiiimia wajainai yuwamiayi. ⁴⁴Tura yuwa umis Jesús ataksha chichaak:

—Wi atumjai pujusan timiajrume nuka mash turunayi. Tura wína pachitas Moisés aarmia nusha uminkayi. Tura Yuse chichame etserin aararmia nusha, tura papi Salmonam aarmawa nusha mash uminkayi, —timiayi.

⁴⁵Nunia Yuse chichame niin pachis aarmaunasha Jesús ni nuiniatiri ainaun nekamtikiamiayi. ⁴⁶Tura ataksha chichaak:

—Yuse chichame tu aarmawaitai: ‘Mesías Yus akupkamutiat jakatnuitai. Tura kempatam kinta jaka tepayat nantaktinuitai,’ tu aarmawa nuka wína pachitas aarmawaitai. ⁴⁷Tura aints ainau ni nintimaurin yapajiawar, ni tunaarin inaisaramtai, Yus ni tunaarinja mash sakartinuitai, tusar wína naarun pachitsar Jerusalénnumia nangkamawar mash nungkanam etserkartin ainawai. ⁴⁸Tura atumsha wi turunamur mash nekau asaram etserkatnuitrume. ⁴⁹Tura

wína Apaachir: Wína Wakantrun akuptuktatjar me tinu asamtai, nuka nayaimpinmaya taatsaing, juni Jerusalénnum pujustaram. Tura taa ni kakarmarin suramsatatrume, —Jesús timiayi.^m

Jesús nayaimpinam wakamuri
(*Marc. 16.19-20*)

⁵⁰Nunia mash etserak umis, ni nuiniatiri ainaujai iruntrar Betania yaktanmanini wearmiayi. Tura nuni wear, Jesús wajas ni uwejen takui: “Yamaikia pujustaram. Yus yainmakarti,” timiayi. ⁵¹Tura uwejen takui kanák wajas nayaimpinam wakamiayi.ⁿ

⁵²Turamtai ni nuiniatiri ainau: Ameketme Yusem tusar nukap warasar Jerusalénnum waketiarmiayi. ⁵³Tura nuni jear, kintajai metek Yus seatai juun jeanam wayaawar: Yus juuntapita tiarmiayi. Maaketai.

Yamaram Chicham Juanku Aarmauri

Yuse Uchiri Yuse chichamea tumawaitai timiauri

1 ¹Nu nangkamtaik Yus mash aa nuna najantsaing, Yuse Chichamengka tuke ayayi. Nu Chichamka tuke Yusnum pujuyayi. Tura asa Yuseyayi.^a ²Nuka nu nangkamtaik Yusjai tuke pujuyayi. ³Ningki najanamuka pengké atsawai, antsu Yus ni Uchirijai mash najanamiayi.^b ⁴Nuka tuke iwiaaku pujau asa, aints ainaun tuke pujustinun suyayi. Tura tuke pujutan sukartin asa, paaniunam pujus, aints ainau nekasar paan nintimrarti tusa chichaman nekamtiknuyayi. ⁵Tura aints ainaun tuke paan nintimtikin asa, aints teenam pujuinauka paan nintimrarti tusa tuke nintimtikui. Tura Yusen umirtan nakitinauka teenam pujuinau asar, nu paaniunam pujaunaka nepetkartatkama pengké tujinkarmiayi.^c ⁶Cristo wantintsaing Yus Imiakratin Juankun akupkamiayi. ⁷Turamtai aints ainau ni chichaamun antukar nekasampita tiarat tusa, Juan nu paaniunka pachis chichaman etserkatas tamiayi. ⁸Juanka mash aints ainaun paan nintimtiknuka achayayi. Antsu nu paaniun pachis etserkat tusa, Yus akupkamuyayi.^d ⁹Nu paaniun nintimtiknuka chikichaitai. Nuka aints ainaun mash

paan nintimtikrartas ju nungkanam tamiayi.

¹⁰Tura ni chichamen nekamtikiartuktas, ju nungkanam taa akiinamiayi. Tura ju nungkan najanau waininayat, ju nungkanam pujuinauka nuwaapita tusar nekaacharmiayi. ¹¹Ju nungkanam ni weari pujuinamunam tamiayi. Tura waininayat, ni wearisha niin pachischarmiayi. ¹²Tura ni weari pachischaram, chikich ainau niin nekasampita tusar nintimtinauka Yuse uchiri arti tusa tsangkamkamiayi.^e ¹³Junia aints akiinawarua nunisarang ataksha akiinawaruka ainatsui. Tura junia aints uchin yajutmarua nunisarang ataksha yajutmarmauka ainatsui. Antsu Yus yajutmarmawa nunisarang Yuse uchiri ainawai.

¹⁴Nu Chichamka ju nungkanam akiina aints wajakmiayi. Tura iijai pujuyayi. Nuni iisha ni kakarmari waitnuyaji. Yuse Uchiri kichik aa nu ni Apaachiriya nunisang tuke puju asamtai, ni nekas chichame anturnuyaji. Tura ni anengkraitairisha nekarnuyaji.^f

¹⁵Tura Juan Criston pachis chichaak: —Juwaitai wi timiaja nuka: Wikia atsai tuke puju asa, wina ukurun winayat wina nangkaatukuitai, —timiayi.

¹⁶Cristo timiá anengkartin asa, mash pengker aa nuna tuke inaitsuk sukartinu-

a 1.1 (Yuse Chichame ta nuka Yuse Uchirin taku tawai.) b 1.3 (Gén. 1.3-31; Sal. 33.6-7; Col. 1.15-17; Hebr. 1.2; 1.Juan 1.1) c 1.5 (Nu paaniunam pujauka Cristoyayi.) d 1.8 (Mat. 3.1; Marc. 1.4; Luc. 3.3) e 1.12 (1.Juan 3.1) f 1.14 (Mat. 11.27)

yayi. ¹⁷Yaanchuik Yus Moisés umirkatin chichaman akatramiayi. Antsu Yuse anengkratairinkia, tura nekas chichamna-sha Jesucristo iin nekantikramnuyaji. ¹⁸Aints kichkisha Yunsaka pengké wainkacharu ainawai. Antsu ni Uchiri, nekas kichik aa nuka tuke nijai tsanias puju asa: Yus tu awai tusa, iincha paan nekantikramamiaji.^g

**Imiakratin Juan Jesucriston
pachis etserkamuri**

(Mat. 3.11-12; Marc. 1.7-8; Luc. 3.15-17)

¹⁹Judío juuntri ainau Jerusalénnum pujuinau asar, sacerdote ainaun tura sacerdote inatiri ainauncha akatrar akupinak:

—Atumka Juannum werum, nekas Mesíaschawashi tusaram nekaataram, —tiarmiayi. Tinamtai nuka ayu tusar, Juannum wearmiayi. ²⁰Tura Juannum wear tu iniinam, Juan aimiak:

—Atsa, wikia Mesíaschawaitjai, —timiayi.^h

²¹Tamati ataksha iniinak:

—¿Tura warí aintsuitme? ¿Yaanchuik Yuse chichamen etserin Elíaskitam? —tu iniinam, Juan aimiak:

—Atsa, nuchawaitjai, —timiayi. Tamati ataksha iniinak:

—¿Tura Yuse chichame etserin tatinua nukítam? —tiarmiayi. Tinamaitiat ataksha:

—Atsa, nuchawaitjai, —timiayi.ⁱ

²²Tamati pengké tujinkar:

—Tura amesha nuwaitjai tusam, paan ujakratkata. Iin akuptamkaji nu warintuk ujaktaij tusar, paan nekaatar wakeraji, —tiarmiayi.

²³Tinamtai Juan ayaak:

—Yaanchuik Yuse chichamen etserin Isaías naartin wína pachitas papinum

aak: ‘Aints numi atsamunam wekaas kakar chichaak: Apu wekaasati tusar, aints jintan tupin iwiarina nunisrumek atumi ninti iwiarataram,’ tímia nuwaitjai, —timiayi.^j

²⁴Tamati Juanjai chichainauka fariseo akupkamu asar, ²⁵ataksha iniinak:

—Tura Mesíaschawaitiatmesha, tura Elíaschawaitiatmesha, tura Yuse chichamen etserin tatinua nuchawaitiatmesha ¿waruka aints ainausha imiaame? —tiarmiayi.

²⁶Tu tinam Juan ayaak:

—Wikia aints ainaun aya entsanmak imiaajai. Antsu yamai atum pujamunam chikich aints pujawai. Tura nuwaapita tusarmeka nekatsrume. ²⁷Nuka wína nangkatusang tuke iwiaaku pujuwitiat, wína ukurun winitatui. Wikia nekas mianchau asan, tsunsumruan ni sapatrin jingkiamun atitataj tayatun, natsaamaku turachminuitjai, —timiayi.

²⁸Betania nungkanam Jordán entsa tumajin Juan aints ainaun imiaamunam nunaka timiayi.^k

**Jesúska Uwija Uchiriya
tumawaitai timiauri**

²⁹Nunia kashin tsawaar Juan Jesús winaun wainak aints ainaun chicharak:

—Jiistaram. Juka Yus akupkamu asa, uwija uchiriya nunisang mash nungkanmaya ainau tunaarin sakartas jakatnuitai.

³⁰Ju wina ukurun winitatui timiaja juka tuke iwiaaku puju asa, wina nangkaturkaitai tusan ujakmajrume nuwaitai.

³¹Juka wantintsaing, Yus akupkamuitai tusanka nekaachmiajai. Antsu ju wantinkamtai, Israel ainau nuna mash paan nekaawarat tusan, aints ainaun imiainiartasan tamajai, —timiayi.

³²⁻³³Nunia Juan ataksha chichaak:

—Wína akuptuku chichartak: ‘Yuse Wakani yampitsa tumau yakiya nanaaki taa aintsnum ketu wainkatatme. Turamtai juwaapita aintsu nintin Yuse Wakani engkemtuatnua tusam nekaatatme,’ wína turutmiayi. Nuna wainchaknaka yáki tusancha nekaachmiajai. Turayatun Yuse Wakani yampitsa tumau nayaimpinmaya tara, aintsnum ketu winkau asan, nuniangka juwaapita tusan nekaamjai. ³⁴Tura nuna winkau asan, juka nekas Yuse Uchirintai tusan paan etserjai, —Juan timiayi.

**Nu nangkamtaik Jesúsa nuiniatiri
ainaun pachis etserkamuri**

³⁵Kashin tsawaarar Juan ni jimiari nuiniatiri ainautijai iruntrar wajasmiaji. ³⁶Tura Jesús nangkaamaun wainak, Juan iiti chichartamak:

—Jiistaram. Juwaitai Yus akupkamuitai. Juka nekas uwija uchiriya tumawaitai, —turammiaji.

³⁷Turammatai nu antukar ni nuiniatiri jimiari ayatrik, Juanka ukukir Jesús nemarkamiaji. ³⁸Tura asakrin Jesús pajas jiimias:

—¿Atumsha yaachia earne? —turammiaji.

Turammatai iisha:

—Nuikiartinu ¿tunia pujame? —tuniasmiaji.

³⁹Tu iniam Jesús chichartamak:

—Watska, iijai wemi. Tura wi pujamur wainkamniuram, —turammiaji.

Turammatai ayu tusar, nijai weri Jesúsa pujamuri wainkamiaji. Tura tsaa nungka wajasu asamtai, iisha nuni wayaar kintamramiaji.

⁴⁰Iikia jimiarichitak Juanku chichame antuku asar, Jesús nemarkamiaji. Wijai tsanias nemarkamiaji nuka Andrésuyayi.

Nuka Simón Pedro yachí ayayi. ⁴¹Andréscha Jesúsan wainkau asa, chikich aintsun ujatsuk, niyá eemak ni yachiin Simónkan eaktas wemiayi. Nunia wainak:

—Mesíaska wainkaji, —tusa ujakmiayi. Mesías ta nuka Cristoitai, Yus akupkamuitai taku tawai.

⁴²Nunia Andrés ni yachiin Simónkan juki, Jesús pujamunam jeemiayi.

Turamtai Jesús Simónkan wainak:

—Ameka Simónkaitme. Juanku uchirinme. Yamaikia ami naarmeka Cefas atatui, —timiayi.^l

Jesús Felipen Natanaeljai untsukmauri

⁴³Kashin tsawaar, Jesús Galileanam wetas wakerimiayi. Tura Felipen wainak: —Nemartusta, —timiayi.

⁴⁴Nu Felipeka Betsaida yaktanmaya aintsuyayi. Andréscha, tura Pedrosha nu yaktanmayang iruniarmiayi. ⁴⁵Nunia Felipeka Jesúsa chichamen antuku asa, Natanaelan eaktas wemiayi. Tura wainak chicharak:

—Yaanchuik Moisés chichaman aak: ¿Yus akupkatnuka tatinuitai tu aarchamukai? Tura yaanchuik Yuse chichamen etserin ainu Yus akupkatnun pachisar aararmia nu aintska iikia nekasar wainkaji. Nuna naaringkia Jesúsaitai. José uchirintai. Nazaretnumia aintsuitai, —timiayi.^m

⁴⁶Tamati Natanael ayaak:

—¿Nazaretnumiangka pengke aints kichkisha aminkai? —tamati, Felipe chicharak:

—Watska, iijai wemi. Amesha wainkamniuram, —timiayi.

⁴⁷Tamati Natanael ayu tusa, Felipejai wemiayi. Turamtai Jesús Natanaelan winaun wainak:

—Jiistaram, juka nekas Israela wearintai. Juka pengké anangkartichuitai, —timiayi.

⁴⁸Tamati Natanael chicharak:
—¿Tunia winasha waitkamame? —tu iniam Jesús ayaak:

—Felipe amin untsurmatsaing, numi higuera nantujen pujamin nekaamjame, —timiayi.

⁴⁹Tamati Natanael chicharak:
—Nuikiartinu, ameka nekasam Yuse Uchirinme. Israel ainautin apurinne, —timiayi.ⁿ

⁵⁰Tamati Jesús chicharak:
—Wi amin higuera numi nantujen pujamin nekaamjame tamau asam, ¿ameka nekasampi Yuse Uchirinme turutmek? Antsu wi taja nuna nangkamemek wainchati takat turamusha wainkatnuitme tajame, —timiayi.

⁵¹Nunia ataksha chicharak:
—Nekasan tajame: Yus nayaimpin uraamtai, wikia aints ayatnak Yus akuptuku asamtai, atumsha Yuse awemamuri nayaimpinmaya wi pujamunam tarutiar, nunia nayaimpinam waketinai wainkatnuitrume, —Jesús timiayi.

Jesús nuwa nuwatmaunum wemaui

2 ¹⁻²Kampatam kinta nangkamaramtai, Galilea nungkanam Caná yaktanam nuwa nuwatmau fiesta amiayi. Turamtai Jesús nasha, tura ni nuiniatiri ainautincha untsurmakaru asaramtai, iisha nuni wemiaji. Tura Jesús a nukurisha nuni pujumiayi. ³Tura umuti vino tutai amukamtai, nukuri Jesús an chicharak:

—Vinoka mash amukayi, —timiayi.

⁴Tamaitiat Jesús aimiak:
—Nukuachi ¿warukaya winasha turutme? Wi wainchatai takat turatnuka jeatsui, —timiayi.

⁵Tamati Jesús a nukuri vino surin ainaun chicharak:

—Au inatmamtaisha miatrusumek umirkataram, —timiayi.

⁶Tamati muits kaya najanamu nekas juun seis armia nuna judío ainau jeanam wayaawar nu muitsnum yumin yarakar uwejencha, tura nawencha nijau armiaiyi. ⁷Tura asamtai, Jesús vino surin ainaun chicharak:

—Ju muits irunuka yumi shikikrum, met met pintrataram, —timiayi.

Tamati miatrusarang met met pintrarmiaiyi. ⁸Tura pintraramtai Jesús chicharak:

—Yamaikia jumchik shikikrum jeentin susataram, —tamati shikikiar jeeniun susarmiayi.

⁹Tura vino surin ainau: Yumiapi yarakmaji tusar nekarmiayi. Antsu fiestanam unsumakuka yumi vino najanamun nekapsatas umusa jiis:

—¿Jusha tunia itamuita? —tusasha nekatsuk shiirman nekapramiayi. ¹⁰Tura asa yamai nuwan nuwatkaun untsuk chicharak:

—Ii nungkarin fiesta najankurkia, nu nangkamtaik nekasar vino pengker tuke suaji. Tura nukap amuraramtai, nuniangka mianchaun suaji. Antsu ameka nuka turutsuk, vino pengker aa nu ukusu asam sukartame, —timiayi.

¹¹Jesús nu nangkamtaik Galilea nungkanam Caná yaktanam nu wainchatai takatnaka turamiayi. Tura nu turamujai ni kakarmarin paan inakmasmiayi. Turamtai ni nuiniatiri ainautisha nu wainkau asar: “Juka nekas Yus akupkamuitai” timiaji.

¹²Nunia Jesús ni nukurijai, tura ni yachí ainaujai, tura ni nuiniatiri ainautijai Capernaum yaktanam wemiaji. Tura nuni jear, jumchik kinta pujusmiaji.^o

Yus juun jeanam tangku surinun jiikmiauri
(*Mat. 21.12-13; Marc. 11.15-18; Luc. 19.45-46*)

¹³Judío fiestari, Pascua tutai jeatak wajasamtai, iikia Jesús jai Jerusalénnum

wemiaji.^p ¹⁴Tura nuni jear, Yus seatai juun jeanam wayaar, aints waakan surinau, tura uwijan surinau, tura kayuk suwencha surinau wainkamiaji. Tura aintsu kuikiarin yapajinausha wainkamiaji. ¹⁵Tura Jesús nuna wainak, chapikian chapikmar umis, nujai waaka ainaun, tura uwija ainauncha awatar jiiykiayi. Tura kuikia yapajinau misarincha ayantur, kuikiarin nungka ujuntramiayi. ¹⁶Tura kayuk suwen surin ainaun chicharak:

—Juka mash jiiiktaram. Wína Apaachiru jeenka surutai jeaka najanawairap, —timiayi. ¹⁷Tamati ni nuiniatiri ainautisha Jesús turamuri nintimsar, Yuse chichamen etserin yaanchuik aarmauri nintimramiaji. Nu aarmauka Yuse jeen pachisar tu aarmawaitai: “Ami jeemka nekas pengker asamtai, kakarman kasmatnuyajai,” tu aarmawaitai. ¹⁸Jesús turamtai, judío juuntri ainu iniinak:

—¿Ameka ju turata tusang Yuska aminka akuptamkamia? Watska, Yus akupkamuitkumka, ¿Yuse kakarmarijai warí wainchati takata turatatme? —tiarmiayi.

¹⁹Tinamtai Jesús chicharak:

—Wi ju jea pujaja juna yumpungkkrumnisha, wikia ataksha kempatmachik kintajai jeamkainjai, —timiayi.^q ²⁰Tamati judío juuntri ainu chicharinak:

—¿Ju jeaka cuarenta y seis (46) musach jeamkamua juka kempatam kintajaingkiash jeamkaintam? —tiarmiayi. ²¹Tinamaitiat Jesús nekas jean pachiska tichamiayi, antsu ni namangken pachis: Wi kempatam kinta jakan tepayatun ataksha nantaktinuitjai, taku timiayi. ²²Tu tinu asamtai Jesús ukunam jakamunmaya nantakiamtai, ni

nuiniatiri ainautisha ni timiauri nintimrar nekasampita timiaji. Tura Yuse chichamen etserin ainausha yaanchuik Jesús pachisar tu aararu asaramtai, nusha ukunam nintimrar nekasampita timiaji.

Jesús aints ainu nintin mash nekawai

²³Nunia Jesús Pascua fiestan inangkartaj tusa, Jerusalénnum pujus, wainchati takat ainaun turamtai, aints untsuri nuna wainkar: Nekasmeapi Yus akupkamuitme tiarmiayi. ²⁴Tinamaitiat Jesús mash aints ainu nintimaurin nekau asa, wína miatrusarka nintimturinat sui tusa nekaamiayi. ²⁵Tura aints ainu nintin ningki paan nekaru asa, chikich ainaun pachiska wína ujatkarat pengké tichamiayi.^r

Jesús Nicodemojai chichasmauri

3 ¹Fariseo aints Nicodemo naartin judío apuri ayayi. ²Tura Jesús kashi weri chicharak:

—Nuikiartinu, aints Yusjai pujachuka, ame wainchati takat turame nunaka kikhkisha turachminuitai. Tura asamtai Yus amin aints ainaun nuiniarat tusa akuptamkawaitai tusar nekaji, —timiayi.

³Tama Jesús ayaak:

—Nekasan tajame: Aints ataksha yakiya akiinachuka Yuse pujutirin waintancha pengké wainkachartinuitai, —timiayi.

⁴Tamati Nicodemo iniak:

—¿Aints timiá juuncha itiur ataksha akiinating? ¿Aints ataksha akiinatas ni nukuri ampujen engkematnukai? —timiayi. ⁵⁻⁶Tu iniam Jesús ataksha ayaak:

—Atsa, nuka turunashtinuitai. Aintsnu-mia akiina nuka aintsuitai. Antsu Yuse

Wakani aintsun engkemtuumka nuka
Yusnumia akiinui. Tura asamtai nekasana
tajame: Aints Yuse Wakanjai akiinachuka
Yus pujamunmaka pengké jeashtinuitai.
7Wi amin chicharkun: 'Ataksha yakiya
akiinatnuitme,' tajame nuka çitiurkamnau-
kai? tuuka nintimraip. 8Nase nintimrata.
Nase ningki wakerak nasentui. Tura nase
uutmausha antayatmek çtuniang winá?
tura çtuki wea? tusamka nekatsme. Yuse
Wakani naseya nunisang wainchati asamtai,
Yuse Wakanjai akiinausha tuyapi akiinua
tusamka nekaashtinuitme, —timiayi.⁵

⁹Tama Nicodemo ataksha iniak:

—¿Ame tame nusha ititurkamnawaita?
—timiayi.

¹⁰Tu iniam Jesús ayaak:

—¿Ameka Israel ainu nuinichukitam?
¿Turayatmesha waruka wi taja nuka
nekatsme? ¹¹Nekasan tajame: Iikia ii
nekamu chichaaji. Tura ii wainmau
etserji. Tura ii etserji nuka antayatrum
nekasampita tu weatsrume. ¹²Wikia ju
nungkanmayan pachisan chichaamtai,
nekasampita tachakrumka çitiur nayaim-
pinmayan pachisan etsermausha
antukrum nekasampita titarmek?

¹³“Ju nungkanmaya aints kichkisha
nayaimpinam wakaar ataksha tarauka
ainatsui. Antsu wikia aints akiinayatun
Yus akupkamu asan, nayaimpinmaya
taramiajai.

¹⁴Yaanchuik entsa atsamunam aints
ainu napi esaim kajinamtai, uwemrarat
tusa Moisés napin jirun najana yakí
takuimiayi. Tura asamtai wisha nunisnak
aints akiinayatun Yus akupkamu asan,
aints ainaun uwemtikratasan numinam
yakí nemaatnuitjai. ¹⁵Tura asamtai aints
ainu nintimursar: Nekasampi wina
uwemtikrurtatua turutinauka jinum
wetsuk, antsu tuke iwiaaku pujusartin
ainawai, —Jesús timiayi.

Yuska mash nungkanmaya ainautin anengkratuí

¹⁶Yus mash nungkanmaya ainautin
timía anengkratu asa, ni uchirin
kichkinak akupturmakmiaji. Tura
asamtai mash nekasampita tusar,
nintimtin ainauka tukeka mengkakachar-
tin ainawai, antsu tuke Yusnum iwiaaku
pujusartin ainawai. ¹⁷Yuska aints
ainautin mengkaakarti tusangka ni
Uchirinka akupturmakchamiaji. Antsu
mash aints ainautin uwemtikramratas ni
Uchirin akupturmakmiaji.

¹⁸Yuse Uchiri nekasampita tusar
nintimtinainauka ji kajintrashtinumka
pengké akupkashtinuitai. Antsu Yuse
Uchiri kichik aa nuna nekasampita tusar
nintimtinachu ainauka niin nekasampita
tichau asar mengkaakartinuitai. ¹⁹Yuse
Uchiri ju nungkanam tara, aints ainu
tunaarin paan nekamtikiamiayi. Turamai-
tiat aints ainu tunau turin asar,
paaniunmaka pujutan nakitinak, antsu
tuke teenam pujustasar wakerinau asar
tuke mengkaakartin ainawai. ²⁰Tunau
takau ainauka mash paaniunam
pujutnaka nakitinawai. Tura ni turamurin
nekarawarai tusar paaniunka yupitina-
wai. ²¹Antsu nekas chichaman
umirinauka Yuse wakeramurin tuke
turinau asar, chikich aints ainu ni
turamurin wainkarti tusar paaniunka
yupitinatui.

Imiakratin Juan Jesúsana pachis ataksha chichasmauri

²²Nunia Jesús ni nuiniatiari ainautijai
Judea nungkanam weri nuni pujusar,
aints ainu imaimiaji. ²³Juansha Enón
yaktanam Salimnum jeatak wajas aints
ainaun imiaak pujumiayi. Nuni entsa
nukap au asamtai, aints ainu

winaunaka imaimiayi. ²⁴Nunaka Herodes niin kársernum engkeatsaing turamiayi.^u

²⁵Tura Juanku nuiniatiri ainau judfo ainaujai chichainak:

—¿Yana imiakratmauriya timiá pengkeraita? —tunaiyarmiayi. ²⁶Tura nunia Juankun iniasartas wear chicharinak:

—Nuikiartinu, ame nuwik Jordán entsa amajin pujusam, amijai nuni pujuma nu pachisam: Wfina ukurun winitatui timiame nuka yamaikia aints ainau imiaawai. Tura asamtai mash niin nemaninawai, —ningki nintimsar tiarmiayi.

²⁷Tinamtai Juan aimiak:

—Yus ni kakarmarin akupkachamtakia, aints kichkisha nunaka pengké jukicharminuitai. ²⁸Atumka antarmin: ‘Wikia Cristochuitjai, antsu eemak jintan iwiaratnua nunisnak akupkamuitjai,’ wi timiaja nusha paan atukmarume.^v

²⁹Nintimrataram. Aints yamai nuwan nuwatmatai, ni amikrisha taa, nu mai tsaniasar wajainaun wainak, tura ni amikri etsermaun antuk nukap waraawai. Atumsha Jesús pachisrum etseru wearme nuna antukan, wisha nunisnak nekasan nukap waraajai. ³⁰Niisha mash aints ainau nangkamasang juuntaitai tuke tiartinitai. Antsu wikia nuna nangkamasnak tuke mianchau atinuitjai, —Juan timiayi.

Yakiya taramia nu pachisar etserkamuri

³¹Nunia ataksha Juan chichaak:

Yakíya taramia nuka mash nangkamakuitai. Tura nungkanmaya ainautikia ju nungkanmaya asar, ju nungkanam aa nuke pachisar chichaaji. Antsu nayaimpinmaya taramia nuka mash ainia nuna

nangkamakuitai. ³²Tura asa ni wainakamia nuna, tura antukmia nuna mash etserui. Tura waininayat ni chichamenka anturinatsui. ³³Antsu yakíya taramia nuna chichamen juwinak nekasampita tinauka Yus ta nuka nekasaintai tinawai. ³⁴Yus ni Wakanin surittsuk susamu asa, Yus akupkamuka ni chichamen tuke etserui. ³⁵Yus ni Uchirin aneau asa, ninu aa nuna mash inarti tusa akupkamiayi.^w

³⁶Aints Yuse Uchirin nekasampita tinauka Yusnum tuke pujusartin ainawai. Antsu Yuse Uchirin nintimtichu ainauka Yusnumka tukeka pujuschartin ainawai. Nunia Yusen umirtan nakitinau asaramtai, Yuska tuke wait wajaktinnum akupkatnuitai, —timiayi.^x

Jesús Samaria nungkanmaya nuwajai chichasmauri

4 ¹⁻²Aints ainau untsuri Jesúsá chichamen antukar niin nemarkartas mainiartas wakertiarmiayi. Tura wainiat Jesús nu aints ainaunka imiaichmiayi, antsu ni nuiniatiri ainauti aints ainau imaimiaji. Turakrin fariseo ainau iin pachitmasar: Jesúsá nuiniatiri Juankun nangkamasarang aints timiá untsurin imiainawai, tiarmiayi. ³Tinamtai Jesús nuna nekau asa: Ataksha iijai Galilea nungkanam waketkimi tamati, iikia Jesúsjai tsaniasar Judea nungkanmaya jiiinkimijai.

⁴Tura jiiinkir Samaria nungka japen nangkamaktin amijai. ⁵Tura Samaria nungkanam weakur, yakat Sicar tutainum jeatak wajasmijai. Nu nungkaka yaanchukia Jacobo nungkari ayayi, tura asa ni uchiri Josén susamuyayi. ⁶Nu nungkanmasha yaanchuk Jacob yumi shikitin nungka chingkiakmau asamtai, nuwa ainau nuni yumin shikiu armiayi.

Tsaa tupin wajasai, Jesús weka wekaaka pimpikin asa, yumi shikiti nungka taimunam ayamas keemsamiayi.

⁷⁻⁸Turamtaí ni nuiniatiri ainautikia yaktanam yurumak sumaktasar wemiayi. Turakrin Jesús ningki juwakmiayi. Tura juwakamtaí Samarianmaya nuwa yumin shikiktas tamiayi. Tura taamtaí Jesús chicharak:

—Yumi shikikiam surusta, —timiayi.

⁹Tu seam nu nuwaka ayaak:

—¿Waruka Samarianmaya nuwa aisha, ame judíotiatmesha winasha yumi umurtincha seatme? —timiayi. Judío ainauka Samarianmaya ainaujai pengké aujnaichau asaramtaí nunaka timiayi.^γ

¹⁰Tamati Jesús ayaak:

—Yus amin yumi umurtinun suramsatas wakera nu nekakmeka, tura yumi surusta tusa seatma nusha nekakmeka, nekasam wína seatinuitme. Turakmin wikia tuke yumi iwiaaku pujustinun sukartin asan, amin usamnawaitjame, —timiayi.^z

¹¹Tama nuwasha ayaak:

—Amesha yumi shikitisha takaktsume. ¿Tura yumi shikiti timiá nitkasha tuniang yumi tuke pujutan sukartincha surustame? ¹²Ii yaanchuik juuntri Jacob ju yumi shikitin chingkiamu asamtaí, niisha tura ni uchiri ainausha, tura ni waakari ainausha mash juni umin armiayi. Nunia chikich ainausha umurarti tusa junaka ukurtamkiayi. ¿Amesha ii juuntri Jacob nangkakaukitam? —timiayi.

¹³Tu iniam Jesús ayaak:

—Ju yumin umauka ataksha kitaarti-nuitai. ¹⁴Antsu wi yumin susatatja nuna umauka ataksha pengké kitaarchatnuitai. Tura nu yumin wi suamka aintsu nintin entsa pukunia nunisang aintsun pujut nangkankashtinun susatasan pajamturti-nuitjai, —timiayi.

¹⁵Tamati nu nuwaka ayaak:

—Winasha nu yumikia surusta. Wisha nuna umuran, pengké kitamchau ami. Tura asan yumin shikiktasnasha juningkia winichu ami, —timiayi.

¹⁶Tamati Jesús chicharak:

—Aishrum untsukam nijai juni tata, —timiayi.

¹⁷Tamati nuwasha aimiak:

—Wína aishruka atsawai, —timiayi.

Tamati Jesús ayaak:

—Ame: Aishruka atsawai tame nuka nekasam tame. ¹⁸Ame cinco (5) aints tsanirmam pujuyame. Tura yamaisha tsanirmam pujame nuka aishrumchawai-tai. Tura asamtaí: Aishruka atsawai tame nuka nekasam tame, —timiayi.

¹⁹Tama nu nuwaka aimiak:

—Apuu, wikia Yuse chichame etsernua nunin jiajme. ²⁰Ii juuntri ainau ju muranam wakaar Yusen: Ameketme juuntam tinu armiayi. Turayatrum judíotirmeka: Jerusalénnum Yusen ameketme juuntam tiartnuitai tuwearme, —timiayi.

²¹Tamati Jesús ataksha ayaak:

—Nuwachi nintimrata. Kinta jeatak wajasi, atumka ju muranmaka tura Jerusalénnumsha ii Apaachiri Yus: Ameketme juuntam titasrumka wecham-nawaitrume. ²²Atumka Yus nekachiatrum: Ameketme juuntam tarume. Antsu mash aints ainau uwentik-ratin judíonmaya tatin asamtaí, judíotikia: ¿Yus yaachita? tusar nekau asar nekasar: Ameketme juuntam taji.

²³Kinta jeatata nuka yamaikia jeayi. Aints ainau ii Apaachiri Yusen nekasar: Ameketme juuntam tiartas wakerinauka, tuke nintijai Yusen nekasar nintimrarti-nuitai. Antsu aints ainau niin nekasar tuke nintijai: Ameketme juuntam turutiarat tusa Yuska wakerawai. ²⁴Yuska

nekas Wakanitai. Tura Yusen nekasar: Ameketme juuntam tiartas wakerinauka Yuse Wakani wakera nunisarang tupin nintimsar: Ameketme juuntam tiartinuitai, —Jesús timiayi.

²⁵Tamati nu nuwa chicharak:

—Mesfaska chikich ainou Cristo tu weena nuka tatinuitai. Wisha nunaka nekajai. Tura ni taa, mash aa nunaka iin paan ujatmaktinuitji, —timiayi.

²⁶Tamati Jesús ayaak:

—Ame wina pachitsam chichaame nuka wiitjai, —timiayi.

²⁷Nu nuwajai chichaak pujai, ni nuiniatiri ainautisha tamiaji. Tura nu nuwa wainkar nukap nintimturmiaji. Turayatur: ¿warí pachismea aujaisha chichaame? tura ¿waruka chichaame? tusarkia, kichkisha iniaschamiaji.

²⁸Nuniangka nu nuwaka yumi shikitirin japa ukuki, yaktanam wakетки aints ainoun ujaak:

²⁹—Atumsha werum, aints wi turuna-murun mash wina turuta nu jiitaram. ¿Nuka Yus akupkatin ii nakaji nuchaukai? —timiayi.

³⁰Tamati nuna antukaru ainouka yaktanmaya jiinkiar, Jesús pujamunam wearmiaji. ³¹Nu nuwa yaktanam weamtai, ni nuiniatiri ainouti Jesús chicharkur:

—Nuikiartinu, amesha yuwata, —timiayi.

³²Tamaitiat Jesús iin airmak:

—Wina yutairuka atum nekachmau awai, —turammiaji.

³³Turammatai iisha ininiakur:

—¿Chikich aints ni yuwatniurinka itarcharmasha? —tunaimiaji.

³⁴Tunaiyakrin Jesús chichartamak:

—Wina akuptuku wakeramurin miatrusnak umiakun, tura ni takatrin miatrusnak takakmakun, yutan yuwina nunisnak kakartinuitjai. ³⁵Atumka chichaakrum: Cuatro (4) nantu nangka-

maramtai, árak juuktin jeatatu, tarume. Antsu wikia tajarme: Pangkairam jiimsaram aints winina au jiistaram. Arak juuktin kinta jeachu wainiatrumek, árak tsamakua nunisarang aints untsuri uwemtikratnuka yanchuk jeayi. ³⁶Aints arakan juwiinaunaka akiinawai. Tura arakan araamia nujai metek warainawai. Tura uwemratin chichaman antukaru ainou nu árak juwaamua nunisarang artinuitai. Yuse chichamen etserin ainou arakan araina nunisarang, tura arakan juwiina nunisarang mai metek takakminau asar, mai metek nayaimpinam warasartin ainawai. ³⁷Tura asamtai yaanchuik juun ainou chichainak: ‘Chikich aintska arakan araawai, tura chikichka juwaawai,’ tu tinu armia nuka nekasaintai. ³⁸Atumsha nunisrumek Yuse chichamenka etserchau arumning, aints ainou irurtaram tusan akupajrume. Chikich aints ainou arakan arainawa nunisarang Yuse chichamen yaanchuik etserkarmiaji. Turinamtai ukunmasha atum aints ainou Yuse chichamen nekasampita tiarat tusaram nekamtkiatnuitrume, —Jesús timiayi.

³⁹Ni nuiniatiri ainoutin chichartamak pujai, nu Samarianmaya nuwa wakетки, ni yaktarin pujuinaun ujaak: “Wi turunamurun mash ujatukai,” tinu asamtai, nu nuwa etsermaun antukaru ainou untsuri Jesús nekas Yus akupkamuitai tiarmiaji. ⁴⁰Tura asar Samarianmaya ainou Jesús pujamunam taar: “Ii yaktarin winitaram, iijai pujusmintrum,” tinamtai iisha ayu tusar, nu yaktanam jear jimia kinta kanurmiaji. ⁴¹Turakrin chikich aints ainausha Jesús a chichamen antukar, nekasampita tiarmiaji. ⁴²Tura asar nuwan chicharinak:

—Yamaikia ame chichaamu nuke antuku asar, nekasampita tatsuji, antsu iik ni chichame anturkau asar: Juka nekas

mash nungkanmaya ainaun uwentikrat-nuitai tusar nekaji, —tiarmiayi.

Jesús apu uchirin tsuwaramuri

⁴³Nunia Jesús Samarianam jimiaran kanur, nunia jiinki Galileanam wemiayi. ⁴⁴Tura ni nungkarin wakетки ai, ukunam atiniun pachis chichaak:

—Yuse chichame etsernun ni nungkan-
r pujuinau pachinatsui, —timiayi.^a

⁴⁵Tura Galilea nungkanam jeamtai, nunia aints ainau Pascua fiestan inangkartas Jerusalénnum wearu asar, nuni pujusar, Jesús turamurin wainkaru asar, Jesús pengker awajsarmiayi.^b

⁴⁶Tura asamtai Galilea nungkanam pujau ataksha Caná yaktanam wakетки-miayi. Nu yaktanam yaanchuik vino najanamia nuni Jesús jeai, chikich yaktanam Capernaum tutainum apu uchiri jaak tepemiayi.^c ⁴⁷Tura asamtai Capernaumnumia apu: Jesús Judea nungkanmaya jiinki, Galileanam tayi, tamaun antuk, Jesús werimiayi. Tura jeari chicharak:

—Uchir pengké jatanak wajasun ukukjai. Wait aneasam jearun winim uchir tsuwatrita, —timiayi.

⁴⁸Tama Jesús ayaak:

—Atumka wi wainchati takatan takai wainchakrumka, nekasampita turutsurme, —timiayi.

⁴⁹Tamaitiat apu ayaak:

—Apu, wait aneasam uchir jatsaing, wári winitrita, —timiayi.

⁵⁰Tamati Jesús apun chicharak:

—Jeemin wakетки. Uchirmeka pengker wajasi, —timiayi.

Jesús tamati, Capernaumnumia apu nuna antuk: Nekasampita tusa wakетки-miayi. ⁵¹Tura wakетки ni jeen jeatak wajasai, ni inatiri ainau jeanmaya jiinkiar ingkiungkar ujainak:

—Uchirmeka pengker wajasi, —tiarmiayi.

⁵²Tinamtai apu ni inatirin iniak:

—¿Tsaa tuni ketia pengkersha wajasma? —timiayi. Tu iniam ni inatiri aiminak:

—Yau tsaa yantanti michatrami, —tiarmiayi. ⁵³Tinamtai apu nintimias: Tsaa yantanti Jesús: Uchirmeka pengker wajasi, tu ujakmau asa, ni aintsriyai mash Jesús nekasampita tiarmiayi.

⁵⁴Jesús nu apu uchirin tsuwaru asa, Galilea nungkanam ni kakarmarin jimiaran inakmasmiayi. Tura nu wainchati takatnaka Judea nungkanmaya jiinki turamiayi.

**Jesús Betesda maatinam
kijirun tsuwarmauri**

5 ¹Nuniangka judío ainau fiestan najanawaramtai, Jesús ataksha Jerusalénnum wakеткиmiayi. ²Jerusalénnum Uwija Waiitiri tutainum nuni ayaamas maati amiayi. Nu maati naaringkia hebreo chichamejai Betesda tinu armiayi. Nu maati yantamen cinco (5) jea jeamkamunam jau ainau tepetiri armiayi. ³Tura jau ainau, tura wainmichu ainausha, tura wekaichau ainausha, tura kijiru ainausha untsuri nuni tepearmiayi. ⁴Tura asar Yuse awemamuri aneachmau entsan tamparmantikmatai, aints ainau: Wiyá ayangnaka pengker wajasainjapi, tu nintimsar: Entsa miartukat tusar maatinam nakasarmiayi. ⁵Nuni nakainak pujuinamunam aints treinta y ocho (38) musach tuke najaimiak tepeu pujuyai. ⁶Tuke nunisang tepeu asamtai, Jesús nu aintsun wainak, tura timiá musach najaimiak tepeu nekau asa chicharak: —¿Ame pengker wajasam wakermek? —timiayi.

⁷Tu iniam jau aimiak:

—Ja ai, natsa, antsu entsa miartamtai, aints wina imiatminka atsau asamtai, wikia maatsaing chikitcha eemkar maa weenawai. Tuminau asaramtai wikia juni tsatsuk tuke tepajai, —timiayi.

⁸Tamati Jesús chicharak:

—Nantakim tepetiram jukim weta, —timiayi.

⁹Tama nu chichaamujai metek nu aintska pengker wajasmiai. Tura nantaki tepetirin juki wemiayi. Tura ayamtai kinta asamtai, ¹⁰judío juuntri ainu nu pengker wajasun chicharinak:

—Ju kintaka ayamtai asamtai, tepetiram jukichminuitme, —tiarmiai.

¹¹Tu tinam nu aintska aimiak:

—Wína tsuwarauka chichartak: ‘Tepetiram jukim weta,’ turutin asamtai aitkajai, —timiayi.

¹²Tamati iniinak:

—¿Yaachia tepetiram jukim weta turamaj? —tiarmiai.

¹³Tu tinamaitiat nu aintska aimkatat-kama tujinkamiayi. Aints untsuri nuni wekajinamunam Jesúscha wári jiinki weau asamtai, nu tsuwaarama nusha yáki tusangka nekaachmiayi. ¹⁴Tura jumchik arus Yus seatai juun jeansam wayaamtai, Jesús niin wainak chicharak:

—Antukta. Yamaikia pengker wajasume. Tura asam ame najaimiame nuna nangkamasmek jatan jurumaki tusam, yamaikia ataksha tunau turuwaip, —timiayi.

¹⁵Tama nu aintska judío juuntri ainamunam we:

—Wína tsuwarauka Jesúsaitai, —tusa etserkamiayi. ¹⁶Tu ujaam, ayamtai kintati turau asamtai, judío juuntri ainu: ¿Jesús ititurkarik maawaintai? nu nintimrarmiayi.

¹⁷Tu nintiminamtai Jesús nuna nekaa chichaak:

—Wína Apaachir ju kintatisha tuke takakmasu asamtai, wisha nunisnak takakmajai, —timiayi.

¹⁸Tamati judío juuntri ainu nuna nekaawar: “Ayamtai kintan pachiat sui, tura Yus wína Apaachiruitai tinu asa, Yus wijai metekaitai, tu nintimias pujatsuash,” tusar Jesús nuna nangka-masarang kajerker maawartas wakeriarmiai.^d

Wina Apaachiru chichamejai takakmajai timiauri

¹⁹Tuminamtai Jesús chicharak:

—Nekasan tajarme: Wi Yuse Uchiri asan, wiki nintimsanak nunaka kichkisha turachminuitjai. Antsu wína Apaachir tura nuna wainkan nunaka turatnuitjai. Wína Apaachir tura nunaka wisha nunisnak mash turajai. ²⁰Wína Apaachirka wínaka anentui. Tura winasha ni tura nunaka mash nekamtikrawai. Tura nuna nangka-masang aints wainchati takatnasha winaka inaktursatatu. Tura asamtai atumsha nu wainkarmeka shamkaram nintimratatrupe. ²¹Wína Apaachirka jakau ainu tuke iwiaaku pujusarat tusa inankitin asamtai, wisha nunisnak wi wakeraknaka nunasha turamnawaitjai.

²²Wína Apaachirka aints ainaun pachis: Nu aintska pengkeraitai, tura nu aintska paseetai tatsui. Antsu wína Apaachirka: Aints ainu mash jiisam: Juka paseetai, tura juka pengkeraitai tusam mash nekaata turutmiayi. ²³Tura asa aints mash wína Apaachirun pengker awajinauka winasha nunisarang mash pengker awajustin ainawai. Wína Apaachir akuptuku asamtai, wína pachitinachuka wína Apaachirnasha nunisarang pachinat sui.

²⁴“Nekasan tajarme: Wína chichamrun antukaru ainu wína akuptukmia nuna

nekasampita tinu asar, pujut nangkankashtinun juwinawai. Tura jinam wait wajaktinnumka wechartinuitai, antsu yaanchuik jakawa nunisarang pujuinayat, pujut nangkankashtinun jukin asar, Yusnum tuke iwiaaku pujusartin ainawai.²⁵Nunasha nekasana tajarme: Uwemratin kinta jeatatu timiaja nuka yanchuk jeayi. Nu kinta jeau asamtai, wi Yuse Uchiri asan ataksha winamtai, wina unsummaurun antukartin ainauka jakaru ainayat, tuke iwiaaku pujusartin ainawai.²⁶Wikia ni Uchiri asamtai, wina Apaachirka tuke iwiaaku pujau asa, aints ainau tuke pujut nangkankashtin susata tusa tsangkatrukiayi.²⁷Tura wikia aints ayatun Yus akupkamu asan, aints ainaun pachisan: Nu aintska pengkeraitai, tura chikich aintska paseetai tusa nekaatnun wina Apaachirka surusmiayi.²⁸Ju chichamka iturkamnawaita tuuka nintimrairap. Jakamunmaya nantakiartin kinta nekas jeatnuitai. Nu kinta jeamtai, jakaru ainau mash wi unsumaurun antukar,²⁹iwiarsamunmaya jiinkartinuitai. Aints pengker aa nuna takasaru ainauka pujut nangkankashtinnum weartas nantakiartinuitai. Antsu tunau takasaru ainauka jinam tuke wait wajakartinnun weartas nantakiartinuitai, —Jesús timiaji.

Yus akupkamuitjai timiauri

³⁰Nunia Jesús ataksha etserak:

—Wiki wakeraknaka pengké turachminuitjai. Antsu wina Apaachir turata turutin asamtai, wikia miatrusnak umiajai. Tura wina Apaachir wina akuptuku asamtai, wi wakeraja nunaka nintimsuk pujau asan, ni wakeramurinak turajai. Tura asan wi turaja nuka nekas pengkeraitai.³¹Wiki nintimtasana etsertumamtaikia, aints ainau: Nangkami

tawai turutiartinuitai.³²Tura chikich wina pachitas etserturkatnuka awai. Ni wina pachitas etsera nunaka nekasaintai tusan nekajai.^e

³³Atumsha wina pachitsaram chicham nekaatasrum aints ainau Juankun iniasarat tusaram akupkamarume. Turakrumin Juan timia nuka nekasaintai.³⁴⁻³⁵Juan ji kapawa nunisang ¿aints ainau ninti itiu ainawak? tusa chichaman paan etsermiayi. Tura asamtai atumsha jumchik kinta ni chichame antukrum warasmiarume. Tura wainiatun aints wina pachitsara tina nunaka wikia pachitsajai. Antsu Yuse chichame nintimkuram uwemrataram tusan nunaka tajarme.³⁶Juan wina pachitas etsermia nuka nekasaintai tusaram nekaratnuitrume. Tura nuna nangkamasrumek wina Apaachir Yus akupkamuitai tusaram nekaratnuitrume. Ni turata turutin asamtai, wi turaja nu wainkuram: Nekasampi Yus akupkamuita tusaram nekaratnuitrume.^f

³⁷Tura wina Apaachirka wina akuptuku asa, wina pachitas: Wiitjai tusa paan nekamtikruamiayi. Tura wainiatrumek atumka ni chichamengka pengké anturchau ayarume, tura wina Apaachirsha waintasha wainchawaitrume.^g

³⁸Nunia wina Apaachir akuptuku waitiatrum, nekasampita turutchau asaram, wina Apaachiru chichamengka atumi nintijaingkia juwatsrum.³⁹Atumka Yuse chichamen etserin yaanchuik aararmia nu aujukuram: Nuna aujsanka nekasana tuke iwiaaku pujusainjapi tusaram nangkamrum tu nintimrume. Antsu nu aarman ainauka wina pachitsara aarman ainawai.⁴⁰Tura wainiatrumek wini winiram nekasrum pujut nangkankashtin jutaka nakitarme.

⁴¹“Aints wina pengkeraitme turutinamtaisha wikia pachitsajai.⁴²Maj, atumka Yus

aneatsrume tusan wikia nekajrume. ⁴³Wína Apaachir akuptuku asamtai, ju nungkanam taawitjai. Turai waitiatrumek winaka nakitrarme. Antsu chikich aints ningki nintimsar chichaman etserkartas wininam-taikia, nuna chichamengka anturkatatrum. ⁴⁴Atumka mai nuwamtak: Pengke aintsuitme turutiarat tu nintimsaram pujayatrum Yuska pachiatrume. Tura asaram ¿winaka ititurak nekasampita turutiarum? ⁴⁵Atumka wína pachitsaram: Ii tunaari ii Apaachirin ujatramkatatji, tuuka nintimsairap. Wikia nunaka turashtatjai. Atumka: Moisésa chichamen umirkan uwemratatjapi tayatrumek, Moisésa chichame umichu asakrumin, Moisés atumi tunaarin pachis paan aarmiayi. ⁴⁶Tura Moisés wína pachitas aaru asamtai, Moisésa aarmauri nekasampita tusaram, winasha nekasampi Yus akupkamuitme tusaram nintimursatnuitrume. ⁴⁷Tura Moisésa aarmauri nekasampita tichau asaram ¿wína chichamrusha iturak nekasampita titaram? —Jesús timiayi.

Jesús cinco mil (5,000) aints yuramuri
(*Mat. 14.13-21; Marc. 6.30-44; Luc. 9.10-17*)

6 ¹Nuna tusa ukuki, Jesús Galilea kucha tumajin katingmiayi. Nu kuchanka chikich aints ainauka Tiberias kucha tu weena nuwaitai. ²Tura jau ainaun tsuwarchamniaun wainiat, Jesús tsuwaru asamtai, chikich aints untsuri nuna wainkaru asar Jesúsán nemariarmiayi. ³⁻⁴Judío ainau fiestari, Pascua tutai jeatak wajasamtai, Jesús ni nuiniatiri ainautijai muranam wakaar, nuni pujusmiayi. ⁵Tura nuni pujarin, Jesús pangkai jiihkama aints untsuri wininaun wainak Felipen chicharak:
—Aints timiá untsuri yuratasrisha ¿tuniang yurumkasha sumaktaij? —timiayi.
⁶Jesúska ni turatnurinka ningki nekayat ¿Felipe warintuk aimkain? tusa timiayi. ⁷Tu iniam Felipe ayaak:

—Jimia pachak kuikijai pang sumakri-sha, kichik kichik aints jumchik suwamsha jeachminuitai, —timiayi.

⁸Tamati chikich nuiniatiri Andrés, Simón Pedro yachí, Jesúsán chicharak:

⁹—Juni uchi pang sebadajai najanamun cinco (5) takakui, tura namaknasha jimiaarchik takakui. ¿Tura aints timiá untsurisha ititurak mashcha yuratai? —timiayi.

¹⁰Tamaitiat Jesús ni nuiniatiri ainautin chichartamak:

—Aints ainau mash pujustaram titaram, —turammiaji.

Turammatai chirichri nukap amaunum pujusar, mash irumram cinco mil (5,000) aints iruntrarmiaji. ¹¹Mash iruntraramtai, Jesús pangkan takus, Yusen maaketai tusa, ni nuiniatiri ainautin suramsamtai, iisha nuni pujuinau mash susarmiaji. Tura namaknasha pachitsuk yuwarti tusar susarmiaji.

¹²Tura aints ainau mash tutuararamtai, Jesús ni nuiniatiri ainautin chichartamak:

—Nangkamiar japawarai tusaram, ampirmau jukitaram, —turammiaji.

¹³Turammatai pang cinco (5) amia nuna ampintramuri doce (12) changkin chumpiamiaji. ¹⁴Tura Jesús nu wainchati takatan turau asamtai, aints nuna wainkar chicharnainak:

—Juka nekas Yuse chichamen etserin ju nungkanam tatinuitai tinu armia nuwaapita, —tunaiyarmiayi.

¹⁵Tura ii apuri ati tusar, Jesúsán jukiartas wakerinam, Jesús nuna nekaa ataksha ningki muranam wakamiayi.

Jesús kucha japen nawejai wekaasamuri
(*Mat. 14.22-27; Marc. 6.45-52*)

¹⁶Tura kintamramtai Jesúsá nuiniatiri ainauti kuchanam wemiaji. ¹⁷Kashi Jesús taachmatai, juun kanunam engkemar, Capernaum yaktanam waketkimi tusar katimiaji. ¹⁸Turarin nase kakar nasenma-

tai, kucha tamparamuri kakar tamparimiayi. ¹⁹Tumamta iikia kuchanam kawinmakir seis (6) kilómetron wearin, Jesús kuchanam nungkanma nunisang wekaaki winau wainkamiaji. Tura wainkar shamkamiaji.

²⁰Tumakrin Jesús chichartamak:

—Wiiitjai, shamrukairap, —turammiaji.

²¹Turammatai iikia pengker nintimsar Jesús engkear jukir, kakarmachu ii weamunam nujamkamiaji.

Aints ainau Jesúsán eakmauri

²²Kashin tsawaarar aints tumajin juwakuu ainau kanu atsau wainkar: Ni nuiniatiri ainau Jesúsánaka ayacharmapi tu nintimrarmiayi. ²³⁻²⁴Nuni iruntrar chichainai, Tiberias yaktanmaya ainau chikich kanujai taarmiayi. Tura yau Jesús Yusen maaketai tusa, pangkan aints ainaun yuramia nuni arakchichu nujamkaramtai, aints nuni juwakuu ainau Jesúsánasha waintsuk, tura ni nuiniatiri ainautincha waitmakchau asar, nu kanunam engkemawar: Jesús eaktai tusar, Capernaum yaktanam wearmiayi.

Wiiitjai yurumka tumawaitjai timiauri

²⁵Tura kucha tumajin katingkiar, nuni Jesúsán wainkar iniinak:

—Nuikiartinu ¿warutia junisha katingmame? —tiarmiayi.

²⁶Tu tinam Jesús ayaak:

—Nekasan tajarme: Atumka yau pang yuwaram tutuaru asaram, wína eatrume. Turayatrum wainchatin turaja nuka nintimtsurme. ²⁷Junia nungkanam yurumak kaurtin aa nuke nintimsaram pujuirap. Antsu nekasrum: ¿Itiurak tuke Yusnum pujusaintaj? tusaram, yuta tuke kaurchatin aa nu nintimrau ataram. Apaachir Yus: Ameka nu turata tusa, wína inatrau asamtai, wikia aints

ayatnak, nu yutanka susatnuitjarne, —timiayi.

²⁸Tamati aints ainau iniinak:

—¿Yus wakeramu umiktasrisha warí ititurkatnuitji? —tiarmiayi.

²⁹Tu tinam Jesús ayaak:

—Yus wakeramuka nuwaitai: Yus wína akuptuku asa, aints ainau mash wína nintimtusarat tusa wakerawai, —timiayi.

³⁰Tamati ataksha iniinak:

—¿Tura amesha warí wainchati takatcha turame? Iikia nu wainkar: Nekasmeapi Yus akupkamuitme tusar, iikia nu nintimsar pujustinuitji. Tura asar ¿warí wainchati takatcha turame? tusar iikia nekaataras wakeraji. ³¹Yuse chichame tu aarmau asamtai, ii yaanchuik juuntri ainau aints atsamunam yurumak maná tutain yuwarmiayi. Nu aarmauka nuwaitai: “Aints ainaun yuratas Yu nayaimpinmaya yurumkan akupkamiayi,” —tiarmiayi.^h

³²Tinamtaí Jesús aimiak:

—Wi taja nuka nekasaintai. Moiséska atumi juuntri ainaun nayaimpinmaya yurumkanka susachmiayi. Antsu wína Apaachir nayaimpinmayan yurumak nekas aa nuna suramrume. ³³Yus nekas yurumkan nayaimpinmayan akupak, mash nungkanmaya aints ainaun pujut nangkankashtinun susatnua nuwaitai, —timiayi.

³⁴Tamati chicharinak:

—Apuu, nu yurumak pujut nangkan-kashtinun sukartin tame nuka tuke sukartusta, —tiarmiayi.

³⁵Tinamtaí Jesús aimiak:

—Wikia tuke pujutan sukartin asan atumi yurumkaria tumawaitjai. Tura asamtai wini wininauka tuke yapartsuk pujusartinuitai. Tura wína nekasampita turutinauka tuke kitamtsuk wijai pujusar-

tinuitai. ³⁶Antsu wi atumin timiaja nunaka ataksha tajarme: Wina waitkayatrüm: Nekasam Yus akupkamuitme turutsurme. ³⁷Aints ainaun wína Apaachir: Nuka aminu arti timiau asar, nuka wína aintsur artinuitai. Tura asaramtai wini wininaunka pengké nakitrashtinuitjai.ⁱ

³⁸Wikia wína wakeramurun turatasnaka nayaimpinmayangka tachawaitjai, antsu wína akuptuku wakeramurin najanatasan taawitjai. ³⁹Wína Apaachir wína akuptuku asa: Aints ainaun wína surusmia nunaka kichkisha mengkatsuk, antsu nungka amukatin kinta jeamtai, inankita tusa wakerawai. ⁴⁰Aints ainau wína nekasampi Yuse Uchirinme turutinauka mash tuke iwiaaku pujusartinuitai. Tura nu aints jakaramtai, nungka amukatin kinta jeamtai, wi inankitnuitjai. Nuwaitai wina Apaachiru wakeramuringkia, —Jesús timiayi.

⁴¹Jesús: “Wiitjai yurumak nayaimpinmaya akupkamunka,” tinu asamtai, judío ainau Jesúsan pachisar pasé chichatan nangkamawarmiayi. ⁴²Tura chicharnainak:

—¿Juka Jesúschaikai? ¿José uchiria nuchaukai? Iikia juna aparisha tura nukurisha wainiaji. Nuna uchirintiat çwarukaya nayaimpinmaya taawitjai tawa? —tunaiyarmiayi.

⁴³Tu tinamtai Jesús chicharak:

—Tuuka aujmatrutsuk asataram.

⁴⁴Wína Apaachir wína akuptukmia nuka aints ainaun nintimtikchamtaikia, aints kichkisha winingkia winichartinuitai. Tura nungka amukatin kinta jeamtai, wini wininaunka jakamunmayan inankitnuitjai. ⁴⁵Yaanchuik Yuse chichame etserin tu aarmiayi: “Yus mash aints ainaun nuiniartinuitai,” tu aarmau asamtai, wina Apaachiru chichamen

antukar nuimiaru ainauka wini wininawai.

⁴⁶“Wína Apaachirun aints kichkisha wainkacharuitai. Antsu wiki Yusnumia tau asan, Apaachirun wainkawaitjai.”^j

⁴⁷“Nekasan tajarme: Wína nekasar nintimtursar pujuinauka pujut nangkankashthinun jukiartin ainawai. ⁴⁸Wikia tuke pujutan sukartin asan, yurumkaria tumawaitjai.

⁴⁹Nintimrataram. Yaanchuik atumi juuntri ainau aints atsamunam yurumak maná tutain yuwariat mash jakarmiayi.

⁵⁰Antsu yurumkan nayaimpinmayan pachisan taja nuka wiitjai. Aints yurumkan yuwa nunisarang nekasampita turutinauka tuke jakachartin ainawai.

⁵¹Nayaimpinmaya yurumkan tuke pujutan sukartinna wiitjai. Tura asamtai nu yurumkan yuwinauka tuke iwiaaku pujusartin ainawai. Mash nungkanmaya ainau pujut nangkankashthinun jukiarat tusan jakatnuitjai. Tura asan wi yurumkaitjai taja nunaka wina namangkrun pachisan tajai, —Jesús timiayi.

⁵²Tamati judío mai nuwamtak chicharnainak:

—¿Juka itiurak yurumak yuwataram tusasha ni namangkencha sukartusminuita? —tunaiyarmiayi.

⁵³Tu tinam Jesús chichaak:

—Nekasan tajarme: Wikia aints akiinayaton, Yus akuptuku asamtai, wína namangkur yuwachkurmeka, tura wina numpar umachkurmeka nekasrum pujut nangkankashtika jukishtinuitume.

⁵⁴Aints wína nekasampita turutuka wína namangkrun yuwawa tumawaitai, tura wína numparun umawa tumawaitai. Tura asa pujut nangkankashthinun jukin asamtai, nungka amuamunam nu aintsna inankitnuitjai. ⁵⁵Wina namangkruka nekas

yuta tumawaitai. Tura wina numparsha nekas umutiya tumawaitai. ⁵⁶Wína namangkrun nintimias yuwauka, tura wína numparun nintimias unauka wijai tuke tsanias pujawai. Tura asamtai wisha nijai tuke tsaniasan pujajai. ⁵⁷Wina Apaachirka tuke puja nuka wína akuptak tuke pujustinun surusu asamtai, wína namangkrun nintimsar yuwinauka wi pujaja nunisarang wijai tuke iwiaaku pujusartinuitai. ⁵⁸Yus yurumkan nayaimpinmayan akupkamia nuna pachisan chichaajai. Yaanchuik atumi juuntri nayaimpinmayan yurumak akupkamun yuwariat jakarmiayi. Antsu yamaram yurumkan yuwinauka tuke iwiaaku pujusartinuitai, —Jesús timiayi.

⁵⁹Pujut nangkankashtinun pachis: Wikia yurumka tumawaitjai tusa, aints ainaun Capernaum yaktanam iruntai jeanam Jesús tu nuiniarmiayi.

**Pujut nangkankashtinun
pachis etserkamuri**

⁶⁰Jesúsa nemarnuri untsuri nu chichaman antukaru asar, mai nuwamtak chicharnainak:

—Ju chichamka nekas yumtinuitai. ¿Yáki junasha antukat? —tunaiyarmiayi.

⁶¹Tu tinamtai Jesús ni tunaiyamun nekaa chicharak:

—¿Waruka wi taja nuka napchawaitai? tarume. ⁶²Wi aints ayatun, Yus akupkamu asan, yaanchuik pujumiaja nuni waketkiamtaikia ¿warukawaintrumek?

⁶³Yuse Wakani nuke pujut yamarman sukartawai. Antsu aintsu namangkengka tuke iwiaakuka pengké pujuschamnawaitai. Wi taja nunaka Yuse Wakani nekamtikramat tusan, tura nekas pujut yamarman suramsarat tusan atumin ujaajrume, —Jesús timiayi.

⁶⁴Tura Jesús niin nintimtichu ainaun, tura niin suruktinua nunasha nu

nangkamtaik nekau asa, ni nemarnuri ainautin chichartamak:

—Atumjai iruntrar pujuinau winaka mashka nintimturinatsui. ⁶⁵Tura asakrumin wikia atumin chicharkun: Wína Apaachir aints ainaun wini winiarat tusar nintimtikchamka, aints kichkisha wini winichartinuitai timiajrume, —timiayi.

⁶⁶Tu tama ni nemarnuri untsuri Jesúsan ukukiar niin nemartan inaisarmiayi. ⁶⁷Tuminamtai Jesús ni doce (12) nuiniatiri ainautin ininmak:

—¿Atumsha nunisrumek jiinkiram wetasrum wakerarmek? —turammiaji.

⁶⁸Turammatai Simón Pedro aimiaki:

—Atsa Apuru ¿yanumak wetaij? Ami chichamijai tuke iwiaaku pujustinuitai. Amek nu chichamka etseru weame.

⁶⁹Iikia nekasampi Yus Akupkamuita, tu nintimsar pujau asar nuka nekaji, —timiayi.^k

⁷⁰Tamati Jesús aimiak:

—Wi doce (12) aints ainautirmin wina nuiniatir ataram tusan inaikiamiajrume. Turayat atumnia kichik iwianchrintin pachitkawai, —Jesús timiayi. ⁷¹Ni tímia nuka Judas Iscarioten Simónka uchirin taku timiayi. Judascha ni nuiniatirintiat ukunam Jesúsan anangka surukmiayi.

**Jesúsa yachí ainau Yus
akupkamuitme tichamuri**

7 ¹Nunia Jesús Galilea nungkanam wekaimiayi. Tura Judea nungkanam judío juuntri Jesús maatai tinau asaramtai, nuni wetan nakitmiayi. ²Tura judío fiestari, Aakmakmau Fiesta tutai jeatak wajamtai, ³ni yachí ainau Jesúsan chicharinak:

—Ami nuiniatiram Judea nungkanam pujuinau ami wainchatu takatrumin wainkarat tusam, junia jiinkim nuni

weta. ⁴Chikich aints ainau: Wina turamurun wainkarat tusar wakerinauka uukarka turinatsui. Ame wainchati takat takaakmeka, mash aints ainau wainminamunam turata, —tiarmiayi.

⁵Ni yachí ainausha: Nekasmeapi Yus akupkamuitme, tinachu asar nunaka tiarmiayi. ⁶Tu tinam Jesús chicharak: —Wi fiestanam wetin kintarka jeatsui. Antsu atumka pachitsuk weminuitrume. ⁷Ju nungkanmaya ainau atumnaka kajertaminatsui. Antsu wikia ni tunau takasmaurin nekantikmau asar, winaka kajertu weenawai. ⁸Atumek fiestanam wetaram. Antsu wína kintarka jeachu asamtai, wikia weatsjai, —timiayi. ⁹Nuna tusa ukuki Galileanam juwakmiayi.

Aakmakmau fiesta tutainum wemaui

¹⁰Turamtai ni yachí jiiinkiar fiestanam wearmiayi. Antsu Jesús juwakiat ukunam Jerusalénnum wemiayi. Tura aints ainau nekarawarai tusa uumak wemiayi.

¹¹Judío juuntri ainausha fiesta irunmaunum Jesúsán eainak:

—¿Nusha tuning puja? —tiarmiayi.

¹²Nu fiestati iruntrar aints untsuri Jesúsán pachisar chichainak:

—Nu aintska nekas pengkeraitai, —tunaiarmiayi. Tinamtai chikich ainau: —Atsa, nuka paseetai. Aints ainaun anangkatas wekainuitai, —tunaiarmiayi.

¹³Tura judío juuntrin shaminau asar, paan antukarai tusar chichakcharmiayi.

¹⁴Fiesta japen wajasai, Jesús Yus seatai juun jeanam waya, Yuse chichamen nuikiartutan nangkamamiayi. ¹⁵Turamtai judío ainau ni chichamen antukar nukap nintimrar:

—Jusha papin nuimiarchau ayatcha çitiurak nunasha nekawa? —tunaiarmiayi.

¹⁶Nuna antuk Jesús chichaak:

—Wi nuikiartaja juka wína chichamruçhuitai. Antsu wína akuptuku

chichamentai. ¹⁷Aints Yuse wakeramurin umirkartas wakerinauka: Wi chichaman nuikiartaja nuna Yusnawaitai tusar paan nekaawartin ainawai. Tura wiki nintimsanak chichaamtaisha, nunasha paan nekaawartin ainawai. ¹⁸Aints ningki nintimias chichaman etseruka, aints ainau wina pengker nintimtursarat tusa chichaman etserui. Antsu chikich aints niin akupkamia nunak pengker awajsatas wakerakka, aints ainaun anangtsuk nekas aa nunak ujaawai.

¹⁹Yus umiktin chicham umiktaram tusa, Moisés suramsau wainiatrumek, kichkitirmesha nu chichamka umirtsurme. ¿Waruka winasha mantuatasrumsha wakerutarme? —Jesús timiayi.

²⁰Tamati aints ainau aiinak:

—Waurkum nuka tame. ¿Yaachia amincha mantamatascha wakerutminawa? —tiarmiayi.

²¹Tinamtai Jesús aimiak:

—Wi ayamtai kintati aintsun kichik tsuwaru asamtai, mash ¿waruka aitkawa? tusaram nukap nintimrarume. ²²Tura wainiat Moisés chichaman akupturmak: Uchi aishmang akiinamtai, nuwapchiri charutkataram, atumin turamin asamtai, atumka ayamtai kinta au wainiatrumek tuke turin ainiarme. Antsu Moiséska nu turatnuka nangkamachuitai, antsu yaançhuku atumi juuntri ainau nu turatnuka nangkamawarmiayi. ²³Tura Moisésa aarmaurin miatrusrumek umirkuram, ayamtai kintatisha uchi nuwapchirin charutnuitiatrumsha, wi ayamtai kintatin kichik aintsun tsuwaraisa ¿waruka kajertarme? ²⁴Tenap nekartsuk aints ainaun pachisrum: Tunau turayi tiirap. Antsu nekasashi tusaram, inintrusrum tenap nekaataram, —Jesús timiayi.

Wikia tuniayainja timiauri

²⁵Tamati Jerusalénnumia aints ainau chicharinak:

—¿Maatai tina auchukai? ²⁶Jiistaram. Mash antinamunam chichau waininayat apu ainauka pachinatsui. ¿Nekasash Yus akupkamui tuuyash nintiminaj? ²⁷Iikia ju aintska tuniayainta tusar paan nekaji. ¿Antsu Yus akupkamu tatinua nusha tuniang winitnui? tusarsha aints kichkisha nekainatsui, —tunaiyarmiayi.

²⁸Tinamtai Jesús Yus seatai juun jeanam nuikiartak pujau, nuna antuk kakar chichaak:

—¿Wi tuniaya winaja nusha paantak nekaram? Wína wakeramurun takastanaka tachawitjai. Antsu wína nekas akuptukuka yaachita tusarmesha nuka nekatsrume. ²⁹Antsu wína akuptuku asamtai, wikia nijai pujayatun juni tau asan, wína akuptukunka paan nekajai, —Jesús timiayi.

³⁰Tamati aints ainau: “Watska, achikiar kársernum engkeatai,” tinayat ni achiktin kintari jeachu asamtai achikcharmiayi.

³¹Tura aints unturi: Nekas Yus akupka-mapita tusar chichainak:

—Mesías tatinuitai tina nu winakka, wainchatai takatan ju aintsun nangkamang unturi turashtinuitai, —tiarmiayi.

Fariseo ainau Jesús eaktaram timiauri

³²Fariseo ainau Jesúsán pachisar chichainaun antukar, sacerdote juuntri ainaujai iruntrar chichainak, Yus seatai jean wainin ainaun untukar: Jesús achiktaram tusar akupkarmiayi.

³³Turinamtai Jesús nuna nekaa aints ainaun chicharak:

—Wikia atumjai jumchik kinta pujustatjai. Tura nunia ataksha wína akuptuku pujamurin waketkitatjai.

³⁴Tura wi waketkiamtai, atumka eatkata-trume. Tura wi wetatja nuni winichmin asaram, winaka waitkashtinuitrume, —timiayi.

³⁵Jesús tamati judío mai nuwamtak iniininak:

—¿Ausha tu weamtaik iisha wainkash-tai? ¿Judío ainau arák griego ainaujai pachinkar pujuinamunam wetinun nu aints ainaun nuiniartas tatsuash? ³⁶Au iincha chichartamak: “Wína eatiatrume, wi weaja nuni wechamin asaram, winaka waitkashtinuitrume,” ¿iin turamji nunasha warina takua tawa? —tunaiyarmiayi.

Yumi tuke pujutan sukartinun pachis timiauri

³⁷Fiesta amuamu kinta timiá pengker kinta asamtai, Jesús nu kintati wajaki kakar chichaak:

—Aints ni nintin kitamawa nunisang pujakka, nintir kitamachua nunisang ati takungka wini winiti. ³⁸Tura wína nekasampi Yus akupkamuitme turutuka Yuse chichame aarmawa nunisang ni nintinia entsa pukunia nunisang aints kitaminawa nunisarang pujuinaunka tuke iwiaaku pujusarti tusa yaingkiartinuitai, —timiayi.

³⁹Kitaminawa nunisarang Jesúsán nekasampita tinu ainauka Yuse Wakani jukiartinuitai, nuna taku timiayi. Yuse Wakaningkia taachu asamtai, tura Jesús nayaimpinam weachu asa, ukunam atiniun pachis nunaka timiayi.¹

Aints metekchau nintimrar kanarmauri

⁴⁰Tamati aints ainau Jesúsá chichamen antukar chichainak:

—Nekas Yuse chichamen etserin tatinuitai tiarmia nuka juwaitai, —tiarmiayi.

⁴¹Tu tinamtai chikich ainausha chicharinak:

—Atsa, antsu Mesías tu weena nuwaitai, —tiarmiayi.

Tu tinamaitiat chikich ainau aiminak:
—Atsa ¿Mesíaska Galileanmaya
tatinkai? ⁴²Mesíaska ii juuntri Davidta
weari asa, Davidcha Belénnum akiinau
asamtaí, nisha nunisang Belénnum
akiinatnuitai, —tiarmiayi.^m

⁴³Tu tinau asaramtai, aints ainau
metekchau nintimrar kanararmiayi.

⁴⁴Tuminai chikich ainauka Jesúsán
achikiar jukiartas wakerinayat achikchar-
miayi.

**Apu ainau Jesúska Yus
akupkachmawaitai timiauri**

⁴⁵Tura Yus seatai jean wainin ainau
Jesúsa chichamen anturkar waketkiar
fariseo ainauncha, tura sacerdote juuntri
ainauncha ujakaram inintrinak:

—¿Waruka juni itachurme?
—tiarmiayi.

⁴⁶Tu tinam nuka aiminak:
—Nu aints chichaa nuniska aints
kikhisha chichachu armayi, —tiarmiayi.

⁴⁷Tu tinam fariseo ainau chicharinak:
—¿Atumnasha anangkramarume?
⁴⁸¿Judío apuri ainausha, tura fariseo
ainautisha kikhisha nu aints pachisar
nekasampita tinajiash? ⁴⁹Antsu Moisésa
aarmaurin nekachu ainauka Jesúsán
nekasampita tinu asar, yumingkramu
ainawai, —nangkamiar tiarmiayi.

⁵⁰Tinamtaí Nicodemo nuwik Jesúsán
kashi jearmia nuka fariseotiat chichaak:

⁵¹—Ii umirkatin chicham tu aarmau
asamtaí, aintsu chichaamuri anturtsuk,
tura ni turamurisha tenap nekartsuk
pujakrikia, wait wajaktintri tu atinuitai
pengké tichamnawaitji. ¿Nekaschaukai?
—timiayi.

⁵²Tamaitiat Nicodemon jiyainak:
—¿Amesha Galileanmaya aintskitam?
Galileanmaya aints Yuse chichamen
etsernuka pengké atsutnuitai. Amesha

Yuse chichame tenap augsam nekaata,
—tiarmiayi.

⁵³Tu tinu asar, kichik kichik ni jeen
waketkiarmiayi.ⁿ

Nuwa tunau turamtaí Jesúsnum itamuri

8 ¹Fariseo ainau ni jeen waketkiaram-
tai, Jesúska Olivo muranam
wakamiayi. ²Tura kashin tsawaar ataksha
Yus seatai juun jeenam jeamtaí, aints
ainau untsuri niin kautkarmiayi. Tura
kautkaram, Jesús keemas nu aints ainaun
nuiniarmiayi. ³Tura nuikiartak pujai,
Moisésa chichame nuikiartin ainau,
fariseo ainausha nuwan chikich aintsjai
tepaun wainkar jukiar, Jesús pujamunam
itaarmiayi. Tura aints iruntramunam
japen awajsar, ⁴Jesúsán chicharinak:

—Nuikiartinu, ju nuwaka chikich aintsjai
tepaun wainkaji. ⁵Moisés iin chichaman
akupturmak: Nuwa tumauka kayajai tukur
maatnuitai, tu aatramramiayi. ¿Tura amesha
warinme? —tu iniasarmiayi.^o

⁶Nunaka: ¿Ni warinting? nunia
chicham najanami tusar nekarawartas
tiarmiayi. Tinamaitiat Jesús aimtsuk
tsunsumaj ni uwejejai nungkan aak
pujumiayi. ⁷Jesús aak pujamtaí, tuke
itattsuk iniinam, wajaki chicharak:

—Ayu, watska, aints tunaun pengké
turichu akungka, kayan achik ju
nuwanka eemak tukuti, —timiayi.

⁸Nunia ataksha tsunsuma nungkan aak
pujumiayi. ⁹Tu pujau asamtaí, ni chichamen
antukaru ainau ni tunaarin nintimrar, juun
ainau nuwá eemkar jiinkiar, nunia chikich
ainausha mash kichik kichik jiinkiar
wearmiayi. Mash jiinkiar amtaí, Jesús ningki
nu nuwajai juwakmiayi. ¹⁰Nuniangka
Jesúscha wajaki nuwanak wainak:

—Nuwachi ¿aints amin jakati turamina
nusha warukawarma? ¿Kikhisha
juwakcharik? —timiayi.

¹¹Tu iniam nu nuwaka aimiak:

—Ja ai Apuru, kichkisha juwakchari, —timiayi.

Tamati Jesús chicharak:

—Ayu, wisha mantamawarti tichatatjame. Yamaikia jeemin waketkim nuniangka tunau turuwaip, —timiayi.

Jesús paaniuwa nunisketjai timiauri

¹²Aints ainu ataksha iruntraramtai, Jesús chicharak:

—Wikia paaniuwa nunisnak mash nungkanmaya aints ainaun paan nintimtikratnuitjai. Tura asamtai wína nemartinauka teenmaka pujuschartinuitai, antsu pujut nangkankashtinun jukiartin asar, tuke paaniunam pujusarti-nuitai, —timiayi.^p

¹³Tamati fariseo ainu chicharinak:

—Ameke amek nintimtumasang chichaame. Tura ame tame nuka nekaschawaitai, —tiarmiayi.^q

¹⁴Tu tinam Jesús aimiak:

—Wikia tuniaya winaja, tura tuwa weaja tusancha nekajai. Tura asan wiki nintimtumasan chichayatnak, wi taja nuka nekasaintai. Antsu atumka tuniaya winaja, tura tuwa weaja nuka pengké nekartsurme. ¹⁵Atumka ju nungkanmaya ainu nintimina nunisrumek aujmatru wearne. Tura wainiatun wikia aintsun kichkisha pachisnaka aujmatu weatsjai.

¹⁶Tura chikich ainaun pachisan: Nuka pengkeraitai, antsu kichka paseetai tayatun, wiki nintimsanak nunaka tatsujai. Antsu wína akuptukmia nusha nunisang nunaka tawai. Tura asamtai wi taja nuka nekasaintai. ¹⁷Atum umiktin chichamnasha Moisés tu aarmiayi: Jimia aints mai metek ni wainkamurin pachisar tu amiayi tusar etserinamtaikia, nu chichamka nekasaintai titinuitrume.

¹⁸Tura asamtai wi taja nuka nekasaintai.

Tura wína Apaachirsha, wína akuptuku asa, wína pachitas ta nusha nekasaintai, —Jesús timiayi.

¹⁹Tamati chicharinak:

—¿Apaachirmesha tuwaita?

—tiarmiayi. Tu iniinam Jesús aimiak:

—Atumka winasha tura wína Apaachirsha nekatsurme. Wína nekarkurmeke, wína Apaachirsha nekaatnuitrume, —timiayi.

²⁰Jesús Yus seatai juun jeansam kuik engketi kajurin puusamunam nunaka etserkamiayi. Tura ni kintari jeachu asamtai, aints kichkisha Jesús an achikcharmiayi.

Wi wetatja nuningkia winichminuitrume timiauri

²¹Ataksha Jesús chichaak:

—Wikia wetatjai. Tura wi weamtai atum wína eatkatin ainiarne. Antsu wi weamunmaka winichminuitrume. Tura atumka tuke tunaarintin asaram jakatnuitrume, —timiayi.

²²Tama judío juuntri chicharinak:

—Juka wi weamunam winichminuitrume ta nunasha ¿warina takua tawa? ¿Ningki maamatan asa tumamtsuash? —tiarmiayi.

²³Tu tinam Jesús aimiak:

—Atumka junia nungkanmayaintrume. Antsu wikia nayaimpinmayaintjai. Atumka nekasrum ju nungkanmayaintrume. Antsu wikia junianchuitjai. ²⁴Tura asan tajarme: Atumi tunaarijai jakatnuitrume. Atumka wína nekasampi Yus akupkamuitme turutchau akurmeka, atumi tunaarijai jakatnuitrume, —timiayi.

²⁵Tamati iniinak:

—¿Tura amesha nekascha warí aintsuitme? —tiarmiayi.

Tu tinam Jesús aimiak:

—¿Warukanak nekasnasha atumjaisha chichastaja? ²⁶Atumi tunaarin pachisan nukap chichasminuitjai. Turayatun nunaka turashtatjai. Antsu wína akuptukmia nuka nekas chicham aa nunak tau asamtai, wikia ni tamaun antuku asan, mash nungkanmaya ainau nekaawarti tusan nunaka etserjai, —timiayi.

²⁷Nuna tau waininayat, ni Apaachiri Yusen pachis nunaapi tawa tusarka pengké nekaacharmiayi. ²⁸Tura asamtai Jesús chicharak:

—Wiki nintimsanak kichkisha turatsjai, antsu wína Apaachir nuiturmia nunak tajai. Wikia aints ayatun Yus akuptuku asamtai, wína yakí numinam takuriaramtai, nuniangka atumka nekasrum: Juka Yus akupkamuapita tusaram nekaratnuitrume. ²⁹Wína akuptukmia nuka tuke wijai pujawai. Wikia ni wakeramurin tuke umiku asamtai, winaka ajapruangka ukurtsui, timiayi.

³⁰Nuna tamati, aints untsuri niin nekasampita tiarmiayi.

Atumka Satanása uchirinrume timiauri

³¹Nunia judío Jesúsán nekasampita tiaru ainan Jesús chicharak:

—Wi taja nu miatrusrumek umirkurmeka, nekasrum wína nuiniatir atinuitrume. ³²Tura nekas chicham aa nuka nekaatnuitrume. Tura nu chicham umirkurmeka, angka pujustinuitrume, —timiayi.

³³Tamati Jesúsán nekasampita ticharu ainan chicharinak:

—Iikia Abraham weawitji. Tura asar chikich ainan inatiri pengké wajaschamiami. ¿Amesha waruka angka pujustinuitrume tukartame? —tiarmiayi.

³⁴Tu tinam Jesús aimiak:

—Nekasan tajarme, aints tuke tunau takainauka mash tunau inatiri ainawai.⁵

³⁵Antsu aintsu inatiri ni uchirinchu asa, nu aintsu jeenka tukeka pujuschamna-waitai. Antsu aintsu uchiri ni apaachiri jeen tuke pujusminuitai. ³⁶Tura asamtai Yuse Uchiri atumin angka awajtamatikia, nekasrum tuke angka pujustinuitrume. ³⁷Atumka Abraham weawitji tarume nunaka nekajai. Tura wainiatrum atumka wi taja nuka antutcha nakitau asaram, wína mantutcha wakerutarme. ³⁸Wikia Apaachirjai pujakun, wi wainkamijaja nunaka etserjai. Tura atumsha atumi apaachiri timiauringkia miatrusrumek umirume, —Jesús timiayi.

³⁹Tama aiminak:

—Ii yaanchuik juuntringkia Abrahama maitai, —tiarmiayi. Tinamaitiat Jesús chicharak:

—Atumka nekasrum Abrahamama wearinkurmeka, ni turamia nunisrumek turamnawaitrume. ⁴⁰Wikia chicham nekas aa nuna Yusnumia nuimiaru asan, atumin ujayajrume. Tura nu chicham antuku ayatrumek, wína mantuatasrum wakerutarme. Abrahamka tuuka nintimchayayi. ⁴¹Antsu atumka atumi apaachirijai metek turarme, —timiayi.

Jesús tamati jiyainak:

—Iikia tsanirnumiangka akiinachuitji. Ii aparingkia kichkitai. Nuka Yusketai, —tiarmiayi.

⁴²Tu tinam Jesús chicharak:

—Yus nekas atumi Apaachirinmataikia, wikia Yusnumia tau asamtai, winasha anentinuitrume. Wikia wiki nintimsanka juningkia tachamijajai, antsu Yus akuptuku asamtai, juningkia taawitjai.

⁴³¿Waruka wi taja nuka timiá nintimtsurme? Wi taja nu nakitau asaram, wína chichamruka antatsrume.

⁴⁴Atumi aparingkia Satanásaitai. Tura atumka ni uchiri asaram, ni wakera nu

turarme. Nu nangkamtaik tuke mangkartin ayayi. Tura nekas aa nunaka nakitau asa, nekas aa nunaka chichaa weatsui. Antsu tuke wait chichaman etserin asa, wait chichaman aparintai. Ni wait chichaman chichau asa, tuke ninu aa nunak chichaawai. ⁴⁵Antsu wikia nekas chichaman etserai waitiatrum, winaka nekasainme turutsurme. ⁴⁶Wína tunaaruka pengké atsau asamtai zyáki wi tunau takaamurnasha kichkisha nekamtikruati? Wikia nekas chichaman chichai waitiatrum éwaruka wínaka nekasainme turutsurme? ⁴⁷Yusnau ainauka Yuse chichamen antinawai. Antsu atumka Yusnauchu asaram, wi taja nuka antut nakitarme, —Jesús timiayi.

**Abraham akiintsaing
Cristoka tuke pujuyayi**

⁴⁸Tamati judío juuntri ainu Jesúsán jiyainak:

—Maj, ameka Samarianmaya aints asam, iwianchrinuitme, ii taji nuka nekasar taji, —tiarmiayi.

⁴⁹Tu tinam Jesús aimiak:

—Wína iwianchruka atsawai. Antsu wína Apaachirun pengker awajkun pujajai. Antsu atumka wínaka pengkerka awajtatsurme. ⁵⁰Wikia wiki nintimsanak: Wína pengker awajtusarat tusanka wakeratsjai. Antsu kichka: Aints ainu mash wína pengker awajtusarat tusa wakerawai. Tura nuka mash aintsu turamurin nekau asa, pengkeraitai tura paseetai tusa ningki mash nekawai.

⁵¹Nekasan tajarme: Wína chichamrun umirtin ainauka tuke jakashtin ainawai, —timiayi.

⁵²Tamati judío juuntri ainu Jesúsán jiyainak:

—Pai, yamaikia ameka iwianchrinuitme tusar paan nekaaji. Abrahamsha

tura chikich aints Yuse chichamen etserin ainasha jakaru wainiatmek, wína chichamrun umirtin ainauka tuke jakashtin ainawai tukartame. ⁵³Éli yaanhuik juuntri Abraham nangkamasmek juunkitam? Abrahamsha, tura chikich Yuse chichamen etserin ainasha mash jakarmiayi. Tura asaramtai éwaruku asamea nusha tame? —tiarmiayi.

⁵⁴Tu tinam Jesús aimiak:

—Wikia wiki nintimsanak: Miajuitjai takunka, nunaka nangkamin tiinjai. Antsu wína pachitas: Miajuitai ta nuka wína Apaachiruitai. Atumka nangkamrum ii Yusrintai tarume nuka nuwaitai. ⁵⁵Atum ii Yusrintai tayatrum atumka wainchawaitrume. Tura wikia wainjai. Antsu wainchawaitjai takunka, atumea nunisnak wait chichaman etserin aintjai. Turayatnak niin wainkau asan, ni chichamen miatrusnak umirnitjai. ⁵⁶Atumi juuntri Abraham yaanhuik jakayat, wi ju nungkanam tatinun wararturas nakarsamiayi. Tura wína waitak nukap warasmiai, —timiayi.

⁵⁷Tamati judío juuntri ainu Jesúsán iniinak:

—Ame cincuenta (50) musach pujachiatmesha éwaruka Abrahaman wainkamiajai tame? —tiarmiayi.

⁵⁸Tu tinam Jesús aimiak:

—Nekasan tajarme: Abrahamsha akiintsaing, wikia tuke pujuyajai, —timiayi.

⁵⁹Jesús tamati kayan jurukiar: Tukur maatai tinam, Jesús uumak Yus seatai juun jeanmaya jiinki wemiayi.^u

Wainmichu akiinau tsuwarmauri

9¹Nunia ni nuiniatiri ainauti Jesúsajai wekaakur aints akiinamunmaya wainmichu wainkamiaji. ²Tura nangkamakur ni nuiniatiri ainauti iniakur:

—Nuikiartinu ¿warukaya juka wainmi-chusha akiinaya? ¿Ni aparí tunaarintin asamtaiyash ai akiinaya? ¿Turachkusha ningki tunau asayash ai akiinaya? —tu iniimiayi.

³Tu iniam Jesús iin chichartamak:

—Atsa, juka tunaarintin asaya ai akiinachuitai. Tura aparisha, nunia nukurisha tunaarintin ainamtaiya, ai akiinachuitai. Antsu Yus ni kakarmarin inakmastas wakerau asamtai, ai akiinawaitai. ⁴Tsawaikia wína akuptuku takatrin takakmastinuitjai. Antsu tee wajasamtai, aints kichkisha takakmas-chartinuitai. ⁵Ju nungkanam iwiaaku pujaknaka, mash nungkanmaya ainau paaniurinjai, —Jesús turammiaiji. ^v

⁶Nuna tusa, Jesús nungkanam usukmi-miayi. Nunia usukijai nungkan kuta najana, nuna juki wainmichu jiin nujtukmiayi. ⁷Tura chicharak:

—Yamaikia entsa maati Siloé tutainum weme jiimi nijarta, —timiayi. Siloésha iiti chichamejaingkia “Akupkamu” taku tawai.

Jesús tamati wainmichu nuni we, ni jiin nijarmiayi. Tura ni jiin nijar umis, ni jeen waketki paan wainmakmiayi. ⁸Tura paan wainmakamtai, ni irutkamu ainauka, tura niin tuke wainmichu pujaun wainin ainau chicharinak:

—¿Jinta pujus kuik surustaram tusa seamnia nuchaukai? —tunaiyarmiayi.

⁹Tu tinam chikich aints ainau chichainak:

—Ja ai, nuwaitai, —tiarmiayi. Antsu chikich aints ainau chichainak:

—Atsa, nuchawaitai, antsu nu aintsua tumawaitai, —tiarmiayi.

Tu tunainamtai nu aintska ningki etsertumak:

—Ja ai, nuwaitjai, —timiayi. ¹⁰Tamati iniinak:

—¿Tura yamaisha itiur jiiimme? —tiarmiayi.

¹¹Tu tinam nuka aimiak:

—Nu aints Jesús tu wena nuka ni usukijai nungkan kuta najana nujai jiirun yakatrrur: ‘Entsa maati Siloé tutainum weme jiimi nijarta,’ turutmatai wi wena jiirun nijaran paan jiiimramjai, —timiayi.

¹²Tamati iniinak:

—¿Nu aintcha tuning puja? —tiarmiayi.

Tu tinam:

—Chaj, nekatsjai, —timiayi.

Fariseo ainau wainmichu tsuwarmaun iniasmauri

¹³Nunia aints wainmichu tsuwarmaun fariseo pujuinamunam itaarmiayi. ¹⁴Jesús ayamtai kintati nungkan kuta najana nujai wainmichu aintsun tsuwaru asamtai, ¹⁵fariseo ainausha nu aintsun ataksha iniinak:

—¿Yamaisha itiur jiiimme? —tiarmiayi. Tu tinam niisha aimiak:

—Nungka kuta najanamujai jiirun yakatrruramtai, nunia nijaran paan jiiimjai, —timiayi.

¹⁶Tamati chikich fariseo ainau chichainak:

—Ju aintsun tsuwaruka Yuska akupkachmawaitai. Yus akupkamuit-kungka, ayamtai kintatikia nunaka turachminuitai, —tiarmiayi.

Tinamtai chikich ainau chichainak:

—Atsa ¿tunau aintsuitkungka itiurak nu wainchatai takatnasha turatnuita? —tunaiyarmiayi.

Tura asar metekchau nintimrarmiayi.

¹⁷Tura yaanchuik wainmichu amia nuna ataksha iniinak:

—¿Ami jiiimin tsuwarmaru nu pachimesha warinme? —tiarmiayi.

Tu tinam nu aintska aimiak:

—Wikia Yuse chichamen etsernuitai tajai, —timiayi.

¹⁸Tamaitiat judío juuntri ainu nu aintsun pachisar: Nekasampi yaanchuik wainmichutiat yamaikia paan jiimua ticharmiayi. Tura asar aparincha tura nukurincha untsukar, ¹⁹iniinak:

—¿Atumi uchiri wainmichu akiinamiayi timiarne nuka nekas jukai? ¿Tura tuke wainmichu akiinausha itiur yamaisha wainmawa? —tiarmiayi.

²⁰Tu tinam ni aparai aimiak:

—Juka nekas ii uchirintai. Tuke wainmichu akiinamia nuwaitai. ²¹Antsu itiuurak wainmakma tusarkia iikia nekatsji. Tura yáki wainmamtikama tusarsha nekatsji. Antsu atum nekaatasrum wakerakrumka, ningki iniastaram. Niisha nampuaru asa, ningki ujatmaktatrumme, —timiayi.

²²Judío juuntri irunun shaminu asar tu aimkarmiayi. Judío juuntri ainu mash iruntrar chicharnainak:

—Aints kichkisha Jesús Mesíasaitai tinauka ii iruntai jeanmaya jiikir akupkantai, tinu asaramtai shamiarmiayi. ²³Tura asar: Ii uchiri nampuaru asamtai, atumka iniasrum nekaataram, —tiarmiayi.

²⁴Tu tinamtai wainmichu tsuwarmaun ataksha untsukar:

—Wína tsuwaarauka nekas Yusetai tita. Antsu Jesúska tunaarinuitai tusar nekaji, —tiarmiayi.

²⁵Tu tinam niisha aimiak:

—Tunaarinuashi tusanka nekatsjai. Antsu junak nekajai: Wikia yaanchuik wainmichu ayatun yamaikia paan jiimjai, —timiayi.

²⁶Tamati ataksha iniinak:

—¿Itiurtamkama? ¿Itiur jiimtikram-sama? —tiarmiayi.

²⁷Tuutas awajinam nisha ayaak:

—¿Wi yanchuk timiajrumme nuka antatsrumek? ¿Warukaya ataksha etserkata tusarmesha wakerutarme?

¿Atumsha nekasrumek ni umirkatasrum tarum? —timiayi.

²⁸Tamati kajerinak:

—Ameke nekas nu aints nemarnuitme. Antsu iikia Moisés nemarnuitji. ²⁹Iikia Yus Moisésan akupkamuka nekaji. ¿Antsu nu aintska tuniantskai? —tiarmiayi.

³⁰Tu tinam niisha ayaak:

—Maj ¿itiurkamnawaita? Wína wainmamtikruku wainiatrumek ¿nuka tuniangki tusarmeka nekatsrumme? ³¹Iikia nuka paan nekaji: Yuska tunaarintin ainaunka anturtsui. Antsu Yusen pengker awajsaruka tura ni wakeramurin najanin ainu seamurinka anturui. ³²Yaanchuikia aints wainmichu akiinaun tsuwaruka kichkisha nekachuyaji. ³³Tura asamtai ju aintska Yus akupkachmawaitkungka, wainchati takatnasha kichkisha pengké turachminuitai, —timiayi.

³⁴Tamati jiyainak:

—Ameke nekas tunaarintin akiinayat-mesha ¿warukaya iin nuikiartin ataj tame? —tusar judío juuntri irunu nu aintsun iruntai jeanmaya jiikiar akupkarmiayi.

Nintijai paan nintimchamun pachis etserkamun

³⁵Iruntai jeanmaya jiikir akupkamun asamtai, Jesús nuna nekaa, nu aintsun wainak:

—¿Amesha Yuse Uchiri nekasampita tamek? —timiayi.

³⁶Tamati niisha ayaak:

—Juunta, ¿yaachita nusha? Wisha nuna wainkan: Nekasampita titasan wakerajai, —timiayi.

³⁷Tamati Jesús chicharak:

—Ameke nuka wainme. Amijai chichaaja nuwaitjai, —timiayi.

³⁸Tamati nu aintska tikishmatar chicharak:

—Apuru, nekasampitme tajame, —timiayi.

³⁹Tamati Jesús chicharak:

—Aintsu nintin mash nekau asan, wína nekasampita turutinaunka, tura wína nekasampita turutinachunka akankartasan ju nungkanam taawitjai. Tura aints paanchaun nintimunka paan nintimtikratasan taawitjai. Tura chikich ainausha anangmamsar: Wikia paan nintimu weajai tu nintimturaunka paanchau nintimtikratasan taawitjai, —timiayi.

⁴⁰Tamati fariseo nuni pujuinauka nuna antukar inintrinak:

—¿Iisha paanchau nintimnukitaij?
—tiarmiayi.

⁴¹Tu tinam Jesús aimiaki:

—Atumka wainmichu akurmeka, atumi tunaari nekachu asaram tunaarinchau aminuitrume. Antsu anangmamkuram: Ii tunaaringkia atsawai tinu asaram, atumi tunaari sakarchau ainiarme, —Jesús timiayi.

Uwija wainiun pachis etserkamuri

10 ¹Nunia Jesús ataksha aints ainaun nuiniaki:

—Wi taja nuka nekasaintai. Aints uwijartin ni uwijarin wenurmaunum kashi ukuawai. Tura kasa ainau uwijan kasamkartas waitinmaka waaitsuk, atu yantamen wenurmaunum wakaar wayaatin ainawai. ²Antsu uwija wainuka waiti amanum nuke waiini. ³Uwija wainin taamtai, waiiti wainin waiitin uraktinuitai. Tura uwija ni waintairi chichamenka pengker antin asamtai, nisha uwija naarin kichik kichik inaituk untsuuyi. Tura ni uwijarin mash chirichrin yuwaarat tusa jiiyi. ⁴Tura wenurmaunomia mash jiiki ayas wekaini. Turamtai uwija ainau waintairi chichamenka anturin asar, ni untsuam nemarkin armayi. ⁵Antsu wainchatiri chichamen nekarchau asar, ni untsuam-

sha nemarkinatsui, antsu tupikinawai, —timiayi.

⁶Jesús nu nuikiartamun aints ainaun ujakmiayi. Tura waininayat nuna takuampi tawa tusarka nekaacharmiayi.

Jesús: Uwijan wainua tumawaitjai timiauri

⁷Tuminamtai Jesús ataksha chichaak:

—Nekasan tajarme: Wikia uwija wenukri waiitiriyia tumawaitjai.

⁸Wi taatsaing, anangkartin ainau winiarmia nuka uwijan kasaminawa nunisarang armiyai. Antsu wína nemarkin ainau uwijaya nunisarang asar, Yus akupkachmau ainaunka anturkacharmiayi. ⁹Wikia uwija wenukri waiitiriyia tumawaitjai. Uwija waiitinam wainawa nunisarang wína umirtukaru ainauka tuke uwemrartin ainawai. Uwija wenuknum wayaawar, nunia jiiinkiar chirichrin yuwina nunisarang wína umirtukaru ainau wini wininau asaramtai, wikia niin tuke wainkartinuitjai.

¹⁰“Kasaka aya kasamkatas, tura aintsun maatas, tura jean mesratas winiyi. Antsu wikia aints ainaun tuke pujut nangkankashtinun susataj tusan, tura tuke wijai warasarat tusan tawitjai. ¹¹Wikia aints ni uwijarin pengker wainua tumawaitjai. Uwija wainin nekas pengker aa nuka ni uwijari ainaun uwentikratas jakatnuitai.”^w

¹²“Antsu aints kuikijai akikiam uwijan wainuka uwija niinuchu asaramtai, yukartin winamtai, nuna wainak uwijanka ajapa ukuuyi. Tura yukartin uwijan achiamtai, uwija irunu mash pisaayi. ¹³Nu aintska aya akikiam takakmin asa, uwija ainau warukati tusangka nintimsuk tupikini.”^x

¹⁴⁻¹⁵“Antsu wikia uwija wainin nekas pengker aa tumawaitjai. Tura asan uwija wainin uwijan uwentikratas jakatnua

nunisnak wisha jakatnuitjai. Wína Apaachirka winaka nekaru asamtai, wisha wína Apaachirnasha nekajai. Tura wína aintsur ainauka uwijaya nunisarang ainau asaramtai nekajai. Tura niisha winasha nekarinawai. ¹⁶Tura chikich aints ainausha uwijaya nunisarang ainayat, wína chichamrun antichu ainawai. Nu aints ainauncha wini winiarat tusan untsuktinuitjai. Wi turamtai chikich umirtin ainaujai mash irunraramtai, wisha uwija wainua nunisnak nu aints ainaun wiki mash wainkatnuitjai.^y

¹⁷“Wikia jakayatun jakamunmaya ataksha nantaktin asan, wína aintsur ainaun uwemtikratan jakatnuitjai. Wi turatin asamtai, wína Apaachirka wína anentui. ¹⁸Wiki wakerakun jakatnuitjai. Wi wakerachmataikia, kichkisha wínaka mantuwarchamawaitai. Antsu wína Apaachirka: Nunaka turata tusa akuptuku asamtai, nunaka turatnuitjai,” Jesús timiayi.^z

¹⁹Tamati judío juuntri ainau nu chichamnasha antukar ataksha metekchau nintimsar, ²⁰untsuri chichainak:

—Aunka iwianch engkemtawai.

¿Waurak tausha waruka anturu wearme? —tiarmiayi.

²¹Tinamtai chikich ainau aiminak:

—Atsa, waurkungka chichaa weatsui.

¿Iwianch engkemtuamuka wainmichun tsuwarminkai? —tiarmiayi.

Jesús ni Apaachirjai kichkia nunisketai

²²Yumanch nantutin Jerusalénnum tuke fiestan najanin armiayi. Yaanchuik ii juuntri ainau Yus seatai jean ataksha iwiararun pachisar nintimtin armiayi.

²³Tura asaramtai Jesús Yus seatai juun

jeanam jea tesaamurin Salomón jeamkamia nuni wayaamiayi. ²⁴Turamtai judío juuntri ainau niin tentakar:

—¿Mesías ayatmesha waruka nuwaitjai tusam, paan etseru weatsme? Ameka nekasam Mesías akumka, nuwaitjai tusam yamaikia paan etserkata, —tiarmiayi.

²⁵Tinamtai Jesús aimiak:

—Yanchuk etserkamja nuka antukia-trumsha, nekasampita turutsurme. Wína Apaachirka turata tusa akuptuku asamtai, wi turaja nusha wainkaram: Nuwaapita tusaram paan nekaatnuitrume. ²⁶Turayatrums wína aintsruchu asaram, nekasampita turutsurme. ²⁷Wína aintsur ainaun uwijaya nunisnak untsuam, anturtukar nemartinawai. Tura winar asaramtai, nuwaapita tusan nekajai.

²⁸Wikia pujut nangkankashtinun suwitjai. Tura asamtai tuke wait wajaktinnumka pengké wechartin ainawai. Tura wi wainu asamtai ¿yáki jurutkit? ²⁹Wína Apaachirka mash ainia nunaka nangkamasang timiá kakaram asamtai, wína aintsur ainaun wína Apaachir surusmia nuna kichkisha atantrukchartinuitai. ³⁰Wisha wína Apaachirjai kichkia nunisrikitti, —timiayi.

³¹Jesús tamati judío juuntri ainau: Kaya jurukir tukur maatai tiarmiayi.

³²Turinam Jesús chicharak:

—Wína Apaachiru kakarmarijai wainchati takatan nekas pengker aa nuna nukap takakmasu asamtai ¿tu takat pachisrumea wína kayajai tukur maatai turutrume? —timiayi.

³³Jesús tu iniam judío juuntri ainau aiminak:

—Nekas pengker takat takaakminia: Kayajai tukur maatai tatsuji. Antsu ameka aintsutiatum, wikia Yusetjai tumamu asakmin, kayajai tukur maatai taji, —tiarmiayi.^a

³⁴Tu tinam Jesús chicharak:

—Atum umirkatin chichamka tu aarmawaitai: Yus chichaak: ‘Atumka yusetrume’ timiayi. ³⁵Yuse chichamengka nekas asamtai, nu aarmauka pachisrum: Nuka waitaitai tichamnawaitrume. Ni chichamen antukaru ainaun pachis: ‘yusetrume’ tinu asamtai, nu chichamka nekasaintai. ³⁶Wína Apaachirka ju nungkanam akuptuku asamtai, wikia nekasam Yuse Uchirinjai tau aisha çwaruka winasha: Yusetjai tau asam pasé chichaame turutrume? ³⁷Wína Apaachiru takatrin wi turai wainiatrumek, nekasam turachmataikia, nekasampita turutirap. ³⁸Antsu wikia nekasam Yuse takatrin takakmamtaikia, winaka nekasampita turutiarum. Tura wina nakitrakrumsha, wi turaja nu pachisrum: Nekasampi nuka Yuse takatrin takaawai titaram. Nu takurmeka, wína Apaachirka wijai metekaitai, tura wisha wína Apaachirjai metekaitjai tusaram, paan nekaataram tusan tajarme, —Jesús timiayi.

³⁹Tamati ataksha: Jesús achiktai tinamaitiat jiinki wemiayi. ⁴⁰Nunia Jordán entsa tumajin we, yaanchuik Juan imiakratmia nuni pujumiayi.^b

⁴¹Turamta aints untsuri Jesúsam jiiisartas weriar, tura wainaikiar chichar-nainak:

—Nekas Juanka wainchatai takatnaka aitkachmiayi. Turayat Jesúsam pachis mash tímia nuka nekasaintai, —tunaiyar-miayi.

⁴²Tura nu nungkanmaya untsuri Jesúsam nekasampita tiarmiayi.

Lázaro jakamuri

11 ¹Betania yaktanam aints Lázaro naartin jaak tepemiayi. Nuka nu yaktanam ni umaji Maríjai, tura chikich umaji Martajai iruntrar puju armiai.^c

²Nu jau umaji Marí naartin ukunam kungkutin sumak, apu Jesúsam nawen ukatar ni intashijai mujturmia nuwaitai.

³Tura Lázaro jaak tepamtaí, ni umaji mai Jesúsam chichaman akuptinak:

—Apu antukta, ami amikrum jaawai tita, —tiarmiayi.

⁴Chicham akuptukmau asa, Jesús nuna antuk chicharak:

—Nu jaak tepauka tukeka jakashtinui-tai. Antsu aints ainu Yuse kakarmarincha wainkarat, tura Yuse Uchiri kakarmarin wainkarat tusa jaawai, —timiayi.

⁵Jesús Martancha, tura nuna kaincha, tura umajin Lázaroncha nekas aneemiayi.

⁶Tura Lázaro jaawai tamaun antukiat, wári wetsuk ni pujamunam jimianan kanurmiayi. ⁷Nunia ni nuiniatiri ainautin chichartamak:

—Judea nungkanam ataksha waketkimi, —Jesús iin turammiaji.

⁸Turammatai ayaakur:

—Nuikiartinu çaunia aints amin kayajai tukurmiar mantamawartas wakerutminau wainiatmesha nuni ataksha waketkimi tame? —timiaji.

⁹Tu chichaakrin Jesús nuikiartamun etserak:

—¿Tsawaarka doce (12) horas paanchaukai? Ju nungkanam pujuinauti-sha tsawai wekaakur, paan wainmau asar tukumkashtinuitji. ¹⁰Tura kashi wekaakurkia tee asamtai tukumkatnuitji, —turammiaji. Nuna tusa wina umirtakrum pujakrumka, nekasrum paan nintimsaram pujustinuitrume. Antsu wína umirtutsuk pujuinauka, teenam wekainawa numisarang wait wajakartin ainawai, taku timiayi.

¹¹Nunia ataksha iin chichartamak:

—Ii amikri Lázaro kanak tepawai. Tura wi werin shintartatjai, —turammiaji.

¹²Turammatai iikia ayaakur:

—Apu, nekas kanak tepakka, nuniangka pengker wajastatui, —timiayi.

¹³Jesúska Lázaro jakamurin nekyat: Kanak tepawai turammiaji. Antsu iikia: Nekas kanuru asamtaiyash taj, tu nintimramiaji.

¹⁴Tu nintimkurin Jesús paan chicharta-mak:

—Lázaroka yanchuk jakayi. ¹⁵Tura nuni wi pujachu asamtai jakayi. Antsu atum wína nekasampita turutin asakrumin, wisha atumin nintimsan waraajai. Tura yamaikia nuni werir jiismi, —turammiaji.

¹⁶Turammatai Jesúsna nuiniatiri kichik Tomás, Jimiamramu naartin, iin chichar-tamak: —Iijai metek mantamawarti tusar iisha wearmi, —turammiaji.

Jakau inannunka wiitjai timiauri

¹⁷Tura Betania yaktanam jeatak wajasarin, Lázaroka yanchuk cuatro (4) kinta jakau asamtai, iwiarsari tinau antukmiaji. ¹⁸Betania yaktaka Jerusalén-numia kampatmachik kilómetro arakchichu ayayi. ¹⁹Tura ni umaji jakau asamtai, Marta tura Marísha wake mesekar juutinamtai, judío ainau untsuri pengker nintimtikratai tusar weriarmiayi. ²⁰Turinamtai Jesús tatanak wajasi tinamun antuk, Marta Jesúsjai ingkiunik-tas jiinki wemiayi. Antsu Maríka jeanam juwakmiayi. ²¹Turamtai Jesúsán ingkiung Marta chicharak:

—Apu, ame juni pujakminka, umaar jakachmin ayat jakayi. ²²Tura wainiatun ame Yus seamka, waring achat mash tuke tsangkatramkatatui tusan nekajme, —Marta Jesúsán timiayi.

²³Tamati Jesús chicharak:

—Umaimikia ataksha nantaki iwiaaku pujustatui, —timiayi.

²⁴Tamati Marta aimiak:

—Nekasam tame. Nungka amuamunam mash jakaru ainau nantakiartin kinta jeamtai, nisha nantaktatui, —timiayi.

²⁵Tamati Jesús chicharak:

—Wiitjai jakaru ainaun inannunka. Tura Wiitjai pujut nangkankashtinun sukartinnaka. Aints wína nekasampita turutinauka jakariat tuke iwiaaku pujusartinuitai. ²⁶Tura yamai pujuinau-sha wína nekasampita turutinauka tuke jakarchatin ainawai. ¿Amesha nusha nekasaintai tamek? —timiayi.

²⁷Tu iniam Marta aimiak:

—Ja ai Apuru, wikia ame tame nunaka nekasampita tajame. Ameka nekasam Mesíasaitme. Nekas Yus akupkamu asam Yuse Uchirinme. Yuse chichamen etserin yaanchuik amin pachitmasar: Ju nungka-nam tatinuitai turamiarmia nuka ametme, —timiayi.^d

Jesús Lázaro iwiarsamunam taa juutmiauri

²⁸Marta nuna tusa Jesúsán ukuki, kain Marín untsuktas waketkimiayi. Tura jeanam jea kain akanak ujaak:

—Nuikiartin ani wajas untsurmawai, —timiayi.

²⁹Tamati Marísha nuna antuk, wári wajaki Jesúsán jiistas wemiayi. ³⁰Antsu Jesús yaktanmaka tuke wayaachu asa, Martajai ingkiunikmia nuning pujumiayi. ³¹Tura asamtai Marí wári wajaki jeanmaya jiinki weamtai, jeanam Marín pengker nintimtikrartas pujuinausha nuna wainkar: Iwiarsamunam juutias weatsush tusar nemariarmiayi.

³²Tura Marí jeanmaya jiinki, Jesús pujamunam naka tikishmatar chicharak: —Apu, ame juni pujakminka, umaar jakachmin ayat jakayi, —timiayi.

³³Tamati Jesús Marínasha tura nijai tsaniasar taarusha juutinaun wainka,

napchau nintimias wake mesekmiayi.

³⁴Tura iniak:

—¿Tunia iwiarsamarme? —timiayi.

Tu iniam aiminak:

—Apu ru winim jiita, —tiarmiayi.

³⁵Tinamtai Jesús juutmiayi. ³⁶Turamtai judío irunu nuna wainkar chicharnainak:

—Jiisia, Lázaron nukap aneawai,

—tunaiarmiayi. ³⁷Tura chikich irunu chicharnainak:

—Wainmichun paan wainmamtikin asa, juni pujakka ¿Lázaron jakashti tusa surimkachampash? —tunaiarmiayi.

Lázaron inankimuri

³⁸Tura Jesúscha ataksha napchau nintimias jakau iwiarsamunam jeamiayi. Pampanam iwiartai waa juun amanum kaya juun ututkamuyayi. ³⁹Tura asamtai Jesús:

—Kaya epenmiau uratkataram, —timiayi.

Tamati jakau umaji Marta chicharak:

—Maj, cuatro (4) kinta jakau asa kawaarak mejeawai, —timiayi.

⁴⁰Tamaitiat Jesús Martan chicharak:

—Ame nekasampitme turutkumka, Yuse kakarmari wainkatatme ¿wi tichamkajam? —timiayi.

⁴¹Tamati iwiarsamunam kaya ututun jurukiarantai, Jesús nayaimpinmanini pangkai jiimias Yusen seak:

—Apaachiru, ame tuke anturtau asakmin, maaketai tajame. ⁴²Wi seamka tuke anturtau weame tusan nekajai. Turayatnak aints juni iruntrar wajainausha wina pachitsar: Nekasampi Yus akupkamuita turutiarat tusan tajame, —Jesús timiayi.

⁴³Nunia kakar untsuak:

—Lázaroa, nantakim jiinkita, —timiayi.

⁴⁴Tu untsuam Lázaroa iwiarsamun-maya jiiinak, uwejencha tarachjai jingkiamu, tura nawencha tura yapiincha tarachjai kangkarmau jiinkimiayi. Turamtai Jesús aints ainaun chicharak:

—Wekaasat tusaram atiataram, —timiayi.

Jesús achiktai tusar chicham najatamuri

(Mat. 26.1-5; Marc. 14.1-2; Luc. 22.1-2)

⁴⁵Judío Marín nemariarmia nuka Jesús jakaun inankinun wainkar, untsuri nekasampita tiarmiayi. ⁴⁶Antsu chikich ainau fariseo pujuinamunam wear, Jesús turamun etserkarmiayi. ⁴⁷Tura ujakaram nuna antukar fariseo ainau sacerdote juuntri ainaujai iruntrar chichainak:

—¿Nu aintska wainchati takatan untsuri aints wainminamunam turu wea nusha ititurkainjik? ⁴⁸Ii pachischakrinkia, aints ainau mash nuna anturkar nemarkartatui. Turinamtai romano ainau kautramkar mesetan najaninak, ii Yus seatai jean yumpuntraminak iincha amutmakartatji, —tunaiarmiayi.

⁴⁹Tu chicharnainak pujuinamtai, kichik sacerdote Caifás naartin, nu musach sacerdote juuntri naamkau asa chicharak: —Atumka pengké nintimtsurme.

⁵⁰Israel ainautikia mash jakarai tusar ¿kichik aintsuk maatin pengkerchaukai tusaram nintimtsurmek? —timiayi.

⁵¹Antsu Caifáska ningki nintimsangka nunaka tichamiayi. Antsu nu musachti sacerdote apuri asamtai, Yus nuna titi tusa nintimtikramiayi. Jesús Israel ainaun uwemtikratas jakatnuitai, taku nunaka timiayi. ⁵²Antsu Israel ainaunak uwemtikrataska jakashtinuyayi, antsu Yuse uchiri ainaun mash nungkanmaya irurtas jakatnuyayi. ⁵³Caifás nuna tamati, nu kintati judío juuntri ainau iruntrar: Jesús maatai tusar, chichaman najatawarmiayi.

⁵⁴Turinau asaramtai, Jesús paan wantinkangka judío nungkanmaka wekaasachmiayi. Antsu ni nuiniatiri ainautijai nuniangka jiinkir, entsa atsamunam yakat Efraín tutainum jear nuni pujusmiayi.

⁵⁵Israel ainauti fiestari, Pascua tutai jeatak wajasamtai, chikich yaktanmaya ainau untsuri Jerusalénnum wearmiayi. Tura Pascua fiestaka jeatsaing, Moisés turataram timiau asar, ni namangken nijarartas, tura ni nintin iwiarartas kaunkarmiayi. ⁵⁶Tura Jesús nasha wainkartas wakerinak aints ainau Yus seatai juun jeansam wayaawar chicharnai-nak:

—¿Atumsha itiur nintimrume?

¿Jesúscha ju fiestanmasha tatimpiash?

—tu ininisarmiayi.

⁵⁷Fariseo ainausha tura sacerdote juuntri ainausha chichaman akupinak:

—Atumsha ni pujamuri nekaarmeka etserkataram, —tiarmiayi. Tura nekaawar, nuniangka Jesús an achikiartas wakeriarmiayi.

Marí Jesús an kungkutijai ukatramuri

(*Mat. 26.6-13; Marc. 14.3-9*)

12 ¹Pascua fiesta seis (6) kinta jeatak wajasamtai, Jesús Betania yaktanam wemiayi. Lázaro sha Jesús inankimia nusha nu yaktanmasha pujumiayi. ²Jesús Betanianam jeamtai, yurumkan yuwartas inarkarmiayi. Tura Marta yurumkan ukaimiayi. Tura Lázaro sha, tura chikich ainausha Jesús jai misanam iruntrar yuwarmiayi. ³Tura yuwinaí Marí kua kungkuti nardo tutain, nekas akik aa nuna litro japchirin ita, Jesús a nawen mash ukatramiayi. Nuniasha nawen ni intashijai japir mujturmiayi. Turamtai jeasha mash kungkuimiayi. ^e ⁴Tura kungkutin ukaramtai, Judas Iscariote, Simónka uchiri nuni pujau, Jesús a nuniatirintiat, ukunam niin suruktin amia nuka chíchaak:

⁵—Kichik musach takakmasar nu kuik jukir, nu kungkutikia sumakmin amiayi. Tura asamtai ¿waruka au suruk kuikian

juki, kuikiartichu ainau untsuksha? —timiayi.

⁶Antsu Judaska kuikiartichu ainau yaingtaska nunaka tichamiayi. Nuka Jesús a nuniatiri kuikiarin wainin asa, kuik engketinam chumpiar susam, nuna kasamnuyayi. ⁷Judas tamati, Jesús chicharak:

—Inaisata. Jumchik kinta arus wina iwiartusartin asaramtai, ju kungkutijaing-kia ukatruri. ⁸Kuikiartichu atumjai tuke irunui. Antsu wikia atumjaing-kia tukeka pujuschatatjai, —timiayi.

Lázaro sha maatai timiari

⁹Judío untsuri Jesús Betanianam pujawai tamaun antukar, wainkartas wearmiayi. Tura Lázaro jakaun Jesús inankimia nunasha wainkartas weriarmiayi. ¹⁰⁻¹¹Tura judío ainau untsuri Lázaro jakamunmaya nantakmiaun nekaawar, sacerdote ainauka nemartan inaisar ukukiar, Jesús an nekasampita tusar nemariarmiayi. Tura asaramtai sacerdote juuntri ainau mash iruntrar: Lázaro sha maatai tusar chichaman najatawarmiayi.

Jesús Jerusalénnum wayaamuri

(*Mat. 21.1-11; Marc. 11.1-11; Luc. 19.28-40*)

¹²Pascua fiesta jeatak wajasamtai, aints untsuri Jerusalénnum kaunkarmiayi. Tura kashin tsawaarar, Jesús tatatui tinamun antukarmiayi. ¹³Nuna antukar numi nuken charukar jukiari, Jesús jai ingkuniktai tusar, yaktanmaya jiinkiar untsuminak:

—Yus juuntaitai. Yus akupkamu winá nuka nekas pengkeraitai. Nuka Israela apuri asa nekas pengkeraitai, —tiarmiayi.

¹⁴Jesús wekama burro uchirin wainak, Yuse chichame aarmawa nunisang keemsamiayi. Nu aarmauka nuwaitai:

¹⁵“Jerusalén yaktanmaya ainautirmeka shamkairap. Jiistaram. Atumi apuri burro uchirin keemas winitramui.”

¹⁶Jesús Jerusalénnum weamtai, ni nuniatiri ainauti Yuse chichame yaanchuik aarmawa nunisang umirui, tuuka nintimrachmiaji. Tura ukunam nayaimpinam waketkiamtai, Jesús turatnun pachisar yaanchuik aarmawa nunaka nekas miatrusang umiawapi tusar nintimramiaji.

¹⁷Aints ainau Jesúsán nemarsar wekainauka, Jesús Lázaron iwiansamunmaya inankinun wainkau asar, ni wainkamurin chikich ainaun ujakarmiaji. ¹⁸Tura ujakaram, chikich aints ainau Jesúsá turamurin nekaawar, Jesúsjai ingkiunikiartas Jerusalénnumia jiinkiar-miaji. ¹⁹Tuminamtai fariseo ainau mai nuwamtak chicharnainak:

—Pai, aints ainau nu aintsun nemarsa-charti tusaram, surimkatatkamaram pengké tujinkarume. Jiistaram. Mash niin nemarinawai, —tunaiyarmiaji.

Griego ainau Jesúsán eakmauri

²⁰Pascua fiesta jeamtai, chikich nungkanmaya ainau Yus juuntaitai tiartas Jerusalénnum untsuri kaunkarmiaji. Griego ainausha jumchik iruntrar-miaji. ²¹Tura nu aints ainauka Felipen jiisar, nijai chichasartas taarmiaji. Felipeka Betsaida yaktanmaya aintsuyayi. Betsaidaka Galilea nungkanmaya yaktaimai. Tura griego chichau ainau Felipen chicharinak:

—Sairua, iisha Jesús wainkataras wakeraji, —tiarmiaji.

²²Tu tinam Felipe Andrésun weri, nijai metek tsaniasar wear Jesúsán ujakarmiaji.

²³Tu ujinam Jesús chichaak:

—Wikia aints ayatun Yus akupkamu asan, yakí wetin kintarka jeatak wajasi.

²⁴Nekasan tajarme: Wikia trigo jingkiajiya nunisketjai. Jingkiaji araachmauka tsapachu asa yujachayi. Antsu jingkiaji araamka, kauriat tsapain asa nukap yujaayi. Wisha nunisnak jakan nunia nantakin, untsuri nungkanmaya ainaun uwentikratnuitjai. ²⁵Aints ni wakeramurinak nintimias jatan shamak pujakka, árak tsapaichua nunisang mengkakatnuitai. Antsu aints Yuse wakeramurinak nintimias jatan shamtsuk pujakka, árak tsapai nukap nerekuu nunisang pujut nangkankashstinun jukitnuitai. ²⁶Aints wína umirtutan wakerakka, nekas wi turaja nunasha turati. Tura nuna turakka, wi nayaimpinam pujustatja nunisha pujustinuitai. Turamtai wína umirtukunka wína Apaachirka nekas pengker awajatsnuitai, —Jesús timiaji.

Ni jakatniurin pachis etserkamuri

²⁷Nunia Jesús ataksha chichaak:

—Yamaikia nukap napchau nintimsan pujajai. ¿Wisha warintajak? Apaachi, ¿wína mantuwartas wakerutina nunaka inaitusarti titajash? Atsa, nunaka pengké tichatatjai. Antsu turutawarti tusan taawitjai. ²⁸Apaachi, amin naarmin pachisar: Ameketme juuntam turamiarti tusan wakerajai, —timiaji.

Jesús tamati iikia nayaimpinmaya chicham antukmiaji. Nu chichamka nuwaitai:

—Wína naarun pachisar: Ameketme juuntam turutiarti tusan, yanchuk aints ainaun nintimtikramiajai. Tura ataksha nintimtikratatjai.

²⁹Aints ainau nu chichaman antukar: Ipiamtarui tiarmiaji. Tura chikich ainausha chichainak:

—Yuse awemamuri nijai chichasi, —tiarmiaji.

³⁰Tu tinam Jesús chicharak:

—Wína antumtikruktaska nu chicham-naka akupturkachi, antsu atumin antumtikramkatas nu chichamnaka akupkayi. ³¹Yamaikia ju nungkanam tunau ainia nunaka mash nekamtikiat-jai. Tura ju nungkanmaya apuri Satanásan nepetkatatjai. ³²Wína mantuwartas yakí takuriamtai, mash nungkanmaya ainu wini winiarat tusan nintimtikrartinuitjai, —Jesús timiayi.^g

³³Nuna taku ni jakatniurin aints ainaun nekamtikiamiayi. ³⁴Jesús tamati aints ainau chicharinak:

—Iikia Yus umirkatín chicham aujkur: Mesíaska jatsuk tuke pujustinuitai tusar nekaji. Tu aarmau wainiatum ¿waruka ame ‘Yus akupkamuka aints wajas yakí takuntinuitai,’ tame? ¿Nu Yus akupka-muka Mesíaschaukai? Antsu nuchawaitkungka ¿yaachita nusha? —tiarmiayi.

³⁵Tu tinam Jesús aiamiak:

—Atumka teenam pujusairam tusan, wikia Yus akupkamu asan, paaniau nunisnak yamaikia jumchik kinta atumjaingkia pujustatjai. Tura asamtai atumsha Yuse uchiri wajasrum, paaniunam wekainawa nunisrumek paan nintimtursataram. Teenam wekainauka tuning wekajj tusarsha nekainatsui.

³⁶Wikia paaniunam tuke pujau asamtai, wína aintsur atasrum nekasampita turutiaran, —Jesús timiayi.

Nuna tina we uumak pujusmiayi.

¿Waruka judío ainu Jesúsán nekasampita ticharmiayi?

³⁷Jesús wainchati takatan timiá untsuri turau waininayat, judío ainu niin nekasampita ticharmiayi. ³⁸Tura Jesúsán nekasampita ticharu ainu yaanchuik Yuse chichame etserin Isafas naartin

aarmia nunaka miatrusarang umirkar-miayi. Nu aarmauka nuwaitai:

“Apu ru ¿yaachia ii chichamencha nekasampita turammiaji? ¿Tura ii Apurisha ni kakarmarincha yaná inaktus-miayi?”

³⁹⁻⁴⁰Tura kichnasha Isafas aarmia nuka nuwaitai:

“Yus nu aints ainaun wainmichua nunisarang nintimrarat tusangka, paanka nintimtikrachmiayi. Tura asamtai ni jiijai jiiminayat, wainmichua nunisarang wainmaktatkamawar tujintinawai. Tu ainiachkungka paan nekaawarminuitai. Tura nintijai paan nintimsar ni tunaarin inaisaramtaikia, wikia nu aints ainaun uwemtikratnuitjai,” Yus Isafásan timiayi. ⁴¹Isafas Jesúsá paaniurin wainkau asa, nuna timiayi.^h

⁴²⁻⁴³Tu aarmau waininayat, judío ainu untsuri Jesúsán nekasampita tiarmiayi. Antsu judío juuntri ainausha jumchik Jesúsán nekasampita tinayat, Yus wína pengker nintimtursat tuuka nintimtsuk, antsu aints ainauka nekasar pengker nintimtursat tusar, fariseo ainaun shaminak, iruntai jeanmaya jiirkiarai tusar, paanka wikia Jesúsán umirnitjai ticharmiayi.

Aints ainaun uwemtikratan tawitjai timiauri

⁴⁴Nunia Jesús kakar chichaak:

—Aints wína nekasampita turutinauka winaka turutinatsui, antsu wína Apaachir wína akuptukmia nunasha tinawai. ⁴⁵Tura wína waitinauka wína akuptukun waininawa nunisarang winasha waitinawai. ⁴⁶Wikia paaniunam pujau asan, wína nintimturina nusha ju nungkanam teenam pujusarai tusan tamiajai. ⁴⁷Wikia aints ainaun wait wajaktinum akupkatasnaka tachamiajai. Antsu aints ainaun uwemtikra-

tasam tamiajai. Tura asamtai aints wína chichamrun antukiat umirtachmataisha, wikia nu aints naka wiasmamtikiashtinuitjai.

⁴⁸Antsu aints wína nakitrinak wína chichamrun pachischaruka ningki wakerinak wait wajaktinaka juwinawai. Tura nungka amumatai, wína chichamrun pachischaru asar, wait wajaktiniun jukiartinuitai. ⁴⁹Wikia wína nintirjaingkia chichachuyajai. Antsu wína Apaachirka ningki wína akuptuku asa: Tu chichasta tusa, akatur akuptukmiayi. ⁵⁰Tura wína Apaachir akatur akuptukmia nunaka aints ainu pujut nangkankashtinun jukiarat tusa akuptukmiayi. Wikia nuna nekau asan, wína Apaachirka akatur akuptak: Tu tita turutmia nunisnak chichajai, —Jesús timiayi.

**Jesús ni nuiniatiri ainawen
nawen nijarmauri**

13 ¹Pascua fiesta tsawaatsaing, Jesús ni Apaachirin waketkitas, ju nungkan ukuktin kinta jeatak wajasun nuna nekaamiayi. Tura ni aintsri ainautin ju nungkanam tuke ukurmaktin asa, iin nuwik aneenmimijai nuna nangkamasang inangnamunam ni anengkratairin paan inakturmasmijai.

²⁻³Turamtai Satanás Judas Iscarioten, Simónka uchirin: Jesús surukta tusa nintimtikramiayi. Tura Jesús Yusnumia tau asa, yamaikia waketkitatjai tusa, tura ni Apaachirisha Jesúsán: Mash ainia nu inau atatme timiau asa, nunasha mash nekaamiayi. Tura tsaa jeamtai, iruntrar uwijan yuwaartas pujuinai, ⁴Jesús wajaki wejmakrin aik wangkeas tarachin juki kachumamiayi. ⁵Tura kiimiatinam yumin yarak, ni nuiniatiri ainautin nawen nijatramar, nunia tarach peaakmaurijai ii nawen mujturmarmijai.

⁶Nunia Simón Pedro nawen Jesús nijatratas wakeramaitiat nuka chicharak:

—Apuu ¿ameash wina nawer nijatrur-tam? —timiayi.

⁷Tamati Jesús ayaak:

—Ja ai, wi turaja nuka yamaikikia paanka nekarashtatme, antsu ukunam paan nekaratnuitme, —timiayi.

⁸Tamaitiat Pedro ayaak:

—Apuu, ameka wina nawerka pengké nijatrurchatatme, —timiayi.

Tamati Jesús chicharak:

—Wikia nawemin nijarchamtaikia, wijaingkia tsaniasmeka pujuschamna-waitme, —timiayi.

⁹Tamati ataksha Pedro ayaak:

—Apuu, takuma nawersha nijatru-ram uwejrusha kiiturta, tura muukrusha majetrurta, —timiayi.

¹⁰Tamaitiat Jesús chicharak:

—Atsa, aints yamai maaingkia, namangkengka pakuichau atinuitai. Tura asamtai wárikia namangkenka nijamatsuk, aya nawenak nijartinuitai. Atumka yamaikia pakuichawa nunisru-mek pujarme. Antsu mashkia pakuichawa nunisrumka pujatsrume, —timiayi.

¹¹Mashkia pakuichawa nunisrumka pujatsrume, tímia nunaka niin suruktinun nekau asa timiayi.

¹²Tura ni nuiniatiri ainautin nawen nijatramar umis, Jesús ni wejmakrin entsar misanam keemas iin chichartamak:

—¿Wi aitkaja juka waruka aitkawa tusaram nekarmek? ¹³Wi nekasan atumi Apuri asamtai, atumka winaka nekasrum: Nuikiartinu tura Apuru turutrume. ¹⁴Tura wikia atumi nuinin ayatnak, tura atumi apuri ayatnak: Mianchawaitjai tusan, atumi nawen nijatkamu asaram, atumsha nunisrumek: Mianchawaitjai tusaram, mai nuwamtak atumi nawe nijatnairataram. ¹⁵Wikia mianchawaitjai titaram tusan, atumin nekaprakun aitkajrume.ⁱ

¹⁶Nekasan tajarme: Aintsu inatiri ni inamurinka nangkashtinuitai. Tura aints akupamu ni akupamurinka nangkashstinuitai.^j

¹⁷Ju chichaman wi tajarme nu nekakrumka, tura umirkaram pujakrumka nekasrum warastinuitrume.

¹⁸Wi atumin mash eaku asan, mash paan nekajrume. Tura asan atum ainautirmin winaka mashkia umirtukuitrume tusanka tatsujrume. Antsu kichkin pachisan: Wina umirtukchawaitai tajarme. Tura asamtai Yuse chichame aarmawa nunisang nekas umiktinuitai. Nu chichamka nuwaitai: “Wijai yuya nuka wina nemasur wajasi,” tu aarmawaitai.^k ¹⁹Nuka turuntsaing yamaik ujaajrume. Tura wi nuna turuna umisam-tai, winaka nekasampita turutinuitrume.

²⁰Nekasan tajarme: Aintsun wi akupaja nunasha nakitsuk anturinauka, winasha nunisarang nakitrutsuk anturtinawai. Tura wina anturtinauka wina akuptukuncha nunisarang anturinawai, —Jesús timiayi.^l

Jesús Judas surutkatatui timiauri

(Mat. 26.20-25; Marc. 14.17-21; Luc. 22.21-23)

²¹Nuna tusa Jesús napchau nintimramiayi. Tura paan chichartamak:

—Nekasan tajarme: Atumniang kichik wina anangkrua surutkatatui, —turammiaji.

²²Turammatai Jesúsua nuiniatiri ainauti jjiisar:

—¿Yanak takung taj? tu nintimramiaji.

²³Tura wikia nekasan ni aneetiri asan, niin ayaamsan yuwakun pujumiajai.

²⁴Tura asamtai Simón Pedro ni uwejejai inakmas: Iniasta. ¿Yana takung taj? turutmiayi.

²⁵Turutmatai wikia Jesúsani iniakun:

—Apu ru ¿yaaachita? —timiajai.

²⁶Tu iniam Jesús chichartak:

—Jiij pujurtia. Pangkan achikian chupran susatatja nuwaitai, —turutmiayi.

Nuna tusa pangkan chupir, Simónka uchirin Judas Iscarioten susamiayi.

²⁷Tura pangkan susamtai, Satanás Judasa nintin engkentuamiayi. Turamtai Jesús Judasan chicharak:

—Ame turataj tame nuka yamaik turata, —timiayi.

²⁸Turamtai chikich ainauka nuni iruntrar yuwinak pujuarmia nuka ¿warinak taj? tusarsha nekaacharmiayi.

²⁹Antsu Judas kuikian wainin asa, kuik chumpitin takaku asamtai, chikich nuiniatiri ainau nintiminak: ¿Fiesta kintatin yuta yuumaktatji nuna sumakta tusash taj? tu nintimramiayi. Antsu chikich irunu: Nuna turachkusha ¿kuikiartichu irunun kuik susata tusash taj? tu nintimramiayi. ³⁰Tuminamtai Judascha pangkan yuwa umis, tee amanum jiinki wemiayi.

Yamaram chicham umiktin akatramuri

³¹Judas jiinkiamtai, Jesús iin chichartamak:

—Wi aints ayatun Yus akuptuku asamtai, yamaikia Yus winaka pengker awajustinuitai. Tura wi turatatja nunaka mash nekaawar, mash nungkanmaya ainau Yusen: Ameketme juuntam tiartinuitai. ³²Wikia aints ayatun, Yus akupkamu asan, Yusen pengker awajmataikia, Yuscha winasha nunisang pengker awajustatui. Tura nunaka wári umikata-tui. ³³Uchichir irunutiram, yamaikia nukapka atumjaingkia pujuschatatjai.

Atumka wina eatkatatrume. Antsu ii juuntrin timiaja nunisnak yamaikia

atumnasha tajarme: Wi wetatja nuningkia winichminuitrume.^m

³⁴Yamaikia yamaram chicham umiktaran tusan tajarme: Tuke mash aneenitaram. Wi atumin aneemiajrume nunerumek aneenitaram. ³⁵Atumka aneenisrum pujakrumningkia, mash aints ainaw: Nekasampi Jesúsá nuiniatiri ainawa tusar nekarmawartinuitai, —Jesús timiayi.ⁿ

**Jesús Pedron: Wina
natsantrurtatme timiauri**

(Mat. 26.31-35; Marc. 14.27-31; Luc. 22.31-34)

³⁶Tamati Simón Pedro Jesúsán iniak: —Apu ru étua wetatme? —timiayi. Tu iniam Jesús aimiak:

—Wi wetatja nuningkia yamaikikia winichminuitme. Antsu nukap arusam winingkia winitnuitme, —timiayi.

³⁷Tamati Pedro ataksha iniak: —Apu ru éwaruka yamaikikia winichminuitme turutme? Wisha amin ayamruktasan jatan wakerajai, —timiayi.

³⁸Tamati Jesús ayaak: —éNekasmek wína mantuwarat tusamek tam? Nekasan tajame: Atash shinatsaing, ameka wína pachitsam: Nu aintsnaka wainchawaitjai tusam, kampakam waitrakum uurtuktatme, —timiayi.

Wikia jinta tumawaitjai timiauri

14 ¹Nunia Jesús ataksha ni nuiniatiri ainautin chichartamak:

—Napchau nintimsuk asataran. Yus nekasampita takurmeka, winasha nekasampita turutiaran. ²Wína Apaachir pujamunam atum pujustin nukap angkan awai. Nu nekaschawaitmatikia atumnasha ujakchainjarme. Tura asan atum pujustintrumin umistasan weajai. ³Tura

wi wena atum pujustinun umisan, atumin yaruaktasan ataksha taratnuitjai. Tura wi pujamunam atumsha nuni pujusmintrum tusan tajarme. ⁴Tura wi weamurka nekarme. Tura jintasha itiu awa tusaram nekarme, —Jesús turammiaji.

⁵Turammatai Tomás iniak:

—Apu ru, ame weamuram nekachutisha éitiurak jintasha nekaataij? —timiayi.

⁶Tamati Jesús aimiak:

—Witjai jintaitjai, tura asan witjai nekasainjai. Tura tuke iwiaaku pujau asan, pujutan sukartinna witjai. Tura asantai aints ningkikia Apaachirun pengké jeachartinuitai, antsu wijaingkia jeartinuitai.^o

⁷Atumka wína: Tuniyainme tusaram nekarkurmeka, wína Apaachirsha nekaamnawaitrume. Tura ni wainkau asaram, yamaikia yaachita nusha tusaram nekarme, —timiayi.

⁸Tamati Felipe Jesúsán chicharak:

—Apu ru, Apaachiran inakmasta. Turakmin ii wainkarkia maaketai titatji, —timiayi.

⁹Tamati Jesús ayaak:

—Feli pea, étu ke atumjai pujai waitiat-mesha, warí aintsuitme tusamka nekartsumek? Wína waituka wína Apaachirnásha wainui. Tura asantai éwaruka amesha Apaachiran inakmasta turutme? ¹⁰Wína Apaachirjai tu ke tsaniasan pujajai. Tura niijai tsaniasan pujau asar, iikia kichkia nunisketji. éNuka nekasampita tusamka nintimsu-mek? Wi taja nunaka wiki nintimsanka tatsujrume. Wína Apaachirka wini pujau asa, ni wakermurin takamtikrawai.

¹¹Wisha wína Apaachirjai tu ke tsaniasan pujau asantai, nunia wína Apaachirsha tu ke wijai tsaniasan pujau asantai, atumsha nekasampita turuttiaran. Antsu wína

nekasampitme turuchamin nekapea-krumka, wi takaamursha wainkau asaram, nekasampita tusaram nintimtur-sataram. ¹²Nekasan tajarme: Wina nekasampi pengké tujinkachuitme tu nintimtusar pujuinauka wi turaja nunasha nunisarang turuwartin ainawai. Tura wikia Apaachirun wetin asamtai, wi turaja nuna nangkamasarang takasartin ainawai. ¹³Atumka wina nintimtusaram wina naar pachitsaram nekasampita tusaram seatkurminka, aints ainau mash wina Apaachirun: Ameketme juuntam tiarat tusan, nunaka turatatjai. ¹⁴Atumka wina naar pachisrum: Nekasampita tusaram, waring achat mash wina seatkurminka, wisha nunaka turatatjai, —Jesús timiayi.^p

**Yuse Wakani akupkatnun
pachis etserkamuri**

¹⁵Nunia Jesús ataksha chichaak:
—Atum wina anenkurmeka wina chichamur umirtuktaram tajarme nuka miatrusrumek umiktaram.^q

¹⁶Tura wi weakun wina Apaachirun chicharkun: Chikich atumin yainmaktinun wiya tumaun akupturmakat tusan seatatjai. Tura wi seam, chikich atumin yainmaktinun atumjai tuke pujusat tusa akupturmaktatrum. ¹⁷Nuka Yuse Wakanintai. Nekas aa nuna nekamtikiartin aa nuwaitai. Wina umirtukcharu ainauka nunaka wainchau asar, tura tuniyayainta tusar nekachu asar jukichmin ainawai. Antsu atumjai pujau asamtai, tuniyayainta tusaram nekarme. Tura niisha atumi nintin engkema asa, tuke atumjai pujustinuitai.

¹⁸“Atum mitaikia nunisrumek pujustaram tusanka, atumin japanka ukukchatatjarme. Antsu waketrusnak

ataksha taritnuitjarne. ¹⁹Jumchik arusar wina umirtukcharu ainauka winaka waitkachartinuitai. Antsu atumka winaka waitkatnuitrum. Wi tuke pujau asamtai, atumsha nunisrumek tuke pujustinuitrum. ²⁰Yuse Wakani atumin tarutramiamtai, wisha wina Apaachirjai tsaniasan pujusan, atumsha wijai tsaniasrum pujau asaram, wi atumjai pujamuka paan nekaatnuitrum. ²¹Aints wina anentuka wina umirtuktin chichamrun nekau asa miatrusang umiawai. Tura asamtai wina Apaachirsha wina anentak pujuinauka aneawai. Wisha nunisnak wina anentunka anejai. Tura asan paan nekarawarat tusan wantinkatnuitjai,”
Jesús timiayi.

²²Tamati chikich Judas, Iscariotechu amia nu iniak:

—Apu ru warukaya amin umirtamtasuk pujuinausha wantintutskesha, iinkesha wantinkatmek? —timiayi.

²³Tu iniam Jesús chicharak:

—Wina anentuka wi taja nuna umirtuktinuitai. Turamta wina Apaachirsha nu aintsna aneetnuitai. Tura iijai tuke tsanias pujau asamtai, iisha nu aintsu nintin engkentuwar, nijai tsaniasar pujustinuitjai. ²⁴Antsu wina anenchauka wi taja nunaka umiatsui. Atum chicham antu wearne nuka winaruchuitai, antsu wina Apaachir wina akuptukmia nuna chichamentai.^r

²⁵“Wi atumjai tuke pujau asan, nunaka ujaajrum. ²⁶Antsu wi weamta, wina Apaachirka atumin yainmaktas ni Wakanin akupturmaktin asamtai, nu nekas Pengker Wakankia wi taja nuna warina takua tawa tusa mash nekamtikramatnuitrum, tura wi etserkamiaja nunasha mash atumin nintimtikramatnuitrum.

p 14.14 (Mat. 7.7-11; Luc. 11.9-13; Juan 15.7,16;16.23-24; 1.Juan 3.21-22;5.14-15)

q 14.15 (1.Juan 5.3) r 14.24 (2.Juan 6)

²⁷“Yamaikia pengker nintimsaram angkan pujustaram. Wi pengker nintimsan angkan pujaja nunisrumek pujustaram tusan akatran ukuajrume. Ju nungkanmaya ainau nangkamar: Angkan pujaji tinawa nunisrumek pujustaram tusanka tatsujrume. Antsu napchau nintimsaram pujusairap. Tura shamtsuk asataram tusan tajarme. ²⁸Wikia atumin chicharkun: Wikia Apaachirun wena, ataksha waketsanak atumjai tuke pujustasan taratnuitjai timiaja nuka antukmarume. Wina Apaachirka wina nekas nangkaturu asamtai, nekasrum wina anenkurmeka, wina Apaachirun weajai tamau antuku asaram nekasrum warastinuitrume. ²⁹Wikia wetsuk nuná eemkan yamaik ujaajrume. Tura wi weamtai, nekasampita turutmintrum tusan nunaka tajarme.

³⁰“Ju nungkanmaya inakratin wináu asamtai, atumjaingkia nukapka chichasana pujuschatatjai. Antsu nuka wina inatratatkama pengké tujintrawai.

³¹Antsu wina Apaachirun aneajai, tura wina akuptukmia nunaka miatrusnak umirmaurun ju nungkanmaya ainau mash nekaawarti tusan, wina Apaachir turutmia nunaka mash umiajai. Yamaikia wajaktiaram. Juniangka jiinkir wearmi,” Jesús iin turammiaji.

Numi aramua tumawaitjai timiauri

15 ¹Nunia ataksha nuikiartamujai Jesús iin chichartamak:

—Wikia nekasan numi aramua tumawaitjai. Tura wina Apaachirka nu numi aramun wainua tumawaitai. ²Antsu wina ainsur ainautiram numi kanawea tumawaitrume. Tura aints wina Apaachiru wakeramurin umirkachu ainauka numi kanawe nerechua tumau ainawai. Numi aramu nereachmataikia, numi kanawen met charukar japin armayi. Tura chikich kanawe nereunaka

nuna nangkamasang nukap nerekat tusar nasuin armayi. Numi kanawe pengker nereu ainauka wina chichamrun umirtukarua nunisarang ainawai.

³Atumka wina chichamur umirtuku asaram, pakuichawa nunisrumek ainiarne. ⁴Numi kanawe sankauka niisha tepeska nerechamnawaitai. Atumsha nunisrumek wina nintimturtsuk pujakrumka, nekasrum pengker aa nuka turachminuitrume.

Tura asaram wi atumjai tsaniasan pujau asamtai, atumsha nunisrumek tuke wijai tsaniasrum pujustaram.

⁵“Wikia nekasan numi aramua tumawaitjai. Tura atumka numi kanawea tumawaitrume. Numi kanawe ni numirin achitkawa nunisrumek wini achitkau ataram. Turakrumka numi kanawe nukap nerekuwa nunisrumek atinuitrume. Antsu wijainchuka pengker aa nuka turatatkamaram pengké tujintarme. ⁶Aints wina japruwar ukurkiaramtaikia, numi kanawen japinawa nunisnak japatnuitjai. Numi kanawe japam kukartinuitai. Tura kukaramtai aints ainau nuna mash irumrar jijai keemin armayi.

⁷“Atumka wini tuke pujakrumka, tura wina chichamur tuke kajinmatsuk nintimtakrumka, waring achat seatkurminka, Yus nunaka suramsatnuitrume.

⁸Atumka Yus wakera nunisrumek pujakrumka, wina Apaachirsha nekasrum pengker awajsatnuitrume. Tura asakrumin chikich ainau atumin waitmakar: Nekasar Jesúsua nuiniatirintai tusar nekarmawartinuitai. ⁹Wina Apaachir wina anentua nunisnak wisha atumnasha aneajrume. Tuke wina aneetir ataram. ¹⁰Wina Apaachiru chichamen tuke umiru asan, tuke ni aneetirinjai. Atumsha nunisrumek wina umirtuktin chicham tuke umirtakrumka, wina aneetiruitrume.

¹¹“Wi waraaja nunisrumek atumsha warastaram tusan, atumin tuke

waramtiksatasan wakerajrume. Tura asan ju chichaman ujaajrume. ¹²Wína chichamur umirtuktaram tajarme nuka nuwaitai: Wi atumin aneajrume nunisrumek aneenitaram.^s

¹³“Aints ni amikrin nekas aneak, ayamruktaj tusa jakatas wakerawai. Nuna nangkamasang aneenitka pengké atsawai. ¹⁴Atumka wína chichamur miatrusrumek umirtakrumka, nekasrum wína amikrui-trume. ¹⁵Aints ni inamuri turamunka nekatsui. Tura asantai wína inatirui-trume tatsujrume. Antsu wína Apaachir turutmiaun mash atumin ujaku asan, wína amikrui-trume tajarme. ¹⁶Atumek nintimsarmeka wína aintsruka wajaschamiarume. Antsu atumin: Wína aintsur ataram tusan eakmiajrume. Tura atum numi nerekuwa nunisrumek wína takatur takastaram tusan akupkamiajrume. Tura asan atumi turamuringkia tuke nangkankashti tusan akupkamiajrume. Tura atumka wína aintsur asaram, wína naar pachittsaram wína Apaachir seamka mash suramsatnuitrume.^t

¹⁷“Wína chichamur umirtuktaram tajarme nuka nuwaitai: Tuke aneenisrum pujustaram,” Jesús turammiaji.^u

Atumnasha nakitramartinitai timiauri

¹⁸Nunia Jesús ataksha iin chichartamak:

—Ju nungkanmaya ainau atumin nakitraminamtaikia, wína pachittsaram: Nunasha nakitraru asar, iincha nakitraminaji tusaram nintimrataram. ¹⁹Atumsha ju nungkanmaya ainawa nunisrumek nintimsaram pujakrumningkia, junia aints atumin anenmiaraintai. Antsu ju nungkanmaya arumning, wína aintsur ataram tusan, wi atumin eakmau asaram,

yamaikia ju nungkanmayanchuitrume. Tura asakrumin junia aints ainau atumin nakitraminawai.^v

²⁰“Aintsu inatiri ni inamurinka nangkakashtinitai timiaja nuka aneaku ataram. Aints ainau wína nakittrinak pasé awajtusaru asar, atumnasha nunisarang pasé awajtamsartinitai. Tura chikich aints wína chichamrun umirtukaru asar, atumi chichamencha nunisarang umirtamkartinitai.^w

²¹“Wína akuptuku yaachita tusan nekainachu asar, atumin wína aintsur asakrumin pasé awajtamsartinitai. ²²Wi ju nungkanam tau asan, junia aints ainaun wína chichamrun ujakchamuitkungka, ni tunaarinka nekarachminuyayi. Antsu ujakmau asar: Nekachkun tunau turinuyajai, pengké tichartin ainawai. ²³Wína nakitrinauka wína Apaachirnasha nakitina-wai. ²⁴Aints ainau wainminamunam wainchati takatan wi chikich aints ainau tujjintinaun wainiatun unturi turinuyajai. Nuna turachmataikia, niin wiasmamtikiashtinitajai. Antsu wi wainchati takatan turamun wainkariat wína nakittrin asar, wína Apaachirnasha nunisarang nakitin ainawai. ²⁵Nu turunatnunka pachis Yuse chichame tu aarmawaitai: ‘Nangkamiar wína kajertukarmiayi.’ Nu aarmauka ii umirkatin chichamaitai tiarmia nunaka miatrusarang umikiarmiayi.^x

²⁶“Tura wi wena atumin yainmaktinun wína Apaachirun puja nuna akuptuktat-jarme. Nuka Yuse Wakanintai. Nekas aa nuna nekamtikiartinka nuwaitai. Nuka Yusnumia taa, wína pachitas aints ainaun nintimtikratnuitai. ²⁷Atumsha nu nangkamtak wijai pujau asaram, wína naar pachisrum aints ainau nekamtikiatnuitrume.

s 15.12 (Juan 13.34;15.17; 1.Juan 3.23; 2.Juan 5) t 15.16 (Mat. 7.7-11; Juan 14.13-14;16.23-24) u 15.17 (2.Juan 5) v 15.19 (Juan 17.14) w 15.20 (Mat. 10.24-25; Luc. 6.40; Juan 13.16) x 15.25 (Sal. 35.19)

16¹“Atumka wína chichamur umirat inaisairap tusan, ju chichaman ujaajrume. ²Ukunam iruntai jeanam wayaakrumin, winar asakrumin jiirmakiartinuitai. Tura aints ainau atumin mantaminak Yusen pengker awajsatasan aitkajai turamiartinuitai. ³Nu aints ainau winasha tura wína Apaachirnasha nekainachu asar turutmartinuitai. ⁴Nu turunatin kinta jeamtai, wi taja nu nintimrataram tusan, ju chichaman ujaajrume,” Jesús turammiaji.

Yuse Wakani turatnun pachis etserkamu

Nunia Jesús ataksha chichartamak:

“Yaanchuikia atumjai tuke pujau asan, nunaka ujakchamiajrume. ⁵Antsu yamaikia wena, wína akuptukmia nujai pujustasan waketjai. Turai waitiatrumek kichkitirmesha ¿tuwa weame? tusarmeka inintsurme. ⁶Tura wi nuna tinu asamtai, atumka wake mesekurme. ⁷Antsu wikia nekasam tajarme: Wi waketkiamtai, atumka nekasrum timiá pengker pujustinuitume. Wi waketchamtaikia, atumin yainmakartinka tarutmichaintrume. ⁸Wi Yuse Wakanin akupkamtai, ni taa ju nungkanmaya ainau tunaarin pachis nekamtikiatnuitai. Tura Yuse wakeramurinha nekamtikiatnuitai. Tura Yus tunaarintin ainaun wait wajaktiniun susatnuncha nekamtikiatnuitai. ⁹Tunaarintin ainau wína nekasampita turutinachu asar tunau ainawai. ¹⁰Tura wína Apaachirun waketkin asamtai, atumka winaka waitkashtinuitume. Tura asakrumin itiu Yuse wakeramurin najanatnuitume tusa, Yuse Wakani atumin nekamtikramatnuitume. ¹¹Tura ju nungkanmaya ainaun inau tuke wait wajaktinum wetin asamtai, tunau ainau Yus wait wajaktiniun susatniun pachisar nekaawartinuitai.

¹²“Atumin nukap ujakmin ayatun, atumka yamaikikia warina takua tawa

tusaram nekaachminuitume. ¹³Tura Yuse Wakani nekas chicham aa nuna nekamtikiartin taa, nekas aa nunaka mash atumin nuitamratnuitume. Antsu ningki nintimsangka nunaka turashtinuitai. Antsu wína Apaachirun chichamen antukmaun nunak titinuitai. Tura ukunam atiniun pachis atumin ujatmaktinuitume. ¹⁴Nuka wína pachitas atumin ujatmaktin asa, wína nekas pengker awajtustinuitai. ¹⁵Wína Apaachirnau aa nuka mash winaruitai. Tura asamtai Yuse Wakani wína pachitas atumnaka ujatmaktinuitume tusan tajarme.

¹⁶“Wikia wina Apaachirun wetin asamtai, jumchik arusrumka winaka waitkashtatume. Nuniangka ukunam jumchik arusrum winaka ataksha waitkatatume,” Jesús iin turammiaji.

Wake mesekrum pujayatrumek ukunam warastinuitume timiauri

¹⁷Jesús turammatai ni nuiniatiri ainauti mai nuwamtak chicharnaiyakur:

—¿Ju chichamsha warimpita? Wína Apaachirun wetin asamtai, jumchik arusrumka winaka waitkashtatume. Nunia ukunam jumchik arusrum ataksha waitkatatume ta nusha ¿warukang tawa? ¹⁸Jumchik arusrum ta nunasha warina takua tawa tusarkia antatsji, —tunaimiaji.

¹⁹Jesús iniasmi tunaiyakrin, nuna nekaa iin chichartamak:

—Wi atumin chicharkun: ¿Jumchik arusrumka winaka waitkashtatume, nunia ataksha jumchik arusrum winaka waitkatatume tajarme nu pachisrumek inintsasarum wakeraram? ²⁰Nekasan tajarme: Ju nungkanmaya ainau warasar-tatui. Antsu atumka wake mesekrum pujusrum juutiatrumek. Atumka wake mesekrum pujayatrumek, ukunmaka warastinuitume. ²¹Nintimrataram: Nuwa jurertin kintari jeamtai, jatema wait waja

pujuuyi. Tura uchin wainak waraak, wait wajakmaurinka kajinmini. ²²Atumsha nunisrumek yamaikikia wake mesekrum pujarme. Turayatrum ataksha wi wantinkamtaí, wína waitkaram, atumi nintijai nukap warastinuitrume. Nu waraamuka tuke nangkankashtinuitai.

²³“Nu kintatikia winaka pengké kichkisha inintsashtinuitrume. Antsu nekasam tajarme: Wína naar pachisrum wína Apaachir seakrumningkia mash suramsatnuitrume. ²⁴Yamaisha wína naar pachisrumka wína Apaachirsha pengké seaatsrume. Antsu yamai nangkamsaram seataram. Atum seakrumningkia, niisha nukap warastaram tusa atumin waramtikramsatnuitrume,” Jesús turammiaji.ʸ

Jesucristo tuke nepetminuitai

²⁵Nunia ataksha Jesús iin chichartamak:

—Wikia atumin chichaman ujaaknaka, tuke nuikiartutai chichamjai ujayajrume. Antsu kinta jeamtaí, nuikiartutai chichamjaingkia ukunmaka ujakchatnuitjarme. Antsu wína Apaachirun pachisan paan ujaktinuitjarme. ²⁶⁻²⁷Nu kinta jeamtaí, atumka wína anentu asaram, wína pachitsaram: Nekasampi iin anenmau asa, ni Apaachirinia jiinki iin tarutramji, tu nintimsaram pujau asakrumin, wína Apaachirka atumin anenmawai. Tura atumin anenmau asamtaí, wikia atumin pachisan wína Apaachirun seatinuitjarme tatsujrume, antsu atumka wína naar pachisrum wína Apaachir seatnuitrume. ²⁸Wikia wína Apaachirnia jiinkin, ju nungkanam taawitjai. Tura yamaikia ju nungkan ukukin, ataksha Apaachir pujamunam waketjai, —turammiaji.

²⁹Turammataí ni nuiniatiri ainauti Jesús chicharkur:

—Yamaikia nuikiartutai chichamka ujakratsuk, nekasam paan etseru weame.

³⁰Ameka mash nekawaitme. Tura aints amin ininmatsaing, pengker aimiat nekawaitme. Tura asakmin nekasampi Yus akupkamuitme taji, —timiaji.

³¹Tu tinu asakrin Jesús iin chichartamak:

—¿Nekasrum yamaikia Yus akupkamuitme turutrumek? ³²Antsu wikia tajarme: Nu kinta jeatutai timiaja nuka yamaikia tsawaatnak wajasi. Tura asamtaí atumka mash wína ukurkiram kanartatrum. Antsu wína Apaachirka wijai pujau asamtaí, wikikia juwakchatatjai. ³³Tura asamtaí wina nintimtusaram angkan pengker pujusmintrum tusan, nunasha tajarme. Ju nungkanam pujakrumka wait wajaktinuitrume. Antsu wi ju nungkanam aa nuna mash nepetkau asamtaí, atumsha napchauka nintimtsuk pujustaram, —Jesús turammiaji.ʒ

Jesús ni nuiniatiri ainaun pachis Yusen seamuri

17 ¹Nunia Jesús chichas umis, nayaimpinmanini pangkai jiiimias Yusen seak:

“Apaachiru, yamaikia wína kintarka jeayi.

Tura asamtaí ami uchiram asan, ami kakarmarmin inakmastasan wakerau asamtaí, amesha kakarmaram inakmasta.

² “Tura wína aintsur ame surusume nuka

pujut nangkankashtinun jukiarat tusam, ameka mash aints inarta tusam, kakarmaram surusuitme.

³ “Apaachiru, ameketme Yusem. Chikich Yuska pengké atsawai.

Tura asamtaí aints ainau aminak:

- Ameketme Yusem tusar, tura
winasha: Jesucristoka Yus
akupkamuitai turutinau asar,
pujut nangkankashtinun jukiartin
ainawai.^a
- 4 “Wikia ju nungkanam pujusan,
ame turata turutmiame nunaka mash
umikuitjai.
Tura asan amin pengker awajnu-
yajme.
- 5 “Tura asamtai Apaachiru,
yaanchuik nungka najanchamning wi
amijai pujamtai,
pengker awajtinuyame nunismek
yamaisha pengker awajtusta.
- 6 “Ame ju nungkanmaya ainau
wina surusmiame nunaka
ami naarmin pachisan
tenapkesan nekamtikiamu asar
aminu ainawai. Tura aminu asaram-
tai
aminu aarti tusam surusuitme.
Turamu asar ami chichamin umirta-
min ainawai.
- 7-8 “Ame wina chichamur etserkata
tusam akuptukmiame nunaka
miatrusnak umikuitjai.
Tura asamtai jusha wina chichamrun
antukar jukiarmiayi.
Tura asar nekasampi Yus akupka-
muitme tinawai.
Tura wina chichamrun
nekas aminuitai tusar nekainawai.
Tuminau asar,
ame surusmau ainauka
mash ninu ainiaji tusar nekainawai.
- 9 “Aminu asaramtai,
juna pachisan seatjame.
Ju nungkanmaya ainau aminuchu
asaramtai,
nuna pachisnaka seatsjame. Antsu
wina surusmiame juka aminu
asaramtai,
juna pachisan seatjame.
- 10 “Mash aminu aa nuka winaruitai.
Tura asamtai wina aintsur ainauka
aminu ainawai.
Tura asar winaka:
Ameketme juuntam tusar
pengker awajtinawai.
- 11 “Wikia yamaikia amin winitin
asan,
ju nungkanmaka pujuschatatjai.
Antsu ju ainauka juni tuke
juwakartatui.
Tura asamtai Apaachiru,
nekas pengker asam,
wisha amijai kichik ajina nunisrik,
jusha mash iruntrar kichkia
nunisarang arti tusan,
ami kakarmarmijai ame surusmau
ainauka wainkata.
- 12 “Wikia ju nungkanam pujusan,
wina aintsur ainaunka ame
surusmiame junaka ami kakar-
marmijai mash pengker
wainuyajai.
Tura asan, kichkisha mengkakchajai.
Antsu ami chichamim yaanchuik
aarmau aa nuna umiktas,
kichik aints tuke mengkakatin asa,
ningki wakerak mengkakawaitai.^b
- 13 “Yamaikia ame pujamunam
winitatjai.
Tura juni pujusan
wi waraaja nunisarang
wina aintsur ainausha warasarti
tusan seajme.
- 14 “Wina aintsur ainaun
ami chichamin ujayajai. Wikia ju
nungkanmayanchuitjai.
Tura jusha nunisarang ju nungkan-
mayancho asaramtai,
ju nungkanmaya pasé aints ainau
junaka nakitin ainawai.^c
- 15 “Tura wainiatnak

- yamaikia ju nungkanmaya jiikiarta tusanka seatsjame.
Antsu Satanás ju aints ainau nepetkai tusam,
ayamrukta tusan seajme.
- 16 “Wisha ju nungkanam tuke pujuschatin asamtai, jusha nunisarang ju nungkanmaka tuke pujuschartin ainawai.
- 17 “Ami chichamim nekas aa nujai ami aintsrum pengker awajsata. Ame chichameka nekasaintai.
- 18 “Ame junia aints ainamunam wína akuptukmiame nunisnak wisha junia aints ainamunam niincha akupinajai.
- 19 “Aminu aintsrum asar, tuke inaitsuk ami wakeramurmin najanawarti tusan, nu aints ainauncha pengker awajsata-san ami wakeramurmin tuke najanin ajai.
- 20 “Juni wijai iruntrar pujuina nunak pachisnaka seatsjame. Antsu ukunam ju aints ainau chichamen antukar:
Wína nekasampita turutiartin ainaun nunasha pachisan amin seajme.
- 21 “Ameka Apaachiru wína pujurtame.
Tura wisha amin pujaja nunisarang niisha iijai pujusarti tusan seajme.
Tura mash iruntrar kichkia nunisarang nintimsar pujuinamtai, ju nungkanmaya ainau nuna wainkar, nekasar wína pachitsar: Nekasampi Yus akupkamuita turutiarat tusan seajme.
- 22 “Ame wijai kichkia nunisrik pujaji nunisarang niisha pujusarti tusam, wína pengker awajtusume. Tura asakmin wisha nunisnak niincha pengker awajinajai.
- 23 “Amesha wini pujurtakmin, wisha ni nintin engkemau asamtai, pengké kichkia nunisarang pujusarti tusan seajme.
Tura tu pujuinamtai, ju nungkanmaya ainau nuna wainkar wína pachitsar: Nekasampi Yus akupkamuita tusar nekaawarti.
Tura amin pachitmasar: Ni Uchirin aneawa nunisang ni aintsri ainauncha aneawai tusar nekarawarti tusan seajme.
- 24 “Apaachiru, ameka nungkaka najantsuk winaka tuke anentin asam, aints wína surusmiame nuka mash wainkata turutin asakmin, wína kakarmarsha ame surusmiame nunaka niisha wainkarti tusan wakerajai.
- 25 “Apaachiru, nekasam pengkeraitme.
Ju nungkanmaya ainauka amin nekarminachu wainiatnak wikia wainjame. Tura ame wína surusmiame nusha mash wína pachitsar: Ameka Yus akupkamuitme tusar nekarinawai.
- 26 “Wikia ni nintin pujamtai, ameka tuke wína anenme nunisarang niisha aneniarti tusan, wína aintsur ainaun ami naarmin pachisan nekamtiknu-yaja nunaka tuke nekamtikiatatjai,”
Jesús Yusen seak timiayi.

Jesús an achikmauri

(Mat. 26.47-56; Marc. 14.43-50; Luc. 22.47-53)

18 ¹Nunia Yusen sea umis, Jesús ni nuiniatiri ainautijai entsawach Cedrón tutai katingkiar, numi arakmau-

num wemiaji. ²Jesús ijai tuke nuni iruntrau asamtai, Judascha niin suruktas wakerau asa, nu numi arakmaunaka nuwaapita tusa nekauyayi. ³Tura asamtai Judas sacerdote juuntri ainaun, tura fariseo ainauncha ujaak: Suntarum tsangkatruktaram tamati, niisha suntar ainaun, tura Yus seatai juun jea wainin ainauncha Judasjai wearti tusar akupkarmiayi. Turinamtai nangkijai, tura saapijai, tura namparingjai, tura kantiinasha takusar, Jesúsán achikiartas tariarmiayi. ⁴Turinamtai Jesúska ukunam atiniun mash nekayat, numi arakmaunomia jiintuki:

—¿Yaachia earne? —timiayi.

⁵Tu iniam aiminak:

—Nazaretnumia aints Jesús eaji,

—tiarmiayi.

Tinamtai Jesús:

—Wiitjai, —timiayi.

Judascha Jesúsán suruktin asa, suntarnum pachinak wajamiayi. ⁶Jesús: Wiitjai tamati, shaminak waketkamawar nungkanam ayaararmiayi. ⁷Tuminamtai Jesús ataksha iniak:

—¿Yaachia earne? —timiayi.

Tu iniam ataksha aiminak:

—Nazaretnumia Jesús eaji, —tiarmiayi.

⁸Tu tinam Jesús chichaak:

—Yanchuk wiitjai tajarme. Wína achirkatasrum eatkurmeke, ju aints wijai wajainauka wearat tusaram akupkataram, —timiayi.

⁹Jesús nuna tusa, ni Apaachirin nuwik seak: “Aints wína surusmiame nunaka kichkisha mengkakchajai,” tímia nuna umiktas timiayi. ¹⁰Tamati nunia Simón Pedro saapin takaku asa, saapin engketirinia kuinak sacerdote juuntri inatiri kuwishin untsurinini met charutkamiayi. Nu aintsu naaringkia Malcoyayi.

¹¹Turamtai Jesús Pedron chicharak:

—Saapiram engketirin engkeata. ¿Wína Apaachirka wait wajaktatme turutmia nunisnak wait wajakchatnukitaj?

—timiayi.

Sacerdote apuri jeen jukimuri

(*Mat. 26.57-58; Marc. 14.53-54; Luc. 22.54*)

¹²Tamati suntar ainu ni apurijai, tura Yus seatai wainin ainuajai irunturar Jesúsán achikiar jingkiawarmiayi.

¹³Nunia Anása jeen jukiarmiayi. Anáska Caifása juuntri ayayi. Tura Caifás nu musachtin sacerdote apuri ayayi. ¹⁴Nu Caifáska yaanchuik judío ainaun chicharak: “Aints mash jakarai tusar ¿kichik aintsuk maatin pengkerchukai?” tímia nuka nuwaitai.^d

Pedro waitruamuri

(*Mat. 26.69-70; Marc. 14.66-68; Luc. 22.55-57*)

¹⁵Jesúsán jukiaramtai, Simón Pedro chikich nuiniatirijai: Jiitai tusar weriarmiayi. Tura apu jeen jear, chikich nuiniatiri sacerdote apuri waitai asa, Jesúsjai apu jeen wayaamiayi. ¹⁶Tura wayaamtai Pedro aanum juwakmiayi. Turamtai nu Jesúsá nuiniatiri nuwa waitin wainin wajamia nuna Pedron pachis aujak:

—Jusha wayaati, —tamati nuwa: Ayu

tusa Pedron wejaamiayi. ¹⁷Pedro wayaamtai, nu nuwachikia waitin wainin asa, Pedron chicharak:

—¿Amesha Jesúsá nuiniatirinchukitam? —tu iniam Pedro aimiak:

—Atsa, wichawaitjai, —waitrak timiayi.

¹⁸Nuna tusa ukuki, micha asamtai, sacerdote apuri inatiri irunu, tura Yus seatai jean wainin irunusha jin keemakar jinam ayaamsar wajasarmiayi. Tuminamtai Pedroscha nuni pachinak anumak wajasmiai.

Sacerdote apuri Jesúsan iniasmauri*(Mat. 26.59-66; Marc. 14.55-64; Luc. 22.66-71)*

¹⁹Nuna turinai sacerdote apuri Jesúsan iniak:

—¿Ami nuiniatirmesha ya ainia? ¿Tura warimpia ami nuiniatirmesha nuininu-yame? —timiayi. ²⁰Tu iniam Jesús aimiak:

—Wikia mash aints antinamunam chichauyajai. Iruntai jeanmasha tura Yus seatai juun jeanmasha, tura judío mash iruntramunmasha aints ainaun tuke nuininuyajai. Antsu uuknaka chichachuyajai. ²¹¿Waruka winasha inintrume? Winaka inintsuk wína chichamrun antukaru ainau iniasta. Nuka wi chichakmaunka nekawaru asar ujatmakartatui, —timiayi.

²²Tamati Yus seatai wainin kichik nuni wajau Jesúsa yapiin paat awati:

—¿Warukaya sacerdote apurisha tuusha chicharme? —timiayi. ²³Tamati Jesús ayaak:

—¿Tuna wi napchaunasha chichaaja? Tura wi taja nuka pengker wainiatmesha ¿waruka awattame? —timiayi.

²⁴Tamati nunia Anás: “Ju aints jingkiataram,” tusa Jesúsan sacerdote apuri Caifás naartinum akupkamiayi.

Pedro ataksha waitruamuri*(Mat. 26.71-75; Marc. 14.69-72; Luc. 22.58-62)*

²⁵Anása jeen Jesúsan iniinak pujuinai, Pedro anum jin ayamak wajamiayi. Nuni wajamtai, aints ainau iniinak:

—¿Amesha Jesúsa nuiniatirinchukitam? —tiarmiayi.

Tu tinamaitiat Pedro ayaak:

—Atsa, wichawaitjai, —timiayi.

²⁶Tamati sacerdote apuri chikich inatiri Malco naartinun Pedro kuwishin charutkamia nuna weari Pedron chicharak:

—¿Numi arakmanum aujai wajamin wi wainkachmakjam? —timiayi.

²⁷Tu iniamaitiat Pedro ataksha waitrak:

—Atsa, —tamati atash shinimiayi.

Pilato Jesúsan iniasmauri*(Mat. 27.1-2, 11-14; Marc. 15.1-5; Luc. 23.1-5)*

²⁸Nunia Caifása jeenia Jesúsan jukiar romano apuri chicham nekatai jeenam jeeniarmiayi. Yamai tsawaarai jeeniarai: Iikia judío asar, judíocho jeen wayaarkia, Pascua fiestati yuwinamunmak iikia yuwachminuitji, tu nintimrar, romano apuri jeen wayaacharmiayi. ²⁹Tuminau asaramtai, Pilato nu aints ainaujai chichastas jiinki iniak:

—¿Ju aincha warí tunaana turini?

¿Atumsha warintrume? —timiayi.

³⁰Tu iniam aiminak:

—Ju aintska tunau turichuitmataikia, iikia aminka itachminuitji, —tiarmiayi.

³¹Tinamtai Pilato chicharak:

—Atumek ju aintska jukiram, atumi juuntri chichamen umirkuram, ni tunaari nekarataram, —tamati judío juuntri aiminak:

—Antsu judío ainautikia aints kichkisha maachminuitji. Romano ainautiram ii apuri asaram, nuka pe surimu wearme, —tiarmiayi.

³²Jesús yaanchuik chichaak: Tu mantuatin ainawai tinu asamtai, ni timiaurin miatrusarang umikiarmiayi.^e

³³Judío juuntri tinamtai, Pilatoka ataksha chicham nekatai jeenam waya, Jesúscha wayaati tusa untsukmiayi. Tura Jesús wayaamtai iniak:

—¿Nekasmek judío ainau apurintam? —timiayi.

³⁴Tu iniam Jesús ayaak:

—¿Amek nintimsamek inintam? ¿Turachkumka chikich aints wína pachitsar ujatmakaramtaik winaka turutam? —timiayi.

³⁵Tamati Pilato ayaak:

¿Wikia judfokitaj? Ami aintsrum ainau sacerdote juuntri ainaujai aminka juningkia itarmiari. ¿Warí tunaawa turamame? —timiayi.

³⁶Tu iniam Jesús aimiak:

—Wikia ju nungkanmaya ainau ni inatirin inawa nunisnaka inatsjai. Wikia ju nungkanmaya ainawa nunisnak wína nuiniatirun ínamtaikia, nuka maanikiarti-nuitai. Turamtaikia judío juuntri ainauka winaka achirkacharaintai. Antsu wi inamuka junianchuitai, —timiayi.

³⁷Tamati Pilato iniak:

—Takumka ¿nekasmek apuitam? —timiayi.

Tu iniam Jesús aimiak:

—Ja ai, ame tame nuka nekasam tame. Wiitjai apu. Ju nungkanam akiinaw asan, chicham nekas aa nuna etserkatasan juningkia taawitjai. Tura samtai chicham nekas aa nuna umirinawka wi taja nuna mash antinawai, —timiayi.

³⁸Tamati Pilato chicharak:

—¿Nekas chichamsha warimpita? —timiayi.

Jesús jakati timiauri

(Mat. 27.15-31; Marc. 15.6-20; Luc. 23.13-25)

Nuna tusa ukuak, Pilato ataksha judío ainaujai chichastas jeanmaya jiinki chicharak:

—Ju aintsu tunaarinka kichkisha nekarachjai. ³⁹Antsu Pascua fiesta jeamtai, atum wína seatkurmin kichik achikmaun jiikin akupnuyajai. ¿Yamaikia ititurkatjak? ¿Ju judío ainautirmin apurinash jiikin akupkataj? —timiayi.

⁴⁰Tu iniamaitiat aints ainau untsuminak:

—Atsa. Juka akupkaip. Antsu Barrabás jiikim akupkata, —tiarmiayi.

Nu Barrabáska kasa aintsuyayi.

19 ¹Tu tinam Pilato suntar ainaun Jesúsan katsumkarat tusa jeanmayan jiiki akupkamiayi. ²Turamtai

suntar ainau tsengkrutin jangkin najatawar tsengkrumtikiarmiayi. Nunia apu wejmakrin kapantakun antsrarmiayi.

³Nunia kichik kichik Jesús wajamunam weriar chicharinak:

—Judío Apuria, pengker pujusta, —tutar yapiin awatiarmiayi.

⁴Turinamtai Pilato ataksha jiinki aints ainaun chicharak:

—Jiistaram. Wikia au aintsu tunaarinka kichkisha nekarachjai. Nu nekaataram tusan, ataksha jiiktajai, —timiayi.

⁵Tamati Jesús jangkin tsengkruk, tura wejmak kapantakun entsar jiinkimiayi. Tura jiinkiamtai Pilato aints ainaun chicharak:

—Ju aintska jiistaram, —timiayi.

⁶Jesús jiinkiamtai, sacerdote juuntri ainau, tura Yus seatai jean wainin ainausha Jesúsan jiisar kakarar chicharinak:

—Numi ajintruam maata, —tiarmiayi.

Tu tinamtai Pilato chicharak:

—Atumek jukiram numinam ajinkaram maataran. Wikia ju aintsu tunaarinka pengké nekarachjai, —timiayi.

⁷Tamati judío juuntri ainau aiminak:

—Juka Yuse Uchirinjai tinuyayi. Ii umiktin chicham tu aarmawaitai: Aints tu chichauka maatnuitai, —tiarmiayi.

⁸Tu tinamtai Pilato nuna antuk nuna nangkamasang shamkamiayi. ⁹Tura ataksha chicham nekatai jeanam waya, Jesúsan iniak:

—¿Amesha tuniayainme? —tamaitiat Jesúska aikchamiayi.

¹⁰Tura aintsuk wajamtai, Pilato chicharak:

—¿Warukaya winasha airtsume? Wi wakeraknaka numinam ajinkaram maataran tiinjame. Turachkunka jiikin akupkainjame. ¿Ameke nuka nekatsmek? —timiayi.

¹¹Tamati Jesús ayaak:

—Yus surimramtaikia, winaka mantuachminuitme. Tura asakmin wína amin surutkauka amin nangkamasang nukap tunaawitai, —Jesús timiayi.

¹²Nuna tinu asamtai Pilatoka: ¿Itiurak Jesúsán jiiikin akupkaintaj? tu nintimmiayi. Antsu judío juuntri ainau chicharinak:

—Ju aints akupkamka, juun apu Césari amikringkia achatatme. Aints ningki: Apuitjai tumamuka juun apu Césari nemasentai, —tiarmiayi.

¹³Nu tinamun antuk Pilato: “Jesús aanun jiiiktaram,” tusa akupak, chicham nekatai keemtainum keemsamiayi. Nu keemtaikia kaya metek paparmau ayayi. Nu wekaataingkia judío chichamejai Gabata inaikiamuyayi. Nuka iiti chichamejaingkia Pata Kaya taku tawai.

¹⁴Pascua fiesta tsawaatsaing, tsaá yakí waakai, Pilato judío ainaun chicharak:

—Pai, atumi apuri jiiistaram, —timiayi.

¹⁵Tamaitiat untuminak:

—Jakati, jakati, numinam ajintruam maata, —tiarmiayi.

Tu chicharinam Pilato chicharak:

—Atumi apuri wainiatnakeash ¿numinam ajinkan maataj? —timiayi.

Tu iniam sacerdote apuri ainau aiminak:

—Íi apuringkia kichkitai, nuka Césarkitai, —tiarmiayi.

¹⁶Tu tinamtai Pilato Jesúsán numinam ajinkar maawarat tusa akupkamiayi. Tura akupkamtai suntar ainau Jesúsán jukiarmiayi.^f

Jesús numinam ajinkar maamuri

(Mat. 27.32-44; Marc. 15.21-32; Luc. 23.26-43)

¹⁷Juwinam Jesús numi winangmaun ningki nanaki suntar ainaujai mura muuk ukunch tutainum wearmiayi. Nuka judío chichamejaingkia Gólgota taku tawai.

¹⁸Nuni jeamtai, suntar ainau jimia aintsun numi winangmanum ajinkarmiayi. Nunia Jesúsán japen ajinkarmiayi. ¹⁹Nuna eemkar: Pilato turataram tusa akupkamú asar, Jesúsá muuken yakinini tatang aarmaun numi winangmanum nujtukarmiayi. Tura nu tatangnum aarmauka nuwaitai: “Juka Nazaretnumia Jesúsaitai, judío apurintai.” ²⁰Nu aarmauka judío chichamejai, tura griego chichamejai, tura romano chichamejaisha aarmauyayi. Tura yakta aarin Jesús numinam nenaamu asamtai, judío unturi nuni wekajinak nu aarmaunaka aujiarmiayi. ²¹Turinau asaramtai, sacerdote juuntri ainau nuna wainkar, Pilaton jeariar chicharinak:

—Ameka judío apurintai tuuka aatsuk ningki: ‘Judío apurinjai tumammiai,’ tu aarta, —tiarmiayi.

²²Tinamaitiat Pilato ayaak:

—Wi aarja nuke ati, —timiayi.

²³Suntar ainau Jesúsán numi winangmanum ajintawar umisar, cuatro (4) aints asar, Jesúsá entsatirin ii jukimi tusar, jurukiar akankarmiayi. Tura Jesúsá wejmakri aparchamu aya najanamu asamtai, ²⁴suntar ainau chichainak:

—Juka jaakchami. Antsu suerte nakurusar ¿yáki juna jukit? tusar nekaami, —tunaiarmiayi.

Turinau asar yaanchuik Yuse chichame aarmawa nunisarang umikiarmiayi. Nu aarmauka nuwaitai: “Suerte nakurusmi tusar, wína entsatirun jurutkiarmiayi.” Tu aarmau asamtai, suntar ainau nunisarang turuwarmiai.^g

²⁵Turinamtai Jesúsá nukuri, ni kai Cleofasa nuwari Maríjai, nunia Magdalanmaya Maríjai Jesús nenaamunam arakchichu wajaarmiayi. ²⁶Nuni wajainamtai Jesús nukurin wainak, tura

winasha, ni aneetairi nuiniatiri asamtai, nukurijai tsaniasan wajai waitak, ni nukurin chicharak:

—Nukuachi, juka ami uchiram ati, —timiayi.

²⁷Nunia winasha chichartak:

—Juka ami nukuram ati, —turutmiayi.

Turutin asamtai wisha Jesúsua nukurin ukunam wína jearun jukimijai.

Jesúsua jakamuri

(*Mat. 27.45-56; Marc. 15.33-41; Luc. 23.44-49*)

²⁸Nunia Jesús mash umiku asa, nuna nekaa, Yuse chichame yaanchuik aarmaun umiktas:

—Kitamajai, —timiayi.

²⁹Tamati aints muits tuupchinam vino churin atun wainak, uruchjai chupir, sapapjai mukunat tusa aapamiayi.

³⁰Turamtai Jesús vino churiniun mukuna nunia chichaak:

—Mash umikjai, —tusa tsunsuma jakamiayi.

Mijiarnum nangkijai ijumuri

³¹Nu kinta Pascua fiesta tsawaatsaing turuawaru asamtai, kashin tsawaar nekas ayamtai kinta atin asamtai, judfo juuntri ainau chicharinak:

—Nu kintaka aints numi winangmanum ajintamu ainau nunisarka nemascharti, —tusa, Pilaton weriar chicharinak:

—Numi winangmanum ajintamu ainau wári jakarat tusa, suntar ainau weriar kangkajin kupikiarti. Nunia jakaramtai, numinmaya jukiarat tusam, chicham akupkata, —tiarmiayi.^h

³²Tu tinamtai Pilato: Ayu tusa chichaman akuptukmau asar, suntar ainau Jesúsnum ayamas netimia nuna kangkajin kupikiarmiayi. Nunia

kichnasha nunisarang kupikiarmiayi.

³³Turuwar Jesúsua kangkajisha kupirkatai tusa weriar, jiamaitiat yanchuk jakaun wainkarmiayi. Tura wainkar kangkajin kupirtsuk inaisarmiayi.

³⁴Tura wainiat kichik suntar čnekasash jaka? tusa nangkijai Jesúsua mijiarin ijiumiayi. Tura ijium numpasha, nunia yumisha kitamiayi. ³⁵Nunaka wikia nekasana winkau asan etserjai. Atumsha nekaaram nekasampita titaram tusan ujaajrume. Wi nekasana nuna winkau asan, wi taja nuka nekasaintai. ³⁶Jesúsua kunchin kupikcharu asar, Yuse chichame yaanchuik aarmawa nunisarang umikiarmiayi. Nu aarmauka nuwaitai: “Ni kunchin kichkisha kupirkachartinuitai.”ⁱ

³⁷Nangkijai ijiumia nusha chikich aints Yuse chichame yaanchuik aarmia nunisang umikmiayi. Nu aarmauka nuwaitai: “Nangkijai ijuarmia nuka niincha wainkartinuitai.” Tu aarmauyayi.^j

Jesúsua iwiarsamuri

(*Mat. 27.57-61; Marc. 15.42-47; Luc. 23.50-56*)

³⁸Suntar nuna mash umisaramtai, Arimateanmaya aints José naartin Pilatonam we: Jesúsua namangken jukin iwiarsatjai tusa seamiayi. Tu seam Pilato ayu tamati, José Jesúsua namangken jukimiayi. Nu Joséka Jesúsua nemarnutiat, judfo ainau shamak nekarawarai tusa, uumak Jesúsua nemarnuyayi. ³⁹Turamtai Nicodemosha yaanchuik Jesúsua chichas-tas kashi tarimia nu kungkutin mirra tutain chikich kungkutijai pachimramun treinta (30) kilon sumak tarimiayi.^k

⁴⁰Tura taa, José Nicodemojai Jesúsua namangken jukiar, tarach sarmanam nu kungkutijai ukatrar, Jesúsua namangken kangkararmiayi. Judfo ainautikia jakaru

ainau tu iwiarniaji. ⁴¹Jesús numi winangmanum jakamia nuna ayaamas numi arakmau ainau wajaarmiayi. Nuni jakau iwiartai pampa najanamu yamaram amiayi. Tura yamaram asamtai, aints kichkisha nuni iwiarsachmauyayi. ⁴²Nu kinta judío ayamtai kinta asamtai, tura nu jakau iwiartaingkia arakchichu asamtai, Jesúsna namangken nuni iwiarsarmiayi.

Jesús jakamunmaya nantakmiauri

(*Mat. 28.1-10; Marc. 16.1-8; Luc. 24.1-12*)

20 ¹Tuming kinta kashik paantra-tsaing, Magdalanmaya Marí Jesúsna iwiarsamurin jiistas wemiayi. Tura nuni jea, kaya juuntan waanam ututkarmia nuna urankaun wainkamiayi. ²Nuna wainak, Simón Pedro pujamunam ampuki waketskimiayi. Wisha Jesúsna aneetiri nuiniatiri asan, Pedrojai tsaniasan nuni pujumiajai. Tura Marí taa iin chichartamak:

—Ii Apuri namangke iwiarsamunmayan jukiari. Tura tunintsuk ukusarma nuka nekatsji, —turammiaji.

³Turammatai iisha Pedrojai jiinkir iwiarsamu jiistasar werimiaji. ⁴Iikia mai tsaniasar ampukir weayatrik, wiyá Pedron nangkaikin, Jesús iwiarsamunam jeamiajai. ⁵Tura ututsuk tekenan jiikman, Jesúsna namangkenka waintsuk antsu ni kangkarmaurinak wainkamiajai. ⁶Wi turamtai, Simón Pedro ukunam taa, wajatsuk iwiarsamunam utukmiayi. Tura utuk Jesús kangkarmau tarachik tarachik nuni tepaun wainkamiayi. ⁷Tura muuken nukukmausha niish nanenan tepaun wainkamiayi. ⁸Turamtai wisha eemkan jeayatun, iwiarsamunam wayaachu asan, wisha uku wayaan, tarach mash amia nuna wainkan: Nekasampi nantaki, tu nintimramiajai. ⁹Yuse chichame yaanchuik Jesúsna pachis: Jakamunmaya nantaktinuitai, tu aarmau wainiatrik, nu

tarach wainchakrikia: Nekasampi nantaki tuuka nintimtsuk pujumiaji. ¹⁰Tura nunia jiinkir ii pujutirin waketskimiayi.

Magdalanmaya Marín Jesús wantintukmauri
(*Marc. 16.9-11*)

¹¹Ii waketskiarin, Marí taa, Jesús iwiarsamunam ayaamas juutu wajamiayi. Tura juutak tekenas iwiarsamun jiistaj tusa, ¹²Jesúsna namangke atsayat, Yuse awemamuri jimiar wejmakana pujun entsarinaun, kichka nuwik Jesúsna namangke tepamunam muukenini pujaun, tura kitcha nawenini pujaun wainkamiayi. ¹³Turamtai Yuse awemamuri Marín iniinak:

—¿Waruka juutme? —tiarmiayi.

Tu tinam nuka aimiak:

—Wína Apuru namangken jurutkiaru asaramtai, tunintsuk ukusarma tusan, nekachu asan juutjai, —timiayi.

¹⁴Nuna tusa tuntupenini pajas jiimkama, Jesús wajaun wainkayat Jesúsapita tusangka nekaachmiayi.

¹⁵Turamtai Jesús Marín iniak:

—¿Warukaya juutme? ¿Yaachia eame? —timiayi.

Tu iniam Marí: Ju aintska numi arakmaun wainutskita, tu nintimias:

—Ame ni namangke jukinuitkumka, juni ukusmajai tusam ujatkata. Turakmin wi jurumkitjai, —timiayi.

¹⁶Tamati Jesús chicharak:

—María, —timiayi.

Tamati nuna pajas jiis, judío chichamejai chicharak:

—Rabuni, —timiayi. Nuka iiti chichamejaingkia nuikiartinu taku tawai.

¹⁷Tamati Jesús chicharak:

—Wína Apaachir pujamunam wakachu asamtai achirkaip. Antsu wína aintsur pujuinamunam weta. Tura ujaakum: Wína Apaachir pujamunam weajai. Nusha atumi Apaachirintai. Tura wína

Yusur pujamunam weajai. Nusha atumi Yusrintai tusan tajarme, tawai tita, —timiayi.

¹⁸Nuna timiau asa, Magdalanmaya Marí waketki, Jesúsá nuiniatiri ainautin chichartamak:

—Wi nekasán ii Apurin wainkajai. Tura tita tusa akaturmayi, —turammiaji.

Ni nuiniatiri ainau wantintukmauri
(*Mat. 28.16-20; Marc. 16.14-18; Luc. 24.36-49*)

¹⁹Nu tuming kinta kintamaunum Jesúsá nuiniatiri ainauti judfo juuntri shamakur, epeemir iruntrar pujarin, Jesús waitin uratsuk aneachmau jeanam waya japen wajas iin chichartamak:

—Pengker nintimsaram pujustaram, —turammiaji. ²⁰Nunia ni uwejencha, tura ni mijiarincha inakturmasmiaji.

Turamtai ii Apuri wainkar warasmiaji.

²¹Tumakrin Jesús ataksha chichartamak:

—Pengker nintimsaram pujustaram.

Wína Apaachir wína akuptukmia nunisnak wisha atumnasha akupkatat-jarme, —turammiaji.

²²Nunia suut umpunmi iin chichartamak:

—Yuse Wakani atumi nintin engkemati.

²³Atumka aintsu tunaari Yus sakarti takurminka, ni tunaarinka sakartatui.

Tura aintsu tunaari Yus sakarchati takurminkia, ni tunaarinka sakarchatatu, —Jesús turammiaji.^l

Tomás Jesúsán wainkamuri

²⁴Jesús nu jeanam wayaamunmaka Tomás Jimiamramu naartin Jesúsá nuiniatirintiat iijaingkia iruntrachmiaji.

²⁵Tura asamtai ukunam chikich nuiniatiri irunuti Tomás ujaakur:

—Ii Apuri wainkaji, —timiayi.

Tu ujaamaitiat Tomás iin chichartamak:

—Atsa, ni uwejen jirujai jinkamurin takaschanka, tura nangkijai ijumurin uwejrujai inurkachnaka, nekasampita tichatatjai, —turammiaji.

²⁶Nunia chikich tumingtin ataksha Jesúsá nuiniatiri ainautikia mash iruntramiaji. Tura Tomáscha iin pachinkamiayi. Turamtai waiti epenmiau wainiat, Jesús aneachmau waya, japen wajas iin chichartamak:

—Pengker nintimsaram pujustaram, —turammiaji.

²⁷Nunia Tomásán chicharak:

—Tomása, ami tsaranchikmijai wína uwejur ijumur inukam takasta. Tura uwejmijai mijiarur inukam jiiitruista. Tura nekaschawaitai turutsuk, antsu nekasampita turuttia, —timiayi.

²⁸Tamati Tomás aimiak:

—Nekasampi wína Apuruitme. Tura nekasampi wína Yusrutme, —timiayi.

²⁹Tamati Jesús chicharak:

—Tomása ¿wína waitkam nekasampita turutmek? Antsu aints wína waittsuk pujuinayat nekasampita turutinauka winaka nekasar timiá pengker nintimturi-nawai, —timiayi.

¿Ju papikia waruka aarmawaita?

³⁰Jesús chikich wainchati takatnasha untsuri turamia nusha ni nuiniatiri ainauti wainkamiaji. Antsu ju papinumka mashkia aarchamuitai. ³¹Tura Jesús nekasampi Yus akupkamuita, tura nekasampi Yuse Uchirinta titaram tusan, tura tu nintimtakrum pujut nangkankash-tin jukimnuram tusan, ju papinaka aatjarme.^m

Siete nuiniatiri ainaun Jesús wantintukmauri

21 ¹Jesús jakamunmaya nantaki, ataksha Tiberias kucha kaanmatkarin wekaas, ni nuiniatiri ainautin

wantinturmakmiaji. ²Nuni Simón Pedro, nunia Tomás Jimiamramu naartin, nunia Natanael, Caná yaktanmaya Galileanmaya aintcha nusha, nunia wi, nunia wína yatsursha, chikich jimiar Jesús a nuiniatirijai iruntrar pujumiaji. ³Iikia iruntrar pujarin, Simón Pedro iin chichartamak:

—Namakan achiktasan weajai,
—turammatai iisha:

—Iijai wemi, —tusa jeanmaya jiinkir kanu juunum engkemrar, kashi red ujua ujuaka namak kichkisha achikchamijai.

⁴Tura tsawaarin Jesús juun kucha kaanmatkarin wantinkamiayi. Tura ni nuiniatiri ayatrik, Jesúsapita tusarkia nekaachmiaji. ⁵Turakrin Jesús untsurmak:

—Natsachi ¿namak achikurmek?
—turammiaji.

Turammatai iikia:

—Atsawai, —timiayi.

⁶Tu aimkurin iin ataksha chichartamak: —Yamaikia untsurnumanini red ujungtaram. Nuni achiktatruma, —turammiaji.

Turammatai ni tímia nunisrik nangki-miar, namak timiá untsuri shikikiar, redcha jiiktatkamar tujinkamijai.^a

⁷Nuniangka wikia Jesús a aneetiri nuiniatiri asan, Pedron chicharkun:

—Auka ii Apurintai, —timiajai.

Wi tamati Simón Pedro nuna antuk, misu wajau asa, wejmakrin patasmaun entsar, juun kuchanam ayangmiayi.

⁸Turamtai chikich nuiniatiri ainautikia kanujai rednum namak chumpimiau kichik pachak metro japikir kaanmatkanam jeemiayi. ⁹Tura kaanmatkanam jear, ji kapaamunam namak jiyamu pangjai wainkamijai. ¹⁰Turakrin iin Jesús chichartamak:

—Namak achikurme nu jumchik itataram, —turammiaji.

¹¹Turammatai Simón Pedro reden kaanmatkanam japiki patai, namakan ciento cincuenta y tres (153) nekapmar-miayi. Antsu timiá untsurintiat redenka jaakchamijai. ¹²Nunia Jesús:

—Yuwitaram, —turammiaji.

Turammatai ni nuiniatiri ainautikia: Juka nekas iinu apurintai tu nintimu asar, kichkisha inintrutsuk: ¿Yaachitme? tichamijai. ¹³Nunia mash kaunkaru asakrin, Jesús wajaki, pangkan achik suramsamijai. Tura namaknasha nunisang suramsamijai.

¹⁴Jesús jakamunmaya nantaki iwiaaku pujus ni nuiniatiri ainautin nujaingkia kampakam wantinturmakmiaji.

Pedrojai chichasmauri

¹⁵Yutan umis, Jesús Simón Pedron iniak:

—Simónka, Jonása uchiriya ¿ju ainau nangkasmek timiá wína anentam?
—timiayi.

Tu iniam Pedroka aimiak:

—Ja ai, Apuru, wikia aminka pengker nintimtusan pujajme. Amesha nuka nekame, —timiayi.

Tamati Jesús chicharak:

—Takumka uwija uchiri wainua nunismek wína umirtin ainau waitrukta, —timiayi.

¹⁶Tamati Jesús ataksha iniak:

—Simónka, Jonása uchiriya ¿nekasmek anentam? —tu iniam Pedroka aimiak:
—Ja ai, Apuru, amesha nuka nekame. Wikia amin tuke pengker nintimtusan pujajme, —timiayi.

Tamati Jesús chicharak:

—Takumka wína uwijar ainau waitrukta, —timiayi.

¹⁷Nunia ataksha iniak:

—Simónka, Jonása uchiriya ¿nekasmek wína pengker nintimtursam pujam?
—timiayi.

Nujaingkia kempatam iniamu asa, Pedroka wake mesekmiayi. Tura ayaak:

—Apuru, ameka mash nekame. Wi amin pengker nintimisan pujajme tajame nuka nekasaintai tusam nekame, —timiayi.

Tamati Jesús aimiak:

—Takumka wína uwijar ainau waitrukta. ¹⁸Nekasan tajame: Ame natsa akumka wejmakrum entsaram, ame tuningsha wekaasatasam wakerakmeka pachitsuk wekainuyame. Turayatam juuntach wajasakminkia, ami kunturam kutsमारकमिन, chikich aints wejmakrumin antstamrartin ainawai. Tura ame nuni weta nakitamin waitminayat, amin achirmakar juramkiartinuitai, —timiayi.

¹⁹Nuna tusa Pedron: Tu mantamawarti-nuitai tusa ujaak timiayi. Tura tu jakam Yus pengker awajsatnuitme taku timiayi. Nunia Pedron ataksha chicharak:

—Tuke inaitutsuk nemartusta, —timiayi.

**Jesúsa aneetiri nuiniatirin
pachis chichasmauri**

²⁰Jesús tamati Pedro pajas jiiras winasha Jesúsán nemarai waitkamiayi. Turamtai wikia nekas Jesúsá aneetiri nuiniatiri asan, iisha Jesús jaatsaing, nijai iruntrar yuwakur pujarin, Jesúsnum

ayaamsan pujusan niin iniakun: “Apuru ¿amin anangkrama surutmaktata nusha yaachita?” timiajai.^o

²¹Tura nuna nintimias, Pedro pajas jiiras Jesúsán iniak:

—Apuru ¿jusha warukatnuki? —turutmiayi.

²²Tama wína pachitas Jesús Pedron ayaak:

—¿Amesha waruka ausha tame? Wi wakeraknaka, juka jatsuk pujaun tarimnawaitjai. Antsu ameka pachitsuk nemartusta, —timiayi.

²³Jesús tu tinu asamtai, chikich nuiniatiri ainau wína pachitsar: Nekasam jakashtinuitme turutin armiai. Antsu Jesúska: “Wi wakeraknaka juka jatsuk pujaun tarimnawaitjai,” turutmiayi, antsu jakashtinuitme turutanka turutchamiayi. Tura Pedron: —¿Amesha waruka ausha tame? —nunak timiayi.

²⁴Wikia Juankuitjai, Jesúsá nuiniatirin-jai. Ju papinasha aaru asan, mash nekasaintai tajai. Jesúsá aintsrishá nunisarang mash nekasaintai tinawai.

²⁵Tura Jesúsá turamuringkia untsurintai. Antsu ni turamuri kichik kichik aakrikia papi timiá untsuri aarminuitai. Timiá untsuri aarmaka mash nungkan-masha ukuschamin aminuitai. Maaketai.

Cristo Nuiniatiri Ainau Turamuri

Yuse Wakani akupkatnun pachis etserkamuri

1 ¹⁻²Wiitjai Lucasaitjai. Wína aneetir Teófilo: Wi yaanchuik amin papin akuptukmiajme nuna aaran, Jesús nayaimpinmaka watsuk ju nungkanam pujus ni turamurin pachisan, tura ni nuiniarmaurincha pachisan nu nangkam-taik nangkaman, nunaka mash aatramiajme. Jesús nayaimpinam waketkitas ni nuiniatiri ainaun: Wína chichamur etserkataram tusa, yaanchuik Yuse Wakani turata tinu asamtai, ni turatniurin pachis chichaman akatmam-ramiayi.^a

³Jesús waitnas jaka, nunia nantaki cuarenta (40) kintati ni nuiniatiri ainaun wantintukmiayi. Tura wantintuk paan: Iwiaakjai tukini wajamiayi. Tura Yus ni aintsri ainaun itiuir nawa nuna pachis chichasmiayi.^b

⁴Tura nuni iruntrar pujusar Jesús ni nuiniatiri ainaun chicharak:

—Juni Jerusalén yaktanam nakastaram. Turaram wína Apaachir ni Wakani pachis chichaman akupkama nuna umiatsaing-kia jiinkirap. Yuse Wakani atumi nintin piatramkatatui tusan, wi atumin ujakmiaj-rume nu nakastaram. ⁵Juan nekas aints ainaun entsanam imaimiayi. Antsu jumchik kinta arus Yus ni Wakanin atumi nintin piatramkatatrume, —timiayi.^c

Jesús nayaimpinam wakamuri

⁶Jesúsjai iruntrar pujusar, ni nuiniatiri ainau Jesúsán iniinak:

—Apuu ōIsrael ainauti Apuri yamaikiash atam? —tiarmiayi. ⁷Tinamtai Jesús ayaak:

—Atsa, warí kintatiya tura warí nantutiya wína Apaachir ni kakarmarijai turatata nuka pengké nekaachminui-trume. ⁸Antsu atumin Yuse Wakani engkemturma, Yus ni kakarmari suramsa-tatrume, tura asamtai juni Jerusalénnum pujusrum, nunia Judea nungkanam wekaakurmesha, nunia Samaria nungka-nam wekaakurmesha, nunia arák wekaakurmesha, mash nungka ainamunam wína pachitsaram etserkatnuitrume, —Jesús timiayi.^d

⁹Tamati Jesúsá nuiniatiri ainau jiiij wajainai, Jesús yakí nayaimpinam yurangmijai wakamtai nuniangka wainkacharmiayi.^e ¹⁰Jesús nayaimpinam wakamtai, ni nuiniatiri ainau tuke jiiij wajainai, aneachmau Yuse awemamuri jimiari aintsua tumau wejmakam pujun entsarinau nijai tsaniasar wajainaun wainkarmiayi. ¹¹Tura wainkaram nuka chicharinak:

—Galilea nungkanmaya ainautiram, ōwarukaya nayaimpisha timiá jiisha wajarme? Jesúska atumnia nayaimpinam waka nuka ataksha nunisang taratnuitai.

a 1.1 (Luc. 1.1-3) b 1.3 (Hech. 13.31) c 1.5 (Mat. 3.11; Luc. 24.49) d 1.8 (Mat. 28.19; Marc. 16.15; Luc. 24.47-48) e 1.9 (Marc. 16.19; Luc. 24.50-51)

Turamtai atum wainkamarme nunisru-mek ataksha wainkatnuitrume, —tiarmiayi.

**Matías Cristo chichamen
etserin ati timiauri**

¹²Nunia olivo muranmaya Jerusalénnum wakеткиarmiayi. Ayamtai kintati wekaasatin aya kichik kilómetrok arakchichu ayayi. ¹³Tura Jerusalénnum ni pujutirin jear, pata yakí amaunum wakarmiayi. Aints nuni wakarmia nuna naaringkia nu ainawai: Pedro, nunia Juan, nunia Santiago, nunia Andrés, nunia Felipe, nunia Tomás, nunia Bartolomé, nunia Mateo, nunia Alfeo uchiri Santiago, nunia Simón mesetan najanin aints, nunia Santiago uchiri Judas naartin, nu mash iruntrarmiayi.

¹⁴Nusha tuke Jesús a yachi ainaujai, tura Jesús a nukuri Maríjai, tura chikich nuwa ainaujai nuni Yusen seartas iruntrarmiayi.^f

¹⁵Chikich kintati aints ciento veinte (120) nuni iruntrar pujuinai, Pedro wajaki chichaak:

¹⁶⁻¹⁹—Yatsur ainautiram, anturtuktaram: Yaanchuik Jesús Judasan iijai metek wína nuiniatir ataram tusa, inaikiamu asa, ni takatrincha takakmasmiayi. Turayat aints ainaun Jesús an achikiarat tusa, jintan inakmasmiayi. Tura Judas tunau wajas Jesús an suruku asamtai, kuik waingkimujai ajan sumakarmiayi. Tura nu ajanam Judas kuntujen naekjai jingkiama tsekengki ayaarak, naekri put tsuraku asamtai, chapí ukuma ayaarak ampuje tishini saaki jakamiayi. Tu jakau asamtai, Jerusalénnum pujuinau nuna nekaawar, nu ajanka ninu chichamejai Acéldama inaikarmiayi. Nuka “numpa aja” taku tawai. Tura Yuse Wakani ii

juuntri Davidtan aantikramu asamtai Judaska akiintsang, David Judasan pachis aarmiayi.^g ²⁰Apu David yaanchuik papi Salmo tutainum tu aarmiayi:

‘Ni jeenka itarak atinuitai. Tura kichkisha ni jeenka pujuschartinuitai,’ tu aarmiayi.^h

Nunia ataksha:

‘Chikich aints ni takatrin takakmastinuitai,’ Judasan pachis tu aarmiayi.ⁱ

²¹⁻²²“Tu aarmau asamtai chikich aints Judasa takatrin takasat tusar inaikiami. Nu aintska nu nangkamtaik Juan Jesús an imiaamun wainkau asa, nunia ii Apuri Jesúsjai wekajin asa, nunia ni jakamunmaya nantakmiaurincha wainkau asa, tura nayaimpinam wakamurin wainkamia nu aintska Judasa takatrin takakmasat tusar inaikiami,” Pedro timiayi.^j

²³Tamati jimia aintsun inaikarmiayi. Chikich aintsun José Barsabás naartinun chikich naari Justo: Ju ati tusar inaikarmiayi. Turinamtai chikich ainausha Matías an inaikarmiayi. ²⁴⁻²⁵Nunia Yusen seinak:

—Ii Apuri Jesús, ameka aintsu nitingkia mash nekame. Tura asam Judas tunau asa, jaka wait wajaktinum weu asamtai, yáki ni takatrin takakmasat tusam, paan inakmasta, —tiarmiayi.

²⁶Nunia papin jimian jukiar, nu aintsu naarin papinum aararmiayi. Tura yana papiriya jiinkiti tusa uwejen engkea, kichik aints peakmiayi. Turamtai Matías a papiri jiinkimiayi. Tura asamtai Cristo nuiniatiri once (11) ainamunam Matías naka pachikarmiayi.

Yuse Wakani aints pujuinamunam tamauri

2 ¹Fiesta Pentecostés tutai tsawaaramtai, Cristo umirin ainauka mash Jerusalénnum iruntrarmiayi. ²Tura mash

iruntrar pujuinai, nasengka atsayat aneachmau nayaimpinmaya nase kakarman uutua tumaun jeanam iruntrar pujuinauka mash antukarmiayi. ³Nunia chikich chikich aintsu muuken jiya tumau kapaun wainkarmiayi. ⁴Tura nuni iruntrar pujuinaunaka Yuse Wakani mash piatkarmiayi. Tura nuni iruntrar pujuinaunka mash chikich aintsu chichamen nekachu ainaunak niish niish chichamtikiamiayi.^k

⁵Tura nu fiestanmaka judío Yuse umirin ainau mash nungkanmaya kaunkar Jerusalénnum pujuarmiayi. ⁶Tura aints ainau niish niish chichainam-tai, nuna antukar kautkarmiayi. Tura mash ninu chichamejaingkia chichainau asaramtai ¿warukang tina? tiarmiayi. ⁷Tura nekainachu asar shamkarmiayi, tura chicharnainak:

—¿Chikich chikich chichamjai chichaina auka mash Galileanmaya ainchaukai? ⁸¿Ausha warukinaku? Ii chichamencha chichatan nekachu ainayatcha, miatrusarang paan chichainausha antaji. ⁹¿Iikia mash nungkanmaya aints ainatsjik? Partianmaya, nunia Medianmaya, nunia Elamnumia, nunia Mesopotamianmaya, nunia Judea nungkanmaya, nunia Capadocianmaya, nunia Pontonmaya, nunia Asia nungkanmaya, ¹⁰⁻¹¹nunia Frigianmaya, nunia Panfiliannmaya, nunia Egipto nungkanmaya, nunia Libianmaya yakat Cirene tutai nuna nangkaikiar arák matsamin ainau, nunia Romanmaya judío ainausha, tura judíochou ainausha iiya nunisarang Yusen nekasampita tinausha irunji. Nuniasha Cretanmayasha, nunia Arabianmayasha irunji. Turayatrik Yus ni kakarmarijai tura nuka paan ii chichamejai mash chichainau antaji, —tunaiyarmiayi.

¹²Tura mash nintimrar shaminak: —¿Juka warimpita? —tunaiyarmiayi. ¹³Tura chikich ainau wishikinak: —¿Nampekar tinatsush? —tiarmiayi.

Pedro aints ainaun chicharkamuri

¹⁴Tu tinamtai Pedro chikich aints Cristo nuiniatiri ainaujai wajaki aints ainaun kakar chicharak:

—Judío ainautiram, Jerusalénnum mash matsamnutirmesha, wi taja nuka anturtukrum nintimrataram. ¹⁵Ju aints ainau nampekar tinawai, tu nintimtar me nuka nangkamrum tarume. ¿Tsaa yamai waakaisha itiru nampekarting? ¹⁶Antsu Yuse chichame etserin Joel naartin nuna pachis yaanchuik etserkamiayi. Ni etserkamuringkia tu aarmawaitai:

¹⁷Yus chichaak: Nungka amukatin jeatak wajamtai, mash aints ainamunam yumi yaranua nunisnak wína Wakantrunka akupkatnuitjai. Tura asamtai atumi uchirisha, tura atumi nawantrisha wína chichamrun etseriartinuitai. Tura natsa ainausha ni jijiaingkia winaka waitinachu wainiatnak, paan nintimtikartinuitjai. Nuniasha atumi juuntri wína pachitsar karamrurartinuitai.

¹⁸Tura wína inatir aishmang ainauncha, tura nuwa ainauncha wína Wakantrunka akuptuktinuitjai. Tura asamtai wína chichamrun etserkartinuitai. ¹⁹Tura yakí nayaimpinmayan shamrumtinun inakmastinuitjai. Tura nungkanmasha wainchati takatnaka inakmastinuitjai. Aints maaniamunam numpan nukap wainkartinuitai. Tura jisha nukap keenaun wainkartinuitai. Nunia mukunit nungkanam nukap atinuitai. ²⁰Tsaasha tsawai wainiat kajinratnuitai. Tura nantuncha numpa tumaun keaun wainkartinuitai. Nunia Yuse paaniurijai

tura ni kakarmarijai nu kintaka jeatnuitai. ²¹Antsu wína naarun pachitsar seatin ainauka uwemrartin ainawai.

Yuska tawai, Joel tu aarmiayi.^l

²²“Israel ainautiram, wi taja nuka anturtuktaram. Nazarenumia Jesús Yusen pengker awajsamia nuna pachisan yamaikia ujaktatjarme. Nu aintska atumjai pujus, Yuse kakarmarijai wainchati takatnasha, tura itiurkachmin au wainiat atum jiiμμαunum turamia nuka mash nekarme. ²³Turayatrum jakati tusaram, nu aintska achikrum, Yusen umirchau ainamunum numin ajintruwar maawarti tusaram surukmiarume. Jesús aints ainaun uwemtikratin asamtai, Yuska eemak mash nekau asa, nunaka turuwarti tusa tsangkamkamiayi.^m ²⁴Tura jatasha Jesúsán nepetkachmin asamtai, waitnas jakau wainiat, Yus niin jakamunmaya inankimiayi. Tura asamtai Yuse kakarmarijai jatancha nepetak nantakmiayi.ⁿ

²⁵“Ii juuntri Davidcha Jesús akiintsang, Jesúsán pachis tu armiayi: ‘Wína Apurun tuke wijai pujaun wainuyajai. Niisha wína untsurunini pujurtau asamtai, wikia pengké mengkaakashatjai.

²⁶Tura wína nintirun pujurtau asamtai waraajai. Tura pengker nintimsan chichaaknasha waraawarat chichaajai. Nunia nantaktinuapitja tau asan, jakancha pengker nintimsan ayamsatnua-pitja tajai.

²⁷Yusru, wína wakantrusha jakatniunmaka ukurtuschatnuitme. Tura ami inatiram nekas pengker asamtai, ni namangkesha kaurti tusamka tsangkam-rukchatnuitme.

²⁸Tura jinta tuke iwiaaku pujustinum jeatnuka inaktursatnuitme. Tura tuke

wijai pujau asam waramtikrustinuitme.’ David yaanchuik tu aarmiayi.^o

²⁹“Yatsur ainautiram: Ii juuntri Davidtan pachisan atumin paan ujaktasan wakerajrume. Nu jakamtai iwiarsarmiayi. Tura iwiarsamuri yamaisha tuke wainkatnuitai. ³⁰Nuka ukunam atiniun etsernuyayi. Tura asamtai Yus Davidtan chichaman yapajiachminun chicharak: ‘Nekasan tajame: Ami wearam Apu asa, aints ainaun inartinuitai,’ tu timiau asa nunaka nekaamiayi. ³¹Yaanchuik David nuna nekau asa, Mesíasan wainkawa nunisang ni nantaktintrin pachis: Wakanim jakatniunmaka ukukchatnuitme, tura ni namangkesha kaurti tusamka tsangkamkashtinuitme, tu aarmiayi. ³²Nu aintsun pachis David yaanchuik aarmia nuka Jesúsayayi. Yus Jesúsánaka nekas jakamunmaya inankimiayi. Turamtai iisha nu mash nekau asar: Nekasaintai taji. ³³Tura asakrin ii Apaachiri Yus: Wína Wakanur aints ainau akuptukta, Jesúsán tinu asa, Jesúsánaka jakamunmaya inankimiayi. Tura asamtai Jesús nayaimpinam waka, ni Apaachiri untsurinini pujus, ni Wakanin akupturmaji. Atumka yamai waintrume tura antarme nuka nuwaitai.^p ³⁴Tura nayaimpinam wakamia nuka Davidchawaitai. Tura asamtai David tu aarmiayi:

‘Yus wína Apurun chicharak: Apu keemtainum wína untsurunini keemsata.

³⁵ Wi ami nemasmin nepettsang juni ayaamsam pujusta.’ Tu aarma-waitai.

³⁶“Nu Jesúska numi winangmanum maamarme nunaka Yus: Apu ati tusa, tura Mesías ati tusa akupkamiayi. Israel ainautirmeka, nuka nekasampita tusaram,

mash pengker nekaataram,” Pedro timiayi.

³⁷Tamati nu etsermaun antukar wake mesekar, Pedron nunia Cristo nuiniatiri ainaun iniinak:

—Yatsur ainau ñiisha itiurkamnauki-taij? —tiarmiayi.

³⁸Tinamtai Pedro ayaak:

—Mash aints ainautiram, atumi yaanchuik nintimtai inaisakrumningkia, Yuska atumi tunaarinka sakturmarta-trume. Tura asa ni Wakani nekas pengker aa nuna atumniaka suramsatatrume. Tura asamtai Jesucristo umirkatasrum maataram. ³⁹Yus yaanchuik ni Wakanin pachis tímia nunaka atumin turamrume, nunia atumi uchirinha, tura mash nungkanam arák pujuinauncha nunaka tawai. Tura ii Apaachiri Yuska: Winar ataram tusa, aints ainaun untsuktas wakerau asa tawai, —Pedro timiayi.

⁴⁰Nu chichamnasha tura chikich chichamnasha untsuri aints ainaun ujakmiayi. Tura chicharak:

—Junia aints tunau turina nujaingkia kanakrum pujustaram, —Pedro timiayi.

⁴¹Tura asamtai nu chichamnasha antukar, nekasampita tinauka mainiarmiayi. Tura asamtai nu kintati kempatam warang (3,000) aints Cristonu wajasarmiayi. ⁴²Tura nu aints ainau mash Cristo nuiniatiri ainau nuiniarmia nuna antú pujuarmiayi. Tura mash iruntrar pujusar, Yusen sear Yuse misarin yuwararmiayi.

Nu nangkamtaik Cristo umirin ainau pujusmauri

⁴³Cristo nuiniatiri ainau nekashtai takatnasha untsuri turuwararmiayi. Tura Cristo kakarmarijai wainchati takatnasha untsuri turinamtai, aints ainau mash nintimrar shamkarmiayi. ⁴⁴Turinamtai Cristonu ainauka mash iruntrar pujusar-

miayi. Tura ninu aa nuna mash sunaisarmiayi. ⁴⁵Tura ninu aa nunasha mash surukar, ni ajarincha surukar, Cristonu ainau yuuminak pujuinaun kuikian susarmiayi.⁴

⁴⁶Tura kintajai metek Yus seatai juun jeanam iruntrarmiayi. Nunia Cristonu ainau jeencha kichik kichik wayaawar, nuni iruntrar pengker nintimtunisar warasar yuwararmiayi. ⁴⁷Tura Yus juuntaitai tiarmiayi. Tinamtai aints ainau mash Cristonu ainaun pengker nintimtiarmiayi. Tuminau asaramtai kintajai metek Yus aints ainaun uwemtikramiayi. Tura asamtai Cristonu ainauka kintajai metek yujararmiayi.

Aints wekaichau tsuwarmauri

3 ¹Chikich kintati tsaá nungkaanmatai, Yus seatai hora jeau asamtai, Pedro Juanjai Yus seatai juun jeanam Yusen seartas wearmiayi. ²Tura Waiiti Shiiram tutainum wayaawartas wearmiayi. Tura waiitinam jear, aints wekaichau nuni pujaun wainkarmiayi. Nu aintska akiinamunmaya tuke wekaichau asamtai, ni weari ainau kintajai metek Yus seatai juun jea waiitirin aints nuni waainaun: Wait aneasrum kuik surustaram titi tusar puusar ukukiarmiayi. ³Turinamtai aints wekaichau Pedron Juanjai wininaun wainak:

—Wait aneasrum, kuik surustaram, —timiayi. ⁴Tamati mai nu wekaichaun wainkar, Pedro chicharak:

—Jiirsata, —timiayi.

⁵Tamati nu aintska: ¿Warinak surustas taj? tusa jiiij pujurmiayi. ⁶Tu nintimias jiiij pujuram, Pedro chicharak:

—Kuikiarka atsawai. Tura kurisha atsawai. Antsu nuna nangkamasang timiá pengker aa nuna susatjame. Nazaret-numia Jesucristo kakarmarijai wajakim wekaasata tajame, —timiayi.

⁷Nuna tusa Pedro ni untsur uwejejai tap achik awajkiyai. Turamtai nawesha, tura wanusesha kakaram wajasmiai. ⁸Turam ayaatsuk wajaki, wekaatan nangkamamiyai. Nunia Pedrojai, tura Juanjai iruntrar Yus seatai juun jeanam waya ming ming wajak: Yus kakarmaitai timiayi. ⁹Tamati aints mash nuni kaunkaru ainu niin wekaun wainkarmiai. Tura ni chichaamurin anturkarmiai. ¹⁰Tura nintimsar shamina:

—Ju aintska Yus seatai juun jeanam Waiiti Shiiram tutainum tuke aintsu kuikiarin seama pujuya nuwaapita, —tiarmiayi.

Jea tesaamurin Salomón jeamkamunam Pedro aints ainaun chicharkamuri

¹¹Tu tinamtai nu aintska Pedrojai tura Juanjaisha kanatsuk nijai tsanias Yus seatai juun jea tesaamurin Salomón jeamkamia nuni wajainamtai, aints ainu nuna wainkaru asar, nuni ampukiar weriarmiayi. ¹²Tuminamtai Pedro aints kaunkarun chicharak:

—Israel ainautiram ¿warukaya miatcha nintimrume? ¿Tura warukaya miatcha jiiokratrume? Ii kakarmarijaingkia juka tsuwarchaji. ¿Ii pengker asarik tsuwaraij? ¹³Antsu ii juuntri Abrahama Yusri, tura Isaaca Yusri, tura Jacobo Yusri ii Yusri asa, ni uchirin Jesúsán: Nekas ameketme juuntam tiarat tusa pengker awajsamiayi. Tura waininayat atumi juuntri ainu: Jesúsna maawarat tusar, Pilatonam surukarmiai. Nuni atum kaunkaram, Pilatoka: Jesúsán jiiin akupkatjash, tau wainiatrum surimkamiarume. ¹⁴Jesúska tunaarinchau tura timiá pengker pujau wainiatrum, atumka nakitramiarume. Antsu mangkartin aintsun jiiiki akupkati tusaram, Pilato seamiarume. ¹⁵Nu turau

asaram, tuke iwiaaku pujustinun sukartin amia nuka maamiarume. Tura wainiat Yus niin jakamunmaya inankimu asa, yamaikia iwiaakuitai. Tura asamtai iikia nu wainkau asar etserji.⁷

¹⁶“Tura Jesús nekasampita tinu asakrin, ni kakarmarijai Jesús ju wekaichaunka nekas pengker tsuwari. Turamtai atumka ju turamuka mash wainkarume.

¹⁷“Yatsur ainautiram, antuktaram. Atumka atumi juuntri ainaujai Jesús turamiarme nuka Yuse uchirintai tutsuk turamiarme. ¹⁸Tura yaanchuik Yuse chichamen etserin ainu: Yus akupkamu Mesías tutai wait wajaktinuitai tusa, ni chichamen etsernun Yus nunaka aamtikramiai. Tura asamtai atum Jesús mau asaram, nu chichamka umikuitrume. ¹⁹Tura asaram atumi yaanchuik nintimtairingkia yapajiam atumi tunaari Yus sakturat tusaram seataram. Nu turakrumningkia atumi tunaarinka sakturmatarume. Tura atumniaka angka awajtamsatarume. ²⁰Tura Yus yaanchuik: Atumi Apuri ati tinu asa, ni uchirin Jesúsán ataksha akupturmaktinuitrume. ²¹Turayat Yus mash aa nuna yamarman najantsaing, Jesucristo yamaisha nayaimpinam pujustinuitai. Yuse chichame etserin ainu paan nintimin asar yaanchuik: Yus turunatnuitai tu tinu asaramtai, Yus mash aa nuna ataksha yamarman najanatnuitai. ²²Tura asamtai Moisés ii juuntri ainaun chicharak: ‘Ii Apuri Yus atumi aintsrin wiya nunisang kichkin akupturmak: Nuka wina chichamrun etserin ati tusa, atumin akupturmaktinuitrume. Nu atumin turamtiata nuka mash umirkatarum. ²³Tura nu Yuse chichamen etsernun umirtsuk pujuinauka Yusnu ainuajaingkia iruntrarchatnuitai, antsu tuke mengkakartinuitai,’ Moisés tu aarmiayi.

²⁴“Nunia Yuse chichame etserin Samuelsha nunisang yamai turatnun pachis yaanchuik etserkamiayi. Nunia chikich Yuse chichame etserin ainausha yamai turatnuncha pachisar mash etserkarmiayi. ²⁵Ilisha yaanchuik Yuse chichame etserin armia nuna wearinji. Tura asakrin Yus atumin pengker awajtamsatas wakerau asa, Abrahaman chicharak: ‘Kichik ami wearam akiinatata nuka mash nungkanam pujuinaun pengker awajsatnuitai,’ timiayi. Tu tinu asamtai atumsha Abraham weari asakrumin, Yus atumin pengker awajtamsatas wakerutmarme. ²⁶Tura ni Uchirin atumin akupturmak: Atumi tunaui mash inaisataram tusa, atumin pengker awajtamsatas ni Uchirin eemak akupturmakmiarume,” Pedro timiayi.

Pedro Juanjai apu iruntramunam jukimuri

4 ¹⁻⁴Pedro Juanjai aints ainaun tuke chicharinak wajainai, aneachmau sacerdote ainai, tura Yus seatai jea wainu juuntrisha, tura saduceo ainausha kaunkarmiayi. Tura kaunkar anumrukar Pedro Juanjai aints ainaun nuininak wajainaun antukarmiayi. Pedro Juanjai aints ainaun nuininak: Jesús jakamunmaya nantakin asamtai, aints ainautisha jakayatrik nantaktinuitji tinai asaramtai kajerarmiayi. Tura Pedron Juanjai achikiar, tsaanungka wajasu asamtai: Kashin chichamsha nekarami tusar kársernum engkewarmiayi. Turinamtai aints untsuri Pedro Juanjai Yuse chichame etsermaun antukaru ainai nu kintatik aishmangkuk aishmangkuk cinco warang (5,000) Criston nekasampita tusar nemarkarmiayi.

⁵Kashin tsawaarar Jerusalénnum judío apuri ainai judío juuntri ainaujai, tura Moisésa chichame nuikiartin ainaujai

iruntrarmiayi. ⁶Tura sacerdote apuri Anás naartin, nunia Caifás, nunia Juan, nunia Alejandro, nunia sacerdote apuri wearisha mash iruntrar pujuarmiayi.

⁷Tura aintsun akuptukar Pedron Juanjai itaarmiayi. Tura japen awajsar chicharinak:

—¿Yana kakarmarijia tura yana chichamejia atumsha aints wekaichausa tsuwarumarume? —tu iniasarmiayi.

⁸Tu iniinam, Pedro Yuse Wakani piatkamu asa ayaak:

—Israela apuri ainautiram, juun ainautirmesha antuktaram. ⁹Aints wekaichau pengker awajsamu pachisrum çitiur tsaarma? tusaram, iincha iningkratu asakrumin, ¹⁰atumin paan ujaktatjarme. Israel ainautirmesha nusha mash paan nekaataram tusan tajarme: Ju aintska nuwik wekaichau pujuya juka yamaikia pengker wajasu wainkarume juka Nazaret-numia Jesucristo kakarmarijai tsaari.

Atumka Jesucristo numi winanganam ajinkaram maamiarume, tura wainiat Yus ataksha jakamunmaya inankimia nuna kakarmarijai tsaari. ¹¹Atumka jea jeamnua tumawaitrume. Antsu Jesúska kaya juunta tumawaitai. Ju kayaka nekas pengker au wainiatrumek, atumka jea jeamnutiram: Nuka paseetai tusaram japamiarume. Antsu Yuska: Nu kayaka timiá pengkeraitai timiayi. Jesús atumniaka uwemtikramratas wakerau wainiatrumek atumka tsuutramiarume. ¹²Tura chikichinum tunaunomia uwemratnuka pengké atsawai. Mash nungka ainamunam chikicha naari pachisar uwemratnuka atsau asamtai, iin uwemtikramratnuka aya Jesucristoketai, —Pedro timiayi.⁸

¹³Pedro Juanjai shamtsuk tu chichainamtai, apu ainausha nuna antukar:

—¿Warukaya nuimiarchau ainayatcha, tura mianchau ainayatcha, timiá

shamkartutskesha chichainawa? —tunai-yarmiayi. Tura Jesúsjai iruntrar nukap pujusaru asar, tu chichainawai tusar nekaawarmiayi. ¹⁴Tura aints tsuwarmau nuni wajaun wainkau asar, chicharkatat-kamawar tujinkarmiayi. ¹⁵Tura jiiktaram tinam, Pedroncha tura Juannasha tura aints tsaarmia nunasha jiikiarantai, nunia kanakar pujusar chichainak:

¹⁶—¿Ju aints ainausha itiurkatjik?

Jerusalénnum pujuinau mash nu aintsun tsuwarchanniau waininayat tsuwarmaurin nekainawai. Tura asaramtai: Waitaitai tichamawaitji. ¹⁷Antsu aints ainu Jesúsán pachisar etserkarai tusar, yamaikia jiyakar: Nu aintsu naari pachisrum aints kichkisha ujakairap, tu chicharkami tiarmiayi.

¹⁸Nunia wayaawarti tusar, ataksha untukarmiayi. Tura Pedro Juanjai wayaawaramtai:

—Yamaikia Jesús pachisrumka aints kichkisha pengké ujakairap. Tura nu aintsu chichame pengké nuiniarairap, —tu chicharkarmiayi. ¹⁹Tinamaitiat Pedro Juanjai aiminak:

—¿Atum umirkatasar Yus umirtsuk pujusminkai? ¿Yus nunasha wakerawak? Atumek nintimrataram. ²⁰¿Li wainkamji nu tura ii antukmaji nu pachisar chichatsuk pujusminkitaij? —tiarmiayi. ²¹⁻²²Tinamtai nu aintska cuarenta (40) musach wekaichau pujuutiat, aneachmau tsuwarmau asamtai, aints ainu nuna nekaawar Yusnaka maaketai tiarmiayi. Tu tinamtai apu ainu Pedron tura Juannasha awatratai tinayat, aints ainaun shamkaru asar, aya chicharinak:

—Yamaikia waketkiram nu aints pachisrum etserkurminkia awatratat-jirme, —tusar akupkarmiayi.

Cristonu ainu Yuse kakarmarin seamuri

²³Tu akupkamu asar, Pedro Juanjai jiinkiar, Cristonu ainu pujuinamunam

waketkiar: Sacerdote apuri ainu tura Israela juuntri ainu tu chichartamkamji tusar ujakarmiayi. ²⁴Tu ujinam nuna antukar, mash iruntrar Yusen seainak:

—Apuru, ame nayaimpisha, tura nungkasha, tura juun entsasha waring achat mash amek najanawaitme. ²⁵Ami Wakanim nekas pengker aa nu ami inatiram David engketam tu aamtikramiame.

‘¿Waruka Yusen umirchau ainu Yusen kajerkar shininawa? ¿Tura warukaya nangkamarsha nintiminawa?

²⁶ Mash nungkanmaya apu ainu aintsun inau ainaujai kaunkar, Yus apu ati tusa akupkamu waininayat niin kajerinawai.’^t

²⁷“Tu aamtikramiame nuka nekasaintai. Ami uchiram Jesús akupkam: Wina Uchir asam aints ainu inarta tusam akupkamiame. Tura asakmin apu Herodes, romano apuri Poncio Pilatojai, tura chikich nungkanmaya aints ainaujai, tura Israel ainautijai ju yaktanmasha iruntrartas kaunkarmiayi. ²⁸Tura asaramtai: Nu turunatnuitai, tinu asakmin nu chichamnaka mash umirkarmiayi.”

²⁹“Apuru, yamaisha iincha kajertaminaji nusha jiisarta. Iikia ami inatiram asar, pengké shamkartutsuk aminu chichamem etserkatasar wakerau asakrin kakarmaram sukartusta. ³⁰Ami kakarmarmijai jau ainauncha tsuwararat tusam, tura ami Uchirmi Jesúsá naari pachisar wainchati takatnasha takasarat tusam, tura aintska itiurkachminun turuwarat tusam kakarmaram sukartusta,” tu Yusen searmiayi.

³¹Yusen tu seainamtai, mash iruntrar pujuinamunam uuya tumau jean peakmiayi. Turamtai Yuse Wakani nuni iruntrar pujuinaunaka mash piatkarmiayi.

Tura asar shamtsuk Yuse chichamen etserkarmiayi.

Cristonu ainauka: Mash iinuitai timiauri

³²⁻³³Cristo nuiniatiri ainau Yuse kakarmarijai ii Apuri Jesúsa nantakmiaur-in pachisar tuke etserkarmiayi. Turinamtai Yus nincha nukap yaingmiayi. Turamtai Cristo umirin ainau mash metek nintimtunisarmiayi. Aints kichkisha: Winar aa nuka winaruketai ticharmiayi, antsu mash iinuitai tiarmiayi. ³⁴Tura asamtai kichkisha yumakcharmiai. Ajartin ainausha ni ajarin surukar, tura jeentin ainausha ni jeen surukar, nujai kuikian jukiar, ³⁵Cristo nuiniatiri ainaun susarmiayi. Turinamu asar yutan yuuminak pujuinaun kichik kichik ni yuumamurincha susarmiayi.^v

³⁶⁻³⁷Turinamtai Levita aints José naartin, isra Chipre tutainun akiinamia nuka Cristonu asa ni nungkarin suruk, kuikian itaa, Cristo nuiniatiri ainaun susamiayi. Tura asamtai Cristo nuiniatiri ainau nu aintsun Bernabé inaiarkiarmiayi. Nuka wait anengkratin taku tawai.

Ananías ni nuwarijai tunau turamuri

5 ¹Tura chikich aints, Ananías naartin, ni nuwari Safirajai ni nungkari amia nuna surukarmiayi. ²Tura Ananías kuikian imiajapen akanak chikich akankamun juki, Cristo nuiniatiri ainaun weri: Juketai tusa, ni nawenini pujtusmiayi. Tura nuwarisha nunaka mash nekaamiayi. ³Turamtai Pedro chicharak:

—Ananías, Yuse Wakani anangkatas-mesha ¿waruka iwianchi apuri Satanás nintirun engkemati tusamsha tsangkama-kume? Nungkarmeka surukam kuik imiajapen akankam jukiyatmesha

¿waruka juketai tame? ⁴Nungkaka surachkumka aminu ayayi. Tura nu nungka surukam, kuik jukim nusha nunisang aminu ayayi. ¿Warukaya nekas chicham aa nu ujatsuksha, wait chichaman ujaktaj tusamsha nintimrutme? Ameka aints ainaun wait chichaman ujaktaj tayatum, nekas Yus anangkatasam wait chichamka etserme, —Pedro timiayi.

⁵⁻⁶Tamati Ananías nuna antú wajayat jaak ayaarmiayi. Turamtai natsa ainau wayaawar, jaka tepaun kangkarmarmiayi. Tura iwiarsatai tusar jukiarmiayi. Turinamtai aints ainau nuna nekaawar mash shamkarmiayi.

⁷Kampatam hora nangkamaramtai, Ananías nuwari, aishri jakaunaka nekatsuk wayaamiayi. ⁸Wayamtai Pedro chicharak: —¿Atum nungka surukrumsha, nekasrumek jukek jukimiarum? —tu iniam nuwasha aimiak:

—Ja ai, juketai, —timiayi.

⁹Tamati Pedro chicharak:

—¿Warukaya aishrumjai Yuse Wakani anangkatasrumsha wakerukmarume? Ami aishrumin iwiarsartas wearma nuka waitinam wayaawartas wininawai. Au jiista. Au winina au amincha iwiartam-sartas winitraminawai, —timiayi.

¹⁰Tamati arutsuk Ananías nuwari Safira naartin Pedro nawen ayamas jaak ayaarmiayi. Turamtai natsa ainau wayaawar, nuwa jaka tepaun wainkar jukiar, aishri iwiarsamunam yamsar iwiarsarmiayi.

¹¹Turuwaramtai Cristonu ainausha mash nukap shamkarmiayi. Tura chikich aints ainausha nu turunamun antukar nusha nunisarang nukap shamkarmiayi.

Wainchati takat untsuri Yuse kakarmarijai turamuri

¹²Tura Cristonu ainau Yus seatai juun jeanam wayaawar, metek nintimsar

chikich tesaamu Salomón jeamkamunam tuke mash kaunkarmiayi. Turinamtai Cristo nuiniatiri ainau wainchati takatnasha, tura aints ningkikia turachminun untsuri Yuse kakarmarijai turuwarmiayi.

¹³Tura Cristonauchu ainau nunaka pengkeraitai tinayat, Cristonu ainaujai iruntraratakamawar shamiarmiayi.

¹⁴Tura aishmang ainausha nunia nuwa ainausha untsuri ii Apuri Cristonka nekasampita tiarmiayi. Tura asar Cristonu ainauka untsuri yujarmiyai.

¹⁵Tura Cristo nuiniatiri ainau turamurin nekaawar, jau ainaun jeanmaya aanum jiikiar, tepetinmasha tura washimnumsha puusar, Pedro nangkamak ni mikinrijai tsuwarti tusar, jau ainaun jintanam pujtusarmiayi. ¹⁶Nunia chikich yaktanmaya ainausha arakchichu pujuinau asar, jau ainauncha tura iwianchruku ainauncha Jerusalénnum itaarmiayi. Tura itaaram mash pengker wajasarmiayi.

Pedro Juanjai wait wajakmauri

¹⁷Tura asamtai sacerdote apuri chikich sacerdote ainau saduceo tutajjai iruntrar Cristo nuiniatiri ainaun suwirpiaku jiinak: ¹⁸Kársernum engkeataram tusar, ni aintsri ainaun akatrar akupkarmiayi. Akupkamu asar, achikiar tunau aints engketinam engkewarmiayi. ¹⁹Turuwaramtai Yuse awemamuri kashi tari, kársera waitirin urak, Pedron Juanjai jiiki chicharak:

²⁰—Yamaikia jiinkiram, tsawaarum Yus seatai juun jeanam wayaaram, nuni wajasrum aints ainau Yusnum tuke iwiaaku pujustin chicham ujaktaram, —timiayi.^w

²¹Tamati Pedro Juanjai miatrusarang umirkarmiayi. Tura tsawaaramtai, Yus seatai juun jeanam wayaawar, Yuse

chichame nuikiartutan nangkamawarmiayi.

Tuminai Cristo nuiniatiri karsernumia jiinkinun nekachu asar, sacerdote apuri ni aintsri ainaujai: Judío apuri ainausha mash kaunkarti tusar untsukarmiayi. Tura mash kaunkaramtai chichainak:

—Jesúsa nuiniatiri ainau karsernumia jiikrum itataram, —tusar ni aintsrin akupkarmiayi. ²²Akupkamu asar, kársernum jear nuni wayaawar Cristo nuiniatirinka waintsuk, judío juuntri iruntramunam wakеткиarmiayi. ²³Tura chichainak:

—Iikia kársernum jear, waiti tuke yawikmau jeamji, tura kársera nakausha aanum wajatinau jear, tura urakar wayaar kichkisha engketu wainkachji, —tiarmiayi.

²⁴Tinamtai sacerdote apuri, tura Yus seatai juun jea wainu apuri, tura sacerdote juuntri ainausha nuna antukar:

—Maj čnusha tuning wainkaintaj? —tu nintimrarmiayi. ²⁵Tu nintimsar pujuinai, chikich aints taa chichaak:

—Aints ainau atum kársernum engkeamarme nuka Yus seatai juun jeanam wajasar aints ainaun nuininawai, —timiayi.

²⁶Tamati juun jea wainu apuri ni aintsrijai jiismi tusar juun jeanam wearmiayi. Tura nuni jear, Cristo nuiniatirin wainkar, aints ainau iin kayajai tukurmiarai tusar, pasé awajtsuk itaarmiayi. ²⁷Tura judío apuri iruntrar pujuinamunam itaar jafen awajarsamtai, sacerdote apuri chicharak:

²⁸—Iikia atum chicharkur: Nu aintska pachisrum pengké nuiniatsuk asataram tusar, akupkamjarme nuka antutskesha, nu nuiniamuka pachitsuk Jerusalénnum mash antukarti tusaram tuke nuikiartarme. Tura atumka: Nu aintska

maarume tusaram, chikich ainausha pasé nintimtikratasrum wakerarme, —timiayi.^x

²⁹Tamati Pedro Cristo nuiniatiri ainaujai aiminak:

—Aints ainauka umirtsuk Yusek umirkamnawaitji. ³⁰Atumka Jesúska achikrum numinam ajintaram maamarume. Tura wainiat ii juuntri ainou Yusri Jesúsna ataksha inankimiayi. ³¹Tura nayaimpinam yakí iwiak, Israel ainauti nintimaurin yapajiakrin, ii tunauringha sakturmartas ii aintsritin inatmin tura uwemtikin ati timiau asa, yamaikia Yuse untsurinini pujawai. ³²Iikia mash nu nekau asar etserji. Tura Yuse Wakanin ni umirkaru ainaun Yus sua nuka: Tu chichastaram tusa iinka chichamtikramji, —tiarmiayi.

³³Tinamtai judfo juuntri ainou nukap kajerkarmiayi, tura Cristo nuiniatiri ainauka maawartak wakierarmiayi. ³⁴Turinamtai chikich fariseo aints, Gamaliel naartin, nu iruntramunam pujumia nuka Moisésa chichamen nuikiartin asamtai, aints ainou niincha pengker anturin armiayi. Tura asamtai judfo juuntri iruntrar pujuinamunam wajaki, Pedroncha tura Juannasha pachis: Nu aints ainou jiiiktaram tama aanum jiiikiarmiayi. ³⁵Nunia Gamaliel judfo juuntri ainou chicharak:

—Israel ainautiram, atum ju aints turatai tu nintimrume auka aneartaram.

³⁶¿Atumka aints Teudas naartin aneaktsurmek? Nu aintska: Wikia juuntaitjai tamati, cuatro pachak ainou niin nemarkarmiayi. Tura niin mainamtai, ni nemarnuri ainouka mash tupikiakiar ni jeen waketkiar kanakar pujusarmiayi. ³⁷Nunia ukunam aints ainou naarin papinum aatramunam chikich Galileanmaya aints, Judas naartin

tamia nuna aints untsuri nemariarmiayi. Tura niincha mainamtai, ni nemarnuri ainouka mash tupikiakiarmiayi. ³⁸Tura asamtai au aintska inaisataram tajarme. Au aints turina nusha ningki nintimsar turinakka, ningki inaisartatui. ³⁹Tura Yus au aints ainou: Nu turataram tamatikia, atumka au aints ainouka nepetkatatkamarum tujinkatnuitrume. Tura asaram aneartaram. Nu inaiyachkurmeka Yusjai maaniktinuitrume, —Gamaliel timiayi.^y

Tamati miatrusarang umirkarmiayi. ⁴⁰Nunia Cristo nuiniatirin untsukar awatrararmiayi. Nuna turuwar chicharinak:

—Jesúsa naari pachisrum chichamka pengké etserkairap, —tusar akupkarmiayi. ⁴¹Akupkaram Cristo nuiniatiri judfo juuntri iruntramunmaya jiiinkiar weenak: Jesúsa naari pachisar inatsaartinun Yus iin tsangkatramkamji tusar warasarmiayi. ⁴²Tura warasar kintajai metek Yus seatai juun jeansam wayaawar, nunia chikich aintsu jeencha wayaawar, tuke inaitsuk Cristo Jesúsán pachisar nuiniararmiayi, tura Yusnum uwemratin chichamnasha etseriarmiayi.

Cristo umirin ainou yaingtinun siete aints inaikiamuri

6¹Jumchik arus Cristo umirin ainou nukap yujaru asaramtai, griego chichame chichainou chikich hebreo chichame chichainoujaj kajernaikiarmiayi. Tura hebreo chichamen chichainou jiyainak:

—Waje ainou yuumamuri kinta metek suayatrumsa ¿waruka waje griegon chichainousha yuumamuri metek sutsuksha pujarme? —tiarmiayi. ²Tura asamtai Cristo nuiniatiri doce (12) armia nuka: Cristonu ainou mash kaunkarat tusar untsukarmiayi, nunia mash kaunkaramtai chicharnainak:

—Aintsu yuumamuri susatasar, Yuse chichame etsertsuk pujakrikia napchawaitai. ³Tura asamtai yatsur ainautiram, atumka pengke aints nintip Yuse Wakani piatkamu ainau siete (7) eaktaram, tura nuka aints ainau yuumamuri susarti tusaram inaikiataram. ⁴Turakrumin iisha tuke inaitsuk Yus seakur, tura Yuse chichame etserkur pujustatji, —tiarmiayi.

⁵Tinamtai Cristonu ainau mash nuna antukar: Pengkeraitai tiarmiayi. Tu tinau asaramtai, Estebankan nu takatan takakmasti tusar inaikiarmiayi. Estebanka Criston miatrusang umirnu-yayi. Nusha Yuse Wakani piatkamuyayi. Nunia Felipencha, nunia Prócoroncha, nunia Nicanornasha, nunia Timónasha, nunia Parmenasnasha, nunia Antioquía nungkanmaya aintsun, Nicolás naartinasha nu takatan takakmasarti tusar inaikiarmiayi. Nu aintska judíochutiat judíowa nunisang Yusen nemarkauyayi.^z

⁶Nuniasha nu aints ainaun Cristo nuiniatiri pujuinamunam itaarmiayi. Itaaramtai Cristo nuiniatiri ainau ni uwejejai nu siete (7) aintsu muuken achirkar: Ni takatrin Yuse kakarmarijai takakmasarti tusar Yusen seatiarmiayi.

⁷Tura Yuse chichamen etserkaru asaramtai, aints ainau untsuri nuna antukaru asar, Cristonu ainau Jerusalénnum nukap yujararmiayi. Tura sacerdote ainausha untsuri Criston nekasampita tiarmiayi.

Estebankan achikmauri

⁸Tura Yuse Wakani Estebanka nintin piatkamu asa, aints ainaun wait aentak pengker awajsamiayi, tura wainchati takatan ningkikia turachminun Yuse kakarmarijai turamiayi.

⁹Tura chikich aints ainau Estebankan: ¿Warukaya Cristosha umirume? tusar

iniasartas weriarmiayi. Nu aints ainau iruntai jeanam, Angkan Ainau Iruntai Jea tutainum tuke iruntrarmiayi. Nu iruntai jeanmasha Cirene nungkanmaya ainau, tura Alejandría nungkanmaya ainausha, tura Cilicia nungkanmaya ainausha, tura Asia nungkanmaya ainausha nuni iruntrarmiayi. ¹⁰Tura Estebankan Yuse Wakani piatkamu asa, Yus ni nekamtai susamu asamtai, nunia aints ainau ni chichamejaingkia nepetkatatkamawar nepetkacharmiayi. ¹¹Tura asaramtai Estebankan suwirpiaku jiisar, chikich ainaun wainkar, kanakar pujusar kuikian susar:

—Atumka tsanumkuram chicharkuram: Au aintska Moisésan pachis pasé chichasmayi, tura Yusen pachis pasé chichasmayi titaram, —tusar akikiarmiayi. ¹²Tu tinam, tsanumin ainau: Ayu tusar, chikich aints ainaun, tura ni juuntri ainauncha, tura Moisésa chichame nuikiartin ainauncha Estebankan pachisar pasé nintimtikrarmiayi. Nunia Estebankan achikiar judío apuri iruntrar pujuinamunam jeeniarmiayi. ¹³Tura jeeniaramtai chikich aints ainaun: Estebankan pachisar wait chichaman etserkarat tusar itaarmiayi. Turinamtai nuka waitrinak:

—Auka Yus seatai juun jean nekas pengker aa nuna pachis tuke itiattsuk pasé chichasmayi, tura Moisés umirkatin chichamnasha pachis tuke pasé chichasmayi. ¹⁴Tura chichaak: Nazarenumia Jesús Yus seatai juun jean yumpungtatui, tura Yus Moisésnum chichaman iin akupturmakmaji nuna yapajiatatui timiayi, —Estebankan tsanuminak tiarmiayi.

¹⁵Tinamtai judío apuri iruntramunam pujuinaka Estebankan jijj pujuriarmiayi, tura Estebanka yapiin Yuse awemamura tumaun wainkarmiayi.

Esteban Yuse chichamen etserkamuri

7 ¹Tura Estebankan wainkar sacerdote apuri iniak:

—¿Ju amin pachitmasar turamina nuka nekaskai? —timiayi.

²Tama nisha ayaak:

—Juun ainautiram yatsur ainautirmeha antuktaram. Ii juuntri Abrahamata turamuri nintimrataran. Ii juuntri Abraham Harán nungkanam weatsaing, Mesopotamia nungkanam pujamtai, ii Apaachiri Yus nekas pengker aa nu niin wantintukmiayi. ³Tura Yus chicharak: ‘Ame nungkarminia jiinkim, ami wearam ainau ukukim, chikich nungkanam wi inaktustatjame nuni weta,’ timiayi.^a

⁴‘Yus tu timiau asa, Abraham Caldea nungkanmaya jiinki, Harán nungkanam pujustas wemiayi. Nunia ni apari jakamtai, Yus Abrahaman: Chikich nungkanam weta timiau asa, atumi nungkari yamai atum pujarme juni tamiayi.^b ⁵Antsu nungkanka jumchiksha susachmiayi. Tura uchin kichkisha yajutmachu wainiat, Yus chicharak: ‘Ame jakakmin ami wearmin ju nungkan susatnuitjai,’ timiayi.^c

⁶‘Tura Yus chicharak: ‘Ami wearam ainau nukap yujarar, chikich nungkanam pujusartinuitai. Tura nuni pujasar, chikich nungkanmaya ainau inatiri asar, cuatro pachak musach wait wajakartinuitai. ⁷Tura ami wearmin wait wajakartinuiun suwinaunka wisha wait wajakartinuiun susartinuitjai. Nunia ami wearam nu nungkanmaya jiikiaran, ju nungkanam wina umirtukartinuitai,’ Yus timiayi.^d

⁸‘Nunia Yus Abrahaman chicharak: ‘Wina chichamur umirtukta. Juwaitai wina chichamruka: Aishmang ainau

akiina ocho (8) kinta nangkamaramtai, nuwapchiri mash charutkataram. Ami wearam wina aintsur asar, tuke inaitsuk ju akupamurun umirtukarti,’ timiayi. Tu timiau asa, Abrahamata uchi Isaacakiinamuri ocho (8) kinta nangkamaramtai, Abraham ni uchi nuwapchirin charutkamiayi. Nunia Isaacata uchi akiinamtai, nusha nunisang turamiayi. Tura Jacobshata nunisang turamiayi. Jacobo uchi doce (12) amia nuka yaanchuik ii juuntri armiai.^e

⁹‘Tura ii juuntri ainau Jacobo uchi armia nuka ni yachiin José suwirpiaku jiinau asar: Egipto inatiri ati tusar surukarmiayi. Tura wainiat Yus Joséneka pengker awajsamiayi.^f ¹⁰Tura José iturkachmin pujau wainiat Yus niincha uwentikramiayi, tura ni nekamtairincha susamiayi. Tura Egipto apuri faraón tutai niin pengker awajsati tusa Yus wakerumtikiamiayi. Tura asamtai faraón Joséneka Egipto nungkarin tura ni aintsri ainauncha mash wainin ata tusa inaikiamiayi.^g

¹¹‘Nunia Egipto nungkanam, tura Canaán nungkanmasha tsuka amatai, Canaán nungkanam pujuinau nukap wait wajakarmiayi. Tura tsuka nukap au asamtai, ii juuntri yutan wainkartatkamawar wainkacharmiayi. ¹²Tura ii juuntri Jacob: Egipto nungkanam trigo awai tamaun antuk, ni uchi ainaun: Nuni werum trigo sumaataran tusa akupkamiayi. Turamtai wear yutan sumakar waketkiarmiayi.^h

¹³‘Nunia ataksha: Yurumak sumaktai tusar taaramtai, José ni yachí ainaun: Wikia atumi yachiinjai tusa nekamtikiamiayi. Turamtai faraón: Joséka Israela wearintai tusa nekaamiayi.ⁱ ¹⁴Turamtai

a 7.3 (Gén. 12.1) b 7.4 (Gén. 12.4) c 7.5 (Gén. 12.7) d 7.7 (Gén. 15.13-14)

e 7.8 (Gén. 17.10-14) f 7.9 (Gén. 37.11, 28) g 7.10 (Gén. 41.39-41) h 7.12 (Gén. 42.1-2)

i 7.13 (Gén. 45.1, 16)

José ni yachí ainaun chicharak: Wína apar ni weari ainaujai setenta y cinco (75) aints mash juni itataram tusa akupkamiayi.^j

¹⁵“Turamtai Jacob ni weari ainaujai Egipto nungkanam wearmiayi. Tura Jacobsha, tura ni uchiri ainausha mash juunmarar nuni jakarmiayi.^k ¹⁶Nuni jakaramtai nukap arus, ni weari ainau José kunchinka jukiar, Siquem nungkanam iwiarsarmiayi. Abraham: Ii weari nuni iwiarsami tusa, nungka Hamora uchirinu amia nuna ni kuikiarijai sumaku asamtai, nuni iwiarsarmiayi.

¹⁷“Tura Yus Abrahaman: Wisha ami wearmin nukap yujratnuitjai timia nu kinta jeatak wajasamtai, ni weari ainau Egipto nungkanmaka nukap yujararmiayi. ¹⁸Nukap yujararai, chikich apu Josén wainchau Egipto apuri amiayi.^l ¹⁹Nuka ii juuntri ainaun anangka pasé awajsamiayi. Tura: Israela uchiri jakarti tusa chichaman akupak: ‘Atumi uchiri yamai akiinauka mash entsanam ujungtaran,’ timiayi.^m

²⁰“Nunia Moisés akiinamiayi. Turamtai Yus niin pengker awajsamiayi. Tura asamtai ni nukuri uchirin kempatam nantu ni jeen uukmiayi.ⁿ ²¹Nunia uuktatkama tujintak entsanam ujungtin kinta jeamtai, uchincha pitaknum engkea entsanam inanmasmiayi. Turamun faraónka nawantri juki, ni uchiria nunisang tsakatmarmiayi. ²²Tura asamtai Egipto ainau nekarmia nuna mash Moisésan nuiniarmiyai. Tura miatrusarang nuiniarmau asa, kakarman chicharkartin ayayi. Tura turamurinha kakarman turinuyayi.^o

²³“Nunia Moisés cuarenta (40) musachrintin pujak, Israel ainaun ni weari asamtai, jiiistaj tusa wemiayi. ²⁴⁻²⁵Tura

weai, Egipto aints Israel aintsun awatun wainak, nuna jiiij wajatmiayi. Tura nintimias: Wikia Egipto aintsun maamtakia, wi wear nuna wainkar: Nekas Yus iin akupturmaku asa, iincha ayamrutmatatji, tu nintimrartatui, Moisés tu nintimias, Egipto aintsun maamiayi. Tura waininayat Israel ainauka tuuka nintimracharmiayi. ²⁶Kashin tsawaar Moisés ni weari ainaun ataksha jiiistas weai, mai Israeltak maaninaun wainak: Kajernaitsuk asataram titas weri chicharak: ‘¿Warukaya mai Israeltaksha maaniarme?’ timiayi. ²⁷Tamaitiat chikich aintsun awatmia nuka Moisésan shitak: ‘¿Ameka ii apurinkitam? ¿Yaachia amincha chicharuta tusasha akuptamkama? ²⁸¿Yaa Egipto aints maamame nunismek winasha mantuatasam turutsu-mek?’ timiayi. ²⁹Nu tímia Moisés tupikiaki Madián nungkanam we, nuni pujus uchin jimiaran yajutmarmiayi.^p

³⁰“Nunia cuarenta (40) musachnangkamaramtai, Moisés aints atsamunam mura Sinaí tutainum jeatak wajasai, numi jangkirtin keamunam Yuse awemamuri wantintukmiayi. ³¹Tura numi keaun kajinchau asamtai, Moisés nuna wainak: ¿Warukang kajintsu? tusa: Wisha wakemkan jiiisnaka wainkainjapi, tu nintimias weri wakemak jiiiai, Yus chichaun antukmiayi. ³²Tura Yus chicharak: ‘Wiiitjai ami wearmi Yusrinjai. Tura asan Abrahamama Yusrinjai. Tura Isaaca Yusrinjai. Tura Jacobo Yusrinjai,’ timiayi. Yus tama Moisés kuraimiayi, tura jiiistatkama shamkamiayi. ³³Turamtai Yus chicharak: ‘Nungka wajame auka winaruital. Tura asamtai sapatrum kuinkam ukuktia. ³⁴Wína aintsur Egipto nungkanam pujuinau wait wajainaun wainkau asan, tura ni juutinauncha

antuku asan, wína aintsur ainaun ayamruktasan winajai. Tura asamtai yamaikia Egipto nungkanam waketkita. Amin nuni akupkatasan wakerajme,' Yus timiayi.^q

³⁵"Ii juuntri ainau Moisésan chicharinak:

'¿Ameka ii apurinkitam? ¿Yaachia amincha chicharuta tusasha akuptamkama?' tusar nakitraru wainiat, Yus ni awemamurin numi jangkirtin keamunam Moisésan wantintukti tusa akuptukmiayi. Tura Moiséska Israel ainau apuri ati, tura ayamrukti tusa akupkamiayi. ³⁶Turamtai Moiséska Israel ainaun Egipto nungkarinia jiikmiayi. Tura Egipto nungkanam, tura juun entsa Kapantin Entsa tutainum, tura aints atsamunam cuarenta (40) musach wekaas, Yuse kakarmarijai ningkikia turachmin ayat, wainchati takatnaka turamiayi.^r

³⁷"Moiséska ni weari ainaun chicharak: 'Yus atumi aintsrin kichik: Wína chichamur etserin ata tusa, wiya nunisang atumin akupturmaktinuitrume,' timiayi.^s ³⁸Tura asamtai Moiséska aints atsamunam Israel ainaujai iruntrar puju armiayi. Tura ii juuntri ainaujai mura Sinaí tutainum iruntrar pujuinai, Yuse awemamuri Moisésjai chichasmiai. Turamtai Moiséscha Yuse chichamen tuke pujustiniun sukartin aa nuna iin nekamtikramatas antukmiayi.^t

³⁹"Tura waininayat ii juuntri ainau Moisésan: '¿Ainusha itiu umirkatjik?' tusar niin umirtan nakitinau asar, Egiptonam wakеткиartas nintimiarmiayi. ⁴⁰Tura asar Aarónkan chicharinak: '¿Ainusha Moiséska iin Egiptonmaya jiirmakmiaji nusha tutsuk werumi? Iikia nekatsji. Tura asamtai ii yusri najatruata. Nuka eemak wekaamtai, iisha nemarsa-

tatji,' tiarmiayi. ⁴¹Nunia waaka uchiri nakumkar kurin najanawarmiayi, tura ni yusrin ni uwejejai ningki najanawariat, maaketai tiartas tangku ainaun maawar epewarmiayi, nunia nakurusarmiayi.^u

⁴²"Turinau asaramtai Yuska ii juuntri ainaun ukukmiayi. Turamtai ii juuntri ainau yaa ainaun Yus nayaimpinam ekentsau waininayat: Ii yusrintai tiarat tusa, Yuska tsangkatkamiayi. Yuse chichame etsernusha yaanchuik nuna pachis tu aarmiayi.

Yus chichaak: 'Israel ainautiram, cuarenta (40) musach aints atsamunam wekaakuram tangku ainau maaram, wína surustasrumka nekasrum turachmiarume.

⁴³Antsu tangku ainau wínaka surutsuk, chikich yus, Moloc tutai yuschau wainiatrum, nuka ii yusrintai tusaram, nunia yaa Refán tutai ii yusrintai tusaram, atumek nakumkaram tikishmatrasrum najanamarume. Tura asamtai wikia atumin Babilonia nungkan nangkaikun akupkatnuitjarne,' Yuska timiayi. Tu aarmawaitai.^v

⁴⁴"Yus Moisésan: 'Jear tarach najanamu jeartukta tusan, wisha inaktustatjame,' tinu asamtai, ii juuntri ainau aints atsamunam Yusjai iruntai jean Yus tímia nunisarang jeamkarmiayi.^w ⁴⁵Ii juuntri ainau nu jean tarachjai jeamkaramtai, ni uchiri ainau wekaasar, ju nungkanmasha Josuéjai taarmiayi. Tura Yus yaingmau asar, ju nungkanam pujuinaunka jiikiarmiayi. David apu naamtsaing, nu tarach jeaka ju nungkanam tuke ayayi.^x

⁴⁶"Davidcha Yusen pengker awajsa-miayi, tura ii juuntri Jacobo Yusri,

Davidta Yusri asamtai, David Yuse jeen jeamkatas wakerimiayi. ⁴⁷Tura Yus nuna surimkau asamtai, Salomón Yuse jeen jeamkamiayi. ⁴⁸Turayat Yuska nekas juun asa, aints ainau ni uwejejai jeamkamunmaka pujuschamnawaitai. Yuse chichame etsernusha yaanchuik tu aarmiayi.

⁴⁹⁻⁵⁰ Yus chichaak: ‘Wiki mash aa nunaka najanau asan, nayaimpi-kia wina keemtairuitai. Tura nungkaka wina najamtairuitai. ¿Wínasha warí jea jeartuktasru-mea wakerutarme? ¿Wína ayamtairuka tuwaita?’ Yus timiayi.”

⁵¹Nunia Esteban tuke etserak:

—Atumka katuram nintintin asaram, Yus umirchawa nunisrumek nintimrume, tura Yuse chichame antut nakitau asaram, atumi juuntri turuwarmia nunisrumek Yuse Wakaningkia kajerin ainiarne. ⁵²Nintimrataram. Atumi juuntri ainau Yuse chichame etserin ainauncha tuke kajerin armiayi. Tura Yuse chichamen etserin ainau: ‘Nekas Tunaarinchau aa nu taratnuitai,’ tu etserinaunka atumi juuntri ainau main armiayi. Tura asamtai ‘Nekas Tunaarinchau’ aa nu taamtai, atumsha nunisrumek ni anangkaram achikrum maamiarume. ⁵³Tura asaram Yuse awemamuri ainau Moisésnum chichaman akupinak: Nu chicham umirkataram tiaru wainiatrumek atumka nu chichamka pengké umikchamiarume, —Esteban timiayi.

Estebanka maamuri

⁵⁴Esteban tamati nuna antukar, judío juuntri ainau kakarar kajerinainka katetet awajiarmiayi. ⁵⁵Turinamtai

Esteban, Yuse Wakani piatkamu asa, nayaimpinmanini pangkai jiihkama Yuse paaniurin wainkamiayi. Tura Yuse untsurinini Jesús wajaun wainkamiayi. ⁵⁶Tura wainak, nu aints ainaun chicharak:

—Pangkairam jiiistaram. Nayaim uraniun wainjai. Tura Yus akupkamia nuna Yuse untsurinini wajaun wainjai, —timiayi.

⁵⁷Tama aints ainau kajerkar kakarar shinukiar, kuwishin epetkar irunturar Estebankan achikiarmiayi. ⁵⁸Turuwar yaktanmaya jiiikiar, kayajai tukuarmiayi. Tura aints ainau kayajai tukuarta ni wejmakrinka aimiakar: Natsa Saulo ii wejmakrin wainkati tusar, ni wajamunam tuktusarmiayi. ^z

⁵⁹Tura kayajai tukuinam Esteban Jesúsán seak:

—Apuu Jesúsá, wakanur jurutkita, —timiayi. ^a ⁶⁰Tura tikishma kakar untsamak: —Apuu, ju tunau turina juka tsangkurata, —timiayi.

Nuna tina nuniangka jakamiayi. ^b

Saulo Cristonu ainaun kajerkamuri

8 ¹⁻⁴Tura Estebankan maawaramtai, Sauloka: Nu aintsu maamuri pengkeraitai timiayi. Turamtai Cristonu ainu Estebanka namangken jukiar iwiarsarmiayi. Tura wake mesekar nukap juutiarmiayi. Nu kintati Cristonu ainu Jerusalénnum pujuinaw nukap wait wajakartiniun nangkamawarmiayi. Saulosha nu aints ainaun mash amuktaj tusa, kichik kichik aints pujuinamunam waya, aishmang ainauncha, tura nuwa ainauncha achik japiki kársernum engkewarat tusa akupnuyayi. ^c

Samaria nungkanam Cristo chichame etserkamuri

Cristonu ainu mash Jerusalénnumia jiiikiar, Judea nungkanam, tura Samaria

nungkanmasha anumkartas niish niish tupikiakiarmiayi. Tura tupikiakiar, yaja wekainaksha tuke inaitsuk Yusnum uwemratin chichaman etseriarmiayi, antsu Cristo nuiniatiri ainauka Jerusalénnum juwakarmiayi. ⁵Turunawaramtai Felipe Samaria nungkanam chikich yaktanam we, aints ainaun chicharak:

—Yus atumin uwemtikramratnun akupkatatjai tímia nuka Jesúsaitai, —timiayi.^d

⁶Tama aints ainu mash iruntrar titu pujusar Felipe chichamen pengker nintimsar anturkarmiayi. Turuawar wainchati takatan Felipe turaun wainkarmiayi. ⁷Turamtai iwianchrintin ainausha untsuri iwianchri kakarar untsumkar jiinkiaramtai tsaararmiayi. Nunia kijiru ainausha, tura wekaichau ainausha untsuri tsaararmiayi. ⁸Tura asamtai nu yaktanmaya ainu untsuri warasarmiayi.

⁹Tuminamtai nu yaktanmasha wishin Simón naartin pujumiayi. Nuka Samaria nungkanmaya ainu anangkak:

—Wikia nekas juuntaitjai, —tinuyayi. ¹⁰⁻¹¹Tura wishin asa, aints ainu anangkau asamtai, nu yaktanmaya kuikiartin ainausha, tura kuikiartichu ainausha niin mash pachiararmiayi. Tura páchinak:

—Nu aintska Yuse kakarmari jukin asa, timiá kakarmaitai, —tiarmiayi. ¹²Antsu Felipe Yus aints ainu inartata nuna pachis, tura Jesucristo naarin pachis uwemratin chichaman etseru asamtai, aints ainausha tura nuwa ainausha nuna antukar, Criston nemarkartas mainiarmiayi. ¹³Turinamtai Simónsha Criston nekasampita tusa maaimiayi. Tura Felipe Yuse kakarmarijai wainchati takatnasha turaun wainak: ¿Wisha warukawainjak? tu nintimias Felipejai tsanias wekaasarmiayi.

¹⁴⁻¹⁶Nunia Cristo nuiniatiri Jerusalénnum pujuinau: Samarianmaya ainu Yuse chichamen umirinawai tinamun antukar, Pedroncha nunia Juannasha Samarianam akupkarmiayi. Tura akupamu asar, Samarianmaya ainu Yuse Wakani piatkachmau ainayat, ii Apuri Jesúsán nemarkaru ainu imainiaru asaramtai, Pedro Juanjai Yusen seinak: Yuse Wakani Cristonu ainu piatkati tusar seatiarmiayi. ¹⁷Nunia muuken achirkaramtai, nu aintsu nintin Yuse Wakani piatkamiayi.

¹⁸⁻¹⁹Cristonu ainu muuken achirkar, Yusen seinamtai, Yuse Wakani engketau asaramtai, Simón nuna wainak Pedron, tura Juannasha chicharak:

—Winasha atumi kakarmari kuikiajai surustaram. Wisha aints ainu páchtsuk uwejruij achikian Yuse Wakanin engketami tusan tajarme, —timiayi.

²⁰Tamati Pedro ayaak:

—Kuikiarmeka amijai metek mengkatnuitai. ¿Yus ni kakarmarin ningki wakerak sukarta nuka kuikiajai sumakminkai? ²¹Yus nintimtichu asam, Yuse Wakanijai turatin pengké tujintame. ²²⁻²³Ameka wiya nunismek Yuse takatri takakmat wakerayatum, nintimin tsaangkua tumau yapau pujurtamu asamtai, ameka tunaarumjai jingkiamua nunismek pujame tu nekajme. Tura asam tunaarum yamaikia inaisam ukukta. Tura Yus seata. ¿Nu turakmin Yus ami tunaarumin tsangkutramrashtimpiash? —Pedro timiayi.

²⁴Tama Simón ayaak:

—Wina turutrumena nu turunawai tusaram, Yus seatritaram, —timiayi.

²⁵Tamati Pedro Juanjai nu aints ainu Jesúsá turamurin ujarak, tura Yuse chichamen etserkar umisar, Samaria nungkanam wekaasar, chikich chikich

yaktanam Yusnum uwemratin chichaman etserkiar Jerusalénnum waketkiarmiayi.

**Felipe Etiopíanmaya aintsun
Jesúsán pachis ujakmauri**

²⁶Nunia Yuse awemamuri Felipen wantintukmiayi. Tura chicharak:

—Felipea, wári umisam ju yakat ukukim, Jerusalén nangkaikim yakat Gaza tutainum junta amatkamunam nuni aints atsamunam wekaasata, —timiayi. ²⁷⁻²⁸Tamati Felipe wári umis, nu jintan amak, aints atsamunam weai, Etiopíanmaya aints Jerusalénnum Yusen maaketai titas we, nunia kawai kárrun japiki weamunam engkema, nu jintanam ni nungkarin wakеткиtas weun wainkamiayi. Nu aintska Etiopíanmaya nuwa inakratniui kuikiarin wainuyayi. Nu aintska kárrunam weak yaanchuik Yuse chichame etserin Isafasa aarmaurin aujki wemiayi. ²⁹Tura nuni papin aujki weamtai, Yuse Wakani Felipen chicharak: —Au kárru wea au mankiata, —timiayi.

³⁰Tamati Felipe nuni we, nu aintska Yuse chichamen etserin Isafasa aarmaurin aujki winaun anturkamiayi. Tura iniak:

—¿Ame aujmena nunaapi tawa tusam nekamek? —timiayi.

³¹Tu iniam nuka ayaak:

—Atsa, wína nekamtikruatnuka atsau asamtai ¿itiur nekaatjak? —timiayi. Tura: —Juni wakam, wijai keesam ujatkata, —tamati Felipesha warukmiayi.

³²Isafasa aarmaurincha aujki winaun anturkamia nuka nuwaitai:

“Uwijan maawartas juwina nunisarang Niincha jukiarmiayi. Tura uwija uchiri ure awaam, juutsuk tepawa nunisang chichakchamiayi.

³³ Niincha inatsaararmiayi, tura tunaarinchau waininayat, wait wajaktiniun susarmiayi. Tura ju nungkanam iwiaaku pujaun maamuncha ¿yaa ni wearing pachischa chichakat?” Tu aarmawaitai.^e

³⁴Nu aarmau aujsar umisar, Etiopíanmaya aints Felipen iniak:

—Wait aneasam ujatkata. ¿Yuse chichame etserin yána pachisa takua tawa? ¿Ningikik tumama? ¿Antsu turachkusha kichan pachisash tawa? —timiayi.

³⁵Tu iniam: Ju aarmauka Jesúsán pachis taku tawai tusa, Felipe uwemratin chichaman Jesúsán pachis ujaktas nangkamamiayi. ³⁶Tura kárrunam junta weenak entsa aun nangkainak Etiopíanmaya aints chicharak:

—Jiisia, juwaitai entsa. ¿Jesucristo umirkat tusam juni imiatchnaukitam? —tu iniasmiayi. ³⁷Tu iniam Felipe ayaak:

—Jesucristo nekasampita takumningkia imaimnawaitjame, —timiayi. Tamati nu aintska chicharak:

—Jesucristo nekasampi Yuse Uchirinta, wikia tajai, —timiayi.

³⁸Nunia kawain wajasat tusar awajarmiayi, tura mai kárrunmaya kuankiar entsanam wear, Felipe nu aintsnaka imaimiayi. ³⁹Tura mai entsanmaya jiinkiarantmai, Yuse Wakani Felipen jukimiayi. Turamtai nuwa kuikiarin wainin Felipen waintsuk ningki juwakmiayi. Turayat waras kárrurin engkema ni nungkarin wakеткиmiayi.

⁴⁰Turamtai Yuse Wakani Felipen jukin asa, Azoto yaktanam jeemiayi. Turamtai nunia jiinki chikich chikich yaktanam Yusnum uwemratin chichaman Jesucriston pachis tuke etserki Cesarea yaktanam jeemiayi.

Saulo Cristo umirkamuri

9¹Nunia Saulo inaitsuk Cristonu ainaun kajerak maatas wakerimiayi. Tura asa sacerdote apuri jeen jea chicharak:

²—Papi aaram surusta. Wikia Damasco yaktanam iruntai jeanam wayaan nuna apurin nu papin inaktusan, yamaram chichaman umirin ainaun aishmangnasha, tura nuwancha wainkanka, achikian jing kian jukin juni Jerusalénnum i kiankatan wakerajai, —timiayi. ³Tura nu papi aarmaun juki, jinta weaun Damasco yaktanam jeatak wajaun aneachmau nayaimpinmaya paantin Saulon tenteamiayi. ⁴Turam tai shamak nungká ayaar kuta antumkamiayi. Tura chichaman antukmiayi. Nu chichamka nuwaitai:

—Saulo, Saulo, ¿waruka winasha waitkaratasmeha wekaaturme?

⁵Tamati Saulo ayaak:

—Apu ruamesha yaachitme? —tu iniam ataksha nayaimpinmaya ayaak:

—Wikia Jesúsaitjai. Ame waitkaratasmeha wekaaturme nuwaitjai. Waaka kajek numin najar nawen meseawa nunismek amek ami nintim meseame, —timiayi.

⁶Tamati Saulo shamak kurangmaikiak:

—Apu ruwarí itirtukat tusamea wakerutame? —timiayi. Tamati Jesús ayaak:

—Wajakim weme nu yaktanam weta. Nuni jeakmin ame turatatme nuna u jatmakartatui, —timiayi.

⁷Tamati aints nijai tsaniasar wekainau-sha chichaamun antukarmiayi. Antsu aintsnaka pengké wainkacharmiayi. Tura asar shaminak chichatsuk wajasarmiayi.

⁸Tuminam tai Saulo kuta antuma pujayat wajaki wainmaktatkama tujinkamiayi. Tura asam tai uwejen tap achikiar jukiar, Damasco yaktanam jeeniarmiayi. ⁹Tura nuni jea kempatam kinta wainmatsuk

yurumkancha yutsuk, tura amutnasha amutsuk pujumiayi.

¹⁰Saulo tu pujam tai, Damasco yaktanam Cristo nemarkin Ananías naartin pujuyayi. Turam tai Apu Jesús niin wantintuk:

—Ananías, —timiayi. Tamati nuka ayaak:

—Apu, juni pujajai, —timiayi.

¹¹Tamati ataksha Apu Jesús chicharak:

—Ame wajakim Jinta Tupin tutainum weta. Nuni Judasa jeen jeam, Tarsonmaya aints Saulo naartin nuni pujau iniasta. Tura nuka Yusen seek pujau wainkatatme. ¹²Ame jeemin pujamning, nu aintsnaka karanma nunisnak amin wainmam tikiamjame. Tura jeanam wayaam, uwejmijai ni muuken achikiam: ‘Ataksha wainmakta,’ tusam paan wainmam tikiamjame, —Jesús timiayi.

¹³Tamati nuna antuk Ananías ayaak:

—Apu, nu aintsun pachisar wina untsuri u jatkarmayi, tura Jerusalénnum amin umirtaminak pujuinaun nu aintska pasé awajsamurin untsuri u jatinaun antukmajai. ¹⁴Tura sacerdote apuri papi aarmau susam, yamai juni taa, amin seatmina nuna mash achiktaj tusa tayi, —timiayi.

¹⁵Tamati Apu Jesús chicharak:

—Tutsuk weta. Nuka antukiatmek nu aintska wina inatir ati tusan, judíochu ainauncha, nunia apu ainauncha, nunia Israela weari ainauncha wina pachitas chicharkat tusan, wikia niin eakmajai. ¹⁶Tura wina pachitas nukap wait waktiniun nekamtikiatjai, —timiayi.

¹⁷Tamati Ananías we, Saulo pujamunam jea, nuni waya ni uwejejai muuken achik chicharak:

—Yatsuru Saulo, ame jinta winamin Apu Jesús wantinturmak amijai chichasma nuka amincha wainmam tikiat tusa, tura Yuse Wakani ami nintimin

piatramkat tusa wina akuptuki,
—timiayi.

¹⁸Tama wainmachiat namaka saapea tumau ni jiniia ayaarmiayi. Tura asamtai Saulo ataksha paan wainmakmiayi. Tura wajaki Criston nemarkatas maaimiayi. ¹⁹Nunia yutan yuwa ni namangken kakamtikramiayi. Tura Cristonu ainau Damasconam pujuinaujai tsanias jumchik kinta pujusmiayi.

**Saulo Damasconam Cristo
chichamen etserkamuri**

²⁰Nunia iruntai jeanam waya: Jesús Yuse Uchirintai tusa etserkamiayi.

²¹Turamtai nu chichaman antukaru ainauka mash nintimrar:

—¿Ju aintska Jerusalénnum Jesúsán seuu ainaun achiktas wekainuya nuchaukai? ¿Tura junisha taa, nu aints ainaun achik jingkia sacerdote juuntri ainamunam jeetias tamia nuchaukai? —tiarmiayi.

²²Tinamaitiat Saulo shamkartutsuk: Jesús nekas aints ainautin uwentikramratnuitji tusa, Yuse kakarmarijai chichau asamtai, judío Damasconam pujuinau: Nekaschawaitai tiartatkamawar tujinkarmiayi.

Saulo ayamrukmauri

²³Nukap kinta arus judío ainau Saulon maatai tusar, chichaman najatawarmiayi.

²⁴Tura judío ainau tsawaisha, tura kashisha yakta waiitiri ainamunam wajasar: Saulo jiiinmatai achikiar maatai tusar nakakar-miayi. Turinamaitiat Sauloka nunaka nekaamiayi. ²⁵Tura asamtai Cristonu ainau kashi Saulon juun changkinnum engkewar, yakta wenukrinia naekjai itarar jiiikar akupkaram tupikiakmiayi.^f

Saulo Jerusalénnum waketikmuri

²⁶Saulo Jerusalénnum waketik, Cristonu ainaujai iruntratas wakerimiayi.

Turamaitiat Sauloka Cristo umirnuaitai, tuuka nintimtsuk mash shamkarmiayi.

²⁷Tura wainiat Bernabé Saulon juki, Cristo nuiniatiri pujuinamunam itamiayi. Tura ita chichaak:

—Juka jinta weak ii Apuri Jesúsán wainkami. Turamtai ii Apuri niin chichasmau asa, Damasconam jea, shamkartutsuk Jesúsá kakarmarijai chichasmayi, —timiayi. ²⁸Tamati Saulo Jerusalénnum juwakmiayi, tura Cristo nuiniatiri ainaujai wekaasamiayi. Tura shamkartutsuk Apu Jesúsá kakarmarijai chichauyayi. ²⁹Tura Sauloka Jesúsán pachis chichasmayi. Turamtai judío griego chichamejai chichau armia nu nuni pujuarmiayi. Tura Saulojai chichai-nau asar, niincha maataras wakeriarmiayi. ³⁰Turinamtai Cristonu ainau nuna nekaawar, Saulon maawarai tusar, Cesarea yaktanam jeeniar:

—Ami yaktarmin Tarsonam weta, —tusar akupkarmiayi.^g

³¹Tura asamtai Cristonu ainau Judea nungkanam tura Galilea nungkanam tura Samaria nungkanam pujuinausha mash pengker nintimsar angkan pujusarmiayi. Tura Criston miatrusarang umirkar: Tunau wajasai tusar shaminak, Yuse Wakani kakarmarijai nukap yujararmiayi.

Eneasa tsuwarmauri

³²Pedro nu nungkanmasha wekaak, Lida yaktanam Cristo umirin pujuinamunam jeamiayi. ³³Tura nuni jea, aints Eneas naartinun wainkamiayi. Nuka kijiru asa, ocho (8) musach wekaichau ni peakrin tepeyayi. ³⁴Tura nu aintsun wainak Pedro chicharak:

—Eneasa, Jesucristo amin yamai tsuwarmawai. Tura asamtai nantakim sekmatiram tuksata, —timiayi.

Tamati nu tamaujai metek Eneas nantakmiayi. ³⁵Turamtai Lidanam tura Sarón yaktanam pujuinau nuna wainkar, ii Apurin umirkarmiayi.

Dorcas jakamunmaya nantakmiauri

³⁶Tura Jope yaktanam nuwa Cristo umirin, Tabita naartin pujuyayi. Nuka griego chichamejai Dorcas taku tawai. Nu nuwaka tuke pengker aa nuna takaak, tuke yuuminancha yainuyayi. ³⁷Dorcas nuni pujus sungkuran achimiak jakamiayi. Turamtai namangken nijarar, pata yakí amanum patasarmiayi. ³⁸Patasaramtai Pedro Lida yaktanam arakchichu pujau asamtai, Cristonu ainau nuna antuku asar, jimia aintsun Pedron jiiwearat, tura nuni jear: Wári juni itaarat tusar akuptukarmiayi.

³⁹Tura akupkamu asar, nuni jeariar ujakaram, Pedro nijai tsaniasar Jope yaktanam wearmiayi. Tura nuni jearamtai, jakau namangeke yakí patasmaunum Pedron iwiakarmiayi. Tura nuni wayaamtai, waje ainau mash juutkiar tenteawarmiayi. Turuawar Dorcas iwiaaku pujak peetai ainaun, tura wejmak ainauncha najanamia nuna inaktusarmiayi. ⁴⁰Turinamtai Pedro aints ainaun, tura waje ainauncha mash jiikmiayi. Tura ningki juwak tikishma Yusen seamiayi. Nunia jakau namangken pangkai jiis:

—Tabita, nantakta, —timiayi.

Tamati Tabita jimmi Pedron wainak nantaki pujusmiayi. ⁴¹Turamtai wajakti tusa, Pedro Tabita uwejen achik awajkimiai. Nunia Cristonu ainauncha, tura waje ainauncha mash untsuam, nusha wayaawar iwiaaku pujaun wainkarmiayi. ⁴²Turamtai Jope yaktanam nu turamun aints ainau mash nekaawarmiayi. Tura aints untsuri Criston nekasampita tiarmiayi. ⁴³Tinam-tai Pedroscha Jope yaktanam untsuri kinta

aints Simón naartinu jeen pujusmiayi. Nu aintska nuwapen takauiayi.

Pedro Cornelion wainkamuri

10 ¹Cesarea yaktanam suntara apuri Cornelio naartin pujuyayi. Ni suntaringkia Italia nungkanmaya aints armiai. ²Nu apuka péngke aints ayayi. Tura ni weari ainaujai tunau wajasai tusar, shaminak Yusen: Ameketme juuntam tinu armiai. Tura judío kuikiar-tichu ainaun yaingtas kuikian nukap suyayi. Tura tuke Yusen seayayi. ³Tu pujai tsaa nungkaanmatai, Cornelio karanma nunisang Yuse awemamuri ni pujamunam wayaun paan wainkamiayi.

Tura wainkam chicharak:

—Corneliowa, —timiayi. ⁴Tamati Cornelio Yuse awemamurin wainak shamak jijj wajatmiayi. Tura:

—Apu ruwári turuttiasme winame? —timiayi. Tu iniam Yuse awemamuri ayaak:

—Ame Yus seamame nuna anturtam-kayi, tura yuuminak pujuinau yaingtasam turamame nunaka Yuska kajinmatram-tsui. ⁵Tura asamtai yamaikia Jope yaktanam aints ainau akupkata. Tura aints Simón naartin, chikich naari Pedro tati tusar untsukarti. ⁶Nuka irastas taa chikich Simónjai nuwape takau tutajai tsanias pujawai. Ni jeengka juun entsa yantamen pujawai, —timiayi.

⁷Chichas umis Yuse awemamuri waketkiamtai, Cornelio ni inatirin jimiaran untsuk, nunia suntar Yusen umirkau pengke nintinnun untsukmiayi. Nu aintska tuke ni apurin umirnuuyayi. ⁸Tura nuni wetaram tusa mash ujak, Jope yaktanam akupkamiayi.

⁹Kashin tsawaar junta weenai, Jope yaktanam jeainatsaing, tsaa tupin wajamtai,

Pedro Yusen seatas jea tuntupe yakí pata amaunum wakamiayi. ¹⁰Tura nuni

pujus nukap yaparmiayi. Tura asa yuwatas wakerimiayi. Tura yurumkan inarawarti tusa nakaj pujai, karanma nunisang ¹¹nayaim uranmiaunumia sekmati sarma tumau cuatro juwiakmaur-in jingkiar, yakfya akupamun wainkamiayi. ¹²Nu sekmatinam pachim ainau cuatro (4) nawentin, tura napi ainausha, tura nanamtin yuchati ainausha engketinaun wainkamiayi. ¹³Turamtai: —Pedroa, wajakim maam yuwata, —tu chichaun antukmiayi.

¹⁴Nuna antuk Pedro ayaak:

—Atsa Apuru, Moisés iin chichaman akupturmaku asamtai, junaka yuchajai. Wikia yuchatinka tuke tsuutakun yuchawaitjai, —timiayi. ¹⁵Tamati ataksha chichaun antukmiayi:

—Yus pengkeraitai tau wainiatmesha ĉwaruka amesha paseetai tame? —timiayi.

¹⁶Tura sekmatiya tumaun ataksha akupak, nunia ataksha iwiak, nunia ataksha akupak, nunia tuke nayaimpinam iwiakmiayi. ¹⁷Nuna turau wainak Pedro: ĉWarukanak auncha wainakaj? tu nintimias pujai, Cornelionmaya akupkamu ainau:

—ĉSimónka jee tuwaita? —tusar inintrukiari inintrukiari taarmiayi. ¹⁸Tura taar untsuminak:

—ĉAints Simón naartin chikich naarisha Pedro ju jeanmasha irastaa taa pujawak? —tu inintrusarmiayi. ¹⁹Tu inintrinamtai, Pedro karanma nunisang wainkamurin tuke nintimias pujamtai, Yuse Wakani chicharak:

—Jiisia, kempatam aints amin eatminawai. ²⁰Tura wi nu aints ainaunka akupkau asamtai wajakim tarata. ĉNekas-nash aujai wetaj? tutsuk aujai weta, —timiayi. ²¹Tamati Pedro tara, Cornelio aintsri akupkamu ainau wainak:

—Atum eatrume nuwaitjai. ĉWaruka tarutniurme? —timiayi.

²²Tu iniam aiminak:

—Iikia suntara apuri Cornelio akuptamkau asamtai winiji. Nuka péngke aintsuitai. Yusen umirnuitai. Tura asamtai mash judío aneanak pengker awajin ainawai. Yuse awemamuri wantintuk niin chicharak: ‘Ami aintsrum akupkam, Pedro jeemin tati tusam untsukta. Tura ni taamtai, ni titata nuka antukta,’ timiayi. Nuna tawai titaram turammiai, —tiarmiayi.

²³Tu tinamtai Pedro chicharak:

—Wayaataram. Turaram juni kanurta-ram, —timiayi. Tamati jea wayaawar nuni kanurarmiayi. Tura kashin tsawaarar Pedrojai waketkiarmiayi. Tura Cristonu ainau Jopenam pujuinausha warumchik nemariarmiayi.

²⁴Tura jinta kanurar kashin tsawaarar Cesareanam jearmiayi. Turinamtai nuni Cornelioka ni weari ainaun, tura ni amikri ainauncha winiarti tusa untsukmau asar, nusha nijai iruntrar nakasarmiayi. ²⁵Tura Pedro jeanam jeamtai, Cornelio nijai ingkiuniktas jiinki: Ameka juuntaitme, titas tikishmatramiayi. ²⁶Turamtai Pedro Cornelion achik:

—Wajaktia. Wisha aintsuitjai. Amea nunisketjai, —timiayi.

²⁷Nunia Corneliojai chichasar jea wayaawar nuni aints untsuri iruntrar pujuinaun wainkamiayi. ²⁸Tura Pedro chichaak:

—Atumka nekarme: Judío ainautikia Moisésa aarmauri umirkau asar, judíochou ainautirmi jeen pengké iraschamnawaitji. Tura atumjai iruntrachminuitji. Tura wainiat Yuska winaka: ‘Aints kichkisha paseetai tutsuk asata, tura tsuutsuk asata,’ turutmiayi. ²⁹Tura amesha chicham akupturkau asakmin, wisha nakimsuk winijai. Tura asan ĉwarukang untsura? tusan nekaatasan wakerajai, —timiayi.

³⁰Pedro tamati Cornelio ayaak:

—Tsaa nungká wajasai, wína jearun Yusen seakun pujai, aneachmau aints entsatin winchaan entsarun wainkamjai, nu wainkamurka cuatro (4) kinta nangka-mari. ³¹Tura wi wainkamu chichartak: ‘Corneliowa, ame Yus seamame nuna anturtamkayi, tura yuuminak pujuinau yaingmame nunasha kajinmatramtsui. ³²Tura asamtai Jope yaktanam aints ainau akupkata. Nuka aints Simón naartin, chikich naari Pedro, tati tusar untukarti. Nuka irastas taa chikich Simónjai, nuwape takau tutajai tsanias pujawai. Ni jeengka juun entsa yantamen pujawai,’ turutmiayi. ³³Tura asamtai wári ujaataram tusan aintsun akupkamjai. Turam amesha pengker nintimin asam taume. Tura yamaikia Yus wainmamunam juni iruntrar pujaji. Tura Yus akuptamkau asamtai, Yus chichaman amin ujatmakma nu mash antuktasar wakeraji, —timiayi.

**Pedro Cornelio jeen
chichaman etserkamuri**

³⁴Tamati Pedro etserak:

—Ayu, yamaikia nekajai: Aints mash metek ainawai, Yuska tu nintimui. ³⁵Antsu Yus mash nungkanmaya ainauncha, judío ainautincha tura judíochou ainauncha, Niin umirinak pujuinaunka, tura pengker aa nuna turinaunka pengker nintimtus pujawai. ³⁶Yus Israela weari ainautinka Jesucristo-nam angkan pujustin chichaman akupturmakmiayi. Nuka mash aints ainautin Apurintai. ³⁷⁻³⁸Juan Yuse chichamen etserak aints ainaun imaimurisha nekarme. Nunia Nazarenumia Jesús Galileanmaya jiinki, judío nungkarincha mash wekainuyayi. Tura Yus ni Wakanin engketamu asa, Yuse kakarma-

rijai pengker aa nuna takauyayi. Tura iwianchrintin ainaun iwianchrin jiiarki akupnuyayi. Yus nijai pujau asa, nunaka turinuyayi. Atumsha nuka nekarme.

³⁹Tura Judea nungkanam Jerusalénnum-sha iisha Jesúsata turamuri wainkamiayi. Nunia numinam nenaawar maawarmiayi.

⁴⁰Antsu kempatam kinta jaka tepau wainiat, Yus ataksha Jesúsana jakamunmaya inankimiayi. ⁴¹Turayat Jesús jaka nantaknunka aints mashkia wainkacharmiayi. Antsu Yus yaanchuik iin: Nu wainkau ataram tusa, eemak eatmaku asamtai, iinak wantinturmakmiayi. Jesús jakamunmaya nantakiamtai, iisha nijai yurumak yuwamiayi, tura amutisha amurmiaayi. ⁴²Tura Jesúska iwiaaku ainau tunaarinja, tura jakau ainau tunaarinja jiiistnuitai, tusaram nu chicham aints ainau ujaktaram tusa, Yus akuptamkamiayi. ⁴³Yaanchuik Yuse chichame etserin mash Jesúsana pachisar etserkarmiayi. Tura Jesúsana nekasampita tinaunka ni tunaarin Jesús tsangkuratnuitai tiarmiayi, —Pedro etserak timiayi.^h

**Judíochou ainau Yuse
Wakani engkemtumuri**

⁴⁴Pedro tuke chichaak pujai, Yuse Wakani aneachmau yakiiya taa, ni chichamen antú pujuinaun engkemtumiaayi. ⁴⁵⁻⁴⁶Tura chikich chichamjai anturnaikiachmin niisha Yusen maaketai tiarmiayi. Tura asaramtai judío Cristonu ainau Pedrojai tsaniasar taarmia nuka nuna antukar nukap nintimrar:

—Maj, Yuse Wakani judíochou ainauncha engkemtuwari, —tiarmiayi.ⁱ

⁴⁷Tinamtai Pedro chicharak:

—Iiya nunisarang Yuse Wakani engkemtuwari asaramtai ¿ju aints ainaun Criston nemarkatas wakerinaun maatsuk asarti tusasha yáki surimkat? —timiayi. ⁴⁸Tura:

—Jesucristo nintimsaram maaitaram,
—tusa akupkamiayi. Turamtai:

—Jumchik kinta iijai pujusmi, —tusar
Pedron iniasarmiayi. Tu iniinam: Ayu
tusa pujusmiayi.

**Pedro Jerusalénnum
chichaman etserkamuri**

11 ¹Cristo nuiniatiri ainau, tura
Judea nungkanmaya Cristonu
ainau nu turamuncha nekaawar:
Judfochu ainayat nusha iiya nunisarang
Yuse chichamen jukiari tamaun antukar-
miayi. ²⁻³Tura Pedro Jerusalénnum
jeamtai, judfo ainau niin chicharinak:
—¿Waruka judfotiatmesha judfochu
ainamunmasha irastasmesha wemame?
¿Tura waruka nijaisha tsaniasmesha
yuwamame? —tiarmiayi.

⁴Tu tinam Pedro nu nangkamtaik Jope
yaktanam turamurin mash etserkatas
nangkamamiayi. Tura chichaak:

⁵—Wikia Jope yaktanam pujusan,
Yusen seakun pujai, karanma nunisnak
sekmatin sarma tumaun cuatro (4)
juwiakmaurin jingkiatamu nayaimpin-
maya wi pujamunam taarun wainkamjai.
⁶Tura ¿waring initak engketa? tusan
jiikman, pachim cuatro (4) nawentin,
nunia napi ainausha, nunia nanamtin
ainausha iikia yuchatai nuni engketinaun
wainkamjai. ⁷Nunia chichaman antukma-
jai. Nu chichamka nuwaitai: ‘Pedroa,
wajakim maam yuwata.’ ⁸Turutmatai
wikia ayaakun: ‘Atsa, Apuru. Yuchatai aa
nunaka tuke yuchawaitjai,’ timiajai.

⁹Turamtai ataksha nayaimpinmaya
chichartak: ‘Yus pengkeraitai tau wainiat-
mesha ¿warukaya paseetai tame?’
turutun antukmajai. ¹⁰Tura sekmatiya
tumaun ataksha akupak nunia iwiak,
nunia ataksha akupak, nuniangka tuke
nayaimpinam iwiakmayi.

¹¹Nuna nintimsan pujai, aints Cesarean-
maya akupkamu ainau wina eatkiar wi
pujamurun tarutiarmayi. ¹²Tarutiaramtai
Yuse Wakani wina chichartak: ‘¿Nekasnash
aujai wetaj? tutsuk aujai weta,’ turutun
antukmajai. Tura Cristonu ainau seis (6)
juni wijai jearu ainaujai Cesareanam jear,
Cornelio jeen mash iruntrar wayaamji.

¹³Tura ii wayaakrin, Cornelio iin ujatmak:
‘Wina jearun Yuse awemamuri wajaun
wainkamjai. Tura nisha chichartak: Aints
ainau Jope yaktanam akupkam, aints
Simón naartin, chikich naari Pedro tati
tusam untsukta. ¹⁴Nu amin chichartamak:
Ami wearmijai itiru uwemratnuitrume tusa
amin ujatmaktatui,’ turutun antukmajai
tusa ujatmakmaji. ¹⁵Turutmatai wikia
Cornelio ainaun Yuse chichamen ujaakun
pujai, Yuse Wakani nu nangkamtaik iin
engkemturmamiaji nunisang niincha
engkemtuwarmayi. ¹⁶Turamtai ii Apuri
Cristo timiaurin nintimramjai. Nu
chichamka nuwaitai: ‘Juan aints ainaun
nekas entsanam imaimiayi. Tura Yuse
Wakani atumi nintin piatramkatatrupe,’ ii
Apuri timiayi.]’

¹⁷Atumsha nintimrataram. Ii nu
nangkamtaik ii Apuri Jesucristo umirkau
asakrin, Yus ni Wakanin iin akupturmak-
miaji nunisang yamaisha ni Wakanin nu
aints ainauncha akuptuku asamtai ¿wisha
itirukanak Yusen: Atsa turuwaip titaj?
—Pedro timiayi.

¹⁸Tamati nuna antukar pengker nintimsar:
Yuska juuntapita tiarmiayi. Tura chichainak:
—Yuska judfochu ainau ni nintimaurin
yapajiawar nekasar pujut nangkankashti-
nun jukiarti tusa yaingkiari, —tiarmiayi.

**Antioquíanmaya Cristonu
ainaun pachis timiauri**

¹⁹Estebankan maawaru ainau chikich
Cristonu ainauncha maawartas

wakerinam, Jerusalénnumia tupikiakiar Fenicia nungkanam, nunia Chipre isranam, nunia Antioquía yaktanam jearmiayi. Nuni jear, judío ainaunak Yuse chichamen ujaarmiayi.^k

²⁰Tura Chipre isranmaya, nunia Cirene nungkanmayasha Cristonu ainau Antioquía yaktanam jear, judíocho ainaun chichasar, ii Apuri Jesúsán pachisar uwemratin chichaman etserkarmiayi. ²¹Tura Yus ni kakarmarijai nu aints ainaun kakantikramu asar, judíocho ainau untsuri ni yaanchuik nintimfairinka inaisar, ii Apuri Criston nekasampita tiarmiayi.

²²Turinamtai Cristonu Jerusalénnum pujuinau nuna antukar, Bernabén Antioquía yaktanam nuna nekaat tusar akupkarmiayi. ²³⁻²⁴Bernabéka pengke aints asa, Yuse Wakani piatkamuyayi. Tura Criston miatrusang umirnuyayi. Tura asa Antioquíanam jea, Yus nu aints ainaun pengker awajsamun wainak nukap warasmiai. Tura asa nu aints ainaun chicharak:

—Pengker nintimsaram tuke inaitsuk ii Apuri Cristo umirkataram, —tusa chicharkamiayi. Tura Bernabé nuni pujai, aints untsuri ii Apurinu wajasarmiayi.

²⁵Nuniasha Bernabé Tarso yaktanam Saulon eaktas wemiayi. ²⁶Tura wainak, Antioquía yaktanam jukimiayi. Tura nuni jear, Cristonu ainaujai kichik musach pujusar, aintsun untsuri Yuse chichamen nuiniarmiayi. Tura asamtai Antioquía yaktanam nuna eemkar Cristonu ainaun pachisar: “Cristonu ainawai,” tiarmiayi.

²⁷Chikich kintati Jerusalénnumia Yuse chichamen etserin ainau Antioquíanam jearmiayi. ²⁸Tura jear, chikich aints Agabo naartin Cristonu ainau iruntramunam wajaki, Yuse Wakani niin nekantikiamu asa:

—Nekas mash nungkanam tsuka nukap atatui, —timiayi. Claudio romano juun apuri asamtai, nu timiauka nunisang uminkamiayi.^l

²⁹Tura asamtai Cristonu ainau chichar-nainak: Judea nungkanam tsuka amati, iisha Cristonu ainau yaingmi tusar, ii kuik tákakmauka kichik kichik miatrusrik susarmi tusar nintimrarmiayi. ³⁰Nuna turuwar Bernabéncha, tura Saulonasha Cristo umirnu juuntrin kuikian suwearat tusar Judea nungkanam akupkarmiayi.

Santiago jakamuri nunia Pedron kársernum engkeamuri

12 ¹Nunia apu Herodes Cristonu ainaun wait wajaktiniun susarat tusa ni aintsrin akupkamiayi. ²Tura Juanku yachiin, Santiagon saapijai maataram tusa ni aintsrin inarmiayi. ³Nuna maawaramtai, judío ainau nuna wainkar: Nuka pengkeraitai tinau asarmatai, Herodes nuna nekaa: Pedrosha achiktaram tusa ni aintsrin akupkamiayi. Turamtai Pascua fiesta, pang pachimrach-mau yuwatin kinta tutai amia nuni Pedron achikiarmiayi. ⁴Achikiaramtai Herodes ni suntarin dieciseis (16) akupak:

—Atumsha atumsha cuatro (4) iruntram, Pedro jiinki tusaram kárser nakastaram, —timiayi. Nunia Pascua fiesta nangkamaramtai, aints ainau iruntramunam chicham nekaami, tu nintimramiayi. ⁵Turamtai suntar ainau Herodes tímia nunisarang Pedron nakasarmiayi. Pedron kársernum engkeawaru asaramtai, Cristonu ainau tuke inaitsuk Pedron pachisar Yusen seatiarmiayi.

Yus Pedron karsernumia jiikmiauri

⁶Herodes: Kashin chicham nekaami timiau kintaka tsawaatsaing, kashi Pedro

suntar jimiar ainamunam jape teema kanú tepemiayi, tura jimia jirujai jingkiamuyayi. Antsu chikich suntar ainauka kársera waitirin nakainak wajaarmiayi. ⁷Turinai Yuse awemamuri aneachmau kársernum engkemtua paantin awajsamiayi. Tura Pedro kának tepaun mijiarnum achik shintarmiayi. Tura Pedro shintaramtai:

—Wári nantakta, —timiayi. Tamati Pedro ni uwejen jingkiamun atiachmaitiat, ningki sayat atimiamiayi. ⁸Turamtai Yuse awemamuri chicharak:

—Kachumtairum kachumata, tura sapatrum weekata, —timiayi. Tu tama Pedro miatrusang umirkamiayi. Turamtai:

—Tura wejmakrum entsaram nemartusta, —timiayi.

⁹Tamati Pedro Yuse awemamurin nemarsamiayi. Tura suntar ainaunaka shintaatsuk ukukmiayi. Antsu: ¿Paankeash ainia? tusa nekachu asa: ¿Karanam wekaatsujash? tu nintimias karsernumia jiinki, Yuse awemamurin nemarsamiayi. ¹⁰Tura suntar eemak wajauncha nangkaikiarmiayi. Tura chikich suntar wajainauncha nunisarang nangkaikiarmiayi. Nunia waiti jiru najanamu epenmiaunum jeainamtai, nu waitikia ningki kuwat uranmiayi. Uraniamtai mai jiinkiar, jintanam jumchik wesarang, Yuse awemamuringkia aneachmau mengkakamiayi. ¹¹Yuse awemamuri mengkakamtai, Pedro:

—Herodes judio ainaujai mash wína mantuwartas wakerutinau asaramtai, Yus nekasampi wína uwentikrurtas ni awemamurin akupturkayi, —tu nintimramiayi.

¹²Tura nuna nintimias Marí jeen wemiayi. Nu Marí kía Juan Marcosa nukuri ayayi. Nu jeanam Cristonu ainau untsuri iruntrar Yusen searmiayi. ¹³Tuminai Pedro nuni jea, aanum wajas waiti

epenmiau uratrita tusa, uwejejai tuntuyamiayi. Turamtai nawan Rode naartin inati asa, waitinam jiistaj tusa, werimiayi.

¹⁴Tura Pedro chichamen antuku asa waras, waitin uratsuk waketki:

—Pedro aanum wajawai, —timiayi.

¹⁵Tamati:

—Atsa ¿waurkum tatsumek?

—tiarmiayi. Tinamaitiat:

—Atsa, nekasam tajai, —tamaitiat:

—Atsa nuchawaitai. ¿Antsu ni wakaninchuashi? —tiarmiayi.

¹⁶Tinau wainiat Pedro tuke waitin tuntuyak wajamiayi. Turamtai waitin urakar Pedron wainkar: ¿Itiur tayik? tusar shamkarmiayi. ¹⁷Tuminamtai jea waya: Itiatkataram titas, uwejen takuimiayi. Tura nuni pujuinaun chicharak:

—Ii Apuri Cristo wína karsernumia jjiirkini, —tusa etserkamiayi. Tura chichas umis:

—Santiagosha tura chikich Cristonu ainausha ujaakrum: Yanchuk jiinkini tusaram ujaktaram, —timiayi.

Nunia jiinki chikich yaktanam wemiayi.

¹⁸Kashin tsawaar Pedro mengkakau asamtai, suntar ainau: ¿Itiurak jiinkimia, tura tuki wemaj? tusar napchau nintimrar chichainak nukap taetet wajarmiayi. ¹⁹Turinamtai Herodes ni aintsri ainaun akupak:

—Eaktaram, —timiayi. Tamaitiat ea eaka wainkartatkamawar tujinkarmiayi.

Tura asamtai kársera nakasaru ainaun: ¿Itiur jiinkimia? tusa inimiayi. Tu iniamaitiat aiminachmatai, kársera nakasaru ainau maataram tusa, ni suntari ainaun akupkamiayi. Nunia Herodes Judea nungkanmaya jiinki, Cesarea yaktanam jea nuni pujusmiayi.

Herodesa jakamuri

²⁰Tura Herodes Cesarea yaktanam pujus, Tiro nungkanmaya ainaun, tura

Sidón nungkanmaya ainauncha kakarman kajerkamiayi. Turamtai nu nungkanmaya aints ainau apu Herodesa nungkarinia ni yutairin sumarmin asar, chichaman iwiartas wakeriarmiayi. Tura apu jeen wainiun Blasto naartiniun chicharinak:

—Wait aneasam, iin pachikratsam apuram chichartakum:

Iisha kajernaitsuk angkan pujustasar wakeraji, tinawai tita, —tusar chichasar-miayi. ²¹Tu tinu asaramtai Herodes:

—Ataksha nu kintati kaunkataram, —timiayi. Nu kinta tsawaaramtai,

Herodes apu entsatin nekas shiirman entsar, paan waitkarat tusa, pata amanum apu keemtainum keemas, aints ainaun chicharkamiayi. ²²Turamtai aints ainau nuna antukar untsuminak:

—Au chichaa auka aintschawaitai, antsu Yusetai, —tiarmiayi. ²³Tu tinamaitiat Herodes: Wikia Yuschawaitjai tachau asamtai, arutsuk Yuse awemamuri sungkuran akuptukmiayi. Turamtai Herodes iwiakutiat akarak jakamiayi.

²⁴Tura Herodes jakamtai, Cristonu ainau Yuse chichamen angkan etserkarmiayi. Tura asaramtai aints Yuse chichamen unturi antukarmiayi.

²⁵Turinamtai Bernabé Saulojai ni takatrin mash umisar, Jerusalénnumia Antioquíanam wakatinak:

—Juan Marcos ijiai wekaasati, —tusar jukiarmiayi.

Bernabé Saulojai wekaatan nangkamamuri

13 ¹Antioquía yaktanam Cristo umirin iruntrar pujuinamunam Yuse chichamen etserin ainau, tura Yuse chichamen nuikiartin ainausha iruntrar-miayi. Nuna naaringkia nu ainawai: Bernabé, nunia Simón, chikich naari Shuwin inaikiarmiayi, nunia Cirene nungkanmaya aints Lucio naartin, nunia Manaén, nuka Galilea apuri Herodesjai tsakaruyayi, nunia Saulo ainik armiayi.

²Tura yurumkan yutsuk ijarmawar, mash iruntrar iinu Apuri Criston maaketai tiartas pujuinamtai, Yuse Wakani nu aints ainaun chicharak:

—Yuse chichamen etserkarti tusaram, Bernabésha tura Saulosha akankaram akupkataram, —timiayi. ³Yuse Wakani tu timiau asar, ijarmawar Yusen sear umisar uwejejai muukencha achikiar: Yus yainmakti tusar akupkarmiayi.

Cristo akupkamu ainau Chiprenam wekaasamuri

⁴⁻⁵Nunia Yuse Wakani akupkamu asar, Bernabé Saulojai Seleucia yaktanam weenamtai, Juan Marcos iin yainmakti tusar, jukimu asa nusha wemiayi. Tura Seleucianam jear, kanu juunum engkema-war, isar Chipre tutainum wearmiayi. Nunia yakat Salamina tutainum jear kanunmaya jiinkiar, judío iruntau jeanam wayaawar, Yuse chichamen etsertan nangkamawarmiayi. ⁶Tura nu isranam Yuse chichamen etserkiar weenak atu yantamen yakat Pafos tutainum jear, judío aintsun Barjesús naartinun wainkarmiayi. Nuka wishnuitiat:

—Wikia Yuse chichamen etsernuitjai, —nangkami anangmak tinuyayi. ⁷Nu wishnuka ni apuri Sergio Paulojai tsanias pujuyayi. Tura nu apuka nintip asa, Yuse chichamen antuktas wakerimiayi. Tura asa:

—Bernabésha, tura Saulosha tati, —tusa untsumkiayi. ⁸Turamtai Yuse chichamen etserinamtai, wishin Barjesús naartin, chikich naari griego chichamejai Elimas naartinuyayi, nuka ni apuri Apu Jesús an umirkai tusa chicharak:

—Ju aintsu chichamengka paseetai, —timiayi. ⁹Tamati Saulo, chikich naari Pablo, nuka Yuse Wakani piatkamu asa, wishnun jijij pujurmiayi. ¹⁰Tura chicharak:

—iMaj! Ameka anangkartinuitme, tura tsanukratin asam Satanása uchirinme.

Tura asam pengker aa nuka mash tsuutame. ¿Warukaya ii Apuri chichame nekas pengker au wainiatmesha tuke inaitsuk paseetai tame? ¹¹Yamaikia ii Apuri amincha wait wajaktinnasha suramsatataui. Tura jiimin kusumtikramratatui. Tura asamtai tsaa tsanmausha wainkashatme, —timiayi.

Nu tamaujui metek wishnu jiiingka kusurmiayi. Tura wainmichu asa, aintsun eak:

—Uwejrún achirkam wekaatsata, —timiayi. ¹²Nu turunamtai apuka nuna wainak, ii Apuri chichame etsermaun antuk nintimrau asa, Criston nekasampita timiayi.

Pablo Bernabéjai chikich Antioquía yaktanam wekaasamuri

¹³Nunia Pablo ni tsaniakmaurijai ataksha kanu juunnum engkemawar, Pafos yaktan ukukiar juun entsanam wekaasar, Perge yaktanam Panfilia nungkanam jearmiayi. Tura nuni pujuinai, Juan Marcos: Waketkitaj tusa Jerusalénnum waketikimiayi. ¹⁴Turamtai Perge yaktanmaya jiinkiar, Pisidia nungkanam wekaasar, chikich yaktanam Antioquía tutainum jearmiayi. Nu yaktaka Pisidianmaya Antioquía inaikiamuitai. Tura nuni jear, ayamtai kintati judfo iruntai jeanam wayaawar keemsarmiyai. ¹⁵Tuminamtai Moisésa aarmaurin aujsar, tura Yuse chichame etsernu aarmaurincha aujsar umisar, judfo iruntai jea juuntri ainu Pabloncha tura ni amikrincha chicharinak:

—Yatsur ainautiram, chicham timin amataikia, yamaikia titaram, —tiarmiayi.

¹⁶Tu tinamtai, Pablo wajaki, anturtukarat tusa, uwejen takui chichaak:

—Israel ainautiram, Yus pengker nintimtin ainautirmeke anturtuktaram.

¹⁷Israel ainauti Yusri ningki wakerutmau asa, yaanchuik ii juuntri ainaun Egipto nungkanam pachiinkar pujuinauncha pengker awajsau asa nukap yujramiayi. Tura yujaramtai ni kakarmarijai ii juuntri ainaun Egiptonmayan jiiikmiayi. ¹⁸Tura aints atsamunam cuarenta (40) musach Yus ni turamurincha tsantramiayi. ¹⁹Tura Canaán nungkanam pujusarat tusa, siete (7) nungkanmaya aints ainaun niish niish chichau ainaunka mash amukmiayi. Tura ni nungkarin Israel ainautin tuke nuni matsamsataram tusa suramsamijai.

²⁰Turamtai Ejipto nungkanam pujuinai cuatrocientos cincuenta (450) musach nangkamaramtai, Yus ni aintsri ainaun inartas chichaman nekamtikin ainaun akupkamiayi. Nunia Yuse chichame etserin, Samuel naartin akiinamiayi.

²¹Nunia Israel ainu Samuelan chicharinak: Apu inaiturkata tiarmiayi. Tinamtai: Cisa uchiri Saúl naartin, Benjamínka weari amia nuna atumi juuntri apuri ati tusa, Yus tsangkatkamiayi. Turamtai Saúl cuarenta (40) musach Israel ainaun inarmiayi. ²²Nunia: Saúl yamaikia apu ahati, antsu David apu ati, Yus timiayi. Tura Davidtan pachis chichaak: Isaífa uchiri Davidka nekas wína wakeramurun tuke umirtuktas wakerau asa, wína nintirun waramtikrusi, Yus timiayi. ²³Yus nuna turatnuitjai tinu asa, Davidta weari kichik Israel ainautin uwemtikramratas, nukap arus Jesúsana akupturmakmijai.

²⁴Tura Jesúska akiintsaing, Juankua akiinamiayi. Nuka aints ainaun Yuse chichamen ujaak: Atumi nintimauri yapajiam Yus umirkuram maaitaram tusa chicharkamiayi.^m

²⁵“Tura ni jakatniuri jeatak wajasamtai, aints ainaun chicharak: ‘¿Atumka wína pachitsaram itiu nintimrume? Atumka: Mesíasaitai turutrumena nuchawaitjai.

Antsu wína ukurun akiinamia nuka wína nangkatusang kakaram atatuí. Tura asamtai wikia mianchau asan, tsuntsumruan nuna sapatrí jingkiamurin atitataj tayatun, timiá natsaamakun atitachminuitjai. Nuka Mesásaitai, timiayi.ⁿ

²⁶“Yatsur ainautiram, Abrahama weari ainautirmesha, Yus pengker nintimsaram pujuinautirmesha anturtuktaram: Ju uwemratin chichamnaka atumin akupturmakuitai. ²⁷Nintimrataram.

Jerusalénnum pujuinausha, tura ii juuntri ainausha ¿Jesús warí aintski? tusar nekaacharmiayi. Tura ayamtai kintajai metek tuke judío iruntai jeaman wayaawar, Yuse chichamen etserin ainau Yuse chichamen aujinaumtaisha pachischarmiayi. Antsu Yuska yaanchuik: Nu turunatnuitai tímia nunisarang: Jesús jakati tiarmiayi. Tura asar Yus tímia nunaka miatrusarang umirkarmiayi. ²⁸Tura niin nangkamiar maachminun waininayat: Pilato Jesúsán maati tiarmiayi.^o

²⁹“Tura asaramtai yaanchuik Yus turunatnuitai tímia nunaka mash miatrusarang umikiar, numinam maawaru asaramtai, ni namangken numinmayan kuakiar iwiarsarmiayi.^p

³⁰Tura wainiat Yus niin jakamunmaya inankimiayi. ³¹Tura Jesús nantakin asa, wína nemartin ainau waitkarti tusa, untsuri kinta Galilea nungkanmaya ainaun nijai Jerusalénnum tsaniasar jearmia nunasha wantintukmiayi. Tura asamtai nu aints ainau yamaisha chikich ainauncha Jesúsán pachisar ujainawai.^q

³²⁻³³“Tura asamtai ii yaanchuik juuntri ainaun Yus ni uchirin pachis: Jaka nantaktinuitai, tímia nunisang Jesúsánka inankimiayi. Nu uwemratin chichamsha iisha atumin ujaajrume. David Jesúsán

pachis Salmo jimiari tutainum aarmia nuka nuwaitai. Yus ni uchirin chicharak: ‘Ameka wína nekas Uchiruitme. Ju kintati wína kakarmarun suajme,’ timiayi. Tu aarmawaitai.^r

³⁴“Nuniasha Yuse chichame Jesúsán pachis tu aarmawaitai. ‘Yus ni uchirin chicharak: Davidtan nekas pengker awajsamiaya nunisnak amincha pengker awajsatatajme timiayi.’^s Tu tinu asa, Jesúsán namangke kaurchatí tusa, jakamunmaya inankimiayi. ³⁵Tura asamtai chikich Salmonam Jesúsán pachis tu aarmawaitai: ‘Ami inatiram nekas pengker asamtai, ni namangkengka kaurti tusamka tsangkamrukchatnuitme.’^t ³⁶Antsu nunaka Davidta namangkenka pachiska tichamiayi. Yus Davidtan turata tímia nunaka mash umikmiayi. Nunia ni juuntri jakarmia nunisang Davidcha jakamiayi. Tura asa ni namangkengka kaurmiayi.

³⁷Antsu Yus inankimia nuka kaurchamiayi.

³⁸⁻³⁹“Yatsur ainautiram, nusha nekaataram: Jesús atumi tunaarin sakturmaru asamtai, nu chichaman atumin etserkaruitai. Moisés umirkatin chichamka umirkayatrume, atumi tunaaringkia sakarchamnawaitrume. Antsu Jesús nekasampita takurminka, atumi tunaarinka mash sakturmartinuitrume.

⁴⁰⁻⁴¹Yuse chichame tu aarmawaitai:

‘Wishikiartin ainautiram nintimrataram. Atum iwiaku pujakrumin, wisha wainchatí takatan takaamtaisha, chikich ainau nuna pachis atumin ujatminau wainiatrume, atumka nekasampita pengké tichatnuitrume. Tura asaram atumsha mengkakai tusaram shamkataram,’ Yus tawai.

Tu tinu asamtai, Yuse chichame etserin tiarmia nuna turunawai tusaram aneartaram,” Pablo timiayi.^u

⁴²Tura chichas umis, Pablo Bernabéjai judío iruntai jeanmaya jiinkiarantai, aints ainu niin chicharinak:

—Wait aneasrum, yamai etserkarume nuka chikich ayamtai kintatisha nunisrumek etseritaram, —tiarmiayi. ⁴³Tura judío iruntai jeanmaya mash jiinkiar, Yuse umirin judío ainu tura judíocho ainausha untsuri Pabloncha, tura Bernabéncha nemarkarmiayi. Nemarkaram nu aints ainu chicharinak:

—Yus atumin wait anentramrau asamtai, pengker nintimsaram tuke inaitsuk Cristo umirkataram, —tu akatrar ukukiarmiayi.

⁴⁴Nunia chikich ayamtai kinta jeamtai, nu yaktanam pujuinau mash Yuse chichamen antukartas iruntrarmiayi.

⁴⁵Tura judíocho ainu timiá untsuri kaunkaramtai, judío ainu nuna wainkar, Pablon suwirpiaku jiisar:

—Nangkami tawai, —tiarmiayi. Tura asar Pablon pachisar pasé chichasarmiayi.

⁴⁶Turinamtai Pablo Bernabéjai shamkartutsuk judío ainu chicharinak:

—Yus turataram iin turamin asamtai, atum nuwá eemkaram ni chichame antuktaram tusar, atumin etserkamin amiaji. Tura wainiatrum atumka tuke iwiaaku pujustinka nakitau asakrumin, yamaikia judíocho ainamunam nu chicham etserkatai tusar weaji. ⁴⁷Ii Apuri nu chichamsha etserkataram tusa iin akatramramiaji. Yus chichaak:

“Judíocho ainu paan nintimrarti tusaram, wina chichamur mash aints ainamunam etserkataram. Tura asaram mash nungkanmaya ainausha arák pujuinausha uwemrarat tusaram, turataram

tajarme.” Tu aarmawaitai,

—Pablo timiayi.

⁴⁸Tamati judíocho ainu nuna antuku asar warasar: Yuse chichame timiá pengkeraitai tiarmiayi. Tura pujut nangkankashtinun jukiartin ainuka Jesúsán nekasampita tiarmiayi. ⁴⁹Tura Yuse chichamen etserinamtai, nu nungkanmaya ainu mash antukarmiayi. ⁵⁰Antsu judío ainu kajerinak nu yaktanmaya juuntri ainausha, tura nuna nuwari ainausha, judío iruntai jeanam tuke winiarmia nuna:

—Atumsha Pablo Bernabéjai ii nungkarinia jiinkarti tusaram pasé awajsataram, —tusar chichaman najatiarmiayi. ⁵¹⁻⁵²Nu judío ainu Yuse chichamen antutan nakitinau asaramtai, Pablo tura Bernabé sha ni sapatrin kuinkar, nungka tsetserin japawar ukukiarmiayi. Yus atumin wait wajaktiniun suramsarti tusar nunaka turuwarmiayi. Tura nu yaktan ukukiaramtai, Cristonu ainu juwakarun Yuse Wakani piatkamu asar tuke warasarmiayi. Turinamtai Pablo Bernabé jai chikich yaktanam Iconio tutainum wearmiayi.^v

Pablo Bernabéjai Iconio yaktanam pujusmauri

14 ¹Pablo Bernabéjai Iconio yaktanam jear, judío iruntai jeanam wayaawar, Yuse chichamen etserkarmiayi. Tura nuni etserinamtai, judío ainu, tura judíocho ainausha untsuri Criston nekasampita tiarmiayi. ²Turinamtai judío Cristo umirchau ainu judíocho ainu chicharinak: Cristonu ainu kajerkataram tusar, pasé nintimtk-rarmiayi. ³Tura waininayat Pablo Bernabéjai untsuri kinta nuni pujusarmiayi. Tura ii Apurin nintimsar shamkartutsuk: Yus aints ainu pengker

awajsatas wakerawai tusar ujakarmiayi. Tu ujakaramtai Yus: Nuna wina kakarmarjai etserinawai tusa, wainchati takatnasha aintska ititurkachminun najanmantikiamiayi. ⁴Turinamtai nu yaktanam pujuinau metekchau nintimsar, chikich ainau judío Cristo umirchau ainau chichamen umiriarmiayi. Antsu chikich ainausha Cristo akupkamu ainau chichamen umiriarmiayi. ⁵Turinamtai judfochu ainau, tura judío ainausha ni juuntri ainaujai iruntrar chichainak:

—Nu aints ainau pasé awajsarmi, tura kayajai tukurarmi, —tinamtai, ⁶Pablo Bernabéjai nu tinamun anturmamkar, nu yaktanmaya jiinkiar, Licaonia nungkanam Listra yaktanam jear, nunia Derbe yaktanam wearmiayi. ⁷Tura nuni jear Yusnum uwemratin chichaman etseriarmiayi.

Listra yaktanam Pablo kayajai tukurmauri

⁸Listra yaktanam aints wekaichau pujumiayi. Nuka akiinamunmaya tuke wekaichau ayayi. ⁹Nu aintska Pablo chichaamun antuk: Nekasnapi tsaartatja, tu nintimias pujamtai, Pablo nuna wainak, ¹⁰kakar chicharak:

—Wajakim tupin wajasta, —timiayi. Tamati tsekengki wajaki, wekaichautiat wekaatan nangkamamiayi. ¹¹Turamtai nunia aints ainau Pablo turamurin wainkar, Licaonia nungkanmaya chichamejai unsumkar:

—Ii yusri aintsua tumau iin tarutmiji, —tiarmiayi.

¹²Tinau asar Bernabén pachisar chichainak:

—Juka ii yusri Júpiteraitai, —tiarmiayi. Tura Pablo chicharkartau asamtai, niin pachisar:

—Juka ii yusri Mercuriowaitai, —tiarmiayi. ¹³Tinamtai yakat wayaamunam nu yaktanmaya ainau yusri Júpiter naartinu jee amiayi. Tura ni yusri jee

wainin sacerdote tutai, waaka ainauncha, tura yangkur ainauncha itaar, mash aints ainaujai iruntrar Pabloncha, tura Bernabéncha: Atumka ii yusrintrume tiartas, waakan maawartas wakeriarmiayi. ¹⁴Turinamtai Bernabé Pabljai nuna nekaawar, Yuschau arining turaminaji tusar, nuka pengké paseetai tusar, wejmakrin jaakarmiayi. Tura nu aints ainan chicharkartas ampukiar wear unsumkar:

¹⁵—Juun ainautiram ¿waruka aitkarme? Iisha atumea nunisrik aintsuitji. Tura asar atum nangkamrum aitkarme nu inaisaram ukukrum Yus nekas iwiaaku aa nu umirkataram titasar winaji. Nekas Yuska nayaimpincha, tura nungkancha, tura juun entsancha, tura mash nungkanam aa nuna najanamiayi. ¹⁶Yaanchuikia aints ainan ni wakeramurin najanawaru wainiat, Yuska nunaka pachischamiayi. ¹⁷Turayat wi nekasani Yusetjai tusa, aints ainautin mash nekaamtikramatas yumin jitungkui. Tura árak araamusha pengker nerekti tusa, aints ainautin ii yutairinka nukap suramji. Tura warasarti tusa, iincha pengker awajtamji, —tiarmiayi.

¹⁸Tu tinau waininayat aints ainan tuke Pabloncha, tura Bernabéncha: Atumka ii yusrintrume tiartas, waakan maawartas wakeriarmiayi. Antsu nuna inaisataram timiau asar inaisarmiayi.

¹⁹Turinamtai Antioquíanmaya judío ainan, tura Iconionmaya judío ainausha Listranam jear, Listranmaya ainan: Pablo pasé awajsataram tusar nintimtikrarmiayi. Turamu asar Pablon kayajai tukua tukuaka kajinmakamtai: Yanchuk jakayi tusar, namangken japikiar yakta aarin japawar ukukiarmiayi. ²⁰Turuwaramtai Cristonu ainan Pablon tariar tentakarmiayi. Turinam nantaki ataksha nu yaktanmak wayaamiayi. Tura kashin tsawaar, Bernabéjai nu yaktanmaya

jiinkiar, chikich yaktanam Derbe tutaunum wearmiayi.

²¹Tura nu yaktanmasha jear, Yusnum uwemratin chichaman etserkarmiayi. Turinamtai aints untsuri Criston nemarkaramtai, nu yaktancha ukukiar, Listranam ataksha wakеткиar, nunia Iconionam jear, Pablo Bernabéjai Antioquíanam wakеткиarmiayi. ²²Tura chikich chikich yaktanam Cristonu ainau pengker nintimtikrartas chicharinak: —Kakaram wajasrum, Cristo tuke inaitsuk nekasampita titaram. Iikia Yuse pujutirin nukap wait wajakur jeamna-waitji, —tiarmiayi. ²³Tura chikich chikich yaktanam Cristonu ainau juuntrin inaikiar, nunia ijarmawar Yusen sear, Cristonu ainaun chichasar umisar: Ii Apuri atumin yainmakarti tusar ukukiar-miayi.

Pablo Bernabéjai Siria nungkanam Antioquia yaktanam wakеткиmuri

²⁴Nunia jiinkiar Pisidia nungkanam nangkamakiar, Panfilia nungkanam jearmiayi. ²⁵Tura nuni jear, Perge yaktanam pujuinaun Cristo chichamen ujakarmiayi. Nunia jiinkiar, Atalia yaktanam jearmiayi. ²⁶Tura nuni juun kanunam engkemawar, yaanchuik jiinkiarmania nu Antioquia yaktanam wakеткиarmiayi. Pablo Bernabéjai nu yaktanmasha jininatsaing, Cristonu ainau niin akupinak: Yus atumin: Cristo chichame etserkataram tusa, pengker awajtamsarti tusar, yaanchuik akupkamu asar, nu yaktanam ataksha jearmiayi. ²⁷Tura Antioquíanam jear, Cristonu ainau irunrartai tusar untsukarmiayi. Tura mash irunraramtai, Yus niin kakamtikramu asar, chikich yaktanam turuwarmia nuna mash etserkarmiayi. Tura etserinak: Yus judfochu ainaun Jesúsán nekasampita tiarat tusa, nintimtikramu asar, nuna pachisar ujakarmiayi. ²⁸Tura Pablo

Bernabéjai Cristonu ainaujai nukap kinta iruntrar pujusarmiayi.

Jerusalénnum iruntramuri

15 ¹Pablo Bernabéjai Antioquíanam pujuinai, Judea nungkanmasha ainau irasartas taarmia nuka Cristonu ainaun nuininak:

—Moisés tímia nunisrumek nuwapchiram charutsuk pujakrumka uwemrashtinuitrume, —tiarmiayi. ²Nuna tinamtai Pablo Bernabéjai nu aints ainaun kakarar chicharinak:

—Tuuka atsui, —tiarmiayi. Tu tinau asar, metekka nintimracharmiayi. Tuminamtai Cristonu ainau Pablóncha, tura Bernabéncha:

—Atumsha chikich aints ainaujai Jerusalénnum werum, Cristo nuiniatiri ainausha, tura Cristonu ainau juuntrisha nu chicham pachisrum: ¿Itiurkamnauki? tusaram nekaataram, —tiarmiayi.

³Tusar akupkarmau asar, Fenicia nungkanam nangkamakiar, tura Samaria nungkanmasha nangkamakiar, Cristonu ainamunam jear:

—Judfochu ainau nekasar yaanchuik ni turutirincha inaisar Criston namarinawai tinamtai, nuna antukar nukap warasarmiayi.

⁴Nunia Jerusalénnum jearamtai, Cristonu ainau, tura Cristo nuiniatiri ainausha, tura Cristonu ainau juuntri ainausha pengker nintimtusar: Winitaram tiarmiayi. Tinamtai Pablo Bernabéjai Yuse turamurin mash etserkarmiayi. ⁵Turinamtai fariseo Cristonu ainau wajakiar chichainak:

—Moisés iin chichaman akupturmaku asamtai, Cristonu judfochu ainausha nekasar nuwapchirin charutkartai, tura Moisésa chichamen miatrusarang umikiarti tusar nuiniarartinuitai, —tiarmiayi.

⁶Tu tinu asaramtai Cristo nuiniatiri ainau, tura Cristo nemarnu juuntri

ainausha nu chicham nekaatai tusar iruntrarimiayi. ⁷Tura chichainak pujuinai, Pedro wajaki chichaak:

—Yatsur ainautiram, yaanchuik Yus wína chichartak: Judíocho ainau Criston nekasampita tiarti tusam, Yusnum uwemratin chicham ujakta tusa akuptukmiayi. Atumsha nuka nekarme.^w ⁸Tura Yus aintsu nintin mash nekau asa: Wikia judíocho ainauncha uwemtikratanan wakerajai tusa, Yuse Wakani nekas pengker aa nu ii nintin piatramkamiayi nunisang judíocho ainauncha piatkamiayi.^x ⁹Tura judíocho ainaun: Judíowa nunisrumek uwemrau ataram timiau asar, Criston nekasampita tinau asaramtai, ni nintincha japiramiayi. ¹⁰Turamu asamtai ii juuntrisha Moisésa chichamen umirkartatkama pengké tujinkarmiayi. Iisha nunisrik tujinuyaji. Tura itiurkachmin ayatrumsha, éwarukaya judíocho ainau Moisésa chichamen mash umirkarti tuusha nintimrume? éYus iin kajertamkat tusaram, nuka tatsurmeash? ¹¹Antsu tuuka nintimtsuji. Ii Apuri Jesús iin wait anentramak jarutramkau asamtai, iikia nekasampita tinu asar uwemrawaitji. Tura asamtai judíocho ainausha iiya nunisarang uwemrartin ainawai, tu nintimji, —Pedro timiayi.

¹²Tama mash aiitsuk pachitske pujuarmiayi. Tuminamtai Bernabé Pabljai aints ainaun ujainak: Aints wainchati takatnasha, tura tujintamu turatnuncha judíocho ainau mash wainkarti tusa, Yus turumtikiamu asar mash etserkarmiayi. ¹³Tura chichasar umisaramtai, Santiago chichaak:

—Yatsur ainautiram, anturtuktaram. ¹⁴Simón Pedro iin chichartamak: Yus nu nangkamtaik: Wína aintsur ataram tusa, judíocho ainauncha eakmiayi. Nuna

iincha ujatmaji. ¹⁵Nu turunatniun pachisar Yuse chichame etserin ainau yaanchuik aararmiayi. Nu aarmauka nuwaitai: Yus chichaak:

¹⁶Nukap arusan Davidta weari arák wearuncha nuna ataksha irurtinuitjai. Davidta weari ampintrau ainau jea yumpunkawa nunisang pujuinai wainiatnak, aints jean iwiarua nunisnak ataksha angkan pujusarti tusan pengker awajsatnuitjai.

¹⁷Chikich nungkanmaya ainau mash wína eatkarat tusan, tura mash wína aintsur arat tusan turatnuitjai, Yus timiayi.

¹⁸Yus yaanchuik nu mash nekaataram tusa, ni chichamen iin akupturmakmiayi, tu aarmawaitai.

¹⁹Tura asamtai judíocho ainau ni yaanchuik nintimtai inaisar, Yusen nemarkartas wakerinau wainiatrumek: Nuwapchiram charuktaram tichamnawaitai tajarme. ²⁰⁻²¹Tura Moisésa chichame etserin ainau yaanchuik kichik kichik yaktanam iruntai jeanam Moisésa aarmauri tuke aujsar yamaisha nunisrumek umirkataram tusar, ayamtai kintajai metek nu chichamnasha etserinau asaramtai, iikia papi aarar akupakur: Aints ni najanamurin: Wína yusruitai tina nunaka inaisarti. Nunisha tsanirmatnasha inaisarti. Nunia niapir maamunka numpentin asamtai yuwacharti, nunia numpancha umutsuk asarti tusar, papi aarar akupkarmi, —Santiago timiayi.

Judíocho ainaun papi akuptukmauri

²²Tamati Cristo nuiniatiri ainau, Cristonu ainau juuntri ainaujai, Cristonu ainaujai mash metek nintimrar, Cristonu ainau juuntrin jimieran Pabljai, tura Bernabéjaisha Antioquíanam akupkatai tusar eakarmiayi. Tura aintsun eakarmia

nuka nuwaitai: Kichik Judas Barsabás, tura kitcha Silas naartinuyayi. ²³Tura nu aints ainaujai papin akupkarmiayi. Nu papikia tu aarmauyayi:

“Cristo nuiniatiri ainautikia, tura Cristo nemarnu juuntri ainautikia, atum judfochu ayatrum Cristonu asakrumin, Antioquíanam pujautirmin, nunia Siria nungkanam pujautirmin, nunia Cilicia nungkanam pujautirmincha chichaman akuptajrume. ²⁴Junia aints ainu ningki nintimsar, ii akupkachmau ainayat, atumin jear: ‘Nuwapchiram charuktaram, tura Moisés umirkatin chicham mash umiktaram,’ tusar atumin itit awajtaminu asaramtai, atum napchau nintimsar pujamusha antukmajai. ²⁵Tura asar iikia mash iruntrar atumin metek nintimtusar jimia aints akupkatasar inaikiamji. Nu aintska jimiar ii aneetiri yachi ainu Bernabé tura Pablojai tsaniasar wekaasarti tusar akupaji. ²⁶Nuka ii Apuri Jesucriston miatrusarang umirin asaramtai, maawartas wakeriarmiayi. ²⁷Tura asamtai Judas Silasjai apatkar akupaji. Nuka ii timiaji nuna mash atumin ujatmaktatrume. ²⁸Yuse Wakani iin nintimtikramrau asamtai, iisha nunisrik nintimsar: Atum nuke umirkataram tusar tajirme. ²⁹Aints ni najanamurin: Wina yusruitme tina nu susamuka yuwairap. Tura numpasha umutsuk asataram. Tura niapir maamuka numpentin asamtai yuwairap. Tura tsanirmat inaisataram. Tu pujakrumka nekasrum pengker pujastarume. Yus atumin yainmakarti.” Tu aarmauyayi.^y

³⁰Tura papin aarar mash umisar: Antioquíanam wetaram tusar, akupkar-mau asar, Antioquía yaktanam wearmiayi. Tura nuni jear, Cristonu ainu mash iruntrarar tusar untukarmiayi. Tura mash kaunkaramtai papin

susarmiayi. ³¹Tura susaram, papin aujsar umisar pengker nintimsar warasarmiayi. ³²Turinamtai Judascha, tura Silascha Yuse chichamen etserin asar, Cristonu ainaun chichaman untsuri ujakar pengker nintimtikrarmiayi. Tura Cristo miatrusru-mek umirkataram tusar kakamtikrarmiayi. ³³Turamu asar nukap arusar nu yaktanmaya Cristonu ainu: Pengker nintimsaram angkan waketkitaram tusar, Jerusalénnumia taarun akupkarmiayi. ³⁴Akupinamaitiat Silaska nuni pujustas wakerimiayi. ³⁵Tura Pablo Bernabéjai Antioquía yaktanam juwakarmiayi. Tura kichik aints ainaujai ii Apuri chichamen nuiniarmiayi. Tura aints ainu Yusnum uwemratin chichaman tuke ujakarmiayi.

**Pablo ataksha Yuse
chichamen etserkatas wemaui**

³⁶Jumchik arus Pablo Bernabé chicharak:
—¿Cristonu ainu itiu pujui nawak? tusar ataksha jiiwearmi. Tura chikich chikich yaktanam ii Apuri Cristo chichame etserkamiaji nuni ataksha iraumi, —timiayi.

³⁷Tamati Bernabé: Ayu tusa, Juan Marcos iijai ataksha wekaasati tusa ayatas wakerimiayi. ³⁸Antsu Marcoska Yuse takatrin takakmatan nakitak Panfilia yaktanmaya waketkin asamtai, Pablo ayatan nakitmiayi.^z ³⁹Tamati metekchau nintimtusar:

—Kanakar wekaasami, —tusar kanakarmiayi. Tura asa Bernabé Marcosan ayas isra Chiprenam wearmiayi. ⁴⁰Tuminamtai Pabloka Silasan ayamiayi. Tura weenamtai Cristonu ainu:
—I Apuri atumin yainmakarti, —tusar akupkarmiayi. ⁴¹Tura akupinam jiiinkiar

Siria nungkanam wekaasar, tura Cilicia nungkanmasha wekaasar, Cristonu ainaun kakamtikrarmiayi.

Timoteo Pablo Silasjai nemarsamuri

16 ¹Pablo Silasjai Derbe yaktanam jear, nunia jiinkiar, Listra yaktanam jear, nuni Cristo nemarkin Timoteo naartinun wainkarmiayi. Timoteo nukuringkia judío nuwa ayayi. Nusha Cristo nemarnuyayi. Antsu aparingkia griego aintsuyayi. ²Turamtai Cristonu ainaun Listranam pujuinau, tura Iconion-masha pujuinau Timoteon pachisar pengker chichasarmiayi. ³Tura asamtai Pablo chichaak:

—Timoteo ijai wekaasati, —tusa wakerimiayi. Turayat nuna aparingkia griego aints asa, uchiri nuwapchirin charutkachmiayi. Tura asamtai judío nuni pujuinau nunaka mash nekaawaru asar, Timoteon pasé nintimturarai tusa Pablo:

—Nuwapchirin charutkartti, —timiayi. ⁴Turamtai nuna umis, nunia tsaniasar wekaasar, chikich chikich yaktanam jear, nuni Cristo nuiniatiri tura Cristo nemarnu juuntri Jerusalénnum pujuinau papin aarar akupkarmia nuna ujarkuta wearmiayi. ⁵Tu ujainau asar, Cristonu ainaun: Miatrusarang Criston umirkarat tusar kakamtikinak kintajai metek yujrarmiayi.

Pablo Macedonianmaya aintsun karanma nunisang wainkamuri

⁶Yuse Wakani: Asia nungkanam Yuse chichame etserkairap, tusa surimkamiayi. Tura asamtai, Pablo Silasjai Frigia nungkanam nangkamakiar, nunia Galacia nungkanam nangkamakiar, ⁷Misia nungkanam jear, Bitinia nungkanam weartas wakeriarmiayi. Tu nintiminaun

wainiat: Nuningkia weerap, tusa Jesúsua Wakani surimkamiayi. ⁸Tura asamtai Misia nungkanam wekaasar, juun entsa yantamen Troas yaktanam jearmiayi. ⁹Tura nuni jear kashi Pablo karanma nunisang Macedonia nungkanmaya aints wajaun wainkamiayi. Tura ni chichamen antukmiayi. Nu chichamka nuwaitai: “Katingkiam iin yaingkratkatasam winita.” ¹⁰Tura Pablo karanma nunisang nu aintsun wainkau asamtai, iikia nintimsar: Nekas Yus nu nungkanmaya ainaun Yusnum uwemratin chicham etserkataram, tusa untsurmaji tu nintimsar, Pablo ijai Macedonia nungkanam katingmi tusar umismiayi.

Pablo Silasjai Filiposnum pujusmauri

¹¹Nunia Troasnum juun kanunam engkemar, juun entsanam tupnik wekaasar, isar Samotracia tutainum wemiayi. Tura nuni jear, kashin tsawaarar nunia jiinkir, Neápolis yaktanam jeamiayi. ¹²Nunia juun kanunmaya jiinkir, Filipos yaktanam wemiayi. Nu yaktaka Macedonia nungka juun yaktayayi. Nuka romano yaktarisha ayayi. Iikia nu yaktanam jear, nuni jumchik kinta pujusmiayi.^a

¹³Tura nuni pujarin, ayamtai kinta tsawaaramtai: ¿Yakta aarin judío ainu Yusen seainatsush? tusar yaktanmaya jiinkir, entsa yantamen aanum Yus seatinam jear, nuni keemsar, nuwa ainu Yuse chichame ukjamiji. ¹⁴Tura nuwa antinak pujuinamunam Tiatira yaktanmaya nuwa, Lidia naartin pachinkamiayi. Nuka tarach shiirman kapantakun surinuyayi. Tura Yusen seauyayi. Nuka Pablo chichaamun antuk, ni etsermaurin nintimramiayi. Tumamtai Yus ni nintin uratmiayi. ¹⁵Turamtai Lidia ni weari ainuajai Criston nemarkartas

entsanam mainiarmiayi. Tura nu umisakrin Lidia iin chichartamak:

—Nekasrum Apu Criston nemarnuitai turutkurmeka, wait aneasrum wina jearun wayaaram, nuni pujustaram, —timiayi. Tamati iikia ni jeen wayaar nuni pujusmiaji.

¹⁶Tura nuni pujusar, chikich kintati Yus seatinam wearin, nuwawach wakantrin-tin iin ingkunmakmiaji. Aints ainau nu nuwachin: ¿Ukunam itiu pujustatja? tu iniinam, iwianch niin nekantikmau asa, ni pujustintrincha paan etsernuyai. Tura nu nuwawach aints ainau inatiri asamtai, nu nuwachin inauya nunaka nukap akiu armiyai. ¹⁷Nu nuwachikia iin nemartamas unsumak:

—Ju aints ainauka nekasar Yus nayaimpinam puja nuna inatiri ainawai. Tura atumin: Uwemratin chichaman ujatminawai, —timiayi.

¹⁸Tura turaka untsuri kinta unsumkinij wajamiayi. Tuke inaitsuk turamtai, Pablo yawetar ayanmatar iwianchin chicharak:

—Jesucristo naarijai tajame: Ju nuwachikia ukukim, jiinkim weta, —akupak timiayi.

Tamati nu tamaujai metek iwianchkia jiinki ukukmiayi.

¹⁹Nu nuwachinmaya iwianch jiinkin asamtai, ni inau ainau nuna nekaawar: Yamaikia kuik jukishtatji tusar, napchau nintimrar Pabloncha, tura Silasnasha kajerkar achikiar, yakta japen apu pujuinamunam jukiarmiayi. ²⁰Tura yakta apurin jeeniar tsanuminak:

—Ju aintska judfo asar, ii yaktarin taar, iin napchau nintimtikraminaji. ²¹Tura ni turamurinka nuitaminaji. Antsu iikia romano asar, nu chichamka antukchat-nuitji. Tura ni turamuringkia turashtinuitji, —tiarmiayi.

²²Tu tinamtai aints untsuri kakarman kajerkararmiayi.

Turinamtai apu ainau ni aintsrin akupkar:

—Ju aintsu wejmakri aitikaram numijai awatratararam, —tiarmiayi. ²³Nunia nukap awatrar umisar karsernum engkewar, karsera wainiun:

—Ju aints jiinkiarai tusam, tenap wainkata, —tusar awajutsarmiayi. ²⁴Tu timiau asa, karsera wainin Pabloncha tura Silasnasha karsera nitkarin tee amanum engkewarmiayi. Tura wajascharti tusa, tau jimiar amanum kangkajin kuinkach-minun chanuntawarmiayi.

²⁵Turamtai kashi japeng Pablo Silasjai Yusen sear, kantancha kantawarmiayi. Tura kantaminamtai, chikich karsernum engkeamu ainau ni kantarin pengker nintimsar antu pujuarmiayi. ²⁶Kantaminai aneachmau kakaram uurkamiayi. Tura uurak karsera wenukrincha kaya najanamun nukap peakmiayi. Turamtai karsera waitiri ningki mash uranmiayi. Tura aints achikmau ainau jirujai jingkiamuri ningki mash tsurararmiayi. ²⁷Turamtai karsera wainin kuraat shintar, karsera waitirin urankaun wainak: Achikmau ainau mash tupikiakcharmasa, tu nintimias ningki maamatas saapirin achikmiayi. ²⁸Turamtai Pablo nuna wainak kakar chicharak:

—Maamawaip. Iikia mash pujaji, —timiayi.

²⁹Tamati karsera wainin ni inatirin akupak:

—Kantii akaam nimta, —timiayi. Tamati kantiin keemak itaamtai, karsernum ampuki waya shamak kuraimiayi. Tura Pablo Silasjai wajamurin naka tikishmatramiayi. ³⁰Tura karsera wainin Pablon tura Silasnasha karsernumia jiiki chicharak:

—¿Uwemratsnasha warinak ititurkatj? —tu iniasmiayi.

³¹Tu iniam nuka aiminak:

—Apu Jesús nekasampita tusam, amesha ami wearmijai mash uwemrata-trume, —tiarmiayi.

³²Tura Yuse chichamen ni jeen iruntrar pujuinau mash antukarti tusar ujakarmiayi. ³³Nuna umisaramtai, kashi wainiat kársera wainin ni numparmaurincha nijatramiayi. Tura nuniangka kársera wainin ni weari ainaujai mash Criston umirkartas mainiarmiayi. ³⁴Nuna umisar Pabloncha tura Silasnasha ni jeen iwiak yutan yuramiayi. Nuniasha ni weari ainaujai mash Yusen nekasampita tinu asar nukap warasarmiayi.

³⁵Kashin tsawaar, nu yakta apuri ainau kársera wainunam: Nu aintsun jimiaran akupkati tusar ni aintsrin akupkarmiayi. ³⁶Tinamtai kársera wainin Pablon nu chichamnasha ujaak:

—Yakta apuri ainau atumin jiirmakiar-tas chichaman akupturminawai. Tura asaramtai yamaikia jiinkiram angkan pengker nintimsaram wetaram, —timiayi.

³⁷Tamaitiat Pablo apu inatirin ayaak:

—Atsa, ðiikia romano arincha waruka chichamnaka nekartamtuksha aints jiiminamunmasha awatamrarmaji? ¿Tura waruka karsernumsha engketmamji? ¿Waruka yamaikia ukar akuptamkartascha wakerutminaji? Tuuka wechatatji. Antsu ningki taar, iincha jiirmakiar akuptamkarti, —timiayi.

³⁸Tama apu inatiri waketkiar, ni apurin nu chichamnasha ujakarmiayi. Tura romano ainawai tinamtai, yakta apuri shamkarmiayi. ³⁹Tura ningki karsernum weriar, nuni wayaawar Pabloncha Silasnasha: —Tsangkutrutram, —tiarmiayi. Tura karsernumia jiikiar:

—Wait anearum, ju yaktanmayangka jiinkiram wetaram, —tiarmiayi. ⁴⁰Tinamtai Pablo Silasjai karsernumia jiinkiar, Lidia jeen wearmiayi. Tura nuni jear, Cristonu ainaun chicharinak:

—Pengker nintimsaram Cristo umirkataram, —tusar yaktanmaya jiinkiararmiayi.

Tesalónica yaktanam wekaasamuri

17 ¹Nunia Pablo Silasjai wekaasar Anfípolis yaktan nangkaikiar, nunia Apolonia yaktan nangkaikiar, Tesalónica yaktanam jearmiayi. Nuni judío iruntai jea amiayi. ²Tura Pablo tuke turin asa, nu yaktanam jea, kempatam seman pujus, ayamtai kinta jeamtai, judío iruntai jeanam waya, Yuse chichamen pachis judío ainaujai chichasmiayi. ³Tura yaanchuik Yuse chichame etsernu aarmauri Jesúsán pachis ujaak: —Yus akupkamuka tu wait wajaktinuitai, nunia jakatnuitai, nunia jakamunmaya nantaktinuitai, tu aarmawaitai, —timiayi. Nunia Pablo ataksha chichaak:

—Jesúsán pachisan atumin ujaajrume nuka nekas Mesiasaitai, —timiayi.

⁴Tamati judío ainau jumchik Jesús nekasampi Yus akupkamuita, tiarmiayi. Tura Pablojai, tura Silasjaisha iruntrar-miayi. Tura griego ainau untsuri Yusen searmia nusha Jesúsán nekasampita tiarmiayi. Tura nu yakta juuntri nuwari ainausha untsuri Jesúsán nekasampita tiarmiayi. ⁵Tinamtai judío Jesúsán umirchau ainau Pabloncha, tura Silasnasha kajerinak suwirpiaku jiisar, yaktanam pasé nintintin nangkami pujuinauncha wainkar, nuna jukiari, nu yaktanmaya ainaun mash pasé nintimtik-rarmiayi. Turuwar aints Jasón naartinu jeen jear Pabloncha, tura Silasnasha aanum jiikiartas, tura pasé nintintin ainamunam surukartas wakeriarmiayi. ⁶Tura asar judío Jesúsán umirchau ainau Pabloncha tura Silasnasha wainkachu asar, Jasónkan tura chikich Cristonu ainauncha japikiar, yakta apuri pujamunam jeeniar, Pabloncha, tura Silasnasha pachisar untsuminak:

—Mash nungkanam itit awajkartin ainau yamaisha iin tarutramiarji. ⁷Jasón

nu aints ainaun: Wína jearun pujusarti tusa untsuki. Tura nu aints ainu juun apu Césara chichamenka umirinatsui, antsu chikich apu Jesús naartin awai turaminaji, —tiarmiayi.

⁸—Tu timiaiu asar, nuna antukar nu yaktanmaya ainausha mash, tura yakta apuri ainausha mash pasé nintimrarmiayi. ⁹Antsu Jasón chikich Cristonu ainaujai apu ainaun chicharinak:

—Iikia nu aints ainaun ii yaktarinia jiinkarti tusar awematji. Pai, kuik ukuaji, nunia iinu yaktarina jiinkiarantaikia, ataksha wainkinnuram. Antsu jiiinachmataikia kuik tuke jukitaran, —tiarmiayi. Tinamtai yakta apuri Jasónkan nunia chikich Cristonu ainauncha akupkarmiayi.

Pablo Silasjai Berea yaktanam pujusmauri

¹⁰Tura asaramtai arumak kashi Cristonu ainu Pabloncha Silasnasha Bereanam akupkarmiayi. Tura akupkamu asar, Berea yaktanam jear, judío iruntai jeanam wearmiayi. ¹¹Tura nu yaktanmaya ainu pengke nintintin asar, Tesalónicanmaya ainu nangkamasarang Yuse chichamen pengker nintimsar antukarmiayi. Tura Yuse chichamen antukar: ¿Yaanchuik Yuse chichamen etserin aarmaujai metekash etserina? tusar kintajai metek Yuse chichamen aujsarmiayi. ¹²Turinau asar, judío untsuri Jesúsán nekasampita tiarmiayi. Tura griego juuntri nuwari ainausha, tura juun ainausha nunisarang Jesúsán nekasampita tiarmiayi. ¹³Tura asaramtai Tesalónicanmaya judío ainu: Pablo Bereanam Yuse chichamen etserui, tamaun antukar nuni jeariar, aints ainu Pablon kakerkarat tusar, itit awajiarimiayi. ¹⁴Tura asaramtai Cristonu ainu nuna antukar Pablon: Wári juun entsanam weta tusar akupkarmiayi. Antsu Silaska Timoteojai nuni juwakarmiayi. ¹⁵Tumi-

namtai Bereanmaya ainu Pablojai tsaniasar Atenas yaktanam jearmiayi. Tura jear waketinamtai, Pablo Silasan tura Timoteoncha: Wári winiarti, tusa chichaman akuptukmiayi.

Pablo Atenasnum pujusmauri

¹⁶Pablo Atenasnum pujus, Silas Timoteojai winiarti tinu asa, nuni nakasmiayi. Nunia aints ainu ni yusrin Yuschau waininayat, untsuri ningki najanawar: Ameka ii yusrinme tinamtai, Pablo nuna wainak napchau nintimrarmiayi. ¹⁷Tura judío iruntai jeanam waya, nuni judío ainaujai, tura judíocho Yusnau ainaujai chichasmiayi. Nuniasha kintajai metek yakta japen aints ainaujai ingkiunik chichasmiayi. ¹⁸Nunia griego nuikiartin, Epicuro naartinu chichamen nuikiartin ainaujai chichasmiayi. Tura chikich nuikiartin ainaujai, Estoicos tutajai chichasmiayi. Turamtai chikich ainu Pablon pachisar chichainak:

—¿Ju aints nangkami chichaa wea juka warintramtajik? —tunaiyarmiayi. Tura Pablo Jesúsán pachis, tura jakar nantaktinun pachis Yusnum uwemratin chichaman etseru asamtai, chikich ainu chichainak:

—¿Juka ni yusri ainaun ii nekatsji nuna pachis chichaatsuash? —tunaiyarmiayi.

¹⁹⁻²¹Atenasnum pujuinauka, tura chikich yaktanmaya ainausha, nuni iruntrantas taaru ainauka tuke yamaram chichaman ujakartas tura antukartas wakerin armiayi.

Tura asar ni juuntri ainu iruntramunam, Areópago tutainum Pablon jeeniarmiayi. Tura nuni jeeniar chicharinak:

—Yamaram chicham ame tame nu iisha nekaatasar wakeraji. Ame tame nuka antichu asar, nunaka takun tajai takumin nekaatasar wakeraji, —tiarmiayi.

²²Tu tinu asaramtai, Pablo juun ainau iruntramunam japen wajas chicharak:

“Atenasnumia juun ainautiram, atumi yusri ainau miatrusrumek nintimtarme tusan wainjarne. ²³Wikia atumi yaktarin wainkan, atumi yusri aints najanamu wainiatrumek: Wina yusruitme tarume, nunaka mash wainkan, nunia atumi yusri susatasrum atumi tangkuri maar epetinja wainkajai. Tura nu aarmaunasha wainkajai: ‘Juka nekashtai Yusnawaitai.’ Tu aarmaun wainkau asan, atumi Yusri nekachiatrum tikishmatrume nuna pachisan nuwaitai tusan, atumin nekantikiatjarne.

²⁴“Nintimrataram. Nu Yuska nungkan najanamiayi. Tura nungkanam mash iruna nunasha najanamiayi. Tura asa nayaimpi Apurintai. Tura nungkanam ainia nuna Apurintai. Tura asa aints ni uwejejai jean jeamina nuningkia Yuska pujuchuitai.

²⁵Nunia mash iwiaaku ainauti pujusarti tusa, ningki ii mayatairincha, tura ii yuumamurincha suramji. Tura ningkia yuumichu asamtai, aintstikia warinchuka Yuska susachminuitji.

²⁶“Tura Yuska aintsun kichkin najana, mash nungkanam yujarar pujusarti tusa najanamiayi. Tura aintsnaka najantsuk eemak nintimias: Warutik pujusarat tusa, tura tuning pujusarat tusa nekaamiayi.

²⁷Tura Yuska arákka pujurtamtsuji. Antsu aints ainau wina eatkar nintimtursarti tusa nintimramiayi. ²⁸Yuska pujutan suramsau asamtai aintstikia iwiaakuitji. Tura asar muchiaji. Tura asamtai atumi nekarmin ainausha nu chichamnaka aarar: ‘Iikia mash Yus najanamuitji,’ tiarmiayi. ²⁹Tura asar iincha Yus najatmau asakrin, kuri najanamuka: Yusetai tuuka nintimtuschatnuitji. Tura kuik najanamuka, tura kaya najanamuka: Yusetai tuuka nintimtuschatnuitji.

³⁰⁻³¹“Nintimrataram. Aints ainau Yusen nekainachak turuawarmia nuna Yus

yaanchuik pachischamiayi. Antsu ukunam ni kintari jeamtai, Yus mash nungkanmaya ainau nintimaurin yapajia-warti tusa aintsun akupkatnuitai. Nu aintska pengké tunaarinchau asa, nunaka turatnuitai. Tura mash aints ainau nuna nekaawarti tusa, nu aintsun jakamunmaya inankimiayi,” Pablo timiayi.

³²Tama aints jakamunmaya nantakmiaun pachis chichaun antukar wishikrarmiayi. Chikich ainau chicharinak: —Ii wakerakikia ame tame nuka chikich kintati antuktatji, —tiarmiayi.

³³Tinamtai Pablo nu aints ainaun ukukmiayi. ³⁴Tura waininayat jumchik aints ainau Pablon nemarkarmiayi. Kichik Atenasa juuntri, Dionisio naartin, nunia kichik nuwa, Dámaris naartin, nunia chikich aints ainausha Criston nekasampita tiarmiayi.

Pablo Corintonam pujusmauri

18 ¹Pablo Atenasnumia jiinki, Corinto yaktanam wemiayi.

²Tura nuni jea, judío aintsun, Aquila naartinun wainkamiayi. Nuka Ponto nungkanmaya aintsuyayi. Tura Roma yaktanam pujai, romano apuri Claudio naartin judío ainaun nu yaktanmayan mash jiikmiayi. Tura asamtai Aquila ni nuwari Priscilajai Italia nungkanmaya jiinkiar, Corinto yaktanam jear, nuni pujusarmiayi. Tura asamtai Pablo Aquila jeen iraamiayi. ³Tura Pablosa, tura Aquilasha mai metek tarach jean najanin asar, Pablo nijai pujumiayi. Tura nuna najanawar surukarmiayi. ⁴Tura ayamtai kintajai metek judío iruntai jeanam waya, Pablo judío ainauncha, tura judíochou ainauncha: Wi taja nuka nekasaintai tusa chicharkamiayi. ⁵Turamtai Silas Timoteojai Macedonianmaya taamtai, Pablo tarach jea najantanka inais, kintajai metek Yuse chichamen etserkamiayi. Tura judío ainaun paan ujaak:

—Nekasan tajarme: Yus akupkamu atum tati tusaram nakarme nuka Jesúsaitai, —timiayi. ⁶Ujaamaitiat nu chichamnaka antutan nakitinak Pablon pasé chicharkarmiayi. Tura asaramtai Pablo ni wejmakrin pearmiayi. Wikia atumin japan ukuktatjarme taku nunaka turamiayi. Nunia nu aintsun chicharak:

—Atumek wakerau asaram, jakaram mengkakatatrume. Antsu wikia nunaka wakeratsjai. Atumka uwemratin chicham antut nakitau asakrumin, wikia yamaikia judfochu ainaun nu chichaman ujaktasan werajai, —timiayi.

⁷Tura judfo iruntai jeanmaya jiinki, judfochu aintsu jeen wayaamiayi. Nu aintska judfo iruntai jeenam ayamas pujumiayi. Tura Yusen seayayi. Ni naaringkia Ticio Justoyayi. ⁸Turamtai judfo iruntai jea apuri, Crispo naartin, ni weari ainaujai mash ii Apuri Jesúsán nekasampita tiarmiayi. Nunia Corintonam pujuinau unturi Yuse chichamen antukar, Jesúsán nekasampita tusar mainiarmiayi. ⁹⁻¹⁰Turinamtai ii Apuri Jesús Pablon kashi karanma nunisang chicharak:

—Wikia amijai pujajai. Tura asamtai amincha kichkisha paseeka awajtamsar-chatatui. Ju yaktanam wína aintsur unturi iruninau asaramtai, shamkartutsuk asata. Antsu tuke inaitsuk wína chichamur etserkim weta, —timiayi.

¹¹Tamati Pabloka nu yaktanam kichik musach nunia jape pujusmiayi. Tura aints ainaun Yuse chichamen nuiniarmiayi.

¹²Tura nuni aints Galión naartin Acaya nungka apuri inaikiamu pujai, judfo mash iruntrar Pablon achikiar, chicham nekatai jeenam jeeniarmiayi. ¹³Tura apun chicharinak:

—Ju aintska Yus umirkataram tayat, Moisésa chichamen nuitamtsuji, antsu metekchau nuitamji, —tiarmiayi.

¹⁴Tinamtai Pablo chichastas wakerau wainiat, Galión judfo ainaun chicharak:

—Judfo ainautiram, ju aints nekas tunaawaitmatikia, tura juka nekas pasé turamtaikia, wikia atumin anturkainjarme. ¹⁵Antsu atum nuikiartamu pachisrum, tura atumi juuntri naari pachisrum, tura chichaman atumi juuntri akupkarmia nu pachisrum tau asaram, atumek iwiartaram. Wikia nu chichamnaka nekatan nakitajai, —timiayi.

¹⁶Nuna tina judfo ainaun chicham nekatai jeanmaya jiikmiayi. ¹⁷Tura apu chichaman nekatan nakitau asamtai aints ainu judfo iruntai jea apurin Sóstenes naartinun achikiar, apu naka wajamunam awatiarmiayi. Awatinau wainiat apu Galiónka pengké pachischamiayi.

Pablo Antioquíanam waketki ataksha wekaasamuri

¹⁸Turamtai Pablo Corinto yaktanam nukap kinta pujusmiayi. Nunia Cristonu ainaun: Weajai tusa ukukmiayi. Nunia Priscilajai, tura aishri Aquilajai Cencrea yaktanam juun entsa yantamen wemiayi. Tura nuni jea yaanchuik Yusen: Wi turatatjai tímia nuna umiktas muuken awamramiayi. Nunia juun kanunam engkemawar, Siria nungkanam waketkiartas wekaasarmiayi. ¹⁹⁻²¹Tura Efeso yaktanam jear, Pablo judfo iruntai jeenam wemiayi. Tura nuni jea, judfo ainaujai chichasmiayi. Tura iijai pujusmi tinamaitiat, Pablo ayu tichamiayi. Antsu ataksha wetas: “Yus wakeramtaikia, ataksha winitatjai,” tusa ukuki juun kanunam engkema, Efeso yaktanmaya jiinkimiayi. Antsu Priscila ni aishri Aquilajai nuni juwakarmiayi.

²²Tura nunia Pablo kanujai wekaas, Cesarea yaktanam nujamak, juun kanunmaya jiinki, Cristonu ainu Jerusalénnum pujuinaun jiistas wemiayi. Nunia jiinki Antioquíanam wemiayi. ²³Tura nuni jea nukap pujus, ataksha nunia jiinki Galacia nungkanmasha, tura

Frigia nungkanmasha wekaas, Cristonu ainau chikich chikich yaktanam pujuinaun kakamtikramiayi.

**Apolos Efesonam pujuinaun
Yuse chichame ujakmauri**

²⁴Pablo wekai, judío aints Apolos naartin Efesonam jeamiayi. Nuka Alejandría yaktanmaya aintsuyayi. Tura Yuse chichame aarmaun pengker nekau asa, pengker etsernuayayi. ²⁵Nuka pengke nintintin asa, tura ii Apuri Jesúsán pachis chichaman antuku asa, nu chichaman paan antumain aints ainaun nuiniarmiayi. Turayat imiakratin Juan aints ainaun imiaimun pachis nunak nekau ayayi. ²⁶Tura judío iruntai jeanam Apolos waya, shamtsuk Jesúsán pachis chichasmiayi. Turamtai Priscila ni aishri Aquilajai ni chichaamurin antuku asar, Apolosan akankar jukiari, Yuse chichame nekas tu awai tusar miatrusarang ujakarmiayi. ²⁷⁻²⁸Tura Apolos Acaya nungkanam wetas wakerau asamtai, Efesonmaya Cristonu ainau papin aattrar akuptinak: Ju aintska pengker yaingtaram, tusar akupkarmiayi. Nunia Apolos we, Acaya nungkanam jea, aints mash antinamunam Yuse chichame etserin yaanchuik aarmaurin Yuse kakarmarijai etserak: Yus akupkamu Mesías tati tusaram nakarme nuka Jesúsaitai tusa, paan nekamtikiamiayi. Tura asa judío ainaun nepetkamiayi. Tura Cristonu ainaun Yus pengker awajsati tusa nukap yaingmiayi.

Pablo Efesonam pujusmauri

19 ¹Apolos Corintonam pujai, Pablo muran nangkaiki, Efeso yaktanam jeamiayi. Tura nuni jea, Yusen umirin ainaun wainkamiayi. ²Tura chicharak:

—¿Atumi nintin Yuse Wakani pujawak? —tu iniam nusha aiminak: —Atsa, Yuse Wakani pachisar etsermauka iikia pengké antichuitji, —tiarmiayi.

³Tu tinam ataksha iniak:

—¿Tura atumsha warí nintimsarmea maimiarme? —tu iniam nusha aiminak:

—Juan aints ainaun nuiniarmia nu nintimsar maimiayi, —tiarmiayi.

⁴Tinamtai Pablo chicharak:

—Nekas Juan aints ainaun: Atumi pasé nintimaui yapajiaran maitiaram tusa imiatmimiayi, tura chicharak: Wína ukurun winá nuka Jesúsaitai. Ni nekasampita titaram, —Juan timiaun Pablo etserak timiayi.^b

⁵Tura Pablo Juanku timiaurin etsermatai, nu aints ainau ii Apuri Jesúsá naarin pachisar mainiarmiayi. ⁶Turinamtai Pablo Yusen sea, nu aints ainau muuken achikiamtai, Yuse Wakani ni nintin piatkamiayi. Turamtai niish niish chichakarmiayi. Turinamtai Yus: Wína chichamrun etserkarti tusa chichamtikiamiayi. ⁷Yuse Wakani piatkamuka doce (12) aints armiai.

⁸Tura Pabloka nuni kempatam nantu pujus, tuke judío iruntai jeanam waya, nuni shamtsuk judío ainaun Yuse chichamen ujamiayi. Tura Yus ni aintsri ainaun tu inawai tusa chicharkamiayi. ⁹Tura wainiat chikich ainau Yuse chichamen umirtan nakitinau asar, nu yamaram etsermaun pachisar pasé chichasarmiayi. Tura pasé chichainamtai, Pablo nunia jiinki, Cristonu ainaun yaruak, aints Tirano naartinu papi aujtainum waya, kintajai metek Yuse chichamen etserkamiayi. ¹⁰Tura Pablo jimia musach aints ainaun Yuse chichamen ujakmiayi. Tura asamtai Asianmaya judío ainausha mash, tura

griego ainausha mash Apu Jesúsán pachisar etsermaun antukarmiayi. ¹¹Tura asaramtai Pablon Yus wainchatai takatan takasat tusa kakamtikramiayi. ¹²Turamtai aints ainau panuinasha, tura tarachnasha jukiar, Pablo namangken antingkiar, nunia jukiar jau ainau namangken nujtukaram tsaararmiayi. Tura iwianchrintin ainausha nu tarachjai nujtukaram, iwianch ainauncha jiiriarmiayi.

¹³Turinamtai chikich judfo ainau chikich chikich yaktanam wekaasar, iwianchrintin ainaun wainkar, ningki nintimsar Jesúsá naarin pachisar, iwianch ainaun jiikiartas chicharinak:

—Pablo Jesúsá naarin pachis etsera nuna naarijai jiinkitaram tajarme, —tinu armiai.

¹⁴Tura sacerdote juuntri Esceva naartinu uchiri siete (7) armia nuna tiarmiayi. ¹⁵Tura iwianchrinu jeen wayaawar nuna tinamtai, iwianch ayaak: —Wikia Jesúsán wainuyajai. Tura Pabloncha wainuyajai. Antsu ¿atumsha ya asarimea tarume? —timiayi.

¹⁶Nuna tusa iwianchrintin tsekengki nu aints ainaun iwianchi kakarmarijai mash achik, nunia nepetak nukap awatramiayi. Turamtai misu kuimiakar, nukap numparar nu jeanmaya tupikiakiarmiayi. ¹⁷Turinamtai Efesonam judfo ainausha, tura judfochu ainausha mash nuna nekaawar shamkarmiayi. Tura Apu Jesús nekas juuntaitai tiarmiayi.

¹⁸Tura Cristonu ainau kaunkar untsuri ni yaanchuik tunau turamurin etserkarmiayi. ¹⁹Tura wishin untsuri yaanchuik turutirin inaisar, ni papirin itaar, aints mash wainminamunam keematkarmiayi. Tura nu papi akikri mash irumram nekapmaram, cincuenta warang (50,000) kuikiajai sumakmin amiayi. ²⁰Tura ii Apuri Jesúsá kakarmarijai Yuse

chichamen etserkaramtai, aints ainau untsuri Jesúsán nekasampita tusar ni kakarmarin inakmasarmiayi.

²¹Tuminamtai Pablo nintimias: Macedonia nungkanam, tura Acaya nungkanmasha wekaasan, nunia Jerusalénnum wetasan wakerajai. Tura nunia jiinkin, Roma yaktanmasha weminuitjai, tu nintimramiayi. ²²Tura ni yaingtintrin jimieran Timoteo Erastojai Macedonia nungkanam eemak akupkamiayi. Tura ningki Asia nungkanam jumchik kinta pujustas juwakmiayi.^c

Efeso yaktanam aints taetet wajamuri

²³⁻²⁴Pablo Efesonam pujai, aints ainau Cristo umirkamurin pachisar nukap chichainamtai, chikich aints ainau kakerkar taetet wajarmiayi. Efesonmaya ainau yusri nuwa tumau nakumkamun: Ii yusrintai tusar seau armiai. Ni yusri naaringkia Artemisaitai. Aints Demetrio naartin ni yusri seati jeen kuikiajai tuupchin najanin armiai. Tura nu nakumkamun ni yaintri ainaujai najanawar untsuri surin armiai. Tura asar nukap kuikian ju armiai. ²⁵Tura nu aints ainaun mash untsuk nunia chikich aints, ni yusri nakumkamurin nuwén najanin ainauncha untsuk, mash kaunkaramtai, Demetrio chicharak:

—Juun ainautiram anturtuktaram: Ii yusri nakumkar surin asar, kuik nukap juwaji. Atumsha nusha nekarme. ²⁶Antsu aints Pablo naartin chichaak: Aintsu yusri ni uwejejai najanamu ainauka Yuschau ainawai. Tura juni Efesonam wekaakusha tura Asia nungkanam wekaakusha, tuke nunisang chichaawai. Tu chichau asamtai aints untsuri ni timiaurin antukar: Nekasaintai tinawai. ²⁷Tu tinau asaramtai, yamaikia ii yusri nakumkamuri najaniatrik suruktatkamar yuumatajai.

Tura ii yusri Artemisaka nekas juuntan waininayat, aints ainau nuna jeenka pachischartinuitai. Tura Asianmaya ainau mash, tura chikich nungkanmayasha mash: Nuka ii Yusrintai tinu ainayat ukunam: Nuka Yuschawaitai tiartinuitai, —Demetrio timiayi.

²⁸Tamati nuna antukar, Efesonam pujuinau kakarman kajekar chichainak:

—Efesio ainauti yusri Artemisaka nekas juuntaitai, —tiarmiayi.

²⁹Tura nu yaktanmaya ainau: ¿Warí pachisara untsuminawa? tusar taetet wajaarmiayi. Tura aints Gayo naartinna-sha, tura chikich aints Aristarco naartinna-sha wainkar, tura achikiar metawar, tura japikiar iruntai jeenam jeeniarmiayi. Gayoka tura Aristarcosha Macedonianmaya aints armiayi. Tura Pablojai tsaniasar wekain armiayi.^d

³⁰Turinamtai Pablo juun ainaun iruntraun chicharkatas wakerau waininayat, Cristonu ainau nunaka surimkarmiayi.

³¹Tura Asianmaya juun ainau Pablo amikri asar chichaman akuptinak:

—Anearta: Amin mantamawarai, auni juun ainau iruntramunam wayaawaip, —tiarmiayi. ³²Tinamtai juun ainau iruntramunam aints untsuri: ¿Warukarik iruntraij? tusar nekainachiat iruntraruar asar, chikich ainausha niish chichasar, tura chikich ainausha:

—Atsa, nuka tuuka atsui, —tusar chichainak taetet wajaarmiayi. ³³Tu wajainai, judfo ainau ni aintsrin Alejandro naartinun: Ame chichakta tusar shitakiar umarmiayi. Turinamtai aints ainaun: Itiatkataram tusa, uwejen takui wajas, judfo ainau ayamruktas aints ainaun chichastas wakerimiayi.

³⁴Tura Alejandro tsapumtai, aints ainau: Auka judfo aintsuitai tusar, mash metek jimia hora kakarar chichainak:

—Ii yaktari yusri Artemisaka nekas juuntaitai, —tiarmiayi.

³⁵Tuke chichainamtai, nunia yaktanmaya chicharkartin wajaki, aints ainaun itatmamantik chicharak:

—Efesonmaya ainautiram, anturtuktar-ram. Ju yaktanam pujuinautikia ii yusri Artemisa jeengka tuke wainuyaji. Tura asar ii yusri nekas pengker aa nuna nakumkamurisha nayaimpinmaya ayaarmia nusha wainuyaji. Mash nungkanmaya ainau nuna nekainawai. ³⁶Aints kichkisha nuna pachis nekaschawaitai tichamnawaitai. Tura asamtai atumka yamaikia itatkataram. Atumka tenap nintimsukka pasé aa nuka kichkisha turuwairap. ³⁷Ju aintska atum juni itaarume nuka ii yusri jeenianka warinchun kichkisha kasamkachari. Tura ii yusrin pachisar paseeka chichaschari.

³⁸Antsu Demetriosha tura chikich aints nijai takainausha, chikich aints ainaun pachisar: Tunau turayi tusar, chicham nekaatai tusar wakerinamtaikia, chichaman nekamtikiartin ainaun jiisar, apu iruntramunam chichamnaka nekaawarti.

³⁹Antsu chikich chicham iwiaratasrum wakerakrumka, ju yaktanmaya juun ainau iruntramunam chichamka nekaamnawaitrume. ⁴⁰Tura ju kintati juni nangkamir iruntrar taetet wajamun romano apuri nuna nekaa inintrak: ¿Warí pachisrumea tuusha chichaarme? tamatikia iikia aiktatkamar tujinkatati. Tura iin pasé awajtamsai tusar shamkatati tajarme, —timiayi. ⁴¹Nuna tusa:

—Yamaikia mash jiinkitaram, —timiayi.

Pablo Macedonianam nunia Grecianam wekaasamuri

20¹Nunia itatkar jiinkiamtai, Pablo Cristonu ainaun untsukmiayi. Tura kaunkaramtai: Pengker nintimsaram pujustaram, tusa chicharka-

miayi. Tura chichas umis: Weajai tusa nunia jiinki, Macedonia nungkanam wemiayi. ²Tura nu nungkanam wekaa wekaaka, Cristonu ainaun: Cristo miatrusrumek umirkataram tusa, nunia ukuki, Grecia nungkanam wemiayi. ³Tura nuni jea, kempatam nantun pujus, judfo ainau: Pablo maataj tinam, Pablo Siria nungkanam wetas kanunam engkemtsaing, nuna nekaa: Kanunmaka engkemtsuk ataksha kukarak Macedonia nungkanam wetajai, tu nintimramiayi. ⁴Tura nijai iruntrar wekaasarmia nuka nu armiyai: Bereanmaya aints Sópater naartin, nuka Pirro uchirintai, nunia Tesalónicanmaya ainau Aristarco nunia Segundo, nunia Derbenmaya aints Gayo naartin, nunia Timoteo, nunia Asianmaya ainau: Tíquico nunia Trófimo nu naartin armiyai.^e

⁵Tura nu aints ainau Troas yaktanam eemkar jear iin nakarmasarmijai. ⁶Tura pang pachimrachmau yuwatin fiesta nangkamaramtai, iikia Filiposnum juun kanunam engkemar, nunia cinco kinta kanujai wekaasar, Troasnum jear, ii amikri kukarak eemkar wearmia nujai ingkiunikmijai. Tura nuni siete (7) kinta iruntrar pujusmijai.

Pablo Troasnum irasmauri

⁷Nunia tuming kinta tsawaaramtai, Cristo jakamuri nintimsar iruntrar pang yuwataras kaunkamijai. Tura Pablo kashin wetin asa, Yuse chichamen etserak, kashi japeng umismiayi. ⁸Tura ii iruntramijai nu jeanmaka pata yaki amaunum kantiin utsuri keemakarmiyai. ⁹Pablo Yuse chichamen etsermatai, natsa Eutico naartin wenurmau angkaakmaunum keemas antimiyai. Tura turaka kari nepeteam kanur, yakíya akaiki aanum ayaarmiyai. Tura nu jeaka kempatam

pata yakiri amiayi. Tura nunia ayaaru asamtai, aints ainau kuankiar jiikma yanchuk natsaka jakaun wainkarmiyai. ¹⁰Turinamtai Pablo kuanki tikishmatar jakaun minakas aints ainaun chicharak: —Shamkairap. Jakayat iwiaakui, —timiayi.

¹¹Nuna tusa ataksha patanam yaki waka, pangkan puukamtai yuwaarmiyai. Tura yuwaar umisar, Cristonu ainaujai chichaa chichaaka tsawaarmiyai, tura tsawaaramtai Pablo jiinki wemiayi. ¹²Tura jiiinkiamtai, natsa jaka nantaknun ni jeen jeeniarmiyai. Tura pengker pujawai tinamtai, mash pengker nintimrarmiyai.

Troasnumia jiiinkiar Miletonam jeamuri

¹³Pablo: Wikia Aso yaktanam kukarak wetaj tusa wakerimiayi. Tura iincha: —Atumka kanunam engkemraram wetaram, —turamkurin, iikia eemkar Asonam jear nakasmijai. ¹⁴Tura Asonam ingkiunikiar Pablosa kanunam engkemramtai, Mitilene yaktanam nijai jeamijai. ¹⁵Nunia jiiinkir, kashin tsawaarar isar Quó tutai nangkaikir, nunia kashin tsawaarar Samos isranam jeamijai. Nunia jiiinkir kashin tsawaarar Mileto yaktanam jeamijai. ¹⁶Tura Pablo: Wári Jerusalénnum weartai, tura nuni jear, fiesta Pentecostés tutai inangkartai tusa, Asia nungkanam yamaikia pujutsuk, Efeso yaktanmasha wetsuk nangkamakmi, tu nintimias pujumiayi.

Efesonmaya Cristonu ainau juuntrin chicharkamuri

¹⁷Tura Miletonam jea, Efesonmaya Cristonu ainau juuntrin winiarti tusa untzukmiayi. ¹⁸Tura mash kaunkaramtai, Pablo chicharak:

—Wikia nu nangkamtaik Asia nungkanam jean, nunia atumjai pujusan, itiuur

pujuyaja nusha mash nekarme. ¹⁹Wikia Yuse inatiri asan, tuke kintajai metek ii Apurin umirnuyajai. Tura miajuitjai tumamtsuk, aints ainau Yusen umirtan nakitinamtai, juutkamaikiakun takakmi-nuyajai. Tura judfo ainau wina pasé awajtusartas wakerutinau asaramtai wait wajayajai. ²⁰Turayatun chicham nekas pengker aa nunaka mash pengker nintimsan atumin ujayajrume. Tura aints iruntramunam Yuse chichamen etserkun, nunia atumi jeen wayaan, nunisha Yuse chichamen ujayajrume. ²¹Tura judfo ainauncha, tura judfochu ainauncha chicharkun: Atumi nintimauri yapajia-ram, Yus nintimrataram tusan, ii Apuri Jesús nekasampita titaram timiajai.

²²Tura yamaikia Yuse Wakani: Jerusalén-num weta turutin asamtai weajai. Tura nuni jeamtai, itiurkarti tusancha nekatsjai. ²³Antsu Yuse Wakani wina chichartak: Chikich chikich yaktanam amin achirmakar kársernum engketma-wartas wakerutminawai. Tura wait wajaktatme turutin asamtai nunasha nekajai. ²⁴Antsu wikia nunaka pachiat-sjai. Mantuwartas wakerinakka mantuwarti. Antsu Apu Jesús: Wina chichamur etserkata tusa, wina akuptuku asamtai, nunaka umiktasan, Yus aints ainaun mash nekas pengker awajsatas wakerau asamtai, Yusnum uwemratin chichaman etserkatasan wakerajai. Nunia jakancha Yusnum warastasan wakerajai.^f

²⁵“Yamaikia nunasha tajarme: Wikia atumin Yuse chichamen etsermatai, mash antuku ainautiram winaka ataksha waitkashtinuitrume, tusan nekajai.

²⁶⁻²⁷Wikia Yuse wakeramurin pengké uutsuk ujayajrume. Tura asan ju kintaka tajarme: Aints wina chichamrun antukiat, Yusen umirtan nakitak mengkangkungka, ningki wakerak mengkawai. Antsu wikia

aints ainau mash uwemratar tusan wakerajai. ²⁸Tura asamtai atumek wainmamkataram. Turaram Yuse Wakani Cristonu ainau wainin ata tusa, atumin akuptamkau asamtai, ii Apuri jarutramak, ni nemarkau ainautin ni numpejai sumarmaku asamtai, Cristonu ainau mash waikataram. ²⁹Wi junia jiinkiamtai, aints ainau uwija ainaun pachim papeenawa nunisarang Cristonu ainaun: Cristo umirat inaisataram tiartas taartinuitai. Wikia nunasha nekajai.

³⁰Tura Cristonu ainau wina nemartusarat tusar atumniang wait chichaman etserin wantinkartinuitai. ³¹Tura asamtai aneartaram. Wikia kampatam musach atumjai pujusan, tsawaisha tura kashisha tuke inaitsuk kichtirmincha: Tunaanum weram tusan, juutkamaikiakun chichar-nuyajrume nuka atumka kajinmakirap.

³²“Yatsur ainautirmin, yamaikia Yus yainmakarti tajarme. Yuse anengkratairin pachisan, wi atumin tuke paan ujayajrume nu nintimrataram. Nu chichamka atumi nintin kakamtikramrat-nuitrume. Yus ni aintsri ainautin: Pengké tunaarinchau wijai pujusmintrum tinu asamtai, Cristojai tuke iruntraram pujustinuitrume tusan, yamaikia ukuajrume. ³³Wikia aintsu kuikiarinch, tura kuririnch, tura entsatirinch pengké wakerichuyajai. ³⁴Antsu wina uwejruijai takakmasan, wi yuumamurun sumarmunuyajai. Tura wijai tsaniasar wekainau yuumamurinch sumarnuyajai. Atumka nuka nekarme. ³⁵Wikia atumjai pujakun, tuke inaitsuk takakmakun, kakaichu ainau yuumamurin sumarnuyajai. Tura asamtai atumsha nunisrumek turataram tusan, atumin nintimtiknuyaj-rume. Ii Apuri Jesús a chichame nintimrataram. Nu chichamka nuwaitai: ‘Aints yuumak pujau ni yuumamurin

juwak warastinuitai. Antsu chikich ainau yuumamurin sua nuka nuna nangkamasang nukap warastinuitai,” Pablo etserak timiayi.

³⁶Nuna tusa chichas umis tikishmar, Cristonu ainaujai Yusen seamiayi.

³⁷⁻³⁸Tura Yusen sea umis, Pablo:

—Winaka ataksha waitkashtinuitrume, —tau asamtai, wake mesekar mash juutkamaikiak Pablon minaksar mejeasarmiayi. Tura nunia nijai tsaniasar kanunam wearmiayi.

Pablo Jerusalénnum wemaui

21 ¹Tura Cristonu ainaun juun entsa yantamen wajainau ukukir, kanunam engkemrar, tupnik isar Cos tutainum wemiaji. Tura kashin tsawaarar nunia jiinkir, isar Rodas tutainum jeamiayi. Nunia jiinkir Pátara yaktanam jeamiayi. ²Tura nuni jear, chikich juun kanu Fenicia nungkanam weau wainkamiaji. Tura nuni engkemrar, nu yaktanmaya jiinkimiaji. ³Tura juun kanunam wekaasar, isar Chipre tutai wainkamiaji. Tura nujamtsuk nangkamakir, nu israka menanmanini ukukir, Siria nungkanam wemiaji. Tura Tiro yaktanam nujamkar, nuni kanunmaya waririn mash jiiiktin asamtai, iisha kanunmaya jiinkimiaji. ⁴Tura jiinkir, Cristonu ainau nuni pujuinau eakmiaji. Tura wainkar, nuni nijai siete (7) kinta pujarin, Yuse Wakani Cristonu ainaun nekamtikiau asamtai, Pablon chicharinak:

—Jerusalénnum weep, —tiarmiayi.

⁵Tura siete (7) kinta nangkamaramtai, iisha nu yaktanmaya jiinkir weakrin, Cristonu ainau mash nuwartuk, tura uchirtuk yakta aarin iin nemartamsarmiayi. Tura juun entsa kaanmatkarin jear, mash tikishmarar Yus seamiayi.

⁶Nuniangka aujsar ukukir kanunam

engkemrakrin, nunia aints ainauka ataksha ni jeen waketkiarmiayi.

⁷Waketkiaramtai iikia Tironmaya jiinkir, kanujai Tolemaida yaktanam jeamiayi. Tura nuni jear kanunmaya jiinkir, Cristonu ainau wainkar: Winaji tusar chichasar, nijai kichik kinta pujusmiaji. ⁸Tura kashin tsawaarar nunia jiinkir, Cesarea yaktanam jear, nuni Felipe jeen wayaamiaji. Nu Felipeka Yusnum uwemratin chichaman Criston nemarchau ainaun ujayayi. Yaanchuik waje ainau yumamurin susarti tusar, inaikiarmia nuni inaikiamuyayi. Tura nuni wayaar, Felipejai pujusmiaji. ⁹Ni nawantri cuatro (4) aishrinchau armia nu Yuse chichamen etserin armiayi. ¹⁰Tura nuni jumchik kinta pujarin, Yuse chichame etserin Agabo naartin Judea nungkanmaya tamiayi. ⁸ ¹¹Tura ii pujamunam waya, Agaboka Pablo kachumtairin achik, Pablo nawen tura uwejencha jingkiatamiayi. Tura chicharak:

—Yuse Wakani chichaak: ‘Ju kachumtai kachuma juna judío Jerusalénnum pujuinau achikiar judíocho ainamunam surukartatui,’ tawai, —timiayi.

¹²Tamati nu antukar, iisha Cesareanmaya Cristonu ainaujai mash iruntrar Pablo chicharkur:

—Wait aneamas Jerusalénnum weep, —timiayi. ¹³Tamaitiat Pablo aimiak:

—¿Warukaya timiá juutkurmesha winasha napchausha nintimtikrarme? Wina Apuru Jesúsna naarin pachisar Jerusalénnumia ainau wina jingkiatawartas wakerutinakka turutawarti, tura mantuwartas wakerutinakka mantuwarti tusan tajarme, —timiayi.

¹⁴Tura Pablo antukchamtai, iikia chicharkur:

—Ii Apuri wakeramuri ati, —tusar itatkamiaji.

¹⁵Tura umisar Jerusalénnum weakur jiinkimiaji. ¹⁶Tura asakrin Cesearanmaya Cristonu ainau warumchik iin nemartam-karmiaji. Tura Jerusalénnum jear, Chiprenmaya aints Mnasón naartin ni jeen iinka jeetammiaji. Nu aintska nu nangkamtaik Criston nemarnuyayi. Tura nu aintsu jeen pujustin amiaji.

Pablo Santiagonam irasmauri

¹⁷Tura Jerusalénnum jeakrin, Cristonu ainau iin waitmakar, pengker nintimtur-masar: Winitaram tusar warasarmiaji.

¹⁸Kashin tsawaarar Pablojai Santiago jiistasar wemiaji. Tura nuni jear, Cristonu ainau juuntri mash iruntrar pujuinaw wainkamiaji. ¹⁹Tura nuni jear Pablo: Winajai tusa, ni wekaamurin pachis kichik kichik turamurinja mash ujaak:

—Wikia Yuse chichamen ujaakun pujai, Yus judóchu ainauncha pengker nintimtikramiaji, —timiayi. ²⁰Tamati nuna antukar: Yus juuntapita tusar warasarmiaji. Nunia juun ainau Pablon chicharinak:

—Yatsuru, ame tame nuka nekas pengkeraitai. Tura untsuri warang judío ainau Cristonu ainayat, Moisésa aarmauri miatrusrik umiktinuitji, mash tinawai.

²¹Tura judío ainau judóchu ainamunam pujuinaw juni taar, amin pachitmasar aints ainaun ujainak: ‘Pabloka Moisésa chichame umirtsuk asataram tawai. Tura atumi uchiri nuwapchiri charutsuk asataram tawai. Tura judío ainauti turuti aa nuna mash inaisataram tawai,’ amin pachitmasar mash turaminawai.

²²Turaminaw asaramtai iikia ititurkatjik? Aints ainau amin pachitmasar: Juni tayi tinaun antukarka tarutmiartatui. ²³Tura asaramtai ii taji nuka turata. Juni Cristonu ainau cuatro (4) irunui. Nuka yaanchuik Yusen: Wikia nuna turatatjai

tinu asar, yamaikia nu chicham umikmi tusar juni pujuinawai. ²⁴Tura asamtai amesha nu aints ainaujai Yus seatai juun jeanam wayaam, ii judíoti: ‘Yus wína pengker awajtusti,’ tusar nijaamaji nunismek amesha nijaamarta. Nunia Moisés tímia nunisarang ni muuken awamrarti tusam, nunia kuik akiimiaktin aa nu amek akiimiakta. Nu turakminka, aints mash amin turamurmin waitmakar, amin pachitmasar aujmatramina nuka nekasar nangkamiar tinawai, tu nintimrartatui. Tura amincha pachitmasar: Nisha nekas Moisésa aarmaurin miatrusang umirui turamiartatui. ²⁵Antsu aints judíochu Cristonu ainau iikia yaanchuik papi akuptukmiaji. Iikia mash metek nintimsar: Aints ni najanamurin: Wína yusruitai tina nu susamuka yuwairap. Tura numpasha umutsuk asataram. Tura niapir maamuka numpentin asamtai yuwairap. Tura tsanirmatka inaisataram. Tu aarar chicham akupkamiaji, —juun ainau tiarmiayi.^h

Yus seatai juun jeanam Pablon achikmauri

²⁶Tinamtai Pablo nunia jiinki, kashin tsawaar nu cuatro (4) aintsjai Moisés tímia nunisarang ni namangken nijaamarar, Yus seatai juun jeanam wayaawar, Pablo nu aints ainaun pachis sacerdoten chicharak:

—Nu kintati ni nijjaamarar umisar, tangkun sumakar Yusen susartas itaartatui, —timiayi.

²⁷Tura siete (7) kinta nijaamamuri umitnak wajainai, Asianmaya judío ainaw Pablon Yus seatai juun jeanam wayaun wainkar, chikich aints ainauncha mash kajkarmiaji. Nuniangka Pablon achikiarmiayi. ²⁸Tura kakarar untsuminak:

“Israel ainautiram, yainkataram. Ju aintska mash nungkanam pasé

chichaman nuikiartak wekau achikji. Juka Israel ainautin pachitmas, tura Moisésa chichame pachis, tura Yus seatai juun jeancha pachis: Nuka nakitrataram tu nuikiartawai. Tura Yus seatai juun jeanam judíocho ainau pengké wayaach-minun wainiat, griego ainausha wayaawarti tusa juni itayi. Tura nuna turak, juka nekas péngke jea wainiat pasemantikui,” nangkamiar waitrinak tiarmiayi.ⁱ

²⁹Tura Efesonmaya aintsun Tróximo naartinun Pablójai Jerusalénnum wekaun wainkau asar: Pablóká nu aintsjai Yus seatai juun jeanam wayaachias, tu nintimsar nunaka tiarmiayi.^j

³⁰Tinamtaí Jerusalén yaktanam pujuinau mash taetet wajaarmiayi. Tura ampukiar weriar Pablonka achikiar, Yus seatai juun jeanmaya japikiar jiikiarmiayi. Turinamtaí nu jea waitirinka wári epeniarmiayi. ³¹Tura judío aints ainau maatai tinamtaí, romano suntari ni apurin chichaman akuptinak:

—Mash Jerusalénnum pujuinau maaniatai tusar taetet wajainawai, —tusar ujakarmiayi. ³²Tu ujaam, suntara apuri ni suntari ainaujai, tura kapitantri ainaujaisha Pablo katsuminamunam ampukiar wearmiayi. Turinamtaí aints ainau nuna wainkar, Pablon katsuminayat inaisarmiayi. ³³Tura inaisaramtaí suntara apuri tari Pablon achikmiayi, tura ni suntarin akuptak:

—Jingkiakratai jiru jimiarjai jingkiatará, —timiayi. Tura jingkiawaramtaí suntara apuri:

—¿Yaachita jusha? tura ¿Warina turama? —tusa judío ainaun iniasmiayi. ³⁴Tu iniam aints unturi chichainak, taetet wajarmiayi. Tura taetet wajainau asaramtaí, suntara apuri chichaman

nekaatatkama tujintak: Pablo suntar matsatmanum jukitará tusa, ni suntarin akuptukmiayi. ³⁵⁻³⁶Turamtaí aints ainau Pablon eteawar nemarsar:

—Maatará, —tusar untsumkarmiayi. Tura judío ainau kajerinau asaramtaí, suntar ainau watainum jear, Pablonka nanasar iwiakarmiayi.

Pablo: Tu pujajai tusa chicharmamsamuri

³⁷Tura suntar matsatmanum jeatak wajasar, Pablo suntara apurin griego chichamejai chicharak:

—Ame tsangkamrakminkia kichik chichaman amin titasan wakerajme, —timiayi. Tu tama ayaak:

—¿Amesha griego chichame chichaukum? —tu iniasmiayi. ³⁸Tu iniam Pablo:

—Ja ai, —tamati, suntara apuri iniak:

—¿Amesha Egiptonmaya aints nuwik romanotin kajertamak: Maatará, tusa mangkartin ainaun cuatro warangan (4,000) aints atsamunam jukimia nu aintschaukitam? —tu iniasmiayi.

³⁹Tu iniam Pablo ayaak:

—Atsa, nuchawaitjai. Wikia judío aintsuitjai. Tarso yaktanmaya aintsuitjai. Cilicia nungka yaktari nekas juun yaktaitai, nuniayainjai. Wait aneamam ju aints ainaujai chichasat tusam tsangka-trukta, —timiayi.

⁴⁰Tamati suntara apuri: Ayu tama Pablo watainum wajas, aints ainaun itatmamtikiatas uwejen takui wajamtaí, aints ainau mash itatkarmiayi. Tura itatkaramtaí, Pablo hebreo chichamejai chichasmiayi.

22 ¹Tura aints ainaun chicharak: —Yatsur ainautiram, juun ainautirmesha, anturtuktaram. Wikia chicharmamkun: Nekas tunaunaka turatsjai tusan, paan ujaktasan tajarme, —timiayi. ²Tura hebreo chichamejai

chichau asamtai, nuna antukar chichatsuk takamtaik wajasarmiayi. Tuminamtai Pablo aints ainaun chicharak:

³“Wikia Judío aintsuitjai. Tarso yaktanam Cilicia nungkanam akiinawaitjai. Turayatun ju yaktanam tsakaru asan, wína nuitinu Gamaliela chichamen nuimiaru asan, ii juuntri ainau Moisésa aarmaurin umirkarmia nunasha mash umirnuyajai. Tura atum ju kinta turarme nunisnak wisha Yuse wakeramurin najanatasan tuke nintirjai wakerin ayajai.^k ⁴Tura nu yamaram chichaman umirin ainaun maataj tusan: Aishmang ainausha, tura nuwa ainausha achikrum jingkiaram kársernum engkeataram, tusan akupin ayajai. ⁵Tura sacerdote juuntrisha, tura judío apuri ainausha mash nunaka nekaawaru asar, nekasaintai tiaraintai. Nuka papin aarar wína surusar: Judío Damasco yaktanam pujuinau susata tusar akuptukarmiayi. Nu akuptukaramtai wikia nuni wena, yamaram chichaman umirin ainaun achikian, juni Jerusalénnum kiankamtai, wait wajaktiniun susarat tusan werimiajai.^l

Pablo: Criston tu umirkawaitjai tusa etserkamuri
(Hech. 9.1-19;26.12-18)

⁶“Tura jinta weayai, Damasco yaktanam jeatak wajasai tsaá tupin ai, aneachmau nayaimpinmaya paantin pengké jiitsumir wajatruckmiayi. ⁷Turamtai shamakun nungka ayaaran, kuta antumkamiajai. Tura chichaman antukmiajai. Nu chichamka nuwaitai: ‘Saulo, Saulo ¿waruka wína waitkaratas-mesha wekaaturme?’ ⁸Tamati wisha ayaakun: ‘Apu ru ¿amesha yaachitme?’ tu iniasmiajai. Nuna tama ataksha nayaim-

pinmaya airak: ‘Wikia Nazaretnumia Jesúsaitjai. Ame waitkaratasam wekaaturme nuwaitjai,’ turutmiayi. ⁹Turutmatai aints wijai wekainauka paaniuncha wainkarmiayi, antsu wijai chichaunka antukcharmiayi. ¹⁰Tuminamtai wi chichaakun: ‘Apu ru ¿warí itirkat tusamea wakerutame?’ tu iniasmiajai. Nuna tama Apu Jesús wína chichartak: ‘Wajakim weme nu yaktanam weta. Nuni jeakmin ame turatatme nuna ujatmakaratui,’ turutmiayi. ¹¹Tura Yuse paaniuri jiiun kusumtikruru asamtai, wikia nantakin wainmaktatkaman tujinkamiajai. Tura wainmachu asamtai, wijai wekajinau uwejrún tap achirkar Damasconam umatiarmiayi.

¹²“Nuni aints Ananías naartin pujuuyai. Nuka Moisésa aarmaurin miatrusang umirnuyayi. Tura asamtai judío Damasconam pujuinau mash nu aintsun pachisar pengker chichau armiai. ¹³Nu aintska wína taruti chichartak: ‘Yatsuru Saulo, yamaikia ataksha paan jiimsata,’ turutmatai, nu tamaujai metek niin paan wainkamiajai. ¹⁴Tura wi wainkam wína chichartak: ‘Ti juuntri Yusen searmia nuka ii Yusri asa, ni wakeramurin amin nekamtikramatas aitkarmayi. Tura ni Uchiri timiá pengker aa nu wainkata tusa, tura ni chichame antukta tusa aitkarmayi. ¹⁵Tura asamtai ameka Yuse Uchiri pachisam wainkamame nu, tura antukmame nusha aints ainausha mash ujaktatme. ¹⁶Tura asam ¿yamaikia warí nákakmea pujame? Wajaktia, turakmin imaitjame. Tura: ‘Apu tunaurun japitrurat tusam Yus seata,’ turutmiayi,” Pablo timiayi.

Pablon judíocho ainamunam akupkamuri

¹⁷Pablo tuke chichaak:

“Nunia nukap arusan juni Jerusalénnum jean, Yus seatai juun jeanam

wayaan, tura Yusen sean, karanma nunisnak ¹⁸Apur taarun wainkamiajai. Tura nuka wína chichartak: ‘Wári umisam Jerusalénnumia jiinkita. Ame wína pachitsam chicham etserkumnisha, junia aints ainauka anturtamkachartatui,’ turutmiayi. ¹⁹Nuna turutmatai, wisha ayaakun: ‘Apuru, wikia iruntai jeansam kichnum kichnum wayaan, amin umirtaminak pujuinaun wainkan, nunia jukin kársernum engkeyajai, tura awatnuyajai. Tura asamtai junia aints ainauka nunaka mash paan nekarinawai. ²⁰Tura ami inatiram Esteban naartin amin pachitmas aints ainaun ujaku asamtai, nu aintsun mainamtai, wikia nuni wajasan: Nuna turuwarti tusan, Estebankan maawarmia nuna wejmakrin nakasmiajai,’ Jesúsán timiajai.’^m

²¹“Wi tamaitiat Apur Jesús wína chichartak: ‘Wikia amin arák judíochu ainamunam akupkatasan wakerajme. Tura asamtai weta,’ turutmiayi,” Pablo timiayi.

Pablo suntara apurin chichasmauri

²²Judío ainau Pablo etsermaurin chichatsuk antukarmiayi. Turayat judíochu ainaun pachis chichaamtai, kakarar untsuminak:

—Ju aintska maaram japataram. Juka iwiaakuka pujuschatu, antsu jakati, —tiarmiayi.

²³Nunia kakarar unsumkar wejmakrin aimiakar, nungka tsetserin nangkiminak Pablon yukuarmiaayi. ²⁴Turinamtai, suntara apuri nuna wainak Pablon pachis ni suntarin chicharak:

—Atumi pujamuri itaram awatrataram. Tura awataram ¿aints ainau warukaya untsuminawa? tusaram nekaataram, —tusa akupkamiayi. ²⁵Turamtai suntar ainau Pablon awatratas nuwap

chapikmarmaujai jingkiawaram, Pablo romano kapitantrin nuni jiimiaj wajaun chicharak:

—¿Romano aints chicham nekartsuk awatramnaukitrum? ¿Atumi apuri nuna tsangkatramarmek? —timiayi.

²⁶Tamati nuna kapitán antuk, suntara apurin jiistas we, nuni jea chicharak:

—¿Amesha iturkatmek? Nu aintska romano aintsuitai. Tura asamtai awatrashtinuitme, —timiayi.

²⁷Tamati suntara apuri Pablon weri chicharak:

—¿Nekasmek romano aintsuitam? —tu iniasmiayi.

Tu iniam Pablo:

—Ja ai, —timiayi.

²⁸Tamati suntara apuri chicharak:

—Wikia romano aints wajastaj tusan, kuikian nukap akiimiakmiajai, —timiayi.

Tamati Pablo ayaak:

—Antsu wisha romano ainamunam akiinaw asan romano aintsuitjai, —timiayi.

²⁹Tamati nuna antukar Pablon awatratas wajainauka awattsuk ukukiarmiayi. Tura Pablo romano aintsuitjai, tinu asamtai, suntara apuri: Pablo jingkiataram tinu asa shamkamiayi.

Pablo judío juuntri ainaun chicharkamuri

³⁰Kashin tsawaar suntara apuri: ¿Waruka judío ainau Pablon timiá kajerina? tusa tenap nekaatas wakerak, jingkiamurin atitamiayi. Nunia sacerdoté juuntri ainaun: Judío apuri ainaujai iruntrarti tusa chichaman akupkamiayi. Tura mash iruntraramtai, Pablon judío apuri iruntramunam jepen awajsamiayi.

23 ¹Turamtai Pablo judío apuri ainaun jiis chicharak:

—Wi wear ainautiram anturtuktaram. Wikia Yuse umirin asan, tuke inaitsuk tunau nintimtsuk pujuyajai, —timiayi.

²Tamati sacerdote juun apuri Ananías naartin Pablojai tsaniasar wajainaun chicharak:

—Jangke awatitaram, —timiayi.

³Tamati Pablo jiyaak:

—Ameke jimiá chichamtin asakmin, aminak Yus awatamratatui. Wína tunaar nekaatasam: ¿Moisésa chichamen umirtsuash? tusam eketiatmesha ¿waruka Moisésa chichame umirtsuksha: Jangke awatitaram tame? —timiayi.^a

⁴Tamati nijai ayaamsar wajainau Pablon chicharinak:

—Maj, sacerdote juun apuri wainiatmesha ¿waruka tuusha chicharme? —tiarmiayi.

⁵Tu tinam Pablo chicharak:

—Wi wear ainautiram, juka sacerdote juun apurintai, tarume nunaka nekachu asan nunaka tajai. Yuse chichame tu aarmawaitai: ‘Atumi juuntri ainau pachisrum pasé chicharkairap,’ tawai, —timiayi.

⁶⁻⁸Nuna tusa Pablo judío juuntri iruntramunam saduceo ainau fariseo ainaujai pachinirarun wainkamiayi. Saduceo ainau nintiminak: Jakau ainau ataksha iwiaaku pujusartaska nantakchartinuitai, tura Yuse awemamuri atsuinawai, tura wakancha pengké atsuinawai, tinu armiayi. Antsu fariseo ainauka nunaka pachisar: Nuka mash ainawai, tinu armiayi. Pabloka nunaka nekaa kakar chichaak:

—Wi wear ainautiram, wikia fariseo aintsuitjai. Tura fariseo uchirinjai. Tura asan jakau ainau ataksha nantakiar iwiaaku pujusartinuitai tajai. Wikia tu tinu asantai, wína chichamrun nekartu-wartas juni iruntrari, —timiayi. Nuna tamati fariseo ainau saduceo ainaujai chicharnainak metekka nintimsuk kanakar wajasarmiayi.^o

⁹Tura mash taetet wajainak, Moisésa chichamen nuikiartin ainau fariseo asar, wajasar chichainak:

—Ju aintska tunau kichkisha turachi.

¿Antsu wakan tura Yuse awemamuri nijai chichaschamasha? ¿Yaachia neka?

—tiarmiayi.

¹⁰Tura kakarar chicharnainak wajainamtai, suntara apuri Pablon pachis: Nu aintsun achikiar japikiar maachartimpiash, tu nintimias: Nunaka turacharti tusa, suntar ainaun: Pablon jukiarti tusa, chichaman akuptukmiayi. Turamtai suntar ainau ni matsatmaunum ataksha jukiarmiayi.

¹¹Turinamtai kashi Apu Jesús Pablon wantintuk chicharak:

—Pabla, juni Jerusalénnum wína pachitsam chichasume nunismek Roma yaktanmasha chichastinuitme. Tura asam pengker nintimsata, —timiayi.

Judío ainau Pablo maami timiauri

¹²Kashin tsawaarar judío iruntrar chichainak:

—Pablo maami. Maachkurkia, yutasha yutsuk, tura amutisha amutsuk pujustatji. Antsu Pablo maachiatrik yuwakrinkia, tura amutisha amakrinkia, Yus iin pasé awajtamsatati, —tiarmiayi. ¹³Nunaka cuarenta (40) aints nangkamasang tiarmiayi. ¹⁴Turuwar sacerdote apuri ainau judío juuntrijai iruntrar pujuinamunam weriar chicharinak:

—Iikia Pablo maami tinu asar, maachkurkia yutasha yutsuk pujustatji. Antsu Pablo maatsuk yuwakrinkia, Yus iinka pasé awajtamsatati, —tiarmiayi. ¹⁵Tura ataksha chicharinak:

—Atumsha tura ii juuntri ainausha suntara apurin chicham akuptakrum: Iisha nu aints pachisar chicham tenapkesar nekarataras wakeraji, anangkuram titaram.

Turakrumin suntara apuri Pablon akupkam-tai, atumin jeatsaing ii maatji, —tiarmiayi.

¹⁶Tinamtai Pablo awe, ni umaji uchiri, nu aints ainau chichaamurin antuku asa, suntar matsatmaunum jea, nuni waya jiichrin ujakmiayi. ¹⁷Tu ujakmau asa, Pablo kapitanin untasuk chicharak:

—Ju uchikia apu pujutirin jeeta, wína chichaman ujata nuna apurmincha ujakti, —timiayi.

¹⁸Pablo tamati, kapitán uchin suntara apuri pujamunam juki, apurin chicharak:

—Aints Pablo naartin ii achikmaji nu wína unturak: Ju uchikia apunam umata turutin asamtai itajai. Chichaman niin ujakma nuna amincha ujatmakti, —timiayi.

¹⁹Tamati suntara apuri uchi uwejen achik, iik kanakar pujusar nekaami tusa chicharak:

—¿Warí ujatkatasmea wakerutame? —tu iniasmiayi.

²⁰Tu iniam nuka ujaak:

—Judío juuntri ainau chichaman najaninak: ‘Kashin Pablo jukim judío juuntri iruntramunam akupturkakmin, nu aints pachisar chicham tenapkesar nekaratar wakeraji,’ tusar amin anangkramawartas ininmasartatui.

²¹Turaminamtaisha: Nekasampita tiip. Cuarenta (40) aints nangkamasang jinta epetak pujurinawai. Tura chichainak: ‘Iikia Yusjai taji: Nu aints maachkurkia, yutasha yutsuk tura amutisha amutsuk pujustatji,’ tinawai. Tura chichaman najanawar umisar, apu ayu titi tusar, amin nakarminawai, —timiayi.

²²Tu tinu asamtai suntara apuri uchin chicharak:

—Yamaikia weta. Antsu wína ujatkame nuka aints kichkisha pengké ujakaip, —tusa akupkamiayi.

Pablo apu Felixnum akupkamuri

²³Nunia nu apuka suntara kapitangkrin jimiaran untasukmiayi. Tura mai taaram-tai chicharak:

—Yamaikia jimia pachak (200) suntar saapin takusar, nunia setenta (70) suntar kawainum keemkar, nunia suntar jimia pachak (200) nangkin nanasar atumjai wearti tusaram umistaram. Nunia kashi japeantak wakai, nu suntar ainaujai Cesarea yaktanam wetaram. ²⁴Nunia Pablo kawainum keemsatin umirsataram. Nuka apu Felixnum pengker jeati tusaram turataram, —tusa akupkamiayi. ²⁵Nunia papin akupkatas tu aarmiayi:

²⁶“Wikia Claudio Liciasaitjai. Apu Felix, nekas wína apur asakmin, amin chichaman akuptajme. ¿Amesha pengkerak pujam? ²⁷Ju aintsun amin akuptajme. Judío ainau niin achikiar maatai tinamtai, juka: Wikia romano aintsuitjai tamati, wikia nuna nekaan, wína suntarur ainaujai werin ayamrukmajai. ²⁸Tura ¿warukaya maawartas wakerinawa? tusan nuna nekaratarasan judío apuri ainau iruntainum jukimjai. ²⁹Tura nuni jeamtai, ii juuntri umiktin chichaman umiatsui tinau wainiatnak wikia: Maawarti tichamnawaitjai. Karsernumsha engkeawarti tichamna-waitjai. ³⁰Tura judío ainau nu aintsun maawartas chicham najatmaun nekaan, wári amin akupajai. Nunia nu aintsun kajerinaun chicharkun: Atumsha apunam werum atumi kajeramuri pachisrum ujaktaram timiajai. Nunak tajame,” tu aarmiayi.

³¹Tura suntar ainau akupkamu asar miatrusarang umirinak, Pablon jukiari, kashi wekaa wekaaka, Antípatris yaktanam jeeniarmiayi. ³²Kashin tsawaar suntar nawejai wekajinauka ni matsam-tairin waketkiarmiayi. Antsu suntar kawainum keemsar wekajinauka Pablojai Cesareanam wearmiayi. ³³Tura nuni jear papi aarmaun apun suwinak:

—Yamaikia Pablo wainkata, —tiarmiayi. ³⁴Tinamtai apu papin aujas umis Pablon chicharak:

—¿Amesha tunía aintsuitme? —tu iniam Pablo ayaak:

—Wikia Cilicia nungkanmaya aintsuitjai, —timiayi. ³⁵Tamati apu chicharak:

—Amin kajertamina nu taar, amin pachitmasar chichaman ujatinamtai anturkatatjame, —timiayi.

Nunia ni suntari ainaun akatar akupak:

—Apu Herodes jean jeamkamia nuni pujsaram ju aints wainkataram, —tusa akupkamiayi.

Apu Felixnum Pablo chicharmamsamuri

24 ¹Nunia cinco (5) kinta nangkamaramtai, sacerdote juuntri Ananias naartin, chikich judío juuntri ainaun ayas, tura chikich chicharkartin Tértulo naartin amia nuna ayas, Cesareanum jearmiayi. Tura Pablon kajerinau asar apunam wearmiai. ²⁻³Tura jearamtai, apu Pablon untsuam ni wayaamtai, Tértulo Pablon tsanumratas apun chicharak:

—Apu Felixta, ameka nekas chicham nekamtikiartin asakmin, angkan pengker pujaji. Tura pengker inamin asam, ii nungkari nekas pengker iwiarin asakmin, mash ju nungkanam pujuinautikia tenukap maaketai taji. ⁴Antsu chicham untsuri antakmeka yaweraim tusan, wait aneasam wi chichaamtai, jumchiksha anturtukta tajame. ⁵Ju aintska sungkura nunisang paseetai. Nuka mash nungkanam wekaas, judío ainau metekchau nintimtikratas: Jesúsak umirkataram tusa, Nazaretnumia aintsu umirnu apurintai. ⁶Tura Yus seatai juun jean pasemamtikratas wakerau asamtai achikmaji. ⁷Turamaitiat suntara apuri Licias ni suntarijai taar, nu aintsun atantramkiarmaji. ⁸Ame ju aints inim, ningki etsermatai, ii taji nuka nekasaintai tusam nekaatatme, —Tértulo timiayi.

⁹Tamati judío nuni kaunkaru ainausha apun chicharinak:

—Ju etsera juka nekasaintai, —tsanuminak tiarmiayi. ¹⁰Tinamtai apuka: Pablo chichasti tusa, uwejejai untsukmiayi.

Turamtai Pablo apun chicharak:

—Apu, ameka untsuri musach ju nungkanmaya ainau chicham nekamtikin asakmin, wikia nunaka nekau asan, wína chichamur anturtukta tusan, pengker nintimsan ujaktatjame. ¹¹Wikia Jerusalénnum Yusen seatasan tamauruka doce (12) kinta nuke nangkamari.

Amesha nekasaintai tusam nekaamna-waitme. ¹²Tura nuni jean, nu yaktanam Yus seatai juun jeanam wayaan, nunia iruntai jeanmasha wayaanan, aanumkessa aints kichkijaisha jiyaniamunka waitkacharmayi. Tura aints ainaujai taetet wajamuncha waitkacharmayi.

¹³Juni aints taara juka wína pachitsar:

Tunau turayi tusarka, turutcharmin ainawai. ¹⁴Antsu nunasha tajame: Jesús yamaram chichaman nuikiartimia nuna wikia umirkawaitjai. Nu yamaram chichaman nekasun umiyatnak, ii juuntri Yusrincha tuke umirkawaitjai. Tura Moisésa aarmaurincha mash, tura yaanhuik Yuse chichame etserin aarmaurincha mash wikia nekasaintai tajai. ¹⁵Nuniasha tunaarinchau ainausha, tura tunau ainausha jakaarusha jakamunmaya nantakiartinuitai, ju aints ainau tina nunisnak wisha tajai. ¹⁶Nuna tau asan Yusen nintimsan, tuke inaitsuk tunaarinchau pujustasan wakerajai. Tura aints ainaun nekasun pasé awajtsuk pujustasan wakerajai.

¹⁷“Wikia untsuri musach chikich nungka ainamunam wekaasau asan, kuikian yuuminak pujuinaun susatasan, tura Yusnau aa nuna Niin susatasan wína nungkarun tamajai. ¹⁸⁻¹⁹Wikia nuna turakun, judío ainauti tuke turaji nunisnak pengker nijaamaran, aintsun jumchik ayasan, Yus seatai juun jeanam wayaamjai. Antsu taetet wajamuka

atsumi. Tura Asianmaya judío ainau nuni wayaawar, wína waitkarma nu juni taar, wi tunau turawaitmataikia, auka tunau turami turutiarintai. Antsu nuka taarchayi. ²⁰Nuka tacharu asaramtai, aints juni kaunkaru ainau wi nuwik judío apuri iruntramunam wajasan, tunau turamun wainkaru ainakka etserkarti.

²¹Antsu nuni wajasan kichik chichaman kakarman chicharkun: Jakau ainau jakariat ataksha nantakiar iwiaaku pujusartin ainawai, wi timiaja nu chichaman pachisar: Paseetai turutina-tsuash,” Pablo timiayi.^p

²²Tamati apu Felix nu yamaram chichaman pachis etsermaun antuku asa, judío juuntri ainaun chicharak:

—Suntara apuri Licias taamtai, atumi chichamen nekaaratjarne, —timiayi.

²³Nuna tusa apu Felix suntara kapitangkrin untuk chicharak:

—Ju aintska wainkata, antsu jingkiatsuk jeanam pujсата. Antsu ni amikri taaramtai, Pablon yaingkiarti tusam tsangkatkata, —timiayi.

²⁴Chikich kintati Felix ni nuwari Drusilajai ataksha tamiayi. Ni nuwaringkia judío nuwa ayayi. Tura Pablo itataram timiayi. Jesucristo itiu umirkatnuita tusa, nuna ujatkat tusa apu Felix Pablon untukmiayi. ²⁵Turamtai Pablo:

—Tu tunaarinchau pujustinuitji, tura ii wakeramuringkia tu nepetkatnuitji, tura ni kintari jeamtai, Yus tunaarintin ainaun jiistinuitai, —tusa ujaam, Felix shamak Pablon chicharak:

—Yamaikia nuke ati tusam weta. Wikia chikich kintati angkan pujakun untuktatjame, —timiayi.

²⁶Nunia Felix nintimias: Pablo achikmau jiinkitas wakerakka, kuikian suruschatpiash tusa, jumchik arus Pablon ataksha untuk, nunia ataksha untuk,

tuke nijai chichastas wakerimiayi.

²⁷Jimia musach nangkamaramtai, Felix apu pujayat jiinkimiayi. Tura jiinkiamtai Porcio Festo apu wajasmiai. Antsu Felix: Judío ainau wína pengker nintimtursarat tusa, Pabloka tuke achikmau pujusti tusa ukukmiayi.

Pablo apu Feston chicharmamsamuri

25 ¹Turamtai Festo Cesareanam taa, kempatam kinta nangkamaramtai, nunia Jerusalénnum wemiayi. ²Nuni weamtai sacerdote juuntri ainau judío juuntri ainaujai Pablon tsanuminak chichaman unturi ujakarmiayi. ³Tura chicharinak:

—Wait aneamam nu aints juni Jerusalénnum weti, tusam akupkata, —tiarmiayi. Jinta nakakar maami, tu nintimsar nunaka tiarmiayi. ⁴Tu seainamaitiat Festo ayaak:

—Pablo Cesareanam achikmau pujawai. Tura wikia juni jumchik kinta pujusan waketanak wajajai. ⁵Tura asamtai atumi apuri ainau wijai Cesareanam wearti. Tura nu aintsu pasé turamuri amatikia, nuni etserkarti, —timiayi.

⁶Tura Festoka jumchik kinta Jerusalénnumka pujusmiayi. Ocho (8) kinta, turachkusha diez (10) kintaksha pujuschayawash. Nunia ataksha Cesareanam waketkimiayi. Tura nuni jea, kashin tsawaar chichaman nekaatas apu keemtainum keemas: Pablo itataram, tusa ni suntarin akuptukmiayi. ⁷Tura Pablo wayaamtai, judío Jerusalénnumia kaunkaru asar, Pablon tentakar nangkamiar chicharinak:

—Juka nekas tunau unturi turamiayi, —tusa tsanumriarmiayi. ⁸Tinamaitiat Pabloka: Warintajak tusangka yuumat-kachmiayi. Tura chichaak:

—Wikia tunaanaka kichkisha turachmiajai. Tura Moisésa chichame

judfoti tuke umirji nunasha umirkawaitjai. Tura Yus seatai juun jeancha paseeka awajsachmiajai. Tura romano juun apurin pachisnaka paseenaka chicharkachmiajai, —timiayi.

⁹Tamati apu Festo judío ainau wína pengker nintimtursarat tusa, Pablon chicharak:

—Ami chichamin nuni nekartuwarat tusam ¿Jerusalénnum wetasam wakeramek? —timiayi.

¹⁰Tu iniam Pablo ayaak:

—Atsa, wikia judío ainaunka paseeka awajsachmiajai. Ameka nuka nekame. Tura romano juun apuri wi turamurun nekartuati tusan ujaktinuitjai. ¹¹Turayatun nekasan wi juun tunau turamtaikia, wína mantuatasam wakerakmeke mantuata. Wikia jatanka shamatsjai. Antsu wína tsanumrutinak etserturina nuka nekaschawaitmataikia, winaka judío ainamunmaka surutkachminuitme. Tura asamtai romano juun apuri César chichaman nekartuati tusan tajame, —timiayi.⁹

¹²Tamati apu Festo ni aintsri ainaujajai chichasmiayi. Nunia Pablon chicharak:

—Nekasam romano juun apuri César chichamrun nekartuati tau asakmin nuni akupkatatjame, —timiayi.

Pablo apu Agripan chicharmamsamuri

¹³Jumchik kinta arus chikich apu Agripa naartin ni umaji Berenicejai Cesarea yaktanam apu Feston jiiisartas taarmiayi. ¹⁴Tura nuni taar, untsuri kinta pujuinai, Festo Pablon pachis apu Agripan ujaak:

—Apu Felix aintsun achik juni ukukmiau tuke pujawai. ¹⁵Tura asamtai wikia Jerusalénnum pujai, sacerdote juuntri ainau judío juuntri ainaujajai iruntrar nu aintsun pachisar: Tunau

turamiayi tusar kautrukarmayi. Tura: Nu aintsnaka maawarti tusar seatiarmayi.

¹⁶Tu seatinamtai wikia ayaakun: Romano apuri ainautikia chicham nekatsuk aintsun maawarti tichamnawaitji. Tura aints tunau turayi tinu ainaujajai ingkiunisar: Tunaari atsuash tusar nekaratnuitji. Tura nu aints chichaman nekarmamchaukeka: Maawarti tusarkia akupatsji, wikia timiajai. ¹⁷Tu tinu asamtai, judío ainau juni kaunkaramtai, wikia nakatsuk kashin tsawaaran chichaman nekaratasan apu keemtainum keemsan, nu aints itataram tusan, suntarun akupkamjai.

¹⁸Tura judío ainau niin pachisar: Juun tunaun untsuri turayi tichartimpiash tu nintimramjai. Tura wainiat nunaka ticharmayi. ¹⁹Antsu ni Yusrin pachisar nu aintsjai metekchau nintimraru asar, nuka paseetai tiarmayi. Tura Pabloka chikich aints Jesús naartin jakayat iwiaakuitai tinu asamtai, nuna pachisar etseriarmayi. ²⁰Tu etserinamtai, wikia itiurkatjak tusan, nekachu asan Pablon iniasan: Ami chichamin nekartamawarat tusam ¿Jerusalénnum wetasam wakeramek? timiajai. ²¹Wikia tamati, nuka aimiak: ‘Atsa, antsu romano juun apuri César chichamrun nekartuati,’ tamati wikia ayaakun: ‘Takumka Césarnum wi amin akupachmaka, juni achikmau pujusta timiajai,’ —Festo apu Agripan ujaak timiayi.

²²Tu ujaam apu Agripa Feston chicharak:

—Wisha nu aintsu chichamen antuktasan wakerajai, —tamati Festo ayaak:

—Ayu, takumka kashin wi untsukamtai, ni chichamengka anturkatatme, —timiayi.

²³Kashin tsawaar apu Agripa Berenicejai shiirman iwiamamsar, suntara apuri ainaujajai, tura nu yakta apuri ainaujajai,

romano juun iruntai jeanam wayaawaramtai Festo: Pablo utita, tusa ni suntarin akuptukmiayi. ²⁴Tura Pablon itaaramtai, Festo apu Agripan chicharak:

—Apu Agripaya, tura mash juun ainautiram, ju aints jiistaram. Judío Jerusalénnum pujuinaw mash ju aintsun kajerinak pasé chicharinawai. Tura tuke inaitsuk maatai tinawai. Tura juni taarsha nunisarang inintru weenawai. ²⁵Tura wikia nintimsan:

Ju aintska maata, turutiaru wainiatnak, juun tunaunaka turichu asamtai, maachminuitjai tajai. Tura ningki: ‘Romano juun apuri César chichaman nekartuati,’ turutin asamtai, nuni akupkatasan nintimjai. ²⁶⁻²⁷Antsu aints achikmau ni turamurin nekatskeka nangkamrik juun apunam akupkachminuitji, tu nintimjai. Tura ju aintsun pachisan wína juun apurun warinak aatrataj tusanka nekatsjai. Tura asamtai atumsha mash antuktaram tusan, tura amesha apu Agripaya ju aintska iniasta tusan, amin itarjiame. Nuniasha paan antuknaka papinasha aartatjai, —timiayi.

Pablo Agripan: Tu pujajai timiauri

26 ¹Nuna tamati apu Agripa Pablon chicharak:

—Ame turamuram pachisam etserkata, —tama Pablo: Anturtuktaram, titas uwejen takui apu Agripan chicharak:

²⁻³—Apu Agripaya, ju kintati wikia juni pengker nintimsan wajajai. Judío ainauti itieur pujaji, tura warí pachisria chichaaji nu miatrusmek nekau asam, judío ainaw wína tsanumrutinak tina nunaka pachisan wi etsermati, anturtukta tusan juni wajajai. Tura asan wait aneam pengker nintimtursam anturtukta tajame, —Pablo timiayi.

Pablo yaanchuikia tu pujuyajai timiauri

⁴Tura ataksha etserak:

—Wikia yaanchuik uchi akunka wína nungkarun pujaknasha, tura nampuaran Jerusalénnumsha itieur pujuyaja nunaka judío ainaw mash nekarinawai. ⁵Nunaka nekarinaw asar, wi yaanchuik fariseo wajasmauncha nekarinawai. Fariseo ainaw: Yusen miatrusnak umirnitjai tumaminawai. Nuna mash nekainaw asar, ni wakerinakka wína pachitsar ujatmakarminuitai. ⁶Yus yaanchuik ii juuntri ainaun chicharak: Jakau ainaw jakariat, ataksha nantakiartinuitai tinu asamtai, wisha nunisnak tinuyajai. Tu tinu asamtai, juni yamaikia chichaman nekartuwartas itariari. ⁷Iikia Israela uchiri doce (12) armia nuna weari asar, mash jakamunmaya nantaktasar wakerau asar, tsawaisha tura kashisha Yuska miatrusrik umirnyujai. Apu Agripaya, wikia jakamunmaya nantakinuapitji tinu asamtai, judío ainaw wína tsanumrutinawai. ⁸¿Waruka Yus jakau ainaun jakamunmaya inankitnuitai, tuuka nintimtsurme? —Pablo timiayi.^r

Pablo Cristonu ainaun tu wekaatinuyajai timiauri

⁹Tura ataksha etserak:

—Yaanchuik wiki nintimsanak: Nazaretnumia Jesúsa umirkarunka kajerkatnuitjai, tinuyajai. ¹⁰Wikia Jerusalénnum tu nintimsan pujai, sacerdote juuntri ainaw turata tusar inatramantai, Cristonu ainaun mainamtai, wisha pengkeraitai tinuyajai. ¹¹Tura iruntai jeanmasha mash wayaan, Cristonu irunun awatnuyajai. Criston umirtan nakitajai tiarat tusan turinuyajai. Tura Cristonu ainaun timiá kajerau asan, chikich nungkanam chikich yakat

ainamunam wekaatinuyajai, —Pablo timiayi.⁵

Pablo Criston tu umirkawaitjai tusa ataksha etserkamuri
(Hech. 9.1-19;22.6-16)

¹²⁻¹³Tura ataksha etserak:

—Wi nuna tuke turin asamtai, sacerdote juuntri ainau turata tusar, papin aarar surusaramtai, wikia Damasco yaktanam wemiajai. Tura tsaá tupin wajasai jinta weai, aneachmau nayaimpinmaya paantin pengké jiitsumir tsaá tsanmau nangkamasang kakarman tsanturamiayi. Apu Agripaya, wikia jinta wekaakun nuna wainkamiajai. Tura wijai wekainausa nuna wainkarmiyai. ¹⁴Tura iikia mash shamkar, nungkanam ayaarar kuta antumkarmiaji. Tura kuta antumkarkrin, hebreo chichamejai chichaun antukmiajai. Nu chichamka nuwaitai: ‘Saulo, Saulo, ¿waruka winasha waitkaratamesha wekaaturme? Waaka kajek numin naka wajakun najar, nawen meseawa nunismek amek ami nintim meseame,’ turutmiayi. ¹⁵Turutmatai wikia: ‘Apu ru ¿amesha yaachitme?’ timiajai. Wi tu iniam nuka aimiak: ‘Wikia Jesúsaitjai. Ame waitkaratasam wekaaturme nuwaitjai. ¹⁶Tura nantakim wajakta. Yamaikia wina inatir atatme titasan wantintajme. Tura ame wainkamurmesha pachisam etserkata. Tura ukunam wantintuktatjame nusha etserkamnium tusan tajame. ¹⁷Judío ainau tura judíocho ainausha amin kajertaminamtaisha wi ayamruktatjame. Nuna turatin asan, yamaikia judíocho ainamunam akupkatatjame. ¹⁸Tura amin akupakun: Wina chichamur etserkum, aints ainau ninti uratia tusan tajame. Ame turakmin teenam pujuinauka yamaikia paanunam pujusarti tusan

wakerajai. Tura iwianchi apuri Satanásan umirtsuk, Yusen umirkarat tusan akupkatatjame. Tura wina nekasampita turutinamtikia, ni tunaarin tsangkuratatajai. Tura Yus winar ataram tusa, eakarmau asar, wijai iruntrar pujusarti tusan akupkatatjame,’ Jesús turutmiayi, —Pablo timiayi.

Pablo Apu Jesúsá chichame miatrusang umikmauri

¹⁹Tura ataksha chicharak:

—Apu Agripaya, Jesús nayaimpinmaya wina turutmia nunaka miatrusnak umirkamiajai. ²⁰Tura asan nu chicham-naka Damasconam pujuinaun nuná eemkan ujakmiajai. Nunia Jerusalénnum waketkin, nunia mash Judea nungkanmasha wekaasan, nunia arák nungkanmasha wekaasan, judíocho ainauncha nu chichamnaka ujaakun: ‘Atumi pasé nintimaurisha yapajiaran Yus umirkataran. Nunia Cristonuitjai tusaram, nekas pengker aa nu turataram’ timiajai.[†]

²¹“Nunia Yus seatai juun jeansam wikia wayaamtai, wina achirkar mantuwartas wakerutiarmiayi. ²²Tura Yus wina yainkau asamtai, tuke inaitsuk apu ainauncha, tura mianchau ainauncha Yuse chichamen ujayajai. Tura yaanchuik Yuse chichame etserin ainau ukunam atiniun pachisar etserkarmia nuna, tura Moisés ukunam atiniun pachis etserkamia nunak etsernuyajai. ²³Yaanchuik Yuse chichame etserin ainau etserinak: Yus akupkamu Mesías waitnas jakatnuitai. Turayat jakamunmaya nuwá eemak nantaktinuitai. Tura jakamunmaya nantakiamtai, judío ainauncha tura judíocho ainamunmasha chichaman etserinak: Paan nintimsaram pujusrum uwemrataram tusar, etserkartinuitai tiarmiayi,” Pablo timiayi.[‡]

**Pablo apu Agripan:
Cristo umirkata timiauri**

²⁴Pablo nu chichaman etserak wajam-tai, apu Festo kakar chicharak:

—Pabloa, nuka waurkum tame. Papi nukap nuimiaru asam waurme, —timiayi.

²⁵Tamati Pablo ayaak:

—Atsa, apu Festoa, wikia waurtsujai. Antsu wi taja nuka nekasaintai. ²⁶Apu Agripa ju keta juka wi taja nunaka nekasaintai tusa nekawai. Tura wi taja nunaka uukchamu asamtai, nunaka mash antuku asa nekawai. Tura asamtai arantutsuk niincha ujaajai. ²⁷Apu Agripaya ¿yaanchuik Yuse chichame etserin aararmia nuka nekasampita tamek? Wikia nekajme. Ame nekasampita tame, —Pablo Agripan timiayi.

²⁸Tama Agripaka ayaak:

—¿Wári Cristo umirkat tusamek wakerutam? —timiayi.

²⁹Tamati Pablo chicharak:

—Ja ai, yamaik tura nukapka arutsuk wiya nunismek Yus umirkata tusan wisha wakerajme. Tura ju kinta wína chicham-run antú pujuinaka mash wiya nunisarang Yusen umirkarat tusan wikia wakerajai. Antsu wiya nunisrumek jingkiamu pujustaram tusanka tatsujrume, —timiayi.

³⁰Pablo tamati, apu Agripa apu

Festojai mai wajakiar, tura Berenicesha nijai pujuarmia nujai mash wajakiar-miayi. ³¹Tura kanakar apu ainau chicharnainak:

—Ju aintsu tunaaringkia atsau asamtai maachminuitai. Tura karsernumsha engkeachminuitai, —tunaiarmiayi.

³²Tura apu Agripa Feston chicharak:

—Ju aintska juun apu César chicham-run nekartuati tichawaitmataikia, jikir akupkamin aji, —timiayi.

Pablo Romanam akupkamuri

27 ¹Chichaa chichainaka apu Festo: —Pablon Italia nungkanam Roma yaktanam akupkami, —tamati, suntar ainau Pablon chikich achikmau ainaujai yaruakarmiayi. Turinamtai apu Festo suntara kapitantrin chicharak:

—Ju achikmau jukim, Italia nungkanam juun apu pujamunam umatia, —timiayi. Nu kapitán Julio naartin apu Césari suntarin inauyayi. ²Tura asamtai juun kanu Adramitio yaktanmaya jeamtai, nuni engkemramiayi. Nu kanuka Asia nungkanam wetin asamtai, iikia Cesareanmaya jikir, juun entsanam wekaasamiayi. Tura Macedonianmaya aints Aristarco naartin iijai wemiayi. Nuka Tesalónicanmaya aintsuyayi.^v

³Tura kashin tsawaarar Sidón yaktanam nujamkamiayi. Tura nujamkarin, Julio Pablon wait anentak:

—Kanunmaya jinkim amikrum ainau jiiista. Turakmin nuka yuumamurmin suramsarti, —tusa tsangkamkamiayi. ⁴Nunia ataksha kanunam engkemrar, Sidónnumia jikir, juun entsanam wekaasar, nase nujinmanini umpuu asamtai, isra Chipre tutaingkia ii menarini ukukir nuni wekaasamiayi. ⁵Tura juun entsa katingkiar, Cilicia nungka yantamen nangkamakir, nunia Panfilia nungka yantamen nangkamakir wekaa wekaaka, Mira yaktanam nungka Licia tutainum nujamkamiayi.

⁶Nuni nujamkarin, kapitán chikich juun kanun Alejandría yaktanmaya jeaun wainkamiayi. Nu kanuka Italia nungkanam wetin asamtai: Nuni engkemaram tusa akuptamkamiayi. ⁷Tura unturi kinta yaitik wekaasamiayi. Tura Gnido yaktanam jintumsar wekaasar, nase nujinmanini kakar nasentu asamtai, nuni

wetatkamar tujinkar, isar Creta tutai tenteenkir, yakat Salmón tutai yantame-nini nase majatau asamtai nuni wekaasamiaji. ⁸Tura nuni pengké wechamin asamtai, wait wajakir nu isra tsakarín tenteenkir chikich nujamtainum, “Pengker Nujamtai” tutainum jeamiaji. Nuniangka yakat Lasea tutaingkia arakchichuyayi. ⁹Tura wekaa wekaaka untsuri kinta mengkakai asar, tura yumanch jeatak wajasu asamtai, juun entsanmaka wekaasachminuitai. Tura asamtai Pablo suntara kapitangkrin chicharak:

¹⁰—Juun ainautiram, yamai wekaakurkia, nekasar sapij wait wajakatji, tu nintimjai. Nekas juun kanusha jakurtatui. Tura warinchi ainausha jeekatatji. Tura aintstisha kajingminuitji, —tu chicharkamiayi.

¹¹Tamaitiat suntara kapitangkri Pablo chichamenka anturtsuk, kanu anuntrinu chichamen, tura kanurtinu chichamenak anturkamiayi. ¹²Tura yumanch amanumak nu nujamtainum pujuschamin asamtai, mash iruntrar nintimsar: Ataksha juun entsanam wekaakurkia, chikich Cretanmaya nujamtainum Fenice tutainum jeami tiarmiayi. Nu nujamtainum tsaa akaatai untsurinini tura menarininisha nase jumchik nasentu asamtai, nuni pujusar yumanch inangkarmi tiarmiayi. Antsu Pabloka tuuka nintimrachmiayi.

Juun entsanam nase kakar nasenkamuri

¹³Tura surnumia nase yaitas nasenmatai: Yamaikia Fenicenam jeataji, tu nintimsar pujusarmiayi. Tura Pengker Nujamtainumia jiinkir isar Creta yantamen arakchichu wekaasamiaji.

¹⁴Tura jumchik arusar tsaa waakmaunum menanmanini aneachmau nase kakar nasenmiayi. ¹⁵Tura nase nujinmanini kakarman nasenmatai, kanu iikiatataka-

mar tujinkar, waketikichmin asar: Aintsarkesha wemi tusar wemiaji. ¹⁶Tura isar tuupich Cauda tutai tenteenkir, atu yantame nase jumchik majantiamtai, nuni wekaasar, kanu yairach nenakar wemiaji nu japikir waitnasar juun kanunam engkermiaji. ¹⁷Tura kanu yairach engkerar umisar, juun kanunam takakmin ainau kanu netsepen chapikjai jingkiawarmiayi. Nunia juun entsa páparim amanum, Sirte tutainum juun kanu pataamini tusar, nase kakarman nasentu asamtai, tarach juun nase umputinka kuakir, nunia tarachrinchau nase nasentak juun kanu umati tusar nakasmiaji. ¹⁸Kashin tsawaarar nase tuke kakarman nasentu asamtai, juun kanu wampuptit tusar, warinchi meram ainaunka juun entsanam ujungkarmiayi. ¹⁹Nunia kempatam kinta nangkamaramtai, juun kanu nitkarin engketiarmia nunasha ni uwejejai utsangkarmiayi. ²⁰Tura untsuri kinta tsasha waintsuk, tura yaa ainausha waintsuk pujau asar, nasengka tuke nunisang kakarman nasenmiayi. Tura kakarman nasenmatai: Yamaikia uwemrashtatjiapi, tu nintimiat nangkamamiaji.

²¹Tura aints mash yurumkancha yutsuk, untsuri kinta takakmasu asaramtai, Pablo mash aints ainamunam japan wajakí chicharak:

—Juun ainautiram, anturtuktaram. Isar Cretanmaya jiintsuk nakasmi, wi timiaja nu umirtukuikurminkia, juun kanusha meserchau ayi. Tura warinchi ainausha entsanam ujungchamu ayi. ²²Antsu juun kanu jakur tuke mengkakamtaisha, aintska kichkisha jakashtatui. Tura asamtai yamaikia napchau nintimtsuk asataram. ²³Wikia Yusnau asan, tura Yuse inatiri asamtai, Yuse awemamuri ju kashia juwi wina wantinturak: ²⁴Pabloa, shamsuk asata. Ameka romano juun apuri pujamunam jeatin asakmin, ju kanunam

amijai wekainauka mash jakarchati tusa, Yus wainkatatui,' turutui. ²⁵Juun ainautiram, Yuse awemamuri wina turutin asamtai, wikia Yusen nekasampita tinu asan: Pengker nintimsaram kakaram wajastaram tajarme. Yus ta nunaka miatrusang umiktatui. ²⁶Antsu chikich isranam pataamtiatji, —Pablo timiayi.

²⁷Tura asamtai jimia tuming nase kakarman nasentak, juun entsa Adria tutainum entsa tamparak juun kanun mai jiimtik mai jiimtik awajmatai, kashi japeng kanunam takakmin ainau pampa uj wajainau arák antukar: Entsa kaanmatkarin jeatak wajasji tu nintimrarmiayi. ²⁸Tura éwarutam kunaki? tusar nekapminak: Treinta y seis (36) metro kunarin nekapmawarmiayi. Tura jumchik arusar ataksha nekapminak, veintisiete (27) metro kunarin nekapmawarmiayi. ²⁹Tura uj wajamtai, pampa ijukai tusar shaminak, juun kanu tatangenini jiru meram jirujai jingkiamu, ancla tutai, cuatro (4) amia nuna juun entsanam jungkarmiayi. Nase jektamrai tusar, tura kanu nuni nanasat tusar turuwarmiayi. Tura shaminak: Wári tsawaarat tusar Yusen searmiayi. ³⁰Tura tsawaarat tusar nakainai, kanunam takakmin ainau nintimsar: Kanunmaya iik jiinkir uwemrami, tusar kanu yairach juun kanunam jingkiamu tepemia nuna atiwar: Entsanam nanasti tusar, chapikjai akupkarmiayi. Nunia chichainak:

—Juun kanu nujinini ancla nangkimiasasar weaji, —nangkamiar anangminak tiarmiayi. ³¹Tinamtai Pablo suntara kapitangkrin, tura suntar ainaun yajak: —Ju takakmin ainau kanunmaya jiinkiamtaikia, atum juwakutirmeka uwemrashtatrupe, —ti miayi.

³²Pablo tamati, suntar ainau kanu yairach chapikjai nenaamun met charutkarmiayi. Turinamtai nu kanuka juun entsanam jakermiayi.

³³Kashik tsawaatsaing Pablo: Aints ainau yutan yuwarat tusa chicharak: —Yamaikia jimia tuming yurumak yutsuk pujarme. Tura asaram tunarta-trume. ³⁴Tura nekasrum uwemratsrum wakerakrumka, wait aneasrum jumchiksha yuwataram, jakairam tusan tajarme. Antsu yuwakrumka, kichkisha jakashta-trume, —timiayi.

³⁵Nuna tusa pangkan juki, mash wainminamunam Yusen maaketai tusa pangkan puuk yuwamiayi. ³⁶Turamtai nuna wainkar, mash pengker nintimsar yuwarmiayi. ³⁷Tura juun kanunam engkemamijai nuningkia jimia pachak, nunia setenta y seis (276) aints armijai. ³⁸Tura mash yuwar tutuarar umisar, juun kanun wampumamtikiartas trigonka kanunmayan mash utsangkarmiayi.

Juun kanu entsanam wayaamuri

³⁹Tura tsawaaramtai, kanunam takakmin ainau nungkan wainkarmiayi. Turayat éwarí nungkaki? tusarka nekaacharmiayi. Tura juun entsa yantamen engketkau miakun wainkarmiayi. Tura nuni kaanmatkan wainkarmiayi. Tura nuna wainkar: Auni nujamkami tusar wakeriarmiayi. ⁴⁰Tura kanu wetsuk nanatu asamtai, jiru meram ancla tutai, nuna jirurin met charutkar, mash juun entsanam japawar ukukiarmiayi. Nunia juun kawin jingkiamuri ataksha atiwar, nunia tarach juuntan chapikrin japikiar, tarachin yakí nenawarmiayi. Tura nase kakaram nasentu asamtai, juun kanu kaanmatkanam nujamtanak wajasmiayi. ⁴¹Tura entsa tamparamuri juninisha, tura atuninisha nukap tamparau asamtai, entsa páparim amia nuni juun kanu nuji muchikchamin patamiayi. Tura juun entsa timiá kakarman tamparau asamtai, kanu tatangkrin jakurmiayi.

⁴²Turamtai suntar ainau: Achikmau ainau yukumkiar tupikiakiarai, tusar

mash maatar wakeriarmaiya. ⁴³Antsu suntara kapitangkri Pablon uwemtikratas wakerau asa: Maawairap, tusa surimkamiya. Tura chicharak:

—Yukumin ainau eemkar juun kanunmaya jiinkiar yukuakiar kukarnum achimkarti. ⁴⁴Tura yukumchau ainau taunum achimkar, tura chikich ainau warinchunam achimkar katingkiarti, —tusa akupkamiya. Tu timiau asar, mash kukarnum achimkar iikia uwemramiaji.

Pablo Malta isranam pujusmauri

28 ¹Tura mash kukarnum achimkar uwemrau asar, ju israka Maltaitai tusar nekaamiaji. ²Nunia iincha aints ainau wait anentramau asar nukap yainmakarmiaji. Tura yumi jitau asamtai, micha amati jin keemakar:

—Juni iruntraram ji yamitaram, —tusar unturmakarmiaji. ³Turaminam-tai Pablo chapuman jinum shushuaun, napi ji sukum chapunnumia tsekengki, ni uwejen esai nemaramiayi. ⁴Turamtai nunia aints ainau nuna wainkar chichainak:

—¿Ju aintska nekas mangkartinchawashi? Juun entsanmayangka uwemrayat, ni Yusri iwiaaku pujusai tusa najmatrayi, —tiarmiayi.

⁵Tinamaitiat Pablo uwejen peaamtai, napi jinum epenamiayi. Tura najaimiatsuk pengker pujumiayi. ⁶Turamtai nunia aints ainau: ¿Warutam arusang uweje inurat? tura: ¿Warutam arusang jaak ayaantit? tusar nakasarmiayi. Nunia naka nakaka najaimiatsuk pengker pujamtai, niisha nintimrar: Yuschaukai tunaiyarmiayi.

⁷Ii pujumiaji nuni nu isra apuri ajari arakchichu amiayi. Nu apuka Publio naartinuyayi. Nuka: Wina pujutirun winitaram, tusa iin wait anentramak kempatam kinta pengker awajtamsamiaji.

⁸Turamtai Publio apari tsuwea tsuweaka ijarak jaak tepemiayi. Turamtai Pablo jiistaj tusa, ni tepamurin waya, nuni Yusen seamiayi. Tura Yusen sea umis, uwejejai muuken achirkam pengker wajasmiai. ⁹Nuna turamtai nu isranam chikich sungkurintin ainau Pablon jiisartas kautkaru ainau tsaararmiayi. ¹⁰Tura iincha pengker awajtamsar nukap yainmakarmiaji. Tura ii wetin jeamtai, kanunam engkematar pujarin, ii yuumamurin mash suramsarmiaji.

Pablo Romanam jeamuri

¹¹Tura kempatam nantu yumanch amanum nu isranmak pujusar, nunia Alejandría yaktanmaya juun kanunam engkemamiaji. Yumchati wekaasachmin asamtai, nu kanuka nuni nanaasmiayi. Nu kanu nujin romano yusri Cástor nunia Polux naartin nakumkamu yakí nujkamu ayayi. ¹²Tura nunia jiinkir, Siracusa yaktanam nujamkar, nuni kempatam kinta kanurmiaji. ¹³Nunia jiinkir, entsa kaanmatkari arakchichu ai wekaasar, Regio yaktanam jeamiaji. Tura kashin tsawaarar, nase surnumanini nasentu asamtai, nunia jiinkir, jimiaarchik kinta wekaasar, Puteoli yaktanam jeamiaji. ¹⁴Tura nuni jear, Cristonu ainau wainkamiaji. Turakrin nuka: Iijai pujusmi, turammiaji. Turaminau asaramtai, iikia nuni kichik tuming pujusar, nunia Roma yaktanam kukarak wemiayi. ¹⁵Tura asakrin Romanmaya Cristonu ainau ii winamun pachisar antukaru asar, sumatinam “Apio Sumati” tutainum jear, nuni ingkiunikmiaji. Tura chikich ainau Romanmaya jiinkiar, “Kempatam Kanuti Jea” tutainum wininau nuni ingkiunikmiaji. Tura asamtai Pablo Yusen maaketai tusa pengker nintimias wajamiayi. ¹⁶Tura Roma yaktanam jeakrin, Pablon karsernumka engketsuk, chikich jeanam pujusti tusa, suntara

apuri tsangkatkamiayi. Antsu tupikiaki tusa kichik suntar: Pablo nakasta tusa jeanam akupkamiayi.

**Pablo Romanam Yuse
chichamen etserkamuri**

¹⁷Tura Pablo kempatam kinta Roma yaktanam pujus, nunia tsawaarak Romanmaya judío juuntri ainaun untsuk mash ikiaanak chicharak:

—Yatsur ainautiram anturtuktaram.

Wikia judío ainaunka paseeka awajchayajai. Tura ii juuntri akupamurincha pachisnaka paseeka chicharchayajai. Tura waitinayat, Jerusalénnum wína achirkar, romanonam surutkarmiayi.

¹⁸Turamtai romano ainaun chichaman nekartuwartas wína nukap inintsar umisar, wikia tunaunaka turichu asamtai, nangkamir maashtinuitji tusar, wínaka akuptukartas wakerutiarmiayi. ¹⁹Tura waininayat ii juuntri ainaun: ‘Atsa, akupkairap,’ turutiarmiayi. Wína turutinamtai, wikia ayaakun: Antsu judío ainaun pachisan pasé chichaschamin ayatun, romano juun apuri chichamrun nekartuati timiajai.”

²⁰“Tura asan wisha atumin chichastaj tusan untsukjarme. Israel ainauti mash iin Uwemtikramratin tati tusar nakaji. Nuna chichamen etseru asan ju jirujai jingkiamu pujajai,” Pablo timiayi.

²¹Tamati judío ainaun chicharinak:

—Amin pachitmasar Judea nungkanmaya papin kichkisha akupturmakcharmaji. Tura ii weari ainaun juni taar, amin pachitmasar: Pasé turayi, kichkisha turamcharmaji. ²²Antsu mash nungkanmaya ainaun nu yamaram chichaman umirinaun pachisar pasé chichainau asaramtai, ¿ame itiuur nintime? nu nekaatasar wakeraji, —tiarmiayi.

²³Nuna tinau asar, nu kinta ataksha antukmi tusar wakеткиarmiayi. Nu kinta tsawaaramtai, untsuri aints Pablo pujamunam kaunkarmiayi. Tura kaunkaramtai, Pablo kashik nangkama, Yuse chichamen etse etserka kiarai inaisamiayi. Tura Yus aints ainaun itiuur inawa nuna pachis Moisésa aarmaurincha ujaak, tura yaanchuik Yuse chichame etserin ainau aarmaurincha ujaak, Jesús: Nekasampita tiarat tusa ujamiayi. ²⁴Turamtai chikich ainau ni timiaurin antukar: Nekasaintai tiarmiayi. Antsu chikich ainau: Nekasaintai ticharmiayi. ²⁵Tura tuke chicharnaisar, metekchau nintimtinisar: Wetai tinamtai, Pablo ataksha chicharak:

—Yuse chichame etserin Isafás naartinun Yuse Wakani ii juuntri ainaun tfmia nuka nekasaintai. Isafasa chichame nuwaitai:

²⁶⁻²⁷Yus Isafásan chicharak:

‘Nu aints ainaun jiisam chicharkata.

Atumka paan antayatrumek antukchatnuitrume. Tura paan wainmatcha wainmayatrumek nekaashtinuitrume. Nu aints ainaun katsuram nintintin asar, kuwishi epekua nunisarang antukartatkamawar tujintinawai. Tura wainmichua nunisarang pujuinaun asar wainmaktatkamawar tujintinawai. Tu ainiachkungka paan nekaawarminuitai. Tura nekasar antukarminuitai. Tura nintijai paan nintimsar ni tunaarin inaisaramtaikia, wikia nu aints ainaun uwemtikratnuitjai,’ Yus Isafásan timiayi.”

²⁸Tura asamtai nunasha tajarme. Yamai ju uwemratin chichaman Yus judíochou ainaun akuptawai. Tura junaka nekasar

antukartatui, —Pablo timiayi. ²⁹Tamati judío ainau nukap chicharnaikiar jiinkiarimiayi.

³⁰Turamtai Pabloka jea ikiamsamunam jimia musach pujusmiayi. Tura nuni niin jiisartas winiarmia nunaka mash pengker

nintimias: Wayataram, timiayi. ³¹Tura Yus aints ainaun tu inawai tusa, ii Apuri Jesucriston pachis shamkartutsuk aints ainaun nuiniarmiayi. Turamtai nu etsermaunaka etserkaip tusarka pengké suritkcharmiayi. Maaketai.

Pablo Romanam Pujuinaun Papin Akuptukmauri

Chichaman akuptukmauri

1 ¹Witjai Pabloitjai. Jesucristo inatirinjai. Tura asamtai Cristo wina eatak, Yusnum uwemratin chicham etserkata tusa akuptukmiayi.

²⁻³Yaanchuik Yus ni Uchirin pachis ni chichamen etserin ainaun aamtikramiayi. Ni Uchirin pachis aamtikramia nunaka ni Uchiri Jesucristo taa miatrusang umikmiayi. Ii Apuri Jesucristo Yuse Uchiri ayat aints wajas, apu Davidta weari akiinamiayi. ⁴Tura asamtai Yus ni Uchirin nekas jakau wainiat, ni kakarmarijai inankimiayi. Turamtai Yuse Wakani nekas pengker aa nuka ii Apuri Jesucriston jakamunmaya inankin asa: Nuka Yuse Uchirintai tusa, aints ainautin nekamtikramamiaji.^a

⁵Jesucristoka wina wait anentrak pengker awajtusua asa: Wina chichamur etserkata tusa, tura mash nungkanam wina chichamur etserkakmin, wina pachitsar: Nekasampita tusar umirtukarti tusa akuptukmiayi. ⁶Tura mash nungkanmaya ainaujai metek atumsha uwemratararam tusa, Jesucristo atumin eatmakmiarume. ⁷Cristo atumin: Nekasrum tunaarinchau winar ataram tusa eatmaku asamtai, Yuse aneetiri ainautirmin, Roma yaktanam pujuinautirmin, ju papin aaran akuptajrume. Ii

Apaachiri Yus ii Apuri Jesucristojai atumin wait anentraminak pengker awajtamsarti, tura angka pengker pujustinnasha suramsarti tajarme.

Pablo Roma yaktanam irastas wakerukmauri

⁸Nu nangkamtaik atumin nuna tajarme. Mash nungkanmaya ainau atumin pachitmasar: Criston miatrusarang umirinawai tinawai. Tura asamtai Jesucristo atumin pachis wina nintimtik-ruru asamtai, Yusen maaketai tajai.

⁹Wikia Yusen tuke nintimran niin umirkau asan, ni Uchiri chichamen etserjai. Tura tuke inaitsuk atumin pachisan Yusen seatjarne nunaka Yuska nekawai. ¹⁰Wikia Yusen tuke seakun: Apaachiru, ame wakerakmeke Romanam akuptukchainmeash tusan tuke seakun pujajai. ¹¹Wikia atumin jeanka, Cristo miatrusrumek umirkatararam tusan atumin kakamtikratanan wakerajrume. Tura asan nekas an atumin jiiastian wakerajrume. ¹²Tura atumsha Cristo nekasampita tinu asakrumin, wisha nunisnak Cristo nekasampita tinu asan, atumjai iruntran pengker nintimtunis ar kiakanirmi tusan wakerajai.

¹³Yatsur ainautiram, nusha nekaataram tusan tajarme. Wisha chikich chikich nungkanmaya ainaun kakamtikramiaja

a 1.4 (Mat. 12.23)

nunisnak atumin kakamtikratasan wakerimiajai. Antsu atumin jistasan nukap wakerayatun, winitatkaman tujinkamiajai.^b ¹⁴Antsu aints tumashmia pujawa nunisnak, mash aints ainamunam, nuimiaru ainamunmasha, tura nuimiarchau ainamunmasha, tura papi nekau ainamunmasha, tura papi nekachu ainamunmasha Yuse chichamen etserkamnawaitjai. ¹⁵Tura asan atumna-sha Roma yaktanam pujuinautirmincha uwemratin chichaman ujaktasan nukap wakerajrume.

**Uwemratin chichame kakarmari
pachis etserkamuri**

¹⁶Mash aints ainau Yusnum uwemratin chichaman nekas kakaram aa nuna antukar, Criston nekasampita tusar uwemrarinuitai. Tura asamtai wikia nu chichaman etsertan pengké natsaamats-jai. Judío ainau nu chichaman eemkar antukaru asar uwemrarin ainawai. Tura chikich nungkanmaya ainausha nu chichaman antukar uwemrarinuitai.^c

¹⁷Yus aints ainautin nu uwemratin chichaman nekamtikramau asamtai, nekas tunaarinchau pujusminuitrume tusa, iincha nekarmaji. Cristo nekasampita tinu asakrin, Yus: Nekas ame pengkeraitme turamji. Antsu chikich uwemratin chichamka pengké atsawai. Yaanchuik Yuse chichame etserin nuna pachis tu aarmiayi: “Yusen nekasampita tinauka tuke iwiaaku pujusartin ainawai.”^d

**Mash aints ainau tunaarintin
ainawai timiauri**

¹⁸Aints ainau tunau asar, chicham nekas aa nuna antutan nakitinak, pasé aa nuna turinau asaramtai, Yus nayaimpi-

nam puja nuka nuna wainak, nu aints ainaun kajerau asa wait wajaktinnum akupawai. Yus nunasha nekamtikramji. ¹⁹Yus tu pujajai tusa, iin nekamtikramau asamtai, aints ainauti: Yus itiu pujawa tusar, paan nekaawartinuitji. ²⁰Yus nu nangkamtaik mash aa nuna najanau asamtai, iikia Yuska wainchautiatrik, ni najanamuri mash wainu asar: Nekas Yus asa, ni kakarmari tuke nangkankashtinuitai tusar paan nekaatnuitji. Tura asamtai aints kichkisha: ¿Yus pujatsush? Wikia nekatsjai, pengké tichatnuitai.^e

²¹Tura aints ainau: Yus tu pujawapi tusar nekainayat, Yus juuntapita tutsuk, nunia maaketai ticharmiayi. Antsu nangkamiar nintiminau asar, nintinchau wajasarmiayi. Tura paan nintimrartatka-mawar tujinkar teenam pujuinawa nunisarang pujuarmiayi.^f

²²Tura wikia nekawitjai tinayat nintinchau ainawai. ²³Tura Yus nekas kakaram aa nuka tuke pujau waininayat, niin umirtan inaisarmiayi. Tura aints jakatin ainayat, ni nakumkamurin najanawar: Wína Yusruitai tusar searmiayi. Tura nanamtin ainau nakumkamuncha, tura napi ainau nakumkamuncha, tura pachim nakumkamuncha najanawar: Wína yusruitai tusar searmiayi.^g

²⁴Tura ni wakeramurin nintimtinak tuke tunau wajasar, jimiar tsaningkiar natsanpiaku aa nuna turinau asaramtai, Yus nu aints ainaun ajapa ukukmiayi. ²⁵Tura Yuse chichame nekas aa nuna nekasampita tutsuk, wait chichaman nekasaintai tusar, Yus najanamia nuna ningki nakumkar: Wína Yusruitme tusar tikishmatrar searmiayi. Tura Yus nekas pengker aa nuka pujau waininayat, Yusnaka seatsuk tura umirtsuk puju

b 1.13 (Hech. 19.21) **c** 1.16 (Marc. 8.38; 1.Cor. 1.18) **d** 1.17 (Hab. 2.4)
e 1.20 (Hech. 17.24-27) **f** 1.21 (Efes. 4.17-18) **g** 1.23 (Jer. 2.11)

armiyai. Antsu Yus tuke pujau asamtai, aintstisha tuke maaketai titinuitji. Nekasaintai.

²⁶Tura aints ainu Yusen umirtan inaisaru asaramtai, ni wakeramurin natsanpiaku aa nuna najanawarti tusa, Yus ajapa ukukmiayi. Nuwa ainausha mai nuwatak pasé aa nuna takau armiyai. ²⁷Aishmang ainausha nunisarang chikich aintsjai mai aishmangtak natsanpiaku aa nuna turunawartas wakeruninawai. Tura nu tunauka timiá pasé asamtai, ni namangkencha pasemamtikrar wait wajaktinnasha juwinawai.^h

²⁸Tura Yusen nintimtan nakitinau asaramtai, tunau nintimrarti tusa, tura pasé aa nuna turuwarti tusa, Yus nu aints ainaun ajapa ukukmiayi. ²⁹Tura asamtai mash tunau aa nuna waring achat mash pachitsuk turinawai. Pengker aa nuna nakitin ainawai, tura pasé nintintin ainawai, tura kichnau aa nuna wakerin ainawai, tura chikich ainauncha pasé awajrsartas wakerin ainawai, tura suwirpiaku jiiisar pujuinawai, tura mangkartin ainawai, tura kajernain ainawai, tura anangkartin ainawai, tura pasé nintintin ainawai, tura tsanukratin ainawai. ³⁰Tura aujmakratin ainawai, tura Yusen kajerin ainawai. Tura jiyaanit-nasha jiyaanin ainawai, tura chikich ainaun pachisar: Nuka mianchawaitai, tura: Wikia miajuitjai, tinu ainawai, tura tunau turin ainawai, tura aparincha, tura nukurincha umirtsuk pujuinawai. ³¹Tura nintinchau ainawai, tura wi nuna turatatjai, tinayat nunaka umichu ainawai, tura anengkratchau ainawai, tura chikich ainaun tsangkurtan nakitinak wait anentsuk puju ainawai. ³²Yus nu tunaun turinauka jakartin ainawai, tamaun nekainayat, nu tunaunaka tuke

takainawai. Antsu nunaka nintimtsuk, chikich tunau takau ainaun jiisar: Au tura auka nekas pengkeraitai tinawai.

Tunau turamunka Yuska mash nekawai

2 ¹Atumsha nintimrataram. Atumka chikich ainu pachisrum: Nuka timiá tunaawaitai tayatrumek, atumsha nunisrumek tunau turau asaram, nuka tichamnawaitrume. Antsu chikich aints timiá tunaawaitai tayatrumek, atumsha nu tunau turau asaram: Wisha tunaawaitjai timinuitrume.ⁱ ²Tura asakrumin Yus nekas chichaman tuke umiku asa, tunaun takau ainaun wait wajaktiniun susatnuitai tusar iisha nekaji. ³¿Atumsha itiuir nintimrume? Tunau turin ainu pachisrum: Nuka tunaawaitai tayatrumek, atumsha nunisrumek nu tunau turau asaram ¿wikia wait wajakchatatjai tu nintimsarmek pujaram? Atsa, tuuka pengké nintimrashtinuitrume. ⁴Atumka tunau arumning, Yus atumin pengker awajtamsamiarume. Tura wait wajaktinnasha suramsachmiarume. Tura Yus atumin pengker awajtamsau wainiatrumek nuka nintimtsuk pujarme. Yus wait wajaktiniun suramtsuk: Nintimaorum yapajiarum, tunaarum inaisaram wina umirtuktaram tusa, iin wait anentramak nakarmak pujawai. Atumka nuka nintimtsuk pujarme. ⁵Tura atumi nintimaui yapaijtsuk, tura atumi tunaarisha inaitsuk nintimchou asaram nukap wait wajaktinuitrume. Tunau ainu wait wajakartin kinta jeamtai, Yus nekas tunaarinchau aa nuka tunaarintin ainu wait wajakartintrin susatas wantinkatnuitai. ⁶Tura kichik kichik aintsun ni turamurijai metek tunau takau ainaun wait wajakartiniun susartinuitai. Antsu pengker aa nuna takau ainaunka pengker awajrsartinuitai.^j ⁷Aints Yusjai tuke

h 1.27 (Lev. 20.13) i 2.1 (Mat. 7.1; Luc. 6.37) j 2.6 (Sal. 62.11-12; Eze. 33.20; Mat. 16.27)

nayaimpinam pujusartas wakerinaunka, tura Yusen pengker awajusartas pengker aa nuna tuke turinaunka Yus pujut nangkankashtinun susartinuitai. ⁸Antsu Yusen nakitin ainau tuke tunau turin asar, tura nekas chichamnaka nakitin asaramtai, Yus nu aints ainaun kajerak, wait wajaktiniun nukap susartinuitai. ⁹Tura nu kinta jeamtai, judío ainausha tura judíochou ainausha nunisarang tunau turinau asar, mash nukap wait wajakartin ainawai. ¹⁰Antsu nekas pengker aa nuna takau ainau nayaimpinam jearamtai, Yus judío ainaun eemak chicharak: Nekas pengker aa nu takau asaram, tuke wijai pujustaram tusa, angka pengker pujustinnasha susartinuitai. Tura judíochou ainauncha nunisang turatnuitai.

¹¹Yus judío ainauncha, tura judíochou ainauncha mai metek jiawai. ¹²Moisésa chichamen nekachu ainau tunau takau asar, mengkakartin ainawai. Tura Moisésa chichamen nekautisha nunisrik tunau takau asar mengkakartin ainajai. ¹³Tura asamtai chikich ainau Yus umirkatin chichaman antukariat, nuna umirtsuk pujuinaunka Yuska: Nuka pengke aintsuitai tatsui. Antsu Yus umirkatin chichaman antukar umirinaunka Yuska: Nuka pengke aintsuitai tawai. ¹⁴Judíochou ainau Yus umirkatin chichaman antutsuk pujuinayat, ningki nintimsar nu chichaman umirinamtaikia, chikich aints ainau nuna wainkar: Ju aintska pengker aa nuna takaawai tusar nekainawai. ¹⁵Tura judíochou ainau pasé aa nuna turinauka ni nintijai nintimsar: Pasé aa nuna turajai tusar napchau nintiminawai. Tura pengker aa nuna turinauka ni nintijai nintimsar: Pengker aa nuna turajai tusar pengker nintiminawai. Tura Yus umirkatin chichaman nekainachiat, ni nintin aarmawa nunisarang ainawai.

¹⁶Aintsu tunaari jiistin kinta jeamtai, Yus ni Uchirin Jesucriston chicharak: Aintsu nintimaurisha mash nekarin asam, tunau ainau wait wajakartin susarta tusa akupkatnuitai. Tura asamtai wikia Yusnum uwemratin chichaman etserjai.

Judío ainau Yus umirkatin chichaman umirkachmauri

¹⁷Yamaikia judío ainautiram: Itiur pujaji tusaram nintimrataram. Atumka: Iikia judío aintsuitji tusaram, tura Yus umirkatin chichaman iin akupturmaku asa, iinka pengker nintimturmaji, jampesrumek tatsurmeash. ¹⁸Tura Yuse wakeramurisha nekarme. Tura Yus umirkatin chicham nuimiaru asaram, nekas pengker aa nu nuwaapita tusaram nekarme. ¹⁹Tura Yuse chichame nekachu ainau wainmichua nunisarang teenam pujuinawa nuna nuininuitjai tatsurmeash. ²⁰Tura Yus ni umirkatin chichaman wina nekamtikruau asa, nekas aa nuna nintimtikruri tatsurmeash. Tura asan nekachu ainauncha tura uchia nunisarang nintiminauncha nuiniartnuitjai tatsurmeash. ²¹Tura chikich aints Yuse chichame nuiniayatrumsa ¿waruka nu chichamsa umirtsurme? Tura chikich ainau ujaakrum: Kasamkairap tayatrumsha ¿waruka kasamu wearme? ²²Tura chikich aintsu nuwaringkia takaschatnuitai tayatrumsha ¿waruka aishrinusha takarme? Tura chikich aintsu yusrin nakitayatrumsha, ¿waruka nu aintsu yusri jeeniangka warinchu kasamrume? ²³Tura Yus umirkatin chichamka pengkeraitai tayatrumek, nu chicham umirtsuk pujau asaram, Yuska pasé awajrume. ²⁴Tura asakrumin Yuse chichame tu aarmawaitai: “Yusen umirchau ainau atum tunau turamun wainkar, Yuse naarin pachisar pasé chichainawai.”^k

²⁵Atumka Moisés umirkatin chicham nekasrum umirkurmeka, atumi nuwapchiri charukrumka, nekasrum Yus pengker awajsatnuitrume. Antsu Moisésa chichame umirtsuk pujakrumka, judíochoa nunisrumek pujarme. ²⁶Antsu judíochou ainawu ni nuwapchirin charukchamu ainayat, Yus umirkatin chichaman umirkar pujuinamtaikia, Yus nu aints ainawu pachis: Juka judíochou ainayat, nekasar wina aintsur ainawu, tu nintimui. ²⁷Aints judíochou ainayat, Yus umirkatin chichaman umirinauka, ni nuwapchirin charukchamu ainayat, atumin nangkamasarang timiá pengker aints ainawu. Tura asar judío ainautirmin: Nekasrum timiá tunaawaitrume turamiartinuitai. ²⁸⁻²⁹Tura asamtai judío ainawu ii nuwapchiri charukmau ayatrik, ii ninti yapajiachu asar, Yuse chichame aarmau nekatatrik, nu umirtsuk pujakria Yuse aintsrinchuitji. Antsu chikich aints Yus Wakani ni nintimaurin yapajituamu asa, nuka Judíochoutiat nekas Yuse aintsrintai. Tura waininayat chikich aints ainawu: Nu aintska pengkeraitai tu weenatsui. Antsu Yusek nekas pengke aintsuitai titinuitai.⁴

3 ¹⁻²Tura asamtai judío ainawu ningki nintimsar: ¿Ilikia chikich ainawu nangkakawaitji. Tura ii nuwapchirisha tuke charinuitji tu nintiminatsush? Tu nintiminaunka aiktasan wakerajai. Yus nu nangkamtaik judío ainawu chikich ainawu nangkamasang ni aarmaurin akupkau asamtai, niisha chikich nungkanmaya ainawu nangkakau ainawu.^m ³Antsu aints ainawu Yuse chichamen nekasampita tutsuk, tura umirtsuk pujuinawu wainiat ¿Yus ni timiaurin umitsuk inaisatniukai? ⁴Atsa, Yuska nunaka turashtinuitai. Aints ainawu mash wait chichaman etserin ainawu,

Yuska pengké waitrichu asa, ni timiaurinka tuke umiawu. Ni chichamesha tu aarmawaitai:

“Ame tunaawaitme turutme nunaka nekasaintai tajame. Tura ame tunawu asam wait wajaktatme turutme nunasha pengkeraitai tajame.”ⁿ

⁵Tura aints nuna antuk ningki nintimias: Yusek nekas pengkeraitai, antsu aintstikia mash pasé ainawu tinu asamtai ¿Ilikia warintajik? ¿Yus tunawu ainawu wait wajaktiniun suwawu asamtai paseetai titinkai? Wikia junia aints ainawu nangkamiar nintimina nunisnak chichajai. ⁶Atsa, Yuska nekas paseechawaitai. Yus paseetkungka, ¿aints mash nungkanam pujuinawu tunaarinchajai: Atumka tunaawaitrume titinkai?

⁷Tura chikich aints ningki nintimias: Wikia wait chichaman etsermataikia, chikich aints ainawu wina wait chichaamurun antukar, Yus pengkeraitai tinamtaikia, ¿warukang winasha tunaawaitai turutiarting? ⁸Tuuka nintimrachmin ainayat: “Pengker aa nuna wainkartas wakerinakka ¿waruka tunawu turutskesha?” nangkamiar anangkinak tinawu. Aints ainawu wina pachitsar tsanurinak: “Tunawu aa nu turakrumka pengker aa nu wainkatatrume,” tu nuikiartawu, atumin anangraminak tinawu. Tu tinu asar, nekasar wiasmamkartin ainawu.

Aints ainautikia mash tunaawaitji

⁹Tura asamtai ¿warintajik? ¿Judío ainawu chikich ainawu nangkamasarik pengker ajik? Atsa, wi aarmaja nuna ataksha tajarme: Judío ainawu mash tunaarintin ainawu. Tura judíochou ainawu mash iya nunisarang tunaarintin ainawu.

¹⁰Nuna pachis Yuse chichame tu aarmawaitai:

“Aints pengkeran turinka kichkisha atsawai.

¹¹ Aints Yusen nintimias pujauka kichkisha atsawai.

Tura Yusen eauka kichkisha atsawai.

¹² Aints mash mengkakatnunam weenawai, tura pasé nintimin ainawai. Tura aints nekas pengker aa nuna turinauka kichkisha atsawai.^o

¹³ Ni jangkén metchau asar, jakau iwiansamu urakmawa nunisarang paseen chichau ainawai. Ni chichamejai tuke anangkartin ainawai. Tura napi tseasria nunisarang najamniun chichau ainawai.^p ¹⁴Tuke inaitsuk chikich ainaun jiyainak pasé chicharin ainawai.^q

¹⁵ Aints ainaun maatai tusar papeen ainawai.

¹⁶ Tura tunia wekainawa nunisha aints ainaun wait wajaktiniun suwinak, tuke pasé awajin ainawai.

¹⁷ Antsu angkan pengker nintimtunisar kajernaitsuk pujutnaka nekainatsui.

¹⁸ Tura kichkisha Yusnaka shamina-tsui.” Tu aarmawaitai.^r

¹⁹Moisésa chichamen Yus mash umiktaran tusa, yaanchuik akupkau asamtai, aints mash nu chichaman umikcharu asar: Wikia tunaachawaitjai tichamnawaitai. Antsu: Wikia tunaachawaitjai tinaunka mash itatmamtkiatas nu umiktin chichaman akupkau asamtai, aints mash: Wikia tunaawaitjai tiartinuitai. Iisha nuka nekaji. ²⁰Tura asamtai Yus aints ainautin ii tunaarin nekamtikrama-

tas Moisésa chichamen akupturmaku asamtai, nu chicham umirkachu asar, mash tunaarintin ainiaji. Tura asamtai aints ningki nintimias: Wikia Moisésa chichamen miatrusrnak umirkau asan tunaachawaitjai, aints kichkisha tichamnawaitai.^s

Yusen nekasampita tinauk uwemrartinuitai

²¹Tura asamtai çitiur aints ainauti tunaarin sakarminuita? tusa, Yus yamaikia aints ainautin nekamtikramamiai. Moisésa chichame umirkakrinka, Yuska ii tunaarinka sakarchamnawaitai. Iikia Moisésa aarmauri aujsar, tura Yuse chichame etserin aararmia nusha mash aujsar paan nekaatnuitji. ²²Yus ni Uchirin Jesucriston ii tunaarin sakarat tusa, akupturmaku asamtai, aints ainautikia mash Jesucristo nekasampita takurningkia, Yus yamaikia ii tunaarin sakturmaru asa: Nekasrum tunaachawa nunisrumek pujarme turamji.^t

²³Aints ainautikia tuke mash tunaarintin ainiaji. Tura asar Yus pujamunmaka jeachminuitji. ²⁴Antsu Cristo Jesús iin wait anentramak pengker awajtamsatas ii tunaarin akiimiatramkatas jarutramkau asa: Yamaikia tunaachawa nunisrumek ainiarne turamji. Tura asamtai ii tunaarisha iikia akiimiatsuk pujayatrik, tunaachawa nunisrik pujaji. ²⁵⁻²⁶Yaanchuikia Jesucristo taatsaing, Yus wári kajecheu asa, aintsti tunaarintin arin wainiat, ii tunaarinka pachischamiayi. Tura ii tunaarin sakturmartas ni Uchirin maawarat tusa akupturmaku asa, numi winanganmanum ajinram numparmiayi. Tura asamtai Jesucristo nekasampita tinautinka ii tunaarin sakturmarmiai. Tura asamtai aints ainautikia nu mash nekainau asar: Yuska

nekas pengkeraitai, titinuitji. Yus nekas pengker asa, ni Uchiri Jesúsán ii tunaarin sakarat tusa akupturmaku asamtai, Jesús nekasampita tusar niinu asar, yamaikia tunaachawa nunisrik pujustinuitji. Tura asamtai Yus nekas pengker asa, aints ainautin nunasha nekamtikramatas ni Uchirinka akupturmakmiaji.

²⁷⁻²⁸Tura asamtai nu nekau asar, Yus iin pachitmas: Pengkeraitme turamji taji. Antsu pengker aa nu takau akurningkia, nunaka turamtsuji. Antsu iikia Jesús nekasampita tinu asakrin, Jesús ii tunaarin sakturmaru asamtai: Ameka tunaachawa nunisketme turamji. Tura asamtai iik nintintumasar: Wikia pengker aa nuna takau asamtai, Yus wínaka tunaachawaitme turutui ticham-nawaitji. Iikia pengker aa nu takaakrishá, ii tunaaringkia sakarcham-nawaitji. Antsu Jesús ii tunaarin sakturmaru asamtai, iikia Jesús nekasampita tinu asakrin, Yuska iin pachitmas: Nuka tunaachawa nunisketai turamji.

²⁹Anturtuktaram. ¿Yuska judío ainautinak: Wína aintsur ataram tusa, uwemtikramratasang wakera? ¿Judíochu ainaunka uwemtiktanka nakitawak? Atsa, judíochu ainaunka uwemtikratas wakerawai. ³⁰Yuska nekas kichkitai. Tura asa aints ainautinka mash metek uwemtikramratnuitji. Judío ainauti Jesús nekasampita takurningkia, ii tunaarin sakturmartatji. Judíochu ainautirmincha Jesús nekasampita tusaram pujakrumningkia, atumi tunaarincha nunisang sakturmartatrome. ³¹Tura Jesús nekasampita takurkia, ¿Yus umirkatin chicham ajapatnukitaij? Atsa, ajapashtinuitai. Antsu Yus umirkatin chicham nekas pengkeraitai taji.

Abrahaman pachis nuikiartamu

4 ¹Yamaikia ii yaanchuik juuntri Abraham nintimrarmi. ¿Yus Abrahaman pachis waruka nuka pengkeraitai timiayi? ²⁻³Yuse chichame Abrahaman pachis tu aarmawaitai: “Abraham Yusen nekasampita timiayi. Tura asamtai Yus Abrahaman pachis: Wína nekasampita turutui asamtai, ni tunaarin sakturan tunaachawa nunisang pujaun jiijai,” timiayi. Tu aarmau asamtai, Abraham pengker aa nuna takau ayat, tuuka uwemrachmin ayayi. Antsu tu uwemramin akungka, Abraham Yusen: Pengke aintsuitjai timinuyayi. Antsu aints kichkisha Yusen: Wikia pengke aintsuitjai tichamnawaitai.”

⁴Junia aints ainu takaamuri nintimrarmi. Aints kuikian achiktas takakmasamtaikia, inau ni takakmamunam akiktinuitai. Tura takatan inau ni takakmamunam akiu asa: Ju kuikianka nangkamin suajme tichatnuitai. ⁵Antsu chikichan takakmatsuk pujaun wainak kuikian suak: Ju kuikianka nangkamniak suajme titinuitai. Yus pachisar nunisrik nintimratnuitji. Aints pengker aa nuna takaachiat: Yus wína tunaarun sakturati, tu nintimias pujamtaikia, Yus nu aintsu tunaarin mash sakturu asa, tunaachawa nunisang pujaun jiiawai. ⁶⁻⁷Tura asamtai aints: Wikia pengker aa nuna takaachiatun, Yus wína tunaarun sakturau asa: Ameka tunaachawaitme turutin asamtai, nekasan waraajai titinuitai. Tura asamtai apu Davidcha nunisang nuna pachis tu aarmiayi:

“Yus aintsu tunaarin mash sakar tsangkuramu asa, nu aintska waraawai.

⁸ Tura nu aintsu tunaarin mash sakturu asa, Yuska ni tunaarinka

nintimtatsui. Tura asamtai nu aintska nekas waraawai.” David tu aarmiayi.ʷ

⁹¿Judfo ainauti iikik warastinui? Atsa. ¿Tura judfochu ainausha nunisar warasartinkai? Ja ai. Yus Abrahaman pachis: Wina nekasampita turutu asamtai, tunaachawa nunisang pujaun jiiajai timiayi. ¹⁰Tura Yus Abrahaman pachis: Ni tunaarin sakaru asan, tunaarinchawa nunisang pujaun jiiajai, tímia nunaka ¿warutik tímia? ¿Ni nuwapchirin charukmau asamtaik nunaka tímia? Atsa, antsu ni nuwapchirin charukchamu wainiat nunaka timiayi. ¹¹Tura ni nuwapchirin charutsuk pujau wainiat, Yus taa nuka nekasaintai timiau asa, Yus Abrahaman pachis: Tunaachawa nunismek pujamin jiiajme, timiayi. Tura: Nuka wína aintsruitai tusan, aints ainau nuna mash nekaawarti tusa Yus Abrahaman: Nuwapchiram charukta timiayi. Tura asamtai chikich aints ainau ni nuwapchirin charukchariat, Yusen nekasampita tinauka Abrahama wearia nunisarang ainawai. Tura asamtai Abrahama nunisarang Yusen nekasampita tinauka tunaachawa nunisarang pujuinaun jiiajai, Yuska tawai. ¹²Abraham nekas ni nuwapchiri charutkamu ainau aparintai. Tura Abraham ni nuwapchirin charutsuk, Yusen nekasampita tinu asamtai, chikich aints ainau Abrahama nunisarang Yusen nekasampita tinauka Abraham yajutmar-mawa nunisarang ainawai.ʷ

Yus Abrahaman: Pengker awajsatatjame timiauri

¹³Yus Abrahaman yaanchuik chicharak: Amincha nukap yujratatjame. Tura ami wearmincha nukap yujranka, mash

nungkanam wína umirtin ainau ami uchirmea nunisarang artinuitai timiayi. Antsu Moisésan Yus chichaman akuptuk-mia nuna umirkaru ainaunka nunaka tichamiayi. Antsu wína nekasampita turutinaunka: Wína aintsur asaram, tunaachawa nunisrumek pujarmin jiiajrume tusa, Yus Abrahaman tura ni wearincha nunaka timiayi.ˣ

¹⁴⁻¹⁵Aints Yusen nekasampita tutsuk, Moisésa chichamen umirinaunka Yuska: Abrahama weariya nunisrumka wína aintsur atatrume tichamiayi. Nuna tichau waininayat, aints ainau nangkamiar chichainak: Judfochu ainau Moisésa chichamen nekainachu asar, Yusen nekasampita tichartinuitai. Tura asar Abrahama weariya nunisarka achartinuitai, nangkamiar tinawai. Antsu Yus chichaak: Wi taja nunaka nekasampita tinauka mash Abrahama weari artinuitai, timiayi. Yus ni chichamen tuke umiktin asa, nunaka nangkamikia tichamiayi. Antsu aints ainau Moisésa chichamen mash umirkartatkamawar yumatinawai. Antsu Moisésa chichame atsamtaikia, ¿ii tunaaringkia itiur nekaatjik? Tura Yus ni umirkatin chichaman aints ainautin akupturmaku asamtai, nu chichaman umirtsuk pujuinauka wait wajakartin ainawai.ʸ

¹⁶Antsu Yus nekasampita tinu asakrin, ni tímia nunisang Yus iin wait anentra-mak pengker awajtsamatas wakerawai. Yus Abrahama weari ainaun mash pengker awajtsatas wakerau asa, Moisésa chichame nekau ainautinka, Yus nekasampita tinu asakrin, pengker awajtsamatas wakerawai. Tura Moisésa chichamen nekachu ainauncha nunisang Yusen nekasampita tinu asaramtai, Yus pengker awajtsatas wakerawai. Tura

asamtai Abrahamka Yus nekasampita tinu ainauti aparintai.^z ¹⁷Tura asamtai Yuse chichame Abrahaman pachis tu aarmawaitai. Yus Abrahaman chicharak: “Ameke unturi nungkanmaya ainau apariya nunismek atinuitme,” timiayi. Tu timiau asa, Abraham Yus nekasampi jakau ainauncha inankitnuita, turasha najanachmau ainauncha nekasampi najanatnuita, timiayi.^a

¹⁸Yus Abrahaman: “Ami wearam unturi nungkanam pujusartinuitai,” tinu asamtai, Abraham juuntach ayat, tura uchin yajutmarchamin ayat: Yuska nekas tujinchau asa, ni tímia nunaka nekasampi umiktatua tusan, wikia unturi nungkanmaya ainau apariya nunisnak atinuitjai, timiayi.^b ¹⁹Abraham nekas juuntach cien (100) musach jeatak pujus, uchin yajutmarchamin ayat, tura ni nuwari Sarasha nunisang juuntach asa, uchin jurerchamin juuntach pujau wainiat, Abraham: Yus turutmia nunaka mash umiktatuapi timiayi.^c ²⁰Tura Yus nekasash taj tichamiayi. Antsu niin kakamtikramu asa, tuke inaitsuk: Yuska nekas tujinchawapita, timiayi. ²¹Tura asa ni tímia nunaka nekasampi umiktatua, tu nintimramiayi. ²²Tura asamtai Abrahaman: Nekas tunaachawa nunismek pujamin jiiajme, Yus timiayi.

²³⁻²⁴Tura Abrahaman pachis aarmauka iincha pachitmas aarmawaitai. Ii Apuri Jesús jakau wainiat, Yus jakamunmaya inankimiayi. Tura asamtai iisha nunisrik: Jesús nekasampita takurningkia, Yus iincha pachitmas: Ni tunaarin sakaru asan, nekas tunaachawa nunisang pujaun jiiajai turamji. ²⁵Yuska ii tunaarin sakturmarts, wína Uchirun maawarti tusa tsangkatramkamiaji. Tura iincha nekas tunaachawa nunisrik pujarin jiirmastas wakerau asa, jakamunmaya Jesúsán inankimiayi.

Jesús ii tunaarin sakturmaru asamtai angkantaitji

5 ¹Ii Apuri Jesucristo ii tunaarin sakturmaru asamtai, ni nekasampita tinu asar, Yuska iinka wait wajaktinnaka suramsashtatji tusar, shamtsuk angka pengker nintimsar pujaji. ²Tura Cristo ii tunaarin sakturmaru asamtai, ni nekasampita tinu asar, tura Yus iin pengker awajtamsatnusha nekau asar, Yuska miatrusrik umirkatnuitji. Tura Yuse pujutirin jearkia, nijai tuke pengker pujustinuapitji tusar waraaji. ³Tura Cristonu asakrin, ii wait wajakrincha jaimiasar pujustinun Yus iin nuitamji. Nu nekau asar, wait wajayatrik iisha waraaji. ⁴Tura Yus iin tu nuitamrau asamtai, miatrusrik umirkurningkia, Yus iin pengker nintimturamji. Tura asamtai pengker nintimsar Yusnum pujustatjiapi tu nintimji. ⁵Antsu tu pujau asar natsaarchatnuitji. Antsu Yus ni Wakanin ii nintin engketramau asamtai, ni anengkratairin suramsamiaji. Tura asamtai Yus pujamunam pujustatjiapi tusar waraaji.

⁶Tura iikikia pengké uwemrachmin asakrin, ni kintari jeamta, Cristo tunaarintin ainautin uwemtikramratas jarutramkamiaji. ⁷Junia aints ainautikia chikich aints uwemtikratasar jataka nakitaji. ¿Tura aints kichkisha chikich aints wait anengkratnun uwemtikratas jatan wakerawak? ⁸Atsa, antsu iikia tunau arining, Cristo iin uwemtikramratas jarutramkamiaji. Tura jarutramkau asamtai, Yus iincha timiá anemaji tusar nekaji. ⁹Cristo waitnas jarutramak, ninu ainautinka angka awajtamsau asamtai, Yus tunau ainaun wait wajaktinasha susatas ni Uchirin akupamtaikia, Cristonu ainautinka wait wajaktinnaka suramsuk uwemtikramratnuitji. ¹⁰Iikia Yuse nemase

arining, ni Uchirin ii tunaarin sakturmar-tas akupturmaku asamtai: Yusjai amikmataram, tusa jarutramkamiyai. Tura jaka nantaki, yamaisha tuke iwiaaku pujau asa, iincha nekas tuke uwemtikramratnuitji. ¹¹Tura ii Apuri Jesucristo iin uwemtikramrau asa iinka: Yusjai amikmataram turamin asamtai, yamaikia Yuse aintsri asar nukap waraaji.

Adánkan pachis nuikiartamu

¹²Yamaikia Adán nintimrarmi.

Adán nuwá eemak tunau wajasu asa jatan jurumakmiyai. Tura kichik aints tunau wajasu asamtai, mash nungkan-maya ainau tunau wajasarmiayi. Tura tunau wajasaru asar, mash jatan juruma-karmiayi.^d

¹³Yus Moisésan chichaman akupta-tsaing, aints ainau yaanchuik tunau turuwarmiayi. Antsu Moisésan chichaman akuptachmataikia, tunausha nekaachmin ayayi.

¹⁴⁻¹⁵Tura wainiat Adánkan Yus chichaman akatramaitiat, umikchau asa tunau wajasmiayi. Tura tunau wajasu asamtai, Yus Moisésan chichaman akuptatsaing, aints ainau tuke mash jakarmiayi. Aints ainau Adánjai metek tunaanaka turuwarchayat, mash tunau asar tura jata nepetkamu asar, Adán jakamia nunisarang jakarmiayi.

Antsu Jesucristo aints wajas, tunau ainaun untsurin uwemtikratas jakau asa, aints ainautin pujut nangkankashtinun sukartin ayayi. Yus ni Uchirin kichik akupturmaku asamtai, aints ainautin untsurin pengker awajtamsatas ni wait anengkratairin nekamtikramamiayi. Adánka turamuri Cristo turamurijaingkia nekas metekchawaitai.^e ¹⁶⁻¹⁷Kichik aints tunau wajasu asamtai, aints ainauti mash tunau asar, wait wajakthin jurumakir

jakartin ainiyai. Tura nu nangkamtaik kichik aints chichaman Yus akupkamia nuna umikchamiayi. Tura asamtai aints ainautin mash jata nepetamkau asamtai jakartin ainiyai. Tura wainiat Jesucristo ni aintsri ainautin wait anentramak ii tunaarin sakturmaru asa, yamaikia tunaachawa nunisrik pujarin jiiirmaji. Tura iin pengker awajtamsatas pujut nangkankashtinun suramak: Wijai tuke pujustinuitrume turamji.

¹⁸Tura asamtai Adán tunau turamujai aints mash tunau wajasar wait wajakar-miayi. Antsu Cristo pengker turamujai aints ainauti ni nekasampita tinu asakrin: Mash tunaachawa nunisrumek pujarmin jiiajrume tusa, pujut nangkankashtinun suramsamiyai. ¹⁹Tura kichik aints Adán naartin Yusen umirkachu asamtai, aints untsuri tunau wajasarmiayi. Antsu Cristo aints wajas, Yusen miatrus umirkau asa, aints untsuri ni nekasampita tinu ainaunka tunaachawa nunisrumek pujarmin jiiajrume titinuitai.^f

²⁰Aints ainau tuke tunau turin asar, ni tunaarin nekaawarat tusa, Yus Moisésan umirkatin chichaman aamtikramiayi. Antsu tunau timiá yujaru asamtai, Yus aints ainautin pengker awajtamsatas ni Uchirin akupturmaku asamtai, Yuska iincha timiá anenmaji tusar nekaatnuitji. ²¹Tura asamtai aints mash tunaarintin asar tuke mash jakarmiayi. Tura wainiat ii Apuri Jesucristo wait anentramak ii tunaarin sakturmaru asa: Yamaikia tunaachawa nunisrumek pujarmin jiiajrume tusa, Cristonu ainautinka pengker awajtamsatas pujut nangkankashtinun suramji.

Cristo kakarmarijai tunau nepetkatnuitji

6 ¹Tura asamtai ¿tunau pachisar iikia warintajik? Yus winasha pengker

awajtusat tusarkia, ¿tuke tunau turatnukai? ²Atsa, iikia Cristonu asar, nijai tsaniasar jakawa nunisrikitji. ¿Antsu aints jakauka ataksha tunau turatnukai? Atsa. Iikia tunau aa nuka mash inaisaru asar ¿itiur tuke tunau aa nusha nintimsarsha pujustajik? ³Cristo iin jarutramkau asamtai, Cristo Jesús nemarkatasar entsanam maain asar, nijai tsaniasar jakawa nunisrikitji. ¿Atumka nuka nekatsrumek? ⁴Tura Cristo iin uwemtikramratas jakamtai iwiarsamu wainiat, ni Apaachiri ni kakarmarijai jakamunmaya inankimu asa, tuke iwiaaku pujawai. Tura asamtai Cristonu ainautikia entsanam maakrikia, Cristo jakamuri nintimsar, jakau iwiarsamua nunisrik entsanam mengkaaji, tura yamarma nunisrik: Tuke Cristo nintimsar pujusmi tusar entsanmaya tsapujai. ⁵Cristo jarutramak jakamunmaya nantakin asamtai, iisha Cristonu asar, Cristojai iwiarsamua nunisrik tura jakamunmaya nantaknua nunisrik tunauka nintimtsuk pujustinuitji.⁸

⁶⁻⁷Aints jakauka tunaunaka nintimtsui. Tura ni wakeramurinha najantsui. Iisha nusha nekaji. Tura Criston numi winangmanum maawarmau asa, Cristonu ainautikia yaanchuik pasé nintimtainka mengkatramkamiaji. Tura Cristo jarutramak, ii tunaaurin japrutmau asamtai ¿itiur tunau inatiria nunisriksha pujustajik?^h ⁸Yamaikia Cristo jaka nantaknua nunisrik nintimu asar, nijai metek tuke pujustinuapitji, tu nintimji. ⁹Cristo jakamunmaya nantakin asa, ataksha pengké jakashtinuitai tusar nekaji. ¹⁰Tura asa kichik kinta jarutramak, aints ainauti tunaarin mash sakturmaru asa, ataksha pengké jakashtinuitai. Antsu yamaikia tuke iwiaaku

pujau asa, Yusjai tsanias pujawai. ¹¹Tura asamtai atumsha Cristo Jesúsnau asaram: Cristo wína tunaarun sakturatas jarutruku asamtai, wikia nijai tsaniasan jakamiajai, tu nintimsaram pujustaram. Tura asaram yamaikia tunauka nintimtsuk antsu Yusen nintimsan ni wakeramurin najanatjai, tu nintimsaram pujustaram.ⁱ

¹²Tura asaram tunau nepetukai tusaram tsangkamamkairap. Turaram wína wakeramurin najanatjai tu nintimkurmin, tunau atumin nepetamkatas wakeramtaisha, tunau wína nepetukai tusaram kakartaram. ¹³Atumka Yusnau asaram, tunau wajasai tusaram, wína wakeramurin turatjai, tuuka yamaikia nintimsairap. Antsu jaka nantaknua nunisrumek Yusek nintimsaram: Wikia Yusnau asan, ni wakeramurinak turatasan wakerajai, tu nintimsaram pujustaram.^j ¹⁴Tura asaram nangkamrum nintimsaram: Moisésa chichamen umirkau asan, tunau nepetkawaitjai tichamnawaitrume. Antsu Yus atumin wait anentramrau asamtai, yamaikia atumka tunauka nepetkatnuitrume.

Tunauka aintsti apuria nunisketai

¹⁵¿Atumsha itiuur nintimrume? Yamaikia Moisésa chichame umikchamin ayatrik, Yus iin wait anentramrau asamtai ¿pachitsuk tunau turamnaukitai? Atsa. Nuka pengké turachminuitai. ¹⁶Antsu aintsu inatiri akurmeka, atumin inatmin nakitsuk umirkatnuitrume. Atumka nusha nekarme. Tura aints tunau tuke takau asamtai, tunauka ni apuria nunisketai. Tura asamtai aints tunau tuke turin asa, tunau inatirintai. Tura aints tunau wajasu asa jakatnuitai. Antsu

atumka Yus umirkuram pujakrumka, Yuse inatiri ainiarme.^k ¹⁷Atumka yaanchuikia tunau inatiri ayarme. Antsu Yus atumin yainmaku asamtai, yamaikia tunau inaisaram, nekas pengke chicham nuimiaru asaram, atumi nintijai miatrusrumek umirkamiarume. ¹⁸Tura yamaikia tunaanumiangka uwemrau asaram, angka pujusrum Yus wakera nuke umirkuram pujarme. ¹⁹Atumka junia aints ainau nintimina nunisrumek tuke nintimu asakrumin, junia aints nintimina nunisnak atumin aatjarome. Yaanchuik atumi wakeramuri najanatasrum tuke inaitsuk tunau turin asaram tunau inatiri ayarme. Antsu yamaikia atumi tunaari mash inaisaram, Yus wakera nuke turatasrum Yuse inatiri ataram.

²⁰Yaanchuik tunau inatiri asaram, tunau umirkuram Yuse wakeramuringkia pachischamiarume. ²¹Tura yaanchuik tunau turuti nintimrarmeka yamaikia natsaarmame. Aints ainau tuke tunau nintimsar pujuinauka jakaar tuke mengkaakartin ainawai. ¿Nuka pengkerkai? ²²Antsu yamaikia tunaanumiangka uwemrau asaram, tunau inatiringkia atsurme. Antsu Yuse inatiri asaram, ni wakeramuri miatrusrumek umirkatnuitrume. Tura Yusnum tuke iwiaaku pujustinuitrume. Nuka nekas pengkerkai. ²³Tura asamtai nunasha tajarme: Tunau akikringkia jataintai. Antsu ii Apuri Cristo Jesús ni aintsri ainauti tunaarin sakturmaru asamtai, Yus iin wait anentramak pujut nangkankashtinun akikchaujaj suramsatnuitji.

Nuwatnaikiatnun pachis nuikiartamu

7 ¹Yatsur ainautiram umaarutirmesha, Yus ni aintsri ainautin umiktin chichaman akupturmaku asamtai, aints iwiaaku pujakka tuke nu chichamnaka

umirkatnuitai. Atumka Yus umirkatin chicham nekau asaram nusha nekarme. ²Nintimrataram. Yus umirkatin chichamka aishrintin ainaun pachis tu aarmawaitai: “Aishri iwiaaku pujamtaikia, nuwa aishrin ukukchatnuitai. Antsu aishri jakamtai nuniangka angka atinuitai.” ³Tura aishri iwiaaku pujau wainiat, nuwari chikichjai tsanirmamtaikia, nu nuwan pachisar: Nuka Yus umirkatin chichamnaka umirtsui tiartnuitai. Antsu aishri jakamtai, nu nuwaka angka asa, chikich aintsun ninumkamtaisha, nu nuwan pachisar: Nuka Yus umirkatin chichaman umirtsui tiarchatnuitai.

⁴Yatsur ainautiram umaarutirmesha, atumka Cristonu asaram: Nuwa aishri jakamtai pachisatnuitrume. Cristo jaka nunia jakamunmaya nantakin asamtai, iikia Cristojai tsaningkiar Yus wakera nunisrik angka Ni umirkatnuitji. ⁵Yaanchuikia Moisésa chichamengka nekayatrik, nu chichamka umirtsuk tuke ii wakeramuri najanatar wakerin asakrin, Yus: Atumka jakarmesha wijaiangka pujuschatnuitrume turammiaji. ⁶Yaanchuik Moisésa chichamengka umirkachu asar shamakur: Tuke wait wajaktinuapitji tu nintimnu-yaji. Antsu Cristo jarutramkau asamtai, yamaikia Cristojai jakar nantaknua nunisrikitji. Tura asar yamaikia arut chicham yaanchuik aarmawa nuka nintimtsuji. Antsu Yus ni Wakanin ii nintin engketramau asamtai, yamarma nunisrik Yuse wakeramuri umirkatar angka pujaji.

Tunau iin pujurtamji tusar etserkamu

⁷¿Tura Moisésa chichamesha pachisar warintajik? ¿Nuka paseekai? Atsa, nuka

paseechawaitai. Moisésa aarmauri
atsamtaikia, nuwaapita tunauka tusarkia
nekaachminuyaji. Tura Moisésa aarmau-
rin nekachkurkia: “Chikichnau aa nu
wakerukairap,” ta nuka nekaachminuyaji.
⁸Tura tunaarintin asan, Yus umirkatin
chichaman nekayatnak, mash aa nuna
pachitsuk wakerinuyajai. Antsu Moisésa
aarmauri atsamtaikia, wikia tunaawapitja
tusanka nekachuyajai. ⁹Yaanchuik
Moisésa aarmauri nintimtsuk pujau asan:
Pengkeraitjai tu nintimtumasan
pujuyajai. Antsu nukap arusan, Moisésa
aarmaurin tenap nintimran: Wikia timiá
tunaawapitja tusan, ¹⁰jakamin nekapnu-
yajai. Tura nuna nekau asan, Yus
Moisésan umirkatin chichaman aints
ainau pengker pujusarti tusa akupkau
wainiatnak, nu chichamnaka umikchau
asan: Wi jakamtaikia Yus wait wajakti-
niun surustinuapita, tu nintimsan
pujuyajai. ¹¹Wikia tunaarintin asan, Yus
umirkatin chichaman nekayatnak, wi
wakerakun tunau turinuyajai. Tura tunau
wína anangkruau asamtai, wikia
nekasnapi jakatniunam weaja, tu
nintimsan pujuyajai.^l

¹²Tura asamtai ¿Moisésa chichamengka
paseekai? Atsa, Yuska: Aints ainau
pengker pujusarti tusa, umirkatin
chichaman akupkau asamtai, nu
chichamka nekas pengkeraitai. Tura Yus
ni wakeramurin iin nekamtikramatas
umirkatin chichaman akupturmaku
asamtai, nu chichamka nekas pengkerai-
tai. ¹³Tura asamtai ¿Yus ni umirkatin
chichaman wína jatan surustasang
akupkurtukamia? Atsa, winia jatan
surustinka tunauketai. Yus: Tunau
warukuita tusa, wína nekamtikruatas:
Wína umirtuktin chicham umirtukchau
asam tunaawaitme tusa nu chichaman
akupkurtukamiayi.

¹⁴Yus umirkatin chichamka aya Yuse
Wakani kakarmarjiai umikminuitji tusar
nekaji. Tura wainiatun wina wakeramu-
run tuke najanin asan, tunaanum
surukmawa nunisnak wikia pujajai.
¹⁵Tura asan pengker aa nunaka turatasan
wakerayatnak, nuna turatatkaman
tujinuyajai. Antsu pasé aa nuna
turutnaka nakitayatnak, nunaka tuke
turinuyajai. Nuna turau asan ¿warukanak
ainaj? tinuyajai.^m ¹⁶Tura wi tunau
turamurnaka nakitayatun nuna turau
asan, wikia Yus umirkatin chichaman
pachisan pengkeraitai tajai. ¹⁷Tura
asamtai yamaikia wi wakeraknaka
tunaunaka turatsjai. Antsu tunau
turutnaka nakitayatun, tunau wína
nepetuku asamtai nu tunaunaka turajai.
¹⁸Tura asamtai wikia pengker aa nuna
turatasan wakerayatun, nunaka
turatatkaman pengké tujintajai. Tura
pengké tujinkau asan, wina namangkruka
pengker aa nuna turatatkama pengké
tujintawai tusan nekaji. ¹⁹Tura nekasn
pengker aa nuna turatatjai tayatun,
nunaka turatsjai. Antsu tunau turashtatjai
tayatun tunaunaka turajai. ²⁰Tura wi
nakitayatnak tunau turaknaka, wiki
wakeraknaka tunaunaka turatsjai. Antsu
tunau wína nepetau asamtai tunaunaka
turajai.
²¹Tu pujau asan, pengker aa nunak
turatasan wakerayatun, wikia tunaawait-
jai tusan nekaji. ²²Tura nintirjai nekasn
pengker nintimran: Yus umirkatin
chichamka nekas pengkeraitai tajai.
²³Tura Yus wakeramu aa nunaka mash
umirkatatjai, tu nintimsan pujayatun,
nuna turatatkaman tujintajai. Tura wína
kakarmarjiai tunau nepetkatatkaman
tujinkan, tunau wína nepetuku asamtai,
wikia tunau achikmawaitjai tusan
nekaji.

²⁴Tura tunau nepetkatatkaman pengké tujintau asan, napchau nintimran jakamin nekapeakun: Maj, juun tunaawaitjai. ¿Yáki wína namangkur wakera nuna nepetukat? tajai. ²⁵Li Apuri Jesucristo wína namangkur wakeramun nepetukatin asantai, Yusnak maaketaj tajai. Tura asan nunasha nekajai: Wiki nintimsanak wína namangkur wakera nuna umirkun, tuke tunau inatiria nunisnak ajai. Antsu paan nintimran Yuse wakeramurin umirkatasan wakerin ajai.

**Yuse Wakanijai Yuse
wakeramuri najanatnuitji**

8 ¹Tura asantai nunasha tajarme. Iikia Cristo Jesúsnaú asakrin, Yus yamaikia iinka pengké mengkaatmakchatnuitji. ²Cristo Jesúsnaú asakrin, Yuse Wakani pujutan sukartin aa nuka iin angka awajtamsamiaji. Tura asa yamaikia ni kakarmarijai ii tunau wakerutinka nepeturmakmiaji. Tura asantai Yus iinka: Tunau turau asaram, tuke jakatniunam wetaram turamtsuji.

³Aints ainau mash tunaarintin asar, Yus umirkatin chichaman kichkisha umirkacharmiyai. Tura asantai Yus ni Uchiri iiya nunisang aints wajasti tusa, tura aints ainauti tunaarin mash sakturtas jakati tusa akupturmakmiaji. Tura asantai Cristo jarutramak ii namangke tunau wakerutin nepeturmakmiaji. ⁴Tura asantai yamaikia ii namangke wakera nuka wakerutsuk, antsu Yuse Wakani wakera nuke wakerau asar, yamaikia Yus umirkatin chicham miatrusrik umirnitji.

⁵Aints ni namangke wakeramurinak umiruka tuke ni namangkenak nintimias pujawai. Antsu Yuse wakeramurinak nintimias pujakka tuke Yusen nintimui. ⁶Ni namangkenak nintimina nuka tuke jakatniunam weenawai. Antsu Yusen

nintimina nuka Yusjai tuke angka pengker pujusartin ainawai. ⁷Aints ainau ni namangke wakeramurinak nintimina nuka Yuse chichamen umitan nakitinau asar, Yuse nemase ainawai. Tu nintimsar pujuinauka Yusen umirkartatkamawar pengké tujintinawai. ⁸Tura asar ni namangke wakeramurinak nintimina nuka Yusen pengker awajsartatkamawar pengké tujintinawai.

⁹Antsu Yuse Wakani atumi nintin pujurtamu asantai, atumka atumi namangke wakeramuri umirtsuk pujau asaram, Yuse Wakani wakeramuri nintimtinuitrume. Antsu Yuse Wakani Cristo akupa nuka aintsu nintin pujurchamka nu aintska Cristo aintsrinchuitai.ⁿ ¹⁰Antsu Cristo atumjai pujamtaikia, atum tunaarintin asaram, waitnasrum jakarmesha, Cristo atumi tunaarin sakturmaru asantai, atumi wakaningkia tuke iwiaaku pujustinuitai. ¹¹Tura Yus Cristo Jesúsnaú jakamunmaya inankin asantai, Yuse Wakani atumi nintin pujurtamkurminkia, atumka jakarmin wainiat, Yus ni Wakanin akupturmak, atumi namangken jakamunmaya inantamkitnuitrume.^o

¹²⁻¹³Yatsur ainautiram umaarutirmesha, atumi namangke wakera nu umirkurmeke tuke jakatniunam wetinuitrume. Antsu Yuse Wakani atumin pujurtamkurmin, atumi namangke wakera nu nepetkarmeka, tuke Yusnum iwiaaku pujustinuitrume. Tura asantai iikia ii namangke wakeramuringkia yamaikia pengké umirkashtinuitji.

¹⁴Yuse Wakani umirin ainautikia mash Yuse uchiri ainiaji. ¹⁵Yaanchuikia tunau inatiria nunisrik pujuyaji. Antsu Yuse Wakani iin pujurtamu asantai, yamaikia Yuse uchiri asar, shamtsuk Yus seakrin, Yuse Wakani: “Apaachi” tumamtikramji.

¹⁶Tura Yuse Wakani ii nintin engkemtur-mau asa: Atumka Yuse uchiri ainiar-me tusa nekamtikramji. ¹⁷Tura Yuse uchiri asakrin, Yus ni uchiri ainautin suramsatas wakera nunaka mash umiktatui. Tura asamtai Cristonu aa nuka mash iinu atinuitai. Tura Cristojai tuke warastasar wakerakrikia, Cristo wait wajakmia nunisrik iisha ju nungkanmaka wait wajaktinuitji.^p

Ukunam atiniun pachis etserkamu

¹⁸Nekasar ju nungkanmasha nukap wait wajayatrik, ukunam tuke wait wajatsuk Cristo pujamunam nekasar warastinuapitji, tu nintimsar pujau asar, ii ju nungkanam wait wajaji nuka jumchikitai, tu nintimsan pujajai. ¹⁹Yus najanamu ainau waring achat mash yamaisha nukap wait wajainawai. Tura ni kintari jeamtai, Cristonu ainautikia ii Apurijai wantinkatnuitji. Tura asakrin Yus najanamu ainauka mash nu kinta jeati tusar nakainawai. ²⁰Nu nangkam-taik Yus mash pengker najanamaitiat, nuniangka mash pasemarmiayi. Nuka ni neaskeka turunachmiayi. Antsu Yus ukunam ataksha iwiarnarti tusa, aints tunau wajakmiaunum pasemarat tusa tsangkamkamiayi. Tura asamtai mash Yus najanamu ainau nungka iwiarnartin kintan nakainawai.^q ²¹Nu kintati mash Yus najanamu ainauka nungka meseamu-nam waitnasar jingkiama nunisarang pujuinau asar, Yuse uchiri ainaujai metek angkan pujusartas nakainawai. ²²Yamai-sha Yus mash najanamu ainauka nuwa jateema waitnawa nunisarang wait wajainawai. Iikia nuka nekaji. ²³Antsu chikich najanamu ainaukeka waitnina-tsu. Iisha nunisrik nukap waitnaji. Yuse Wakani iin pujurtamu wainiatrik, yamaisha wait wajayatrik, Yus ii

namangken yapajiatin kinta nakaji. Tura Yuse uchiri asar Yusnum pujustin kinta nakaji.^r ²⁴⁻²⁵Tura Yus: Wi uwemtikratat-jarme tinu asamtai, iisha uwemrawaitji. Iikia Cristojai tuke pujustin asakrin, Cristo iinu namangkenka yapajiatnuitai. Tura asamtai iinu namangke yapajiach-mau pujayatrik, Yus tímia nunaka umiktatuapi tusar nakaji. Tura Yus nuna yaanchuik umikuitmataikia iikia: Yus nunaka umiktatuapi tichamnawaitji.

²⁶Ii wait wajakrincha, Yuse Wakani iincha yainmaji. Iikia: ¿Itiur Yus seatnuitji? tusar nekachu arining, Yuse Wakani ii wait wajamurin nekau asa, iikia ¿warintua nuka? nekaatkatamar tujintarning, iin pachitmas Yusen chichartamji. ²⁷Tura Yuse Wakani Yuse aintsri ainautin pachitmas Yusen sea nunaka Yuska mash anturui, tura ii nintimauringha mash nekau asa, ni Wakani Yuse wakeramurijai metek seatramkurin mash anturui.

**Yuse kakarmarijai mash
aa nuka nepetkatnuitji**

²⁸Yus: Wína uchir asaram, wi wakera-mur najanataram tusa, iinka eatmaku asamtai, iikia Yus aneen asakrin, tuke iincha pengker awajtamji. Tura asamtai Yus wakera nuka mash pengkeraitai tusar nekaji. ²⁹Tura asamtai Yus yaanchuik ¿ya wína aintsur atataua? tusa mash nekau asa: Wína aintsur atatrume timiayi. Tura Yus ni Uchirin Apu ata tusa, nuná eemak jakamunmaya inankimiayi. Tura Cristonu ainautinka: Cristoa nunisrumek wína uchir ataram tinu asa, jakamunmaya inantamkitnuitji. ³⁰Tura Yus nu nangkamtaik: Wína uchir atinuitrume tinu asa iin eatmakmiayi. Tura nekasrum tunaarinchawa nunisrumek ataram tusa, ii tunaarinchaka sakturmarmiaji. Tura wína

uchir asaram, tuke wijai nayaimpinam pujusmintrum turammiaji.

³¹¿Tura nu nekau asar warintajik? Yus iin yainmakrinka, ¿yáki iincha nepetamkataij? ³²Yus ni Uchirin suritramtsuk iincha mash uwemtikramratas jakat tusa akupturmakmiaji. Tura asa ni Uchirijai metek pengker aa nuna mash suramsatnuitji. ³³¿Yuse aintsri ainautinka yáki tunaawaitme turamtaij? Tu tinamtaisha Yuska pachischatnuitai. Yus ii tunaarin sakturmaru asa: Atumka pengkeraitrume turamji. ³⁴Tura ¿yáki Cristonu ainautincha jinum epenati turamtinuitai? Cristo Jesús nunaka pengké turashtinuitai. Antsu Ni jarutramkau asa, nunia jakamunmaya nantaki, Yuse untsurinini pujus, iin pachitmas ni Apaachirin seatramji. ³⁵Cristo iin miatrusang anenmau asamtai ¿yáki iincha akantamkatnuitaij? Ii wait wajakrincha, tura itiurkachmin pujakrincha, Cristo iincha tuke anenmaji. Chikich ainau iin pasé awajtamsartas wakerutminakrincha, tura tsukajai wait wajakrincha, tura entsati yuumakrincha, tura shamrumtinnun pujakrincha, tura iin mantamawartas wakerutminakrincha, Cristo iinka tuke inaitamtsuk anenmaji. ³⁶Iincha mantamawartas wakerutminau asaramtai, nuna pachis Yuse chichame tu aarmawaitai:

“Yuse nemarniuri asakrin, uwijan maawartas juwinawa nunisarang kintajai metek iincha mantamawartas wakerutminaji.”^s

³⁷Tura wainiat Yus iin tuke anenmau asamtai, waring achat mash tuke nepetji. ³⁸Yus iin timiá anenmau asamtai, chikichkisha Yuse anengkratairin jurutramkishtinuitji tusan nekajai. Ii jaakrincha, tura iwiaaku pujakrincha, Yus iincha tuke inaitamtsuk anenmaji. Tura Yuse awemamuri, tura ju nungkan-

maya apu ainausha, tura nayaimpinam kakaram ainausha, yamai iruna nusha, tura ukunam atinua nusha, ³⁹tura yakí iruna nusha, tura nungkanam nitak iruna nusha, tura Yus mash najanamu iruna nusha, waring achat mash Yuse anengkratairin pengké jurutramkishtinuitji. iYus ni anengkratairin ii Apuri Cristo Jesúsá turamurijai paan inakturmasmiaji!

Yus Israel ainaun:

Wína aintsur ataram tusa eakmauri

9¹Wi yamai titatja nuka nintimrataram. Cristonu asan Yuse Wakani wana nintimtikruru asamtai, wína nintirjai nintimraja nuka nekasaintai tusan titatjarme. Tura wait chichamnaka ujaatsjarme. ²Wína wear Criston umirchau asaramtai, wi wait anentakun tuke napchau nintimsan pujajai. ³Tura asan wína wear mengkatatnunan wearai tusan, niin uwemtikrachmin ayatnak, niin uwemtikramnawaitkunka, wikia Cristonmaya kanakan ni wait wajaktintrincha juruktasan wakerin ajai. ⁴Israela wearai ainautin Yus: Wína uchir ataram tusa wakerimiayi. Tura asa Yus ni aintsri ainamunam ni paaniurijai wantintukmiayi. Tura: Wína aintsruitrume timiayi. Tura: Wína chichamur umirtuktaram tusa, Yus ni umirkatin chichaman Moisésnum akupkamiayi. Tura iruntai jeanam wijai iruntrataram timiayi. Tura ukunam atiniun pachis ii wearai ainaun chichaman akuptukmiayi. ⁵Tura ii juuntri ainamunmaya ni wearai ainaji. Tura Mesíaska Israela wearai ainamunam akiina aints wajasmiaji. Tura Mesíaska Yuse Uchiri asa, mash aa nuna apuri asamtai tuke: Ameketme Yusem titinuitji. Nuka nekasaintai.

⁶Antsu Israela wearai ainau mashkia Yuse aintsrinchu ainawai. Tura wi wear

ainau Yuse chichamen umikchau asaramtai, Yuska ukunam atiniun pachis t́mia nunaka umikchawaitai tichamnawaitai. ⁷Abrahama wearisha mashkia Yuse aintsringkia wajascharmiayi. Antsu Yus Abrahaman chicharak: “Ami uchirmi Isaaca weari ainau nekasar ẃna aintsur wajasartinuitai,” timiayi. ⁸⁻⁹Tura asamtai Isaac akiintsaing, Yus Abrahaman t́mia nuka nuwaitai: “Chikich musachti amin jiitatjame. Tura nuningkia nuwem Saraka uchin takakun wainkatatjai,” tu aarmau asamtai, nusha nekaamnawaitji. Antsu aints Abrahaman weari ayat, pachitsuk Yuse uchiri wajaschatnuitai. Antsu Yus Abrahaman t́mia nunisarang akiinauka nekasar Yuse aintsri ainawai.”^u

¹⁰Tura ii juuntri Isaac uchin yajutmak numatik jimieran yajutmarmiayi. Tura asamtai nuwari Rebeca nu juretik uchin jimieran jurermiayi. ¹¹⁻¹³Tura asamtai nu uchin jimieran jureatsaing, Yus Rebecan chicharak: “Eemkauri ni yachiin ekerin umirkatnuitai,” timiayi. Tura asamtai ukunam Yuse chichamen etserin tu armiayi. Yus chichaak: “Jacobon aneemiajai. Antsu yachiin Esaún aneemiajai,” timiayi. Tu aarmau asamtai, Rebeca uchin jureatsaing, nu uchikia pengker aa nuna turachun tura tunaunasha turachun wainiat, Yus ningki wakeruku asa, kichik uchinak pachis: Ẃna aintsur atatui tusa, aints ainaun mash nekamtikiatas wakerimiayi.”^v

¹⁴Nu chicham nintimsar pujakrishha ¿warintajik? Yus pengker nintimias pujatsui ¿tu nintimratnukai? Atsa, tuuka nintimrachminuitai. ¹⁵Yus Moisésan chicharak: “Wi Yus asan, wiki nintimsanak aintsun wait anentratasan wakeraknaka wait anentratnuitjai. Tura aintsun pengker awajsatasan wakerak-

naka turatnuitjai,” timiayi. ¹⁶Tura asamtai aints ningki nintimias: Wikia pengker aa nuna takau asamtai, Yuska nekasampi winaka wait anentrurtatua tamatika, Yuska nu aintsun wait anentatsui. Antsu Yus ningki wakerak aints ainautin wait anentramaji. ¹⁷Tura Yuse aarmauri Egipto apurin pachis tu aarmawaitai. Yus faraónkan chicharak: “Wikia Yus asan, aints ainau ẃna kakarmarnasha wainkarti tusan, tura ami turamurmin nekaawar, ẃna naarun pachitsar mash nungkanmaya ainau: Yuska juuntapita turutiarti tusan, amin apu inaikiamiajme,” timiayi.”^w ¹⁸Tura asamtai Yus ningki wakerak aintsun wait anentratnuitai. Tura kichnasha: Nuka ẃna nintimurchau asa, nuna nangkamasang nintimurchau ati tusa pachischatnuitai.

¹⁹Tura chikich aints ningki nintimias chichaak: “¿Warukakung Yus aints wait wajaktinasha sua? Tura ¿Yus aints tu pujusarti tusa wakeramtaikia ititurkatjik?” wina turutchanpiash. ²⁰¿Atumka ya aints asarmea Yuscha pajakrumsha aiktinuitrume? ¿Atumka ititur nintimrume? Nuwe pining najanam, nuwen najaniun chicharak: ¿Waruka aisha najatame timinkai? Atsa, nuka tichamnawaitai. ²¹Nuwe najanin nuwen juki ningki wakerak piningkian nekas shiirman najanatnuitai. Tura nuwe ampintraun juki tachaunasha najanatnuitai.”^x

²²⁻²³Yus tunau ainaun wait wajaktiniun susatatiat: Aints ainau ẃna kakarmarun wainkarat tusa tunau ainaun wait wajaktiniun wári sutsuk nukap arus susatnuitai. Tura asamtai Yus aints ainautin wait anentramak, iincha juramkitas: Tuke nayaimpinam wijai pujusmintrum tusa, ningki wakerau asa ni

kakarmarin inakturmasmiaji. ²⁴Yus judío ainautincha: Wína aintsur ataram tusa eatmakmiaji. Tura judíocho ainautirmincha nunisang: Wína aintsur ataram tusa eatmakmiarume. ²⁵Yuse chichame etserin Oseas naartin nuna pachis tu aarmiayi.

Yus chichaak: “Wikia Yus asan, wína aintsrucho ainaun wína aintsur arti titatjai. Tura aints wína anentsuk puju armia nunasha wína aneetir arti titatjai,” timiayi.

²⁶Tura mash nungkanmaya ainaun pachis Yus:

“Wína aintsruchuitrume, timiaja nu aints ainaun ukunam: Nekasrum Yus iwiaaku pujustinun sukartinu uchirintrume titinuitjai,” timiayi. Oseas tu aarmiayi.^γ

²⁷⁻²⁸Tura Yuse chichame etserin Isafas naartin Israel ainautin pachitmas chichaak:

“Yus tímia nunaka miatrusang wári umiktatui. Tura Israel ainau mash nungkanam pujuinaun wainiat, Yus wait wajaktiniun akuptuktinuitai. Tura asamtai Israel ainauti yaikmia timiá untsuri ayatrik jumchik uwemratnuitji,” Isaías tu aarmiayi.^z

²⁹Tura Yus Isaíasan chikich chichamna-sha yaanchuik tu aantikramiayi:

“Yus nekas kakaram aa nuka aints ainautin jumchiksha uwemtikramrachamtaikia, iikia Sodoma yaktanam tura Gomorra yaktanam pujuarmia nunisrik mengkakatnuitji,” tu aarmiayi.^a

Israel ainau Criston nekasampita tinauka uwemrartinuitai

³⁰¿Judíocho ainau pachisar warintajik? Judíocho ainau Yus pengker awajsatnun

yaanchuikia nintimchau ainayat, Criston nekasampita tinu asaramtai, Yus yamaikia tunaachawa nunisarang pujuinaun jiiawai. ³¹Antsu Israel ainau umirkatin chichaman umirkartas wakerinayat umirkatatkamawar tujinkarmiayi. Tura asaramtai Yus niin tunaachawa nunisarang pujuinaun jiiischamiayi. ³²⁻³³¿Waruka tu pujuarmia? Israel ainau Criston nekasampita tutsuk: Pengker aa nu turakrikia, iik uwemratnuitji, nangkamiar tu nintimsar pujuarmiayi. Tura asar Criston umirtan nakitrarmiayi. Tura nuna pachis tu aarmawaitai:

Yus ni Uchirin pachis chichaak:

“Wainkataram. Wikia Sión yaktanam kaya juuntan pujsatnuitjai. Wi turamtai aints ainau nu kayanka nakitrartinuitai. Tura nu kayanka tukumkar iyarartinuitai. Antsu nu kayan: Nekas pengkeraitai tinauka pengké natsaarchatnuitai,” Yus timiayi.^b

Tura Cristoka nu kaya tumau asamtai, Israel ainau Criston kakerkar: Nekasampi Yuse Uchirinta tutsuk, Moisésa chichame umirkarkia uwemratatjapi, tu nintimsar pujuarmiayi.^c

10 ¹Yatsur ainautiram umaarutirmeshasha, tuke wína nintirjai wakerakun, wína wear ainau uwemrarat tusan Yusen seatinajai. ²Tura wína wear nintimaurin nekajai. Ningki nintimsar Yusen miatrusarang umirkartas wakerinayat çitiur Yuse wakeramurin najanamnawaitji? tusarka nekainatsui. ³⁻⁵Moiséscha tu aarmiayi: “Aints Yus umirkatin chichaman umirak Yusen pengker awajsatas wakerakka, Yus tímia nunaka mash nuwatsuk miatrusang umirkatnuitai.” Tu aarmau wainiatrik, aints

y 9.26 (Os. 1.10;2.23) z 9.27 (Isa. 10.22-23) a 9.29 (Gén. 19.24-28; Isa. 1.9)

b 9.32 (Isa. 28.16) c 9.32 (1.Ped. 2.6-8; Rom. 10.11)

ainautikia kichkisha Yus umirkatin chichamka nuwatskeka umirkachmiaji. Tura wina wear ainau: ¿Yusen itiu pengker awajsatnuitja? tusar nekainachu asar, ni pengker turamurijai Yusen pengker awajstartas wakerin armaiyi. Tura wainiat Yus aintsu tunaarin tuuka sakarchamin asamtai, wi wear ainau Yusen pengkerka awajsacharmiyai. Cristo ningki Yus umirkatin chichaman miatrusang umirkau asamtai, Moisésa chichamen umirkarkia uwemratatjiapi tichamnawaitji. Antsu Cristo nekasampita takurkia, Yuska pengker awajsatnuitji.^d

⁶Tura Cristo yaanhuik iin uwemtikram-ratas tau asamtai, aints ainauti Cristo nekasampita tinu asar: ¿Yáki nayaimpin-masha waka, Cristoncha junisha itati? tuuka nintimrachminuitji. ⁷Tura Cristo yaanhuik jakamunmaya nantakin asamtai: ¿Yáki jakau ainamunam waya, Criston jakamunmaya inanki junisha itati? tuuka nintimrachminuitji. ⁸Antsu Yus pengker awajsatasar wakerakrikia, Yuse aarmaurijai metek nintimratnuitji. Cristo nekasampita titaram tusar, chicham ii etserji nuka nuwaitai: “Yuse chichame umirtaka yumtichuitai. Nintimjaisha Yus nekasampita tusam, tura jangkemjaisha Yus nekasampita tusam ujaktinuitme,” tu aarmawaitai.^e ⁹Tura asamtai Yus ni Uchirin Jesúsán jakamunmaya inankimia nu nintimtakum, tura jangkemjai: Jesús nekasampi wína apuruita takumka tunaanumiangka uwemratatme. ¹⁰Tura asamtai Jesucristo nekasampita tu nintimtakminkia, Yus aminka pengkeraitme turamatatui. Tura jangkemjai Jesucristo wína apuruita takumka uwemratatme.

¹¹Yuse chichame tu aarmawaitai: “Cristo nekasampita tu nintimtina nuka

natsaarchartinuitai.”^f ¹²Tura Cristoka judío ainau Apuri asamtai, nuniasha judíocho ainau Apuri asamtai, mash metek ii Apuri seakur: Tunaanumia uwemtikrurta takurningkia, ii Apuri aints ainautin mash metek anenmau asa mash uwemtikramratnuitji. ¹³Tura asamtai Yuse chichame tu aarmawaitai: “Aints ii Apurin seak: Uwemtikrurta tamaka uwemtikratnuitai.”^g ¹⁴¿Antsu Criston nekasampita tutsuk pujuinauka itiu nijaisha chichasarting? ¿Tura Criston pachisar chichaman antutsuk pujuinauka itiu Criston nekasampita tiarting? ¿Tura aints kichkisha Cristo chichamen etserchamtaikia itiu chikich ainausha antukarting? ¹⁵¿Tura aints akupinach-maka itiu ningki nintimsarsha Cristo chichamencha etserkarting? Tura ni chichame etserin ainaun pachis tu aarmawaitai: “Aints uwemratin chichaman etserki weenauka, pengker chichaman etserin asar nekasar pengker ainawai.”^h

¹⁶Antsu aints mashkia uwemratin chichaman Criston pachisar nekasampita ticharmiyai. Yaanhuik nuna pachis Isaías tu aarmiyai: “Apu ru zyáki ii etserkamun antukaria?”ⁱ ¹⁷Tura asamtai aints ainau Cristo chichamen antuku asar nekasampita tinawai. ¹⁸Antsu wi nintimsan tajai: ¿Wína wear ainau nekasar nu chichaman antukcharmasha? Ja ai, nekasar antukarmiyai. Yuse chichamesha tu aarmawaitai:

“Mash nungkanam Yus ni najanamuri nekamtikiamu asar, mash nungkanmaya ainausha antukar-minuitai.”^j

¹⁹Tura: ¿Wína wear ainau nu uwemratin chichaman antukariat, paan nekaawarmakia? Tu inintrusminuitai. Tu

inintrinak pujuinaunka wikia tajai: Wína wear ainauka nu chichamnaka antukariat nakitrarmiayi. Moiséscha nuna pachis tu armiyai. Yus chichaak:

“Atumka chikich ainau pachisrum:

Nuka ii wearinchuitai tayatrumek, nu aints ainau wína aintsur wajasaramtai, atumka nu aints ainau suwirpiaku jiiustinuitume. Tura chikich ainau pachisrum: Nintimchau ainawai tayatrumek, nu aints ainau wína aintsur wajasaramtai, atumka judfochu ainaun kajerkatnuitume,”

Yus timiyai. Tu aarmau asamtai, wína wear ainau Cristo chichamen nakitrarti-nuitai, nunaka taku tawai tusar nekaji.^k ²⁰Tura Isafás ni weari ainaun shamtsuk chichaman aatramiyai. Nu aarmauka nuwaitai. Yus judfochu ainaun pachis chichaak:

“Wínaka eatinachiat winaka waitkarmiayi. Tura wína seatinachu wainiatun Wiki wantintukmiajai,” timiyai.

²¹Tura ni weari ainaun pachis Isafás tu armiyai. Yus chichaak:

“Wína chichamrun nakitin ainaun wína umirtutsuk pujuinau asaramtai, kintajai metek wini winiarti tusan untsumnuyajai,” timiyai.^l

Israel ainau jumchik uwemrartin ainawai

11 ¹Tura asamtai ¿Yus ni aintsri ainautin tuke japrama ukurmakmakiaj? Atsa, ukurmakchamiaji. ¿Wikia Israel aintschaukitaj? ¿Tura Abraham wearinchukitaj? ¿Tura Benjamínka wearinchukitaj?^m ²Yus yaanchuik Israela weari ainautin: Wína aintsur ainiarne, tinu asa, ni aintsri ainautinka mash

japrama ukurmakchamiaji. ¿Yuse chichame etsernun Elíasan pachis aarmawa nuka antukchamkuram? Elfas ni weari ainaun pachis napchau nintimias Yusen chicharak: ³“Apu, ami chichamin etserin ainaun mash maawaru asaramtai, wiki ampintrajai. Tura tangku epetincha mash mesrari. Tura asar winasha mantuwartas wakerutinawai,” timiyai.ⁿ ⁴Tamaitiat Yus ayaak: “Nuka tiip, wína aintsrun untsurin maawarmaitiat, siete mil (7,000) ainau Baalan tikishmatrar: Wina Yusruitme tutsuk pujuinawai,” timiyai.^o ⁵Tura yamaisha nunisarang aints ainautin Yus wait anentramak: Wina aintsur ataram tinu asamtai, aints ainauti jumchik Cristo umirkur pujaji. ⁶Antsu Yus iin wait anentramau asa, pengker aa nu takachu arining, tunaunumiangka uwemtikramramiaji. Antsu iikia pengker aa nu takau akurningkia, Yus iincha tunaunumiangka uwemtikramrashtinuitji. Antsu iikia pengker aa nuka turichu arining Yus iinka wait anentramau asa uwemtikramratnuitji.

⁷Tura asamtai ¿warintajik? Tu uwemrachminun waininayat, wína wear ainau nangkamiar: Wi tuke pengker aa nuna turaknaka uwemratatjapi, tu nintimrarmiayi. Antsu Yus ni eakmau ainautinka uwemtikramramiaji. Antsu chikich ainau Yusen nekasampita ticharu asaramtai, katuram nintintin arti tusa Yus tsangkamkamiayi. ⁸Tura asamtai tu aarmawaitai:

“Nu aints ainauka katuram nintintin asar, nintinchawa nunisarang pujusarti tusa Yus tsangkamkamiayi. Tura ni jijai pengker wainminayat, Yus wakera nunaka nekaacharti tusa tsangkamkamiayi. Tura Yus tímia nunaka antukcharti

tusa, kuwishincha epetkamiayi. Tura asamtai yamaisha nunisarang ainawai.” Tu aarmawaitai.^p

⁹Davidcha Yusen umirtan nakitinaun pachis tu aarmiayi:

“Aints ainau uma umaka tura yuwa yuwaka nakunakut pujuinauka Yusen nakitinaun asaramtai, Yus wait wajaktiniun susartinuitai.

¹⁰ Tura wainmichua nunisarang Yuse wakeramurin nekatsuk pujusartinuitai. Tura merman entsakua nunisarang tuke wait wajakartinuitai,” tu aarmawaitai.^q

Judóchu ainau Yuse aintsri wajasmauri

¹¹Tura asamtai atumin iniastasan wakerajrume: Ii juuntri ainau Criston umirtan nakitinaun asaramtai, ¿Yus wi wear ainaun tuke ajapa ukukmiakia? Atsa, ukukchamiayi. Antsu ii juuntri ainau Criston umirtan nakitinaun asaramtai, Yus judóchu ainaun uwemtikramiayi. Turamtai wína wear ainau nuna wainkar, nusha nunisarang Criston umirtan wakerukarti tusa Yus turamiayi. ¹²Tura wína wear ainau Criston umirtan nakitinaun asaramtai, Yus judóchu ainaun nekas pengker awajsamiayi. Tura asamtai wína wear ainau ataksha Yusen nekasampita tinauka, nuna nangkamasarang nekasar timiá pengker pujusartinuitai.

¹³Judóchu ainautirmin yamaikia nunasha tajarme: Yus wína atumin akuptuku asamtai, wikia Yuse chichamen tuke inaitsuk atumin ujaajrume. ¹⁴Tura nuna turakun, atum uwemrarume nunisarang wína wear jumchiksha nuna nekaawar uwemrarti tusan wakerajai. ¹⁵Tura asamtai Yus wína wear ainaun ajapa ukukiat, mash nungkanmaya ainaun wait anentak: Wína aintsur ataram tinu asa, Yus wína wear ainaun

ataksha: Wína aintsur ataram, tamatikia, nuka yaanchuik jakarua nunisarang pujuinayat, jakamunmaya nantaknua nunisarang nekasar pengker nintimsar warasartinuitai. ¹⁶Tura pang eemkar najanamuka Yus susam pengkeraitmataikia, nunia pang ukunam najamusha nunisang pengker atinuitai. Tura numi kangkape pengkeraitmataikia, kanawesha pengker ainawai. Tura asamtai ii yaanchuik juuntri ainau Yusen nekasampita tinu asar, Yuse aintsri wajasaru asaramtai, ni weari ainausha nunisarang ukunam: Yusen nekasampita tusar Yuse aintsri wajasartinuitai.

¹⁷Tura Yuska kichik kichik wína wear ainaun numi kanawe charukmawa nunisang ajapa ukukmiayi. Tura atumin judóchu wainiat Yuska: Wína aintsur ataram tusa, numi íkiakmawa nunisang judó ainaujai metek wína aintsur ataram timiayi. Tura asa Yus judó ainautin pengker awajtamsamia nunisang atumnausha nekas pengker awajtamsiarume. ¹⁸Tura asamtai judóchu ainautiram, Yuse aintsri ayatrumek nangkamrum: Judó ainaun Yus ajapa ukukin asamtai, wikia judó ainaun nangkamasnak pengke aintsuitjai, tuuka nintimrairap. Antsu tu nintimrataram: Yus judó wearin kichik mash aints ainaun uwemtikratin ati tusa akupkau asamtai, judóchu ainauti yamaikia Yuse aintsri ainiaji, tu nintimrataram.

¹⁹Turayatrume atumka: Yus iinka: Wína aintsur ataram turamtias, judó ainaun ajapa ukukmiayi, tu nintimsaram pujakrumningkia, wikia tajarme: ²⁰⁻²¹Wína wear ainausha Yus tímia nunaka nekasampita tichau asaramtai, Yus niin ajapa ukukmiayi. Antsu atumin: Wína aintsur ataram, titaska wína wear ainaun ajapangka ukukchamiayi. Antsu

atum Yus tímia nunaka nekasampita tinu asaram, Yuse aintsri wajasurme. Wína wear ainau Yuse aintsri ainayat, Yus tímia nunaka umirkacharu asaramtai, Yuska niin ajapa ukukmiayi. Tura asamtai atumsha Cristo umirat inaisakrumningkia, atumnasha ajaprama ukurmaktinuitrume. Tura asamtai wikia nu aints ainaun nangkamasnak timiá pengkeraitjai, tuuka nintimsairap. Antsu wainkataram. ²²Tura asaram tu nintimsaram pujustaram: Yus aints ainaun mash aneyat, ni umirkacharu ainaunka wait wajaktiniun susatnuitai. Tura atumka Yus umirkuram pujakrumningkia, atumin wait anentramak ajapramangka ukurmakchatnuitrume. Antsu Yuse wait anengkratairi nintimsuk, tura ni umirtsuk pujakrumningkia, wína wear ainaujai metek atumnasha ajaprama ukurmaktinuitrume. ²³Tura wína wear ainau ataksha Yusen nekasampita tinamtaikia, Yus: Ataksha wína aintsur ataram titinuitai. Tura asamtai wína wear ainau yamaikia Yusen umirkacharu ainayat, ataksha Yuse aintsri wajasartnuitai. ²⁴Antsu atumka yaanchuikia Yuse aintsri acharmin wainiat, Yus atumin pachitmas: Wína aintsur ataram tusa wakerimiayi. Tura ii juuntri ainau yaanchuik Yuse aintsri ainayat, Yus tímia nunaka umikcharu ainau wainiat, ukunam ni weari ainaun chicharak: Atumsha wína chichamur umirkurmeka, wína aintsur atinuitrume titinuitai.

Israel ainau ukunam ataksha uwemrartin ainawai

²⁵Tura asamtai yatsur ainautiram, wikia nekawaitjai, tu nintimsaram pujusairap tusan nunasha tajarme. Chikich ainau nuna nekaachminun wainiat, Yus nu chichamnaka nekamtik-

ruamiayi. Nu chichamka nuwaitai: “Wína wear ainau jumchik Criston umirkaru pujuinaing, chikich ainau katuram nintintin asar, Criston umirtan nakitina-wai.” Tura judóchu ainautiram: Cristo umirkuram pujakrumningkia, wína wear ainausha katuram nintintain inaisar Criston umirkartinuitai. ²⁶Tura asamtai Yuse chichamesha tu aarmawaitai:

“Sión yaktanmaya atumin uwemtikramratin taamtai, Jacobo weari ainautirmi tunaarin mash japitramratnuitrume.”^r

Tu aarmau asamtai Yus Israel ainautin mash tunaanumia uwemtikramratnuitji.

²⁷Nuniasha tu aarmawaitai:

“Wína aintsur ainau tunaarin mash sakturan nijai yamaram chichaman najanatnuitjai,” Yus timiayi.^s

²⁸⁻²⁹Tura wína wear ainau uwemratin chichaman pachis nekasampita tichau asar, Yuse nemasea nunisarang ainawai. Tura asaramtai atumka mash uwemratin chicham Cristo pachisrum antukmiarume. Tura wainiat Yus tímia nunaka mash umiktinuitai. Yaanchuik ii juuntri ainaun Yus chicharak: Wi Yus asan, atumi weari ainaun pengker awajsatnuitjai, tu tinu asa, ni tímia nunaka yapajiachmin asamtai, wína wear ainau tuke Yuse aneetiri ainawai. ³⁰⁻³¹Tura asamtai yaanchuik Yus umirtsuk pujuyarme nunisarang wína wear ainau yamaikia Criston umirtsuk pujuinawai. Tura yamaikia atum Cristo umirkau asakrumin, Yus atumin wait anentramramia nunisang wína wear ainauncha wait anentratnuitai. ³²Aints ainau mash metek jingkiama nunisarang Yusen umirkartatkamawar tujinkaru asaramtai, Yus aints ainaun mash wait anentak tunaanumia uwemtikratnuitai.

³³Maj ¿Yus timiá pengkerchaukai? ¿Warina Yuscha nekatsua? Aintstikia Yuse nintimauringkia pengké nekaachminuitji. Tura ¿Yus warina turawa? tusarsha iisha nekaachminuitji. ³⁴¿Yus itiur nintimua tusarsha yáki nekaat? ¿Tura yáki Yusen nuiniarat? ^t ³⁵¿Tura yáki Yus pengker awajtusat tusasha akiimiakminui? Nuka pengké turachminuitai. ³⁶Yus mash aa nuna ningki najanamu asar ninu ainawai. Tura mash najanamu ainau wína pengker awajtusarmi tusa Yuska najanamiayi. Tura asamtai iisha tuke inaitsuk Yus pengker awajsarmi tajarme. Nekasaintai.^u

¿Yus itiur miatrusrisha umirkatnuitji?

12 ¹Yatsur ainautiram umaarutirme-sha, Yus atumin miatrusang wait anentramrau asamtai nunaka tajarme: Atumka Yusnau asaram, tura atumek wakerau asaram, Yus pengker awajsataram. Iwiaaku pujakrum, wína namangkur Yusnawaitai tusaram Yuse wakeramuri najanataram. Tu pujakrumka, Yus nekasrum pengker awajsatnuitrume. Yus tu pujustaram tusa wakerawai. ²Nunia tajarme: Ju nungkanmaya ainau nintimina nunisrumka nintimrairap. Antsu Yus wína nintimaurun yapaijturat tusaram tsangkamkataram. Tu pujau asaram Yuse wakeramuri nekas pengkeraitai tusaram, tura itiur Yusen pengker awajsatnuitja tusaram, tura ¿itiur Criston miatrusnak umirkatnuitja? tusaram nekaamnawaitrume.

³Tura Yus wína pengker awajtusasa: Wina chichamur etserkata turutin asamtai, wisha atumin tajarme. Atumka nangkamrum: Wikia chikich ainaun nangkamasnak pengkeraitjai tuuka nintimrairap. Antsu tupin nintimsaram

Yus: Wína nekasampita turuttiamur turamin asamtai, nu takatcha takakmas-tatji, titinuitrume. ⁴Iinu namangkesha warukuita tusar nintimrarmi. Iinu namangke kichkitiat muchitmau untsurintai. Tura metekchau ainawai. ⁵Tura asamtai Cristonu ainautikia untsuri ayatrik, kichik aintsu namangkea nunisrik aji. Tura Cristonu asar mai nuwamtak yuumaniaji.^v

⁶Yus ii takatrinka metekchau ati tusa, ni wakera nunisang iin suramsau asamtai takat takakmastinuitji. Tura asakrin: Wína chichamur etserkata turamataikia, Yus nekasampita tinu asar, ni wakera nunisrik ni chichamengka etserkatnuitji. ⁷Tura Yus: Wína umirtuku ainau tuke yaingtaram turamataikia, ni wakera nunisrik chikich ainau yaingtinitji. Tura Yus chikich ainau: Wína chichamur nuiniartaram turamataikia, ni wakera nunisrik ni chichamesha nuiniartinuitji. ⁸Tura: Chikich ainau wína miatrusarang umirtukarat tusaram kakamtikrataram, Yus turamataikia, ni wakera nunisrik chikich ainausha kakamtikratnuitji. Tura chikich ainau yuumamuri susatararam, Yus turamataikia, wína pengker awajtusarat, tuuka nintimsuk, yuuminak pujuinau ni yuumamurisha tuke susatnuitji. Tura Yus chikich ainau wainin ata turamataikia, wikia apuitjai, tuuka nintimsuk, antsu Yus wakera nunisrik chikich ainausha wainkartnuitji. Tura Yus: Wait wajainau yaingtaram, turamataikia, iikia pengker nintimsar wait wajainausha yaingtinitji.^w

Cristonu ainautikia chikich ainau pengker awajsatnuitji

⁹Nunasha tajarme: Chikich ainaujai suwirpiaku jiinitsuk nekasrum aneinita-

ram. Turaram pasé aa nuka nakitakrum, pengker aa nuke turataram. ¹⁰Tura wait anengkratin asaram, Cristonu ainou aneen ataram. Tura wikia mianchawaitjai tusaram pengker nintimtunisrum pujustaram.

¹¹Ii Apuri Cristo pengker awajsatasrum, ni takatrin atumin suramsamia nuka nakimtsuk, antsu ii Apuri wakera nunisrumek kakaram wajasrum turataram.

¹²Atumka pengker nintimsaram: Cristojai tuke pujostatjiapi tusaram warastaram. Tura wait wajakrumsha napchauka nintimtsuk pujustaram. Antsu tuke inaitsuk Yus seataram.

¹³Cristonu ainou yuuminak pujuinausha yaingtaram. Tura aints irak taamtaisha yuratararam, tura wini kanurta titaram.^x

¹⁴Atumin pasé awajtaminamtaisha yapajitsuk: Yus wait waktiniun susati tutsuk, antsu Yus yainmakti titaram.^y

¹⁵Cristonu ainou warainamtaikia, atumsha nunisrumek warastaram. Tura wake mesekar juutu pujuinamtaisha, atumsha nunisrumek wake mesekrum juutiararam.

¹⁶Chikich aints ainoujai pengker nintimtunisrum pujustaram. Tura wikia miajuitjai, tuuka nintimtsuk asataram. Antsu wikia mianchawaitjai titaram. Tura atumek: Wikia mash nekajai, tuuka nintimtumasaairap.

¹⁷Aints atumin pasé awajtaminamtaisha: Wisha yapajikiataj tuuka nintimsairap. Antsu mash metek ainiaji tusaram pengker aa nu turataram.

¹⁸Chikich ainoujai kajernaitsuk pengker nintimtunisrum: Angkan pujusmi tusaram wakerin ataram. ¹⁹Wína aneetir ainautiram, atumin kajertaminamtaisha

atumka yapajitsuk, antsu Yus ningki wait waktiniun susati tusaram inaisataram. Yuse chichame tu aarmawaitai. Yus chichaak: "Tunau ainaun yapajikiatnunka wiiitjai. Wiki wait waktinnaka sukartinuitjai," tawai.^z

²⁰Yuse chichame tu aarmou asamtai, atumi nemase yaparinamtaisha yuratararam, tura kitaminamtaisha umutisha artaram. Tu pujakrumka, atumin pasé awajtamina nu inatsaartinuitrume.^a ²¹Tura asamtai aints atumin pasé awajtaminamtaisha: Wisha nunisnaka yapajikian pasé awajsataj, tuuka nintimsairap. Antsu atumin pasé awajtamina nuka pengker awajsatararam.

13 ¹Nunasha tajarme: Apu ainou aints ainaun inararti tusa, Yus pujsamu ainawai. Tura Yus wakerou asamtai aints ainaun inainawai. Tura asamtai atumka apu ainou mash umirkatnuitrume. ²Tura Yus apu ainaun: Aints ainaun inararti tusa pujsamu asarmtai, aints apun umirtsuk puja nuka Yusnasha umirtsuk pujawai. Tura asa wait waktinasha jukitnuitai. ³Tura pengker aa nuna turinauka apu ainaun shamkarchatnuitai. Antsu pasé aa nuna turinauka apu ainaun shamkartinuitai. Apu ainaun shamtsuk pujustasrum wakerakrumka, pengker aa nu turatararam. Turakrumin apu atumin pengker nintimturmastinuitrume. ⁴Yus apu ainaun nangkamniaka pujsachmiayi, antsu aints ainaun yaingkiarmi tusa, tura pasé takau ainaun wait waktiniun susarmi tusa, Yus apu ainaunka pujsamiayi. Tura asamtai pasé turakrumka, apu ainou nekasrum shamkatnuitrume. ⁵Tura Cristonu asaram, apu ainausha tuke umirkatnuitrume. Tura wait waktin juki tusaram, tura nuna nangkamasrik pengker

nintimsar pujusmi tusaram, apu ainausha tuke umirkatnuitrume. ⁶Tura asakrumin Yus: Aints ainau pengker pujusarti tusa, apu ainaun akupkau asamtai, apu ainau Yuse inatiri asar, ni aintsri ainaun akikiartas atumnian kuikiancha juwinawai.

⁷Apu ainau ni takatrin takasarti tusar, ni aintsrin akupinak: Apu akiktaram tinamtaikia nakiarairap. Tura apu atumin mash takakmastaram tinamtaisha, nakimtsuk nu takatka takakmastaram. Juun apu chikich ainauncha: Apu ata tusa inaikiamu asamtai, pajakrum aitsuk umirkataram. Tura apu ainau Yus inaikiamu asaramtai, pengker awajsataram. ^b

⁸Atumka tumash akurmeka, atumi tumashri nakimtsuk akimiaktaram. Tura tuke inaitsuk mai aneenin ataram. Aints chikich ainaun tuke aneak pujacka, Yus umirkatin chichaman Moisés aarmia nunaka mash umiawai. ⁹Yus Moisésan umirkatin chichaman aamtikramia nuka nuwaitai: “Chikicha nuwari wainiatrum tsanirmawairap. Tura aints maawairap. Tura kasamkairap. Tura waitruwairap. Tura chikichnau aa nusha wakerukairap,” tu aarmawaitai. Tura mash irurar kichik chichamjai timinuitai. Nu chichamka nuwaitai: “Atumi namangke anearme nunisrumek chikich ainausha aneetaram.” ^c ¹⁰Aints chikich ainaun aneauka paseeka awajtsui. Tura asa Yus umirkatin chichaman mash miatrusang umiawai.

¹¹Iikia nu nangkamtaik Cristo nekasampita tusar: Nukap arus ii Apuri Cristo iin juramkitas tatinuitai timiaji. Antsu yamaikia aints kanur kuraat shintawa nunisrik: Cristo tatanak wajasi tusar paan nintimratnuitji. ¹²Ii Apuri tatanak wajasu

asamtai, tunau ainau teenam pasé turina nuka inaisarmi. Tura paaniunam pujuinawa nunisrik paan nintimsar tunau nepetkaru armi. ¹³Tura asar paaniunam pujuinawa nunisrik pengker nintimsar pujusarmi. Tura nampetcha nampetsuk, tura jampetcha jampetsuk, tura tsanirmatcha tsanirmatsuk, tura jiyaanit-cha jiyaanitsuk, tura suwirpiaku jiinitsuk asarmi. ¹⁴Tura atumka ii Apuri Jesucristonu asaram, ni kakarmarijai atumi namangke wakera nuka nepetkarum, Cristo wakera nunisrumek pujustaram. ^d

**Cristonu ainau pachisrum
pasé chichakairap**

14 ¹Aints Cristonu ainiayat mianchau wajainamtaisha nujai iruntrataram. Tura: Ameka Cristo umirat inaisame tiirap. ²Nintimrataram. Chikich aints ainau: Mash aa nu páchitsuk yuwatnuitji tinawai. Antsu chikich ainau Cristonu ainayat tenapkesar nekainachu asar: Kuntinu namangken yuwanka, tunau wajasai tu nintimsar kuntinu namangken yutsuk pujuinawai. ³Tura mash yuuka namangken yuchaun pachis: Nuka nintinchawaitai tichatnuitai. Antsu Yus nu aintsun pachis: Wina aintsruитай tinu asamtai, namangken yuchauka namangken yuun pachis pasé chichaschatnuitai. ⁴Atumka chikich aintsu inatiri pachisrum: ¿Inatiram tenap umirtamtsui titinkitrum? Atsa, nuka tichamnamnawaitrume. Antsu inakratin ni inatirin pachis: Wina pengker umirtawai, turackkusha pengkerka umirtatsui, ningki titinuitai. Tura asamtai ii Apuri Cristosha: Nekasar pengker pujusarti tusa, ningki ni inatiri ainaun nintimtkratnuitai.

⁵Tura chikitcha nintimrarmi: Cristo umirin chichaak: Nu kintati Yus maaketai

titasar iruntratnuitji, tu nintimui. Antsu chikichka: Kintajai metek tuke Yusen maaketai titasar pachitsuk iruntratnuitji, tu nintimui. Tura metekchaw nintimsar pujuinayat, mai metek čni nintimaurinka itiurak awa? tusar, ningki nekaamawarti-nuitai. ⁶Aints nu kintati Yusen maaketai titasar iruntratnuitji tinauka Yusen pengker awajsartas tu nintiminawai. Tura kintajai metek Yus nintimratnuitji tinauka nusha nunisarang Yusen pengker awajsartas wakerinawai. Tura Cristo nemarin pachitsuk mash yuuka Yusen maaketai tusa yuwawai. Tura chikich aints kuntinu namangken yutsuk pujausha nunisang Yusen maaketai tawai.^e

⁷Tura asamtai Cristonu ainautikia iik nintimsarkia iwiaaktsuji. Antsu Yus wakerau asamtai iisha iwiaakji. Tura Yusnau asar: Nu kintatiapi jakatatja tumamchatnuitji. ⁸Iwiaaku pujakrikia, ii Apuri pengker awajsatsasar pujaji. Tura jaakrishia, ii Apuri wakerau asamtai jakatnuitji. Tura asamtai iwiaaku pujakrishia, nuniasha jaakrishia tuke ii Apuri Cristonuitji. ⁹Cristo ni umirin jakaru ainaun Apuri atas, tura ni umirin iwiaaku ainautin Apuri atas jarutramkamiayi. Nunia ataksha tuke iwiaaku pujustas nantakmiayi. ¹⁰⁻¹¹Yuse chichame tu aarmawaitai. Yus chichaak:

“Wikia nekasan tuke iwiaaku pujau asamtai, mash aints ainauka wina tikishmatrurar: Ameketme Yusem turutiartnuitai,” tawai.^f

Tu aarmau asamtai, Yuse kintari jeamtai, Yus pujamunam naka wajasakrinkia, mash aints ainautinka Yus ii takatrincha, tura ii nintimaurincha itiur ainawa tusa nekaamtikramatnuitji.

Tura asamtai čwaruka Cristonu ainau pachismesha: Nuka mianchawaitai tame?

Tura chikich Cristonu ainau pachismesha čwaruka nakitajai tame? ¹²Tura asamtai Yus iin ininmakrin, ii turamu pachisar kichik kichik iik ujaktinuitji.^g

Cristonu ainau tunau wajasai tusaram wainkataram

¹³Tura asar chikich ainaun pachisar: čWaruka ainawa? tuuka nintimtunitsuk pujusarmi. Antsu Cristonu ainau tunau wajasarai tusar, tura Cristo nemaran inaisarai tusar tupin nintimratnuitji. ¹⁴Ii Apuri Jesús wina nekamtikruau asamtai, Yus najanamuka paseeka atsawai tusan nekajai. Antsu aints: Nu yutan yuwinauka tunau turinawai, tu nintimias pujayat, nu yutanचा yuwakka nekas tunau nintimias yuwawai. ¹⁵Tura atumi yutairi pachitsuk yuwau asakrumin, Cristo nemarin nuna wainak, tunau nintimias pujamtaikia, nu aints tunau nintimtikrau asaram, nu aintska aneetsuk pujarme. Antsu Cristo nu aintsun aneau asa, niincha uwemtikratas jakamiayi. Tura asamtai atumi yutairi pachitsuk yuwakrumka, chikich aints Criston umirtan inaisai tusaram wainkataram. ¹⁶Tura asaram atumka: Wi turaja nuka pengkeraitai tarumning, chikich ainau atumi turamurin pachisar paseetai turutiarai tusaram inaisataram. ¹⁷Yuse aintsri ainautikia čwarí yuta nekas pengkeraita, tura warí umutiya nekas pengkeraita? tuuka nintimtsuji. Antsu Yuse Wakani ii nintin engkemturmau asamtai, Yusnum pujustasar tunau nintimtsuk Yus wakera nunisrik angkan pengker nintimsar pujustin asar tuke warastinuitji. ¹⁸Criston tu umirkar pujuinauka Yusnasha tura aints ainauncha pengker nintimtinawai.

¹⁹Tura asamtai chikich aints ainaujai kajernaitsuk angkan aneenisar pujusarmi tusar, tura Cristo miatrusrik umirkarmi

tusar pengker nintimtunisar pujusarmi. ²⁰Yus ii yutairincha pachis: Pengkeraitai tau wainiat, Cristonu ainou: Nu yutaka paseetai tamatikia, atumka nu yutai pachitsuk yuwau asaram, nu aintska tunau nintimtikratnuitrume. Tura asamtai Cristonu ainou Yusen umirtan inaisarai tusaram, atumi yutairi páchitskeka yuwairap. ²¹Iikia kuntinu namangkesha pachitsuk yuwau asakrin, tura ii umutirisha pachitsuk umau asakrin, Cristonu ainou tunau nintimsar pujuinamtaikia, tura Criston miatrusar umirtsuk pujuinamtaikia, kuntinu namangkengka yuwashtinuitji, tura ii umutirisha umurchatnuitji. Tura Cristonu ainou tunau nintimrari tusar, tura Criston umirtan inaisarai tusar, ii wakeramuringkia najanashtinuitji. ²²Yus ii yutairin mash aa nuna najanau asamtai, mash yuwamawaitji tu nintimsaram puajakrumka, tuke inaitsuk tu nintimsaram pujustaram. Atumka Yus nintimtakrum, mash aa nu turakrumka, Yuska waramtik-satnuitrume. ²³Antsu nu yuta yuwaknaka tunau wajaschatjash tu nintimsaram yuwakrumka tunau wajarme. Tura asamtai waring achat mash pachisrum: Nunaka turashtinuitjai, tu nintimsaram pujayatrum, nu turakrumka tunau wajarme.

Atumi wakeramuri najantsuk, chikich ainausha pengker awajsataram

15 ¹Nunasha tajarme: Aints Cristonu ainayat mianchau wajainauka iijai metek nintimsuk pujuinau wainiatrik Cristo miatrusrik umirkautikia nu aints tunau nintimsarai tusar yaingtinuitji. Tura ii wakeramuringkia turashtinuitji. ²⁻³Cristoka ni wakeramurinka turachmiayi. Antsu Yuse chichame niin pachis aarmaunka mash umikmiayi. Nu aarmauka nuwaitai: “Amin kajertaminak pasé chichartamkartas wakerialmia nuka wina turutinak

tiarmiayi,” timiayi. Tu aarmau asamtai chikich aints ainou Criston miatrusarang umirkarat tusar, ii wakeramuringkia najantsuk chikich ainou pengker awajsatnuitji. ⁴Yaanchuik Yus ni chichamen etserin ainaun aamtikramia nuka iin nuitamratas aamtikramiayi. Tura asa: Wait wajakrumsha napchauka nintimsuk antsu pengker nintimsaram pujustaram tusa Yus nintimtikramji. Tura asamtai iinu Apuri tatintri nakakur warastinuitji. ⁵⁻⁶Yuska ii Apuri Jesucristo Apaachirintai. Tura asamtai mash metek nintimsaram ii Apuri maaketai titaram. Yus: Wina miatrusrumek umirtuktaram, tura pengker nintimsaram pujustaram tusa iin nintimtikramji. Tura asamtai Cristo Jesús pujumia numisrumek, mash metek pengker nintimtunisarum pujustaram tusa wakerawai. Yus tu pujustaram tusa atumin yainmakarti.

Uwemratin chicham judíocho ainamunam etserkamuri

⁷Cristo Yusen pengker awajsatas iincha pengker awajtamsamiayi. Tura asamtai atumsha nunisrumek chikich ainoujai pengker awajnisataram. ⁸Nunasha tajarme: Iinu yaanchuik juuntri ainaun Yus: Wi nunaka turatatjai tinu asa, ni tíaia nunaka mash umiktas, tura judío ainautin nuna nekamtikramatas, ni Uchirin Criston judío ainautin yaingti tusa akupturmakmiayi. ⁹Tura nukap arus judíocho ainaun wait anentau asa nusha nunisarang: Yus juuntaitai tiarat tusa Cristo tamiayi. Judíocho ainaun pachis Yuse chichame tu aarmawaitai:

Cristo ni Apaachirin chicharak: “Tura asan mash nungkanmaya ainou iruntramunam amin: Ameketme juuntam titatjame. Tura amin naarmin pachisan kantan kantamruatjame,” timiayi.^h

¹⁰Tura chikich aarmausha nuwaitai:

“Mash nungkanmaya ainautiram,
Yuse aintsri ainaujai iruntraram
warastaram.”ⁱ

¹¹Tura chikich aarmausha nuwaitai:

“iMash nungkanmaya aints ainauti-
ram ii Apuringkia: Ameketme
juuntam titaram!”^j

¹²Tura Isaías Jesúsan pachis tu aarmiyai:

“Davidta apari Isaí naartinu weari
kichik wantinkatnuitai. Nuka
mash nungkanmaya apuri atinui-
tai. Tura mash nungkanmaya
ainaun uwemtikratin asamtai
niin pachisar: Nekasampi iin
uwemtikramratatji tiartinuitai.”
Tu aarmawaitai.^k

¹³Tura Yus iin uwemtikramratin
asamtai, nu nakaji tusaram, nekasampita
tinu asakrumin, Yus atumin nukap
waramtikramsarti. Tura angka pengker
nintimsaram pujustaram tusa nintimtik-
ramrarti. Tura nekasnapi Yusnum
pujustatja titaram tusa, Yuse Wakani ni
kakarmarijai atumin pengker nintimtik-
ramrarti tusan tajarme.

¹⁴Yatsur ainautiram umaarutirmesha,
atumi nintijai pengker nintimtunisrum
pujarme, tura Yus atumin ni nekamtairin
suramsau asamtai, atumsha Yuse
chichame tu umirkataram tusaram, mai
nuwamtak chicharnaikiatnusha nekarme,
wikia tu nintimsan pujajai. ¹⁵Turayatun
atum kajinmakiram tusan, atumin
nintimtikratan nekasana paan aarmajai.
Yus wina chichamur etserkata tusa,
akuptuku asamtai nunaka aatjarme.

¹⁶Jesucristo judíocho ainamunam wina
chichamur paan etserkata tusa akuptuku
asamtai, tura Yuse Wakani nintirun
engkemturau asamtai: Yus pengker
awajsaram nekasrum ninu atinuitrume

tusan, Yus nu chichaman judíocho ainaun
nekamtikiatas wakerau asamtai, wikia
Yusnum uwemratin chichaman ujayajai.

¹⁷Tura Cristo Jesúsnaun asan, wikia
pengker nintimsan: Yuse wakeramurin
najanau asan, ni takatrin miatrusnak takau
ayajai timinuitjai. ¹⁸⁻¹⁹Tura wiki
nintimsanka nunaka tatsujrume. Wikia Yuse
chichamen etserkun, Yuse Wakani wina
kakamtikruru asamtai, aints wainchatai
takatnasha turinuyajai. Tura Jerusalén-
numian nangkaman, Yuse chichamen
etserkin weakun, Iliria nungkanmasha jean,
judíocho ainu Criston umirkarat tusan,
tuke inaitsuk uwemratin chichaman Cristo
pachisan etsernuyajai. ²⁰⁻²¹Yuse chichame
tu aarmawaitai:

“Yuse chichamen pengké antukcharu
ainau nekaawartinuitai. Tura
pengké antukcharu ainu nu
chichamnaka tu awai tusar
nintimrartinuitai.”^l

Nu aarmawa nunisnak wikia chikich
aints Cristo chichamen yaanchuik
etserkarmia nuningkia etsertan nakitnu-
yajai, antsu Cristo chichamen antukcharu
ainamunam uwemratin chichaman tuke
etserkatasan wakerinuyajai.

Pablo Romanam wetas nintimramuri

²²Tura asamtai atumin irastasan nukap
wakerayatun winitatkaman tujinnuyajai.^m

²³Tura yamaikia Yuse takatrin juningkia
mash umisu asan, tura unturi musach
atumin irastasan wakerau asan, ²⁴yamai-
kia Españanam wetasan wakerakun,
atumniasha jiiastan wakerajrume. Tura
atumin jeanka, jumchik atumjai wararnai-
sarmi tusan wakerajrume. Nunia weta
tusaram winaka yainkamnawaitrume.
²⁵⁻²⁶Macedonia nungkanmaya ainu tura
Acaya nungkanmaya ainausha Jerusalén-

num Cristonu ainau yuuminak pujuinaun yaingkiartas kuik akuptuktai tinau asaramtai, yamaikia Cristonu ainau Jerusalénnum pujuinaun ni yuumamurin susartasan weajai.ⁿ ²⁷Ningki nintimsar kuikian akupkartas wakeriarmiyai. Jerusalénnumia Cristonu ainau yaanchuik judfochu ainamunam Cristo chichame etsernun akupkarmia nutiksarang yamaikia judfochu ainausha Jerusalénnumia Cristonu ainau yuumamurinchasusartinuitali. Nuka nekas pengkeraitai.^o ²⁸Tura asamtai wikia Jerusalénnum jeanka, tura nuni pujuinaun kuikian mash susanka, nunia jiinkin, nu wekaamurnasha umisan, nuniangka Españaanam wetasan, atumnisha jiiatjarme. ²⁹Cristo wina akuptuku asamtai, atumin jeanka nukap kakantikratatjarme tusan nekajai. ³⁰Yatsur ainautiram umaarutirmesha, ii Apuri Jesucristonu asakrumin, tura Yuse Wakani: Aneenisrum pujustaram tusa, iin yainmaktin asamtai, tuke inaitusk winasha Yusjai yainkataram. Tura wina pachittsaram Yus nukap seatritaram tajarme. ³¹Tura Yus seakrum: Judea nungkanam wekaaksha, Cristo umirkacharu ainamunam Yus uwemtikrati tusaram seatritaram. Tura Jerusalénnumia Cristonu ainau yuuminak pujuinausha kuikian pengker nintimsar jukiarat tusaram Yus seataram. ³²Nunia Yus wakeramtaikia, wisha atumin jean, atumjai iruntran warasan jumchik ayamsatnuitjai. Nu pachisrum Yus seatritaram. ³³Yus angka pengker pujustinasha sukartin aa nuka atumjai mash pujusti tajarme. Nuke ati.

**Pablo aints ainaun
chichaman akuptukmauri**

16 ¹⁻²Ju papin aaran umisan, ii umaji Febe naartinun atumin akuptajrume. Juka Cencrea yaktanmaya

ainaun untsuri yain ayayi. Tura wisha nu yaktanam pujamtai, winasha yainuyayi. Tura asamtai Cristonu ainaun tuke yaininawa nunisrumek ii Apuri naarijai ii umaji pengker yaingtaram, tura ni yuumamurisha mash susataram tajarme.

³Tura umaar Priscilan, tura aishrin Aquilancha chichaman akuptajai. Nuka Cristo Jesúsnaun asar, wijai miatrusarang takau ainawai.^p ⁴Yaanchuik wina mantuwartas wakerutinamtai, nuka wina surimrukarmiayi. Tura asaramtai wisha niincha maaketai tajai. Antsu wikikia nunaka tatsujai, antsu judfochu Cristonu ainausha mash nunisarang tinawai. ⁵Tura ni jeen Cristo chichamen antukartas iruntraru ainautirmincha mash chichaman akuptajrume. Wina aneetir Epeneton chichaman akuptajai. Wi Asia nungkanam Cristo chichamen etsermatai, nuka nuwá eemak Criston umirkamiayi. ⁶Tura umaar Marínasha chichaman akuptajai. Nuka atumin yainmaktas nukap takakmasmiayi. ⁷Tura wina wear ainaun Andrónicon, tura Juniasnasha chichaman akuptinajai. Nuka wina nangkatar nuwá eemkar Criston umirin armiyai. Tura wijai tsaniasar kársernum engkemawarmiayi. Tura Cristo nuiniatiri ainaujai Cristo takatrin miatrusarang takakmasarmiayi.

⁸Tura Ampliatoncha chichaman akuptajai. Nuka ii Apuri Cristonu asa wina aneetiruitai. ⁹Tura Urbanoncha chichaman akuptajai. Nuka wijai Cristo takatrin takakminuyayi. Tura wina aneetir Estaquisnasha chichaman akuptajai. ¹⁰Tura Apelesnasha chichaman akuptajai. Nuka Criston miatrusang umirkawaitai. Tura Aristóbulo jeen pujuinauncha chichaman akuptinajai. ¹¹Tura wina wearun Herodió nan chichaman akuptajai. Tura Cristo umirin Narciso naartinu jeen pujuinauncha chichaman akuptinajai. ¹²Tura umaarun

Trifenan, tura umaarun Trifosancha chichaman akuptinajai. Nuka ii Apurin umirin asar Yuse takatrin takakminawai. Tura ii aneetiri umaji Pérsidan chichaman akuptajai. Nuka ii Apuri takatrin takaak wait wajamiayi. ¹³Tura ii yachi Rufoncha chichaman akuptajai. Nuka ii Apurin miatrusang umirnuyayi. Tura ni nukurincha chichaman akuptajai. Nuka wína nukuru tumawaitai. ¹⁴Tura Asíncriton, tura Flegontencha, tura Hermesnasha, tura Patrobasnasha, tura Hermasnasha; tura Cristonu ainanun nijai iruntrar pujuinauncha chichaman akuptinajai. ¹⁵Tura Filólogoncha, tura Juliancha, tura Nereoncha, tura ni umajincha, tura Olimpasnasha, tura Cristonu ainanun nijai iruntrar pujuinauncha mash chichaman akuptinajai.

¹⁶Cristonu ainautiram, mash pengker nintimtusurum aneenisurum: ¿Pengkerak pujaram? titaram. Cristonu ju nungkanam iruntrar pujuinauka mash atumin: Pengker pujustaram tusar chichaman akupturminawai.

¹⁷⁻¹⁸Yatsur ainautirmin umaarutirmincha, nunasha tajarme: Aints niish nintimsar Cristonu ainanun anangkinak: Kanakrum pujustaram tusar atumin pasé awajtaminamtaisha, nu aints ainanun wainkataram. Ii atumin nuiniarmiaji nunaka nuininatsui. Tura ii Apuri Jesucristoncha umirinatsui. Antsu ni wakeramurinak najaninawai. Tura pengker chichainayat, papi nekachu ainanun anangkinawai. Tura asamtai nu aints ainanun wainkaram, atumka nuwakai tusaram, tura kanakar pujusai tusaram, nu aints ainanun iruntrairap. ¹⁹Antsu atumka Cristo chichame tuke umirkau asakrumin, aints ainanun nunasha mash nekainanun asaramtai, wikia atumin nintimtusurum warajai. Tura pengker aa nuka turataram, tura pasé aa nuka

nintimtusurum asataram tusan wisha wakera-
jai. ²⁰Iwianchi apuri Satanás wári nepetkataram tusa, Yus nekas angka pengker nintimratnun sukartin aa nuka atumin kakamtikramratatrum. Ii Apuri Jesús atumin yainmakarti tajarme.

²¹Timoteo wijai Yuse takatrin takakmau asa, atumin chichaman akupturmarme. Wína wear ainanun Lucio, tura Jasón, tura Sosípatersha atumin chichaman akupturminawai.

²²Ju papin aarja juka wíitjai Tercioitjai. Wisha ii Apuri naarin pachisan chichaman akuptajrum.

²³Tura Gayo chichaman akupturmarme. Wikia nuna jeen pujajai. Tura Cristonu ainanun Yuse chichamen antukartas ni jeen tuke kauninawai. Tura ju yakta kuikiari wainusha, Erasto naartin, tura ii yachi Cuarto atumnasha chichaman akupturminawai. ²⁴Ii Apuri Jesucristo atumnasha mash yainmakarti. Nuke ati.

Inangnamu Yusen maaketai timiauri

²⁵Yamaikia Yus maaketai tiarmi. Yus wína miatrusurumek umirtuktaram tusa, atumnasha kakamtikramratnuitrum. Yaanchuikia Jesucriston pachis uwemratin chichaman aints ainanun pengké nekaachminun wainiat Yus wína nekamtikruau asamtai nu chichaman etsernuitjai. ²⁶Yus tuke iwiaaku puja nuka yaanchuik ni chichamen etserin ainanun kichik kichik: Wína chichamur aatrurtaram tusa akupkamiayi. Tura mash nungkanmaya ainanun nu chichaman antukar nintimrar umirkarat tusa, Yus nu chichamnaka paan nekamtikiamiayi.

²⁷Yus ningki mash nekau asa, ni Uchirin Jesucriston akupturmaku asamtai, tuke inaitsuk: Yus pengker awajsarmi. Maaketai.

Pablo Corintonam Pujuinaun Papin Eemak Akuptukmauri

Chicham akuptukmau

1 ¹Wiitjai Pabloitjai. Yus wakerau asa, Jesucristo: Wína chichamur etserin ata tusa eatkamiayi. Ii yachi Sóstenes wijai tsanias pujawai. ²Cristonu ainautirmin Corinto yaktanam pujuinautirmin ju papin aaran akuptajrume. Atum pengké tunaarinchau winar ataram tusa, Cristo Jesús atumin eatmakmiarume. Chikich chikich nungkanam pujuinauncha ii Apuri Jesucriston: Ameka wína Apuruitime tinaunka: Wína uchir aarti tusa Yuska eawai. ³Ii Apaachiri Yus ii Apuri Jesucristojai atumin wait anentramak pengker awajtamsarti, tura angka pengker pujustinasha suramsarti tajarme.^a

Pablo Criston maaketai timiauri

⁴Atum Cristo Jesúsnau asakrumin, Yus atumin wait anentramak pengker awajtamsau asamtai, wisha Yusen tuke maaketai tajai. ⁵Atumka Cristonu asaram, ni pachisrum nekas chicham pengker chichastaram tusa, Yus ni nekamtairin atumnasha suramsamiarume. ⁶Tura Criston pachisar etserina nu antuku asaram nintimrume. ⁷Tura ii Apuri Jesucristo tatin kinta nakau asaram, Yus atumin suramsa nuka yuumatsuk pujarme. ⁸Tura atumi tunaarin sakaru

asa, ii Apuri Jesucristo taatsaing, pengké tunaarinchau ataram tusa, atumin waitmaktinuitrume. ⁹Yus: Wína Uchirjai tsaniasrum pujustaram tusa, atumin eatmaku asa, Ni tímia nunisang tuke mash umiktinuitai. Ni Uchiri Jesucristoka iinu Apurintai.

Kanakrum pujusairap timiauri

¹⁰Yatsur ainautiram umaarutirmesha, ii Apuri Jesucristo naarin pachisan atumniaka tajarme: Mash iruntraram metek nintimraram pujustaram. Tura metekchau nintimtsuk asataram. Antsu kichik nintiya nunisrumek chicham iwiararam, metek nintimtunisrum pujustaram. ¹¹Yatsur ainautiram, Cloé jeen pujuinau atumin pachitmasar: Jiaani pujuinawai tinamun wisha antukmajai. ¹²Wi antukmaja nuka nuwaitai: Atumsha tu chichaarme: Chikich ainautiram wína pachitsaram: Wikia Pablo umirnuitjai tarume. Tura kichtirmesha: Wikia aints Apolos naartinu umirnuitjai tarume. Tura kichtirmesha: Wikia Pedro umirnuitjai tarume. Tura kichtirmesha: Wikia Cristonak umirnuitjai nuketjai tarume.^b ¹³¿Waruka tuusha chichaarme? ¿Cristo unturingkai? Atumin uwentikramrat tusarka, numi winangmanumka winaka mantuacharmiayi. Tura atumsha entsa maakrumsha, wína nemartustasrumka

a 1.3 (Hech. 18.1) b 1.12 (Hech. 18.24; 1.Cor. 3.4)

maichmiarume. ¹⁴⁻¹⁵Wikia aya Crisponcha tura Gayoncha imaimiajai. Antsu kichnaka imaichmiajai. Tura atumka wina pachitsaram: Nu wina imiatin asantai, wikia Pablo umirnujtai turutiarai tusan, aintsun untsurinka imaichu asan, pengker nintimsan pujajai. ^c ¹⁶Maj, kichnasha Estéfanasa wearincha imaimiajai. Antsu chikich wi imaimunka aneaktsujai. ^d ¹⁷Cristo wínaka: Aints imaita tusangka akuptukchamiayi. Antsu uwemratin chicham etserkata tusa, winaka akuptukmiayi. Chikich nekau ainau aya ningki nintimsar chichaina nunisnaka chichaatsjai. Antsu Cristo iin uwemtikramratas numi winangmanum jarutramkamiayi, taja nuna aints ainau kajinmakiarai tusan nu chichamnaka etserjai.

Cristo Yuse kakarmarincha tura nekamtairincha nekamtikramamiayi

¹⁸Cristo numi winangmanum jarutramkamiayi tusan, nu chichaman etserjai. Antsu mengkakarta in ainau nuna antukar, nintimchau asar: Nangkami tawai tuweenawai. Antsu uwemratin ainautikia nu chicham nintimtakrikia, Yus ni kakarmarijai iin kakamtikramji tu nintimji. ^e ¹⁹Yuse chichame etserin yaanchuik tu aarmiayi. Yus chichaak:

“Junia ainau nekamtairinka mengkatkatatjai. Tura nangkamiar: Wikia nekau aintsuitjai, tinu ainau chichamencha mengkatkatatjai,” tu aarmawaitai. ^f

²⁰Tura asamtai nintimrarmi: ¿Nekau ainau nekamtairi nekakrikia uwemratnukitaij? Atsa. ¿Tura papi nekau ainau chichamen nintimtakrikia uwemratnukitaij? Atsa. ¿Tura junia chicharkartinu chichamen antukrikia uwemratnukitaij?

Atsa. Junia aints ainau ningki nintimsar: Nekau aintsuitjai tinu wainiat Yuska: Nekas nintinchau ainawai tawai. ²¹Tura junia aints ainau ni nekamtairijaingkia winasha nekaracharti tusa, Yus surimkamiayi. Antsu nu aints ainau ningki nintimsar Cristo chichame etserkamun pachisar: Nu chichamnaka nangkamiar etserinawai tuweenawai. Tu tinu wainiat, Yus ni chichame etserkamun antukar, nekasampita tinaunaka uwemtikratas wakerimiayi.

²²Judío ainu chichainak: Yuse kakarmarijai wainchatai takat wainarkia: Nekasampita tichainjash tinawai. Tura griego ainu chichainak: Iikia junia aints ainu nekaina nu nekataras wakeraji tinawai. ²³Antsu iikia: Ii Apuri Cristo numi winangmanum jarutramkamiayi tusar, nu chichamka etserji. Judío ainu nuna antukar: Nuka natsanpiakuitai tuweenawai. Tura judíocho ainu nu chichamnasha antukar wishikinak: Nintinchau ainawai tuweenawai. ²⁴Tura wainiat Yus judío ainauncha, tura judíocho ainauncha uwemtikratas eaku asamtai, Cristo Yuse kakarmarin tura ni nekamtairincha nekamtikramji. ²⁵Junia aints ningki nintimsar wishikinak: Yus tímia nunaka nangkami timiayi tuweenawai. Antsu junia aints nekaina nuka mianchawaitai tusa Yuska nekawai. Yuse nekamtairi junia aintsu nekamtairin nangkamakuitai. Cristo numi winangmanum jakantai, junia aints ainu: Yuse kakarmaringkia atsawai tinu wainiat, Yuse kakarmari junia aintsu kakarmarinka nangkakawaitai. ²⁶Yatsur ainautiram, umaarutirmesha nintimrataram: Junia aints nekaina nunisrumka atumka nekatsrume. Tura atumsha apu naamkarmeka wajatsrume. Tura kuikiar-

tinu uchirinchnuume. Untsuri tu pujuinauka atumjai iruninachu wainiat Yuska: Winar ataram tusa, atumniasha eatmakmiarume. ²⁷Antsu junia nekau ainau Cristo umirkaru ainau pachisar: Nu aintska nintinchau ainawai, tinau wainiat, Yuska nu nekau ainau inatsaartas nekachu ainaun: Wina uchir ataram tusa eakmiayi. Tura kakaram ainau Cristo umirkaru ainau pachisar: Nu aints ainau kakaichu ainawai tinau wainiat, Yuska nu aints ainauncha inatsaartas, kakaichu ainaun: Wina uchir ataram tusa eakmiayi. ²⁸Tura inati ainauncha, tura chikich ainau nakitin ainauncha, tura mianchahu ainauncha: Wina uchir ataram tusa Yuska eakmiayi. Tura chikich aints nangkamiar: Wikia miajuitjai tinaunka Yuska: Mianchawaitai tusa pachisui. ²⁹Tura asamtai aints ningki nintimsar: Wikia miajuitjai, tura pengkeraitjai tinayat, Yusnaka tichamin ainawai. ³⁰Antsu atumka Yuse uchiri asaram, Cristo Jesúsnuwaitrume. Tura Yuse wakerau asamtai, Cristo Jesús Yuse nekamtairincha iin nekamtikramamijai, tura ii tunaarinchu sakturmarmijai, tura pengké tunaarinchu ataram tusa iinka kakamtikramamijai, tura ii tunaarinchu akiimiatramak uwemtikramamijai. ³¹Tura asamtai Yuse chichame tu aarmawaitai: “Aints pengkeraitjai tumamtas wakerakka, nunaka tutsuk Criston ningki nekas pengkeraitai titinuitai.”^g

Cristoka krusnum jakamiayi timiauri

2 ¹Yatsur ainautirmin umaarutirmincha, wikia atumjai pujaknaka, Yuse chichamen nekas aa nuna atumin ujaakun, junia ainau nekamtairijaingkia Yuse chichamenka ujakhamiajrume, antsu nu chichamnasha paan antukminun

ujakhamiajrume. ²Tura wikia aya Jesucristonak pachisan atumjai chichastatjai tusan, tura Cristo numi winangmanum jarutramkamijai tusan, nunak pachisan atumjai chichastatjai, tu nintimnuyajai. ³Tura wina kakarmar atsau asamtai, Yuse wakeramuri miatrusnak umirkashtinuapitja tusan, tura Yuse nekas pengkerka awajsashtinuapitja, tu nintimsan nintirjai shamakun kurainuyajai.^h

⁴⁻⁵Tura junia ainau nekamtairijaingkia atumin chicharkachmiajrume, antsu Yuse kakarmari nintimsaram Cristo nekasampita titaram tusan, wikia Yuse chichamenka ujayajrume. Yuse chichamen ujaaknaka, junia nungkanam nekamtangkia nintimrataram tutsuk, antsu Yuse Wakani kakarmarijai Yuse chichamen atumniaka ujayajrume.

Yuse tu awai tusa ni Wakani iin nekamtikramji

⁶Yuse chichame umirin ainautikia Yuse nekamtairi etserji. Tura Cristonu ainau nuna antukar: Nuka Yuse nekamtairintai tinawai, tura ii nekamtairi ju nungkanmaya nekamtairinchnu asa, junia apu nekamtairinchnu. Junia apu aintsun inau ainayat wari mengkakarta inawai. ⁷Antsu iikia chikich aints ainau nekashtai etserji. Yuska nungkan najantsaing, ukunam wina nekamtairun aints ainau nekamtikratnuitjai, tura tuke uwemtikratnuitjai tusa, Yuska nintimramiayi. ⁸Tura waininayat junia apu ainu nu nekatinka kichkisha nekainatsui. Antsu nuna nekawaruitkungka, ii Apuri ni kakarmarijai mash najanamia nunaka numi winangmanumka maacharmiyajai. ⁹Tura Yuse chichame tu aarmawaitai: “Aints kichkisha wainkachmin aa nuna Yuse aneena nuka

wainkarti tusa Yus umismawaitai. Tura aints kichkisha antukchamnau aa nunaka Yusen aneena nuka antukarti tusa Yus umismawaitai. Tura aints chikichkisha nintimrachmin aa nunaka Yusen aneena nuka nintimrarti tusa Yus umismawaitai,” tu aarmawaitai.ⁱ

¹⁰Tura Yuska ni Wakanin akupturmak, ni nintimaurincha nekamtikramamiaji. Ni Wakani mash nekau asa, chikich aints ainau pengké nekaachminun wainiat, mash paan nekaawarti tusa iincha nekamtikramamiaji.

¹¹Nintimrarmi: ¿Yáki chikich aintsu nintimaurincha nekamnawai? Chikich aintsu nintimauringkia pengké nekaachminuitai. Antsu iik nintimsarik ii nintimauri nekaamnawaiti. ¿Tura yáki Yuse nintimaurincha nekamnawai? Aints kichkisha Yuse nintimaurinka pengké nekaachminuitai. Antsu Yuse Wakani nuke Yuse nintimaurinka nekawai.

¹²Tura Yus ju nungkanmaya nekamtainka iinka nekamtikramachmiaji. Antsu ni nekamtairinka mash iin nekamtikramatas, ni Wakanin nekas pengker aa nuna ii nintin engketramamiaji. ¹³Tura Yuse chichamen pachisar chichaakrikia, ju nungkanmaya nekau ainau nuikiartina nunisrikia iikia chichaatsji. Antsu Yuse Wakani iin nuitamrau asamtai, nu chichamka Yusen nintimina nuke ujaaji.

¹⁴Antsu Yusen umirchau ainau Yuse nekamtairinka ni Wakani sukarta nunaka juwinatsui. Nu nekamtainka nekaawartakamawar yuumatinau asar, ningki nintimsar Yuse namarin ainan pachisar nintinchawa nunisarang chichainawai tinawai. ¹⁵Tura Yuse Wakani aintsu nintin engkemtuamuka Yus niin nekamtikiatas wakera nunaka mash

nekamtikiatnuitai. Antsu junia aints ainau Yuse aintsri nintimaurinka pengké nekaachartinuitai. ¹⁶Tura Yuse chichame tu aarmawaitai: “¿Yaachia Yuse nintimaurincha nekaamnawaita? ¿Tura yaachia Yushasha nuiniarminuita?” Tu aarmawaitai. Tura wainiatrik Cristonu ainautikia Cristo nintimia nunisrik iisha nintimji.^j

**Cristo chichame etserin mash
Cristo inatiri ainawai**

3 ¹Yatsur ainautiram umaarutirmesha, wikia atumjai pujaknaka Yuse Wakani piatkamu ainan chicharja nunisnak atumniasha chicharkatatkaman tujinkamiajrume. Antsu atumka kuwirchia nunisrumek nintimu asakrumin, ju nungkanam aa nuna nintiminaun chicharja nunisnak atumniaka chicharnuyajrume. ²Uchi kuwirach aya muntsunak muntsuwitai. Atumin chicham yumtichu antukminun ujayajrume nuka muntsua tumawaitai. Antsu chicham yumtin aa nuka kuntuu namangkea tumawaitai. Nu chichamnaka atumniaka ujakchamiajrume. Tura nu chichamsha yumtin asamtai, nintimratkamaram yamaisha tuke tujintarme.^k ³Tura asaram chikich ainau suwirpiaku jiiisrum pujarme. Tura jiyani pujau asaram atumi wakeramuri nintimsaram pujarme. Tura ju nungkanmaya ainau nintimina nunisrumek tura pujuina nunisrumek atumsha tuke pujarme. ⁴Tura asaram chikich ainautiram: Wikia Pablon umirnuittjai, tura chikich ainautirmesha: Wikia Apolosan umirnuittjai tarume. Tu chichaakrumka ju nungkanmaya ainau chichaina nunisrumek chichaawearme.^l ⁵¿Waruka tuusha chichaawearme? ¿Wikia warí aintsuitja tura Apoloscha warí aintsuita? Iikia Yuse inatirinji

nuketji. Ii Apuri ii takatrin tu ati tusa, iin suramsamiaji nuke takakminuyaji. Tura iikia atumin Cristo chichame etserkau asakrin, atumsha: Cristoka nekasampita timiarume. ⁶Wikia arakan arakminua nunisnak nuná eemkan Cristo chichamen etsernuyajai. Yumi jitachmatai aints árak araamu kajing kai tusa, yumijai ukatua nunisang Apolos Yuse chichamen kajinmakiarai tusa atumniaka nuitamramiarume. Antsu arakan tsapamtiknua nunisang ni chichamen atumin nintimtikramratnuka Yusketai. ⁷Aints arakan araksha ningkikia tsapamtikiachminuitai. Tura yumijai ukatua nuka arakan ningkikia tsamamtikrachminuitai. Antsu arakan tsamamtiknua nuka Yusketai.^m ⁸Aints arakan araawa nuka Yuse chichame nu nangkamtaik etserua nunisketai. Tura kitcha árak kajing kai tusa, yumin ukatua nuka Yuse chichamen ukunam nuiniawa nunisketai. Mai metek Yuse takatrin takakmasaru asar, ukunam Yusnum jearantai, Yuska niin pengker awajartinuitai. ⁹Yus: Tu takakmastaram tinu asamtai, iikia ni takatringkia ni kakarmarijai takaaji. Tura Yus atumi nintin takasu asamtai, atumka Yuse ajaria nunisketrume. Tura Yuse jee jeamkamua nunisketrume. ¹⁰Tura Yus: Wina chichamur tu etserkata tusa wina akuptuku asamtai, jea jeamin pengker nekawa nunisnak wikia: Criston nekasampita titaram tusan, nu nangkamtaik atumin Yuse chichamenka ujayajrume. Tura chikich ainau: Yuse chichame pengker umirkarat tusar atumin nuitaminawai. Tura kichik kichik nuikiartin: ¿Itiurkanak nekas pengkeran Yuse chichamencha nuiniaraintaj? tu nintimartinuitai. ¹¹Jean jeamin kayan jeamkartas nuná eemkar nungkan tainiar

kaya juuntan wewe amij tusar jintinawai. Jesucristo nu kaya nunisang asa iin uwemtikramratnuka nuketai. ¹²Nunasha tajarme: Jean jeamin ainau jean jeaminak nekasar wári mamurchamnun jeamkartas wakerinakka kurijai, tura kuikiajai, tura kaya shiirmajai jean jeaminawai. Nuniasha numijai, tura nukajai, tura paatjai jean jeaminawai. Yuse takatrin takakmin ainausha niish niish pengkernasha tura mianchaunasha takakmincha ainawai. ¹³Chikich chikich aintsu takatri nekas pengkerashi tusa, Cristo nekaatas taantai, paan wainkartinuitai. Nu kinta jeantai, chikich chikich aintsu takatri itiuwak awa tusa Yuska jiistinuitai. ¹⁴Aints Criston nintimias jea kaparchamniaun jeamua nunisang Yuse takatrin nekas pengker takau asamtai nuna takatringkia mengkakashtinuitai. Tura ukunam Yusnum jeantai, nu aintsnaka Yus pengker awajatsnuitai. ¹⁵Tura aintsu jee numijai, tura nukajai, tura paatjai jeamkamua nintimrarmi: Jijai keemamka nu jeaka keawai. Turamtaikia nu aintsu takatringkia mash mengkawai. Yuse umirin ainausha nunisarang Yuse takatrin mianchau takau asaramtai, Jesucristo taantai, ni takatri mash jijai keemamua nunisarang mengkaktartinuitai. Tura nu aintska mengkakashtinuitai, antsu jea keamta, misu jiinua nunisang uwemratnuitai.

¹⁶Nusha nintimrataram: Yuse Wakani atumi nintin engkemturmau asamtai, atumka Yus seatai juun jea nunisketrume. ¿Nuka nintimtsurmek?ⁿ ¹⁷Aints Yuse jeen mesramtaikia, Yuscha nu aintsnaka mengkaaktinuitai. Atumka Yuse jea tumau asakrumin, Yus nunaka turawai.^o

¹⁸Tura asamtai junia aints ainau nekaina nujaingkia metekaitjai, tuuka

nintimtumasaairap. Anstu Yuse nekamtairi nekaatasrumka, ju nungkanmaya ainau nekamtairingkia nintimtsuk asataram.

¹⁹Yus ju nungkanmaya nekau ainan pachis: Nuka nintimchawaitai tawai. Tura asamtai Yuse chichamesha tu aarmawaitai:

“Aints ningki nintimsar: Wikia nekau aintsuitjai, tura Yuska atsawai tinamka, Yuska nu aintsnaka ejatkajai achiawa nunisang achiawai.”

²⁰Ataksha tu aarmawaitai:

“Aints ainan ningki nintimsar: Wikia nekau aintsuitjai, tinan wainiat ii Apuri nu aintsnaka pachis: Nangkami tawai tusa nekawai.”^p

²¹Tura asamtai aints nuikiartiniun pachis: Nuka chikich nuikiartin ainan nangkakawaitai pengké tichamnawaitai. Yuse chichamen nuikiartin ainautin mash metek Yus akupkamuitji. ²²Wisha, tura Yuse chichame etserin Apoloscha, tura Pedroscha atumin yainmakarat tusar akupkamuitji. Tura ju nungkanam aa nunasha mash Yus atumnau ati tusa najanawaitai. Iwiaaku pujakrisha, tura jakarsha tuke Cristonuitji. Yamai ainia nunasha, tura ukunan atinua nunasha Cristoka mash atumnau ati tusa najanawaitai. ²³Atumsha Cristonuitrume. Tura Cristosha Yusnawaitai.

Cristo inatiri ainan takatri pachis etserkamuri

4 ¹Atumka iin pachikratsaram: Nuka Cristo inatiri asar, tura Yus akupkamu asar, chikich ainan nekaachminun wainiat, Yuse chichamen iin nekamtikraminaji, tu nintimratnuitrume. ²Tura asamtai aints ni inatirin: Jear waitrukta tusa ukukmiau asa, nu aintska jeenu chichamen miatrusang umirkat-

nuitai. Yuscha nunisang: Wina chichamur umirtuktaram tusa, akupkamu ainau miatrusarang umirkartinuitai. ³Atumka wina pachitsaram: Nekas Yuse chichamen pengker etsertsuash turutrumin wainiatnak wikia nunaka pachitsajai. Tura Yusen nintimtichu ainausha wina pachitsar: Yuse chichamen nekas pengker etsertsuash turutrinan wainiatnak nunaka pachitsajai. Anstu wiki nintimsanak: Nekasan Yuse chichamen pengker etsernuitjai tumamtsujai. ⁴Tura wina tunaaruscha awash tusanka nekatsjai.

Anstu wiki nintimsanak: Tunan turachmiajai tumammataisha, nunasha ii Apuri nuke nekawai. Ningki: Aminu tunaarumka atsawai turutrinuitai. ⁵Tura asamtai ii Apuri taatsaing, chikich ainan pachisrum: Nu aintska ni takatrinka tenapka takaatsui tutsuk asataram. Anstu nintinam ukusmau aa nuna chikich aints nekaachminun wainiat, ii Apuri taa paan nekamtikramatnuitji. Tura ame tu pujusmiam tusa, ni umikchamurinka paan nekamtikiatnuitai. Anstu pengker takau ainan kichik kichik: Atumi takatri pengker takakmasurme ningki titinuitai.

⁶Yatsur ainautiram, anturtuktaram: Wikia Apolosan pachisan, tura wiki nintimtumasan nunaka takun tajai tusan, atumsha nuimiartaram tusan nunaka tajarme. Yuse chichame aarmawa nuna nangkamasrumek etserkairap. Tura chikich aints pachisrum: Nuka Yuse takatrin timia pengker takaawai, tura chikich aints pachisrum: Nuka Yuse takatrin tenapka takaatsui tutsuk asataram. ⁷¿Yaachia atumin chikich aints ainan nangkamasang timia pengkeraitai turamua? Nuka pengké nekaachminuitai. ¿Yuse chichamen yaachia atumin nekamtikramama? Atumin nekamtikramama nuka Yusketai. Tura atumin mash

nekamtikramau asamtai ¿waruka wiki mash nekawaitjai tuusha nintimrume?

⁸Atumek nintimsarmek: Yus iin nekamtikramatas wakera nusha iikia mash nekaji ¿nangkamrum tatsurmeash? Tura iincha Yus suramsatas wakera nusha yaanchuik mash jukinuitji ¿nangkamrum tatsurmeash? Tura iincha pachikratsaram: Nekas mianchawaitai tayatrum atumek: Iikia apua nunisrik pujau asar, chikich ainauka yuumatsji ¿nangkamrum tatsurmeash? Antsu apua nunisrumek pujakrumningkia, iisha atumjai iruntrar apua nunisrik pujusminuitji. ⁹Wiki nintimsanak: Cristo chichame etserin ainautinka Yus: Uku wajastaram tusa iinka akuptamkamiaji tajai. Turamtai aints ainau Cristo chichame etserin ainautin maatai turaminaji. Turamin asaramtai, Yuse awemamuri ainausha tura mash nungkanmaya ainausha jiisarti tusa Yus akupkamuitji, wikia tajai. ¹⁰Iikia atumjai metekka ainatsji. Iikia Cristonu asakrin: Nintinchau ainawai turaminaji. Antsu atumek nintimsaram: Cristo iin nekamtikramatas wakera nusha mash nekaji tatsurmeash. Iikia kakarmachuitji. Antsu atumek nintimsaram: Iikia kakarmaitji tatsurmeash. Atumin pachitmasar pengkeraitrume turaminawai. Antsu iin pachitmasar paseetrume turaminaji. ¹¹Iikia Cristo chichame etserin asar, yamaisha tsukajai, tura kitakjai tuke wait wajaji, tura mamuaji. Tura tuke waitkarminaji. Tura jeenchawaitji. ¹²Ii yuumamuri sumarmaktasar ii uwejejai nukap takakmakur pimpiaji. Tura iin kajertaminamtaisha: Yus yainmakti tuweaji. Tura iin kajertaminausha pajakrishha ayaatsji. ¹³Iin pachitmasar napchau chichartaminamtaisha, iikia napchauka chichartsuk yaitasar chicharuweaji. Yamaikia tuke ju

nungkanmaya ainau iincha nakitraminak tsauka nunisarang iin japramawartas wakerutminaji.

¹⁴Atumin inatsaartaj tusanka nunaka aatsujrume. Antsu wína aneetir uchirua nunisrumek asakrumin, atumin chicharkatasan nunasha aatjarme. ¹⁵Aints timiá untsuri atumin Cristo chichamen nuitaminak pujuinayat, atumi aparingkia untsuringkia ainatsui. Antsu wiyá eemkan atumin Cristo Jesúsnum uwemratin chichaman etserkau asan, nekasan atumi aparua nunisnak ajai. ¹⁶Tura asan wait aneasrum, wiya nunisrumek Yus umirkataram tajarme.^s

¹⁷Tura asan Timoteon akuptajrume. Nuka wína aneetir uchirua tumawaitai. Nuka iinu Apuri chichame nekas pengker umirnuitai. Tura wi Cristo Jesúsán umirja nunaka mash kajinmakiram tusa atumin nintimtikramratatrume. Tura wi Cristonu ainaun chikich chikich yaktanam nuininuyaja nunisang atumin nuitamratatrume. ¹⁸Tura atumjai pujuinauka miajuitjai tumamsar wína pachitsar: Iin shamramau asa tachatnuitai tinawai. ¹⁹Tu tinau wainiatnak Yus wakeramtai-kia, wári atumin irastasan wakerajai. Tura miajuitjai tuweena nuna chichamen nekaatasnaka winishtatjai. Antsu nekasarash Yuse kakarmarijai Cristo takatrin takakmina tusan, nuna nekaatasan winitatjai. ²⁰Yus aints ainaun inartinun pachiska nangkamniaka chichaschamawaitai. Antsu Yuse kakarmarijai ni chichamen etserinawash tusa nekaamawaitai. ²¹¿Atumsha itiurtukat tusarmea wakerutarme? ¿Awaturat tusarmek wakerutaram? ¿Turachkurmesha wait anentrurat tusarmek, tura yaitik aujtusat tusarmek winit tusaram wakerutaram? Atumek nintimrataram.

¿Cristo umirin pasé takauka itieurkatnuita?

5 ¹Aints atumin pujaun pachisar chichainak: Aints Cristonu ayat ni apari nuwarijai kanawai, tamaun antukmajai. Aints Yusen nekachu ainausha nu tunaunaka pengké turinatsui.

²Antsu atumka nu aintsu turamuri nekayatrumsha, ¿waruka jampesrumsha pujarme? Nu aintsu tunaari nintimsaram wake mesekrum juutinuitrume. Nuna tura nuka atumniangka jiiiktinuitrume.

³Wikia atumjai pujawaitkuncha: Warintinjak tusan, nu tunau tura nuna wait wajaktintri tuyapi atinuita tusan, ii Apuri Jesucristo naarin pachisan tajarme.

⁴Atumka ii Apuri Jesucristo naari pachisrum iruntraram pujusrum: Itieurkat-jik takurmin Yuse Wakani: Nuka turataram tusa nekamtikramatatrume. Wisha atumjai pujachiatnak, atumin nintimsan pujustatjai. ⁵Nu tunau takaunaka iwianchi apuri Satanás ni namangken pasemantikrati tusaram tsangkatkataram. Tura asaram ii Apuri Jesús taamtai, nu aintska uwemrati tusaram turataram.

⁶Atumka: Ii turamuka pengkeraitai tuwearme nuka napchawaitai. Atumka kichik aints tunau turati tusaram tsangkamkau asakrumin, chikich aints ainau nuna wainkar, mash tunaun wakerukartin ainawai. ¿Atumka nuka nekatsrumek? ⁷Ii ainauti Pascua fiesta jeatsaing, uwija uchiri mainuyaji. Turarin wainiat Cristo uwijaya nunisang jarutramak, ii tunaarin akiimiattramkamiaji. Tura asamtai yamaikia ii ainauti pang mangkarat tusar, engkeamiaji nu ii jeenia mash japnuyaji nunisrumek atumi tunaari mash inaisaram ukukrum, nekasrum tunaarinchau wajastaram. Cristo atumi tunaarin japrutmau asamtai,

yamaikia pang mangkarchawa nunisrumek arume. ⁸Tura asamtai ii ainautikia Pascua fiesta inangkartai tusar, pang pachimtai mash japin armiajina nunisrik Cristo jakamuri nintimsar, ii tunaari mash inaisar, chicham nekas aa nu umirkar Pascua fiesta inangkaru armi. ⁴

⁹Yaanchuikia atumin papin aatkun, Cristonu ainayat nuwan nuwatsuk tsanirmin ainaujaingkia, tura aintsun ninumtsuk tsanirmin ainaujaingkia tsaningkairap timajrume. ¹⁰Antsu Yusen nekachu ainaujai tsaningkairap tatsujrume. Tura kuikian nukap wakerin ainaujai, tura kasa ainaujaisha, tura Yuschau waininayat: Ameka wina yusruitme, nangkamiar tinu ainaujaisha tuke tsaningkairap tatsujrume. Nu aints ainaujai tuke iruntsuk pujustasrum wakerakrumka, ju nungkanmaya tuke jiiiktinuitrume. ¹¹Tura asaram aints mash ukuktaram tatsujrume. Aintsu Cristonuitjai tinayat tsanirmin ainausha, tura kuikian nukap wakerin ainausha, tura Yuschau waininayat: Ameka wina yusruitme, nangkamiar tinu ainausha, tura pasé chicharnain ainausha, tura nampeu ainausha, tura kasa ainausha ukuktaram tajarme. Nu aints ainaun pachisan: Nujajingkia yuwairap.

¹²⁻¹³Yusen nekachu ainau tunaarin pachisar: Ni wait wajaktintri tu ati tichatnuitji, antsu Yusek titinuitai. Aintsu atumka aints: Yusnawaitjai tinayat, Yusen umirtsuk pujuinauka: Tunaarum inaisataram tusaram chicharkatnuitrume. Tura asamtai nu tunau takauka atumniangka jiiiktaram tajarme.

¿Kajernaiyamu amataisha itieurkatnuita?

6 ¹Atumka Cristonu ayatrum kajernaiyakrum pujakrumka, ¿waruka junia apu ainau Yusen umirchau wainiatrum-

sha, chicham iwiarami tusarmesha jiarne? Chicham iwiarami tusaram, ¿waruka chikich aints Yusnau ainauka jiatsrume? ²Nintimrataram. Nungka amumati, ju nungkanmaya tunaarintin ainau wait wajaktintri tu ati tusar Yusnau ainautikia susatnuitji. ¿Atumka nuka nekatsrumek? Tura nu chicham mash nekaatin ayatrumsha ¿warukarmek chicham jumchik pasé aa nuka iwiarash-tarme? ³Iikia nayaimpinam jearkia, Yuse awemamuri ainaun inartinuitji. ¿Atumka nuka nekatsrumek? ¿Tura asaram ju nungkanam chicham jumchik aa nuka itiori iwiarash-tarmek? ⁴Cristonu ainamunam kajernaiyamu amataikia ¿Yusen umirchau ainau Cristonu ainautirmin yainminachusha waruka chicham iwiaratai tusarmesha jiiarme? ⁵¿Atumka natsaamatsrumek? tusan tajarme. ¿Atumningkia Cristonu ainau chichaman iwiaramniauka kichkisha atsawak? ⁶¿Mai Cristonu ainautak kajernaikiamu iwiarami tusar pujuinamunam Yusen umirchau ainausha jiisartas weena nuka pengkerkai?

⁷Atumka Cristonuitiatrum mai nuwamtak kajernaiyakrum pujakrumka, Cristo umirchau ainau chichaman iwiararti tusaram jiiarme nuka paseetai. Atumin waitkarminamtaisha ¿waruka tsangkurturme? Tura atumnau aa nuna kasartaminamtaisha, ¿waruka nangkami sakarti tusaram inaiyatsrume? Nu turakrumka nekas pengker turarme. ⁸Antsu atumka Cristonu ainaujai pasé awajnaiyarme. Tura atumi yachiijai kasarnain arume.

⁹Yus aints ainautin inatmartata nuna pujutirin Yusen umirchau ainauka pujuschartinuitai. ¿Atumka nuka nekatsrumek? Atumkeka anangmamawairap. Pachitsuk tsanirmin ainausha, tura

Yuschau waininayat: Ameka yusetme, nangkamiar tinu ainausha, tura mai aishmangtak tsanirmin ainausha, ¹⁰tura kasa ainausha, tura kuikian nukap wakerin ainausha, tura nampeu ainausha, tura tsanumin ainausha, tura anangmin ainausha Yus aints ainaun inartata nuna pujutirin pengké jechartinuitai. ¹¹Atum-niangka jumchik aints tu puju armiyai. Antsu yamaikia Yus atumi tunaarin japitramramiarume. Tura pengké tunaarinchau ataram tusa, ii Apuri Jesucristo atumi tunaarin mash sakturmarmiarume. Nunia Yus ni Wakanin atumin suramsamiarume.

II namangke Yusnawaitai

¹²Chikich aints ainau chichainak: Wi wakeraja nunaka waring achat mash pachitsuk turamnawaitjai tina nuka nekasar tinawai. Antsu ni wakerina nuna mash turinakka, Yusen nekasar pengkerka awajinatsui. Nekasar ni wakerina nunaka waring achat mash pachitsuk turawartinuitai. Tura mash pachitsuk turinauka nuniangka inaisat-kamawar pengké tujintinawai. ¹³Chikich aints ainausha chichainak: Ii yutairi yuwakrikia, wakenam engkemniyai. Yus yutai yuwataram tusa, iin waken najatramamiaji tina nuka nekasaintai. Tura ii yutairisha, tura ii wakesha mengkakatin ainawai. Antsu tunau takastaram tusangka, ii Apuri Cristo ii namangkenka najatramachmiaji. Antsu winar ataram tusa, ii namangkenka najatramamiaji. ¹⁴Tura Yus ii Apurin inankimia nunisang iincha ni kakarmarijai inantamkitnuitji.

¹⁵Cristonu ainautiram nintimrataram: ¿Ii namangkengka Cristonuitai tusarmeka nekatsrumek? Tura asamtai ¿Cristonutiatrum nuwa kungkatip nuwatkashtatiatur nujai tsaningminkai? Atsa, turachmi-

nuitji. ¹⁶Yuse chichame tu aarmawaitai. Yus chichaak:

“Aints nuwajai tsaning jimiaraitai, kichik namangkea nunisketai,” timiayi.”

Tu aarmau asamtai aints nuwa kungkat-pin nuwatkashtatiat, nujai tsaningka kichik namangkea nunisang atinuitai.

¿Atumka nuka nekatsrumek? ¹⁷Tura aints ni Apuri Cristojai tsaning puja nuka Yuse Wakani ni nintin engkemtuamu asa, Cristo Wakanijai kichik wakanian nunisketai.

¹⁸Tura asamtai nuwa nuwatsuk tsanirmatka tuke inaisataram. Chikich tunau ainaujai ii namangke pasemantik-rashtinuitji. Antsu aints nuwajai tunau takauka ni namangken pasemamtikui.

¹⁹Yus ni Wakanin atumin suramsau asamtai, atumi namangke Yuse jeea nunisketai. Tura Yuse Wakani atumi nintin pujurtamu asamtai, atumi namangkengka atumnauchawaitai. ¿Atumka nuka nekatsrumek? ²⁰Cristo atumi tunauring akiimiatramkatas ni numpejai atumin sumarmaku asamtai, yamaikia atumi namangkengka Yusnawaitai. Tura Yusnau asamtai, yamaikia maaketai tusaram Yus pengker awajsataram.*

Nuwa nuwatkatnun pachis chicharkamu

7 ¹Atum wina papi aatrakrum: Nuwa nuwatkatnun chicham pachisrum inintsamarume. Nuna pachisan yamaikia titatjarme: Aints nuwan nakitak nuwatsuk pujaksha pengkeraitai.

²Turayat chikich nuwan takasai tusa, aints kichik nuwanak nuwatkatn. Tura nuwasha nunisang kichik aintsnak ninumkati. ³Ni nuwari asamtai, aints ni nuwarin pengker awajsatnuitai. Tura nuwasha nunisang ni aishrin pengker awajsatnuitai. ⁴Nuwa namangkengka

ninuchuitai, antsu ni aishrinuitai. Tura aishmangku namangkesha nunisang ninuchuitai, antsu ni nuwarinuitai. ⁵Aints ni nuwarijai tsuutnaitasuk tsaniasar pujusartinuitai. Antsu Yus nukap seatasar ¿warutam kintak iijai kanutskesha pujustaij? tu nintiminauka mai nuwamtak metek nintimtunisar nunaka turuwartinuitai. Antsu aints ninu nuwarijai kanutsuk untsuri kinta pujamtaikia, iwianchi apuri Satanás: Chikich nuwanam tepeeta turuti tusa, ataksha ni nuwarijai kanurтинuitai.

⁶Yatsur ainautiram, tuke atumi nuwarijai tumatsuk asataram tusanka nunaka tatsujrume. Antsu atum wakerakrumka, nusha turunataram tusan tajarme. ⁷Aints mash wijai metek nuwenchau arti tusan wakerajai. Antsu Yus mash aints ainaun metekka najanachmiayi. Tura asamtai chikich ainauka nuwan nuwatkatn ainawai. Antsu chikich ainauka nuwan nuwatkashtin ainawai.

⁸Antsu nuwartichu ainautirmin, tura waje ainautirmincha chicharkun: Wi nuwartichu aja aintsaram pujakrumnisha pengker pujarme tajarme. ⁹Antsu nuwartichu pujuschamin nekapinaka, nuwa angkantn aa nuna nuwatkartn. Tura nuwa aintsun ninumtsuk pujuschamin nekapinaka aints nuwenchawa nuna ninumkartn. Nusha pengkeraitai. Antsu natsa nuwan tuke wakerayat nuwatsuk pujakka nuka napchawaitai.

¹⁰Antsu aishrintin ainauka aishrinka ajapangka ukukchartnuitai. Wiki nintimsanka nunaka tatsujrume. Antsu ii Apuri Cristo: Nu chichamsha umiktaram tusa akupkamiayi. ¹¹Antsu nuwa ni aishrin ajapa ukukingkia, nuniangka aintsna ninumtsuk pujusti, tura aintsjai tsaning pujustas wakerakka, ni aishrinak waketrukti. Tura aintcha ni

nuwarincha ajapangka ukukchati tajarme.^y

¹²Tura chikich nuwentin ainaun iinu Apuri nu chichamnaka akupkachu wainiatun nunaka tajai: Aints Cristonu asa, ni nuwari Criston umirchau wainiat, nijai pujustas wakerakka, nuwarinka ajapashtinuitai. ¹³Tura nuwasha nunisang Cristonu asa, aishri Criston umirchau wainiat, nijai tsanias pujustas wakerakka, aishrincha ajapashtinuitai. ¹⁴Nuwa Cristonu asa, aishri Criston umirchau wainiat Yus: Mai kichkia nunisang arti timiau asa, aishrin ajapashtinuitai. Tura aishmangsha nunisang Cristonu asa, nuwari Criston umirchau wainiat, nuwarincha ajapashtinuitai. Nuwa Criston umirchau wainiat aishri: Wína uchir Yusnau arti timiau asa, ni uchirisha Yusnau ainawai. Tura aishmangsha Criston umirchau wainiat ninu nuwari: Wína uchir Yusnau arti timiau asa, ni uchirisha nunisarang Yusnau ainawai. Antsu nuwa Criston umirchau aishrin ajapa ukukmiaka ni uchirisha Yusen umirchau artinuitai. Tura aints Criston umirchau asa, nuwarin ajapa ukukmiaka, ni uchirisha Yusen umirchau artinuitai.

¹⁵Antsu aints Criston umirchau asa, ni nuwari Cristonu asamtai, nuwarin ukuktas wakerakka turatnuitai. Tura nuwari aishrincha: Weep tusangka surimkashtinuitai. Tura nuwari ataksha angkanta nunisang atinuitai. Tura nuwasha nunisang Cristo umirchau asa, aishri Cristonu asamtai, aishrin ukuktas wakerakka turatnuitai. Tura aishri nuwarin: Weep tusangka surimkashtinuitai. Tura aishri ataksha nuwenchawa nunisang atinuitai. Antsu Yus: Kajernaitasuk pengker nintimtunisrum aneenisrum pujustaram tusa wakerau asamtai, nuna pachisan aatjarme. ¹⁶Aints Criston

umirchayat, nuwarin ukutsuk pujakka, nuwa aishrin nintimtikmau asa, nisha ukunam Criston umirak uwemrashtimpiash tusarkia nekaachminuitji. Tura nuwasha nunisang Criston umirchayat, aishrin ukutsuk pujakka, ni aishri nuwan nintimtikmau asa, nisha ukunam Criston umirak uwemrashtimpiash tusarkia, nusha nekaachminuitji. Tura asamtai nu aintska Cristonu asa ni nuwari Criston umirchau wainiat ukukchatnuitai. Tura nuwasha nunisang Cristonu asa, ni aishri Criston umirchau wainiat ukukchatnuitai.

¹⁷Yus aints ainautin: Tu pujustaram turamin asamtai, kichik kichik Cristonu ainau Yus wakerana nunisang pujusarti. Nu chicham umiktaram tusan, tuke Cristonu ainau iruntramunam etserjai. ¹⁸Tura asamtai judío Criston umirtsang, ni nuwapchirin charutkarmia nuka Criston umirak pujakka natsaamak: Ameka judío aintsuitme turutiarai tusa, nu charutkarmun uukainjash tu nintimtsuk asati. Tura aints ni nuwapchirin charukchamu ayat, Cristonu asa, nuwaprun charukainjash, tu nintimtsuk asati tajarme. ¹⁹Cristonu ainautikia nuwapech charukmauka tura charukchamuka pachiatjsi. Antsu Yuse chichamen miatrusrik umirkatar wakeraji, tu nintimsar pujaji. ²⁰Cristonu ainautikia Cristo umirturning nuwapech charukmau autikia aintsarik pujusminuitji, tura charutkachmau ainausha aintsarang pujusartinuitai. ²¹Tura atum Cristo umirtsuk pujusrum aintsu inatiri akurmesha, nunia Cristonu wajasrum napchau nintimtsuk asataram. Antsu inatmin atumin chichartamak: Angkan pujustasam wakerakmeke jiinkitnuitme turaminamtaikia, nekasrum jiinkitnuitrume. ²²Ii Apuri Cristo aintsu inatirin: Wína umirtukta tusa eak, ni tunaurn akiimiatkamu asa, aintsu inatiri ayat,

yamaikia angkanta nunisang Criston umirkartnuitai. Tura aintsu inatirinchu Cristo: Wina umirtukta tusa eakmau asa, aintsu inatirinchtuat Cristo inatirintai. ²³Cristo atumi tunaarin akiimiatramkatas waitnas jaka, atumin sumarmaku asamtai, yamaikia Cristonu ainiarme. Tura asaram ju nungkanmaya ainu atumin: Wina umirtukta tinauka pachischatnuitrume. ²⁴Yatsur ainautiram umaarutirmesha, Yus atumin eatmak: Wina umirtakrum tu pujustaram tinu asamtai, chikich chikich ainautirmesha Yus wakera nunisrumek pujustaram.

²⁵Yamaikia nawantan pachisan, nunia natsancha pachisan tajarme nuka anturtuktaram. Ii Apuri nuna pachis chichaman akupkachu wainiatnak wiki nintimsanak nunaka aatjarme. Ii Apuri wait anentrak ni chichamen nekantikruau asamtai, wi taja nuka atumsha nekasaintai titinuitrume. ²⁶Tura yamaikia wait wajaktin nukap au asamtai, nuwa nuwatsuk aintsarik pujustin pengkeraitai, tu nintimsan pujajai. ²⁷Nuwartin akurmeka, nuwaram japawairap. Antsu nuwartichu akurmeka nuwasha eakairap. ²⁸Antsu nuwa nuwatkurmeke tunaauka turatsrume. Tura nuwa nawan aintsun ninumkusha nuka tunaunaka turatsui. Antsu nuwenawaru ainauka nukap wait wajakartin asaramtai, atum waitnawairam tusan nunaka tajarme.

²⁹Yatsur ainautirmin umaarutirmincha nunasha tajarme: Ii Apuri tatintri jeatak wajasi. Tura asamtai yamaisha nuwartin ainu nuwartichua nunisarang Yusnaka umirkartnuitai. ³⁰Tura wake mesekar pujuinausha wake meseachua nunisarang Yusnaka umirkartnuitai. Tura nakurin ainausha nakurichua nunisarang Yusen umirkartnuitai. Tura warinchun sumin ainausha sumichua nunisarang Yusnaka umirkartnuitai. ³¹Ju nungkanam aa nuka mash mengkakatin asamtai, ju nungka-

nam aa nunaka wakerutsuk Yusnaka umirkartnuitai.

³²Ju nungkanam aa nu nintimtsuk asataram tusan, nunasha tajarme: Nuwartichu ainauka Yusen pengker umirkatasan wakerajai, tu nintimsar pujuinawai. ³³Antsu nuwartinka itiu nuwarnasha pengkersha awajatsjak? tusar ju nungkanam aa nunak nintimsar pujuinawai. ³⁴Tura aishrintin ainu aishrinchau ainaujai metekchau nintiminaawai. Nuwa aishrinchau ainauka: itiu wina namangkrujai, tura wina nintirjaisha tunaarinchau Yusen pengker awajatsjak? tusar ii Apuri Criston nintimsar pujuinawai. Antsu aishrintin ainauka: itiu aishruncha pengkersha awajatsjak? tusar ju nungkanam aa nuna nintimsar pujuinawai.

³⁵Atumsha mash nuwartichu pujustaram tusanka nunaka tatsujrume. Antsu atumin yaingtasan nekas pengker aa nu turataram tusan, tura ii Apuri Cristo miatrusrumek nintimrataram tusan nunaka tajarme.

³⁶Antsu aints chichaak: Nawan yaanchuk aintsun ninumkamin ayat, ninumtsuk pujakka napchawaitai, tura asan nuwaktasan wakerajai, tu nintimias pujakka, nu nawannaka nuwatkat. Nuka tunaachawaitai. ³⁷Antsu chikich aints yusen miatrusnak umirkatasan, nuwan nuwatan nakitajai tu nintimias pujauka pengker aa nuna turawai. ³⁸Tura asamtai aints nawantan nuwatuka pengker aa nuna turawai. Tura aints nuwan nuwatsuk pujausha nuna nangkamasang pengker nintimias pujawai.

³⁹Nuwa aishri iwiaaku pujamtaikia, tuke nijai tsanias pujustinuitai. Antsu aishri jakamtai angka wajas, ni wakerakka Cristo nemarniun ninumkatnuitai. ⁴⁰Tura wiki nintimsanak: Waje chikich aintsun ninumtsuk pujakka, timia pengker nintimias pujustinuitai tajai.

Yuse Wakani nunasha wína nekamtik-
ruau asamtai, tu nintimsan pujajai.

**Yuschau waininayat wína yusruitme tinu
ainau pachis timiauri**

8¹Yatsur ainautiram, Cristo umirchau
ainau ni yusrin, Yuschau waininayat,
tangkurin susartas maawaramtai únuna
namangke Cristonu ainauti yuwatnuashi?
tu inintsamarume nuna pachisan
aatjarme. Antuktaram: Iikia nukap nekaji
taji nuka nekasaintai. Antsu iijai metek
nekainachu ainaun pachisar: Nuka
mianchawaitai taji nuka napchawaitai.
Antsu Cristonu ainau aneakrikia, iisha
Yus miatrusrik umirkur pujustinuitji.
²Aints nangkami nintimias: Mash aa
nunaka nekajai tayat, Yus niin
nekamtikiatas wakera nunaka mashkia
nekatsui. ³Antsu Yusen anea nuna pachis
Yus: Nuka wina aintsruitai tawai.
⁴Tura asamtai Cristo umirchau ainau ni
yusrin susartas tangkun maina nusha
yuwamnawashi, tu nintimsaram pujau
asaram nintimrataram. Yuska kichkitai
nuketai. Antsu ju nungkanam pujuinauka:
Juka wína yusruitai tina nuka Yuschawai-
tai tusar nekaji. ⁵Aints ainau wakan
ainaun, tura iwianch ainauncha
shaminak, entsuri umirin ainayat
nangkamiar: Nayaimpinmasha, tura
nungkanmasha yuska entsuri pujuinawai,
tu nintiminawai. ⁶Antsu iikia Yuska
kichkitai taji. Nuka iinu Apaachirintai.
Nusha mash aa nuna najanau asa iincha:
Wína umirtuktaram tusa najatmamiaji.
Tura ii Apuringkia kichkitai. Nuka
Jesucristoketai. Nuka ii Apaachiri Yusjai
mash ainia nuna najanau asamtai, iisha
nuna kakarmarijai iwiaakji.^z
⁷Antsu aints ainau mashkia nunaka
nekainatsui. Chikich ainau nangkamiar:
Yuschau waininayat nuka ii yusrintai

tinawai. Tura asamtai ni yusrin maaketai
tiartas, ni tangkurin maawaru asaramtai,
Cristonu ainau nuna namangken
yuwinakka, napchau nintimsar shamina-
yat yuwinawai. ⁸Antsu ii yutairi
yuwakrincha Yuska nunaka pachiatstui.
Tura ii yutsuk pujakrishia Yuska
napchauka awajtsuji. Tura ii yutairi
yuwakrishia Yuska pengkerka awajtsuji.
⁹Antsu nuka nintimrataram: Atumka nuka
tunaachawaitai tusaram, nu yutasha
wakerakrumka yuwamnawaitrume. Antsu
nu yuta yuwakrumningkia, chikich aints
nuna wainak: Nuka tunaawitai tu
nintimratnuitai. Tura asamtai chikich
aints ainaun tunau nintimtkrai tusaram
nintimrataram. ¹⁰Atumka aintsu yusri jeen
pujusrum, nuka Yuschawaitai tusaram
nekau asaram, tangku namangke ni yusrin
susaru yuwau asakrumin, chikich aints
Cristo nemarkin atumin waitmak, nusha
nunisang nuna yuwau asa, Criston
umirtan inais, tuke chikich aintsu yusri
jeen maaketai titas wayaamnawaitai.
¹¹Tura asamtai atumka: Chikich aintsu
yusri nekas Yuschawaitai tusaram,
nekatytrum nuni yuwau asakrumin,
chikich aints Criston miatrusang
umirchauka Cristo nu aintsun uwemtikra-
tas jarukmaitiat, nu aintska
mengkakatnuitai. ¹²Turamtai nu tangku
namangke yuwau asaram, Criston
nemarnuka tunau nintimtikrume. Nu
turakrumka Cristoka umirtsuk tunau
wajarme. ¹³Tura asakrumin wikia tajarme:
Wi yutan yuwamtaikia, Cristonu ainau
tunau wajasarai tusan, wikia yamaikia nu
yutanka pengké yuwashatjai.^a

Pablo ni pujamurin etserkamuri

9¹¿Wikia Cristo akupkamuchukitaj?
Wikia Jesús jakamunmaya nantak-
nuncha wainkamijai. Tura atumin Cristo

chichamen etserkau asamtai, atumsha Cristo umirin ainiarme. Wikia Cristo akupkamu asan chikich aints Cristo akupkamu turina nunasha wisha nunisnak turamnawaitjai.^b ²Chikich ainu wina pachitsar nangkamar: Cristo akupkachmawaitai turutinau waitiatrumek atumka nekasrum: Cristo akupkamuitai turutinuitrume. Cristo: Wina chichamur etserkata tusa akuptuku asamtai, atumsha wi etsermau antuku asaram, Cristonu ainiarme. Tura asaram wina pachitsaram: Cristo akupkamuitai tusaram paan nekaramnawaitrume.

³Aints ainaun wina pachitsar: Itiur pujawa tusar nekarawartas wakerutinaunka wisha nunasha tajai: ⁴Wikia nekasn Cristo chichame etserin asan, Cristonu ainaun: Yutasha tura umutisha surustaram timinuitjai. ⁵Tura Cristo akupkamu asan, nuwan nuwatkanka, nujai tsaniasan wekaasamnawaitjai. Chikich aints Cristo akupkamu ainu, tura ii Apuri Cristo yachí ainausha, tura Pedrosha ni nuwarijai wekajinawai. Tura asamtai wisha wakeraknaka turamnawaitjai.

⁶¿Atumka itiur nintimrume? Cristo akupkamu ainu ni uwejejai takakminachu wainiatrumek, atumka ni yuumamurisha suarme. Antsu wisha Bernabéjai atumin Cristo chichamen etseriatrik, iik takakmasar ii yuumamuringkia sumarmaji. ¿Nuka pengkerkai? ⁷Suntar nintimrarmi: ¿Aints suntar naamkau ni yutairin akiimiawak? Atsa, antsu suntara apuri ni yutairinka akiimiatui. ¿Tura ajartin ni ajarinian juuk yutsukek puja? Atsa. ¿Tura uwijartin ni tangkurin tsakatmaruka nuna muntsurin umutskek puja? Atsa, pachitsuk umawai. Tura asamtai Cristo: Wina chichamur

etserkataram tusa iincha akuptamkau asamtai, iisha Cristonu ainu yutairisha nangkamrik yuwamnawaitji, tura kuikian iin suraminamtaikia, iisha ii yuumamuringkia sumarmakminuitji. ⁸Junia aints nintimina nunisnaka tatsujrume. Antsu Moisés umiktin chichaman akupak nunasha timiayi. ⁹Yus umiktin chichaman akupkau asamtai, tu aarmawaitai: “Waaka trigo neren pakartas nájamtaikia, trigo pachitsuk yuwati tusaram jangkengka jingkiatawairap.”^c ¿Antsu Yus waakan nintimsang nunaka tímia? Atsa. ¹⁰Antsu iincha nintimtikramratas nunaka aatramramiaji. Nunaka taku tawai: Yuse chichame etserin Yuse takatrin takakmau asamtai, chikich ainuka Yuse chichamen antinau asar, ni yuumamurinha susartinuitai. Aints arakan araina nuka, tura neren juwina nuka mai metek yuwarmin ainawai.^d

¹¹¿Aints ajarin araamia nuna neren juuk yutsukek pujusminui? Atsa, pachitsuk yuwamnawaitai. Tura asamtai iikia Yuse chichame nekas pengker aa nu atumka nintimtikramu asaram ii yuumamurisha sukartusminuitrume. ¿Nuka paseekai? ¹²Iikia nu nangkamtaik atumin Cristonam uwemratin chicham etserkamiaji. Tura chikich ainu ukunam atumin Cristo chichamen nuitamrarmia nuka atumi yutairincha, tura atumi kuikiarin juwiarminia nunisrik iisha jukimnawaitji.^e

Turayatrik iikia turachmiaji. Antsu chikich aints itiurchat nintimsar antutan nakitrarai tusar, iikia waitnasar takakmasar ii yuumamuringkia sumarmiyuji. ¹³Nintimrataram: Yus seatai juun jeanam takakminausha chikich ainu Yusen susartas tangkun maawar itainaun nuna

b 9.1 (Hech. 9.3-6; 1.Cor. 15.8-10; Gál. 1.11-16)
e 9.12 (Rom. 15.27)

c 9.9 (Deut. 25.4) **d 9.10** (1.Tim. 5.18)

namangken yuu armiai. Sacerdote ainausha aintsu tangkurin maawar, Yusen susartas epeena nuna namangkencha yu armiai. ¹⁴Tura asamtai ii Apuri nu chichamnasha iin akupturmak: Aints ainau uwemratin chichaman antin ainauka Yuse chichamen etserin ainauka ni yuumamurin susarti timiai.^f ¹⁵Aintsu wikia chikich aintsun: Yuumamur surusta pengké tichamijai. Tura yuumamur surustaram tusanka atumniaka aatsujrume. Chikich ainaun: Yuumamur surusta takunka ínatsantrujai jakamin nekapchainjash? Aintsu chikich ainau kuikiarin jurukchau asan, pengker nintimsan warasan angkan pujajai.

¹⁶Ii Apuri Cristo: Uwemratin chicham etserkata tusa akuptuku asamtai, wi nu chichaman etserkunka: Pengkeraitjai tumamtsujai. Aintsu wi nu chichaman etsertsuk pujamtaikia, Cristo winaka wait wajaktiniun surustinuitai. ¹⁷Tura asamtai wi wakeraknaka Cristo chichamen etserkunka warasminuitjai. Tura Cristo: Wína chichamur etserkata turutin asamtai, wikia nakitaknasha ni chichamenka tuke umiktinuitjai. ¹⁸Tura wikia Cristonam uwemratin chichaman etserin asan, aints ainau akirkarti tuuka nintimtsujai. Aintsu chikich ainau wína akirtsuk antukarti tusan, pengker nintimsan nu chichaman etserjai. Nu uwemratin chichaman wi etsermatai, chikich ainau nu chichaman antukaru asar, nekasar wína akirkarminiun wainiatun nunaka pengké nakitajai.

¹⁹Wikia chikich ainau inatiringkia achayatnak, aints utsuri Cristo chichamen antukar uwemrarti tusan, mash aintsu inatiriya nunisnak pujajai.

²⁰Judío ainau Criston umirkarti tusan, wikia judío ainaujai iruntran, judío aintsua nunisnak pujuyajai. Tura Moisésa

chichamen umirin ainaujai iruntran, Criston umirkarti tusan, Moisésa chichamen umirnuyajai. Moisésa chichamen umirkunka, tuuka uwemrachmin ayatnak nunaka turinuyajai. ²¹Yus wína chichamur umirtuktaram tusa, chichaman akupkamia nuna umirin asan, Cristosha wína chichamur umirtukta tusa akuptukmia nuna umirkawaitjai. Tura Moisésa chichamen nekachu ainausha Criston umirkarat tusan, wikia Moisésa chichamenka nekachua nunisnak pujuyajai. ²²Tura Cristo chichamen miatrusarang umirkacharu ainausha miatrusarang Criston umirkarat tusan, nijai iruntran pujuyajai. Tura aints ainau mash uwemrarat tusan, judío ainau pujuinawa nunisnak nujai iruntran pujuyajai. Tura judfochu ainaujaisha nunisnak iruntran pujuyajai. Kichkikia menakar uwemrarmi tusan tu pujuyajai. ²³Tura aints ainau utsuri uwemrartin chichaman antukar uwemrarti tusan, wikia Cristonam jeanka winaka: Nekasam pengker umirtukmiame, turutmi tusan tu pujajai.

²⁴Aints ainau nekapnainak ampuinauka nekarme. ¿Yáachia eemak jeati? tusar ampukiar weenak, kichik aintsuk tsengkrutin jukitnun waininayat mash ampuinawai. Atumsha tsengkrutin jukiartas ampuina nunisrumek Cristo pengker umirkataram. ²⁵Aints nekapnaisartas eemkar jeartas wakerinauka, ii namangke kakarat tusar kintajai metek ampuinawai. Tura ampukiar: Wikia eemkan jeanka tsengkrutin jukitatjai, tu nintimsar turinawai. Tura nu tsengkruti jumchik arus minartinuitai. Tura iikia tsengkruti minartin aa nu jukitasrikia Cristoka umirtsuji. Aintsu nayaimpinam jeakrin, ii Apuri iin chichartamak: Atumka wina pengker umirtakrum

pujuyarme, iin turammi tusar wakeraji.
²⁶Aints ainau nekapnainak ampuina nuka nangkamiarka ampuinatsui. Aintsu nekapnainak, chikich nepetkami tusar nekapnainawai. Wisha nunisnak nangkamiar nasenam kutsma kutsma wajaina nunisnaka Cristonka umirtsujai. ²⁷Aintsu tunau wajasai tusan, wina wakeramur-naka najantsujai. Cristo chichamen etserin ayatnak, ni chichamen miatrusnak umirtsuk wi jakamtaikia, Cristo wina chichartak: Wina chichamur etsernutiatum ¿waruka miatrusmek umirtukchamiame? turuti tusan, Cristo chichamenak umirkatasan wakerajai.

Yuschau waininayat wina yusruitme tinu ainaun chicharkamuri

10 ¹Yatsur ainautiram umaartir-mesha, yamai taja nuka nintimrataran. Yaanchuik Moisés ii juuntri ainaun Egipto nungkanmaya jiikim, ii juuntri ainau mash mukuntijai wekaasarmiayi. Tura mash juun entsa japencha wekaasarmiayi. ²Ii juuntri ainau mash mukuntijai wekaasaru asar, tura juun entsanmasha mash wekaasaru asar, entsanam mainawa nunisarang: Wikia Moisésan nemarsatasan wakerajai tiarmiayi. ³Tura nayaimpinmaya yutanca mash yuwarmiayi. ⁴Turinam-tai Yus pampanmaya yumin akupkamtai, nu yumincha mash umurarmiayi. Tura Cristoka nu pampa nunisang aints jakaarchati tusa iwiaaku pujustinun suramji. ⁵Turamaitiat ii juuntri ainau Yusnaka pengkerka awasacharmiayi. Tura Yusen umirinachu asar, aints atsamanam unturi jakaarmiayi. ⁶Ii juuntri ainau ni wakeramurin najanawarmia nunisrumek tunau wakeru-

kairap tusa, Yus iincha nuitamratas wakerutmaji. ⁷Tura Yuschau waininayat ni yusrin ningki najanawar: Juka ii yusrintai tiarmia nunisrumka atumka tiirap. Yuse chichamesha tu aarmawaitai: “Nu aints ainau yutanca yuwar, tura umutnasha nukap umurar nunia wajakiar nakurusarmiayi,” tu aarmawaitai. ⁸Tura asamtai nuwajai turunitsuk asarmi. Ii juuntri ainau yaanchuik nuwajai turunawaru asar, kichik kintatik veintitrés mil (23,000) aints jakarmiayi. ⁹Tura ii juuntri chichainak: Wikia tunau turamtaikia, watska, Yus wait wakti-niun suruschanpiash, iisha nekapsami tu nintimsuk asarmi. Yaanchuik ii juuntri ainau nuna turinamtai, Yus napin aints ainaun esaiti tusa akuptukmiayi. Turamtai napi esainam unturi jakaarmiayi. ¹⁰Tura Yus pachisrum pasé chichakairap. Yaanchuik ii juuntri ainau Yusen kajerinak pasé chichasaru asaram-tai, Yus sungkanan ni awemamurijai akuptuk aints ainaun maamiayi. ⁹

¹¹Ii juuntri ainau turunamuri nintim-rarmi: Nu aintsua nunisrumek pujusairam tusar, Yuse chichame etserin ainau tu aarmarmiayi. Nungka amukatin jeatak wajasu asamtai, atumka tunau wajasairam tusa, Yus yamai pujuinautinka nuitamratas wakerutmaji. ¹²Tura asamtai aints: Wikia tunaunaka pengké turashtat-jai tauka anearti. Nisha ii juuntriya nunisang tunau wajastinuitai. ¹³Atumin nekapramsatin jeamtaikia: Wikiapi tu pujaja, tuuka nintimsairap. Chikich ainausha atumjai metek tu pujuinawai. Aintsu Yus tímia nunaka nekas umiktinui-tai. Satanás: Tunau turata, turamu wainiat, Yus atumin: Tunau wajasairam tusa yainmaktatrumek, nuniasha tunau

nepetkatarum tusa kakamtikramrata-trume.^p

¹⁴Aneetir ainautiram, nu nintimrau asaram, aints ni yusrin ningki najanina nuka nintimtutsuk asatarum. ¹⁵Atumka nekau asaram, wi taja nuka pengkeraitai tusaram nintimratnuitrume. ¹⁶Iikia Cristo jakamuri nintimsar, tura ni numpe numparmaurisha nintimsar, iisha iruntrar maaketai tiri, kichik piningjai umaji. Nu umakur Cristo nintimsar pujaji. Tura Cristo jakamuri nintimsar, kichik yurumkak yuwaji. Nu yuwakur Cristo nintimsar pujaji.^q ¹⁷Iikia untsuri ayatrik, Cristo jakamuri nintimtusar, kichik yutak yuwaji. Iikia mash Cristonu asar, kichik namangkea nunisketji.

¹⁸Israel ainau turamuri nintimratarum: Sacerdote tangkun maawar namangken Yusen maaketai tiartas yuu armiai. Tura tangku namangke Yus suamu yuwinau asar, Yusen nintimsar yuu armiai. ¹⁹⁻²⁰Wi yamai titatjarum nu nintimratarum. ¿Tangku namangken aints ni yusrin suwina nuka warimpita? Nuka aya tangku namangkentai. Antsu Yusen tenap nintimtichu ainau nangkamiar: Juka ii yusrintai tusar, ni yusrin ningki najanawariat, ni yutairincha maaketai tiartas suwinak ¿nekas Yusnak suwina? Atsa, nunaka Yusnaka suwinatsui, antsu iwianchin suwinawai. Tura asantai atumsha nu yuwau asaram, iwianch ainaujai tsaningtinuitrume. Antsu iwianch ainaujai tsaniasrum pujusairam tusan tajarme. ²¹Atumka Cristo jakamuri nintimsaram, umuti kichik piningjai umuru asaram, nuniangka iwianch susamuka umurchatnuitrume. Tura ii Apuri Cristo misarin yuwau asaram, nuniangka iwianch susamuka yuwashitnuitrume.^r

²²Ii Apuri Cristo umiriatur ¿nu inaisar ataksha iwianch umirkurin, ii Apuri kasmatramkatnukitai? Tura: ¿Ii Apuri nangkamasrik kakarmaitji timinkitai?

Angkan pujusrum aneenitaram timiauri

²³Chikich aints chichainak: Ii wakera-krikia pachitsuk mash turamnawaitji tina nuka nekasaintai. Antsu ii wakeraji nu mash turakrikia, chikich ainau yaingchatnuitji. Nekasar ii wakeraji nuka pachitsuk turamnawaitji, antsu nu pachitsuk turakrikia, chikich aints Cristonu ainausha miatrusarang Criston umirkarat tusar yaingtatkamarsa yuumataji.^s ²⁴Tura asar ¿itiur pujaknak pengkersha pujusaintaj? tuuka nintimtsuk, antsu ¿chikich aintsun itiur yaingkainjak? tu nintimratnuitji.

²⁵⁻²⁶Yuse chichame tu aarmawaitai: “Yus mash najanau asantai, iinu nungkarinkia Yusnawaitai. Tura ju nungkanam aa nusha mash Yusnawaitai.”^t Tu aarmau asantai, namang sumatinam tangku namangke sumaktasrum jearmeka, ¿aintsu yusri susamuashi? tuuka nintimtsuk sumaktaram. Tura sumakrum ¿juna yuwanka tunau wajaschatjash? tuuka nintimtsuk pachitsuk yuwatarum.^u

²⁷Cristo umirchau ainau: Wína jearun yuwita, atumin turaminamtaikia, atum wetasrum wakerakrumka yuutarum. Tura ni jeen yuwakrum: ¿Namangsha ii yuwaji juka ni yusrin maaketai tiartas maamuchuashi? tura ¿nuna yuwanka tunau wajaschatjash? tuuka nintimtsuk pachitsuk yuwatarum. ²⁸Turayat chikich aints ujatmak: Juka ni yusrin susatas maamuitai tusar ujatminamtaikia, chikich aints Cristo miatrusar umirchau ainau tunau nintimrarai tusaram, nu namangka yuwairap. ²⁹Atumka pachitsuk

yuwamin arumin, chikich ainau tunau nintimrarai tusan nuka yuwairap tajarme.^v

Antsu atumka chichaakrum: Wikia wína yutairun pachitsuk yuwamin aisha, chikich ainau: Nuka yuwachminuitme tinamtaisha ¿warukanak wikia yuwash-taj? ³⁰Wikia Yusen maaketai tusan, wina yutairun yuwamtaisha ¿itiuri chikich aints wína pachitas: Nuka tunau turayi, turutiarting? atumka timinuitume.

³¹Anturtuktaram. Atumi yutairi yuwakrumka, tura atumi umutiri umakrumsha, tura waring achat mash turakrumsha, aints ainau nuna mash wainkar: Yusen pengker nintimtusarat tusaram turataram. ³²Judío ainau, tura judíocho ainausha Criston umirtan nakitrarai tusaram, tura Cristonu ainau tunau wajasarai tusaram, tuke tu nintimsaram pujustaram. ³³Aints ainau tuke mash pengker nintimsar pujusarti tusan, tura wína pachitsar pasé chichar-tukarai tusan, wikia wína wakeramurnaka najantsujai, antsu chikich ainau unturi uwemrarti tusan, wikia aints ainaun yaingtasan wakerajai.

11 ¹Wikia Criston nemarkau asamtai, atumsha wiya nunisrumek chikich ainau yayaakrum Cristo nemarkataram tajarme.^w

Nuwa ainau Yuse jeen tu pujusartinuitai timiauri

²Yatsur ainautiram, wína tuke kajinma-trukchau asakrumin, tura wi atumin nuiniarmiajrume nuka miatrusrumek umirtuku asakrumin, wisha atumin pengker nintimtajrume. ³Tura chikich chichamnasha atumin nekamtikiatasan wakerajrume. Anturtuktaram: Cristo ni Apaachiri Yusnak umirnitai. Tura Cristo umirin ainautikia mash ii Apuri Cristok

umirnitai. Tura Yus wakerau asamtai, nuwa ainau ni aishrinak umirin ainawai.

⁴Tura aishmang ni nuwarin inartin asa, Cristonu ainau iruntramunam Yusen aujsatas, tura Yuse chichamen etserkatas tarachin nukumak wajaska, nuwa tumau wajau asa nuka natsanpiakuitai. ⁵Antsu nuwa aishrintin Cristonu ainau iruntramunam tarachin nukumatsuk Yusen aujsatas tura Yuse chichamen etserkatas wajacka, aishmangkua nunisang wajau asa nuka natsanpiakuitai. Nuna turakka intashi awamrawa tumawaitai.

⁶Tura asamtai nuwa Cristonu ainau iruntramunam tarachin nukumatsuk wajastas wakerakka, intashincha awartinuitai. Antsu nuwa intashin awarka nuka natsanpiakuitai. Tura asamtai nuwa aishrinak umirin asa, Cristonu ainau iruntramunam tarachin nukumaktinuitai. ⁷Yus aintsun najana chicharak: Ju nungkanam ainia nuka wiya nunismek mash inarta timiau asa, aints waring achat Yus najanamia nunaka mash inartinuitai. Tura asa tsengkrutin tsengkrutsuk wajastinuitai. Turamtai nuwa aishrin pengker umirak pujacka, aishrin pengker awajsatnuitai. ⁸Yus aintsun najanak aishmangnaka nuwanmayanka najanachmiayi, antsu aishmangkun eemak najana, pajen kuitak nuwanka uku najanamiayi. ⁹Aishmang nuwan umirkat tusangka Yuska najanachmiayi, antsu nuwa aishmangkun umirkat tusa najanamiayi.^x ¹⁰Tura asamtai nuwa aishrin umirak pujacka, Yuse awemamuri ainau nuna wainkar: Nu nuwaka aishrin umirui tiarat tusar tarachin nukumaktinuitai. ¹¹Antsu mai ii Apuri Cristonu asar, aishmangtisha iikikia Cristoka umirkash-tinuitai. Tura nuwa ainausha ningkikia Cristonka umirkachartinuitai. ¹²Nu

ngankamtaik Yus nuwan aishmangnumia najanamiayi. Turayat aishmang ainausha nuwanmaya akiininawai. Antsu Yus mai najanamiayi.

¹³Atumek nintimrataram. Cristonu ainau iruntramunam nuwa tarachin nukumatsuk Yusen seakka ¿nuka pengkerkai? ¿Atum ainautiram nuka napchawaitai tatsurmeash? ¹⁴Corintonmaya ainautiram, aishmang ainau nuwa nunisarang intashin sarman tsakatmarantaikia, ¿nuka natsanpiakuitai tatsurmek? ¹⁵Antsu nuwa intashi tarachjai nukukmawa nunisang ati tusa, Yus nuwa intashin sarman najatamiayi. Turamu asa nuwa intashpikia nekas pengkeraitai. ¹⁶Antsu chikich ainau ju chichaman umitan nakitinamtaisha, wikia nunaka pachiatjsai. Iikia Cristonu ainau iruntramunam tuke tu nintimsar pujaji. Tura Cristonu ainau chikich nungkanam pujuinausha nunisarang nintiminawai.

Yuse misari pachisar nuikiartamu

¹⁷Yamaikia chikich chichaman atumin aatratan wakerajrume. Yuse misari yuwatasrum iruntraram pujakrumsha, Cristo miatrusumek umirkatasrumka iruntsurme. Tura irunkurmesha pasé pujau asakrumin: Atumka pengker turarme tatsujrume. ¹⁸Wi anturkamjarme nuka nuwaitai: Cristonu ainautirmin pachitmasar: Iijai iruntrar yuwami tiariat kanakar yuwinawai. Nu tamaun antukan, nekasashi tu nintimsan pujajai. ¹⁹Chikich aints ainau: ¿Yaachik Yusen miatrusang umirak puja? tusar paan nekarawarti tusaram, atumka kanákrum pujarme. Antsu ¿kanákrum pujakrumsha nekasrum pengkerak pujaram? Atsa. ²⁰Tura iruntai jeanam wayaaram kanákrum yuwakrumka, atumka Cristo jakamuri

nintimtusrumka Yuse misari yuwatasrumka iruntsurme. ²¹Antsu kichik kichik eemkar jear, kichnaka náksatsuk, ni yutairin kichnaka jamtsuk yuwinawai. Tura eemkar jearma nusha umutirin nukap umuru asar nampekar pujuinawai. Antsu uku jearuka yutsuk pujuinawai. ²²Tu yuwatasrum wakerakrumka, tura tu umurtasrum wakerakrumka ¿warukaya atumi jeening kanákrum yuwatsrum? Cristonu ainau iruntramunam tu yuwakrumka nuka natsanpiakuitai. Tura yutan jumchik itarusha inatsaarme. ¿Tura asakrumin warintajrumek? ¿Pengker turarme titajrumeash? Atsa, nunaka tatsujrume.

Yuse misari yuwatin pachisar etserkamu
(*Mat. 26.26-29; Marc. 14.22-25; Luc. 22.14-20*)

²³Ii Apuri chichamen wína ujatkaru asaramtai, wi atumin ujakmiajrume nu kajinmatsuk asataram tusan tajarme: Ii Apuri Jesúsán nu kashi surukarmia nuni ii Apuri yurumkan achik, ²⁴Yusen maaketai tusa puuk: “Ju yuwakrum wína namangkur nintimrataram. Wikia atumin uwentikratan jakatatjai. Ju yuwakrumka tuke wína jakamur nintimrataram,” timiayi. ²⁵Tura piningnasha achik Yusen maaketai tusa chichaak: “Ju umuti umakrumka, wína numpar nintimrataram. Wína mantinamtai, atumi tunaari sakartaj tusan wína numpar numpartatui. Tuke ju umuti umakrumka wína nintimtursaram umurtaram,” timiayi. ²⁶Tura asamtai ii Apuri taatsaing, nu yurumak yuwakrumka, tura nu umutisha umakrumka: Ii Apuri Cristo iin uwentikramratas jarutramkamiaji tu nintimratnuitrume.”

¿Yuse misari itiu yuwatnuitji?

²⁷Tura asamtai aints ii Apuri jakamuri nintimtsuk, nu yurumkan yuwauka, tura

nu umutinja umauka, ii Apuri iin jarutramkau wainiat, ni jakamurin nintimsuk yuwau asa tura nintimsuk umuru asa, ningki wiasmatmamkatatui. ²⁸Antsu aints Yuse misarin yutsuk: ¿Tunaar atsuash? tu nintimias ningki ni nintin iwiaratnuitai. Nunia nu yurumkancha yuwatnuitai, tura nu umutnasha umurtinuitai. ²⁹Cristo nu aintsu tunaarin sakturtas jarukmaitiat, aints nuna nintimsuk nu yurumkancha yuwa, tura nu umutnasha umur, ni wait wajaktiniun jurumaktias turawai. ³⁰Tura asamtai atumjai iruntrar pujuinau untsuri kakaichu ainawai, tura najaiminawai. Tura chikich ainausha jakaru ainawai. ³¹⁻³²Antsu Yusen umirchau ainaujai metek ji kajintrashtinnum mengkakarai tusa, ii Apuri Cristo ni nemarnutinka: Tunau inaisataram tusa, iin wait wajaktiniun suramji. Tura asamtai ii tunaari mash nintimrar: Wikia tunaawitjai, antsu wina tunaarunka mash inaisatjai tinu asakrin, Yuska iinka wait wajaktin-naka suramsashtinuitji.^z

³³Yatsur ainautiram umaarutirmesha, iruntai jeanam Yuse misari yuwatasrum irunkurmeka, mash kaunkarti tusaram nakastaram. ³⁴Atumka wait wajaktin jurumakiram tusan nunasha tajarme. Antsu aints yaparacka, ni jeen yuwatnuitai. Tura chikich chicham atum aattrumarume nunaka atumin jean chicharkatatjarme.

Yuse Wakani sukartusmauri pachis etserkamu

12 ¹Yatsur ainautiram, umaarutirmesha, Yus ni aintsri ainautin: Wina takatur pengker takakmastaram tusa, ni Wakani sukartusmauri pachisrum nekaataram tusan ujaktatjarme.

²Atumka yaanchuikia Cristo umirchau asaram, atumi yusri aints najanamu

wainiatrumek umirkuram pujuyarme. Nusha aints najanamu asar chichachu armiyai. Atumka nusha nekarme. ³Tura asakrumin ¿yaachia nekas Yuse kakarmarijai chichaa? tusan nuna nekamtikiatasan wakerajrume. Yuse Wakani nintimtikramu asar, aints kichkisha: Jesúska yumingkramu ati ticharminuitai. Tura: Jesús wina Apuruitai, tinauka aya Yuse Wakani nintimtikramu asar tiartinuitai.

⁴Yuse sukartusmauringkia untsuri ayat nuna sukarta nuka kichik Yuse Wakani nuketai. ⁵Tura Cristonu ainauti takatri untsuri irunu wainiat, kichkin kichkin ni takatrin sukartinka kichik ii Apuri Cristo nuketai. ⁶Tura Cristonu ainauti untsuri ayatrik, kichik kichik metekchau ni takatrin takakmasarti tusa, iin kakamtikramratnuka kichik ii Apaachiri Yus nuketai. ⁷Yus mash pengker yainiktaram tusa, Cristonu ainautinka kichik kichik ni Wakanin suramji. ⁸Tura asamtai Yuse Wakani chikich ainautinka Yuse chichamen nekas pengker etserkarat tusa nekamtikramji. Tura chikich ainauncha Yuse chichamen pengker nuiniarat tusa nintimtikramji. Tura nu aintsun ni nekamtairin suwa nuka Yuse Wakanintai. ⁹Tura chikich aints ainautincha nekaachmin arining, Yuse Wakani ni wakeramurin nekamtikramji. Tura chikich aints ainautincha jau ainauncha tsuwararat tusa kakamtikramji. Tura nu aintsun ni kakarmarin sua nuka Yuse Wakanintai. ¹⁰Tura kichnasha wainchatai takat turatnun suawai. Tura kichnasha ukunam atiniun pachis chichamen paan etserkatnun suawai. Tura kichnasha Yuse Wakani turamu nekamtikiatnuncha, tura pasé wakantrintin nekamtikiatnuncha suawai. Tura kichnasha niish chichamtiksatnun suawai. Tura kichnasha niish

chichainaun paan nekamtikiatnun suawai. ¹¹Tura Cristonu ainautin Yuse Wakani nuke takamtikui. Tura ningki wakerak, ni takatri takakmastinun kichik kichik suramji.^a

Cristonu ainautikia kichik namangkea nunisrik aji

¹²Nintimraram. Iinu namangke kichikiat aintsti muchitmauri untsurintai. Tura untsuri ayat, mash iruram kichik aintsu namangentai. Cristo nemarnutisha nunisrik untsuri ayatrik Cristonu asar, mash iruram kichik aintsu namangkea nunisrik aji.^b ¹³Cristonu ainautikia untsuri nungkanmaya ainiaji. Judíofsha, tura judíochu ainausha Criston namarin irunui. Tura aintsu inatiri ainausha, tura aintsu inatirinchu ainausha Criston namarin irunui. Tura Yuska: Kichik namangkea nunisrumek ataram tusa, ni Wakani ni nintin piatkamiayi.

¹⁴Aintsti namangke muchitmauri kichikchuitai. Antsu untsurintai. ¹⁵Tura asamtai aintsu nawe nintimrarmi: Aintsu nawe chichakchamin ayat: Wikia aintsu uwejenchuitjai. Tura asan takakmaschamnawaitjai tayat ¿aintsun yaingchamnaukai? ¹⁶Tura aintsu kuwishi nintimrarmi: Nusha chichakchamin ayat: Wikia aintsu jiinchuitjai. Tura asan aintsun yaingchamnawaitjai tayat ¿aintsun yaingchamnaukai? ¹⁷Antsu iikia jiik jiik akurkia, ii kuwishi atsamtaikia ¿itiur antuktinuitji? Tura ii kuwishik kuwishik akurkia, ii nuji atsamtaikia ¿itiur nekapatnuitji? ¹⁸Yuska ningki wakerau asa, aintsti muchitmaurin niish niish metekchau ati tusa najanamaiyi. ¹⁹Aintsti muchitmauri atsamtaikia ¿iinu namangke itiu muchitkating? ²⁰Antsu Yus ii muchitmaurin untsurin najanamai-tiat, iinu namangke kichikiat.

²¹Ii jingkia pengker ataing, ii uwejesha yuumaji. Tura ii muukeshu pengker ataing, ii nawesha yuumaji. Yus ni umirkautinka mash metek takakmasmin-trum tusangka najatmachmiaji. Antsu mash metekchau asaram, kichik kichik wína takatrun takakmasmintrum tusa, iinka najatmamiaji. Tura asamtai Cristonu ainautikia: Aminka yuumats-jame tunaichamnawaitji. ²²Antsu aintsti namangke muchitmauri kakaichu wainiatur nukap yuumaji. ²³Ii muchitmauri mianchau ainia nu natsantakur jiirsarai tusar nukumaji. Tura nu muchitmau natsanpiaku ainu waitkarai tusar tenap nukumaji. ²⁴Antsu iinu muchitmauri natsanchawa nuka nukumatsji. Tura asakrin Cristonu ainautin mianchau arin wainiat, Yus iin najatmau asa: Ameka nekas pengkeraitme turamji. ²⁵Tura asamtai suwirpiakuka jiinitsuk pujustinuitji. Antsu Cristonu ainautikia mash metekchau ayatrik, pengker nintimrarmi iruntrar pujasar, Cristonu ainaujiaingka yainin atinuitji. ²⁶Cristo namarin kichik wait wajamtaikia, Cristonu ainautisha mash ni wait wajamuri nintimtusminuitji. Tura Cristo namarin chikich wara warat pujamtaikia, Cristonu ainautisha nunisrik wara warat pujusminuitji.

²⁷Tura atumsha kichik kichik Cristo namarin asaram, mash iruntraram Cristonuitrume. ²⁸Tura Cristonu ainautin: Winia takatur takakmastaram tusa, Yuska ni kakarmarin suramsamiaji. Chikich takatan nangkamasang Cristo akupkamu ainaun ni takatrin susamiayi. Tura Yuse chichamen etsernuncha ni takatrincha susamiayi. Tura Yuse chichamen nuikiar-tinnasha ni takatrincha susamiayi. Tura chikich ainu wainchatu takatan

turawarti tusa, ni kakarmarincha susamiayi. Tura chikich ainau jau ainaun tsuwararti tusa, tura chikich ainau Cristonu ainaun yaingkiarti tusa, ni kakarmarincha susamiayi. Tura Cristonu ainaun pengker inararti tusa, chikich ainauncha ni kakarmarin susamiayi. Tura chikich niish chichau ainaun tu chichasarti tusa chichamtikiamiayi.^c

²⁹¿Cristonu ainauti mashik Cristo akupkamu ainaij? Atsa. ¿Tura mashik Yuse chichame etserin ainaij? Atsa. ¿Tura mashik Yuse chichame nuikiartin ainaij? Atsa. ¿Tura mashik Yuse kakarmarijai wainchatai takat takau ainaij? Atsa. ³⁰¿Tura mashik Yuse kakarmarijai jau ainausha tsuwau ainaij? Atsa. ¿Tura mashik niish chichau ainaij? Atsa. ¿Tura mashik nu chichamnasha nekamtikin ainaij? Atsa. ³¹Antsu mash Cristo sukartusmauri pengker ainia nu wakerin ataram. Tura itiur timiá pengker pujusmi-nuitrume tusan, yamaikia atumin nekamtikiatasan wakerajrume.

Nekas aneenitnun pachis timiauri

13 ¹Wikia junia aints ainau chichamen untsuri chichaayatnak, tura Yuse awemamuri chichamencha chichaayatnak, chikich ainaun aneetsuk pujaknaka nangkami chichainjai. Tura tampur mesramu nangkami tuntuyamua nunisnak pujuinjai.

²Tura Yuse chichamen nekas pengkeran etseriatnak, tura chikich ainau nekaachminun wainiatnak, Yus nekawa nunisnak mash nekayatnak, tura Yusen nintimsan ni kakarmarijai muran muchkiamin ayatnak, chikich ainaun aneetsuk pujaknaka wikia nangkamnak pujuinjai.^d ³Tura winar aa nunaka yuuminan mash suayatnak, tura Yusen pengker awajsatasan wina namangkrun

astuwarti tayatnak, chikich ainaun aneetsuk pujaknaka, pengké nangkamin tajai.

⁴Antsu aints ainaun itiur aneetnuita tusan yamaikia ujaktatjarme. Antuktar: Chikich ainaun aneauka pasé awajinamsha pachichuitai, antsu wait anentratnuitai. Tura chikich ainauncha suwirpiakuka jiichuitai. Tura: Miajuitjai tumamtsuk pujuwitai. Tura chikich ainaun pachis: Nuka mianchawaitai tutsuk pujuwitai. ⁵Tura chikich ainaun aneauka natsanta nunaka turichuitai. Tura ninunkeka nintimchawaitai. Tura kajechuitai. Tura ni pasé awajinamsha yapajmichuitai. ⁶Tura chikichan pasé awajinamtaisha warartichuitai. Antsu nekas chichaman antuk waras pujuwitai. ⁷Chikich ainaun aneauka, niincha pasé awajinamsha tsangkurnuitai. Tura chikich ainaun aneauka ni chichamencha antuk: Nekasainta tusa pujuwitai. Antsu tunau ainaun pachis: Nuka tunaarin inaisarti tusa nakawaitai. Tura chikich ainau pasé awajinamsha, kajertsuk jaimias tsantratnuitai.

⁸Nekas aneenitka tuke atinuitai. Ju nungka amukamtaikia, Yuse chichame etsermauka atsutnuitai. Tura chikich chichamjai niish chichastinaka inaisartnuitai. Tura Yusnum jearkia, mash aa nu nekau asar nekatka yuumakchatnuitji.

⁹Antsu yamaikia mashkia nekatsji. Tura Yuse chichamengka miatrusrikia etsertsuji. ¹⁰Antsu ii Apuri taamtaikia, iikia mash paan nekaatnuitji. Tura ju nungkanam nintimtaingkia amukatnuitai.

¹¹Yaanchuik uchi akun, uchua nunisnak chichaiyajai. Tura uchi nintimina nunisnak nintimnuyajai. Tura uchi nekainawa nunisnak nekaiyajai. Antsu yamaikia juun asan, uchi akur nintimtainka inaisawaitjai. ¹²Tura

asamtai yamaikia ispi kusurujai paanchau wainmamji nunisrik jumchik nekaji. Antsu ukunam ii Apuri ii nintimaurin mash aa nuna nekau asa nu taamtaikia, iisha nunisrik ii nekachmau aa nusha mash paan nekaatnuitji.^e

¹³Tura asamtai kempatam tuke amukashtin ainia nuka juwaitai: Yus nekasampita tusar nintimtustin, tura ukunam atata nu nakastin, tura Yuscha tura aintcha aneakur pujustin. Antsu anengkrataingkia mash ainia nuna nangkamasang timiá pengkeraitai.

Aints niish chichastinun pachis etserkamu

14 ¹Tura asamtai chikich ainaun nekasan aneetasan wakerajai, tu nintimsaram pujustaram. Tura Yus ni sukartusmauri surusti tusaram wakeruku ataram. Takat timiá pengker aa nuka Yuse chichame etsernu takatrintai. ²Antsu aints niish chichauka, chikich aints antukarti tusangka chichaatsui, antsu Yusjai chichaawai. Tura Yuse Wakani niin chichastinun sua nunaka chikich ainu antinachu asar: ¿Warintua? tusarsha nekaachartin ainawai. ³Antsu aints Yuse kakarmarijai Yuse chichamen etserkungka, chikich ainaun kakamtikratas, tura Criston miatrusarang umirkar pengker nintimsar pujusarti tusa etserui. ⁴Aints chichaman nuimiarchayat niish chichauka: Wikia miatrusnak Yusen umirkatasan wakerajai tawai. Tura aints Yuse chichamen paan antumain etserkungka, Cristonu ainu mash miatrusarang Yusen umirkarat tusa nu chichamnaka etserui.

⁵Tura asamtai atumka chikicha chichame nuimiarchayatrumek, mash tu chichasmintrum tusan wakerajrume. Tura nuna nangkamasrumek Yuse chichame mash paan etserkataram tusan wakeraj-

rume. Yuse chichame paan etserkatin timiá pengkeraitai. Antsu niish niish chichastinka chikich ainu antinachu asaramtai nuka mianchawaitai. Antsu aints antukchamniaun chichaamtai, chikich aints: Tu taku tawai tusa, paan antukminun etsermataikia, Cristonu ainu nu chichamnasha paan antukar nintimrartinuitai. ⁶Yatsur ainautiram, umaarutirmesha nintimrataram. Wikia atumin irakun chikich chichamjaingkia antukchamniaun chichaamtaikia, ¿warintua tusaram, itiur nekaatrumek? Antsu Yus wina nekamtikruamia nuna paan etsermataikia, tura wi nekaja nuna paan etsermataikia, tura ukunam atata nuna pachisan wi etsermataikia, tura chikich chichaman wi atumin nuiniakun pujamtaikia, mash paan antukrum Cristo miatrusrumek umirkatnuitrume.

⁷Nangku umpuamu tura arawir tuntuyamu nintimrarmi. Aints yumatayat nangkami nangkun umpuamtaikia, nunaapi umpuawa tusarkia nekaachminuitji. Tura yumatayat arawiran nangkami tuntuyamtaikia, nunaapi tuntuyawa tusarkia nekaachminuitji. ⁸Tura suntar ainu nintimrarmi: Suntar ainu mesetnum weartas maanit nangkamami tusar, maaniakur kantamtain pupuntrijai pupuntrinawai. Tura suntar nangkami pupuntrin pupuntramtaikia, suntar ainu nuna antukar, ¿itiur maanitnasha nangkamawarting?

⁹Atumsha nunisrumek chikich ainuajai chicham antukchamin chichaakrumka ¿chikich ainu atumi chichaamurincha itiur anturtamkarting? Atum antukchamin chichau asaram nangkamrum chichaarme.

¹⁰Nekas chikich nungkanmaya ainausha niish niish chichainau untsuri irunui. Tura nu chichaman nekainauka

mash paan antukmin ainawai. ¹¹Antsu wikia chikich nungkanmaya aintsu chichamen antachkunka ¿warinkung taj? tusanka nekaachminuitjai. Tura anturnai-kiachmin asamtai, chikich nungkanmaya aintsu chichamen niish chichau asa wi chichaamurnaka nekatsui. ¹²Tura atumka Yuse Wakani sukartusmaurin timiá wakerau asaram, Cristonu ainau miatrus-rumek kakamtikratasrum takat timiá pengker aa nu wakerin ataram.

¹³Tura asamtai Cristonu ainau iruntramunam aints niish antukchamin chichauka, chikich ainausha antukarti tusa, Yus nu chichamnasha nekamtikiawarat tusa Yusen seatnuitai. ¹⁴Yuse Wakani wína chichamtikrau asamtai, wikia chikich chichamjai Yusen seaknaka ¿warintajak? tusanka nintimsujai.

¹⁵¿Tura wisha itiurkatjak? Yuse Wakani wina chichamtikrau asamtai, nu chichaman nekachiatnak Yusen seatatjai. Tura wína chichamrujaisha paan nintimran Yusen seatatjai. Tura: Yuse Wakani wína kantamtikrau asamtai: ¿Warí kantanak kantamataj? tusan nunasha nekachiatnak kantan kantamatatjai. Tura paan nintimsan kantancha kantamatatjai. ¹⁶Tura Yuse Wakani atumin chichamtikramau asamtai, Yus seakrum: Maaketai tinu asakrumin, chikich ainau atum Yus seamun antinayat: ¿Warintua? tusan nekainachu asar Yusen: Maaketai ticharmin ainawai.

¹⁷Atumka nekasrum Yus maaketai tarumning, chikich ainausha: ¿Warintua? tusan nekainachu asar, Criston miatrusar umirkartatkamawar tujintinawai. ¹⁸Wikia atumin nangkamasnak chikich ainau chichame nuimiarchau ayatun unsuri chichaajai. Tura asan Yusnaka maaketai tajai. ¹⁹Antsu chikich aintsu chichamejai antukchamin nukap chichaayatnak,

chikich ainau nunaka antinachu asaram-tai nangkamnak chichaajai. Antsu Cristonu ainau iruntramunam wikia jumchik chichamnak paan antukminun etserkunka, Criston miatrusarang umirkarti tusan wakerajai.

²⁰Yatsur ainautiram umaarutirmesha, uchi ainau nintimina nunisrumka nintimrairap. Tura uchichia nunisrumek nintimkurmesha, tunauka nintimsuk asataram. Antsu atumka juun asaram, juun ainau nintimina nunisrumek nintimrataram. ²¹Yuse chichame tu aarmawaitai. Yus chichaak: “Chikich nungkanmaya aintsu chichamejai wína aintsur ainaujai chichastinuitjai. Tura waininayat wina chichamrunka antukchartinuitai,” timiayi. Tu aarmau asamtai, Yus ni aintsri ainaun chikich ainau chichamejai chichamtikui tusan nekaatnuitjai. ²²Tura asakrin Cristonu ainau iruntramunam aints chikich aintsu chichamejai antukchamin chichauka, Cristonu ainau uwemrarat tusangka chichamtiktusi. Antsu Cristo umirchau ainau nuna antukar: Yuska nekas juuntapita tiarat tusa, Yus chikich aintsu chichamejaikia chichamtikui. Tura Yuse chichamen paan antukminun etseruka, Cristo umirchau ainau Criston miatrusarang umirkarat tusangka chichamtiktusi, antsu Cristonu ainau Criston miatrusarang umirkarat tusa chichamtikui. ²³Tura asamtai Cristonu ainau iruntramunam mash Yuse kakarmarijai niish niish chichau asakrumin, chikich aints Yuse chichamen nekachu tura chikich aints Criston umirchau nuni wayaangka, atumin pachitmasar: ¿Waurinatsush? tiartinuitai. ²⁴Antsu mash iruntrar Yuse kakarmarijai Yuse chichamen etserinam-taikia, Cristo umirchau tura Yuse chichamen nekachusha nuni wayaangka,

nuna antuk ni tunaarin nintimias: Wisha tunaawitjai titinuitai. ²⁵Tu tinu asamtai nu aintsu nintimaurin paan nekaatnuitai. Tura asamtai nuka ni tunaarin mash etserak, Yusen maaketai titas tikishmatar: Yus nekas atumjai pujawai turamtinuitai.

¿Cristonu ainau iruntramunam itiu pujustinuita?

²⁶Yatsur ainautiram, Cristo umirin iruntramunam pujakrumka, chikich aints Yus kantan pengker kantamui, tura chikitcha Yuse chichamen pengker nuiniawai, tura chikitcha Yus niin nekamtikiamu asa, ni chichamen pengker etserui. Tura chikitcha antukchamin chichaayat, Yuse kakarmarijai niish chichaawai. Tura chikitcha nu chichaman paan antuku asa, nuna taku tawai tusa paan etserui. Mash iruntram tu pujakrumka, Cristo miatrusrik umirkarmi tusaram turataram. ²⁷Aints Yuse kakarmarijai antukchamin chichainauka, jimiarchiksha, tura kempatmaksha chichasarti. Tura kitcha chichas umisam-tai kitcha chichasti. Tura kichka nu chichamnaka paan antau asa, nuna taku tawai tusa etserkatnuitai. ²⁸Tura nuna taku tawai tusa etserkamin atsamtaikia, Cristonu ainau iruntramunam chicham antukchamnaujaingkia chichakchatnuitai. Antsu aints ningki kanák pujus, chicham antukchamin aa nujai Yusnaka seatnuitai. ²⁹Tura aints jimiarchiksha, tura kempatmaksha Yuse kakarmarijai Yuse chichamen etserkartinuitai. Turinamtai ¿pengkerashi? tusar chikich ainausha nekaawartinuitai. ³⁰Tura chikich aints Yuse chichamen antú pujaun Yuse Wakani chikich chichaman chichasti tusa nintimtikramu asa, eemak chichauka itatkatnuitai. ³¹Yuse chichamen tu etserkatasrum wakerakrumka, mash nuimiararti tusaram, tura mash miatrusa-rang Criston pengker nintimsar umirkarti

tusaram, kichik kichik Yuse chichamen etserkiram jeekatarame tajarme.

³²⁻³³Yuska pachim chichamnaka nakitawai. Antsu pengker nintimsaram angkan pujustaram tusa wakerawai. Tura asamtai Yuse chichamen etserin ainauka, Yus ni chichamen nintimtikramu asar, nu chichamnaka etserkartinuitai. Antsu nintimsukka nangkamiarka chichakchartinuitai.

Chikich nungkanam Cristonu ainau iruntramunam turina nunisrumek atumsha turatnuitrume. ³⁴Cristonu ainau iruntramunam nuwa ainau chichakcharti tusar surimkamuitai, antsu Yuse chichame aarmawa nunisarang chichatsuk takamtaik antukartinuitai. ³⁵Cristonu ainau iruntramunam nuwa chichaaka mianchawaitai. Tura asamtai nuwa tenap antukchau asa inintrustas wakerakka, ni jeen wakетки, ni aishrin nuni iniastinuitai.

³⁶Ju chichamsha nintimrataram. Yus atumin chikich ainaun nangkamaskeka ni chichamen nekamtikramachmiarume, tura atumkeka ni chichamenka jukichmiarume. ³⁷Aints: Wikia Yuse chichame etsernuitjai tauka tura: Wikia Yuse kakarmarijai Yuse takatrin takawitjai tauka atumin aatjarne nuna nintimias: Yus akupkamu asa aaweawai tusa paan nekaatnuitai. ³⁸Tura wína pachitas: Cristo akupkachmawaitai turutuka nuka Cristo akupkachmawaitai.

³⁹Yatsur ainautiram, Yuse chichame etserkatin wakeruku ataram. Tura aints niish chichaamtaisha, antukchamin ayatrumek suritkairap. ⁴⁰Cristonu ainau iruntramunam aints ainau kaunkaramtaisha, pachim chichamka chichatsuk, pengker nintimraram wi taja nuka mash umirkuram turataram tajarme.

Cristo jakamunmaya nantakmiauri

15 ¹Yatsur ainautiram umaarutirmesha, yamaikia chikich chichamnasha atum kajinmakiram tusan,

atumin nintimtikrasatan wakerajrume. Uwemratin chichaman atumin etserkamiaja nusha jukimiarume. Tura asaram nu chichamka umirume. ²Tura nu pengker chichamnasha wi atumin ujakmiajrume nu tuke inaitsuk nintimtau asaram uwemrarume. Antsu nu chicham umitsuk pujakrumka, Cristo nekasampita nangkamrum tiintrume.

³Chicham timiá pengker aa nuna antuku asan, wikia atumin ujakmiajrume nuka nuwaitai. Yuse chichame aarmawa nunisang Cristo ii tunaarin akiimiatramkatas jarutramkamiaji.^g ⁴Turamtai ni namangkenka iwiarsarmiaji, turamaitiat Yuse chichame aarmawa nunisang kempatam kinta jaka tepayat ataksha nantakmiaji.^h ⁵Nunia Pedro wina waitkat tusa Cristoka wantintukmiaji. Tura ni nuiniatiri ainaw: Wina waitkarat tusa ataksha wantinkamiai.ⁱ ⁶Tura ataksha cinco pachak aints nangkamasarang ni nemanin ainaun Cristoka wantintukmiaji. Tura nu wantintukmau ainauka yamaisha untsuri iwiaaku ainayat, jumchik jakaru ainawai.^j ⁷Nuniasha Santiago wina waitkat tusa Cristoka wantintukmiaji. Nuniasha ni nuiniatiri ainaun mash: Wina waitkarat tusa wantinkamiai.

⁸Tura nukap arus wikia Cristo kajerin aing, wina eatak: Chichamur etserkata tusa, Cristo winasha wantinturkamiai.^k ⁹Wikia Yuse umirin ainaun kajerakun, wait wajaktiniun sukartin asan yamaikia natsaamakun, Cristo akupkamuitjai tumamchamnawaitjai. Tura asamtai chikich aints Cristo akupkamu ainaw wina nangatuku ainawai.^l ¹⁰Antsu Yus wina wait anentruru asamtai, wisha Cristo akupkamuitjai. Tura nangkamnaka winaka pengkerka awajtuschamiai. Tura wiki nintimsanak Cristo takatrin

takakmaschamiai. Antsu Yus wina wait anentruru asamtai, Cristo nuiniatiri nangkamasnak Cristo takatrinka takakmi-nuyajai. ¹¹Tura Cristo chichamen wi etserja nuka tura chikich aints Cristo chichame etserina nusha mai metek pengker ainawai. Tura atum Cristo nantakmiau pachisar etsermau antuku asaram, Cristo nekasampita timiarume.

Jakausha nantaktinuitai tusa etserkamu

¹²Iikia chicham Cristo jakamunmaya nantakmiauri pachisar etserji. Nu etserkamu antuku arumning, atumjai pujuinau chichainak: Jakau ataksha nantakchatnuitai útweena nunasha warukaya tuweenawa? ¹³Tura aints jakamunmaya nantakchamin awaitmatikia, Cristosha jakamunmayanka nantakchau ayi. ¹⁴Tura Cristo nantakchawaitmatikia, ii etserji nuka nangkamir etserinji. Tura atumsha nangkamrum: Cristo nekasampi Yuse Uchirinta tiintrume. ¹⁵Nu nekasainmatikia, Yus Criston jakamunmaya inankimiai, takurkia anangmawainji. Tura jakau ainaw nantakchamnawaitmatikia: Yus Criston jakamunmaya inankichu ayi. ¹⁶Tura jakau nantakchamnawaitmatikia, Cristosha nantakchau ayi. ¹⁷Tura Cristo nantakchawaitmatikia, atumsha Cristo nekasampi Yuse Uchirinta nangkamrum tiintrume. Tura atumi tunaari sakarchau asamtai, atumka tuke tunaarintin aintrume. ¹⁸Nu nekasainmatikia Cristonu jakaru ainaw tuke mengkaru aintai. ¹⁹Iikia Cristonu asar iwiaaku pujakrikia, nijai tuke pujustin nakaji. Antsu ii jakar nantakchamin akurkia, chikich ainaun nangkamasarang iin timiá wait anentramrarminuitji.

²⁰Antsu tuuka nintimrashtinuitji. Chikich jakaru ainaun nangkamasang Yus

nuná eemak Criston nekas jakamunmaya inankimiayi. Tura asamtai Cristonu ainauti jakakrincha, iincha nunisang inantamkitnuitji. ²¹⁻²²Nu nangkamtaik Yus aints Adán naartinun najanamia nu tunau wajas jakau asamtai, mash nungkanmaya aints ainau tunau asar jakartin ainawai. Tura wainiat Cristo jakamunmaya nantakin asamtai, Cristonu ainautikia mash Cristoa nunisrik nantakiartin ainiaji. Tura asamtai kichik aints Adán naartinjai jakatin nangkamnanu asamtai, jakamunmaya nantaktincha nunisang kichik aintsjai nangkamna-miayi. Nu aintska Cristoyayi. ^m ²³Tura Cristo chikich jakaru ainaun nangkamasang eemak nantakmiayi. Tura nukap arus Cristo wantinkamtai, ni aintsri ainautikia jakamunmaya nantakiartinuitji. ²⁴Tura nungka amuamunam Cristo apu ainauncha mash, tura inakratin ainauncha mash, tura ni nemase ainauncha mash, timiá kakaram ainau wainiat nepetak amuktinuitai. Tura nunia Cristo ni Apaachiri Yusen mash ainia nuna susamu asa, Yus ningki mash inartinuitai. ²⁵Ii Apuri Cristo ni nemase ainaun mash nepetak tuke mash inartinuitai. ²⁶Tura ni nemase mash nepetkatin asa, nungka amuamunam aints ainau pengké jakacharti tusa Cristo jatancha nepetkatnuitai. ²⁷Tura asamtai Yus ni Uchirin: Mash ainia nuna apuri ati tusa akupkamiayi. Tura mash ainia nuna ínayat, ni Apaachiri Yusnaka inarchatnuitai. Nuka paan nekaatnuitji. ⁿ ²⁸Tura Cristo ni nemase ainaun mash nepetkaku asa, nuniangka ni Apaachirin: Yamaikia amek Apu ata titinuitai. Tu tamau asa, nuniangka Yuska mash ainia nuna nangkamasang juun atinuitai.

²⁹Nusha nintimrataram: Cristo namarin jakamtai, chikich aints nu

aintsu pengker pujamurin wainkau asar, iisha Criston umirkarmi tusar entsanam maiinawai. Jakaru ainau jakamunmaya nantakchamniaun waininayatcha ¿warukantsuk entsanmasha maiina?

³⁰Tura jakaru ainau jakamunmaya nantakchamniauncha ¿warukantsuk kintajai meteksha iincha mantamawartascha wakerutminaji? ³¹Yatsur ainautiram umaarutirmesha, kintajai metek iincha mantamawartas wakerutminau asaramtai nunasha tajarme: Atum ii Apuri Jesucristonu asakrumin, wisha waraajai. Tura atumin Cristo chichamen etserkau asan, kintajai metek itirukachminnum pujakun: Mantinaksha mantuwarti tusan, jakatnua nunisnak pujajai. ³²Wi Efeso yaktanam pujamtai, aints ainau juun yawaaya nunisarang winasha mantuwartas wakerutinau asaramtai, wikia wait wajayajai. Iikia jakar nantakchatin akurkia ¿tuusha pujustin wakerukminkai? Atsa. Jakau ainau pengké nantakchamnawaitai, tu nintimina nuka nangkamiar chichainak: “Kashin ii jakatin asar, yamaisha nukap yuwami, tura nampekmi,” tinawai. Jakaru ainau pengké nantakchamnawaitmatikia, nuna tinauka nunaka nekasar tiarminuitai. Antsu jakaru ainau nekasar nantakiartin asaramtai, tuuka nintimrashtinuitji. ^o

³³Chikich ainau anangkruwarai tusaram aneartaram. “Aints pengker pujayat, pasé ainaujai tsanias pujakka, nusha nunisang pasé pujustinuitai.” Tu tinu ainia nuka nekasar tinawai.

³⁴Atumjai Yusen nekachu ainausha pujuinawai. Tura asamtai atumsha yamaikia tupin nintimsataram. Tura atumi tunaui inaisataram tusan tajarme. Nunaka atumin natsarat tusan tajarme.

¿Jakaru ainau itiur nantakiartinuita?

³⁵Tura chikich aints inintrak: ¿Jakau ainau itiur ataksha iwiaaku pujusarti-nuita? Tura ninu namangke mash mengkakamtai, ¿warí namangkejing ataksha nantaktinuita? timinuitai. ³⁶Tu inintra nuka nintimchawaitai. Arak araarma nu saapchiri kawaachmatikia tsapaichminuitai. ³⁷Tura asamtai árak araakrumka, ¿yanchuk nukarauk araa wearam? Atsa, antsu trigo araakrumka, tura chikich árak araakrumsha, jingkiajin araarme. ³⁸Tura Yus árak araamun niish niish tsapaiti tusa tsapamtikui. Tura Yus wakerá nunisang tsapaayi. ³⁹Yus ningki wakerak, ni najanamia nuna metekchau ati tusa mash najanamiayi. Tura asamtai aintstikia iisha aji. Tura kuntin ainausha, tura nanamtin ainausha, tura namak ainausha niish niish ainawai. ⁴⁰Nayaimpinmasha yaa ainau niish niish jintin ainawai. Tura nungkanam Yus najanamu ainausha niish niish arti tusa metekchau najanamu ainawai. Tura nayaimpinmaya ainau shiirmari, tura nungkanmaya ainau shiirmarisha niish niish ainawai. ⁴¹Tura tsaa tsanmausha niish ayi. Tura nantu tsanmausha niish mushatmin ayi. Tura yaa ainau tsanmausha niish niish asaramtai, yaa ainau shiirmari metekchau ainawai.

⁴²Tura jakau ainausha nunisarang yamaram namangjai nantakiartin ainawai. Jakau namangke kaurtin aa nu iwiarsam, nuniangka jakashtinnum nantaktinuitai. ⁴³Jakau namangke kawaarak mejeeni tusar tsuutakur iwiarji. Antsu jakamunmaya nantaakka shiiram nantaktinuitai. Ii namangke kakaichu aa nuka iwiarji. Antsu yamaram namang kakaram atinua nujai nantaktinuitji.

⁴⁴Jakau namangke junia namang asamtai

iwiarji. Tura Yusjai nayaimpinam pujustasar yamaram namangjai nantaktin ainiaji. Jakau namangke ju nungkanmaya namangketai, antsu jaka nantaktin namangke aa nuka nayaimpinmaya namangketai.

⁴⁵Yuse chichame tu aarmawaitai: “Nu nangkamtaik Yus aintsun Adán naartinun najanak suut umpui: Iwiaaku ati tusa, mayatairin engketamiayi.” Tu aarmawaitai. Nunia nukap arus Cristo aints wajas, Yuse Wakani kakarmarijai aints ainau tuke iwiaaku pujustinun suyayi. ⁴⁶Nu nangkamtaik Yus aintsu namangken nungkanmaya najanamiayi. Nuniangka chikich yamaram namang nayaimpinam pujustinnaka uku najanamiayi. ⁴⁷Nu nangkamtaik Yus aintsun nungkanmaya najanamu asa, ju nungkanmaya aintsuyayi. Antsu ii Apuri Cristoka nayaimpinmaya aintsuitai. ⁴⁸Adánka nunisarang ainauka junia namang ainawai. Tura Cristoa nunisarang pujusartin ainauka nayaimpinmaya namang artinuitai.^P

⁴⁹Yamaikia Adánka nunisrik ju nungkanmaya aints ayatrik, ukunam nayaimpinam jearkia, Cristoa nunisrik nayaimpinmaya aints atinuitji.

⁵⁰Yatsur ainautiram umaarutirmesha nunasha tajarme. Aints junia namangjai tura junia numpajai Yus pujamunmaka pujuschartinuitai. Tura junia namangka kaurtin asamtai, nayaimpinmaka kaurtinnumka jeachartinuitai. ⁵¹Yuska chikich chicham uukmaunasha wína nekamtikruau asamtai, yamaikia atumin nekamtikiatasan wakerajrume. Antuktar: Cristo umirkautikia mashkia jakashtinuitji. Antsu iinu namangkenka Yus mash yapajiatnuitai. ⁵²Yuse awemamuri pupunan pupuntramtai, aints mitsum mitsum wajawa nunisang Yus ii

namangken yapaijturmatnuitji. Tura pupunan pupuntramtai, Cristo umirin jakaru ainau Yusjai tuke jatsuk pujusartas nantakiartinuitai. Tuminamtai iwiaaku ainau namangkencha Yus yapaijatnuitai.^q

⁵³Ju namangka jakakrin kaurtinuitai. Antsu nunia yapaijmiamar chikich namang kaurchatin aa nujai, tura pengké jakashtin aa nujai Yusnum pujustinuitji. ⁵⁴Tura ii namangke jakatin aa nu yapaijmiamar, chikich yamaram namang jakashtin aa nujai pujustinuitji. Tura asamtai Yuse chichame etsernu aarmaurisha umiktinuitai. Nu aarmauka nuwaitai: “Jatanka Yus nepetkawaitai. ⁵⁵¿Yamaikia jatasha iincha itiru nepetamkatjik? Tura asamtai ¿iikia warukarik jatasha shamkatij?” tu aarmawaitai. ⁵⁶Yaanchuik Yus Moisésnum umiktin chichaman akupkau asamtai, aints ainauti nu chichamka umitsuk mash tusan wajasar jakatnuyaji. ⁵⁷Tura ii Apuri Jesucristo turamurijai jatanka Yus nepetkamiayi. Tura jatancha nepetkau asamtai, iisha jatasha nepetkatin asar, Yus maaketai tiarmi.

⁵⁸Wina aneetir yatsur ainautiram umaarutirmesha: Jatasha nepetkatin asaram kakaram wajasrum, tuke yawetsuk Yuse takatri takakmin ataram. Tura ii Apuri Cristonu asaram, ni takatringkia nangkamrumka takaatsrume. Atumka nusha nekarme.

Kuik irumratniun pachis etserkamuri

16 ¹Yamaikia kuik irumram chikich aints Cristonu ainau akuptuktaram tusan aatjarme. Wi Galacianmaya ainaun: Nu turataram tusan timiaja nunisnak atumnasha tajarme. ²Wi taamtai nu kuik irumrai tusaram, atum tumingjai metek kuik Yus

susatasrum atumi jeen akankaram ukustaram. Kuik nukap jukirmeka Yus nukap susatnuitrume. Antsu jumchik jukirmeka jumchiksha susatnuitrume.

³Tura wi atumin jeamtai, pengke aints atumjai pujuinau wainkaram: Jerusalénnum Cristonu kuikiartichu ainaun yaingkiartas, atumi kuikiari takusar wearti tinu asakrumin, wikia papin aaran akupkatatjai. ⁴Tura wi weminuitmataikia, wijai tsaniasar wearminuitai.^s

Wetintrin pachis aarmauri

⁵Wikia Macedonia nungkanam wetin asan, nunia jiinkin Corintonam atum pujamunam jeatatjai. ⁶⁻⁷Yamaikia atumin jeanka, jumchik kinta iratnaka nakitajai. Antsu Yus wakeramtaikia, nukap kinta atumjai tsaniasan pujustasan nintimjai, tura yumanch nangkamarti tusan, atumjai pujuschainjash tu nintimjai. Nuniangka atum: Weta tusaram, winaka akuptukmintrum tu nintimjai. ⁸Tura yamaikia Efeso yaktanam Pentecostés fiestan inangkartatjai. ⁹Junia aints ainau untsuri Yuse chichamen antukartas wakerinawai. Antsu Criston umirtan nakitinausha untsuri irunui.

¹⁰Timoteo atumin jeamtai, nisha wiya nunisang ii Apuri takatrin takau asamtai, pengker nintimias atumjai pujusti tusaram wainkataram. ¹¹Antsu Timoteo pachisrum mianchawaitai tiirap. Antsu pengker nintimias angkan waketkiti tusaram akupturkataram. Nunia chikich aints Cristo umirnujai tati tusan juni nakajai.^t

¹²Tura ii yachi Apolosan chikich ii yachijjai atumin winfar jirmasarat tusan nukap iniasmajai, turayat yamaikikia iratan nakimiawai. Antsu ni angkan akungka winishtimpiash.

Inangnamu chicham akupkamuri

¹³Chikich ainau atumin anangkrama-warai tusaram aneartaram. Tura Cristo nekasampita tusaram, kakaram wajasrum, uchia nunisrumka nintimsai-rap. ¹⁴Tura asaram chikich ainau tuke inaitsuk anen ataram tusan tajarme.

¹⁵Yatsur ainautiram, atumsha Estéfanas itiur pujumia nusha nekarme. Niisha ni weari ainaujai Acaya nungkanam nu nangkamtaik Cristo chichamen umirkarmiayi, tura Cristonu ainaun tuke yaingkiarmiayi. Atumsha nuka nekarme.

¹⁶Tura Estéfanasa nunisarang Criston umirinak pujuinauka umirkataram. Turaram Cristonu ainaun yaingkiartas takakminauka umirkataram tajarme.

¹⁷Estéfanas, tura Fortunatosha, tura Acáicosha juni taaru asaramtai wisha waraajai. Atum winitatkamaram tujintra-krumin, niisha wína jiirsartas tarutiarmayi. ^u ¹⁸Tura winasha jiirsar nintirun pengker nintimtikrurarmayi.

Tura atumin wakеткиar, atumnasha nunisarang pengker nintimtikramrartatui. Tura asamtai nu aints ainau pengker awajsataram tajarme. ¹⁹Asianmaya Cristonu ainau atumin: Pengker pujustaram tusar, chichaman akupturminawai. Aquila ni nuwari Priscajai, tura Cristo nemarkin ni jeen kaunin ainaujai Cristonu asar, atumin nukap pachitminawai. ^v

²⁰Cristonu ainausha mash atumin: Pengker pujustaram tusar chichaman akupturminawai. Cristonu ainautiram, pengker nintimtisrum: ¿Pengkerak pujaram? tunaitaram.

²¹Yamaikia ju aarmaunka wína uwejruijari aaran akuptajrume. Wiitjai Pabloitjai.

²²Aints ii Apuri Jesucriston aneetsuk pujuinaunka Yus jiiisti. Apuru Jesúsá, wári tarata.

²³Ii Apuri Jesucristo atumin pengker awajtamsarti tajarme. ²⁴Atum Cristo Jesúsánu asakrumin, mash aneajrume. Nunak tina amuajai. Nuketai.

Pablo Corintonam Pujuinaun Papin Ataksha Akuptukmauri

Chicham akuptukmauri

1 ¹Wiitjai Pabloitjai. Yus wakerau asamtai Jesucristo: Wina chichamur etserkata tusa eatkamiayi. Yuse aintsri Corintonam pujuinautirmin, nunia Acaya nungkanam pujuinautirmincha, wina yatsur Timoteojai ju papin aaran akuptaj-rume. ²Ii Apaachiri Yus ii Apuri Jesucristojai atumin pengker awajtam-sarti, tura angka pengker pujustinasha suramsarti tajarme.

Pablo wait wajakmauri

³Yus ii Apuri Jesucristo Apaachiri aints ainautin wait anengkratin asa, tuke iin pengker nintimtikramrau asamtai maaketai tiarmi. ⁴Ii wait wajakrinkia, Yuska tuke iin pengker nintimtikramrau asamtai, chikich ainausha wait wajainam-taikia, Yus iin tuke pengker nintimtikramramiaji nunisrik iisha chikich wait wajainausha pengker nintimtikrartinuitji. ⁵Cristo timiá wait wajakmia nunisrik iisha wait wajau asakrin, Cristoka napchau nintimsuk asataram tusa, tuke pengker nintimtikramji. ⁶Tura asamtai iikia wait wajayatrik: Pengker nintimsaram pujustaram tusar wait wajari. Tura atum uwemramnuram tusar iikia wait wajari. Tura Yus iincha tuke pengker nintimtik-

ramrau asamtai ii wait wajari nunisrumek atumsha wait wajakrumsha, napchau nintimsuk, antsu iiya nunisrumek Yus nintimsaram wait waktinuitrume. ⁷Tura asakrumin iikia atum nintimtusar: Iijai metek wait wajau asakrumin, Yuska iin pengker nintimtikramji nunisang atumna-sha pengker nintimtikramratatrume, tu nintimsar iikia pujaji.

⁸Yatsur ainautiram umaarutirmesha, Asia nungkanam timiá wait wajakmiaji nuna atumin nekamtikiatasan wakerajrume. Timiá wait wajamuka pengké atsuwapi tu nintimsar, tura jakatatjiapi, tu nintimsar pujuyaji. ⁹Antsu aints maatar achikmawa nunisrik: Nekasriapi jakatatji tu nintimnuyaji. Tura timiá wait wajakur: Uwemrashtinuapitji, tu nintimsar pujarning Yus: Wi jakaun inankitin asan, atumin uwemtikratatjarme tusa iin nuitamramiaji.^a

¹⁰⁻¹¹Atumsha Yusnum yainkau asakrumin, timiá shamrumtinnum pujakrishia: Jakatnuapitji, tu nintimsar pujarning, Yus iincha: Jakairam tusa uwemtikramramiaji. Tura asa iincha tuke uwemtikramji. Tura asamtai Yus iincha nekas uwemtikramratatjiapi, tu nintimsar pujaji. Tura asar aints untsuri iin pachitmasar Yusen seatramiaru asaramtai, Yus iincha pengker awajtamsamjai. Tura asamtai aints untsuri iincha pachitmasar Yusen maaketai tiartatui.

a 1.9 (1. Cor. 15.32)

¿Warukang Pablo Corintonam wechaya?

¹²Yatsur ainautiram, ju chicham nekaataram tusar wakeraji. Iikia atumjai pujakur, anangmatsuk antsu Yus umirkur pujuyaji. Tura junia aints ainau nintimina nunisrikia pujuchmiaji, antsu Yus iin pengker awajtamsau asa, iin nekas pengker pujustinun suramsamiaji. Iikia tu nintimsar pujakur pengker nintimji. ¹³⁻¹⁴Tura asar iikia atumin aatjirme nu aajsaram ¿warintua? tusaram paan nekaatnuitrume. Antsu chicham nekaach-minun aa nunaka aatsujrume. Ii Apuri Jesús taamtai, atumka iin pachikratsaram warastinuitrume. Tura iisha atum pachisar warastinuitji.

¹⁵Tura pengker nintimtunijaji, nuna nekau asan, atum warasmi tusan, jimia irastasan wakerimijaji. ¹⁶Wikia Macedonia nungkanam weakun jiirkuta nangkaikiarmi tusan wakerimijaji. Tura waketkuncha ataksha jiisarmi tusan wakerimijaji. Tura atumin pujunantaj nunia Judea nungkanam akuptukarmi tusan wikia wakerimijaji.

¹⁷Antsu atumin winishtatiatun ¿nangkamniak atumin winitatjai timiakij? Atsa. ¿Tura junia aints ainau: Winitatjai tiariat yapajiasarang: Winishtatjai, tu nintimsar pujuinawa nunisnak wikia tu pujaj? Atsa. ¹⁸Iikia winishtatitrik atumin nangkamir: Winitatjai tusarkia chichamka akupkachmiaji. Yuscha nunaka nekawai. ¹⁹Wikia Silvanojai tura Timoteojaisha Yuse Uchiri Cristo Jesús a chichamen atumin ujakmijrume nuka yapajiasrikia ujakchamijrume. Cristo timiauringkia nekasaintai. Tura asamtai iisha ni chichamengka tuke yapaijtsuk ni tímia nunisrik etserji. ²⁰Yus tímia nunaka mash Cristo miatrusang umikmiayi. Tura mash umiku asamtai, iikia Yus maaketai

titasar, Cristo Jesús a naari pachisar nuka nekasaintai taji. ²¹Tura Cristonu asakrin, iincha kakamtikramji nuka Yusketai.

Tura winar ataram tusa eatmakmiaji. ²²Tura Yus ni Wakanin ii nintin engketramau asa, tuke wijai pujustinuitrume tusa iincha nintimtikramramiaji.^b

²³Tura asamtai wikia atumin nukap aneayatun, Corintonam pujautirmin jiiistan winichmajai. Yus nintirun nekau asa ¿nekasash taj? tusa nekarui.

²⁴Atumka yanchuk Cristonu asakrumin, yamaikia ataksha Cristo: nekasampita titaram tatsujrume. Antsu miatrusumek warastaram tusar, atum nintimtikratasar wakeraji.

2 ¹Tura wiki nintimtimasnak: Atumin jeanka ataksha wake mesemtikajirum tusan, wikia yamaikia atumniaka jiischatatjirme timiajai.

²Wi atumin jeamtai, wake mesekrum pujakrumngkia ¿yaachik winasha waramtikrusat? Atumek winaka waramtikrusminuitrume. ³Tura asakrumin winaka wake mesemtikrukairam tusan, atumnaka jiischamijrume, antsu wina waramtikrustaram tusan wakerajai. Tura asan papinak aatran akuptukmijrume. Tura atumin jean wisha warasamtaikia, atumsha mash warasmintrum, tu nintimsan pujuyaji. ⁴Wikia nuwik atumin aatkun, atumin napchau nintimtikratasnaka aatrachmijrume. Antsu atumin nukap aneau asan napchau nintimsan, tura wake mesekan juutkamaikiakun atumniaka aatramijrume.

Tunau takauka tsangkuratnuitai timiauri

⁵Wikia nuwik papin aatkun, aints tunau takaun pachisan aatramijrume. Nu tunau takauka winakeka wake mesemtikrukchamiai. Antsu atumsha mash jumchik wake

b 1.22 (Efes. 1.14)

mesekmiarume. Turayatun nuna nangka-masnak chichakai tusan, “jumchik wake mesekmiarume” tajai. ⁶Atumsha mash iruntraram pujusrum: Nu aintska iijai iruntrashti tinu asaram, yamaikia nuke ati tusaram tsangkatkataram. ⁷Yamaikia nuka timiá wake mesek pujau asa, katurman nintimsai tusaram, ni tunaarisha tsangkuraram nunia yaingtaram. ⁸Tura wait anearum, ataksha nu aints yamaikia aneau asaram: Aneajme tusaram nekamtikiataram. ⁹Wi nuwuk aatramiaj-rume nunaka miatrusarang umirtukaraintash tusan nekaatasan aatramiajrume. ¹⁰Atum chikich aintsu tunaari tsangkurarume nunisnak wisha tsangkurajai. Nekas tsangkuramu amataikia, atumjai metek nintimsarmi tusan, nu aintsu tunaarin tsangkurajai. Cristo nunasha nekawai tusan tajarme. ¹¹Satanás iincha nepetamkai tusar, nu aints yamaikia tsangkuratnuitji. Satanás iincha itiu nepetamkatas wakerutmaji nusha nekaji.

**Pablo Troasnum napchau
nintimias pujusmauri**

¹²Wikia Troas yaktanam Cristonam uwemratin chichaman etserkatasan jeamtai, ii Apuri takarti nekas pengker takakmasminun wainkamiajai. ¹³Turayatun yatsur Titon wainkatatkaman tujinkan napchau nintimramiajai. Tura Titon eaktasan Cristonu ainaun ukukin, Macedonia nungkanam wemiajai.^c

Cristojai tunau nepetkatnuitji timiauri

¹⁴Tura Cristo Jesús tuke tunau nepetin asa, iincha tuke kakamtikramji. Tura asamtai ii nintin pujawapi tusar, ii tunía wekaaji nunisha ni kakarmarijai aints ainawai ni chichamen nekamtikiawaitji. Tura asar Yuska maaketai taji.^d

¹⁵Iikia Cristo chichame etserin asar, nekapeamka iikia kungkuajai. Ii Yuse chichame ujakarmau asar, uwemrartin ainawai tura mengkakartin ainasha ii kungkuamurinka nekapartin ainawai. ¹⁶Tura mengkakartin ainauka ii kungkuajai nunaka jakamnu mejeaun nekapraminaji. Antsu uwemrartin ainauka tuke pujustinum wetin asar, kungkurman nekapraminaji. ¿Tura yaachia ningki nintimsangsha nunasha turamnawaita? ¹⁷Chikich ainawai unturi kuik jukitaj tusar, Yuse chichamenka yapajiasarang etserina nunisrikia iikia etsertsuji. Antsu Yus akupkamu asar, tura Cristo inatiri asar, Yus iincha jiirmaji tusar, pengker nintimsar Yuse chichame anangmatsuk paan etserji.

Yamaram chicham najanamu

3 ¹Iikia nu tau asakrin, ¿atumsha ataksha ningki nintimtumasar: Wikia pengke aintsuitjai tumaminawai tuuk nintimrum? Chikich aints turina nunisrik: Ju aints nekasar Yuse chichame etserin ainawai tusar ¿atum papi aarmau inaktus-tinkitaj? ¿Tura nu papi aatruartaram tusar iisha atum seatnukitaj? Atsa. ²Atumka ii papiriya nunisketrume. Ii chichame antuku asaram, atumka ii nintin papi aarmawa nunisrumek pujarme. Tura asakrumin chikich aints ainawai mash atum itiu pujarme tusar paan waitmakar, papin aujinawa nunisarang nekawartinuitai. ³Atumka Cristo papin aar suramsawa nunisketrume. Nuka papi aatijaisha aarchamu wainiat, Yus ni Wakanijai aarmawaitai. Moisésan Yus kayanam aamtikramia nuniska aarchamuitai. Antsu atumi nintin aarmawaitai. ⁴Yus iincha: Wina chichamur etserkataram tusa akuptamkau asamtai, iikia Cristonu asar nuka timinuitji.

⁵Ii kakarmari atsau asamtai, iik nintimsarik Yuse takatringkia takakmaschamawaitji. Antsu Yus ni kakarmarin suramsau asamtai nuka turaji. ⁶Tura yamaram chichaman Cristo najanamia nuna iincha: Pengker etserkataram tusa Yus nekaamtikramamiaji. Yaanchuik Moisésa aarmaurin umitsuk pujuinaunka tuke main armaiyi. Antsu yamaikia Moisésa aarmaurin miatrusrumek umirkataram turamtsuji, antsu Yuse Wakani ii nintin engkemturmau asa, tuke pujutan suramji.^e

⁷Yus umirkatin chicham yaanchuikia kaya tauwa tumaunum aarmau ayayi. Tura Yus nu kayan aarmaun, Moisésan susam, ni yapii wincha jiitsumir amiayi. Tura timiá jiitsumir asamtai, Israel ainau Moisésa yapiin jiistatkamawar tujinkarmiayi. Turayat Moisésa yapiin wincha amia nu yaitik mushatmaki sakarmiayi. Moisés umirkatin chichaman umitsuk pujuinaunka maawartinun wainiat, Yus Moisésa yapiin winchaan wainmamtikiamiayi. ⁸Yus umirkatin chichamka pengker ayat, yamaram chicham Yuse Wakani sukarta nuka nuna nangkamasang timiá pengkeraitai. ⁹Yus umirkatin chichaman umirinachmatai maawartinun wainiat, Yus Moisésa yapiin winchaan awajsamiayi. Antsu Cristo aints ainauti tunaarin sakturmaru asamtai, Cristo chichamengka Moisésa chichame nangkamasang timiá pengkeraitai.

¹⁰Nintimrataram. Nu yamaram chichamka timiá pengker asa, yaanchuik Yus Moisésan chichaman susamia nuna nangkamasang Cristo chichamengka timiá pengkeraitai. ¹¹Tura Moisés umirkatin chicham ukunmaka inaisartinun wainiat pengker ayayi. Antsu Cristo chichame tuke pujustinun sukartin aa nuka nuna nangkamasang timiá pengkeraitai.

¹²Tura asamtai iikia tuke Yusnum pujustin asar, pengké natsaamsuk Yuse chichamengka paan etserji. ¹³Moisésa yapii winchari yaitas mengkakatin asamtai, aints ainau wainkarai tusa, yapiin panuijai nukumakmiayi. Antsu iikia turatsji.^f ¹⁴⁻¹⁵Tura Yuse paaniurin mengkakaun aints ainau wainkarai tusa, Moisés panuijai yapiin nukumakmia nunisarang Israel ainau Moisésa chichamen aujinak pujuinayat ¿warinkung taj? tusarsha nintimsuk puju armiayi. Tura yamaisha nunisarang katuram nintintin asar, tuke paan antukaru ainayat, ni jii kusurua nunisarang nintiminawai. Antsu aints ainau paan nintimtikratnuka ii Apuri Cristoketai. ¹⁶Tura asamtai aints ii Apurin umirinauka jii kusurua nunisarka ainatsui. ¹⁷Ii Apuri nekas Wakanitai. Tura Yuse Wakani aintsu nintin engkema pujakka, nu aintsnaka nekas angkanmamtikui. ¹⁸Tura asamtai Moisés ni yapiin panuijai nukumakmia nunisrikia pujatsji. Antsu iikia ispiya nunisketji. Iisha ii Apuri paaniurisha itiur awa tusar nekau asar, chikich ainausha paan nekamtikiatnuitji. Tura asar Yuse Wakani ii nintimaurin yapajiau asamtai, yaitasar ii Apuria nunisrik nintimsar pujaji.^g

Yuse chichame tu etserji timiauri

4 ¹Yus iincha wait anentramrau asa, yamaram chicham etserkataram tusa akuptamkau asamtai, iikia yawetsuk tuke etserji. ²Antsu chikich ainau natsanpiaku aa nuna úkar turina nuka iikia inaisawaitji. Tura anangkartin ainau turina nuka iikia turatsji. Tura Yuse chichamengka iikia pengké jumchiksha yapajitsuji. Antsu Yuska iincha jiirmaji tusar, ni chichame etserkursha, Yuse chichame aarmawa nunisrik etserji.

Turakrinka mash aints ainou nuna antukar: Nekas Yuse chichamentai tiarat tusar turaji. ³Tura Yusnum uwemratin chicham ii etserji nuka paantaitai. Tura waininayat mengkakartin ainouka: Nu chichamka paanchawaitai tinawai. ⁴Tura asaramtai iwianch ju nungka apuri asa, nu aints ainou Yusnum uwemratin chicham timiá pengker aa nunaka paan nintimrarai tusa, tura Cristo Yusea nunisang pujawapi tu nintimrarai tusa, jii kusurua nunisarang pujusarat tusa anangkamiayi. ⁵Tura asamtai iik nintimtasarikia tu pujaji tusarkia, chichamka etsersuji, antsu Jesucristo ii Apurintai tusar, ni chichamengka etserji. Tura Jesús iin anenmau asamtai, iikia atumi inatirinji taji. ⁶Yus nu nangkamtaik teen: Paantin ati, tía nuka ii nintincha paantin ati tusa nintimtikramramiayi. Jesucristo timiá kakaram aa nuka iincha: Yuse kakarmari tu awai tusa, nekamtikramatas ii nintincha paan nintimtikramramiayi.^h

¿Itiur Yus nintimsar pujustinuita?

⁷Ii kakarmari atsau wainiat, Yus timiá kakaram aa nuka iin pachitmas: Wina aintsru kakarmaringkia niinuchitai, antsu winaruitai tusa, aints ainautin mash nekamtikramatas, ii namangke nuwe najanamua nunisang kakarmachu mesertinun wainiat, Yus ni kakarmarin engketramji. ⁸Tura asamtai iikia timiá wait wajayatrik, wait wajamunmayangka jiiinkitnuitji. Tura itiurkachmin pujayatrik waurtsuji. ⁹Tura aints pasé awajtamkurnisha iinka Yuska ajaprama ukurmatsji. Tura asamtai iin mestamrartas wakerutminaksha tujintraminaji. ¹⁰Jesúsán maawartas wakermaria nunisarang iincha tunia wekaaji nunisha tuke mantamawartas wakerutminaji. Turayat

mantamawarchau asaramtai, iikia tuke Jesúsá kakarmarijai iwiaakji. Tura jakachu asar, aints ainou Jesúsá kakarmarincha wainkarat tusar wakeraji. ¹¹Tura Jesúsánau asakrin, kintajai metek mantamawartas wakerutminaji. Tura asamtai ii namangkengka jakatin ayatrik, Jesús jakayat tuke iwiaaku puja nuka iin pujurtamji tusar, aints ainausha nekamtikiatnuitji. ¹²Tura asar atumsha tuke iwiaaku pujusmintrum tusar, iikia wait wajakar jakatin ayatrik, Yuse chichame etserji.

¹³Yuse chichame tu aarmawaitai: “Yusen nekasampita tinu asan, Yusen pachisan chichakmiajai.” David tu aarmau asamtai, iisha nunisrik Yus nekasampita tau asar, tu chichaaji.ⁱ

¹⁴Yuska ii Apuri Jesúsán jakamunmaya inankimiayi. Tura asa iincha nunisang inantamkitnuitji. Tura atumjai metek ni pujamunam iincha juramkitnuitji tusar nekaji. ¹⁵Tura asar atum yaingtasar iisha wait wajaji. Tura asakrin aints unturi Yuse wait anekratairi itiurak awa tusar, nunaka nekaawar, Yusen pengker awajinak maaketai tiartinuitai.

¹⁶Tura asamtai iikia napchou nintimtsuk pujaji. Ii namangkengka weamki weamtaisha, Yus ni kakarmarijaingkia ii nintinka kintajai metek kakamtikramji. ¹⁷Tura ju nungkanam wait wajamuka wári nangkankatin asa nuka mianchawaitai. Tura yamaikia nukap wait wajayatrik ukunam paaniunam pujusar, nuna nangkamasrik nukap warastinuitji. ¹⁸Tura asar ju nungkanam wait wajaji nuka yamaikia nintimtsuji. Antsu ii waittsuji nuka nekasar nintimji. Antsu iin waittsuji nuka nekasar wári nangkankatnuitai. Antsu tuke pujustinka pengké nangkankastinuitai.

5 ¹Yamaikia aintsti namangke nintimrarmi. Aintsti namangkesha jea tumau asa wári mengkakatnuitai.

Tura ii jakar, nayaimpinam iinu namangke yamaram atinua nuka aintstikia najanachminun yanchuk Yus umismawaitai tusar nekaji. ²Ju nungkanam iwiaaku pujakrikia nekasar wait wajaji. Tura asar nayaimpinam yamaram namangjai pujustasar wakeraji. ³Tura asar aints wejmakan entsawa nunisrik ii wakanisha ataksha yamaram namangnum engkemati tusar wakeraji. ⁴Tura asar ju nungkanam iwiaaku pujakrikia wait wajakur wake mesemar pujaji. Turayatrik nekasar jakatasrikia wakeratsji. Antsu aints entsatin yamarman entsawa nunisrik yamaram namangjai tuke pujustasar wakeraji. ⁵Yamaram namangken ii jukitnun najatramamiaji nuka Yusketai. Tura Yus: Yamaram namangnaka susatatarjarme tusa, nuna eemak ni Wakanin iin suramsawaitji.^j

⁶⁻⁷Tura asamtai tuke pengker nintimsar pujaji. Yus yamaram namangken iin suramsatin aa nuka wainchayatrik, Yuska wínaka nekas surustinuapita, tu nintimsar pujaji. Tura junia namangjaingkia ii Apurijaingkia tsaniasrikia pujuschatnuitji tusar nekaji. ⁸Turayatrik tuke pengker nintimsar pujaji. Tura junia namangka ukukir, yamararam namangjai ii Apurijai pujustasar wakeraji. ⁹Tura asar iwiaaku pujakrishia tura jakarsha, ii Apuri tuke warartustasar wakeraji. ¹⁰Mash aints ainautikia jakarkia nunia nantakir, ii Apuri Cristo pujamunam eemkar wajasakrinkia, ii turamurincha mash jiirmastinuitji. Tura nuni wajasakrin pengker aa nuna turinauka pengker aa nuna jukiartin ainawai. Antsu pasé aa nuna turinauka pasé aa nuna jukiartin ainawai.^k

Angkan pujustinun pachis etserkamu

¹¹Ii Apuri mash tunaarintin ainaun wait wajaktiniun susatin asamtai, iikia nu nekau asar, Cristo umirchau ainausha: Cristo umirkataram tusar chicharkur pujaji. Yuska iincha paan nekarmau asamtai, atumka ii turamuri paan nekaataram tusar wakeraji. ¹²Nu takur iik nintimsarkia: Pengke aintsuitji tumamtsuji. Chikich ainausha ningki nintimtusar: Miajuitjai tumamsar chikich aintsu nintinka nekainachiat: Nuka mianchawaitai tinawai. Antsu atumka ii turamuri nekau asaram chikich aints ainausha tenapkesar nekaawarti tusaram pengker nintimtusum ujaktaram. ¹³Tura asakrumin chikich ainausha iin pachitmasar: Waurinak tinawai nangkamiar turaminamtaikia, iikia Yuska pengker awajsatasar tu pujaji. Tura paan nintimsar pujakrikia, atum yaingtasar tu pujaji. ¹⁴Cristo iin timiá anenmau asamtai, ii turaji nuka Cristo anengkratairijai turaji. Tura nusha nekaji: Cristo mash aints ainautin uwemtikram-ratas jarutramkau asamtai, Cristonu ainautikia mash Cristo jakamia nuni iisha nijai metek jakawaitji taji. ¹⁵Tura asamtai Cristo mash aints ainautin jarutramak nunia nantakmiayi. Nuni asamtai iwiaaku pujaji juwik ii wakeramuringkia najantsuk, antsu Cristo wakeramuri najanatnuitji. ¹⁶Tura asamtai yamaikia junia nungkanmaya aints ainau nintimnawa nunisrikia nintimtsuji. Yaanchuikia aints ainau jiisar: Juka pengkeraitai, antsu auka mianchawaitai tinuyaji. Tura Cristosha pachisar tu nintimtinuyaji. Antsu yamaikia tuuka nintimtsuji. ¹⁷Tura asar Cristonu ainautikia Yusnumia akiinau asar, yamaram akiinawa nunisrik ainiaji. Ii yaanchuik tunau nintimtairing-

kia mash inaisar, pujut yamaram jukin asar, yamaikia ii nintimauringkia nekas yamarmaitai.¹

¹⁸Mash yamaram aa nunaka Yus turawai. Yaanchuik iikia tunaarintin asar, Yusjaisha nemasnaikiar pujuyaji. Tu puju arin, Cristo jarutramkau asamtai, yamaikia Yuse nemasengka atsuji, antsu Yus: Wína amikur ataram turamijaji. Tura yamaikia chikich ainausha: Yusjai nemasnaitsuk asataram, antsu atumi tunaari inaisaram, Wijai amikmataram tusaram, uwemratin chicham etserataram tusa, Yus iin akuptamkamijaji. ¹⁹Nu tsangkurnaiyamu chichamka nuwaitai: Yus aints ainauti tunaarinka nintimtsuk pujus: Wijai nemasnaitsuk asarti, antsu ni tunaarin inaisar wina amikur wajasarti tusa, ni Uchirin Criston akupturmakmijaji. Tura iincha: Nu chicham chikich ainausha nekamtikiataram tusa akuptamkamijaji. ²⁰Tura Cristo: Wína chichamur aints ainau ujaktaram tusa, iin akuptamkau asamtai, Yus chichawa nunisrik iikia atum chicharkur: Yusjai nemasnaitsuk asataram, antsu Yus amikmataram, tusar ujaijrume. ²¹Yus iincha tunarinchawa nunisrik pujarin jiirmastas wakerutmau asa, Cristoka tunaarinchautiat aints ainauti tunaarin sakturmartas tunau aintsua nunisang jakati tusa Yus wakerimiayi.

6¹⁻²Yaanchuik Yuse chichame etserin Isáíasa aarmauri nintimrarmi. Nuka tu aarmawaitai: Yus chichaak:

“Uwemratin kinta jeau asamtai, ame seatmiamena nuna anturkamjame. Yusnum uwemratin kinta jeau asamtai, wikia amincha yaingmajme,” timiayi.

Tu aarmawa nunisang yamaikia Yusnum uwemratin kinta jeayi. Tura yamaikia Yus seatin kinta jeayi. Tura asamtai iikia

Yuse takatri takau asar, atum chicharkur: Yuse anengkratairi nintimtsuk pujusairam tusar ujaijrume.

**Pablo ni wait wajakmauri
pachis etserkamuri**

³Aints kichkisha Yuse chichame etserin ainautin pachitmasar pasé chichartamkairai tusar, iikia tuke pengker pujustasar wakeraji. ⁴Tura Yuse inatiri asar, itiu pujuinawa tusar, aints ainausha pachitsuk nekaawartinuitai. Iikia wait wajayatrik, tura yuumayatrik, tura yumtin pujayatrik, Cristo takatringkia tuke inaitsuk takakmakur pujaji. ⁵Iikia awattai ayaji, tura kársernum engketai ayaji, tura mantamawartascha papeetmin armiyai. Nuniasha taka takakmaka pimpikir pujuyaji. Nuniasha kanutskesha tsawain ayaji. Tura tsukajaisha wait wajayaji. ⁶Tura timiá wait wajayatrik, tuke tunauka nintimtsuk pujuyaji. Tura chicham nekas aa nu nekau ayaji. Tura jaimiasar pujuyaji. Tura aintska mash pengker awajnuayaji. Yuse Wakani ii nintincha pujurtamnuyaji. Tura chikich ainausha nekas anen ayaji. ⁷Tura nekas chicham etsernuyaji. Tura Yuse kakarmarijai Yuse takatrissha takakminuyaji. Iikia Cristo inatiri asar, tunauka nintimtsuk Yuse chichamejai iwianchkia nepetnuyaji. Tura iin pachitmasar pasé chichartaminamtaisha, iikia Cristo nekasampita tinu asar tunauka nepetnuyaji. ⁸Chikich ainau iin pachitmasar: Pengker aintsuitai turaminaji. Antsu chikich ainausha iincha pachitmasar katsekraminaji. Tura chikich ainauka iin pachitmasar pengker chichartaminaji. Antsu chikich ainausha iin pachitmasar pasé chichartaminaji. Nekas aa nu chichaarain waininayat, iin pachitmasar waitrinak: Nuka anangkartin ainawai

turaminaji. ⁹Chikich aints iincha waitmakar wishikraminak: ¿Warí aintsuita? turaminaji. Antsu chikich ainausha nekasar itiuur pujuinawa tusar paan nekarminaji. Iikia jaachak wajakmiaji. Turayatrik tuke iwiaakji. Tura mantaminachu asaramtai jachauyaji. ¹⁰Tura wake mesekar pujayatrik, tuke pengker nintimsar pujaji. Tura kuikiartichu ayatrik, untsuri aints ainau yainuyaji. Ii waririsha pengké atsau wainiatrik: Yusnau aa nuka mash iinuitai taji.

¹¹Corintonmaya yatsur ainautiram, iikia ii nintimaurisha utsuk mash paan ujayajrume. ¹²Iikia atumin tuke inaitsuk pengker nintimtusar pujarin wainiatrumek, atumka iin pachikratsaram tuuka nintimsarmeka pujatstrume. ¹³Tura asakrumin aints ni uchirin chicharinawa nunisnak atumin chicharjarme. Atumsha nunisrumek winasha atumi nintimmauri paan ujatkataram tusan seajrume.

¿Cristo iwianchjai tsaning pujusminkai?

¹⁴Atumka Cristo umirchau ainaujaingkia tuke tsaningkrumka pujusairap. ¿Cristo umirkau ainau Cristo umirchaujai metekak nintimina? Atsa. ¿Tura paantin teejai metek aminkai? Atsa. Tura asamtai ¿Cristo umirkauti itiuurkarik Cristo umirchau ainaujaisha tsaningtajai?

¹⁵¿Cristo iwianchjai tsaning pujusminkai? Atsa, tsaningchamawaitai. ¿Tura Cristo umirkau Cristo umirchaujai tsaningkiar pengkerak pujusminui? Atsa. ¹⁶¿Tura chikich ainau Yuschau waininayat, nuna yusri jeen nekas ii Yusri jeejai metekakai? Atsa, pengké metekchawaitai. Antsu iikia ii Yusri tuke iwiaaku puja nuna jeea nunisketji. Yus nuna pachis chichaak:

“Nijjai tsaniasan pujustinuitjai. Tura nijjai wekaasatnuitjai. Tura ni Yusri atinuitjai. Turamtai nisha

wína aintsur artinuitai,” timiayi.^m ¹⁷Nunia Yus chichaak: “Wína umirtichu ainamunmaya jinkitaram. Turaram nñjai tsaningkrum pujusairap. Tura tunauka takasairap. Tunau takatsuk pujakrumningkia, wikia atumin jukitnuitjarme. ¹⁸Tura asan wikia atumi Apaachiri atinuitjai. Turamtai atumka wína uchir tura wína nawantur atinuitrume,”

tusa ii Apuri nekas kakaram aa nuka timiayi.

7 ¹Aneetir ainautiram, Yus iincha nu chichaman akupturmaku asamtai, iikia yamaikia tunau takatsuk asarmi. Tura tunau nintimtsuk asarmi. Tura iikia: Ii Apuringkia Yusketai tinu asar, Yus miatrusrik umirkaru armi.

Pablo warasmauri

²Ataksha iikia pengker nintimtusar pujusarmi. Iikia aintska kichkisha paseeka awajsachmiaji. Tura aintska kichkisha paseeka nuiniarchamiaji, tura aintska kichkisha anangkachmiaji.

³Atumin wiasmatkataj tusanka, nunaka tatsujrume. Antsu yaanchuik timiaja nunaka ataksha tajarme: Wikia atumin aneau asan, jaaknasha atumjai jakatasan wakerajai. Tura iwiaaku pujaknasha atumjai pujustasan wakerajai. ⁴Wikia atumin pachisan pengker nintimtusar pujurjarme. Tura yamaisha winaka pengker nintimtikuru asakrumin, wait wajayatnak nintirka nukap waraawai.

⁵Tura Macedonianam jean, namangkru-sha pimpikin asamtai, angka pujutsuk tuke wait wajajajai. Aints ainau iijjai maanikiartas wakerinau asaramtai, tura Cristo umirin ainau Cristo umirtan inaisarai tusan nintirsha kurarmayi.

⁶Wikia napchau nintimsan pujamtaí, Yus napchau nintimsar pujuinauncha pengker nintimtikin asa, ii yachí Titon akupturkami. Tura asa winasha pengker nintimtikurmayi. ⁷Turamtaí Tito juni taa, atum wína pengker nintimtursamarume nuna ujatckayi, tura wína waitkatasrum nukap wakerutamun wína ujatckau asamtaí wikia warasmajai. Tura aints tunau turamtaí, atum napchau nintimtimchakuram, tura atum wína pengker nintimturmaun ujatckau asamtaí, wikia nuna nangkamasnak nukap warasmajai.

⁸Tito wína ujatak: Ame Corintonam papi akupkamame nuna aujsar nukap wake mesekar pujuarmiayi tusa, ujatckau wainiatun, yamaikia napchau nintimtsuk pujajai. Yaanchuik nu papin atumin akuptukan, atumin nukap wake mesemtikiau asan, napchau nintimramiajai. Turayatrum tuteka wake mesekrumka pujuschamiarume, antsu jumchik arusrum ataksha inangkarmiarume. ⁹Atum nukap wake meseku asakrumningkia, wikia waraatsjai. Antsu wake mesekrum atumi nintimauri yapajiau asakrumin, wikia nuna nekaan waraajai. Tura asaram Yus pengker awajsamiarume. Tura asakrumin wikia nu papin akuptukmiajrume nujaingkia atumniaka paseeka awajsachmiajrume.

¹⁰Yusen pengker awajsartas wake mesekar pujuinauka ni tunaarin inaisaru asar uwemmartin ainawai. Tura asar napchau nintimtsuk pujuinawai. Antsu junia nungkanmaya ainaw ni tunaarin inaitan nakitinau asar, wake mesekar pujusar, nunia jakar tuke mengkakartin ainawai. ¹¹Atumsha nintimrataram. Yus pengker awajsaram wake mesekrum pujau asaram, wi aatjarme nunisrumek tunaarintin atumjai pujau atumnia wári jiktasrum wakerukmiarume. Tura winasha ayamrutkatasrum wakerutka-

miarume. Tura aints tunau wajasmia nuna tunaarisha nakitramiarume, tura Yus shamakrum nu aintska kajerkamiarume. Nu turau asaram, nu aintsu tunaaringkia pengké nakitaji tusaram ujatckamiarume. ¹²Yaanchuik wi papin atumin akuptukmiajrume nuna: Nu aintska tunaarin inaisati tusan aatramiajrume. Tura nuna apari wake mesekmia nuka ataksha pengker nintimrati tusan aatramiajrume. Antsu nuna nangkamasrumek Yus umirkau asaram, iincha anengkratrume tusan atumin nintimtikratasan aatramiajrume. ¹³Tura wi timiaja nusha mash umiku asakrumin, iisha pengker nintimsar pujaji.

Tura Tito pengker nintimrati tusaram, atumsha mash pengker awajsau asakrumin, Titosha waraak nunasha iincha ujatckau asamtaí, nuna nangkamasrik iisha nukap warasmajai. ¹⁴Wikia atumin ujakmiajrume nuka mash nekasaintai. Tura wisha Titon atumin pachisan: Nuka pengker aints ainawai, timiajrume nunasha Titosha nekarmamiarume. Tura asakrumin iikia atumin pachisar Titon ujakmiaji nunaka: Nangkami tawai tutsuk, antsu nekasaintai Titosha timiayi. ¹⁵Tura iin jiyatmaktas winitramtsujiash tusaram shamayatrum, ni tímia nuka mash miatrusrumek umirkamiarume. Tura asakrumin Tito nuna nintimias nukap waraawai. ¹⁶Tura asamtaí wisha nunisnak atum nekas pengker turamurmin nekau asan, pengker nintimsan waraajai.

Yusnau ati tusar kuik irumratnium pachis timiauri

8 ¹Yatsur ainautiram, Cristonu ainaw Macedonianam pujuinaun Yus ni wait anengkratairi nintimtikrau asamtaí, nuna yamaikia atumin nekamtikiatatan wakerajrume. ²Nisha itiuirkachminnum pujuinayat nukap warainawai. Tura

kuikiartichu ainayat, kuikiartin ainaun nangkamasarang ampitsuk: Ii kuikiari Yusnau ati tusar mash susarmiayi. ³Nuka kuik ampirmaunaka susacharmiayi, antsu pengker nintintin asar, kuikiari jumchik au waininayat, ningki wakerinak ni kuikiarin Yusen susarmiayi. Wikia nuna wainkau asan ujaajrume. ⁴Tura iincha seatraminak: Wait anearum, iisha Cristonu ainau yuuminak pujuinau kuik akuptuktin tsangkatruktaram turamiarmiayi. ⁵Tura iik nintimsar: Kuikiachin jumchik Yusen susachartimpiash, tu nintimsar pujarin, nuna nangkamasarang nukap susarmiayi. Antsu nuwá eemkar: Iikia Yusnau asar, iinu aa nuka mash Yusnawaitai tusar, nunia iincha: Iisha yaingtatjirme turamiarmiayi. ⁶Tura asaramtai Tito yaanchuik atumin jea, kuik irumratniun nangkamamia nuka ataksha turati tusar, atumin akupkatasar wakeraji. ⁷Atumsha Cristo tuke nekasampita tusaram, tura pengker nuikiartin asaram, tura Yuse chichame pengker nekau asaram, tura Yus miatrusrumek nintimrau asaram, tura iincha miatrusrumek anengkratu asaram, Cristonu ainau yuuminak pujuinau wait anentakrum kuikiasha nukap akuptuktinuitrume.

⁸Antsu wína umirtuktaram tusanka nunaka tatsujrume, antsu Macedonian-maya ainau chikich ainaun miatrusarang yaingkiartas wakerinau asaramtai, atumin nuna nekamtikiatasan wakerajrume. Tura atum nekasrumeash Yus anearam tusan, chikich ainaun nekamtikiatasan wakerajrume. ⁹Atumka ii Apuri Jesucristo wait anengkratairingkia tu awai tusaram nekarme: Nuka nayaimpinam pengké yuumatsuk pujayat, ju nungkanam yuumak pujumiayi. Tura ju nungkanam yuumak pujau, atumin anenmak jarutramkau asamtai, atumsha

nayaimpinam yuumatsuk pujustinuitrume.

¹⁰Wikia tu nintimsan pujajai tusan, atumin yaingtasan tajarme. Chikich musach atumek wakerau asaram, pengker nintimsaram kuik irumat nangkamamiarume. ¹¹Tura yaanchuik pengker nintimsaram kuik irumratasrum wakerimiarme nuka yamaisha turamin amatikia turataram. ¹²Nintimrataram. Aints ni kuikiarin Yusen susatas wakeramtaikia, Yuska nu aintsu kuikiarin takakun nekau asa, pengker nintimias nu kuikianka jurawai. Antsu kuikian takakchau ainaun: Kuik wína surustaram tusangka seatsui.

¹³Tura chikich aints yayaakrum, atumka yuumaktaram tusanka tatsujrume. Antsu mash metek yuumatsuk pujusmintrum tusan nunaka tajarme. ¹⁴Yamaikia niisha yuuminak pujuinau asaramtai, atumsha niisha yaingtinuitrume. Tura chikich kintati atumsha yuumakrumin, niisha nunisarang atumnasha yainmakartinitai. Tura asamtai mash yuumatsuk pujustinuitrume. ¹⁵Yuse chichame nunaka pachis tu aarmawaitai: “Aints nukap jukiarmia nuka ampirmaurin chikich ainaun susaru asar ampichu armiayi. Tura ni ampirmaurin chikich ainaun susarmau asar, nusha yuumatsuk pujuarmiayi.”^o

Pablo Titon Corintonam akupkamuri

¹⁶Wi atumin miatrusnak yaingtasan wakeraja nunisang Yus Titoncha nintimtikrau asamtai, wikia Yusen maaketai tajai. ¹⁷Wi Titon: Weta tamau asa: Ayu turutui. Tura niisha atumin anenmau asa, ningki wakerak atumin irastas winitatui.

¹⁸Tura Titojai tsanias weti tusan, ii yachiin chikichan akuptuktatjarme. Nuka Yusnum uwemratin chichaman nekas

pengker etseru asamtai, Cristonu ainau mash niin pachisar pengker chichainawai. ¹⁹Tura Cristonu ainau iruntramunam: Nu aints Titojai wekaasati tusar, tura nijai kuikian irumrarti tusar inaikiarmiayi. Tura ii Apuri maaketai titasar, iik wakerakur yuuminau wait anentakur kuik akuptuktasar turaji tiarmiayi. ²⁰Tura asar iin pachitmasar: Ningki kuikian wakerinak tinatsuash turamiarai tusar, Titojai tsanias ii yachi kuikian irumrarat tusar akupaji. ²¹Tura asar Yus wainmaunum tura aints ainau wainminamunam ii turaji nuna mash paan nekaawarat tusar turaji. ²²Nunia ju jimia aintsjai tsanias wearti tusar chikichan akuptuktajirme. Nuka Cristo takatrin tuke takakmastas wakerawai tusar nekaji. Tura atumin nekas pengker nintimturmau asa, yamaikia nuna nangkamasang Cristo takatrin eemtikias wakerawai. ²³Antsu Titon pachisar inintrinamtaikia: Juka Pablojai tuke tsanias wekainuitai titaram. Tura atumin yainmaktas tuke Yuse chichamen etserui titaram. Tura ii yachi jimiar Titojai tsaniasar wekainauncha pachisar inintrinamtaikia: Juka Criston pengker awajsartas, junia Cristonu ainau mash ni yachiin akupkari titaram. ²⁴Tura atumi anengkratairin Cristonu ainau mash nekaawarti tusaram, ii yachi ainau pengker wainkataram. Nu turakrumningkia atumin pachisar timiaji nuka pengke aintsuitai tiartinuitai.

Cristonu ainaun kuik akuptukmauri

9 ¹⁻²Atumka Cristonu ainau kuik akuptuktasrum wakerarme nuna nekau asan, nuna pachisnaka aatrachminuitjarne. Atumsha kuik susatasrum wakerau asakrumin, wikia Macedonia-nam wekaakun atumin pachisan: Acaya nungkanam pujuinau chikich musachti kuik irumtan nangkamawar yamaisha

tuke atumin yainmakartas wakerinawai tajai. ³Tura atumin pachisan: Yuminak pujuinaun nekasar kuikian akuptukartas wakerinawai, timiaja nunaka nangkami tawai turutiarai tusan wikia nakitajai. Tura asan kuik irumraram umistaram tusan, ii yachiin kempatam akupinajai. ⁴Tura wi ukunam Macedonianmaya Cristonu ainaujai atumin jeakrin, atum kuik irumratin umitsuk pujakrumka natsaartinuitrume. Tura ii atum pachisar: Kuik irumratniun umisari, tinu asar, iisha nunisrik natsaartinuitji. ⁵Tura kuik surimshim irumrairam tusan yamaikia tajarme: Atumek nintimsarmek: Iikia yuuminak pujuinau kuikiaka akuptuktatji tinu asaram, nu kuik eemkaram irumratarum. Turakrumin ii yachi ainau atumin eemkar jear, kuikian surimsuk suamun irumrarti tusan akupaji. Nunia wi atum mash irumraram pujarmin jeatattjai.

⁶Ju chichamsha nintimratarum: Aints arakan jumchik araangka, jumchik juuktinuitai. Antsu arakan nukap araangka, nukap juuktinuitai. Kuik suamusha nunisketai. ⁷Tura aints mash ni nintijai nintimina nunisarang ni kuikiarin pengker nintimsar Yusen susarti tajarme. Aints pengker nintimias Yusen ni kuikiarin sua nunaka Yuska aneawai. Tura asamtai: Nakitayatnak suajai tuuka nintimrashtinuitji. Tura: Kuik susata turutinamtai suajai tuusha nintimrashtinuitji. ⁸Yuska atumin tuke anenmau asa, atumka tuke yuumatsuk pujustaram tusa, pengker aa nuna mash suramtanka tujintatsui. Tura asa chikich aints nukap yaingtinun atumnasha nukap suramsatnuitrume. ⁹Yuse chichame tu aarmawaitai:

“Aints yuuminak pujuinaun nukap susau asamtai, Yuska ni pengker turamurinka pengké kajinmatsui.”^p

¹⁰Tu aarmau asamtai, Yuska aints ainautin: Arak araataran, tura yutasha yuwataran tusa, ii yuumamurin suritramtsuk tuke sukartin asa, arakan tsapantikiu tura nukap neremtikui. Tura atum pengker turamun pachis nunaka taku tawai.⁹ ¹¹Atum: Chikich ainausha yaingtaram tusa, Yuska waring achat mash atumnasha suramsatnuitrume. Kuik irumramu akupturmaktatrumu nu iisha mash jukir, yuumin ainausha susatnuitji. Turakrin nuka Yusen nukap maaketai tiartinuitai. ¹²Tura ni yuumamuri susamu asar, Cristonu ainu yuuminak pujuinaiusha yuumatsuk pujusartinuitai. Tura atum yaingmau asar, nuna pachisar Yusen nukap maaketai tiartinuitai. ¹³Atumka yuuminu kuik akuptukmau asar, Cristonam uwemratin chichaman miatrusarang umirinawai tusar nekarmawartinuitai. Tura asar: Nekas Yuska juuntapita tiartinuitai. Tura atumi kuikiari surimtsuk susamu asar, niisha Yusen maaketai tiartinuitai. ¹⁴Tura yuuminu kuik akuptuktaram tusa, Yuska atumin nintimtikramrau asamtai, atumsha wait anentakrum kuik akuptukmau asar nu kuikian jukiaru ainu atumin pachisar Yusen seatramiartinuitai.

¹⁵Yuska ni Uchirin suritramtsuk iin akupturmaku asamtai, iikia tuke inaitsuk Yuska maaketai tiarmi.

Pablo ni takatrin pachis chichasmauri

10 ¹Aints ainu wina pachitsar chichartinak: Pablosa iijai pujakka mianchawapita, antsu arak pujus kartan akupturmak: Miajuitjai tusa, kakarman chichaayi turutinawai. Tu turutinau wainiatnak, Cristo winaka pengker nintimtursau asamtai, tura wait anentruru asamtai, wikia Cristo nintimia

nunisnak atumin chicharjarme. ²Tura atumi irutkamuri iin pachitmasar chichainak: Junia nungkanmaya ainawa nunisarang pujuinawai, tinaunka ¿waruka nusha tarume? tusan chicharkatnuitjai. Tura iin pachitmasar nangkamiar tsanuminak pujuinamtaikia, wisha atumin jeamtaikia, nu aints ainaun kakarman chicharkai tusaram Yus seatritaram. ³Iikia ju nungkanam pujakri-sha, junia nungkanmaya maanina nunisrikia iikia maaniatsji. ⁴Junia nungkanmaya ainu nangkijai maaninawai. Antsu ii nangkiringkia Yuse kakarmarintai. Nujai iwianchi kakarmari nepetji. ⁵Tura asar junia nungkanmaya ainu nangkami nintimtainkia Yuse kakarmarijai nepetji. Tura Yus tu pujawai tusar, nekatan nakitinayat ningki nintimsar: Nekau aintsuitji, tinausha Yuse kakarmarijai nepetji. Tura Cristo tuke pengker umirkarmi tinu asakrin, junia nungkanmaya ainu nintimtairingkia waring achat mash tu awai tusa iincha nekamtikramji. Ju nungkanmaya ainu nintimina nuka nintimtsuk pujakur iwianchi nintimtairisha nepetji. ⁶Tura atumka Cristo miatrusrumek umirkurminkia, nuniangka chikich ainu nangkamiar Cristonuitjai tinayat, Criston umirtsuk pujuinamtaikia, ni turamuri pachisar chicharkatnuitji.

⁷Atumka aints ainu itiur nintiminawa tusarmeka paanka nekatsrume. Antsu aints: Wikia Cristonuitjai tauka iincha pachitmas: Wiya nunisarang Cristonu ainawai, tu nintimratnuitai. ⁸Tura Yus ni kakarmarin wina surusu asamtai: Wina chichamur umirtuktaram takuncha natsaarchatnuitjai. Atum mengkakat tusangka, Yuska winaka akuptukchamiayi, antsu Yus miatrusrumek umirkataram tit tusa, winaka akuptuk-

miayi. ⁹Tura asamtai atum shamruktaram tusanka papinka akuptatsjarne. ¹⁰Antsu wina pachitsar: Niisha papin aar kakarman chichartamji. Antsu ni taa mianchawaitai, tura asamtai ni chichaa-muringkia pachischamnawaitai turutinawai. ¹¹Turutinauka nunasha nekaawarti: Iikia arák pujayatur, papi aarar chicham akupaji nunisrik atumjai pujakrikia umikatjai.

¹²Aints ningki nintimtumasar: Iikia timiá pengkeraitji tinau wainiatrik: Iikia nu aintsjai metekaitji tichamnawaitji. Tura niya tumawaitji tichamnawaitji. Nu aints ainauka ningki nekapmaminawai. Tura nangkamiar mai nuwantak chichar-nainak: Iikia timiá pengkeraitji tumaminauka nintinchau ainawai.

¹³Antsu Yus tu nintimsuk asataram, tinu asamtai, iikia nu aintsjai metekaitji tichamnawaitji. Antsu Yus tu takakmastaram tusa akuptamu asa, iinka atumin jeatnu tsangkatrakamiaji. ¹⁴Yus iin akuptamchamtaikia atumin jeachminuyaji. Antsu Yus iin nekas akuptamkau asamtai, iiyá eemkir atumin Cristo chichame ujaimiajrume. ¹⁵Tura ukunam chikich aints Cristo chichamen etserin jear, atumin yainmakaru asaramtai, nu aintsu takatringkia ii umismiaji tatsuji. Antsu atumka miatrusrumek Yus nintimsaram pujakrumningkia, Yus wakera nunisrik atum nukap yaingtasar wakeraji. ¹⁶Tura atumin jear, ii takatri Corintonam umisar, nuniangka nangkamakir, chikich nungka ainamunam Yusnum uwemratin chicham etserkatasar wakeraji. Antsu chikich ainau takatrin pachisrikia: Nu takatka iik takakmasmaji tichatnuitji. ¹⁷⁻¹⁸Aints ningki nintimtu-mas: Pengker takakmasjai taunaka ii Apuringkia: Pengker takakmame tatsui. Antsu ii takatri tu awai tusa, ii Apuri

ningki nekau asa: Wina takatruka pengker takakmame, titinuitai. Tura asamtai aints ainau: Miajuitjai tumam-tsuk, antsu Yusnak: Juuntapita tiartinuitai.

**Pablo anangkartin ainau
pachis chichasmauri**

11 ¹Yamaikia nintinchau chichai-nawa nunisnak jumchik atumin chicharkatasan wakerajrume. Tura asamtai wait anearum tsangkuurtaram. Tura nekasrum anturtuktaram. ²Wiyá atumin Cristo chichamen etserkau asamtai, Cristonu wajasmiarume. Tura asakrumin yamaikia anangkartinu chichame umirkairap tusan, nawan aintsjai tumichu kichik aintsu ninumkati tusa, ni aparí suruku asa, chikichjai pujuschatí tusa kasmatniayi. Yuscha nunisang ni aintsri ainautin timiá anenmau asa, chikich yus umirtsuk asataram tusa, ni aintsrin kasmatai pujawai. Wisha nunisnak atumin aneau asan kasmatajrume. ³Nu nangkamtaik napi anangkartin asa, Evan anangkamia nunisarang nu aints ainau atumin anangkramawarai tusan napchau nintimjai. Tura atum tuke pengker nintimsaram Cristo miatrusrumek umirkayatrum, atumin yamai anangkraminamtai, Cristo umirat inaisairam tusan napchau nintimjai. ⁴Tura asamtai aints Yus akupkachmautiat atumin jeartamiar, ii Jesús pachisar chicham etserji nunisarka etsertsuk, antsu Jesúsán pachisar niish etserinau wainiatrumek: Jusha pengkeraitai tusaram anturume. Tura Yuse Wakani pachisar ii etserji nunisarka etsertsuk, chikicha wakanin pachisar niish etserinau wainiatrumek: Jusha pengkeraitai tusaram anturume. Tura Yusnum uwemratin chicham ii

etserji nunisarka etserinachu wainiatrum, antsu chikich chichaman uwemrashtinun etserinau wainiatrumek: Jusha pengkeraitai tusaram anturume. ⁵Tura nu aints ainau Yuse chichamen timiá shiirman etserinawai tinau wainiatun, wína nangkatusarka Yuse chichamenka etserinatsui, tu nintimsan pujajai.

⁶Wikia antukchamnaun chichau ayatnak, Yuse chichamen paan nekajai. Tura atumjai pujakun, atumin nu chichamnasha tuke nekamtikiamjarme.

⁷Tura mianchau asan, uwejruijai takakmaknasha, atumin pengker awajsatasan akirkataram tutsuk, antsu kuikiachujai nangkamin Yusnum uwemratin chichaman atumin etserkamiaja žnu pachisrumek tunaawitai tarum? ⁸Atumin Yuse chichamen etserkatanan chikich nungkanmaya Cristonu ainau kuikiarin jukin, nujai yuumamurnaka sumarminuyajai. ⁹Tura atumin pujusan, kuikian yuumaknaka atumniaka seachmiajrume. Antsu Macedonianmaya Cristonu ainau jear, wína yuumamurnaka surusarmiayi. Tura asan atumniaka: Kuikiaram surustaram tusanka seachuyajrume, tura yamaisha kuikianka seashtatjarme. ¹⁰Cristo nekas chichaman wínaka nekamtikruau asamtai, Acaya nungkanmaya ainau wína pachitsar: Nuka ii kuikiarinka pengké nakitawai, tuke turutiartatui tusan nekajai.

¹¹¿Atumin aneachkunak tu chicharjaram? Atsa, wikia atumin nekas nup aneau asan tu chicharjarme. Nunaka Yuska nekawai.

¹²Tura wi turaja nunaka tuke turatatjai. Chikich chichaman etserin ainau ningki nintimtusar: Iikia Pablo tura nunisrik turaji, tinu ainau nuna turutiari tusan, wikia Yuse chichamen yamaikia etserja nunisnak tuke etserkatatjai. ¹³Tura asan

nunasha tajarme: Nu aints ainau Yus akupkachmau asar anangkartin ainawai. Tura asar Cristo iin akuptamkamji, nangkamiar anangminak tinawai. ¹⁴¿Tura auka waruka timiá shiirmancha chichaina? tuuka nintimrashtinuitai. Satanás tuke anangkartin asa, Yuse awemamuri paannium pujawa nunisang wantinui. ¹⁵Satanás tu wantinu asamtai, ni inatiri ainausha: Nekasar iikia pengker aintsuitji tusar, Yuse inatiria nunisarang wantininawai. Antsu anangkartin asar, ni tunaarijai metek tuke wait wajaktinnun jeartinuitai.

**Pablo ni wait wajakmauri
pachis ataksha etserkamuri**

¹⁶Ataksha nunasha tajarme: Aints kichkisha wína pachitas: Waurkawitai tu nintimtusashtinuitai. Antsu tu nintimtusaram pujakrumningka, wisha wiki nintimtusar: Miajuitjai tumamtiasan, waurinak chichainawa nunisnak chichaktin tsangkatruktaram. ¹⁷Wi yamaikia taja nunaka ii Apuri tita turutchau wainiatnak wikia wiki nintimsanak: Miajuitjai tusan, waurinak chichainawa nunisnak chicharjarme. ¹⁸Junia nungkanmaya ainau untsuri: Miajuitjai tumaminamtaikia, wisha nunisnak: Miajuitjai tusan, jumchik atumin tu chicharkatatarjarme. ¹⁹Atumka nekawaitjai tayatrum, waurinak chichainau wainiatrum, pengker nintimsaram anturume. ²⁰Aints atumin inatminak, tura atumnau aa nunaka juwinak, iisha miajuitji tusar, atumin yapiin awataminamtaisha, atumka achikmawa nunisrumek pujayatrum, nu aintsu chichame anturin arume. ²¹Wikia natsaamayatnak atumin tajarme: Iikia kakaichu asar, atumjai pujakrishna tuuka pujuschamijai.

Antsu waurinak chichainawa nunisnak chichaayatnak nunasha tajarme: Chikich

ainau miajuitjai tumamsar chichainawa nunisnak wisha chichakminuitjai.

²²Niisha hebreo ainamtaisha, wisha nunisnak hebreo aintsuitjai. Tura niisha Israela wearinjai tinamtaisha, wisha nunisnak Israela wearinjai. Tura niisha Abrahama wearinjai, tinamtaisha, wisha nunisnak Abrahama wearinjai tajai.

²³Tura niisha: Cristo inatirinjai tinamtaisha, wisha nuna nangkamasketjai. Antsu nunaka takun waurua nunisnak chichaa-jai. Wikia nu aints ainaun nangkamasnak kakarman takakminuitjai. Tura nu aints ainaun nangkamasnak kársernum untsuri engkeamuitjai. Tura nu aints ainaun nangkamasnak wikia awatramuitjai. Tura nu aints ainaun nangkamasnak untsuri jaachak wajakmiajai. ²⁴Tura achirkar judío ainau nuwap chapikmarmaujai awá awataka treinta y nueve (39) awaturarmiayi. Tura ataksha achirkar, tura ataksha achirkar, cinco (5) achirkar nunisarang awaturarmiayi. ²⁵Numijaisha kampakam katsumrukarmiayi. Tura mantuwartas kayajai tukuriarmiayi. Tura kanujai wekaakun juun entsanam kampakam ukanmiajai. Chikich kanu ukanmatai, wikia kichik kinta kashisha, tura tsawaisha juun entsanam taunum achimkan nanasmiajai.^t

²⁶Wikia jinta wekaa wekaaka nukap wait wajayajai. Tura entsa nujangkruam-tai, katingtatkaman wait wajayajai. Tura jinta wekaaknasha, kasa ainau achirkar mantuwarai tusan, tura wi weau ainausha, tura judíocho ainausha wína achirkar mantuwarai tusan shamnuyajai. Tura yaktanam pujusan, wína achirkarai tusan nintimnuyajai. Tura aints atsamunam pujusan, pachim ainau yuruwai tusan shamnuyajai. Tura juun entsanam ukani tusan shamnuyajai. Tura aints nangkamiar: Iisha Cristonuitji tusar,

Cristonu ainaun anangkawarai tusan nintimnuyajai. ²⁷Wikia taka takakmaka yaweyajai. Tura kanutskesha tsawainuyajai. Tura yutancha yuumakun yaparnuyajai. Tura kitamtancha kitamnu-yajai. Tura untsuri kinta ijarman pujuyajai. Tura entsatirnasha yuumakun tsetsekjai wait wajayajai.

²⁸Tura nuna nangkamasnak ¿Cristonu ainau chikich chikich yaktanmasha itiuur pujuinawak? tusan kintajai metek nintimnuyajai. ²⁹Tura Cristo umirin kakainachmataisha, wisha nunisnak kakarchamin nekapniajai. Tura aints ainau: Cristo nemarkin tunau takasti tusar nintimtinamtaisha, wisha natsaamakun tunau takamtikinaun kajerniajai. ³⁰Wiki nintimsanak: Miajuitjai tumamtanka nakitajai. Antsu wína pujutrun pachisan chichaaknaka, wi wait wajakmaurun pachisan chichastatjai. ³¹Wi taja nuka nekasaintai. Yus nunasha nekawai. Ii Apuri Jesucristo Apaachiri asamtai, tuke Yuska maaketai titinuitji. ³²Wi Damasco yaktanam jeamtai, juun apu Aretas chikich apun: Nu yakta apuri ata tusa inaikiamu asa, ni suntari ainaun wína pachitsar: Nu aints achiktaram tama, yakta waitirin mash epeniar winaka nakarkarmiayi. ³³Turutinamtai Cristonu ainau winaka juun changkinnum engketawar, yakta wenukri angkaakmaurinia naekjai nungka itararu asaramtai uwemramiajai.^u

**Pablo karanma nunisang
Criston wainkamuri**

12 ¹Wiki nintimsanak: Miajuitjai tumamtanka nakitajai. Antsu karanma nunisnak ii Apuri wantinkamun pachisan yamaikia ujaktatjarme. ²Aints Cristo nemarkin wi waintain Yus ni pujamurin nayaimpinam iwiakmiajai.

¿Tura namangtukeash iwiakia? Turachkusha ¿wakaninkeash iwiarkaya? tusanka nekatsjai. Antsu Yusek nekawai. Nu turunamuka yamaikia catorce (14) musach nangkamaruitai. ³Ataksha tajarme: ¿Nekasash namangtukeash nayaimpinam wakaya? tusanka nekatsjai. Turachkusha ¿wakaninkeash Yus jurukia? tusanka nekatsjai. Yusek nekawai. ⁴Tura wainiatun nunasha nekajai. Cristonu ainau jakau pujutinam iwiakmau asa, chichaman aints kichkisha etserkachminun antukmiayi. Tura ni antukmia nunaka etserkaip tusa suritkamiayi. ⁵Nu turunamun pachisan: Nekas pengkeraitai titinuitjai. Tura wiki nintimsanak: Nekasan pengkeraitjai tumamchamna-waitjai. Antsu wina wait wajakmaurun timia untsuri amia nuna pachisan chichakminuitjai. ⁶Wikia chikich aintsun nangkamakuitjai tumamtiasan wakeraknaka, wikia nunaka nangkamniaka tumamchainjai, antsu nekasan tumaminjai. Turayatun nunaka tatsujai. Atum wi turamur wainkaram, tura wi chichaamur antukrum, itiu pujawa tusaram paan nekararam, nuke nintimtusararam tusan wakerajai.

⁷Wi nayaimpinam wainkamiaja nu timia pengker asantai, nangkami nintimtumas: Miajuitjai tii tusa, Satanás wait wajamun jangkia tumaun akuptukat tusa Yuska tsangkamrukmiayi. ⁸Tura asan nu wait wajamurun jurutkit tusan, ii Apurin kempatman seamijai. ⁹Wi seamaitiat wina chichartak: “Wait wajamur jurutkita” turutme nunaka turashtatjame. Antsu tuke inaitsuk pengker awajsatattjame. Tura asantai wina kakarmarjai kakaichu ainaun kakamtikraja nunajai amincha kakamtikratattjame turutmiayi. Turutin asantai, Cristo ni kakarmarin wina surusti tusan, kakarmachutiattak pengker nintimsan Yusen maaketai tajai. ¹⁰Tura Cristonu

asan, wina katsekrinamtaisha, tura wina mantuwartas wakerutinamtaisha, pengker nintimsan pujajai. Wi yuumakun pujayatnak, nunia yumtin pujayatnak, nunia wina kakarmarka atsurtau wainiatnak wikia pengker nintimsan pujajai. Cristo ni kakarmarijai wina kakamtikruru asantai, wina namangkruka kakarmachu ayatnak kakaram nekapeajai.

Pablo Corintonmaya ainaun pachis timiauri

¹¹Wi pengkeraitjai tumamkun waurua nunisnak chichaajai. Antsu atumsha wina pachitsaram pengker chichartukmin ayatrumek, atumka chichachu asakrumin tu chichaajai. Wikia mianchau ayatnak, chikich ainau nangkamiar: Cristo akupkamuitji tinauka wina nangkatusarka ainatsui. ¹²Wikia atumin jean, wait wajasan Yuse takatrinka takakmin ayajai. Tura wainchatai takatnasha takauyajai. Tura Yuse kakarmarijai jau ainauncha tsuwayajai. Tura asantai: Nekas Yus akupkamuitai tusaram nekaramiarume. ¹³Tura chikich yaktanam Cristo umirin pujuinauncha atumjai metek pengker awajnuyajai. Turayatun atumin: Kuik surustaram tusanka pengké seachmiaj-rume. Tura nuka tunaawaitmatikia, wait anearum tsangkutrutaram.

¹⁴Atumin jimia irasu asan, jujaingkia atumin kempatam irastasan wakerajai. Tura atumin jeanka, etsermaunum akirkatararam tichattajarme. Atumnau aa nunaka wakeratsjai. Antsu atumka Cristo miatrusrumek umirkatararam tusan wakerajrume. Uchikia ni aparinunka kuikian kiauntukchamnawaitai, antsu apar ni uchirinun kuikian kiauntukminuitai. ¿Tura atumka wina uchirchaukitrum? ¹⁵Wikia atumin yaingtasan wina kuikiarnaka amuktattjai. Tura atumin yaingtasan, taka takakmaka pimpikin jaaknasha jakattjai, tu nintimsan

pujajai. ¿Wikia atumin miatrusnak aneamaitiatrumsha waruka winaka anentsurme?

¹⁶Wikia atumi kuikiarin pengké jurukchamajrume. Tura waininayat chikich ainau wína pachitsar: ¿Nuka tsanukratin asa, itiu atumi kuikiarin jukishtatua? turutinawai. ¹⁷¿Itiu atumniasha tsanurmiajrume? ¿Wi aintsun atumin akuptukmiaja nuka atumniaka tsanurmarmakiam? Atsa, atumniaka tsanurmarchamiarume. ¹⁸Antsu wikia Titon chicharkun, atumin jiiriti tusan akuptukmiajrume. Tura chikich aints Cristo nemarniun nijai tsanias weti tusan akupkamiajai. Tura ¿Titosha atumniasha tsanurmarmakiam? Atsa. Niisha iiya nunisang Yuse takatrin takakmawai. ¿Nekaschaukai?

¹⁹Wína aneetir yatsur ainautiram ¿atumka itiu nintimrume? Atumka wína pachitsaram: Niisha nekas pengker aintsuapita turutiatar tusa, ¿ni pengker turamurin pachis chichaatsuash, tu nintimursarmek pujaram? Antsu wikia tuuka nintimsujai. Wikia Cristonu asan, Yuska winasha nekaruapi tusan, atumin kakamtikratasan tu chicharjarme. ²⁰Wi atumin jeancha, pengker pujuinaun wainkarchatjash tu nintimsan pujajai. Tura atumsha wína waitkatasrum wakerutarme nunisrumka winaka waitkashtatrum, wi tu nintimsan pujajai. Wi atumin jeamtai ¿pasé chicharnaiyamusha achanpiash? ¿Tura suwirpiaku jiniamu achanpiash? ¿Tura kajernaiyamusha achanpiash? ¿Tura wi nangkamakuitjai tichartimpiash? ¿Tura mai jiyani wajamusha achanpiash? ¿Tura aujmatnaiyamusha achanpiash? ¿Tura wikia miajuitjai tumamchartimpiash? ¿Tura kanarar pujamusha achanpiash? tu nintimkun yumtin nintimjai. ²¹Tura wi atumin jeamtai, atumi tunaari inaitsuk pujakrumningkia, Yus wína inatsatrai

tu nintimsan pujajai. Untsuri atumjai tsaniasar pujuinaun ni yaanchuik tunau turutirincha inaitsuk, pasé aa nuna nintimtinak, tura nuwan tsanirmatan wakerinak, tura ni wakeramurin tuke nintiminak pujuinaumtaikia, wikia atumin jean juutancha juutminuitjai tajarme.

Inangnamu chicham akupkamuri

13 ¹Yaanchuik atumin jimia irasmiajai. Tura jujaingkia kempatman irastatjai. Tura atumin jean, itiu pujarme tusan, chichaman nekaatasan, aintsun jimiaarchiksha, tura kempatmankesha iniastatjai. ²Yaanchuik atumin jean, tunau takau ainaun, tura chikich ainauncha mash wi timiaja nunaka yamaikikia arák pujayatun, ataksha aatjarme: Wi ataksha atumin jean, tunaarum inaiyachkurminka tsangkurashatjarme. ³Tura wi Cristo kakarmarijai chichaaja nu nekaatasrum wakerau asaram nekaamnawaitrume. Cristoka kakarmaitai. Tura asa ni kakarmarin atumin nekamtikramume. ⁴Cristo namangke ii namangkea nunisang kakaichu amiayi. Tura asamtai niincha numi winangmanum maawarmiyai. Tura maawarmaitiat Yuse kakarmarijai jaka nantakin asa tuke iwiaakuitai. Ii namangkesha kakaichutiatur Cristonu asar, tuke Yuse kakarmarijai atum yaingtasar pujaji. ⁵Atumka anangmamawairam tusaram: Nekasnash Yusnawashitaj tusaram nekaamatarum. ¿Jesucristo wína nintirun nekasampi pujurtawa tusaram atumka nekatsrumek? ⁶Antsu iikia nangkamrikia Cristo umirmuitji tatsuji. Atumsha nusha nekaatarum tusar wakeraji. ⁷Tura atum tunau takasairam tusar Yusnasha seatjirme. Tura iincha pengker chichartamsarat tusarkia nunaka tatsujrume. Antsu atum nekas pengker aa nu turatarum tusar nunaka tajarme. Tura iin pachitmasar pasé chichainauka nuka

pachiatsji. ⁸Iikia Yuse chichame nekas aa nuka pengké yapajiachmin aji. Antsu ii turaji nuka nekas chicham pengker aa nujai turaji. ⁹Tura asakrin iinka pachitmasar: Kakaichu ainawai turaminawainai, atumka kakaram wajakrumningkia iikia waraaji. Tura atum pachisar: Miatrusarang Yusen umirkarat tusar Yuscha seaji. ¹⁰Tura asar atumin pasemantikrarat tusangka, Yuska winaka akuptukchamiayi. Antsu atumin kakantikrat tusa, Yuska winaka akuptukmiayi. Tura asamtai wi atumin jeanka, kakarman chicharkaijrum tusan, winitsukju papin aatjarne.

¹¹Ayu, yatsur ainautirmin umaarutirmincha, inangnamunam nunasha tajarme: Pengker nintimsaram pujusta-

ram. Tura Cristojai tuke kiakanirtaram. Tura miatrusrik Cristo umirkarmi tusaram chicharnaikiataram. Tura kichik ninti nintimtunistaram. Tura pengker awajnisaram pujustaram. Tu pujakrumningkia, Yus atumin anenmau asa, tura nekas angkan pengker nintimikiartin asa, atumniasha tuke pujurtamsatrume. ¹²Pengker nintimtunisrum chicharnaikiataram. ¹³Junia Cristonu ainawainai mash atumin chichaman akupturminawai.

¹⁴Ii Apuri Jesucristo atumniasha tuke yainmakarti. Tura Yuska ni anengkratairin atumniasha nekamtikramawarti. Tura Yuse Wakani atumi nintin engkema, tuke atumjai tsanias pujusti tajarme. Maaketai.

Pablo Gálatas Ainaun Papin Akuptukmauri

Chicham akuptukmauri

1 ¹Wiitjai Pabloitjai. Aints ainau: Wína chichamur etserkata tusarka akuptukcharmiayi. Tura Yus chikich aintsun akatak: Pablo wína chichamrun etserin ati tusam inaikiaa tusangka, wínaka akuptukchamiayi. Antsu ii Apaachiri Yus ni Uchiri Jesucriston jakamunmaya inankimia nu: Wína chichamur etserin ata tusa akuptukmiayi. ²Cristonu ainau wijai iruntrar pujuinausha Galacia nungkanam Cristonu ainautirmin chichaman akupturminawai. ³Ii Apaachiri Yus ii Apuri Jesucristojai wait anentraminak atumin pengker awajtamsarti tusan, tura angkan pengker pujustinasha suramsarti tusan seatjarme. ⁴Ii Apaachiri Yuska nuna wakerau asa, junia nungkanmaya ainau tunau turamun inaisarat tusa, iin uwentikramratas ni Uchirin akupturmaku asamtai, Cristo ii tunaarin sakturmartas jarutramkamiayi.^a ⁵Tura asamtai Yuska juuntapita tusar tuke maaketai tiarmi. Tu ati.

Chikich uwemratin chichamka atsawai

⁶⁻⁷Maj ¿atumka nekasumek kakarmachu Yus umirat inaisarum? Cristo iin timiá anenmau asamtai, Yus wína aintsur ataram tusa, atumin eatmaku wainiatrum, tura chikich uwemratin chicham atsau wainiatrum, chikich aints atumin tarutmiar, Cristonam uwemratin

chichaman yapajiwartas wakerinau wainiatrum, atumka nangkamrum: Nu chichaman umirkunka uwemratatjapi tarume. ⁸Antsu wikia tajarme: Iikia uwemratin chicham Cristo pachisrum etserkataram, Yus turamin wainiatrum yapajiar etserkurningkia, Yus iinka wait wajaktiniun suramsatnuitji. Tura Yuse awemamurisha Yusnum uwemratin chichaman ii etsermiayi nuna yapajiwartas etserinakka nusha nunisarang wiasmamkartin ainawai. ⁹Yaanchuik atumin timiajrume nuna ataksha nunisnak tajarme. Aints atumin anangkramawartas chikich uwemratin chicham iikia etserkachmiayi nuna etserinakka wiasmamkartin ainawai.

¹⁰Wikia nuna takun, aints ainau wína pengker nintimtursarat tusanka nunaka tatsujai, antsu winaka Yus pengker nintimtursati tusan nunaka tajai. Antsu aints ainaun pengker awajatsatnaka nunaka tatsujai. Antsu aints ainau wína pengker awajtusarat tusan nuna takunka, Cristo inatiringkia achainjai.

¿Pablo itiu Yuse chichame etserin wajasmiai?

¹¹Yatsur ainautiram umaarutirmesha, Cristonam uwemratin chichaman wi etserja nuka aintsu chichamenchuitai. Nu nekaataram tusan tajarme. ¹²Aints ainauka nu uwemratin chichamnaka uatkacharmiai. Tura nu chichamnaka

a 1.4 (1.Tim. 2.5-6)

aints ainauka nuiturcharmiayi. Antsu Jesucristo wína wantinturkau asa, nu chicham etserkata tusa nekamtikruamiayi.^b

¹³Tura wi yaanchuik itiuur pujuyaja nuka antukmiarume. Tura judío umirkatin chichaman miatrusnak umirkataj tusan, wikia Cristo aintsri ainaun tuke kajerakun, tura mash amuktasan wakera-kun, miatrusnak wait wajaktiniun suyaja nuka antukmiarume.^c ¹⁴Tura wína wear ainau wijai metek yaanchuik ii juuntri timiauri nuimiaru ainau nuna nangka-masnak miatrusnak umirnuyajai. ¹⁵Tura wikia akiintsain, Yus wait anentrak wína eatkau asa: ¹⁶Wina Uchir itiuur awa tusa, paan nekamtikruau asa: Judíocho ainamunam uwemratin chicham wína pachitsam etserkata tusa akuptuku asantai, wikia chikich ainaun warinak etserkaintaj tutsuk, nunaka inintrusuk pujuyajai.^d ¹⁷Tura wína eemkar Cristo nuiniatiri armia nuna chichamen nekaatasnaka Jerusalénnumka wechamijai. Antsu Arabia nungkanam aints atsamunam Cristo chichamen nintimratan wemijai. Nunia waketkin ataksha Damasco yaktanam tamijai.

¹⁸Nunia kempatam musach nangkamaramtai, Pedron jiiistan wemijai. Tura Jerusalénnum jean, nuni Pedrojai jimia tuming pujusmijai.^e ¹⁹Tura ii Apuri yachiin Santiagoncha wainkamijai. Antsu Cristo nuiniatiri chikich ainaunka wainkachmijai. ²⁰Wi aarja juka nekasaintai. Yusjai tajai. Waitchawaitai.

²¹Nunia Siria nungkanmasha, tura Cilicia nungkanmasha wemijai. ²²Antsu Cristonu ainau Judea nungkanam pujuinauka winaka waitkacharmiyai. ²³Antsu wína pachitsar chichaman antukar: “Yaanchuik Cristonu ainautin

wait wajaktiniun suramnuyaji nunaka inais, iin yaanchuik amutmaksat wakerinutiat, yamaikia Cristonam uwemratin chichaman etserak wekaawai,” tiarmiayi. ²⁴Tura asar wína pachitsar: Yuska juuntapita tiarmiayi.

Cristo nemarnu juuntri ainau Pablon pengker awajsamuri

2 ¹Nunia catorce (14) musach nangkamaramtai, wikia Bernabéjai ataksha Jerusalénnum wemijai. Tura Tito wijai wekaasati tusan jukimijai.^f ²Tura Yus: Weta tusa akuptuku asantai, nuni jeamtai winaka: Nangkamim judíocho ainamunam Cristo chichame etseru weame, turutiarai tusan, Cristo nemarnu juuntri kanakar pujuinamunam nuni pachinkan: Yusnum uwemratin chichaman judíocho ainamunam tu etserjai timijai. ³Tura Titosha judíocho-tiat, wijai wekaimia nuna pachisar: Nuwapchirin charutkami ticharmijai. ⁴Tura chikich aints ainau anangminak: Iisha Cristonuitji tusar, aneachmau ii pujamunam wayaawar, ii Cristo Jesúsnum angkan pujamun nekarmawar, napchau awajtamkartas wakerutmiarmijai. Tura iin chichartaminak: Nekasrum uwemratasrum wakerakrumka, ataksha Moisésa aarmauri umirkataram turamiarmijai. ⁵Tura wainiatirik atum Yusnum uwemratin chicham antukmiarume nuka tuke yapaijsuk antuktaram tusar, nu aints ainauka iikia pengké pachischamijai.

⁶Tura Cristonu ainau juuntrisha winaka yamaram chichamnaka ujakkacharmiyai. Nuka Cristonu ainau juuntri ainayat, Yus mash aints ainautinka metek jiirmaji tusan, nu aints nekau irunuitmataisha, wikia nunaka pachiatjsai. ⁷Tura wína

b 1.12 (Efes. 3.3) **c** 1.13 (Hech. 8.1-4;22.4-5;26.9-11) **d** 1.16 (Hech. 9.3-6)

e 1.18 (Hech. 9.26-30) **f** 2.1 (Hech. 11.30;15.2-4)

yamaram chichaman pengké ujatkacharu wainiatnak, Yuska: Cristonam uwemratin chicham judíocho ainamunam etserkata tusa, winaka akuptuku asamtai, antsu Pedronka judío ainamunam Cristonam uwemratin chichaman etserkati tusa akupkau asamtai nunaka nekaawarmiayi.

⁸Tura Pedron: Judío ainamunam weta, tímia nu Yusek winasha: Judíocho ainamunam weta tusa akuptukmiayi.

⁹Tura asamtai nuna nekaawar Santiagosha, nunia Pedroscha, nunia Juanscha Cristonu ainau juuntri asar, wína pachitsar: Nekas Cristo akupkamuitai, tu nintimtursar, winasha tura Bernabéncha: Nekasar metek nintimji tusar, ii untsur uwejen achirtamkar: Atumka judíocho ainamunam werum, Cristo chichame etserkataram. Antsu iikia judío ainamunam weri, Cristo chichame etserkatatji turammiamiaji. ¹⁰Tura iin chichartamianak: Judío yuuminak pujuinuu yaingtaram turutinamtai, wikia nunaka wakerau asan tuke turinuyajai.

Pablo Pedron chicharkamuri

¹¹⁻¹²Tura wi Antioquía yaktanam pujai Pedro tamiayi. Tura taa judíocho ainau iruntramunam pachitsuk yuwamiayi. Tura Santiagonumia akupkamu ainau kaunkaramtai, Pedro nu aintsun wainak: Ameka judíotiatmesha tura nuwapchiram charukmautiatmesha ¿waruka judíocho ainaujaisha iruntram yuwame? turutiarai tusa, natsaamak judíocho Cristonu ainaujai iruntrar yutan yuwamu inaisau asamtai, wikia Pedron wainkan tupnik chicharkamiajai.^g ¹³Tura Pedro judíocho ainaujai iruntrar yuwamun inaisamtai, chikich judío Cristonu ainau Pedroa nunisarang judíocho Cristonu ainaujai pengker nintimsar iruntrar yuwaariat, nunia yapajiasarang nintimsar, judíocho

ainaujai yutanka inaisarmiayi. Turinuu asaramtai Bernabéscha nunisang turamiayi. ¹⁴Turamtai nuna jiisan, Cristonam uwemratin chichaman mianak umirkacharu asaramtai, wikia mash antinamunam Pedron chicharkun: “Ameka judíotiatmesha nuwik judíocho ainawa nunisam pujayatmesha ¿waruka yamaikia judíocho Cristonu ainaun chicharkun: Judío ainau pujuina nunisrumek atumsha pujustaram tame?” timiajai.

Judío ainau tura judíocho ainausha mai metek uwemrartin ainawai

¹⁵Iikia nekasar akiinamunmaya judío asar, chikich nungkanmaya tunaarintin ainaujai pengké metekchawaitji.

¹⁶Turayatur iikia nusha nekaji: Aintsti Moisés umirkatin chicham umirkarkia uwemratatji tayatrik, tuuka uwemrashtinuitji. Antsu Cristo nekasampita takurkia, tunaanumia uwemratatjiapi tusar nekaji. Nu nekau asar, Jesucristo nekasampita takurkia, Yus pengker awajsatnuitji. Antsu Moisés umirkatin chichaman umirinaksha kichkisha tunaanumiangka tuuka uwemrachartin ainawai.^h

¹⁷Tura judío ainautikia judíocho ainaujai metek tunaarintin asar: Cristo ii tunaarin sakturmaru asamtai, angkantaitji takurkia nuka nekasar taji. ¿Antsu Cristoka iinka: Judíochua nunisrumek tunau turataram turamjik? Atsa, pengké turamtsuji. ¹⁸Nintimrataram. Wikia yaanchuik: Tunau inaisataram timiajai nuna wainkin: Ataksha tunau turataram takunka, wikia nekasar tunau wajasmnuitjai. ¹⁹Moisés umirkatin chichaman wikia umirkatatkaman pengké tujinnuyajai. Tura Moisés umirkatin chichaman umirkachu asan, jakamin nekapnuyajai. Tura yamaikia Yus wakera nunak

umirkatasan, Moisés umirkatin chicham-naka pachischamnawaitjai. ²⁰Yuse Uchiri wína anentu asa, wína uwentikrurtas ningki wakerak numi winangmanum jarutruku asamtai, wikia Cristo nekasampita tinu asan, Cristojai numi winangmanum jakawa nunisnak tura nantaknua nunisnak nintimjai. Tura Cristo nekasampita tau asan, tura pujut nangkankashtinun jukin asan, yamaikia Cristonak nintimsan pujajai.ⁱ

²¹Yus iin timiá pengker awajtamsatas ni Uchirin aukpturmaku asamtai ¿warukanak Cristoka nangkami jakamiayi titaj? Wi Moisés umirkatin chichaman umirkan uwemramin amataikia, Cristoka nangkami jakaayi. Antsu iin uwemtikramratas jarutramkau asamtai nuka tichamnawaitji.

Cristo nekasampita takur uwemrawaitji

3 ¹Gálatas ainautiram ¿warukaya waweamua nunisrumkesha timiá wauru wearme? ¿Yaachia atumin chicham nekaschau umirkataram tusasha anangkramamiarume? Cristo atumin uwentikramratas numi winangmanum jarutramkamiayi nuna pachisan wikia chichaman paan etserkaisha ¿waruka kakarmachusha kajinmakniurme? ²Kichik chichaman iniastasan wakerajrume. Nu airkataram. ¿Atumi nintin Yuse Wakani engkemamia nuka waruka engkemamiayi? ¿Atumka Moisés umirkatin chicham umirkau asakrumning, atumi nintin engkemamia? Atsa, antsu Cristo chichame antukrum nekasampita tinu asaram, Yuse Wakanisha jukimiarume. ³¿Warukaya timiá nintinchausha ainarme? Yuse Wakani nu nangkamtaik atumi nintin engkemturmau wainiatru-mek ¿yamaikia atumi kakarmarijaisha

Moisés umirkatin chichamsha umirkatas-rumsha wakerarme? ⁴¿Atumka nangkamrumek wait wajakmiarum? ¿Tura pengké kichkisha nuimiarchamkiarum? ⁵Nintimrataram. Yuska ni Wakanin atumin aukpturmak: Wainchatai takat turataram turamiarme nuka ¿warukaya ni kakarmarinka suramsamiarume? Atumka Moisés umirkurminkia ni kakarmarin suramsachmiarume, antsu Cristo pachisar etsermau antukrum, nekasampita tinu asakrumin ni kakarmarin suramsamiarume.

⁶Ii yaanchuik juuntri Abraham nintimrarmi. Abraham Yusen nekasampita timiayi. Tura asamtai Yus Abrahaman pachis: Wína nekasampita turututu asamtai, tunaachawa nunisang pujaun jiiajai timiayi.^j ⁷Tura asamtai Yusen nekasampita tinauka Abrahama wearia nunisarang ainawai. Atumsha nuka paan nekaamnawaitrume.^k ⁸Yus yaanchuik mash nekau asa, nukap arus mash nungkanmaya ainau wína nekasampita turutinaunka wikia tunaarinchawa nunisarang pujuinaun jiiistinuitjai tusa, nuná eemak Abrahaman uwemratin chichaman ujaak: “Ameka wína nekasampita turututu asam uwemratnuitme. Tura mash nungkanmaya ainau amea nunisarang wína nekasampita turutin ainau nekasan pengker awajsatnuitjai,” timiayi.^l ⁹Tura Abraham Yusen nekasampita tinu asamtai, chikich aints ainau Yusen nekasampita tusar pujuinaunka Yuska Abrahama nunisang pengker awajui.

¹⁰Yuse chichame tu aarmawaitai: “Aints Moisés umirkatin chichaman aarmawa nunaka mash umirkachu ainauka Yus kajerkamu ainawai.” Tu aarmau asamtai, aints ainau Moisés

umirkatin chichaman mash miatrusarang umikcharu asaramtai, tuke Yus kajer kamu ainawai. ¹¹Yuse chichamesha tu aarmawaitai: “Yusen nekasampita tinauka, tuke iwiaaku pujusartin ainawai.”^m Tu aarmau asamtai Moisés umirkatin chicham umirkurkia, Yuska iinka tunaachawa nunisrik pujarningkia jjiirmatsji. ¹²Tura aints ningki nintimias: Moisés umirkatin chichaman umirkanka uwemratatjapi tauka nunaka nangkami tawai. Yuse chichame tu aarmawaitai: “Aints Moisés umirkatin chichaman umirak tunaanumia uwemratas wakerakka, Moisésa aarmaurinka mash miatrusang umirkati,” tu aarmawaitai.ⁿ

¹³Cristo ii wait wajaktiniun juki, numinam waitnas jarutramak uwemtikramrau asamtai, Moisésa chichame umirchau ainauka Yus kajer kamu ainawai, yamaikia turamtsuji. Yuse chichame aints numinam nenaamun pachis tu aarmawaitai: “Aints jakati tusar, numinam nenaamua nuka kajerka-muitai,” tu aarmau asamtai, Cristo ii tunaarin akiimiatramkatas numinam nenaawarmia nuka aints kajer kamuyayi.^o ¹⁴Yuska yaanchuik Abrahaman chicharak: “Mash nungkanmaya ainau wína nekasampita turutinauka, amijai metek wína aintsur artinuitai,” tinu asa, mash nungkanmaya ainaun uwemtikratas Jesucriston akupturmakmijai. Tura Yus: Wína nekasampita turutinaunka wína Wakantrun akuptukartinuitjai tinu asa, ni Wakanin iin akupturmakmijai.

**Yus Abrahaman tura Moisésnasha
chicham akuptukmauri**

¹⁵Yatsur ainautiram umaarutirmesha, yamaikia junia aints ainau turamurin pachisan ujaajrume. Aints chikich aintsjai

chichaman najanawar, nu chichaman papinum aarar, tura ni naarincha mai aarar umisar, nu chichamnaka yapaijtsuk umikiartin ainawai. Antsu: Nu aarmaun yapajian, chikich chichamnasha aartajai, pengké tichamnawaitai. ¹⁶Tura asamtai Yus Abrahaman ni wearin pachis chicharak: Ami wearam akiinatnua nuka mash nungkanmaya ainaun pengker awajsatnuitai timiayi. Antsu untsuri aintsun pachiska nunaka tichamiayi, antsu kichik aintsun ni Uchirin Criston pachis Yus nunaka timiayi.^p

¹⁷Wi taja nuka nintimrataram. Yus Abrahamjai chichaman eemak najanamia nuka umitskeka inaisachminuyayi. Tura Abraham jakamtai, cuatrocientos treinta (430) musach nangkamaramtai, Yus Moisésan umirkatin chichaman ukunam akuptukiat, Abrahaman nuná eemak tímia nunaka umitskeka inaisachmiayi. ¹⁸Tura Yus Abrahaman: Wína nekasampita turutin asam uwemratatme tinu asa, Moisés umirkatin chicham umirkamka uwemratatme, Abrahamnaka tichamiayi. Iikia Yus pengker awajsatasar wakerakria, Moisésa chichamenka umirkachu ayatrik, Yus nekasampita takurkia Abrahamana nunisrik uwemramnawaitji.^q

¹⁹Tura ¿Yus iincha waruka umiktin chichamnasha akupturmakmijai? Yus Abrahaman: Ami wearam akiinatnua nuka mash nungkanam pujuinaun pengker awajsatnuitai, tímia nunaka Cristo taatsaingkia umikchamnauyayi. Tura asamtai aints ainau mash tunau wajasaru asaramtai, Yus ni awemamurin akatar akupak: Umiktin chicham Moisés susataram tusa akupkamiayi. ²⁰Yus Moisésan chichaman akuptak: Aints ainau wína wakeramur ujakta tusa, ni awemamurin akupkamiayi. Antsu

Abrahamjaingkia mia ningki chichas-miayi.

**¿Yus waruka umiktin
chichamnasha akupkamiayi?**

²¹Yus Moisésan umiktin chichaman akuptukmau asa žeemak Abrahaman tímia nunaka umitsuk inaisamnaukai? Atsa, nuka umitskeka inaisachminuitai. Yus aints ainaun uwemtikratas Moisésan chichaman akuptukuitmatikia, aints ainau nu chichaman umirkar tunaarin-chau pujusartin armiayi. Antsu aints ainauka tuuka uwemrachmin armiayi. Aints ainau tuke Wijai pujusarti tusangka, Moisésan umirkatin chicham-naka Yuska akuptukchamiayi. ²²Antsu Yuse chichame tu aarmawaitai: “Aints mash jingkiama nunisarang tunau ainawai.” Tu aarmau asamtai, iikia Jesucristo nekasampita takurkia, Yus yaanchuik Abrahaman tímia nunisrik uwemratnuitji.⁷

²³Antsu Cristo taachmataikia Criston nekasampita tichamin armiayi. Tura Yus Moisésan umirkatin chichaman akupkau asamtai, iisha jingkiama nunisrik nu chicham umirin ayaji. Antsu Cristo ukunam taa: Wína nekasampita turutkur-meka nekasrum uwemratnuitrume tusa iincha nekamtikramamijai. ²⁴Tura asamtai Yus Moisésan chichaman akuptukmia nuka uchin wainua tumawaitai. Uchin wainuka uchi chichaman umiktinun nuimiarat tusa nakawai. Tura asamtai Yus Moisésnum chichaman akupkau asa, ii tunaarin nekamtikramamijai. Tura Cristo ii tunaarin sakturmartas tau asamtai, iikia Cristo nekasampita takurkia Yus pengker awajsatnuitji. ²⁵Tura yamaikia Cristo nekasampita tinu asar, uchi ni wainmaun umirua nunisrikia yamaikia pujatsji. Tura

asar Moisés umirkatin chichaman umirkunka uwemratatjapi tichamna-waitji. ²⁶Tura asamtai atumka Cristo Jesús nekasampita tinu asaram mash Yuse uchirintrume. ²⁷Tura mash Cristo naari pachisrum maiintirmeka Cristo pujumia nunisrumek atumsha pujustinuitrume. ²⁸Tura asamtai judío ainautirmesha, tura judíochu ainautirmesha, tura aintsu inatiri ainautirmesha, tura aintsu inatirinchu ainautirmesha, tura aishmang ainautirmesha, tura nuwa ainautirmesha yamaikia mash metek Cristo Jesúsnu asaram, kichkia tumawaitrume. Tura iisha aji tuuka nintimrashtinuitrume. ²⁹Tura Cristonu asaram, Abrahama weariya tumawaitrume. Tura asamtai Yus Abrahaman chicharak: “Ami wearmin pengker awajsatnuitjai” tinu asa, Yuska atumnasha pengker awajtamsatnuitrume.⁸

4 ¹Wi taja nuka nintimrataram. Kuikiartinu uchiri nampuarantai, nu aints takaka nuka ukunam ninu uchirinu atinuitai. Antsu uchi akungka, ni aparí inatiriya nunisketai. ²Tura nu uchikia nampuachkungka ni wainurin umirnuitai. Tura ni aparí kuikiarin wainuncha umirnuitai. Antsu nampuarka, ni aparí tu tinu asamtai, ni aparínu aa nunaka mash wainkatnuitai. ³Cristo taachmataikia, iikia uchia nunisrik pujuyaji. Tura asar uchi ni wakeramurin najantsuk pujusarti tusa, ni aparí inatirin umirak pujawa nunisrik Moisésa chichame umirkur pujuyaji. ⁴Tura ni kintari jeau asamtai, Yus ni Uchirin ju nungkanam akupkamu asa, nuwanam akiinamiayi. Tura aints wajas, Moisésa chichamen miatrusang umirnuyayi. ⁵Antsu aints ainauti Moisésa chichame umirkatatkamar tujintau asakrin, Yuska iin angkanmamtikramkatas: Wína uchir ataram tusa, ni Uchirin

akupturmakmiaji. ⁶Tura asamtai yamaikia Yuse uchiri wajasu asakrumin, Yus ni Uchiri Wakanin atumi nintin akupturmaku asa: “Apaachi,” turutmintrum tusa nintimtikramramiarume. ⁷Tura asamtai yamaikia aintsu inatiria tumachawaitrume. Antsu Yuse uchiri ainirame. Tura Yuse uchiri asakrumin, Yusnau aa nuka mash atumnau atinuitai.^f

Pablo ¿Cristonu ainaun itiur pujuinawak? tusa nintimtusmauri

⁸Yaanchuikia Yuska tu awai tusaram nekachu asaram, chikicha yusri Yuschau wainiatrum, aintsu inatiriya nunisrumek umirkuram pujuyarme. ⁹Antsu yamaikia Yus tu awai tusaram nekarme. Tura Yuscha atumniasha nekarmarme. Tura asamtai ¿waruka ataksha waketkirmesha Cristo umirat inaiyakrumsha, ataksha aintsu inatiriya nunisrumkesha aintsu umirkatin chichamsha umirkatasrumsha wakerarme? Tu pujakrumka uwemrachminuitrume, tura Yuse kakarmarisha jukichminuitrume. ¹⁰Atumka judíochu ayatrum, ¿waruka judío fiestarisha inangkartasrumsha wakerarme? Tu uwemrachmin ayatrum, kinta pachisrum, tura nantu pachisrum, tura musach pachisrum, tura fiesta ainausha pachisrum tuke nintimsarmesha pujarme. ¹¹Atumka tu pujau asakrumin, wi atumin waitnasan Yuse chichamenka ujakmiaj-rume nunaka nangkamniash etserkaya tusan wake mesekan pujajai.

¹²Yatsur ainautiram, wikia atumjai pujaknaka atumjai metek pujuyajai. Tura asamtai yamaikia wait aneasrum wiya nunisrumek pujustaram. Wi atumjai pujamtaisha, winaka paseeka awajtuscharumarume. ¹³Wi nu nangkamtaik atum pujamunam jean, sungkurmau asan pimplayatnak uwemratin chichaman

ujayajrume. ¹⁴Tura sungkurmau asan, wína namangkur pasemaru wainiatrumek, atumka tsuutrichmiarume. Antsu Yuse awemamurin anturinawa nunisrumek, tura Jesucriston anturinawa nunisrumek anturtinuyarume.⁴

¹⁵Maj, nekasas tajarme: Yaanchuikia wina yainkatasrum, atumi jii kuinkachmin ayatrum, kuinkaram surutcha wakerutmiarume. ¿Antsu yamaikia waruka winaka pengker nintimturtsuksha pujarme? ¹⁶Wikia atumin nekas chichaman aa nuna ujaamaitiatrumsha ¿yamaikia atumi nemasenkita?

¹⁷Chikich aintsu ainaw atum pujamunam jear anangkraminak: Iisha atum yaingtasar wakeraji turaminayat, nunaka nekasar atumin yainmakartaska turaminatsui. Antsu wína pachitsar: Nuna chichame antutsuk asataram, antsu ii chichameng antuktaram tusar, atumnaka tu nintiminawai. ¹⁸Turinamtai wi atumjai pujaisha, tura wi atsaisha, chikich ainaw atumin nekasar yainmakartas wakerutminakka nuka nekas pengker araintai.

¹⁹Wína uchir ainautiram, yamaikia Cristo nintimtichu asakrumin wikia wake mesekan, nuwa uchin jurertas wait wajawa nunisnak: Cristo nemarkamniuram tusan, wikia ataksha wait wajajai. ²⁰Tura yamaisha atumjai iruntran pujusan, nuna pachisan atumjai chichas-tasan wakerajrume. Turayatun atumjai pujachu asan ¿itiurkatjarmek? tusancha nekatsjai.

Agar Sarajai chichaman nuikiarturmauri

²¹Atumka Moisés umirkatin chicham umirkatasrum wakerau asakrumin kichik iniastajrume. ¿Moisés umirkatin chicham aujchaukitrum? ²²Yuse chichame Abrahaman pachis tu aarmawaitai: “Abrahama uchirisha jimiari ayayi. Tura

Sara inatiri Agar naartin kichkin jurermyai. Tura kichnaka Abrahamana nekas nuwari Sara jurermyai.^v 23Antsu Abrahamana uchiri Sara inatiri Agar jurermia nunaka Yuska: Turata tichau wainiat, Abraham ningki nintimias yajutmarmiyai. Antsu kichnaka Abrahamana nuwari kaa ayat: Uchin jurertatui, Yus timiau asa Sarasha jurermyai. 24-25Wi taja nunaka taku tawai: Sara inatiri Agar uchin jurermyai. Nuka inatiri uchiri asa, Moisésa chichamen umirnuwa tumawaitai. Tura Arabia nungkanam mura Sinaí tutainum yaanchuik Moisésnum umirkatin chichaman Yus aantikramiyai. Tura asamtai yamai Jerusalénnum pujuinausha: iikia uwemratasrikia Moisés umirkatin chicham umirkatnuitji nangkamiar tinauka ainsu inatiria nunisarang ainawai. 26Antsu iikia yamaram Jerusalénnum, nayaimpinmaya akupkatin aa nuni pujustin asar nunia aintsuitji. Tura asar nu nayaimpinmaya Jerusalénnumia uchua nunisketji, nuniasa angkantaitji. 27Tura asamtai tu aarmawaitai:

“iKaa ayatmek warasta! Uchiram atsau wainiatmek, tura uchi jurertasam jatemam nekapchau ayatmek, pengker nintimsam nukap warasta. Nuwa japamu ayat, aishrintin ainaun nangka-masang uchin untsuri wainkatnuitai.” Tu aarmawaitai.^w

28Yatsur ainautiram umaarutirmesha, Yuska: Wina uchir ataram turamin asamtai, iisha Isaaca nunisrik Yuse uchirinji. 29Yaanchuikia Agara uchiri Ismael, Yus wakerachmau akiinau asa, Sara uchirin Isaacan kajerak pasé

awajnyua nunisarang yamaisha Yusen umirchau ainauka Yusnumia akiinau ainaunka tuke kajerin ainawai. 30Tura Yuse chichame tu aarmawaitai: Sara Abrahaman chicharak: “Ame jakakmin wina uchir aminu aa nunaka mash jukitnuitai. Antsu Agara uchiringkia nunaka jukishtnuitai. Tura asamtai wina inatir ni uchirijai jikim akupkata,” timiyai.^x 31Tu aarmau asamtai iikia Cristonu asar, inati uchiria tumauchuitji. Antsu angkantaitji. Tura asar Sara uchiriya tumawaitji.

Yusnau asaram tuke angkan pujustaram

5¹Cristo iin uwentikramratas angkan awajtamsamijai. Tura asamtai yamaikia angkan pujau asaram kakaram wajastaram. Tura uwemratasrumka ataksha Moisés umirkatin chicham umirkami tiirap.^y

²Anturtuktaram. Wikia nekasana tajarme: Atum uwemratasrum atumi nuwapchiri charukakrumnisha, Cristoka atumin pengkerka awajtamsashtinuitrume. ³Tura asamtai ataksha tajarme. Aints ni nuwapchirin charuk tu uwemratas wakerakka, umirkatin chichamnasha Moisés aarmawa nunaka tuke mash inaitsuk umirkatnuitai. ⁴Atumka Moisés umirkatin chichaman umirkanka uwemrainjapi, tu nintimsaram pujau asaram, Yuse anengkratairiniangka kanaku asakrumin, Cristo atumniaka pengkerka awajtamsashtinuitrume. ⁵Antsu Yuse Wakani ii nintin engkemtur-mau asamtai, Cristo nekasampita tau asakrin, Yuska ii tunaarin mash sakturmaru asamtai: Nekasriapi Yusnum pujustinuitji tusar nakaji. ⁶Ni nuwapchiri charukmau ainauka, tura ni nuwapchiri charutkachmau ainausha mai metek

Cristo Jesúsnu asar, ii nuwap charutka pachischatnuitji. Antsu mash Cristo nekasampita tinu asar, chikich ainausha aneetnuitji.

⁷Atumka Cristo pengker umirkuram pujuyarme. ¿Yaachia nekas chicham inaisataram turamrume? ⁸Yuska nunaka turachmiayi. Antsu angka pujustaram tusa, atumin untsurmaku asa: Ataksha Moisésa chichame umirkataram tichamiayi. ⁹Antsu nu aints wait chichaman jumchik chichainayat, kariau kariachunam jumchik engkeam, mash karimtikia nunisang nu chichaman antuku ainaunka anangkawartinuitai.^z ¹⁰Atumka ii Apuri umirkau asakrumin, wi timiaja nunaka tuke umirinak pujuinawai tu nintimjai. Antsu atumin wait chichaman etsera nunaka Yus wait wajaktiniun susatnuitai. Antsu ¿warí aintsiki? tusanka wikia pachiatjsjai.

¹¹Yatsur ainautiram umaarutirmesha, Cristo umirin ainaw ni nuwapchirin tuke charutkartinuitai, wi tamatisa, judío ainauka winaka kajertukchartinuitai. Antsu nunaka wikia tatsujai. Antsu Cristo numi winangmanum jarutramkau asa, iin uwemtikramratnuitji. Chikich uwemtikramratnuka atsawai tau asamtai, wína tuke kajertinawai. ¹²Aints atumin itit awajtaminak: Atumi nuwapchiri charutsuk pujakrumka, nekasrum uwemrashtinuitrume, tinauka niinun ningki charukarti tusan wakerajai.

¹³⁻¹⁴Yatsur ainautiram umaarutirmesha, Cristo atumin: Angkan pujustaram tusa untsurmaku asamtai, yamaikia atumi namangke wakera nuka nintimsuk asataram. Antsu Yus umirkatin chichamka mash kichik chichamjai timinuitai. Nu chichamka nuwaitai: “Atumi namangke anearme nunisrumek chikich ainausha aneetaram.” Tu aarmau

asamtai, nekasrum aneeniakrum yainiktarum.^a ¹⁵Tura aneenitsuk jiyaani pujakrumka, pachim esaniniar yunainawa nunisrumek pujarme. Tura asaram amuniktinuitrume. Tu pujusai tusaram wainmamkataram.

Aintsu wakeramuringkia Yuse Wakani wakeramurijaingkia metekchawaitai

¹⁶Tura asamtai tajarme: Yuse Wakani wakera nuka tuke umirkuram pujustaram. Tu pujakrumka atumi namangke wakera nuka umirkashtinuitrume. ¹⁷Yuse Wakani wakera nuka aintsti namangke wakeramurijaingkia metekchawaitai. Yuse Wakani wakera nunaka ii namangkengka nakitawai. Tura ii namangke wakera nunaka Yuse Wakanisha nakitawai. Tura asamtai atumi namangke wakeramuri najankurmeka, Yuse Wakani wakera nuka turatatkamaram tujintarme.^b ¹⁸Antsu Yuse Wakani: Tu pujustaram tusa, atumin nuitamak pujurtamatikia, Moisés umirkatin chichamka pachischatnuitrume.

¹⁹Aintsu wakeramuringkia paan nekaamnawaitji. Aintsu wakeramuri tu ainawai: Tsanirmatin, tura pasé aa nu turatin, tura natsanpiaku aa nusha turatin, ²⁰tura Yuschau waininayat: Ameketme Yusem tusar seartin, tura wawekratatin, tura nemasnaikiatin, tura maaniktin, tura suwirpiaku jiinistin, tura aints kajerkatatin, tura miajuitjai tumamtin, tura chikich ainaujai irunat nakitakur kanaktin, ²¹tura chikichnau aa nu wakeruktin, tura nampektin, tura yutak nukap wakeruktin, nunia chikich tunaa aa nu pachitsuk turatin, aintsu wakeramuri tu ainawai. Tura asamtai wi yaanchuik ujakmiajrume nunaka ataksha tajarme: Aints nuna tuke turinauka Yus pujamunmaka pengké jeachartin ainawai.

²²Antsu Yuse Wakani aintsu nintin piatkau asa, árak nereawa nunisang neremtikui. Yuse Wakani turamuringkia tu ainawai: Chikich ainau aneenitin, tura warastin, tura angka pengker nintimratin, tura jaimiasar nintimtustin, tura chikich ainau wait anetratin, tura ii timiauri miatrusrik umiktin, ²³tura mianchawaitjai tumamtin, tura ii wakera-muringkia turashtin, Yuse Wakani turamuri tu ainawai. ¿Nu turatnunka yáki surimkat? ²⁴Tura Cristonu ainautikia ii namangke wakera nuka, tura pasé turuti ainia nusha aints numi winangmanum jakamia nunisrik inaisawaitji.^c ²⁵Tura yamaikia Yuse Wakani iin engkemturma pujamtaikia, ni wakera nuke umiktinuitji.

²⁶Antsu wikia miajuitjai tutsuk, tura nekapnaisatai tunaitsuk, tura suwirpiaku jiiintsuk pujusmi tu nintimtunistinuitji.

Yainiktaram timiauri

6 ¹Yatsur ainautiram umaarutirmesha, Cristo umirkausha aneachmau tunaunaka turatnuitai. Turamtaisha Yuse Wakani piatkamu ainautiram, nu tunaun turau wainkurmesha: Wisha mianchawaitjai tusaram, nu aints jaimiasrum chicharkuram: Nu tunauka inaisata, tusaram yaingtaram. Wisha tunau wajasai tusaram nuka turataram.

²Chikich ainau merman nanaakinawa nunisarang wait wajainamtaikia, nu aints nekasrum yaingtaram. Tu pujakrumka Cristo ni chichamen akupkama nuka umirkatnuitrume.

³Aints mianchau ayat nangkami: Wikia miajuitjai tauka ningki anangmamui.

⁴Tura ¿ii turamuri itiurak awa? tusar iik nintimratnuitji. Ii turamuri pengkeraitmatikia, chikicha turamuri nintimtusrikia

waraatsji, antsu ii turamuring nintimsar waraaji. ⁵Aintstikia mash ¿ii turamuri itiurak awa? tusar nintimratnuitji.

⁶Yuse chichame atumin nuitaminak pujuinau nekasar yuumatsuk pujusarat tusaram, tuke mash pengker awajsaram yaingtaram.

⁷Anangmamawairap. Yuska anangmichuitai. Aints arakan arauka juuktinuitai. Ii turamuringkia árak araamua nunisarang ainawai. Ii turaji nunasha iincha nunisarang turutmatnuitji. ⁸Tura asamtai aints ni namangke wakera nuna turinauka, wait wajaktiniun jukiartinuitai. Antsu Yuse Wakani wakera nuna turinauka tuke Yusnum pujut nangkankashtinun jukiartinuitai. ⁹Tura asamtai pengker turatin aa nuka tuke inaitsuk tura yawetsuk turatnuitji. Nu turau asar ii kintari jeamtaí, aints arakan juwaak waraawa nunisrik iisha nukap arusar warastinuitji. ¹⁰Tura asamtai yaingmin amatikia, aints ainau mash pengker awajatsnuitji. Tura nuna nangkamasrik Cristonu ainau timiá pengker awajatsnuitji.

Inangnamu chicham akupkamuri

¹¹Inangnamunam nekasana wína uwejruijai aaran, warutam juunna aari tusaram wainkataram. ¹²Judfo aints ainau Cristonu numi winangmanum maawaru asar, Cristonu ainautin pe kajertaminaji. Tura asaramtai aints atumin chichartaminak: Cristonu ayatrumek, tuke atumi nuwapchiri charuktaram turaminauka, judfo ainaun shaminau asar, kajertamkarai tusar nunaka tinawai. ¹³Tura nu aints ainau nuwapchirin charutkariat, Moisés umirkatin chichamnaka miatrusarka umirinatsui. Turayat atumi nuwapchirin charutramkartas wakerutminawai. Tura

atumin pachisar: Au jiisia, au aintsu nuwapchiri charukmawaitai tiartas wakerinawai. ¹⁴Tura wainiatun wikia aya ii Apuri Jesucristonak wararsatnuitjai. Antsu chikichan pachisnaka waraschatnuitjai. Ii Apuri jarutramkau asamtai, wikia numi winanganmanum jakawa nunisnak ju nungkanmaya ainau wakera-murinka pachiatsjai. ^d ¹⁵Ni nuwapchiri charutkachmau ainausha, tura ni nuwapchiri charutkamu ainausha mai metek Cristonu asaramtai, aintsu nuwapen charutkachmau tura charutka-musha pachischatnuitji. Antsu Yusnumia

yamaram akiinatin wakeruktinuitji. ¹⁶Yuse aintsri wi taja nunaka umirinak pujuinaun tuke mash angkan nintimrat-nun Yus susarat tusan, tura Yus wait anentrarat tusan wakerajai.

¹⁷Yamaikia nunasha tajarme: Wikia Jesúsa inatiri asamtai, aints wína awatinak charutrarmau chimirmaurun paan waitrukartinuitai. Tura asaramtai aints kichkisha yamaikia wínaka ititka awajtuschartinuitai.

¹⁸Yatsur ainautirmin umaarutirmincha, ii Apuri Jesucristo atumniasha pengker awajtamsarti. Tu ati.

Pablo Efesonam Pujainaun Papin Akuptukmauri

Chicham akupkamuri

1 ¹Wiitjai Pabloitjai. Yus wakerutak Jesucristo chichame etserin ata, turutin asa wina akuptukmiayi. Cristonu ainautirmin Efesonam Cristo Jesús tuke umirkuram pujautirmin ju papin aatran akuptajrume.^a ²Ii Apaachiri Yus ii Apuri Jesucristojai atumin wait anentramak pengker awajtamsarti. Tura angkan pujustinnasha suramsarti.

Cristo aints ainautin pengker awajtamsamuri

³Ii Apaachiri Yuska, ii Apuri Jesucristo Apaachiri asamtai, iikia: Ameketme juuntam tusar maaketai tiarmi. Iikia Cristonu asakrin, Yus iincha timiá pengker awajtamsamijai. Tura ni Wakanin ii nintin engketramau asamtai, iikia nayaimpinam pujuinawa nunisrik pengker nintimsar angkan pujaji. ⁴Tura asamtai Yus nu nangkamtaik nungkan najantsuk nintimias: Wina Uchir Cristo nukap arus aints niin umirinak pujusarti-nua nuna tunaarin sakatramu asa, tura aintstin timiá anenmau asa iincha pachitmas: Nu aints ainauka nekasar tunaarinchau wina Uchirnou arti tu nintimturmasmijai. ⁵Tura iincha Yus miatrusang anenmau asa, iin pachitmas: Ukunam wina Uchirou Jesucriston

akupkamtai, nuka aints ainaun uwentik-ratas jakamtai, wina aintsur wajasarti tusa, ningki wakerutmak tu nintimtur-masmijai. ⁶Yus nekas timiá pengker asa, ni aneetiri Uchirin iin akupturmaku asa, wait anentramak iin pengker awajtamsamijai. Yus nuna turau asamtai, ni aintsri ainautikia mash iin pengker awajtamsamuri nintimsar: Yus juuntapita taji. ⁷Yus iincha nukap anenmau asa, ni Uchirin akupturmaku asamtai, ii tunaarin akiimiatramkatas, Cristo jarutramak ni numpe numparmiyai. ⁸⁻⁹Yus iincha wait anentramak pengker awajtamsau asa, ni nekamtairincha iincha suritramtsuk, ni nintimaurincha yaanchuik aints ainou nekaachminun wainiat iincha nekamtikramamijai. Tura iin uwentikramratas Criston akupturmaku asamtai, yamaikia iisha nuka paan nekaatnuitji. ¹⁰Yus iin nekamtikramatas wakerimia nuka nuwaitai. Yus wi turatnuitjai timia nunaka mash umis, Cristo ataksha tatin kinta jeamtai, nayaimpinmaya ainauncha, tura nungkanmaya ainauncha mash irur, wina Uchir Cristo nunaka tuke inartnuitai tu nintimramiyai.

¹¹Tura asamtai Cristonu ainautikia akiinturning, Yus ningki iin uwentikramratas wakerak iin pachitmas: Wina aintsur arti tusa, tura tuke Cristojai iruntrar wijai pujusarmi tusa

a 1.1 (Hech. 18.19-21;19.1)

wakerimiayi. ¹²Yus nuna wakerau asamtai, iikia nuwá eemkar, Yus tuke nintimraru asar, Cristojai tuke nayaimpinam pujustinuapitji tusar, tura Yus nekas pengkerapita tusar, ni wakeramuri tuke inaitsuk najanatnuitji. ¹³Tura atumsha iiya nunisrumek nekas uwemratin chicham Criston pachisrum antuku asaram, Cristo nekasampita timiarume. Tura asamtai Yus: Wína Wakantrun aints ainau nintin engketatatjai tinu asa, ni Wakanin nekas pengker aa nuna atumi nintin engketramiamiarume. Tura asamtai atumsha: Wikia nekasnapi Yusnawaitja tusaram, atumek nekatmatnuitrume.^b ¹⁴Cristo ii tunaarin akiimiatramak uwemtikramrau asamtai, Yuse Wakani ii nintin engkemturmau asakrin, wína umirtuku ainaujai mash iruntraram, nekasrum wijai tuke pujustinuitrume tusa, Yuse Wakani iincha nintimtikramramiaji. Tura Yuska timiá pengker asamtai, mash aints ainautikia pengker awajarsartin ainiaji.^c

Pablo Cristonu ainaun pachis seatmiauri

¹⁵Atumka ii Apuri Jesús nekasampita tinu asaram, Yusnau ainau mash anearme. Tura asamtai wisha nu chichaman antukan, ¹⁶atumin pachisan Yusen seatkun tuke maaketaj tajai. ¹⁷Ii Apuri Jesucristo Apaachiri timiá pengker asamtai, atumin ninu Wakanin suramak, ni nekamtairincha atumniasha nekamtikramawarti tusan seatjarme. Tura Yus itiuur awa tusaram, miatrusrumek nekaamniuram tusan seatjarme. ¹⁸Tura Yus atumin eatmaku asamtai, atum nayaimpinam jearam tuke nijai pujusmintrum tusan, tura atumin paan nekamtikramawarat tusan, Yusen seatjarme. Tura Yus warina ni uchiri ainautinka tsangkatramkatnuitji

nusha nekaamniuram tusan Yusen seatjarme. ¹⁹⁻²⁰Aints ainau Criston maawaru wainiat, ni tujinkamuri nekas atsau asamtai, Yuska ni kakarmarijai Criston jakamunmaya inankimiayi. Nunia nayaimpinam iwiak, mash aa nuna inarti tusa, apu keemtainum ni untsurinini kentsamiayi. Yuska timiá kakaram asa, ni kakarmarijai Cristonu ainautin kakamtikramratnuitji. Nusha nekaamniuram tusan, wisha Yusen seatjarme. ²¹Ii Apuri Cristo junia apu ainaun nukap nangkakawaitai. Ni kakarmarisha nayaimpinam pujuinau kakarmarincha nukap nangkakawaitai. Tura ii wainji nunasha mash ni kakarmarijai inamui. Tura ii waintsuji nunasha pachitsuk mash inamui. Cristo tuke iwiaaku asa, yamai pujuina nunasha, tura ukunam pujusartinua nunasha mash nukap nangkakawaitai. ²²Tura mash ainia nu Cristonka umirkartinuitai. Tura mash ni umirin ainautin inarti tusa, Yus Cristonak inaikiamiayi. Tura asamtai Cristo aintsri ainautikia kichik namangkaa nunisrik ainiaji.^d ²³Tura Cristo mash aa nuna najanau asa, ni aintsri ainautinka inatmartin asamtai, iikia mash iruntrar Cristonuitji. Tura Cristonu asakrin, ni Wakanin ii nintin piatramkau asamtai, mash Cristojai iruntrarsha kichik namangkaa nunisrik ainiaji.^e

Yus iin timiá anenmau asa uwemtikramramiaji

2 ¹Atumka yaanchuikia tunaarintin asaram, jakawa nunisrumek pujuyarme. ²Tura ju nungkanam Criston umirchau ainau pujuinawa nunisrumek yaanchuikia atumsha pujuyarme. Tu pujau asaram atumsha iwianchi apuri Cristo umirtan nakitinau apuri aa nuna wakeramuri tuke umirkuram pujuyarme.^f

b 1.13 (Luc. 24.49; Juan 14.26; 16.13-15; Hech. 1.4;2.33) c 1.14 (1.Cor. 1.22)

d 1.22 (Sal. 8.6) e 1.23 (Col. 1.18) f 2.2 (Col. 1.13)

³Yaanchuikia iisha Cristo nemarchau asar tu pujuyaji, tura ii namangke wakeraku nuke najankur, tura ii nintijai wakeraji nuke nintimsar pujuyaji. Tura tunaanumia akiinau asar, chikich aints Yusen umirchau pujuina nunisrik pujuinau asar, Yuse kajekmauri jukitin amiaji. ⁴⁻⁵Tu pujarning Yus iincha wait anentramak pengker awajtamsatas wakerutmimijai. Turamta iikia tunaarintin asar, jakawa nunisrik pujarning, Yuska iincha miatrusang anenmau asa, Cristojai tuke iwiaku pujusmintrum tusa, iincha uwemtikramramijai. ⁶Tura asamtai iikia Cristo Jesúsnu asar, yamaikia nijai tsaniasar jakamunmaya nantaknua nunisrik tura nayaimpinam pujuinawa nunisrik, pengker nintimsar angkan pujusmintrum tusa uwemtikramramijai. ⁷Tura nukap arus ni anengkratairinha, tura iin pengker awajtamsatnurinha nekamtikramatas turamiyai. ⁸Tura atumsha Cristo nekasampita tau asakrumin, Yus wait anentramak atumniasa tunaanumia uwemtikramramiarume. Antsu atumkeka nuka turunachmiarume. Antsu Yuska ningki wakerak kuikiachujai turamiyai. ⁹Aints ningkikia uwemrachmin ayat, ni pengker takaamurijai tunaanumia uwemramnawaitkungka: Wiki tunaanumia uwemrawaitjai, tumamtinuitai. Antsu aints kichkisha tuuka uwemrachmin asamtai, Yuska atumniaka ningki wakerak tunaanumia uwemtikramramiarume. ¹⁰Iikia akiinturning, Yusek iin uwemtikramratas ni Uchirin Cristo Jesúsnu akupturmaku asa, tura iincha yamaram nintimaun suramsau asa: Yamaikia Cristonu asaram, pengker aa nuke turataram tusa iincha yainmaktinuitji.

Cristonu asar pengker nintimsar pujaji

¹¹Tura asamtai judíocho ainautiram yaanchuik itur pujuyaji tusaram nintimra-

taram. Judíocho akiinautiram Yuska umirchau asakrumin, judíoti ainauti atum pachisar: ¿Warí, ni nuwapchiri charutkamukai? tsuutakur tinuyaji. Antsu judíotikia ii uwejejai ii uchiri nuwapchirin charutin asar, iik nintimsarik: Iikia Yusnawaitji tu nintimnuyaji. ¹²Antsu atumka yaanchuik Cristo pachisrum yamaram chichamka nekachu ayarme. Tura asaram Yuse aintsrinchu ayarme. Tura Yuska judío ainautin ni chichamen akupturmak: Tuke wijai pujustinuitrume, tímia nuka antichu ayarme. Tura nu chicham antichu asaram tura Yuska umirchau asaram uwemrachmin ayarme. ¹³Antsu yaanchuikia Yuska umirchau ayatrum, yamaikia Cristo atumi tunaarin sakturmartsa jarutramak numparu asamtai, atumka Cristo Jesúsnu asaram Yusnum iruntratnuitrume.

¹⁴⁻¹⁵Yaanchuikia judío ainauti Moisésa chichame umirin asar, judíocho ainautirimijai kajernain armiaji. Tura wainiat Cristo judío ainautin tura judíocho ainautirmincha nunisang uwemtikramratas jarutramkamijai. Tura asamtai Yus yaanchuik Moisésnum chichaman akupkama nuna nangkamaku asamtai, yamaikia judío ainautincha, tura judíocho ainautirmincha: Mash iruntraram kichik aintsua nunisrumek kajernaitsuk angkan pengker pujusmintrum tusa, Cristo atumin angkan awajtamsamiarume. ¹⁶Tura Cristo numi winangmanum waitnas jarutramkau asa: Mash metek pengker nintimtisurum pujustaram tusa, judío ainautincha tura judíocho ainautirmincha: Atumi kajernaiyamuri inaisataram tusa chichamnaka iwiaramiyai.^g

¹⁷Judíocho ainautiram, yaanchuikia Yus umirtsuk pujarmin wainiat, Cristo aints ainauncha mash uwemtikratas wantinkau asa: Judío ainau tura judíocho

ainausha mash metek angkan pengker nintimsar kajernaisuk pujusarti tusa, nu chichamnaka atumin nekamtikramamiarume. ¹⁸Tura mash Cristonu asaram, judíocho ainautirmincha, tura judío ainautincha mash irur ni Wakanin ii nintin engketramau asamtai, ii Apaachiri Yuska seatnuitrume. ¹⁹Tura yamaikia atumsha Cristonu asaram, chikich nungkanmaya aintsua tumauchuitrume. Antsu Cristonu ainaujai mash iruntraram Yuse aintsrintrume. ²⁰Atumka jea jeamkamua tumawaitrume. Kayajai jean jeamin ainau jea yumpunkai tusar, painia tumaun kayan nungka taimunam jintin armayi. Yaanchuik Yuse chichame etserin ainau tura Cristo nuiniatiri ainausha jean jeaminawa nunisarang aints ainaun Yuse chichamen ujuu armiai. Tura kaya nekas juunta tumau aa nuka Jesucristoketai. ²¹Tura asamtai Cristonu ainautikia unturi asar, mash iruntrar metek nintimtunisar ii Apuri jee nekas pengker jeamkamua nunisrik ainiaji. ²²Tura Yuse Wakani atumi nintin engkemturmau asamtai, atumka mash iruntraram Yuse jeea nunisketrume.^h

**Cristo Pablon judíocho
ainamunam akupkamuri**

3 ¹Wikia Cristo Jesúsá chichamen judíocho ainautirmin etserkau asamtai, wína achirkar kársernum engketawarmiai. ²Tura asamtai Yuska: Wína chichamur etserkata tusa, ningki wakerutak akuptuku asa, tura atumin wait anentramak pengker awajtamsatas wakerau asa, wína chichamur etserkata tusa nekamtikruamiayi. Atumka nuka nekaamnawaitrume.ⁱ ³Ju chichaman yamaikia jumchik aarja junaka aints ainau yaanchuikia nekaacharmiai. Antsu

Yus ningki wakerak winaka nekamtikruamiayi.^j ⁴Yaanchuik aints ainau nu chichaman nekaachminun wainiat, Yuska nu chichaman wína nekamtikruau asamtai, wi aarja ju atumsha aujsaram nekaamnawaitrume. ⁵Yaanchuikia aints kichkisha nu chichamnaka nekaacharmiai. Antsu yamaikia Yuska ni Wakanin akupturmaku asa, Cristo akuptukmau ainautincha, tura chikich Yuse chichame etserin ainauncha, Criston pachisar etserkarti tusa, nu chichamnaka nekamtikramamiai. ⁶Nu chichamka juwaitai: Judíocho ainautirmesha judío ainautitai metek Cristo Jesúsnaun asar, uwemratin chicham umirkar kichik aintsua nunisrik atinuitji. Tura Yuse uchiri asar, mash iruntrar Cristonu ainiaji. Judío ainautin Yuska yaanchuik ni chichamen akupturmak: Wijai tuke pujusmintrum tíaia nunisang yamaikia judíocho ainautirmincha ju chichamnasha akupturmarme.^k

⁷⁻⁸Wikia yaanchuikia Cristo umirtan nakitin asan, mash Cristonu ainaun nangkamasnak mianchauyajai. Tura aing Yuska: Wína inatir wajasta tusa, ningki wakerutak tura wait anentrak, wína pengker awajtustas uwentikruru asa, judíocho ainamunam wína chichamur etserkata tusa ni kakarmarin surusmiayi. Tura asamtai wi Cristo chichamen etserkun: Cristo ningki wakerutkau asa, wait anentramak iincha tuke uwentikramratnuitji tusan, nu chichamka kuikian nangkamasang timiá pengker asamtai etserjai.^l ⁹Yus mash najanamia nuna nintimias: Judíocho ainau mash wína aintsur artinuitai tusa, ningki mash nekyat, nu nangkamtaik aints ainaun nunaka paanka nekamtikiachmiayi. Antsu nu chichaman paan nekamtikiata

tusa wína akuptukmiayi. ¹⁰Tura yamai Yuse awemamuri apuri ainau nayaimpinam pujuinauka mash ni aintsritin Yus turunamun mash waitmakar nintimsar: Yuse nintimauri nekas pengker aa nuna paan nekamtikiatas, ¹¹Yus yaanchuik aints ainautin najatmatsuk, aints ainau uwemrarti tusa: Nukap arusan uchirun akupkatnuitjai, tu nintimrau asa, ni tímia nunisang ii Apuri Jesucriston akupturmakmijai. ¹²Turamtai iikia Cristo nekasampita tinu asar, shamtsuk tura natsaamsuk angka Yuska seamnawaitji. Tura Cristonu asar, Yus seakur: Nekasampi anturtamji titinuitji. ¹³Tura asamtai wikia atumin Cristo chichamen etserkau asan, wait wajamur nekakrumsha: Napchau nintimsuk asataram tusan tajarme. Antsu wikia wait wajaing, atumka warasmintrum tusan wakerajai.

Cristo anengkratairi pachis etserkamuri

¹⁴Tura asamtai wikia tikishman ii Apuri Jesucristo Apaachirin seatjarme. ¹⁵Yus nayaimpinmaya ainauncha tura nungkanmaya ainauncha mash najanau asamtai, iikia junia aints ainauti ii aparijai chichaaji nunisrik Yuska seakur: “Apaachia,” titinuitji. ¹⁶Wisha atumin pachisan tu seatjarme: Yus timiá pengker asa, tura timiá kakaram asa, ni Wakani atumi nintin piatramkau asamtai, ni kakarmarijai atumniasha kakamtikramrarti. ¹⁷Tura Cristo nekasampita tinu asakrumin, Cristo atumi nintin pujurtamsamniuram tusan, tura nekasrum aneenisrum pujusmintrum tusan Yusnaka seatjarme. ¹⁸Tu pujakrumka Cristo umirin ainaujai mash iruntram, Cristo anengkratairi tu awai tusaram, nekaataram tusan Yusen seatjarme. Cristo aints ainautin tuke inaitamsuk timiá anenmau asamtai, atumsha nunisrumek Yuska

aneetaram tusan seatjarme. ¹⁹Tura ¿Cristo anengkratairi itiuurak aa? tusaram ¿tura aints ainautin waruka timiá anenmaji? tusaram miatrusrumek nekaachminun wainiat, Yus atumin nintimtikramrat tusan seatjarme.

²⁰Tura asan Yusen maaketai tajai. Yuska timiá kakaram asa, ni tujinkamuringkia pengké atsau asamtai, ni kakarmarijai iincha kakamtikramrau asa, ni kakarmari ii seaji nuna nangkamasang iincha suramsamnawaitji. Tura ii nintimji nuna nangkamasang iincha nintimtikramramnawaitji. ²¹Tura Cristo Jesús iin uwemtikramrau asamtai, Cristonu ainautikia mash ninu asar, Yuska nekasar tuke inaitsuk pengker awajsarmi. Tu ati.

Mash Yuse kakarmarijai pengker nintimtinismi

4 ¹Wikia ii Apuri Cristo inatiri asamtai, wína achirkar kársernum engketawarmiayi. Tura asan atumin akatkun, Yuska: Wína uchir ataram tusa, atumin eatmaku asamtai, atumsha Yuska umirin asaram, ni wakera nunisrumek pujustaram tusan nunasha tajarme. ²Atumka: Mianchawaitjai tusaram, jaimiasrum yaitasrum aujnain ataram. Tura pengker nintimtinisrum aneenin ataram.^m ³Tura Yuse Wakani atumi nintin engkemturmau asamtai, atumka mash iruntram metek nintimsaram angka pengker pujustaram. ⁴Yuse Wakaningkia kichkitai. Nuka ii nintin mash metek engkemturmau asamtai, Cristonu ainautikia mash iruntrar kichik namangkea nunisrik atinuitji. Tura Yuska iincha mash eatmaku asamtai, mash metek iruntrar nekasar Cristojai nayaimpinam pujustinuitji tu nintimji. ⁵Ii Apuringkia kichkitai: Jesucristoketai. Tura asamtai mash metek Cristok nekasampita

titinuitji. Cristonu ainauti Cristo nemarkatar mash metek maiinuitji.

⁶Tura Yuscha kichkitai: Nuka mash aints ainauti Apaachirintai. Tura asa mash aa nuna inawai. Tura mash aints ainau wina wakeramurun najanawarti tusa nintimtik-rartinuitji. Tura asa ii nintin engkemturmawaitji.

⁷Tura Cristo iincha pengker awajtamak: Yainikmintrum tusa ningki wakerutmak, Yuse takatrisha metekchau atumsha atumsha takakmasmintrum tusa, ni kakarmarinaka suramsawaitji. ⁸Tura asamtai Yuse chichame yaanchuik Criston pachis tu aarmawaitai:

“Ni nemase ainaun mash nepetak nayaimpinam wakamiayi, tura mash ainia nuna inartin asa, ningki wakerak aints ainaun metekchau kichik kichik ni kakarmarin susamiayi.” Tu aarmawaitai.ⁿ

⁹“Ni wakamiayi,” tu aarmawa nuka çwarina takua tawa? Nuka yaanchuik ju nungkanam tara, aints wajas, nunia jakau asamtai iwiarsarmiayi. ¹⁰Turinau wainiat nunia jaka nantakin asa, mash iruna nuna ni kakarmarijai inartas nayaimpinam wakamiayi. ¹¹Tura mash aa nuna inakratin asa, ni akuptukmau ainautinka: Wina chichamur etserkataram tusa kakamtikramamiayi. Nunia Yuse chichame etserin chikich ainauncha: Wina chichamur etserkataram tusa ni chichamenka nekamtikramiayi. Nunia chikich ainauncha: Yusnum uwemratin chicham paan etserkamniuram tusa kakamtikramiayi. Nunia chikich ainauncha Cristo amirin ainau wainkamniuram tusa nintimtikramiayi. Nunia chikich ainauncha Yuse chichame nuikiartin ataram tusa inaikiamiayi.

¹²Cristo ni aintsri ainautin mash ni

takatrin suramak: Cristonu ainau yaingmintrum tusa tura: Wina wakera-mur miatrusrumek umirtukmintrum tusa, Cristo ni inatiri ainautinka mash ni kakarmarin suramsamiayi. ¹³Cristo iin kakamtikramrau asamtai, iikia mash metek Cristo miatrusrik umirkarmi tusar, tura Yuse Uchiri tu awai tusar, miatrusrik nekaami tusar yainiktinuitji. Tu pujakri-kia mash metek Cristoa nunisrik nintimrartinuitji. Tura Cristoa nunisrik nintimrar, Cristo wakeramuringkia tuke najanatnuitji.^o

¹⁴Tu pujakriki uchi nintiminawa nunisriki nintimrashtinuitji. Uchi ainau nase mai umpu mai umpu waja nunisarang nintiminak chichaman antukar pachitsuk nintimaurin yapajin ainawai. Tura wait chichaman antukar mengkakarta inawai. Tura asaramtai anangkartin ainauka wait chichaman chichainau asar, chikich ainauncha pachitsuk anangkinawai. ¹⁵Antsu iikia aneeniakur nekas chicham aa nu ujaniktinuitji. Tura ii Apuri Cristo miatrusrik umirkurkia, ni nintimia nunisrik nintimsar, Cristonu ainautikia uchi nampuarua nunisrik nintimrartinuitji. ¹⁶Tura asamtai Cristonu ainautikia untsuri ayatrik, kichkia nunisrik mash iruntrar metek nintimtunisar, miatrusrik aneenisar yainiktinuitji. Tura asar Cristo ni takatri metekchau ati tusa iin suramsau asamtai, Cristo kakarmarijai mash iruntrar Cristo miatrusrik umirkatnuitji.^p

Cristonam pujut yamaram jukitnuitji timiauri

¹⁷Ii Apuri Cristo ju chichamnasha aarta turutin asamtai, nunasha tajarme. Yusen umirtsuk pujuinawa nunisrumek nangkamrum nintimsarmeka pujusairap.

Nu aints ainauka Yuse wakeramurin pachinachu asar nangkamiar nintiminawai. ¹⁸Nuka Yuse chichamen nekatan nakitinau asar paanka nintiminatsui. Tura nintinchau asar pengker pujustinun Yus sukarta nunaka nintiminatsui. ^q

¹⁹Tura ni tunau turamurinha natsaamtuk turin asar, warainak pasé aa nuna turin ainawai. ²⁰Antsu atumka Cristo chichame paan antuku asaram, tu pujusmintrum tusarkia nuiniarchamuitrume. ²¹Atumka nekasrumek Jesúsa chichame antukuitkurmeke, tura ni chichame nuimiaru akurmeka, ni chichame pachisrum atumsha: Nuka nekasaintai timinuitrume. ²²⁻²³Yaanchuikia atumi wakeramuri nintimkuram anangmamkuram tuke inaitsuk tunau nintimin ayarme. Tura asaram mengkatkatnunam pujuyarme. Antsu yamaikia nu arut nintimtaingkia inaisaram, Yuse Wakani atumi nintin engkemturmau asamtai, yamaram nintiminawa nunisrumek pujustaram. ²⁴Tura nekas chicham antuku asaram, Yus wakera nunisrumek tunaarinchau pujakrum, nekasrum pengker aa nuke turatnuitrume. Tura asaram yamaikia yamaram nintimau nuke nintimsaram pujustaram. ^r

²⁵Tura atumka mash kichik namangkea tumau asaram, waitruitsuk nekas chicham aa nuke chichastaram. ^s

²⁶Kajernaikiaram tunau nintimsarmeka kanurairap. Antsu chikich ainaujaisha tsangkurnairaram angkan kanurtaram. ^t

²⁷Satanás atumi nintin engkemturawai tusaram aneartaram. ^u

²⁸Yaanchuik kasamin akurmesha, yamaikia Cristonu asaram kasamat inaisaram pengker takakmastaram. Tura yuuminak pujuinaw yuumamurin susami tusaram, pengker takakmastaram. ^v

²⁹Atum chichaakrumsha, chicham nakitamuka chichakairap. Antsu chikich aints ainaun pengker awajsamin aa nuke chichaktaram. Tura antujamniau chichau asaram, chikich ainausha miatrusarang Criston umirkarat tusaram, chicham pengker aa nuke chichastaram. ³⁰Yuse Wakani nekas pengker aa nuka wake mesemtikairap. Yuse Wakani atumi nintin engkemturmau asamtai atumsha: Wikia nekasnapi Yusnawaitja tusaram paan nekaamamin arume.

³¹Pasé aa nuka mash inaisaram kajernaitasha, tura nakitnairatnusha, tura jiyaniktincha, tura katsekmaktincha, tura pasé chichamsha mash inaisataram.

³²Antsu wait anennaisaram, tura pengker awajnaisaram pujustaram. Yus atumi tunaarin mash tsangkutramrau asamtai, atumka Cristonu asaram tsangkurnairataram.

¿Yuse uchiri ainau itiu pujusartinuita?

5 ¹Atumka nekasrum Yuse aneetiri uchiri asaram, Yus puja nunisrumek pujustaram. ²Cristo ningki wakerak, iin uwemtikramratas jarutramkau asa, Yusen pengker awajsamiayi. Tura asamtai Cristo iin anenma nunisrumek atumsha aneenitarum. ³Atumka Yusnau asaram, tsanirmatnusha, tura pasé turatnusha, tura chikichnau aa nu wakeruktincha pachisrum chichaschatnuitrume. ⁴⁻⁵Aints chikich nuwajai tsanirminauka, tura pasé turatnun wakerinauka, tura ninuchu aa nuna tuke wakerin ainauka nayaimpinam Yus ni Uchiri Cristojai aints ainautin inatmartas puja nuna pujutirinka pengké pujuschamnawaitai. Atumsha nuka paan nekarme. Ninuchu aa nuna wakerinauka chikich aintsu yusrin tikishmatrar seinawa nunisarang ainawai. Tura

chicham natsanpiaku aa nuka chichakairap, tura nintinchawa nunisrumek nangkamrumka chichakairap. Nu chichamka nakitaintai. Tura chikich ainausha pachisrum wishikrairap. Antsu Cristonu asaram maaketai titaram. ⁶Chikich ainau nangkamiar wait chichaman chichainamtaisha, anangkruwai tusaram nintimrataram. Yusen umirchau ainauka tuke inaitsuk tunau turin asaramtai, Yuska nu aints ainaun wait wajaktiniun susartinuitai. ⁷Tura asamtai nu aints ainaujai pengké pachinkairap tajarme.

⁸Yaanchuikia Cristo umirchau asaram, teenam pujuinawa nunisrumek pujuyarme. Antsu yamaikia ii Apuri Cristonu asaram, paaniunam pujuinawa nunisrumek pujarme. Tura asaram tuke inaitsuk paaniunam pujusrum Cristosha umirin ataram. ⁹Paaniunam pujuinauka pengker nintintin ainawai. Tura nekas pengker aa nuna turinak nekas aa nuna chichainawai. ¹⁰Tura asamtai ii Apuri wakera nu turin ataram. ¹¹Tura Yusen nintimsuk teenam pujuinawa nunisrumek atumka: Tunau wajasai tusaram, nu aints ainaujaingkia iruntrairap. Antsu teenam pujuinauka tunaanum pujusarai tusaram chicharkataram. ¹²Nu aints ainau anumkar tunau turina nuna tunaaringkia pachisar chichastinka nekas natsanpiakuitai. ¹³Antsu aints paaniunam pujuinau turamuringkia paan nekaratnuitji. Tura tunau ainau turamurisha nunisang mash paan nekaratnuitji. ¹⁴Tura asamtai tunau takainaun pachis tu aarmawaitai:

“Jakawa nunisrumek kanurum tepakrumsha shintartaram. Turaram shintarum nantaktaram. Turakrumningkia Cristo atumin

paan nintimtikramratnuitrume.”^w

¹⁵⁻¹⁶Tu aarmau asamtai: Itiur pujaji, tusaram nintimrataram. Yamaikia tunau ainau untsuri pujuinau wainiatrumek, atumka nintinchawa nunisrumka pujusairap. Tura ii jakatin kinta wári jeatin asamtai, kintajai metek Yuska pengker awajsataram.^x ¹⁷Tura asaram nintinchau ainau turina nuka turuwairap. Antsu Yuse wakeramuri itiur awa tusaram nintimrataram. ¹⁸Atumi umutiri umakrumsha nampekairap. Atum nampeakrum pujakrumka inaisatatkamaram tujintarme. Antsu wina nintirun Yuse Wakani tuke pujurtusti tusaram, Yus nintimsaram pujustaram. ¹⁹Tura atum chichaakrumsha, Yuse chichame pachisrum chichastaram. Tura Yus kanta kantamaram, atumek nintimsaram yamaram kantasha kantamaram. Tura ii Apuri nintimsaram atumi nintijai kanta kantamaram. ²⁰Tura mash aa nu pachisrum ii Apuri Jesucristo naari nintimtusum, tuke ii Apaachiri Yus maaketai titaram.^y

¿Cristo nemarkin ni wearijai itiur pujustinuita?

²¹Atumka Cristonu asaram umirnain ataram.

²²⁻²³Tura Cristoka ni aintsri ainautinka uwemtikramratin asa, ii muukea tumawaitai. Tura nuwentin ainauka ni nuwari muukea tumau ainawai. Tura asar ii Apuri nuna wakerau asamtai, aishrintin ainautiram atumi aishri umirkartaram.^z ²⁴Tu pujustaram turamin asamtai, aishrintin ainausha Cristonu asar, Criston umirina nunisarang mash ni aishrinak umirkartinuitai.

²⁵Cristo ni aintsri ainautinka timiá anenmau asa, iin uwemtikramratas

jarutramkamiaji nunisrumek nuwentin ainautirmesha atumi nuwaringkia aneetaram.^a ²⁶Cristo ni aintsri ainautinka: Aints entsanam maii pakuichau pujawa nunisrumek nekasrum tunaarinchau ataram tusa, ii tunaarinka mash japitram-ramiaji.^b ²⁷Cristo aintsri ainautikia mash iruntrar Cristonu asakrin, ii Apuri ni aintsri ainauti tunaarin sakturmartas jarutramkamiaji. Tura Cristo iin juramkitas taamtai, ni wakera nunisrik pengké tunaarinchau pujustinuitji. ²⁸⁻³⁰Cristo aintsri ainautikia mash iruntrar Cristonu asar, Cristo ni aintsri ainautin timiá anenma nunisarang nuwentin ainauka nekasar ni nuwarin aneanak ni namangkea nunisarang niincha pengker awajstartinuitai. ¿Yáki ni namangken nakitnui? ¿Antsu ni namangken pengker awajstas yáki yutan yuwatsu? ¿Tura yáki ni namangken pengker awajmamtso? Tura asamtai nuwentin ainau ni nuwarijai kichik namangkea nunisarang asar, nuwennuka ni namangken anea nunisang ni nuwarincha aneetnuitai. ³¹Tura asamtai Yus nu nangkamtaik chichaak: “Aints ni aparincha, tura ni nukurincha inais ukuki, ni nuwarijai tsaaningtinuitai. Tura aishmang ni nuwarijai jimiaraitiat, kichkia nunisang atinuitai,” timiayi.^c ³²Yus nu nangkamtaik aints nuwatnaikiat-nun pachis nunaka timiayi. Tura yaanchuikia nunaka nekaachminun wainiat, Yus wína nekamtikruau asamtai wisha tajarme: Ju chichamka Cristonu ainauti mash iruntrar kichik namangkea nunisrik pujuinaji taku tawai. ³³Tura wi atumin aatramjarme nunak ataksha tajarme: Nuwentin ainautiram atumi nuwarisha atumi namangkea nunisrumek aneetaram. Tura aishrintin ainautirmesha atumi aishri anturin ataram.

6 ¹Uchi ainautirmin tajarme: Ii Apuri Cristonu asaram, atumi aparisha, tura atumi nukurisha umirin ataram. Nuka nekas pengkeraitai.^d ²⁻³Yus nu nangkamtaik chichaman akupak: Ju chicham umirkuram, nekasrum pengker pujustinuitrume turammiaji nuka nuwaitai: “Atumi aparisha, tura atumi nukurisha umirkataram. Turakrumka pengker aints atinuitrume, tura untsuri musach ju nungkanam pujustinuitrume.”^e

⁴Uchirtin ainautirmincha tajarme: Atumi uchiri nangkamrumka kajkairap. Antsu pengker nuiniakmaikiakrum, tunau wajasaim tusaram, tura Yusen pengker nintimtusarat tusaram, Cristo wakera nunisrumek tsakatmartaram.^f

⁵Aintsu inatiri ainautirmincha tajarme: Atumka Cristo umirin asaram, Cristo wína pasé awajtusai tusaram, shamakrum pengker nintimsaram nakimtsuk atumi inatmin Cristo umirume nunisrumek pengker umirin ataram. ⁶Atumin inatmin jiirmamtaisha, wína pengker awajtusat tuuka nintimtsuk takakmastaram. Antsu atumin inatmin waitmachu wainiatrumek, Cristo inatiri asaram, nakimtsuk pengker nintimsaram takakmakrum Yuse wakeramuri najanin ataram. ⁷Atumka pengker nintimsaram atumin inatmin umirkurmeka aintskeka umirtsurme, antsu ii Apuri Cristosha umirume. ⁸Tura Cristo taamtai, aintsu inatiri ainausha, tura aintsu inatirincha ainausha ii Apuri Cristo ni pengker turamurijai metek kichik kichik pengker awajsatnuitai.^g

⁹Tura inakratin ainautirmincha tajarme: Atumsha Cristonu asaram, atumi inatiringkia yaishi yaintsuk asataram. Nusha nintimrataram: Cristo nayaimpinam puja nusha atumka umirkatnuitrume. Tura atumi inatirisha

a 5.25 (Col. 3.19; 1.Ped. 3.7) b 5.26 (Tito 3.5) c 5.31 (Gén. 2.24) d 6.1 (Col. 3.20)
e 6.2 (Ex. 20.12; Lev. 19.3; Deut. 5.16) f 6.4 (Col. 3.21) g 6.8 (Col. 3.22-25)

nunisarang niincha umirkartinuitai. Tura Cristoka mash ainia nuna inau asa, mash aints ainautin metek inatmaji.^h

**¿Cristonu ainautisha itiru
iwianch nepetkatnuitji?**

¹⁰Yatsur ainautirmincha tajarme: Atumka Satanás nepetkatarum, ii Apuri Cristo nintimsaram: Cristo ni kakarmarijai wína kakamtikrurti tusaram kakaram wajastaram. ¹¹Romano suntari mesetnum weartas jirun entsarar weenawa nunisrumek atumsha Yuse kakarmarijai Satanáska nepetkatnuitrume. ¹²Iikia aintsjaingkia maaniatsji. Antsu iwianch ainaujai ii jijjai waintsuji nujai, tura Satanásjai, tura pasé nintimikiartin ainau teenam pujuinawa nujai maaniaji. ¹³Tura asamtai suntar mesetnum weenak iwiarmamina nunisrumek Yuse kakarmari jukitaram. Tura asaram Satanás atumin nepetamkartas wakera nu nepetkau ataram, tura Satanás Yuse kakarmarijai nepetkau asaram tuke inaitsuk anearum kakaram wajastaram.

¹⁴Tura asaram wainmamkataram. Satanás nepetkatarumka nekas aa nuke nintimrataram. Tura wait chichamka etsertsuk nekas aa nuke etserkataram. Tura Cristo atumi nintin japitramrau asamtai, tunaarumsha mash japaram ukukrum, tunaachawa nunisrumek pujustaram. ¹⁵Tura asaram suntar iwiarmaminak sapatun wejina nunisrumek chikich ainamunam wetasrum, angkan pengker pujustin chicham etserkatini iwiarnartaram. ¹⁶Nunia suntar maaninak tantaaran takakinawa nunisrumek Cristoka nekasampita tusaram nintimtusaram. Turakrumningkia Satanás atumin: Tunau turataram tusa nepetamkatas wakeraksha, atumin nepetamkatatkama tujinramkatatrume. ¹⁷Tura Cristo atumin

uwemtikramrau asamtai, wína tuke waitkatatui, tu nintimsaram, suntar jirun tsengkrakinawa nunisrumek au asaram, Satanáska nepetkau ataram. Tura suntar nangkin takakinawa nunisrumek Yuse chichamesha nintimrau ataram. Nuka Yuse Wakani nangkirintai.ⁱ

¹⁸Yuse Wakani itiru Yus seatnuitrume tusa atumniaka nekamtikramatnuitrume. Tura asamtai tuke inaitsuk Yus seataram. Tura kajinmatsuk tuke Yus seakrumka, Cristonu ainausha mash pachisrum Yus seattaram. ¹⁹⁻²⁰Tura winasha Yus seatritaram. Tura Yus winia chichartak: Wína chichamur etserkata tusa akuptukuitai. Wikia ni chichamen etserin asan kársernum engkeamuitjai. Tura kársernum engketiatun, warinak titaj tusan, yamaikia nekaachmin ayatun, shamtsuk tura natsaamsuk Yusnum uwemratin chicham nekas pengker aa nuna paan etserkatnun Yus wína nekamtikiati tusaram seatritaram tajarme.^j

Inangnamu chicham akupkamuri

²¹Yamaikia ju papin aaran umisu asan, ii aneetiri yachiin Tiquicon atumin akuptuktatjarme. Nuka ii Apuri Cristo pengker inatirintai. Nuka atumin jea, wína pachitas atumin ujatmak wi turamurnasha mash nekaamtikramatatrume. ²²Tura asamtai atumka iin pachisrum mash nekaataram tusan, tura atumin pengker nintimtikrarti tusan akuptuktatjarme.^k

²³Ii Apaachiri Yus ii Apuri Jesucristojai ni nemarkautirminka mash angkan pengker pujustinun suramsarti tajarme. Tura Cristo nekasampita tinu asakrumin, tuke aneenisrum pujustaram tusa, atumin yainmakarti. ²⁴Ii Apuri Jesucristo tuke inaitsuk aneakrumningkia, Yus atumin mash pengker awajtamsarti tajarme. Maaketai.

Pablo Filiposnum Pujinaun Papin Akuptukmauri

Chicham akupkamuri

1 ¹Wiitjai Pabloitjai. Yatsur Timoteojai ju papin atumin aatjarne. Iisha mai Cristo Jesúsá inatirinji. Jesucristonu ainautirmin Filiposnum pujuinautirmin mash atum aatkur pujaji. Tura Cristonu ainau wainin ainautirmincha, tura ni yain ainautirmincha aatkur pujaji.^a ²Ii Apaachiri Yus ii Apuri Jesucristojai, atumniasha pengker awajtamsarti, tura angkan pengker pujustinasha suramsarti.

Maaketai timiauri

³Atumka Yusnau asaram, tura wína yainkau asakrumin, atumin nintimsan pujakun, wína Yusrunka maaketai tajai. ⁴Tura atumin mash pachisan Yusrun seaknaka, nekasn warasan Yusen seajai. ⁵Nu nangkamtaik Cristonam uwemratin chichaman wi etsermatai, atumka mash iruntraram wína yainkau asakrumin, tura yamaisha tuke yaintu asakrumin, nuna nintimsan warasan Yusen seatjarne. ⁶Yus atumin pengker awajtamsatniun nangka-mau asa, Cristo Jesús tatin kintaka jeatsaing, Cristonu ainautirmin tuke pengker umirtuktaram tusa, Yus atumniaka yainmaktatrum. Yus nekasampi turatatua tusan, wisha nekajai. ⁷Wikia atumin aneau asan, atumin pachisan tu nintimsan pujajai. Yamaisha

kársernum engketkuncha, tura apu iruntrar pujuinamunmasha: Cristonam uwemratin chicham nekas Yuse chichamentai tusan, tura nu chichamka waitchawapita tau asamtai, winasha wait anentrak Yus yaintui. Atumsha winasha yaintu asakrumin, Yus wait anentramak atumniasha mash yainmarme. ⁸Jesucristo atumin wait anentramak mash anenmau asamtai, wisha nunisnak atumin warutmak anejrum nunasha Yuska nekawai. ⁹Atum aneenisrum pujarme nuna nangkamasrumek aneenitaram tusan, tura Yus ni nekamtairin atumniasha suramsarat tusan Yusen seatjarne.

¹⁰Tura Yusen tu seakun, nekas pengker aa nuna timiá pengkeraitai, tiarat tusan Yusen seatjarne. Tura Cristo tatin kinta jeamtai, atum nekasrum tunaarinchau wajasmintrum tusan, tura wait wajakairam tusan Yusen seatjarne.

¹¹Jesucristonu asaram, ni kakarmarijai atumsha nekasrum tunaarinchau pujustinuitrume, tura pengker aa nuka nekasrum tuke mash turatnuitrume tusan, atumin pachisan Yusen seatjarne. Tu pujakrumningkia chikich ainausha: Yus juuntapita tiartnuitai.

Cristonak nintimsan pujajai timiauri

¹²Yatsur ainautiram umaarutirmesha, wi kársernum engkeman pujai, aints

a 1.1 (Hech. 16.12)

untsuri Cristonam uwemratin chichaman antukari. Nu nekaataram tusan wisha wakerajai. ¹³Juun apu jeen wainin ainausha, tura chikich inatiri juun apu jeen pujuinausha wína pachitsar: Cristo nemarkin asamtai, kársernum engkewari tusan mash nekarinawai. ¹⁴Wi kársernum engkeamu pujamtaí, Cristonu ainau untsuri ii Apurin umirkar, yamaikia pengker nintimsar, shamkartutsuk Yuse chichamen etserinawai.

¹⁵Nekasan tajarme: Chikich ainauka wína suwirpiaku jiirsar, tura miajuitjai tinayat, Cristo chichamenka etserinawai. Antsu chikich ainauka pengker nintimtursar Cristo chichamenka etserinawai.

¹⁶Wikia Cristonam uwemratin chicham nekas Yuse chichamentai tinu asan, juni kársernum engkeamu pujajai. Tura asamtai chikich ainau nuna nekainau asar, tura Criston aneenu asar Cristo chichamenka etserinawai. ¹⁷Antsu chikich ainauka pasé nintimtursar: Wína anturtukarat tusan, wína pachitsar wait wajakti tu nintimtursar, Cristo chichamenka niish etserinawai. ¹⁸Tinau wainiatnak wikia pachiatjsai. Antsu mai metek Cristo chichamen etserkartí wikia tajai. Chikich ainau pasé nintijaisha, antsu chikich ainauka nekasar pengker nintijai Cristo chichamen etserinamtaí, nuna nekaan wisha waraajai. Tura asan tuke warastatjai.

¹⁹Nunia atumsha Yus tuke seatrau asakrumin, Jesucristo Wakani kakarmarijai wisha tuke Yusnum uwemratatjapi tusan nekajai. ²⁰Wikia nekas natsaamtsuk: Cristo wína Apuruitai tusan, tuke ni naarin pachisan aints ainaun paan ujakartasan wakerajai. Wi nuna turamtaí, Cristo kakarmari wini puja nuna paan nekaawarat tusan wakerajai. Wína mantinachmataikia, tura wína mantinam-

taisha wikia shamkashtatjai, tura asan aints ainau: Cristo nekas juuntapita tiarat tusan wakerajai. ²¹Wikia iwiaaku pujaknaka tuke Cristonak nintimsan pujajai. Antsu jakanka tuke Cristojai tsaniasan pujustinuitjai. Nuka timiá pengkeraitai. ²²Yamaikia iwiaaku pujaknaka, Cristo ni takatrin wína surusmia nuna takaajai. Turayatnak ¿tukí timiá pengkerai? tusanka nekatsjai. ²³⁻²⁴Wikia jakanka Cristojai tsaniasan pujustasan wakeraja nuka timiá pengkeraitai. Antsu atumi yainmakartin yuumau asakrumin, wikia iwiaaku pujusminuitjai. Tura asan ¿tukí timiá pengkerai? tusan nekaatatkaman tujintajai.^b

²⁵⁻²⁶Cristo Jesús wína yaintu asamtaí, atumjai ataksha iruntran pujamtaikia atumsha: Cristo nekas juuntaitai tusaram, nukap warasmintrum tusan, wárikia mantuachartatui tusan nekajai. Tura tu nintimsan pujaknaka, wisha atumniaka mash: Miatrusrumek Cristo umirkataram tusan kakamtikratnuitjarme. Tura atumniaka mash waramtiksatnuitjarme.

²⁷Tura Cristonam uwemratin chichamka timiá pengker asamtaí, atumsha pengker aa nuke turataram. Tura asakrumin atumin jiisan, tura atumin jiitsuk yajá pujaknasha, atum pengker turamurmin anturkatasan wakerajrume. Tura mash metek iruntraram Cristo nekasampita tusaram chikich ainausha Cristonam uwemratin chicham mash metek nintimsaram ujakaram. ²⁸Atumi nemase ainausha jumchiksha shamkairap. Atum shamtsuk pujakrumningkia, nu aints ainauka: Jiinmapi wetatja tinaunka nunaka Yus nekamtikiatnuitai. Tura Yus atumniasha nekamtikramau asamtaí: Nekasnapi uwemratatja titinuitrume. ²⁹Atumka Cristonu asakrumin, ni nekas nintimtusti-

nasha tura nuna nangkamasrumek wait wajaktinasha Cristo tsangkatramkawaitrume. ³⁰Atumsha wiya nunisrumek Cristonu asaram wait wajarme. Yaanchuik wi wait wajamurka waitkamiarume. Tura yamaisha wait wajamurka tuke antarme.^c

Cristo nintimias pujumia nunisrumek atumsha pujustaram

2 ¹Cristo atumin pengker nintimtikramrau asamtai, tura Yuse Wakani atumi nintin engkemturmau asamtai, atum Cristo nintimsaram pujau asaram, tura chikich ainau wait anentakrum pujau asaram, tura winasha anentau asaram, ²wina waramtikrustasrum mash metek iruntraram aneenisrum pengker nintimtusisrum pujustaram. ³Antsu chikich ainau suwirpiakuka jiasairap. Tura: Miajuitjai tuuka nintimtumaisairap. Antsu mianchawaitjai, tu nitimtumasarum pujustaram. Tura chikich ainausha pachisrum: Nuka timiá pengkeraitai tu nintimsaram pujustaram. ⁴Atumnau aa nuke nintimsarmeka pujusairap. Antsu çhikich ainaun itiurak yaingkaintaj? tu nintimsaram pujustaram.

⁵Cristo Jesús nintimias pujumia nunisrumek atumsha nintimsaram pujustaram.

⁶ Cristo Yusea nunisang pujayat: Wikia Yusjai metekaitjai, tu nintimsangka pujuchmiayi.^d

⁷ Antsu ni pujutirin nayaimpinka ukuki, aintsua nunisang akiina, mash aints ainau inatiria nunisang ayayi.

Jesús tunaarinchau ayat aints wajas:

⁸ Wikia mianchawaitjai tusa ni Apaachirin umirkau asamtai,

mangkartinua nunisarang numi winangmanum natsanpiakum maawarmiayi.^e

⁹⁻¹¹ Tura asamtai nayaimpinam puju ainausha mash, tura nungkanam puju ainausha mash, tura nungka nitkarin puju ainausha mash

Jesúsan tikishmatrarti tusa, tura Jesúsán nakitin ainausha:

“Ameketme Inakratnum,” tiar ni Apaachiri Yunsaka waramtiksar-tinuitai.

Yus Jesucriston: Mash apu inau ata tusa,

ni naarin chikich ainau naarin nangkamasang nekas pengker awajsamiayi.^f

Cristonu ainauka yaa tsantinawa nunisarang ainawai

¹²⁻¹³Tura asamtai aneetir ainautiram, yaanchuik wi atumjai pujakun, Yuse chichame etsermatai antukrum umirtuk-miarume nuna nangkamasrumek yamaisha arák pujai wainiatrumek pengker umirtuktaram. Atumka: Yuse wakeramuri najanatatajai titaram tusa, atumin yainmaktinka Yusketai. Tura ni wakeramuri takamtikramsatanuka Yusketai. ¹⁴Atum turarme nuka mash chikich ainau pachisrum aujmatnaitasuk tura jiyannitsuk asataram tajarme. ¹⁵Nu turakrumka pengké tunaarinchau pujau asaram, chikich ainau atumniaka wiasmatramtsuk pujusartinuitai. Tura asaram Yuse uchiri atinuitrume. Tura tunau ainaujai pachinkaram pujayatrumek, nekasrum tunaarinchau pujau asaram, yaa teenam tsantinawa nunisrumek ¹⁶pujut nangkankashtin pachisrum Cristo chichame chikich aints ainausha

nekantikiataram. Nu turakrumka Cristo tatin kinta jeamtai wínaka waramtikrusti-nuitrume. Nu turakrumningkia wisha nintimsan: Wikia wait wajayatnak tuke wekaasan, Yuse chichamen etserkamiaja nunaka nangkamniaka etserkachmiajai titinuitjai.

¹⁷Wína mantinamtaisha wikia warasainjai. Tura atumsha Cristo nekasampita tinu asaram, wait wajayatrums wi waraaja nunisrumek waraminuitrume. ¹⁸Tura atumsha waraakrumningkia metek warasarmi.

Timoteon pachis tura Epafroditon pachis etserkamuri

¹⁹Ii Apuri Jesús wakeramtaikia, Timoteo wína pengker nintimtikrurat tusan wári atumin akuptuktasan wakerajrume. Nuka atum itiu pujarme nuna nekaa, wína ujatkatu tusan wisha wakerajai. ²⁰Tura Timoteowa nunisar nintimsar pujuinaunka kichkisha waininatsjai. Timoteoka wiya nunisang atumin pachis: ¿Pengkerash pujuina? tusa nintimtur-marme. ²¹Chikich ainauka ni wakeramurinak tuke nintimu weenawai. Antsu Jesucristo wakeramurinka nintimu weenatsui. ²²Tura atumka Timoteo pachisrum ni pengker pujamuringkia nekarme. Nuka wijai tsanias Cristonam uwemratin chichaman etsernuyayi. Tura uchi ni aparin yayawa nunisang winasha tuke yainuyayi. ²³Tura wina turunatnur itiu ating tusan nuna nekaanka, Timoteonka kakarmachu atumin akuptuktasan wakerajrume. ²⁴Tura ii Apuri wakeramtaikia, karsernumia wina jirkiaramtaikia, atumin wáriapi wainkartatja, tu nintimsan pujajai.

²⁵Yamaikia Epafroditoncha akuptuktasan nintimtajrume. Juka wína yatsurua tumawaitai. Tura wiya nunisang wait

wajayayi. Tura wiya nunisang shamkartutsuk Cristo chichamen etsernuyayi.

²⁶Atumka ni sungkurmakmaurisha nekau asakrumin, Epafrodito nuna nekaa napchau nintimias, atumin jiirmastas wakerutmarme. ²⁷Nuka nekas jaachak wajakin asamtai, wisha wake mesekmajai. Tura wainiat Yus wait anentak tsuwarmayi. Ni jakawaitmataikia, wikia nuna nangkamasnak wake mesekan pujuschajash. Tura Yus winasha wait anentruru asa nincha tsuwarmayi. ²⁸Tura asamtai atumsha ataksha wainkaram warastaram tusan, tura wisha nunisnak napchau nintimsuk pujustaj tusan, ii yachiin wári akuptuktajarme. ²⁹Tura ni atumin jeamtai, ii Apuri Cristo maaketai tusaram, nukap warasrum wainkataram. Chikich ainau niya nunisarang Criston pengker umirkar pujuinausha pengker awajsataram. ³⁰Atumka wína yainkatatkamaram tujintau asaram, ni wína yaingt tusaram, atum akupkamu asa, ii yachi jatancha shamtsuk wina yaintak jaachak wajakmiayi.

Cristo nekaatnuka mash aa nuna nangkamasketai

3 ¹Wina yatsur ainautirmin umaarutirmincha, yamaikia ataksha tajarme: Ii Apuri Cristo nintimsaram warastaram. Nuwuk aatramjarme nuna ataksha antuktaram tusan, napchauka nintimsuk atumin ataksha aatjarme. ²Anangkartin ainau pasé aa nuna nuikiartinak pujuinau wainkataram. Nu aints ainau chichainak: Atum uwemratarum wakerakrumka, Moisés tímia nunisrumek atumi nuwapchiri charuktaram, nangkamiar tinawai. ³Nuwaprun charuknaka uwemrainjapi, tichamawaitji. Antsu Yuse Wakanjai Yus pengker awajkur:

Yus juuntaitai taji. Tura Cristo Jesúsnu asar uwemratatjiapi tusar waraaji, antsu ii nuwapchiri charukmau asar uwemratatjiapi tatsuji.^h ⁴Chikich ainau nangkamiar: Wikia miatrusnak Moisésa chichamen umirkawaitjai tu nintimtumasar pujuinau wainiatnak, nu aints ainaun nangkamasketjai timinuitjai. ⁵Wi akiinamur ocho (8) kinta nangkamaramtai, Moisés chichaman akupkamia nunisarang nuwapchirun charutrukar-miayi. Wikia nekasn Israela wearai asan, Benjamínka wearinjai. Tura wína wear ainausha tuke hebreo chichamen chichau asaramtai wisha nunisnak nunasha chichayajai. Tura fariseo aints asan, Moisésa aarmaurin tuke umirnuyajai.ⁱ ⁶Tura wikia Moisésa aarmaurin miatrusnak umirkau asamtai, wína pachitsar: Moisésa aarmaurin umirchawaitjai pengké turutcharminuitai. Tura wiki nintimtumasnak Yusen miatrusnak umirkataj tusan, Cristonu ainaun kajerakun wait wajaktiniun suyajai.^j

⁷Yaanchuikia tu nintimsan pujuu asan, nangkamin nintimnuyajai. Antsu yamaikia Cristonu asan, wi yaanchuik nukap nintimnuyaja nunaka yamaikia inaisawaitjai. ⁸Yaanchuik turutirun turaknaka tuuka uwemrachminuitjai tusan nuna nekaan, tura nunaka mash inaisau asan, yamaikia pachischawaitjai. Antsu wína Apur Cristo Jesús ituirak awa tusan, nuna nekaatasan wakerajai. Tura Cristonu tuke ataj tusan, yaanchuik nintimnuyaja nunaka pachisan: Tsuwata nunisketai, tu nintimsan pujajai. ⁹Tura Cristojai tsaniasan pujustasan wakerau asan, Moisésa aarmaurin umirkun nekasnapi tunaarinchau pujusainja, tuuka yamaikia nintimsujai. Antsu Criston nekasampita tinu asamtai, tura Yus wína

tunaaruncha japrutau asamtai, Yus winaka tunaarinchawa nunisnak pujai jiiirui, tu nintimjai. ¹⁰Tura mash ainia nuna nangkamasang wakeramurka juwaitai: Criston miatrusnak nekaatasan wakerajai. Tura Yuse kakarmarijai nantakmiaurinha nekaatasan wakerinjai. Tura ni wait wajakmia nunisnak wait wajaktasan wakerinjai. Tura Cristo jatancha shamtsuk jakamia nunisnak wisha jatancha wakerinjai. ¹¹Tura asan Cristo jaka nantakmia nunisnak wisha jakamunmaya nantaktasan wakerinjai.^k

Pablo tu pujajai timiauri

¹²Antsu Cristo wakeramurin miatrusnak umirnuyajai tatsujai. Tura tunaauruka nekas atsawai tatsujai. Tura wainiat Cristo Jesús: Winar atatme tusa untsurkamiayi. Tura asamtai Cristo wakera nunaka tuke inaitsuk miatrusnak umirkatasan wakera-jai. ¹³Yatsur ainautiram umaarutirmesha, wisha Cristo pujumia nunisnak pujajai tatsujume. Antsu kichnasha tajarme: Wi turinuyaja nunaka yamaikia mash kajinmaran, Cristoa nunisnak atasan wakeraja nunaka tuke nintimsan pujajai. ¹⁴Wikia nekasnapi Cristo Jesúsjai tsaniasan pujustatja, tu nintimsan pujajai. Tura Yus wína untsurak: Cristojai tsaniasan nayaimpinam tuke pujusta turutit tusan, tu nintimsan pujajai.

¹⁵Tura asamtai Cristo nekasampita tinu ainautikia mash metek tu nintimraru armi. Antsu atum tu nintimsuk pujakrumningkia, Yus: Tu pujustaram tusa, atumin nunasha nekamtikramatatrume. ¹⁶Tura yanchuk Cristo tu umirkatin nekau asaram, tuke nunisru-mek umirkataram tajarme.

¹⁷Yatsur ainautiram umaarutirmesha, wi tu pujaja nu nekau asaram, wiya

nunisrumek atumsha pujustaram. Tura aints iiya nunisarang Cristo nemaninau wainkaram, nu aintsua nunisrumek pujustaram.¹ ¹⁸Yaanchuik atumin nukap ujakmiajrume nuna yamaisha juutkamai-kiakun ataksha atumin ujaktasan wakerajrume. Cristo numi winangmanum jakamia nuna chichamen untsuri aints ainau antutan nakitinawai. ¹⁹Tura ni namangke wakerina nunak tuke nintimsar pujuinau asar, ni namangkengka ni Yusrintai. Tura tunau takainau asar, natsanpiaku aa nunaka natsaamtsuk: Nuka pengkeraita tinawai. Tura ju nungkanmaya ainau nintiminawa nunisarang nintiminawai. Tura asar tuke mengkaakartin ainawai. ²⁰Antsu iikia Yusnau asar, tura nayaimpinam pujustin asar, iin uwemtikramratin nayaimpinmaya wári tati tusar nakaji. Iin uwemtikramratnuka ii Apuri Jesucristo-ketai. ²¹Ni taa, iinu namangke jakatin aa nunaka ni namangkae nunisang ati tusa yamarman yapajturmatnuitji. Tura asamtai nu yamaram namangjai pengké jakashtinuitji. Tura ni tujinkamuringkia atsau asamtai, Cristo waring achat mash aa nunaka ni kakarmarijai inartinuitai.

Ii Apuri nintimsaram tuke warastaram

4 ¹Yatsur ainautirmin umaarutirmincha atumin aneau asan, atumniasha jiistasan wakerajrume. Tura wi etsermaur antuku asaram, Cristo miatrusrumek umirkau arume. Tura asakrumin wisha tuke waraajai. Atumka wína aneetir asaram, tuke Cristo umirkuram kakaram wajastaram tajarme.

²Yamaikia ii umaji Evodianam chichaman akupajai. Tura ii umaji Sintiquenmasha chichamnasha akupajai. Wait anesrum atumka mai Cristonu asaram, pengker nintimtunisrum

pujusmintrum tusan chichaman akuptajrume. ³Yatsuru, amesha nekasam wína takatur yaintin asakmin wi seatjame: Ii umaji mai pengker nintimtunisar pujusarti tusam yaingta. Wi yaanchuik Cristonom uwemratin chichaman etsermatai, ii umaji mai Clementejai, tura chikich aints ainaujai Yuse takatrin takakmasar, wína nukap yainkarmiyai. Nuna naaringkia papinum tuke iwiaaku pujustinnum aatramu ainawai.

⁴Ii Apuri Cristonu asaram, tuke mash warastaram. Ataksha tajarme: Tuke warastaram.^m ⁵Tu pujakrumningkia chikich ainau atumin waitmakar mash: Nu aints ainauka nekasar pengker nintintin ainawai tiartinuitai. Ii Apuri arakchichu pujau asa iincha tuke waitmaji.

⁶Atumka yumtinka nintimtsuk asataram. Antsu tuke Yus seakrum waring achat mash Yus ujakataram. Tura Yus seakrum tuke maaketai titaram.ⁿ

⁷Yus ni Uchirin Cristo Jesúsau akuptur-maku asa, atumi ninti nekas angka nintimratnun aintstikia pengké nekaachmin aa nuna atumniasha suramsatatrume. Tura Cristo Jesúsau asakrumin, Yus atumin angka awajtamsau asa, atumi nintimaurincha tunau engkemtuwai tusa atumin waitmaktatrume.

Pengker aa nuke nintimsataram timiauri

⁸Yatsur ainautirmin umaarutirmincha, chikichnasha inangnamunam tajarme: Atum chicham nekas aa nunak nintimratj tusaram, tura juun ainauncha: Nekasnapi pengker awajsatatja, tu nintimsaram pujustaram. Tura tupin nintimsanapi pujustatja tusaram, tura tunaarinchawapi pujustatja tu nintimsaram pujustaram, tura chikich ainauncha aneetatjapi tusaram, tura pengker aa

nunaapi nintimratatja tusaram, waring timiá pengkerai, tu nintimsaram maaketai tusaram pujustaram.

⁹Wi atumin nuiniarniajrume nuka umiktaram. Tura wi etsermaur antukmia-rume nusha umiktaram. Tura wi takaamur wainkamarume nusha nunisru-mek turataram. Nu turakrumningkia ii Yusri nekas angkan nintimratnuncha sukartin aa nuka atumjai pujustinuitai.

**Filiposnumia ainau Pablon
kuikian akuptukmauri**

¹⁰⁻¹¹Atumka ataksha wína nintimtura-saram kuik akupturkau asakrumin wikia Apurun maaketai tusan warasmajai.

Yaanchuikia nekasrum wína yainkatas-rum wakerutayatrum yainkachmiarume. Tura wainiatun wi papin aaran: Wína kuikiar atsau asamtai yainkataram tusanka nunaka aatsujrume. Wi waring achat mash yuumayatnak, napchau nintimtsuk pujustinasha nuimiaruitjai.

¹²Kuikiartichu pujaknasha: Kuikiartichu ainau itiur pujuinawa tusancha nekauyaja-
jai. Tura kuikiartin pujaknasha kuikiartin ainau itiur pujuinawa tusancha, nunasha nekauyajai. Yutair nukap amatikia, tutuaran pengker nintimnuyajai. Tura yutair atsamtaisha, yaparaknasha nunisnak pengker nintimnuyajai. Yuuma-tsuk pujaknaka tura yuumaknasha, pachitsuk pengker nintimsan pujustina-sha nuimiaruitjai. ¹³Cristo ni kakarmarin surusu asamtai, Cristo wakera nunasha mash turamnawaitjai. ¹⁴Turai wi wait wajamtai, atumka wait anentrakrum wína yainkau asaram, nekas pengker aa nuka turamarume.

¹⁵Filiposnum pujuinautiram, nu nangkamtaik Cristonam uwemratin chichaman atumin ujakmau asaram, tura

wisha Macedonia nungkanmaya jiinkin asamtai, chikich yaktanmaya Cristonu ainau kuikian suruscharu wainiatrumek, atumek maaketai turutsaram kuik irumraram akupturkamarume. ¹⁶Tura wi Tesalónica yaktanam pujamtaisha, atumka kuik irumraram, ni yuumamuri sumarmakat tusaram akupturkamarume. Nunia ataksha kuik irumraram akuptur-kamarume.^p

¹⁷Kuikianka miatrusnaka wakeratsjai. Antsu atumka kuik akupturkau asakrumin, Yus atumin nukap yainmakta-trume, tu nintimsan pujajai. ¹⁸Yatsur Epafrodito itama nuka atum akupturka-marume nunaka mash jukimjai. Tura nukap akupturkau asakrumin, nuna mash metek jukin asan yamaikia yuumatsjai. Wína surayatrumek nuka Yus susama-rume. Tura asaram kungkuti jinum epeamua nunisrumek Yus pengker awajsamarume.^q

¹⁹Atumka Cristo Jesúsnu asakrumin, wina Yusur mash ainia nuna najanau asa, atumi yuumamurin mash suritramtsuk suramsatnuitrume. ²⁰Tura asamtai ii Apaachiri Yus nekas pengker aa nu tuke maaketai tiarmi. Nuke ati.

Inangnamu chicham akupkamuri

²¹Jesucristonu ainautirmin: Mash pengker pujustaram tusan chichaman akuptajrume. Tura ii yachi iijai iruntrar pujuinausha: Pengker pujustaram tusar chichaman akupturminawai. ²²Cristonu ainau ju yaktanam pujuinauka mash pengker pujustaram tusar, chichaman akupturminawai. Tura juun apu Césari inatiri ainia nusha Cristonu asar atumin chichaman akupturminawai.

²³Ii Apuri Jesucristo atumnasha pengker awajtamsarti. Maaketai.

Pablo Colosasnum Pujuiunaun Papin Akuptukmauri

Chicham akuptukmauri

1 ¹⁻²Wiitjai Pabloitjai. Yus wakerau asa, Jesucristo chichame etserin ata tusa wina akuptukmiayi. Cristo: Nekasrum tunaarinchau winar ataram tusa, atumin eatmaku asamtai, Cristonu ainautirmin Colosasnum pujuinautirmin ii yachí Timoteojai ju papin aaran akuptajrume. Ii Apaachiri Yus atumin wait anentramak tuke pengker awajtam-sarti. Tura angka pengker pujustinasha suramsarti.

Pablo Cristonu ainaun pachis Yusen seatmiauri

³⁻⁴Atumka Cristo Jesúsnu asakrumin, tura Cristonu ainau mash aneau asakrumin, iisha atum pachisar chicham antukar, Yus ii Apuri Jesucristo Apaachiri asamtai, atum pachisar seakur tuke maaketai taji. ⁵Atumka Yusnum uwemratin chicham nekas aa nu antuku asaram, nayaimpinam pujustatjiapi tinu asakrumin, iisha atum pachisar tuke maaketai taji. ⁶Yusnum uwemratin chichaman mash nungkanmaya ainau antukarmia nunisrumek atumsha antuku asaram, tura Yus miatrusrumek umirkau asaram, Yuse anengkratairi pachisrum: Nekas tu awapi tusaram nekaamarume. Tura asakrumin nu chicham árak

nereawa nunisang mash nungkanam yujaawai. ⁷Ii aneetiri yachí Epafra nu chichamnaka atumin nekamtikramramiarume. Nuka iiya nunisang Cristo inatirintai. Tura Criston miatrusang umirkau asamtai, atumin akuptukmiarume. ⁸Tura nuka atumin pachitmas: Yuse Wakani ni nintin pujurmau asar, aneenisar pujuinawai tusa iincha ujatmakmiaji.

⁹Tura nu chichamka antuku asar, nunia nangkamar tuke inaitsuk atum pachisar Yus seakur pujaji. Tura ni wakeramurin atumin nekamtikramawarat tusar, tura nuna atumin mash nintimtikramrarat tusar, atum pachisar Yus seaji. ¹⁰Atumka Yusnu asaram, pengker aa nuka turataram tusar, tura Yuse wakeramuri miatrusrumek nekaataram tusar, ii Apuri tuke umirkau asaram, atum tuke Yus pengker awajsamniuram tusar, atum pachisar Yus seaji. ¹¹Tura Yus ni kakarmarijai atumin kakamtikramrat tusar, tura itiurkachmin pujayatrum, napchau nintimsuk jaimiasrum warasrum pujusmintrum tusar Yus seaji. ¹²Tura ii Apaachiri Yus: Wina uchir asaram, wina ainsur ainaujai mash nayaimpinam tuke paaniunam Wijai pujusmintrum turamin asamtai, tuke maaketai titinuitrume. ¹³Yaanchuikia iikia teenam pujuyaji. Tu pujarin ii

Apaachiri Yus iin teenmaya jiirmakin asa: Wína aneetir Uchir pujamunam atumsha pujusmintrum tusa angkanmamtikramamiaji. ¹⁴Yuse Uchiri jarutramak ii tunaarin sakturmaru asa iin uwentikramramiaji.^b

Cristo jarutramak angkan awajtamsamiaji

¹⁵Yuse Uchiri Cristo nungkancha najantsaing tuke pujuyayi. Tura asa mash najanamu apurintai. Yuska wainchamaitiat, ni Uchiri aints wajasu asa, aints ainau wainkarat tusa wantinmamtikiamiayi.^c

¹⁶Cristo mash ainia nuna najanau asa, nayaimpinam aa nuna mash, tura nungkanam aa nunasha mash najanamiayi. Tura ii wainji tura ii waintsuji nunasha mash najanamiayi. Tura Yuse awemamuri ainausha mash, tura nuna apurisha mash, tura junia apu ainausha mash Criston umirkarti tusar najanamu ainawai. ¹⁷Mash ainia nunaka najantsaing Cristoka tuke pujuyayi. Tura yamaisha tuke pujau asa, tu ati tusa, mash aa nunaka wainnuitai.

¹⁸Cristo nu nangkamtaik tuke iwiaaku pujuu asa, ni aintsri ainauti apurintai. Tura mash aa nuna inau ati tusa, Yus ni Uchirin chikich aints ainaun nangkamasang nuná eemak jakamunmaya inankimiayi.^d ¹⁹Tura asamtai Cristo mash ainia nuna najanau asa, tura mash ainia nuna inartin asamtai Yus: Wijai metek ati tusa wakerimiayi. ²⁰Yus ni Uchirin: Numi winangmanum maawarti tusa akupkamu asa, ni numpe numparmaujai mash nungkanam pujuinauncha, tura nayaimpinam mash pujuinauncha: Angkan pengker nintimsar pujusarti tusa Yus wakerukmiayi.^e

²¹⁻²²Atumsha yaanchuikia Yus umirchau asaram, tura tunau tuke nintimsaram pujau asaram, Yusnumka jeachmin

ayarme. Tura Yuse nemase arumning, Cristo aints wajas: Wína Apaachirjai pujustasrum yamaikia tunaarinchawa nunisrumek ataram tusa waitnas jakau asa, atumi tunaarin sakturmarmiarume. Tura asamtai Yus: Yamaikia wijai pengker nintimsaram pujustaram turamrume. ²³Tura asamtai nekasrum tuke inaitsuk Cristo nekasampita titinuitrume. Tura Cristonam uwemratin chicham antuku asaram, tuke inaitsuk: Wikia Cristojai nayaimpinam pujustasan wakerajai tinu asaram, nekasrum nayaimpinmaka pujustinuitrume. Nu uwemratin chicham-naka mash nungkanam etserkaruitai. Tura Cristo wína akuptuku asamtai, wisha nu chichaman etsernuitjai.

Pablo Cristonu ainau inatirinjai timiauri

²⁴Criston miatrusarang umirkau ainau wait wajakartin ainawai. Tura asaramtai wisha nunisnak Cristonu asan, ni tímia nunisnak wait wajajai. Cristo wait wajakmia nunisnak atumin yaingtasan wait wajayatun, Cristonu asan wikia warajai. ²⁵Yus wína akatur akuptak: Wína aintsur ainamunam mash wína chichamur miatrusmek etserkum, Cristonu ainau inatiri ata tusa akuptuku asamtai, wikia atumi inatiri ajai.^f

²⁶⁻²⁷Yuska nekas pengker chichaman mash nungkanam pujuinaun nekamtikia-tas wakerayat, nu nangkamtaikia aints ainautin nekamtikramachmiaji. Antsu yamaikia Yus nu chichamnaka Cristonu ainautinka nekamtikramji. Nu chichamka nuwaitai: Mash nungkanam Cristonu ainautin ni Wakanin engketramau asamtai, Cristo atumi nintin pujau asamtai, nijai tsaniasrum tuke iwiaaku pujustinuitrume.^g

b 1.14 (Efes. 1.7) **c** 1.15 (Juan 1.1-3; Hebr. 1.2; 1.Juan 1.1; Apoc. 19.13)

d 1.18 (Efes. 1.22-23; Apoc. 1.5) **e** 1.20 (Efes. 2.16) **f** 1.25 (Efes. 3.2)

g 1.26 (Efes. 3.4-6)

²⁸Tura asakrumin iisha Cristo pachisar chicham etserji. Tura Criston miatrusrarang umirinak nekasar tunaarinchau Cristonu arti tusar, Cristo nekatirijai tuke nu chichamka nuikiartaji. ²⁹Tura asamtai Cristo ni kakarmarin wina surusu asamtai, ni kakarmarijai Yuse chichamen tuke etserkun pujuyajai.

2 ¹Yatsur ainautirmin, nunasha nekamtikiatasan wakerajrume. Wikia atumin yaingtasan, tura Laodicea yaktanam pujuinauncha yaingkiartasan, tura wina waitkacharu ainauncha Yuse chichamen ujakartasan nukap wakerajai. ^h²Tura aints ainau mash Criston pengker umirkarat tusan, tura aneinsar metek nintimtunisar pujusarat tusan wakerajai. Nu chichamnaka yaanchuikia aints ainauka nekaacharmiayi. Tura wainiat Yus: Nu chicham aints ainau nekamtikiata turutin asamtai, paan nekamtikiatasan wakerajai. Nu chichamka Cristo chichametai. ³Cristo mash nekau asa, mash aa nunaka iin nintimtikramratnuitji, tura mash nekamtikramratnuitji. ⁴Aints waitrinak atumin anangkramawarai tusan nunaka tajarme. ⁵Wikia atumjai pujachiatnak, tuke atumin nintimtakun nukap pachiajrume. Tura atumka tuke inaitsuk Cristo nekasampita tusaram miatrusrumek umirkau asakrumin, wikia nuna nekau asan waraajai.

Cristo pujut yamarman suramji

⁶Tura asamtai Jesucristo wina Apuruitai tinu asaram, Cristojai tuke tsaniasrum pujustaram. ⁷Tura Cristonu asaram, Cristo tu awapi tusaram nuimiaru asaram, tuke Cristok nintimsaram pujustaram. Tura Cristo miatrusrumek umirkau asaram, tuke inaitsuk Yus maaketai titaram.

⁸Yatsur ainautiram aneartaram. Aints ainau waitrinak anangkartutai chichaman etserinak nangkamiar chichainau asar, ii yaanchuik juuntri tinu armia nu antuktaram tusar, junia aints ainau nekatirin nuitaminak pujuinamtaisha, Cristo nu chichamka antuktaram tichau asamtai, anangkruwai tusaram, tura Cristo umirtan inaisai tusaram aneartaram.

⁹Yus wainchau arin, Cristo Yus ayat aints wajas: Yuska tu awai tusa iin nekamtikramamiaji. ¹⁰Tura Cristo Yuse awemamuri ainaun tura mash apu ainauncha tura mash ainia nunasha inau asa, ni aintsri ainautin tuke uwemtikramrau asamtai, atumsha nijai tuke tsaningku asaram, Yuse Wakani piatkamu ainarme. ¹¹Tura Cristonu asaram, atumi nuwapchiri aints charukchamu wainiat Cristo: Atumi wakeramuri tuke inaisataram tusa, atumi tunaarinka nakakar ashiniar japinawa nunisang mash atumi nintiniancha jiiki, Cristoka atumniaka pengker awajtamsamiarume. ¹²Tura atumsha Cristo nemarkatasrum entsanam maakrumka, Cristo jakamtai iwiarsarmia nunisrumek entsanam mengkarme. Nuniasha Yus nekas ni kakarmarijai ni Uchirin jakamunmaya inankimia nunisrumek atumsha Criston nekasampita tusaram entsanmayangka ataksha tsapuarume. ⁱ

¹³Tura yaanchuik atumi tunaarijai jakawa nunisrumek pujarmin wainiat, Cristo atumi tunaarin mash japitramrau asamtai Yus: Cristojai tuke iwiaaku pujustaram tusa, pujut yamarman suramsamiarume. ^j ¹⁴Tura Cristo ii tunaarin pengké akiimiakchamniau au wainiat mash sakturmarmiaji. Tura asanum winangmanum jirujai ajinkarti tusa tsangkatramkiaji. Tura waitnas jarutramak aintsti tunaarinka ningki

akiimiatramkamiaji. ¹⁵Tura Cristo numi winangmanum jarutramak, iwianch ainaun tura ni nemase ainaun mash nepetkau asa, mash ainia nuna paan nekaawarat tusa jakamunmaya nantaki, ni nemase ainaun inatsaarmiayi.

Nayaimpinam aa nuke nintimtin ataram

¹⁶Tura asamtai yamaikia aints kichkisha: Tunau wajasai tusaram, nu yutaka yuwairap, tura nu umutisha umurairap turamiarchatnuitai. Tura tunau wajasai tusaram, nu fiestasha inangkartaram, tura yamaram nantusha fiesta najanatararam, tura nu kinta ayamratararam turamiarchatnuitai.^k ¹⁷Cristo taatsaing Yus Moisésan chichaman akatar akupak: Nu chichamka mash umirtuktaram timiayi. Antsu nunia Cristo iin uwemtikramratas tarutmi jarutramkau asamtai, nu chichamka yamaikia pachischatnuitji. ¹⁸Tura asamtai aints ainau nangkamiar chichainak: Iikia mianchau asar, Yuska tupnik aujtsuk, antsu Yuse awemamuring seatnuitji tinauka anturkairap. Nuka nangkamiar: Wikia karanam Yuse awemamurin wainkau asan, chikich aints ainaun nangkamakuitjai tinayat, Criston umirchau ainau nintimina nunisarang nintiminawai. ¹⁹Nu aints ainauka Cristojai tsaniasarka pujuinatsui. Antsu Cristo mash aa nuna apuri asa, ni aintsri ainautinka pengker waitmaji. Tura asa metek nintimsaram Yus wakera nunisrumek pujustaram tusa, ni aintsri ainautinka kichkia nunisang jiirmaji. Tura: Miatrusrumek umirtuktaram tusa, ni kakarmarijai ni aintsri ainautinka yainmaji.

²⁰Atumsha Cristo jakamia nunisrumek yamaikia pujakrumka, junia aints ainau

nintimina nuka umirkashtinuitrume. Tura asaram uwemrataj tayatrumsha çwaruka ju nungkanmaya ainau chichame tuke umirkurmasha pujarme?^l ²¹Nu aints ainau chichainak: Uwemratasrum wakerakrumka, nu yutasha yuwachminuitrume, tura nu umutisha umurchamnawaitrume, tura nusha takaschamnawaitrume tinawai. ²²Nu aints ainauka ningki nintimsar nu chichaman akupinau asar, aints ainaun: Nu umirkataram tusar nuininawai. Antsu waring achat ii yuwajina, tura umajina tura takajina nuka mash amukatnuitai. ²³Aints nu chichaman umirina pujuinauka ningki nintimsar: Nekasan Yusen umirnitjai tinawai. Tura wina namangkruka mianchawaitai tusar, ni namangkenak nukap waitkina-wai. Tuminau asaramtai chikich aints ainau nuna wainkar nangkamiar: Nu aints ainauka nekau ainawai, tu nintiminawai. Antsu tu nintiminauka ni namangeke wakeramurinka nepetkachtinuitai.

3 ¹Tura asamtai Cristojai jakamunmaya nantaknua nunisrumek pujau asaram, nayaimpinam iruna nu wakerin ataram. Nuni Cristo Yuse untsurinini pujawai. ²Tura asamtai ju nungkanmaya aints wakerina nuka nintimsuk nayaimpinam aa nuke nintimtin ataram. ³Atumka Cristojai tsaniasrum jakawa nunisrumek au asaram, tura Cristojai tsaniasrum iwiaaku pujau asaram, tuke Yusnau ainarme.^m ⁴Tura Cristo tuke pujusti-nun iin suramsatin aa nu nayaimpinmaya wantinkamtai, atumsha nijai tsaniasrum wantinkatnuitrume. Tura Cristoa nunisrumek atinuitrume.ⁿ

**Tunau inaisaram Cristo wakera
nunisrumek ataram**

⁵Tura asamtai ju nungkanmaya ainau turina nuka aints jaka inaiyawa nunisrumek tuke mash inaisataram. Tura nuwa nuwatkashatratrum tsanirmatka tuke inaisataram. Tura tunau wakeruktincha mash inaisataram. Tura chikichnau aa nu wakerutisha inaisataram. Chikichnau aa nuna timia wakerin ainauka ni Yusria nunisarang nintimtinawai. ⁶Tu nintimsar Cristian umirtsuk pujuinaunka Yuska nekas wait wajaktiniun susartinuitai.^o

⁷Yaanchuikia atumsha nu tunausha tuke turin ayarme. ⁸Antsu yamaikia nu tunauka mash inaisataram: Kajektincha, tura chikich ainau pasé chicharkatnusha, tura tsanumnairatnusha, tura tunau chichatcha mash inaisataram.

⁹Yaanchuik tunau nintimtaurum inaisamiarme. Tura yaanchuik tunau turutirmesha mash inaisau asaram, wait chichamka ujaanitsuk asataram. Atumka tunau nintimtaurumka wejmak mamurun japina nunisrumek inaisawaitrume.

¹⁰Tura yamaram nintimtai wejmakan yamarman entsainawa nunisrumek jukimiarme. Tura Yuska mash aa nuna najanau asa: Wijai metek nintimin ataram tusa, atumniaka kintajai metek nintimtikramrume.^p ¹¹Cristo ni umirin ainautinka timiá nintimtikramrau asamtai, yamaikia judiochu ainausha, tura judio ainausha, tura ii nuwapchiri charukmau ainausha, tura nuwapchiri charukchamu ainausha, tura chikich nungkanmaya ainausha, tura papi nekachu ainausha, tura aintsu inatiri ainausha, tura aintsu inatirinchu ainausha mash warí aintski tichatnuitji. Antsu Cristo mash najanamu asa, tura mash aints ainautin inatmin asa, ni

aintsri ainauti nintin engkemturmau asamtai, Cristok nintimtinuitji.

¹²Tura asakrin Yus atumin anenmau asa: Winar ataram tusa, atumniaka eatmakmiarume. Tura asamtai yamaikia iwiarmamrawa nunisrumek pujau asaram, chikich ainausha wait anentraram, tura pengker awajsataram. Tura mianchawaitjai tusaram, yaitasrum aujnaisataram, tura kajernaitsuk pujustaram. ¹³Tura jaimiasrum tsangkurnain ataram. Tura chikich aints ainausha atumin pasé awajtaminak pujuinawainiatrumek, Cristo atumin tsangkutramrau asamtai, atumsha nunisrumek tsangkurnain ataram.^q ¹⁴Tura nu mash umiau asaram, nuna nangkamasrumek nukap aneenitaram. Tura aneenisrum pujakrumka, kichik namangkea nunisrumek asaram, Cristoka miatrusrumek umirume. ¹⁵Atumka untsuri ayatrumek, kichik namangkea nunisrumek pujau asaram, Yus wina aintsur ataram tusa, atumin untsurmaku asamtai, angka pengker nintimtunisrum pujustaram. Tura Yus tuke maaketai titaram.

¹⁶Cristo chichame atumi nintijai tuke nintimin ataram. Tura nu chicham nekau asaram, Cristo mai nemarnutirmek Cristo chichame nekapruiataram. Tura Cristo mai nemarnutirmek Cristo chichame nintimtiknairataram. Tura Yuse chichame kantamataram. Tura Yus kanta kantamarau, Yuse Wakani atumin nintimtikramrau asamtai, yamaram kantasha kantamarau, Yuska maaketai titaram. ¹⁷Tura chichaakrumsha, ii Apuri Jesús nintimkamaikiakrum chichastaram. Tura takakmakrum pujakrumsha nunisrumek Jesús nintimkamaikiakrum takakmastaram. Waring achat mash turarme nusha tuke nunisrumek Jesús nintimkamaikiakrum turataram. Tura ii

Apuri Jesúsá naari pachisrum iinu
Apaachiri Yuska tuke maaketai titaram.^r

Ii wearijai pengker pujusmi timiauri

¹⁸Aishrintin ainautiram atumi aishring-
kia umirin ataram. Ii Apuri nuna
wakerau asamtai turataram.^s ¹⁹Tura
nuwentin ainautirmesha atumi nuwari
tuke aneen ataram. Tura katuram
nintimtutsuk asataram.^t

²⁰Uchi ainautiram, atumi aparisha, tura
atumi nukurisha tuke umirin ataram. Ii
Apuri Cristo: Nu turataram tusa wakera-
wai.^u

²¹Uchirtin ainautiram, atumi uchiri
wake mesekar pujusarai tusaram,
nangkamrum chicharkuram kajkairap.

²²Aintsu inatiri ainautiram, tuke
atumin inatmin umirin ataram. Atumin
inatmin jiirmaj wajamtaí, wína pengker
awajtusat tuuka nintimtsuk takakmasta-
ram. Antsu pengker nintintin asaram,
atumi inatmin waitmachu wainiatrumek,
ii Apuri Cristo tuke iincha waitmají
tusaram shamakrum nakimtsuk
takakmastaram. ²³⁻²⁴Ii Apuri Cristo ni
tímia nunaka miatrusang umiktinuitai
tusaram nu nekau asaram, nekasrum nijai
tuke pujustinuitrume. Tura asaram
waring achat mash turarme nu
turakrumka, atumi inatmin umiriatru-
mek, ii Apuri Cristo inatiri asaram, ii
Apuri pengker awajsatasrum, pengker
nintimsaram nakimtsuk kakaram
takakmastaram. ²⁵Yus aints ainautin
mash metek jiirmau asamtaí, aints pasé
aa nuna takauka ni pasé turamurijai
metek wait wajaktintrin jukitnuitai.^v

4 ¹Tura aints inau ainautirmincha
nunasha tajarme: Atumsha Cristo
umirin asaram, wína inatnusha nayaimpi-

nam pujawai tusaram, paan nekau
asaram, atumi inatiri pengker awajsaram
ni yuumamurisha susataram.^w

²Nunia mash Cristonu ainautirmincha
nunasha tajarme: Tuke inaitsuk Yus
seataram. Tura tuke kajinmatsuk Yus
seakrum maaketai titaram. ³Tura Yus
seakrumka, iincha pachikratsaram Yus
seataram. Yaanchuikia aints ainau Cristo
chichamen nekaachminu wainiat, Yus
iinca nu chichamnaka nekamtikrama-
miaji. Tura asamtaí nu chichamka
ataksha aints ainau antumtikiatasar
wakeraji. Antsu Cristo chichame etserin
asan, wikia kársernum engeeamu pujajai.

⁴Tura Cristo wakera nunisnak nu
chichamnaka aints ainaun paan
nekamtikiatasan wakerajai. Tura asamtaí
nu pachisrum Yus seatritaram.^x ⁵Atumka
Cristo nekamtairi jukin asaram, Cristo
umirchau ainau Criston pengker
nintimrtari tusaram, nangkamrumka
kinta japawairap.^y ⁶Atumka chikich
ainaujai chichaakrumsha tuke antuuja-
min chichastaram. Tura aints ainau
atumin ininminamtaisha, warinak titaj tu
nintimsaram nekasrum pengker
aimkatnuitrume.^z

Inangnamu chicham akupkamuri

⁷Yatsur ainautiram, yamai ju papin
aaran umisan, ii aneetiri yachiin Tíquicon
atumin akuptuktatjarme. Nuka wiya
nunisang ii Apuri inatirintai. Tura asa iin
nukap yainmin ayayi. Nuka wi turamur-
nasha pachis atumin ujamtatrume.
⁸Turamtaí iin pachisrum mash nekaata-
ram tusan, tura atumin pengker
nintimtikramarat tusan akuptuktat-
jarme.^a ⁹Nunia Tíquicojai ii aneetiri
yachí Onésimon akuptuktatjarme. Nuka

r 3.17 (Efes. 5.19-20) s 3.18 (Efes. 5.22; 1.Ped. 3.1) t 3.19 (Efes. 5.25; 1.Ped. 3.7)
u 3.20 (Efes. 6.1) v 3.25 (Efes. 6.5-9) w 4.1 (Efes. 6.9) x 4.4 (Efes. 6.18-20)
y 4.5 (Efes. 5.16) z 4.6 (Fil. 4.6; 1.Tes. 5.17-18) a 4.8 (Efes. 6.21-22)

atumniayaintai. Nu jimiar aintska: li itiuur pujaji nuna pachis mash ujatmakta-trume.^b

¹⁰Aristarco, wijai kársernum engkeamu puja nuka chichaman akupturmarme. Nuniasha Bernabé kaná yachi, Marcoscha chichaman akupturmarme. Yaanchuik niin pachisan atumniasha chichaman ujakmiajrume. Ni atumin jeamtai pengker awajsataram.^c ¹¹Nunia Justo, chikich naari Jesús, atumin chichaman akupturmarme. Ju kempatam aints irunuka Yusen nemarkin asar, wijai tsaniasar Yuse chichamen etserkarmia nuka judío aints ainawai. Chikich judío wijai pujauka atsawai. Antsu juka winaka pengker nintimtikrurarmayi.

¹²Nuniasha atumnia aints Epafrascha chichaman akupturmarme. Nuka Cristo Jesús a inatirintai. Tura tuke inaitsuk atumin pachitmas: Miatrusarang Yusen umirkarat tusa, tura Yus wakera nuna mash nekaawarat tusa Yusen seatrarmume.^d ¹³Juka atumin nukap nintimturmarume. Tura Laodicea yaktanam pujuinauncha, tura Hierápolis yaktanam pujuinauncha pachis nukap nintimui. Tura asamtai nuna nekau asan,

nunasha atumin nekamtkiatasan wakerajrume. ¹⁴Ii aneetiri tsuwakratin Lucascha chichaman akupturmarme. Nunia Demascha nunisang chichaman akupturmarme.^e

¹⁵Nunia Cristonu ainaun Laodicea yaktanam pujuinauncha chichaman akuptinajai. Nunia Ninfan chichaman akuptakun, ni jeen Yuse chichamen antin ainauncha chichaman akuptinajai.

¹⁶Atumka ju papikia mash aints antinamunam aujsataram. Tura aujsaram umisrum, Cristo umirin Laodicea yaktanam pujuinaun antumtkiatasrum akupkataram. Tura Laodicea yaktanam pujuinaun papin akuptinaja nu jukiram atumsha aujsataram.^f

¹⁷Nunia Arquipon ju chichaman akuptakun: “Ami takatrumin ii Apuri suramsau asamtai, nu pengker umikta” tawai titaram.^g

¹⁸Wiiitjai Pabloitjai. Ju chichamnaka wina uwejruijai aatjarme. Ju aarmauka wainkaram, nekas ni aarmaurintai tusaram nekaatnuitrume. Wikia kársernum pujau asamtai, kajinmatrutsuk Yus seatritaram. Yus atumniasha tuke pengker awajtamarti. Maaketai.

Tesalónicanam Pujuinaun Pablo Papin Eemak Akuptukmauri

Chicham akupkamuri

1 ¹Wiitjai Pabloitjai. Silvanojai tura Timoteojai Tesalónica yaktanam Cristonu pujuinautirmin aatjarne. Ii Apaachiri Yusnau asaram, tura ii Apuri Jesucristonu asakrumin, Yus wait anentramak atumin yainmakarti, tura angkan pengker nintimsar pujustinasha suramsarti.^a

Tesalónicanam Criston umirinawai timiauri

²⁻³Atumka Ii Apuri Jesucristo nekasampita tusaram, pengker aa nuka takakmakrum pujarme. Tura Cristo aneau asaram, chikich ainausha tuke inaitsuk yayakrumsha yaweatsrume. Tura asaram Cristo tati tusaram kajinmatsuk naka pujarme. Tura asakrumin iikia nu nintimsar maaketai tusar, atum pachisar Yus tuke seakur pujaji. ⁴Yatsur ainautirmin umaarutirmincha, Yus atumin anenmau asa, nekas wina uchir ataram tusa, atumniasha eatmakmiarume. Nusha iisha nekaji. ⁵Iikia Cristonam uwemratin chicham etserin asar, nangkamriika nu chichamka etserkachmiaji. Antsu Yuse Wakani ni kakarmarin iin suramsau asamtai, chicham nekas aa nu etserkurin, Yuse Wakani nu chichamnaka atumniasha nekamtikramamiarume. Iisha atumjai itiur pujuyaji nusha nekarme.

⁶Tura asaram atumsha iiya nunisrumek Yuse uchiri wajasrum, iincha nemarkartinuyarme, tura ii Apurisha nemarnuyarme. Ii chichame pengker nintimsaram antuku asaram, atum nukap wait wajayatrume, Yuse Wakani atumi nintin piatramkau asamtai, nukap warasmiarume.^b ⁷Atum timiá pengker pujau asaram, Cristonu ainau Macedonia nungkanam pujuinau, tura Acaya nungkanam pujuinausha: Iisha Cristonu ainautisha tu pujaji tusaram, tura atumsha iiya nunisrumek tu pujustaram tusaram nuiniarmiarume. ⁸Tura Macedonianam tura Acayanmasha chicham ii Apuri Cristo pachisrum etsernuyarme. Tura asakrumin mash nungkanam atumin pachitmasar: Criston nekasampita tinawai tinu asar, Cristo chichamencha antukarmiayi. Tura chikich nungkanmaya ainausha yaanchuik Yuse chichamenekawaru asaramtai, nu chichamka iikia etsertsuk pujusminuitji.

⁹Tura chikich nungkanmaya ainausha atumin pachitmasar etserinak: Iisha nu aintsnum irastasar wemiaji nuni iincha pengker awajtamsarmiaji. Nunia ni yusri aints najanamu ainaunka inaisar, Yus nekas iwiaaku aa nuna umirinak pujuinawai tusar etserinawai. ¹⁰Nunia atumin pachitmasar etserinak: Yuse Uchiri Jesús

a 1.1 (Hech. 17.1-2) b 1.6 (Hech. 17.5-9)

nayaimpinmaya taratata nuna nakainak pujuinawai turaminawai. Yus ni Uchirin jaka tepau wainiat inankimiayi. Tura tunau ainaun wait wajaktiniun susartas tara iinka uwentikramratnuitji.

**Tesalónicanam Pablo Yuse
chichame etserkamuri**

2¹Yatsur ainautirmin umaarutirmincha, iisha atumin nangkamriki iraschamijaji. Atumka nuka nekarme.

²Iikia atumningkia iratsuk Filiposnuma wemijaji. Nuni Yuse chichame etseru asar, ii nukap wait wajamijaji. Tura nangkamiar iinka awatarmarmijaji. Atumsha nusha nekarme. Tura atumin jearsha, chikich ainau iincha pasé awajtaminau wainiatrik, Yus iinka yainmau asamtai, pengké shamkartutsuk atumin Cristonam uwemratin chichaman ukamijajume.^c

³Iikia wait chichamka etsertsuk, tura pasé aa nusha nintimsuk, tura atumka anangtsuk chicharkamijajume. ⁴Antsu Yuska ii nintimaunasha mash nekau asa: Cristonam uwemratin chicham etserkataram tusa, iin akuptamkau asamtai, Yus wakera nunisrik iikia etserji. Aints ainau ningki nintimsar, chichaman antukartas wakerina nuka etsertsuji. Antsu Yus pengker awajatsasar, ni chichamengka etserji.^d

⁵Aints ainau iin pengker awajatsarti tusarkia: Atumka pengke aintsuitrume pengké tichamijajume. Atumka nusha nekarme. Nuniasha atumi kuikiari wakerakriki nangkamriki: Atumniaka nukap aneajume tichamijajume. Yuska nunasha nekawai. ⁶⁻⁷Nunia atumsha tura chikich aints ainausha iin: “Apuru,” turamiarai tusar nakitnuyaji. Cristo akupkamutiatrik, apua nunisrik aints ainausha inatka pengké nakitnuyaji. Antsu iisha atumin jear, atum aneau asar,

nuwa ni uchirin aneak minakas muntsurin muntsua nunisrik iisha atumjai pujuyaji. ⁸Tura atum timiá aneau asar, iisha Cristonam uwemratin chicham atumin pengker nintimsar ujaktasar wakerimijaji. Tura nuna nangkamasrik atum timiá aneau asar, atum yaingtasar jakatasar wakerimijaji. ⁹Yatsur ainautirmin umaarutirmincha, atumin Yusnum uwemratin chicham etserkur pujakur, ii yuumamuri sumaktasar atumi kuikiari juta nakitau asar, tsawaiha tura kashisha tuke takakmau asar pimpiyaji. ¿Nuka aneakrumek?^e

¹⁰Antsu Cristonu ainautirmijai iruntrar pujakur, Yus umirkur nekasar pengker aa nuke turinuyaji. Tura chikich ainau iin pachitmasar pasé chichasarai tusar tunaarinchau pujuyaji. Atumsha nusha wainmakmiarume. Yus mash wainkau asa nunasha nekawai. ¹¹⁻¹²Iisha uchirtin ainau ni uchirin chicharua nunisrik: Yus umirkataram tusar, tura shamtsuk kakaram wajastaram tusar, kichik kichik chicharkamijajume. Atumsha nusha nekarme. Yus atumin: Wína pujutirun nayaimpinam paaniunam wijai pujusmintrum tusa untsurmakmiarume. Tura Yuse uchiri asaram, tuke Yus umirkuram pujustaram tajarme.

¹³Yuse chichame ii etsermijaji nuka antuku asaram atum: Aintsu chichamentai tutsuk, antsu Yuse chichamentai timiarme nuka nekasantai. Nu chichamka atum antuku asaram, Cristo nekasampita tusaram, Yus atumin nintimtikrammiarume. Tura asamtai tuke inaitsuk Yuska maaketai taji. ¹⁴Yatsur ainautiram umaarutirmesha, atumkeka waitka wajatsrume. Antsu Cristo Jesúsnuu ainaun Judea nungkanam pujuinaunka ni weari ainau wait wajaktiniun susarmiyaji. Tura asar atumniasha nunisarang atumi yaktari

pujuinau waitkarminawai. Tura wainiatrumek atumsha Judea nungkan-maya Cristonu ainia nunisrumek pengker nintimsaram pujarme. ¹⁵Nu judío ainu ni wearintiat Yuse chichamen etserin ainaun yaanchuik maawarmiayi. Nunia ii Apuri Jesúsna sha maawarmiayi. Nunia iincha ni yaktarinangka jirmakiarmiayi. Nuka Yusen pengkerka awajtsuk pujuinawai, tura asar aints ainaun mash kajerin ainawai.^f ¹⁶Iikia judíocho ainamunmasha Cristo chichame etserkatasar wakerarin waininayat, judío ainu iinka surimram-karmiayi. Tura ninu nintin tuke tunau piatkamu asaramtai, Yus: Nuke ati tusa, nu judío ainaunka kajerak, ni wait wajaktintrincha nukap susartinuitai.

**Pablo ataksha Tesalónicianam
wetas wakerukmauri**

¹⁷Yatsur ainautirmijai, tura umaarutirmi-jaisha jumchik kinta wainaitsuk kanakar pujakrishna, tuke kajinmatsuk atum nintimsar pujumijai. Tura asar atumin irastasar nukap wakerimijai. ¹⁸Wikisha atumin jiistasan wakerayatun tujinkan, ataksha atumin jiistasan wakerimijai. Tura iikia ataksha atumin jiistasar wakerayatrik, ii winitasar wakerarin wainiat, iinka Satanás tuke surimramkamijai. ¹⁹Ii Apuri Jesucristo taamtai, çyaachia ni wajamurin naka wajastatua? Nuka atumetrume. Iikia ii Apuri chichame atumin etserkau asakrin, atumsha ii Apuri umirkau asaram, ni wainkatnuitrume tusar, nu kinta iikia nakakur pujaji. Nu kinta jeamtai, atum pachisar maaketai tusar warastinuitji. ²⁰Atum Cristo miatrusrumek umiru asakrumin, iisha atum pengker nintimsar maaketai tusar waraaji. **3** ¹Tura asakrin wikia atumin nintimsan: çPengkerash pujuina? tusan, atumin winitatkaman tujinkan,

tura chichaman nekaatatkaman yumatkau asan, wiki Atenas yaktanam juwakmiajai.^g

²Tura ii yachí Timoteon atumin akuptukmiajrume. Nusha iijai iruntrar Cristonam uwemratin chichaman etsernuitai. Tura asamtai atum tuke inaitsuk Cristo nekasampita titaram tusan, tura Cristo umirkuram kakaram wajastaram tusan, Timoteon atumin akuptukmiajrume. ³Atumka Cristonu asaram: Waitnasan pujaknasha, Cristo umirtanka inaisashtatjai tiarat tusan, atumin Timoteonka akuptukmiajrume. Iisha Cristonu asar, tuke wait wajaktinuitji tusaram nekarme.

⁴Yaanchuik atumjai iruntrar pujusar, iikia atum chicharkur: Iikia nekasar Cristo umirkurkia, wait wajaktinuitji timiajrume. Ii timiaji nunisrumek yamaikia Cristonu asaram, atumsha wait wajarme nuka nekarme. ⁵Tura asakrumin atumin nintimsan: çPengkerash pujuina? tusan, nekaatatkaman yuumatkan: çTuke Criston umirinatsuash? tusan, tura: çCristo umirtaka inaisataram tusa iwianch atumin anangkramachmasha? tura Cristo umirmau inaisau asakrumin, çiisha waitnasar Yuse takatri nangkamriash takakmasiaij? tu nintimsan Timoteon atumin akuptukmiajrume.

⁶Yamaikia Timoteoka atumniangka tamayi. Tura taa, atum tuke Cristo nekasampita tusaram aneenisrum pengker pujamurminka ujatmaji. Tura atumsha iin pengker nintimkartusrum pujarme tusa, tura iincha waitmakartas wakerutminaji tusa ujatmaji. Tura asamtai iisha numisrik atumsha jiistasar wakeraji. ⁷Tura iisha nukap wait wajayatrik, tura ititurkachmin nukap pujayatrik, atum tuke Cristo nekasampita tinu asakrumin, nu chichamka antuku asar

pengker nintimsar pujaji. ⁸Atumka ii Apuri tuke umirkuram kakaram wajasu asakrumin, iisha nekasar pengker nintimsar pujaji. ⁹Tura iin nukap waramtikartusu asakrumin, iisha warasar atum pachisar Yus maaketai tayatrik, nuna nangkamasrik tuke maaketai titasar wakeraji. ¹⁰Tsawaisha tura kashisha tuke Yus seakur, ataksha atum jiiistasar wakeraji. Yus nuna tsangkatramkat tusar seaji. Tura atumin jear: Yus miatrusumek umirkataram tusar atum nuiniartasar wakeraji.

¹¹Ii Apaachiri Yus, tura ii Apuri Jesús atumin iin akuptamkat tusar, tura ii wetinun eemak iwiartar tusar Yuska seaji. ¹²Tura Yus seakur: Nekasrum atumka nukap aneenitaram tusar, tura ii Apuri atumin nukap nintimtikrarat tusar, tura iisha chikich ainausha mash aneaji nunisrumek atumsha chikich ainausha aneetaram tusar Yuska seaji. ¹³Tura ii Apaachiri Yus miatrusumek umiru asakrumin, ii Apuri Jesús ni aintsri ainaujai taamtai, atumsha pengké tunaarinchau naka wajatsamniuram tusar Yuska seaji.

Yuska pengker aa nu turataram tusa wakerutmaji

4 ¹Yatsur ainautirmin umaarutirmincha, kichnasha tajarme. Iisha: Yuska tu pengker awajsatnuitrume tusar, atumin ujakmiajrume nusha umirkuram pujarme. Tura yamaisha ii Apuri Jesús: Tu chicharkataram tusa, iin akuptamkau asamtai, ii timiaji nuna nangkamasrumek Yus umirkuram pujustaram tusar atum chicharkur pujaji.

²Ii Apuri Jesús: Nu chicham umiktaram tusa, iin akupturmaku asamtai, iisha atumin etserkamiaji nuka nekarme. ³Yuse wakeramuri nuwaitai: Nekasrum pengké tunaarinchau pujustaram. Tura asaram nuwa nuwatsukka tsanirmawairap. Tura

aints ninumtsukka turunawairap. ⁴Kichik kichik aints ni nuwarinak nuwatak, nujaingkia tunaarinchau pujusartinuitai. ⁵Yusen umirchau ainauka pachitsuk nuwan takasartas wakerinawai. Antsu atumka nu aintsua nunisrumka pujusairap.

⁶Yaanchuiksha atum akatkur timiajrume nunaka ataksha nunisnak wisha tajarme. Chikich aints ainausha anangkawairap. Tura chikich aintsu nuwaringkia tsanirmatsuk asataram tajarme. Antsu nuna turinaunka ii Apuri wait wajaktiniun nukap susatnuitai. ⁷Yuska: Tunau turataram pengké turamtsuji. Antsu nekasrum tunaarinchau wina umirtuktaram turamji. ⁸Tura aints ju chichaman nakitina nuka aintsnaka nakitinatsui, antsu Yusen nakitinawai. Yus: Nekasrum tunaarinchau pujustaram tusa, ni Wakanin nekas pengker aa nuna iin suramsawaitji.

⁹Tura Cristonu ainaujai pengker nintimtisurum pujustaram tusa, Yus iinka paan nuitamrau asamtai ¿warukanak atumin aneenitaram tusancha nunasha aartaj? ¹⁰Atumka nekasrum Cristonu ainau Macedonianam pujuinausha mash anearme. Tura Cristonu asaram, nuna nangkamasrumek Cristonu ainau aneetaram. ¹¹Tura ¿itiurak pengker nintimsancha pujusaintaj? tu nintimsaram pujustaram. Tura chikich ainauka waitkatsuk pujustaram. Tura atumi yuumamuri sumaktasrum atumi uwejejai takakmastaram. Yaanchuik atumin chicharkamiajrume nunisrumek turataram. ¹²Tu pujakrumka pengké yuumakchatnuitrume. Nunia Yusen umirchau ainausha atumin pachitmasar: Nuka pengke aintsuitai turamiartinuitai.

Ii Apuri tatintri pachis etserkamuri

¹³Yatsur ainautiram umaarutirmesha, ¿Cristonu jakaru ainau warukatnuki?

tusaram nekaataram. Cristo umirchau ainauka ni weari jakamtai: Pengké nantakchatnuitai tusar nukap juutin ainawai. Atumka Cristo umirchawa nunisrumka wake mesekrum pujusairam tusan yamaikia ujaajrume. ¹⁴Jesús nekas jakamiayi, tura ataksha nantakmiayi, tu nintimtakrinkia, Cristonu jakaru ainaunka Jesúsán inankimia nunisang Yus ataksha inankiartinuitai.

¹⁵Ii Apuri Cristo iin ujatmaku asamtai, iisha yamaikia atum ujaajrume: Ii Apuri taamtai, iwiaaku pujuinautikia iiyá eemkarkia nayaimpinmaka wakashtinuitji. Antsu Cristonu jakaru ainau nuwá eemkar nayaimpinam wakartinuitai. ¹⁶Ii Apuringkia nayaimpinmaya jiinkitnuitai. Turamtai Yuse awemamuri juuntri kakar untsumaun antukar, tura Yuse pupuntrin kakar pupuntramun antukar, Cristonu jakaru ainau nuwá eemkiar nantakiartinuitai. ¹⁷Nunia iisha tuke iwiaaku pujuinautisha Cristonu jakaru ainaujai iruntrar ii Apuri Cristojai nasenam yakí mukuntunam ingkiunikmi tusar wetinuitji. Nuniangka tuke ii Apurijai tsaniasar pujustinuitji.^h

¹⁸Tura asaram atumka Cristonu ainaujai iruntraram nu chichamka ujanikrum: Wake mesekrum pujusairap tusaram nintimtiknairataram.

5 ¹⁻²Yatsur ainautiram umaarutirmesha, ii Apuri kasa aintsua nunisang aneachmau tatinuitai. Atumka nuka paan nekarme. Tura asakrumin ¿Cristo tatintri warutik ati? tura ¿warí nantutik ati? tusan nunaka nekachu asan aatrashtatjarme.ⁱ

³Aints ainau chichainak: Maj, iisha angka pengker pujaji. Maaniamuka atsawai tinu wainiat, Yuska aneachmau nungkanka yumpungtinuitai. Nuwa

jamtin: ¿Uchin warutik jurertaj? tayat aneachmau uchin jurertas jatematnuitai. Nungka yumpunkatin kintasha nunisang aneachmau atinuitai. Nu kinta jeamtai-
kia, tunaarintin ainauka uwemrartatkamawar tujinkartinuitai.

⁴Antsu yatsur ainautiram, umaarutirmesha, atumka teenmaka pujatsrume. Tura atumsha anearum pujau asakrumin, Cristo kasa aintsua nunisang aneachmau winaksha, atumniaka awaktamkashtinuitrume. ⁵Atumka Yuse uchiri asaram paaniunam pujarme. Tura paaniunam pujau asaram teenmaka pujatsrume.

⁶⁻⁷Aintstikia kashikia kanutayi. Antsu nampektasar wakerinauka kashi nampenawai. Antsu iikia nu aintsua nunisrikia pujatsji. Tura kanurua nunisrikia, tura iwianch umirnuu nunisrik pujusai tusar, aints kanutsuk iwiaawa nunisrik anearu armi. ⁸Yus paaniunam puja nu iinka inatmau asamtai, iisha nunisrik paaniunam pujakrikia, nampetsuk paan nintimin atinuitji. Santar ainau: Netseprun nangkijai ijutiarai tusar, wejmak jiru najanamun entsasar, tura muukrun charutkarai tusar, tsengkruti jiru najanamun tsengkrugar maaniamunam weenawai. Tura asamtai Satanás iincha pasé awajtamsatas wakerutniamtaikia, iisha Cristo nekasampita tinu asar, tura Yus anen asar, santar jirun entsarua nunisrik, tura jirun tsengkrakinawa nunisrik: Nekasan uwemrattajapi tu nintimsar pujusarmi.^j ⁹Yuska: Atumka ji kajintrashtinnun engkematarum tusangka iinka kajertamkashtinuitji, antsu ii Apuri Jesucristo iincha uwemtikramratnuitji. ¹⁰Cristo: Wijai metek iwiaaku amintrum tusa jarutramkamijai. Tura asamtai iwiaaku pujakrikia, tura

nunia jakarsha, Cristonu ainautikia tuke nijai pujustinuitji. ¹¹Tura asamtai tuke turarme nunisrumek pengker nintimtusurum mai kiakani wajatarum tajarme.

Pablo Cristonu ainaun chicharkamuri

¹²Yatsur ainautirmin umaarutirmincha nunasha tajarme: Wait aneasrum anturtuktaram: Aints ainaun ii Apuri Cristo akupamu asar, tuke atumin yainmakartas waitnasar takakminamtaisha, tura atumin chichartaminamtaisha, tura nuitaminamtaisha, pengker awajsatarum tusan tajarme. ¹³Yus ni takatrin nu aints ainaun susau asamtai, nu aints aneetaram, tura nekasrum pengker anturkaram umirkatarum. Tura asaram tuke kajernaitsuk angkan pujatarum tusan tajarme.

¹⁴Yatsur ainautirmin, nunasha tajarme: Cristo nemarin takatan takakmichu ainau takakmastaram tusaram chicharkatarum. Tura napchau nintimsar pujuinausha pengker nintimtusurum chicharkaram kiakartaram. Tura kakaichu ainausha yaingtaram. Tura aints ainau mash jaimiasrum chicharkatarum.

¹⁵Aneartaram. Aints atumin pasé awajtaminamtaisha, kichkisha kajertsuk asatarum. Antsu: Wisha pengker awajsatjai, tu nintimsaram pujustaram. Tura Cristonu ainaun tura Cristo umirchau ainauncha mash pachitsuk pengker awajsatjai, tu nintimsaram pujustaram.

¹⁶Tuke inaitsuk warastaram.^k

¹⁷Yus seat kakantratarum.

¹⁸Atumka Cristo Jesúsnu asaram, pengker pujakrumka, tura itiurchat pujakrumsha, Yus tuke maaketai titaram. Yus nuna wakerau asamtai turatarum.^l

¹⁹Yuse Wakani atumin nintimtikrama nuka umirtsukka pujusairap.

²⁰Yuse chichamen etserin Yuse chichamen ujatminamtaisha, nangkami tawai tiirap. ²¹Antsu mash antarme nuka nintimsaram: ¿Nu chichamnaka nekas Yus akupkachiash? tusaram nekaatarum. Tura nekas pengker aa nuka tuke metatarum. ²²Tura pasé turina nuniangka kanaktaram tajarme.

²³Ii Apaachiri Yus angkan pujustinasha suramji nu atumin yainmakti. Tura mash tunaarinchau winar ataram tusa, atumi nintincha, tura atumi namangkencha Yuska waitmakti. Ii Apuri Jesucristo taatsaing, kichkisha atumin pachitmasar: Nuka tunaawaitai turamiarchati tusa, Yuska atumin waitmakarti tusan tajarme. ²⁴Yuska: Winar ataram tusa, atumin untsurmaku asa, ni timia nunisang mash umiktinuitai.

Inangnamu chicham akupkamuri

²⁵Yatsur ainautiram umaarutirmesha, Yus seatritaram.

²⁶Cristonu ainautiram aneenisrum: ¿Pengkerak pujaram? tunaitaram.

²⁷Ii Apuri Jesucristo wina akuptuku asamtai, ju papin atumin akupaja juka Cristonu ainau mash antukarti tusaram aujsatarum.

²⁸Ii Apuri Jesucristo atumniasha pengker awajtamarti tajarme. Maaketai.

Tesalónicanam Pujuinaun Pablo Ataksha Papin Akuptukmauri

Chicham akupkamuri

1 ¹⁻²Wiitjai Pabloitjai. Silvanojai tura Timoteojai Tesalónicanam Cristonu ainautirmin aatjarne. Ii Apaachiri Yusnau asaram, tura ii Apuri Jesucristonu asakrumin, ii Apaachiri Yuska, tura ii Apuri Jesucristo wait anentramak angka pengker pujustinasha suramsarti.^a

Cristo taamtai Yus tunaarintin ainaunka wait wajaktiniun susartinuitai

³Yatsur ainautiram umaarutirmesha, atumka miatrusrumek Cristo umirkau asaram, tura miatrusrumek aneeniau asakrumin, tuke atum pachisar nekasar Yuska maaketai timinuitji. ⁴Atumka wait wajayatrume pengker nintimsaram jaimiasrum pujarme. Tura itiuirkachmin pujayatrum, tuke inaitsuk Cristo pengker umirkuram pujarme. Tura asakrumin iisha chikich nungkanmaya Cristonu ainausha atum pachisar etserkur: Criston miatrusarang umirinawai taji. ⁵Atumka Yus miatrusrumek umiru asaram nekasrum wait wajarme. Tura asakrumin Yus atumin inatmin asa: Wina aintsur asaram, wijai tsaniasrum pujusmintrum turamrume. Yuska atumin pachitmas tu nintimias pujawai tusar iisha nekaji.

⁶Yuska nekas tunaarinchau asa, aints ainau atumin waitkarmina nunaka wait wajaktiniun susa ningki yapaijkiatnuitai.

⁷⁻⁸Atumka wait wajau asakrumin, ii Apuri Jesús atumniaka ayamtikramsatnuitrume, tura iincha atumjai metek ayamtikramsatnuitji. Nu kinta jeamtaikia, Jesús nayaimpinmaya wantinak, ni awemamuri nekas kakaram ainaujai ji keawa nunisang wantinkatnuitai. Tura asa Yus niin nintimtichu ainaunka, tura ii Apuri Jesúsnum uwemratin chichaman umirchau ainaunka wait wajaktiniun susa yapaijkiatnuitai. ⁹Turamtai Yusen umirchau asar, ii Apuri paaniunam puja nunaka waintsuk, tura ni pujamurincha waintsuk tuke nangkantsuk wait wajaktiniun jukiartin ainawai. ¹⁰Cristo taamtai, nu kintatikia ninu ainautikia mash Cristoa nunisrik wajasar, ii Apuri wainkar: Ameketme juuntam titinuitji. Atumsha ii etsermau nekasampita tinu asaram, Cristoka wainkaram pengker awajsatnuitrume.

¹¹Tura asakrumin Yus atum uwemram nekasrum pengker ataram tusa, atumin untsurmaku asamtai, iisha tuke ii Yusri seakur pujaji. Tura atumka Yus nekasampita tinu asakrumin, tuke pengker aa nuka Yuse kakarmarijai turataram tusar, atum pachisar tuke seakur pujaji. ¹²Ii Yusri tura ii Apuri Jesucristo atumin pengker awajtamsau asamtai, chikich ainau atumin pachitmasar: Nekasar Criston pengker umirinawai

a 1.1 (1.Tes. 1.1)

turamíarat tusar, iisha tuke Yus seakur pujaji. Tura ii Apuri Jesúsá naarin pachisrum: Ameketme pengkeram, tu nintimsaram pujusmintrum tusar, iisha Yus tuke seakur pujaji.

Juun Tunau wantinkatnuri

2¹Yatsur ainautiram umaarutirmesha, ii Apuri Jesucristo iijai ingkiuniktas tatintri pachisar atum aatratasar wakeraji.^b ²Aints atumin chichartaminak: Yuse Wakani wína ujatkau asamtai, Cristo tatintringkia yanchuk nangkamari, anangkraminak tinamtaisha, nu chichamka anturkairap. Tura chikich aints nu chichaman ujatminamtaisha, tura iisha atumin papi aarar akupakur: Cristo tatintringkia yanchuk nangkamari, tu aarmau wainkarmesha, ¿nekasash tina? tu nintimkuram pachim nintimrairap. Tura shamtsuk asataram tajarme. ³Aints kichkisha wína anangkruwarai tusaram aneartaram. Cristo tatinka jeatsaing, Yusnumia kanaamu atinuitai. Nunia nuna nangkamasang aints nekas juun tunau tuke mengkakatnunam wetinua nu wantinkatnuitai. ⁴Nuka Yusen nemasentai. Tura aya wínak nintimtursarat tusa, aints waring achat ii yusrintai tusar seinawa nunasha nakitau asa, aints mash antinamunam: Wikia Yusetjai tusa, Yus seatai juun jeanam keemsatnuitai. Tura asa aints mash: Juwaitai Yus turutiarat tusa turunatnuitai.^c

⁵Yaanchuik atumin iraakun nunasha ujakmiajrumé. ¿Nuka kajinmakniurmek? ⁶Tura ni wantinkatnuri kinta jeachú asamtai, nu Juun Tunau wantinkai tusa, yaachia surimiawa nuka atumsha nekarme. ⁷Yamaisha chikich aints ainu nekaachmin ainayat, aints untsuri Yusen umirtan nakitinawai. Tura Tunau

Surimin aa nuka yamaisha Juun Tunau wantinkashti tusa surimiawai. Antsu Tunau Surimin jiinkiamtaikia, nu Juun Tunau wantinkatnuitai. ⁸Nu Juun Tunau taamtaikia, ii Apuri Jesús paaniunmaya taangka, aya chichasang ni mayatmaurijai nepetak mengkaaktinuitai. ⁹Nu Juun Tunau wantinkatnua nuka Satanása kakarmarijai wantinkatin asa, aints ainaun anangkatas, wainchatai takatan tura aints turachminun turatnuitai.^d

¹⁰Tura asamtai aints mengkakartin ainia nu nekas chichamnaka nakitinawu asar uwemtanha nakitinawai. Tura Juun Tunau nu aints ainaun: Tunau tuke turataram tusa anangkattnuitai.^e ¹¹Tura asamtai nu aints ainu anangmamu chichaman antukartas wakerinau asaramtai, wait chichaman antukar umirkarat tusa Yuska tsangkamkatnuitai. ¹²Tura asamtai nekas chichaman nakitin ainauka: Tunau aa nuka nekas pengkeraitai tusar, tuke ni tunaarijai warainau asaramtai, Yuska nu aints ainuun ji kajintrashtinum akupkatnuitai.

Yus atumin uwemrataram tusa eatmakmiarume

¹³Yatsur ainautiram umaarutirmesha, ii Apuri atumin anenmau asamtai, iisha atum pachisar Yus tuke maaketai titinuitji. Atumka nekas chicham umirkau asakrumin, Yuse Wakaningkia atumi nintin pengker awajtamsamiarume. Tura asakrumin nu nangkamtaik Yus atumniaka uwemramnawaitrume turammiarume. ¹⁴Yus iinka: Cristonam uwemratin chicham etserkataram tusa akuptamkau asamtai: Atumka nu chicham antukrum, wína aintsur wjasmintrum tusa wakerau asa, ii Apuri Jesucristo: Wiya nunisrumek paaniunam pujusmintrum tusa atumniaka untsurmakmiarume.

¹⁵Tura asamtai yatsur ainautiram umaarutirmesha kakaram wajastaram. Tura wikia yaanchuik atumin irakun ujakmiajrume nu tura papin aaran akuptukmiajrume nusha kajinmakirap. ¹⁶Ii Apuri Jesucristo tura ii Apaachiri Yus nekas pengker asa iincha anenmaji, tura iincha pengker awajtamu asa, iincha pengker nintimtikramji. Tura asa tuke pengker pujustinaka suramji. ¹⁷Tura asamtai nekas pengker aa nu chichasmintrum, tura nekas pengker aa nu takakmasmintrum tusa, atumniaka nintimtikramrarti tajarme.

Iin pachikratsaram Yus seataram

3 ¹Yatsur ainautiram umaarutirmesha, kichnasha inangnamunam tajarme. Ii Apuri chichame nukap etserkau asakrin, chikich chikich nungkanam wári jearti tusaram Yuska seataram. Tura atumka Yuse chichame pengker antuku asakrumin, tura Yuska nekas juuntapita tinu asakrumin, chikich nungkanmaya ainausha Yuse chichamen antukar, atumjai metek Yus juuntapita tiarti tusaram Yuska seataram. ²Aints mashkia Yusnaka umirinatsui. Tura asaramtai nu aints ainamunam pujakrin, iin pasé awajtamsarai tusaram Yuska seatritaram. ³Tura ii Apuri: Wi nuna turatnuitjai, tímia nunisang umiktinuitai. Tura atumin kakamtikramratnuitrume, tura tunau takasairam tusa atumniaka waitmaktinuitrume. ⁴Atumsha Yusnau asaram, ii timiaji nu nekasrum umirkuram pujarme, tura tuke umirkatatrume tu nintimsar pujaji. ⁵Tura Yuska iincha timiá anenmaji tusa, ii Apuri atumin nintimtikramrarti. Tura Cristoa nunisrumek wait wajarmining, itiur jaimiasrum pujustinuitrume tusa, ii Apuri Cristo atumniaka nekamtikramawarti tusan Yusen seatjarme.

Cristonu ainau takatrin pachis chicharkamuri

⁶Yatsur ainautiram ii Apuri Jesucristo naari pachisar tajirme: Aints Cristonuitjai tayat, pengke takat aa nunaka takatsuk, tura ii chicham nuiniarmiaji nuna umitsuk pujuinamtaikia, nu aintsnumia kanaktaram. ⁷⁻⁸Iikia itiur atumjai pujuyaji nusha nekarme. Iikia atumjai pujakur takakmatskeka pujuchmiaji. Tura atumi yutairingkia akiimiatskeka yuwachmiaji, antsu itiurkachmin achati tusar, ii yuumamurin sumarmaktasar tsawaisha tura kashisha waitnasar takakminuyaji. Tura asakrin atumsha iiya nunisrumek turatnuitrume. ⁹Ii Apuri iin akuptamkau asamtai, ii wakerakrikia, yuumamur nangkamrum surustaram tusar, seammin ayatrik seamchayaji. Antsu iiya nunisrumek takakmasmintrum tusar iisha takakminuyaji. ¹⁰Iisha atumjai pujakur, nu chichamka ujakmiajrume: Aints takatan nakitauka yutancha yutsuk pujustinuitai. ¹¹Antsu atumjai iruntrar naki ainau takakmatsuk pujusar, nangkami chichaj pujuinawai tinamun antukmajai. ¹²Nu takakmichu ainau chicham akuptaji. Ii Apuri Jesucristo chichamejai tajirme: Naki ainau ni yuumamurin ningki sumarmakartas nakimtsuk, tura nangkamniaka chichatsuk takakmasarti.

¹³Yatsur ainautiram, pengker aa nuke yawetsuk turataram. ¹⁴Ju papi ii aarji nuna umirtan nakitinau wainkurmeka: Umichuitai tusaram, ni kanák pujus natsaarat tusaram ukuktaram. ¹⁵Tura nu aints wainkurmesha, atumi nemasea nunisrumka nintimtusairap, antsu atumi yachiiya nunisrumek tupnik chicharkatararam.

Yus yainmakarti timiauri

¹⁶Ii Apuri ningki angkan pengker pujustinun suramji nu atum tuni pujarme

nunisha tuke inaitsuk angkan pengker
pujustinnasha suramsarti. Tura atumin
mash yainmakarti.

¹⁷Wiitjai Pabloitjai. Ju chichamnaka
wína uwejrui yamaikia aatrajrume.

Tuke aintsanak aajai. Tura asantai ju
aarmau wainkaram, nekas ni aarmaurin-
tai tusaram nekaataram. ¹⁸Ii Apuri
Jesucristo atumniasha mash pengker
awajtamsarti. Maaketai.

Pablo Timoteon Papin Eemak Akuptukmauri

Chicham aatramuri

1 ¹Wiitjai Pabloitjai. Jesucristo akupka-muitjai. Yus iin Uwentikramratin ii Apuri Jesucristosha nákakur pujaji nu: Wína chichamur etserkata tusa akuptukmiayi. ²Timoteowa, ju papin aatjame. Ameka wi etsermauka nekasampita tinu asakmin, wikia aminka yajutmarchayatnak: Wína nekas uchirua tumawaitme tajame. Ii Apaachiri Yus tura ii Apuri Cristo Jesús amincha yainmakarti, tura amincha wait anentramarti, tura angkan pengker pujustinasha suramsarti tusan amin aatkun pujajai.^a

Wait chichamka antukaip timiauri

³Wi Macedonia nungkanam wekaakun: Ameka Efeso yaktanam juwakta timiajme. Tura nuni pujau asam, chikich aints irunuka chicham ii nuiniarchamu waininayat nuininak pujuinamtaikia, nuka nuiniarairap tusam surinkata tajame. ⁴Tura ii juuntri naari pachisar tuke aujmatinaka pujuinauka nu nuikiartamujajngkia aintsun kichkisha pengkerka awajinatsui, antsu jyanitan wakerumtikinawai. Turinau asar ii yaanchuik juuntri aujmatin armia nuna aujmatinaka pujuinauka nuka antukairap tusam surinkata. Nuna turinakka Yus pengker umirkatnunka yainmatsji.

⁵Yuse aintsri ainautikia tuke nintijai Criston nekasampita tusar, tura tunauka

nintimtsuk, aya pengker aa nuke wakera-kur nekasar anengkratin wajastasar wakeraji. Tura asar: Aneenitaram tusar nu chichamka etserji. ⁶Chikich ainau nekas chichaman jukiariat nunaka inaisar, chicham nekaschaun jukiari, tuke nangkamiar chichaj pujuinawai. ⁷Nu aints ainau Moisés umirkatin chichaman nuiniarartas wakerinamaitiat, chikich ainau: ¿Ame tame nuka warina takua tawa? tusar ininminamtai, nu aints ainau nangkamiar chichainau asar, tura nekachu asar paan: Nuna taku tawai tusar, etserkartatkamawar yuumatinawai.

⁸Moisésa aarmaurisha pengkeraitai tusar nekaji. Yus yaanchuik nu chichaman akupkau asamtai, ni wakera-murisha tura tunau surimiaktincha nekaatnuitji. ⁹Tura umiktin chichaman aints umirkarat tusar akupina nusha waruka akupinawa tusar nekaji. Apu ainauka pengke aints ainau umikiarat tusarka ni akupamurinka akupinatsui. Antsu tunau turin ainau nuna umikiarat tusar akupinawai. Tunau ainauncha tura chichaman umichu ainauncha tura Yusen nakitin ainauncha tura ju nungkanam pasé aa nuna turin ainauncha chichaman mash umirkarat tusar akupinawai. Tura aparincha, tura nukurincha main ainauncha, tura mangkartin ainauncha mash, ¹⁰tura tsanirmin ainauncha, tura mai aishmangtak tsanirmin ainauncha, tura aintsun mesatkan ju ainauncha, tura

a 1.2 (Hech. 16.1-3)

wait chichaman etserin ainauncha, tura waitrinak: Yusjai tajai tinu ainauncha, tura pengker nuikiartamun nakitin ainauncha apu ainau chichaman umirkarat tusar akupinawai. ¹¹Yus nekas pengker aa nuka: Nu pengker nuikiartamun nuiniakmeka Cristonam uwemratin chicham etserkata tusa akuptukmiayi.

**Pablo Yus wait anentramu
asa maaketai timiauri**

¹²Ii Apuri Jesucristo wina akuptak: Amin pengker nintimtajme tusa, tura wina inatir ata tusa, ni kakarmarina surusmiayi. Tura asamtai wikia Jesucriston maaketai tajai. ¹³Yaanchuikia Criston pachisan napchau chichauyajai. Nunia ni nemarkin ainaunka achikian katseknuyajai, tura maataj tusan, tura karsernum engkeataj tusan wekaatinuyajai. Tura wi nekachu asan, Jesús Yuse Uchirintai tichauyajai. Turai wainiat Yuska winaka wait anentrurmiayi. ¹⁴Tura ii Apuri winaka nekas pengker awajtusmiayi. Tura Cristo Jesúsjai tsaningkiar pujamu asa, ni nekas pengker nintimustinasha tura ni anengkratairinchina surusmiayi.^b

¹⁵Cristo Jesús tunau ainaun uwemtikratat tusa, nungkanam taramiayi. Ju chichamka nekasaintai. Aints mash nuna pachisar nekasaintai tiarminuitai. Wikia chikich ainaun nangkamasnak nekas an juun tunaun turinuyajai. ¹⁶Wikia timiá tunau ain, Yus winaka wait anentruru asa, tunaunuka mash sakturamiayi. Jesucristo jaimias pujau asa, ukunmasha aints ainau mash nuna nekaawar nekasampita tartin ainauncha tuke pujustinun susatas wakerimiayi. ¹⁷Ii Apuri Yus tuke jakashtinuitai. Ii jijaingkia waintasha wainchautiatu: Yuska nekas kichik aa nuka mash nekawitai taji. Tura nu nintimsar: Tuke iinu Apuri ata

tusar Yus nekas pengker awajsatnuitji. Tu ati.

¹⁸Uchiru Timoteowa wi ju chichaman akuptajme. Wi amin nuiniarmau asam, nu chicham chikich ainausha ujakta. Tura pengker pujusam kakaram wajasta. Yuse chichame etserin ainausha amin pachitmasar: Yuse chichame etserin atatui tiarmia nunismek nintimsam pujusta. ¹⁹Tura pengker nintimsam Yus umirkatnuka inaisaip. Chikich ainau pengker aa nuna nekainayat, tura Criston nekasampita tinayat, Yus umirtan inaisarmiayi. ²⁰Himeneo tura Alejandrosha Yusen umirtan inaisaru asaramtai, Yusen pachisar pasé chichatirin inaisarti tusan, iwianchi apuri Satanás ni wait wajaktintrin susarti tusan ajapan ukukmiajai.^c

Yus seatnun pachis nuikiartamuri

2 ¹Yamaikia nunasha tajame: Yus seakrikia, aints ainau mash pachisar: Ni yuumamuri susat tusar seatinuitji. Tura Yus ni tunaunrincha tsangkurat tusar seatinuitji. Tura chikich ainauncha Yus wait anentrarat tusar seatinuitji. Tura mash aints ainau pachisar Yuska tuke maaketai titinuitji. Aints mash tu Yusen searat tusan wisha wakerajai. ²Tura chikich ainaujai pengker angka pujusmi tusar, tura tuke maanitsuk pujusmi tusar, tura Yuska pengker awajsarmi tusar, tura aints mash iin pachitmasar pasé chichartamkarai tusar, tura apu ainausha tura aintsu juuntri ainausha ni aintsrin pengker inararat tusar Yuska seatinuitji. ³Yus tu seakrikia, nekasar pengker seaji. Yus iin Uwemtikramratin tuke tu seattaram tusa wakerawai. ⁴Tura mash aints ainaun uwemtikratas wakerau asa, wina chichamrun nekas aa nuna aints mash nekaawarti tusa wakerawai.^d

⁵Yuska aya kichkitai. Nuka ni Uchirin Jesucriston aints wajasti tusa akupkawai-tai. Tura aints wajas: Yusjai amikmataram tusa, ⁶aints ainautin mash uwemtikramratas, tura ii tunaarinja akiimiatramkatas jarutramkamiaji. Tura asamtai aints ainau mash nuna nekaawarat tusa Yuska iinka nekamtikramamiaji.^e ⁷Tura Yuska mash aints ainautin uwemtikramratas wakerutmau asa, judfochu ainausha nu chicham nuiniarta tusa Yuska wina akuptukmiaji. Tura asamtai chicham nekas aa nu nuiniakminkia: Cristo nekasampita tiarat tusa winaka akuptukmiaji. Wikia waitrutsuk nunaka nekas tajai.^f

⁸Tura asamtai Yuse umirin iruntrar Yusen seainak, aishmang ainau pengker nintimtunisar, ni tunaarinja inaisar kajernaitsuk, tura Yuska anturtatsuapi tuuka nintimtsuk, uwejen takuiniar Yusen searat tusan wakerajai. ⁹Nuwa ainausha, wina jiirsarat tutsuk, antsu pengke entsatin entsasar Yusnak nintimrarti tusan wakerajai. Muukencha pengker temashmiarar antsu: Shaakun nukap nungkutsuk entsati akiknasha entsatsuk pujusarti tusan wakerajai.^g

¹⁰Antsu Yusnau asar, pengker aa nuna takainak chikich ainauncha wait anentrarti tusan wakerajai. ¹¹Nuwa ainauka aishrin umirina Yuse chichamen takamtaik nuimiarartinuitai. ¹²Antsu aishmang iruntramunmaka Yuse chichamenka nuwaka nuikiarturchartinuitai. Tura asamtai nuwaka aishmangkun inarcharti, antsu aints Yuse chichamen etsermati takamtaik antukarti tusan wakerajai. ¹³¿Waruka nunasha turawartinuita? tusan tajame. Yus aishmangkun Adán naartinun eemak najanamiyai, nuniá ukunam nuwancha

Eva naartinun najanamiyai.^h ¹⁴Turamtaiwianch Adánna anangkachmiyai, antsu Evan anangkamiyai. Tura anangkamu asa tunau wajasmiaji.ⁱ ¹⁵Tura waininayat nuwa ainau uchin jatemawar waitnasar jurerar, tuke Criston nekasampita tusar, Yusen aneenauka ni tunaarinn mash inaisar uwemrartin ainawai.

Cristonu ainau wainin itieur pujusartinuita timiauri

3 ¹Aints Cristonu ainau wainin naamkatas wakerakka, nuka nekas pengker takatan wakerawai. Ju chichamka nekasaintai. ²Tura Cristonu ainau wainin naamkatas wakerakka, nekas pengker aints atinuitai. Tura pengker aints asamtai, chikich ainau nuna jiisar: Auka paseetai pengké tichartinuitai. Nuka kichik nuwentin atinuitai. Tura chichamnasha antin, tura pasé aa nuna chichas nakurichu, tura pengker nintintin atinuitai. Tura aints iraunasha pengker nintimtus: Juni kanurta tusa nunia yuratnuitai. Nuna turak pengker nuikiartin atinuitai. ³Tura nampechu atinuitai, tura maanitnasha maanichu atinuitai, tura kuikian itieur nukapsha achiktajak, tuuka nintimtsuk pujustinuitai. ⁴Tura ni jeen pujuinauncha pengker inartinuitai. Ni uchirisha pasé chichamnasha chichachu atinuitai. Nunia aparincha pengker umirkatnuitai. ⁵Ni jeen pujuinaun tenap inachkusha ¿itiur Yuse nemarnuncha pengkersha inarting? ⁶Aints yamai Cristo nemarkin wajasuka, Cristonu ainau wainin at tusarkia inaikiashtinuitji. Satanás Yusen nangkasang juun wajasat wakerau asamtai, Yus Satanásan nepetkamia nunisang nu aintsnaka wait wajaktiniun susai tusar,

e 2.6 (Gál. 1.4; Tito 2.14) f 2.7 (2.Tim. 1.11)
i 2.14 (Gén. 3.1-6)

g 2.9 (1.Ped. 3.3) h 2.13 (Gén. 2.7,21-22)

nu aintska Cristonu ainau wainin naamkan wisha apu wajastaj, tu nintimrai tusar inaikiashstinuitji. ⁷Tura Satanás Cristonu ainau wainiun anangka-wai tusa, tura Cristo umirchau ainau wina pachitsar pasé chichasarai tusa, nekas pengker aints atinuitai.^j

**Cristonu ainaun yaincha itiur
pujusartinuita timiauri**

⁸Cristonu ainaun yainka pengker aints artinuitai. Tura pasé aa nuna chichas nakurichu artinuitai. Tura ni timiaurinka miatrusar umiu artinuitai. Tura nampet-nasha nampechu artinuitai. Tura kuikian itiurak nukap achiktaj tuuka nintimsuk pujusartinuitai. ⁹Ni tunaarinka mash inaisar, tura pengker nintimsar, Yuse chichame nekas aa nuna nekau asar, Yus ni chichamen nekamtikiamia nuna tuke nekasampita tiartinuitai. ¹⁰Nu nangkam-taik: ¿Nu aints nekasash pengker puja? tusam nekaata. Tura nu nekaam, Cristonu ainaun yain ati tusam inaikiata. ¹¹Nuna nuwarisha nekas pengker asamtai, aints mash niin pengker nintimtusartinuitai.

Tura nuwarisha tsanumchau, tura pasé aa nuna chichas nakurichu, antsu pengker aa nuna tuke mash umiu atinuitai. ¹²Tura Cristonu ainau yain kichik nuwentin atinuitai. Tura ni jeen pujuinauncha, tura ni uchiri ainauncha pengker inau atinuitai. ¹³Nu takatan nekas pengker takaminamtaikia, chikich aints ainausha: Nu aintska nekas pengkeraitai tiartinuitai. Cristonu ainau yain Cristo Jesús an nekasampita tinu asa, natsaamsuk Criston pachis chichastinuitai.

**Yus iin pengker awajtamsamurin
pachis timiauri**

¹⁴⁻¹⁵Uchiru, amin wári jiistanan wakerajme. Turayatun ju papin wi aarja

ju jukim, Yuse aintsri ainau itiur pujusartinuita tusam nekaata. Yus tuke puja nuna namarin ainau ni uchiri asar, nekas chicham aa nuna pengker nintimsar jukiar tuke inaitsuk nintimartinuitai. ¹⁶Yus iinka pengker awajtamsamurin mash aints ainauka nekaachminun wainiat, iin nekamtikramamiaji nuka nekas pengkeraitai. Nuka juwaitai:

Yuska aints wajas, ju nungkanam wantinturmakmiaji.

Tura nayaimpinam waketkimiaji.

Yuse Wakani niincha pachis:

Nekas pengkeraitai timiaji. Yuse awemamuri niincha wainkarmiaji.

Tura niin pachisar mash nungkanam etserkarmiaji.

Tura asamtai nuna nekasaintai tinauka mash nungkanam pujuinawai.

**Criston umirtan inaisartinun
pachis etserkamu**

4 ¹Uchiru, Yuse Wakani paan etserui: Kinta amuamunam aints Criston umirinayat iwianch nuikiartamun antukar, tura anangkartin wakantrin chichamen antukar, Criston umirtanka inaisartinuitai. ²Nu anangkartin ainauka aints ni uwejen jiru tsuwerjai sukuamsha nekapinachua nunisarang ni tunaarinka pengké nekaprachartinuitai. Tura asar tuke aints ainaun anangkawartas wait chichaman etserkartinuitai. ³⁻⁴Nuka nangkamiar chichainak: Nuwa nuwatkatnuka paseetai, tura Yus yutancha mash najamu waininayat, tura Cristonu ainautikia nekas chichaman nekau asar, yutaka pachitsuk yuwamnawaitji tusar nekainayat nu yutaka yuwashstinuitai tinawai. Antsu Yus yutancha mash najanamu asamtai, Cristonu ainautikia

nakitajai tutsuk nekas chicham paan nekau asar, Yus maaketai tusar mash yuwamnawaitji. ⁵Yus nunaka: Pengkeraitai tinu asamtai, iisha Yus sear pachitsuk yuwamnawaitji.^k

Cristo inatiri ainau pachisar etserkamu

⁶Uchiru, wi taja nuka Cristonu ainau nuiniakmeka, Jesucristo pengker inatiri atatme. Tura Yuse chichame nekasampita tusam, pengker nuikiartuktinka mash jukin asam, nu nintimsam kakaram wajastatme.

⁷Antsu yaanchuik juuntan aujmatinauka antukaip. Tura nintimsuk chichainauka antukaip. Antsu Yuse wakeramuri umirkataj tusam kakaram wajasta. ⁸Iinu namangke kakaram awajsatnuka jumchik pengkeraitai. Antsu Yuse wakeramuri umirkatnuka nuna nangkamasang pengkeraitai. Nu umirkurkia ju nungkanmaka pengker pujustinuitji. Nunia jakarsha tuke Yusnum iwiaaku pujustinuitji. ⁹Ju chichamka nekas asamtai, aints ainauka mash nekasaintai tiartinuitai. ¹⁰Yus tuke iwiaaku puja nuka iin Uwemtikramratin asa, aints ainautin mash uwemtikramratinuitji. Tura asa nu chichamka nekasampita tinu asar, katsekraminamtai-sha waitnasar kakaram takakmaji.

¹¹Wi taja nuna mash umikiarat tusam chicharkarta. Tura Cristonu ainauka mash nuiniarta tajame. ¹²Ame pengker pujakminkia: Auka uchitai turamiarchatnuitai. Tura ame pengker chichaakum, tura pengker pujusam Yuse anengkratairingkia tu awai tusam, chikich ainausha nuiniarta. Nunia Yus nekasampita tusam tunaarinchau pujusam, Cristonu ainau wiya nunisarang pujusarti tusam nuiniarta tajame. ¹³Uchiru wi jeatsaing, aints iruntramunam Cristonu ainauka

nuiniartasam tura kakamtikratasam Yuse chichame aujsata tajame. ¹⁴Cristo nemarnu wainin ainau ninu uwejejai muukmin achirmakar, Yuse kakarmari jukit turamiaru asaramtai, kakaram wajasam Yuse takatringkia inaisaip.

¹⁵Tura aints ainau mash ame pengker turamun nekaawarat tusam, wi tajame nuka tuke nintimjai nintimsam turata. ¹⁶Ame tenapkesam: Wisha tu pujajai tu nintimram, Yuse chichamengka tuke mash nuiniarta. Nu turakmeka amesha uwemratnuitme. Turakmin ami chichamin antinausha uwemrartinuitai.

¿Cristonu ainauti itiur pujustinuitji?

5 ¹Uchiru, juuntach ainau jiyakaip. Antsu ami aparmijai chichaame nunismek chichasta. Tura yachim ainau pengker awajme nunismek natsa ainausha pengker awajsata. ²Nuwa juuntach ainausha ami nukurmea nunismek pengker awajsata. Tura nawan ainausha umaimia nunismek tunauka nintimtutsuk pengker awajsata.

³Waje ainau ni yaingmintri atau asamtai, ame yaingta. ⁴Antsu waje nawantrintin tura uchirtin pujakka, tura tirangkisha pujakka, ni wearai asar niin wainkartinuitai. Nuka ni aneenak tsakatmarmau asar, ni aparincha, tura ni nukurincha wainkartinuitai. Yuscha nunaka wakerau asa, nekas pengkeraitai tawai. ⁵Tura waje nekas ningki pujakka: Yus wina yainkati tusa, tuke inaitsuk tsawaisha kashisha nintimui, tura tuke inaitsuk Yusen seak pujawai. ⁶Antsu waje tuke ni wakeramurin nintimias pujakka, iwiaaku pujayat jakawa nunisang pujawai.

⁷⁻⁸Cristonu ainau ni wearin wait anentinachuka, tura ni wearai waje ainaun nintimtinachuka Yusen nekasar umirina-

tsui. Nu aintska nekasar Yuse uchiri ainayat, Criston umirchawa nuna nangkamasarang pasé pujuinawai. Ju chichamnaka Cristonu ainau antukarti tusam etserkata. Turakmin Cristonu ainau ju chichaman miatrusarang umirinamtai, chikich ainau Yuse namarin pasé pujuinawai tichartinuitai.

⁹Nuwa nekas juuntach kichik aishrintin wajema pujamtaikia, Cristonu ainau nu wajenka wait anentrartinuitai. ¹⁰Aints mash nu waje turamurin nekaawar: Nusha pengkeraitai tiartinuitai. Ni uchirin tsakatmaramtaikia, tura irau ainauncha pengker yuramtaikia, tura Cristonu ainauncha yaingkiamtaikia, tura wait wajainauncha wait anentramtaikia, tura pengker aa nuna mash takakmasamtaikia, nu wajenka Cristonu ainauka wait anentrartinuitai.

¹¹Antsu nuwa nawan aintsun yamai ninumkayat wajemamtaikia, Cristonu ainausha chikich waje juunchin wait anentinak yaina nuniska yaingkiarchatnuitai. Antsu nu nuwa wajemayat, ni wakeramurin nintimias pujau asa, Cristonka nintimsuk, aintsun ataksha ninumkataj tu nintimias pujawai. ¹²Nuka Cristonuitjai tayat, Criston nintimsuk pujamtaikia, aints ainausha nuna nekaawar, nuka tunaawitai tiartinuitai. ¹³Nu nuwa ainauka takatan nakiminak, chikich chikich jeanam wayaawar, nangkamiar aujmakratu pujuinawai. Chikich aints chichaamtai, ningkikia tichamin ainayat nangkamiar chichau ainawai. ¹⁴Tura asamtai nunasha tajame: Nawan wajema pujakka, ataksha aintsnaka ninumkati. Tura uchinha jurerti. Tura ni jeencha tenap wainkati tajame. Nuwa tu pujamtaikia Criston nakitin ainausha: Nu nuwaka paseetai tichartinuitai. ¹⁵Chikich nawan wajema

pujuinauka menakar, Criston umirtan inaisar, iwianchi apurin Satanásan nemarsarmiyai.

¹⁶Nuwa Cristonu asa, ni jeen wajen pujas pujauka chikich Cristonu ainaun: Ju wajeka atumsha yaingtaram tutsuk ningki yaingtinitai. Antsu waje pengké ningki pujamtaikia, yaingmintri atsau asamtai, Cristonu ainau mash nu wajenka wait anentrartinuitai.

¹⁷⁻¹⁸Uchiru, Yuse chichamesha tu aarmawaitai: “Waaka trigo neren pakartas nájamtaikia, trigo pachitsuk yuwati tusaram jangkengka jingkiatawairap.”¹⁷ Chikich chichamsha tu aarmawaitai: “Aints takakmak pujamtaikia akiktinuitai.” Tu aarmau asamtai, Cristonu ainau wainin Yuse takatrin pengker takakminak, tura pengker nuikiartinamtaikia, tura Yuse chichamen kashincha kashincha etserinamtaikia, nekas pengker umirkartinuitai. Tura Cristonu ainau ni yuumamurincha susartinuitai.¹⁸

¹⁹Aints ningki chichaak: Cristonu ainau wainin tunau takasi tamatikia nuka antukaip. Antsu jimiarchiksha, tura kampfamaksha tsanumtsuk nuna tinamtaikia, nu chichamka antukta.

²⁰Cristonu ainau tuke tunau turukiar weenamtaikia, ame Cristonu ainau mash iruntramunam ni tunaarin nekaawarti tusam chicharkata. Turakmin chikich ainau nuna antukar: Wína tunaaruncha turutiarai tusar shamkar inaisartinuitai.

²¹Ii Apaachiri Yus, tura ii Apuri Jesucristosha, tura Yuse awemamuri ainau Yus: Winia inatir ataram tusa inaikiamia nusha ii tunaarincha mash metek nekartaminaji. Tura asaramtai nunasha tajame: Cristonu ainau wainin tunau takauka nekas aminu amikrum wainiatmek chicharkata. Aints ainau

mash metek jiista, tura metek chicharkata. ²²Ameka Cristonu ainau wainin inaikiasam wakerakmesha wárikia inaikap. Tura ame inaikiamaitiat, nuka tunau turamtaikia, ame ni tunauringkia jurumaktiatme. Antsu pasé aa nuna turinamunmaka pengké pachinkaip.

²³Wakemin tuke najaimin asam, yumikia umuraip. Antsu vinosha jumchiksha umurta.

²⁴Ju chichamsha nintimrata: Chikich aints ni wait wajaktintri jeachu wainiatrik ni tunauring paan nekaatnuitji. Tura chikich aints tunauringka yamaikia paanka nekaashtinuitji, antsu ukunam paan nekaatnuitji. ²⁵Tura aintsu pengker takatrisha nunisrik paan wainkatnuitji. Antsu yamaikia paanka nekachiatrik ukunam paan nekaatnuitji.

6 ¹Inati ainautiram, chikich aints ainau Yusen pachisar, tura Yuse chichame ii nuikiartaji nuna pachisar pasé chichasarai tusaram, atumin inatminka pengker umirkataram. ²Inamnujai mai metek Cristonu asar, inati ni inamurinja nakitrachartinuitai. Antsu ni inamurisha Yuse aneamuri tura Cristo nemarin asamtai, chikich inati ni apurin umirina nuna nangkamasarang pengker umirkartinuitai.

Kuik wakeruktinun pachis etserkamu

Ju chichamka nuiniarta. Tura umirkataram tusam etserkata. ³Aints ii Apuri Jesucristo chichamen nekas aa nuna nuikiartachuka, tura Yus pengker umirkatnun nuikiartachuka, antsu niish wait chichaman nuikiartak pujauka ⁴nekachiat nangkami: Wikia miajuitjai tawai. Nuka nangkami chichaman chichaa chichaaka jiyanitnasha, tura kajernaitancha, tura katseknaitancha tura pengker nintimtunitsuk pujustinasha

wakerawai. ⁵Nu aints ainau tunau tuke nintiminau asar nekas chichamnaka pachinatsui. Tura asar jiyanitan tuke wakerinawai. Tura kuikian nukap jukin Yusnaka pengker awajsachainjash tu nintiminawai. ⁶Iikia Yus umirkurkia, tura tunau takatsuk pujakrikia, warinchuwach tura kuikiasha nukap wakerutsuk pujakrikia, nekasar maaketai titinuitji. ⁷Iikia warinchusha takutsuk akiinamiaji. Tura jakarsha nunisrik warinchusha kichkisha jukishtinuitji. ⁸Tura asar ii yutairi amatisha, tura ii entsatiri amatisha, maaketai tusar pengker nintimsar pujustinuitji. ⁹Antsu kuikiartin wajaštaj tu nintiminauka kuikian timiá wakerinaw asar tunau wajainawai. Tura asaramtai kuikian nukap achikiartas wakerin ainaunka kuntin ejatkanam napinawa nunisang iwianch nu aintsnaka achiawai. Tura jakatniunam nunia wait wajaktinun akupawai. ¹⁰Kuikian nukap aneenauka tunau tuke turatun nangkaminau. Tura asaramtai chikich aints kuikian aneenau asar, Criston nekasampita tinachu asar, nukap wait wajakarmiayi. ^o

Cristo umirkum kakaram wajasta timiauri

¹¹Uchiru, ameka Yusnau asam, kuikiaka nintimtsuk asata. Antsu tunauka nintimtsuk Yus pengker awajsata. Tura Cristo nekasampita tusam chikich ainausha aneeta. Tura jaimiasam: Wikia miajuitjai tumamtsuk asata. ¹²Antsu Cristo pengker umirkum kakaram wajasta. Nu turakmekka pujut nangkashtin jukitnuitme. Yuska nu jukita tusa aminka eatmakmiayi. Tura asamtai aints unturi antinamunam ameka Cristo nekasampita tinuyame. ¹³⁻¹⁴Ataksha tajame: Ii Apuri taatsaing, wi taja nuka kajinmatsuk tura yapajitsuk umikta. Nu

turakmeke natsaamtsuk pujustinuitme. Yus iwiaaku ainautin mash pujutan sukartin asa amincha waitmawai. Tura Poncio Pilato Criston iniam, Ni shamtsuk nekas chichaman etserkamia nuka amincha waitmawai.^P

¹⁵Ni kintari jeamtai, Yus ni Uchirin nayaimpinmaya akupkatnuitai. Ningki timiá pengker asa, junia apu ainau Apurintai. Tura junia juun ainau nangkamasang juuntaitai. ¹⁶Ni tuke pujuu asa pengké jakashtnuitai. Tura tuke paaniunam pujuwitai. Tura asamtai aints kichkisha ningkikia nuningkia jeacharmi-nuitai. Aints kichkisha Yusnaka pengké wainkacharmiayi, tura pengké wainkachartnuitai. Tura asamtai Yus timiá kakaram asa, aints ainaun tuke inartinuitai. Nekasaintai.

¹⁷Uchiru, kuikiartin ainau ujakta: Atumka jampesrum kuikiartinuitjai tiirap tita. Kuik wári mengkakatini asamtai, kuikiarka nukap pujawai, tuuka nintimtsuk pujustaram tusam, antsu Yusek nintimrataram tita. Yuska tuke iwiaaku pujuu asa, ii yuumamurinchu tuke mash sukartin asamtai, iisha

pengker nintimsar yuumatsuk pujustinuitji. ¹⁸Kuikiartin ainausha ujakta: Chikich ainau wait anentakrum pengker aa nuka mash turataram. Turaram chikich aints yuuminuk pujuinausha nukap susataj tusaram, pengker nintimsaram yainiktaram. Nuna turinaunaka Yuska pengker awajsatnuitai tita. ¹⁹Kuikiartin nuna turinauka nukap aruser Cristonam jear, chikich ainaun susarmia nuna nangkamasarang nisha warasartnuitai. Tura pujut nangkankash-tinun Cristo susatnua nuna jukiartinuitai.

**Inangnamu Timoteon
chichaman akatramuri**

²⁰Uchiru Timoteowa, Yuse chichame etserkata timiaja nuka aints ainamunam tenapkesam etserkata. Antsu chikich chichaman etserina nuka, tura ju nungkanmaya pachisar aujmatina nuka antukaip. Tura nangkamiar: Wisha nekajai tinauka nuna chichamengka antukaip. ²¹Tura chikich aints tu nintimsar pujuinauka Cristo umirtanka inaisarmiayi.

Ii Apuri amin yainmakti. Maaketai.

Pablo Timoteon Papin Ataksha Akuptukmauri

Chicham aatramuri

1 ¹⁻²Aneetiru uchiru Timoteowa: Wiitjai Pabloitjai. Yus wakerau asamtai Jesucristo akupkamuitjai. Cristo Jesúsjai tsaningkiaru ainaun mash pujut nangkan-kashtinun susatatajai Yus tinu asa, nu etserkata tusa akuptukuitai. Ii Apaachiri Yus, tura ii Apuri Jesucristo amincha yainmakarti, tura wait anentramrarti, tura angkan pengker pujustinasha amincha suramsarti tusan, amin aatkun pujajai.^a

Cristo pachisar chichastinka natsaaraip

³Uchiru, wikia tsawaisha kashisha tuke: Yus amin yainmakti tusan, amin pachisan maaketai tajai. Yaanchuik wina wear Yusen umirin armia nunisnak wisha tunaanaka nintimtsuk Yusen umirkun pujajai. ⁴Uchiru, wi kanaamtai ame eantramiarena nuna tuke nintimsan pujajai. Tura asan ataksha wararnaisami tusan amin jiiistan wakerajme. Tura amin wainkanka nekasam warastatajai. ⁵Ameka Cristo nekasampita timiame nunaka kajinmatsjai. Ami nukuchrum Loida tura ami nukuram Eunicesha yaanchuik Yusen nekasampita tinu armiayi. Tura amesha nunismek tu pujame tusan nekajme.^b

⁶Tura asan tajame: Wi muukmin uwejruijai achikian Yusen seamtai, Yus ni

kakarmin amin suramsamia nujai ataksha Yuse takatringkia kakaram takakmasta. ⁷Yus shamamunka suramsachmiaji, antsu ni kakarmarin, tura ni anengkratairincha, tura nekas paan nintimratnuncha iin suramsamiaji.

⁸Ii Apuri Cristo pachisar chichastincha natsaaraip. Tura wikia Cristo chichame etserin asan, kársernum pujamtaisha natsantruraip. Tura amesha Cristonam uwemratin chicham etserin asam, wait wajaktincha shamkaip. Ame wait wajakmincha Yus ni kakarmarincha suramsatnuitai. ⁹Yuska iincha uwemtikramramiaji. Tura wina takatur takakmastaram tusa, pengker takakmakur pujatsrining iincha untsurmakmiaji. Tura Cristo Jesús yaanchuik aints ainaun najanchayat, iin anenmau asa, ni aintsritin uwemtikramratas wakerutmakmiaji. ¹⁰Tura Yuska yamai iin uwemtikramratnun Jesucriston akuptur-maku asa, ni anengkratairin nekamtikramamiaji. Ni Uchiri jakamun-maya inankin asa jatancha nepetkamiayi. Nunia tuke wijai pujustaram tusa, pujut nangkan-kashtinun ninu ainautinka suramsamiaji. Nu nekaataram tusa, Cristonam uwemratin chichaman iinka nekamtikramamiaji.

¹¹Nu chichamka etserin ata tusa Yus winaka inaitukmiaji. Tura judfochu

a 1.1 (Hech. 16.1; 1.Tim. 1.2) b 1.5 (Hech. 16.1-2)

ainamunam wína chichamur nuiniarta tusa akuptukmiayi.^c ¹²Ju takatan takakmau asan, wikia waitnajai, antsu pengké natsaamatsjai. Cristo yaachita tusan nekau asan, tura niincha umiru asan, wikia nunaka nekajai. Nungka amukatin kinta jeatsaing, Cristo timiá kakaram asa, wína takatan surusmia nunaka tuke mash pengker waitruktinuitai.

¹³Wi pengker nuikiartamu antuku asam, nuka kajinmatsuk metek nuikiartukta. Ameka Cristo Jesúsnau asam, ni nekasampita tusam chikich ainausha aneeta. ¹⁴Yus ni nuikiartutirin amin suramsau asamtai, Yuse Wakani iin pujurtamji nuna kakarmarijai aints ainau pengker nuiniarta tajame.

¹⁵Uchiru, Asia nungkanmaya ainau winaka mash ukurkiari. Figeloshá, tura Hermógenesha wina ukurkiari. Amesha nusha nekaamame. ¹⁶⁻¹⁷Wikia kársernum pujai, Onesiforo juni Romanam taa, natsantrutsuk ningki eatkinij wajau asa, winaka waittsuka inaituschamiayi. Tura wína waitkau asamtai, nintirun nukap waramtikrusmiayi. Tura asamtai Onesiforo wearinka Yus wait anentrati tajai. ¹⁸Iikia Efesonam pujarin, nusha iin nukap yainmakmijai. Amesha nuka nekame. Tura nungka amukatin kinta jeamtai, ii Apuri niincha wait anentrati tajai.

Jesucristo inatiri pachis timiauri

2 ¹Uchiru, Cristo Jesúsnau asam, ni kakarmarijai kakaram wajasta. ²Yuse aintsri iruntramunam wisha amin nuiniarmiajme nu chichaman pengker umirin ainauka nuiniarta. Nu turakmin nisha nunisarang chikich ainauncha nuiniararti tusam turata.

³Amesha Jesucristo pengker umirkau asam, péngke suntara nunismek wait

wajaktinka shamkaip. ⁴Suntar mesetnum weenak, ni apurin miatrusrang umirin asar, ni wearinka jiitsuk, tura ni wakeramurinha najantsuk pujuinawai. Iisha nunisrik ii wakeramuringkia najantsuk, ii Apuri Cristok umirkatnuitji. ⁵Tura nakurakur nekapnaiyamu nintimrata. Nekapnaiyakrum pujakrumka, tu nakurustaram tinamaitiat, aints miatrusang umitsuk pujamtaikia, chikich aints ainausha niincha: Pengker nakurusume tichartinuitai. Iincha nunisang Yus umirtsuk pujakrinkia, Yuska: Pengker umirtukume turamchatnuitji. ⁶Tura aints ni ajarin takakmak pujauka juuktin kinta jeamtai, ni ajarinianka pachitsuk yuwatnuitai. ⁷Wi taja nuka nintimrata. Tura ii Apuri nuna taku tawai tusa aminka mash nekamtikramatatu.

⁸Uchiru, Jesucristo jakamunmaya nantakmiauri nintimrata. Ni apu Davidta wearí asa, Cristoka juun apu atinuitai. Yusnum uwemratin chichaman wi etserja nuka nuwaitai. ⁹Nu chichaman etseru asan, jirujai jingkiamu mangkartinua nunisnak kársernum waitnajai. Antsu Yuse chichamenka pengké jingkiachartinuitai. ¹⁰Tura asamtai Cristo Jesúsnau ainau tuke uwemrarti tusan, tura pujut nangkankashtinun jukiarti tusan, wait wajaktinnum pujayatun tsantran pujajai.

¹¹Ju tamauka nekasaintai:

Cristonu ainautikia waitnasar jakarsha Nijai tuke pujustinuitji.

¹²Cristonu asar waitnasar pujakrishá, Nijai tsaniasar aints ainausha inartinuitji.

Antsu Criston natsantamka, Niisha nunisang natsantramratnuitji.^d

¹³Iisha Criston nekasampita tutsuk pujakrinkia, Niisha ni tímia nunaka tuke umiktin asa ni chichamenka tuke umiktinuitai.

**Yuse chichamen pengker takainaun
pachis etserkamu**

¹⁴Uchiru, wi taja nuka chikich aints ainausha nintimtikrarta. Turakum ii Apuri Cristo wakeramuri etserkata. Nangkamiar aujmatnainak pujuinauka: Nunaka inaisarti tusam, ii Apuri wainmaunum chicharkata. Aujmakratinauk pujuina nuka pengké kichkisha yaingkratinatsui. Antsu nuna antinauka paseminawai. ¹⁵Pengker aa nuka kakaram takasta. Nu takaakminka Yuska amincha: Pengker takakmasume turamtaui. Tura nekas chicham nuiniakum tupnik nuiniarta. Turakmeka natsaarchatnuitme. ¹⁶Antsu ju nungkanmaya ainau nangkamiar chichainamunmaka nuningkia pachinkaip. Tu chichainauka nukap tunaun nintimsar pujuinawai.

¹⁷Tura nuna chichamengka aintsu namangke kaurau nunisang tsuwarchamin ayi. Tura Himeneo tura Filetoshu tu pujuinawai. ¹⁸Nuka nekas chichamnaka inaisar nekaschau aa nuna chichainak, Cristo nemarkin jakaru ainauka yanchuk nantakiaru asaramtai, atumka nantakchatnuitrume tusar Cristonu ainaun anangkinawai. ¹⁹Antsu Yuse chichamengka yapajiachminuitai. Nu chichamka tu aarmawaitai: “Ii Apuri Cristo ni aintsrinka yaachita tusa mash nekawai.” Tura chikitcha tu aarmawaitai: “Wisha Cristonuitjai tina nuka ni tunaarinja mash inaisartinuitai.”^e

²⁰Kuikiartinu jeenkia pining kuri najanamua tura kuik najanamusha irunui. Tura nunaka kuikiartin ainau nuke takainawai. Tura numi najanamusha, tura nuwe najanamusha pining irunui. Antsu mianchau ainau nunaka pachitsuk takainawai. ²¹Aints ni tunaarinka mash inais, nekas pengker pujakka, pining kuri

najanamua nunisketai. Jeentin pining kuri najanamunka pengker wainui. Yuscha nunisang ni aintsri ainautinka: Wina inatir ataram tusa, tura wina takatur pengker takakmastaram tusa ju nungkanam pujsamuitji.^f

²²Uchiru, natsa tunau wakerutan nintimina nunismeka nintimraip. Antsu nekas pengker aa nuke nintimrata. Tura Cristo nekasampita tusam chikich ainau aneeta. Tura pengker nintimsam angkan pujusta. Tura Cristonu ainau tunauka nintimsuk Yusen seaina nujai iruntrata. ²³Aints nangkamiar aujmatnainamtaisha, tura netse chichainamtaisha nuni pachinkaip. Nuka jiyanitnasha nintimkinawai. ²⁴Ii Apuri inatiri ainautikia chikich ainaujai jiyantsuk pujustinuitji, antsu aints ainaun mash pengker awajsatnuitji. Tura aints ainaun pengker nuiniartinuitji. Tura jaimiasar pujustinuitji. ²⁵Tura pengker nintintin asar, Yusen nakitin ainausha: Antuktaram tusar ujaktinuitji. Tura ni nintimaurincha yapajiawar nekas chichaman nekaawarti tusar nakastinuitji. ²⁶Nu turakrinkia Yusen nakitin ainausha shintawa nunisarang: Wikia Satanása inatirinjai tusar, paan nintimrar kuintin ejatkanmaya jiihua nunisarang Satanása wakeramurinka inaisar uwemrartin ainawai.^g

**Nungka amukatin jeamtai
¿aints ainausha itiru pujusartinuita?**

3 ¹Uchiru, nusha nekaata: Nungka amukatin kinta jeatsaing, wait wajaktin nukap atinuitai. ²Aints ainau niinunak nukap nintimrartinuitai. Tura kuikian nukap wakerinak, Yusnasha pachisar pasé chichasartinuitai, tura aparincha, tura nukurinja umirtsuk pujusar, maaketai tutsuk Yusnaka nakitrartinuitai. ³Tura chikich ainauncha

wait anenchau artinuitai. Tura tsanumin artinuitai. Tura ni namangke wakeramur-in nepetchau artinuitai. Tura kajeu artinuitai, tura pengker aa nunaka nakitrartinuitai. ⁴Tura amikrincha anangkawartinuitai. Tura arantutsuk tunaun turuwartinuitai. Tura ningki nintimtumasar: Shiirmapitja tumamin artinuitai. Tura Yuse wakeramurinka najantsuk ni wakeramurinak najanawartinuitai. ⁵Nuka nangkamiar Yusnawaitjai tinayat, Yuse kakarmaringkia atsawai tiartinuitai.^h

Uchiru, nu aints ainaujaingkia pengké pachinkaip. ⁶Nu aints ainauka chikich chikich jeanam pachitsuk wayaawar, nuwawach nintinchaun juun tunaarinnun jiisar, pengker chichainayat anangkinak ni wakeramurin tuke najanawarti tusar nintimtikinawai. ⁷Tura nu nuwa ainauka nu aintsu chichamen tuke anturkariat, chicham nekas aa nunaka nekaawartatka-mawar yuumatinawai. ⁸⁻⁹Yaanchuik wishin Janes naartin, tura kitcha Jambres naartin, nekas chichamnaka nakitinak Moisésan pachisar: Nangkami tawai tiarmiayi. Tura ni anangmamurincha aints ainausha mash nekaawarmiayi. Nu wishin jimiar yaanchuik turinamurin nekaawarmia nunisarang yamaiya aintcha nintinchaun turinamurincha mash paan nekaawartinuitai. Nu aints ainauka nekas chichamnaka nakitinawai. Tura wikia nuikiartinuitjai tinayat, nekaschau aa nuna nuikiartinawai. Tura Yusen nekasampita tichau asaramtai, nu aints ainaunka Yuska nakitawai.

Inangnamu Pablo Timoteon akatramuri

¹⁰⁻¹¹Antsu ameka Uchiru, wi nuikiartamur antukam umirnyuame. Tura wi pengker pujamursha waitkam nunismek turinuyame. Tura wi nintimaur

nekauyame. Tura Yus umirkamursha nunismek amesha umirnyuame. Tura Yusen nakitin ainaun wi tsantramiaja nunismek amesha tsantramiaame. Tura wi aints ainaun aneenuyaja nunismek amesha aneenuyame. Tura wi wait wajamurun pachichuyaja nunismek amesha pachichuyame. Tura Antioquia yaktanam, tura Iconio yaktanmasha, tura Listra yaktanmasha wina mantuwartas papeetinamtai, wi wait wajakmaurusha nekaamiam. Antsu Yus winaka nuni uwemtikurmiayi. ⁱ ¹²Aints Cristo Jesúsna asar, pengké tunaarinchau pujusmi tusar wakerinamtaisha, Cristo nakitin ainauka tuke nakitrartinuitai. ¹³Tura tunaun ainausha, tura anangkartin ainausha, niisha anangkamu asar, chikich aints ainauncha nuna nangkamasarang tunaun turukiar weartinuitai.

¹⁴Antsu ameka nuimiarmiam nu nekasampita tusam, nuka tuke inaitsuk umirkata. Amincha nuitamrarmia nuka waitrichu ainawai tusam nekame.

¹⁵Ameka uchiwach asamek, Yuse chichame nekas pengker aa nu antuku asam nekauyame. Tura Cristo Jesús nekasampita takurningkia, iin uwemtikramratnuitji tusam nusha nekauyame.

¹⁶Yus ni aintsri ainaunka ni chichamen aamtikramiayi. Tura asamtai Yuse chichame nekas pengkeraitai. Yus ni chichamen aints ainautinka nuitamratas, ni tunaarin inaisarti tusa, tura ni chichamen umirtukarti tusa, tura tunaarinchau pujusarti tusa aamtikramramiaji. ¹⁷Tura Yus ni aintsri ainautin mash aarmawa nunisrumek umirtuktaram tusa, tura pengker aa nuka mash turataram tusa, ni chichamenka aamtikramramiaji.

4 ¹Ii Apaachiri Yus tura ii Apuri Cristo Jesús iinka waitmaji. Nuka iwiaaku ainau, tura jakaru ainau tunau turamu-

rincha jiistas winitnuitai. Tura asamtai ju chichamnasha akatjame: ²Aints Yuse chichamen antutan wakerinamtaisha, tura antutan nakitinamtaisha nunismek tuke ukutsuk ujakta. Atumi tunaui ukuktaram tusam tura: Pengker aa nu turataram tusam, aints ainau nuiniarta. Antutan nakitinau wainiatmek, kajertsuk pengker nintimsam tuke Yuse chichame nuiniarta tajame. ³Kinta jeamtai aints ainau pengker nuikiartamun antutan nakitartinuitai. Antsu niish niish nuikiartiniun untsuri ni wakeramurinak nuikiarturat tusar eakartinuitai. ⁴Tura nekas chicham aa nunaka tuntupeawar ukukiar, yaanchuik juunta aujmattairin antutan wakerukartinuitai. ⁵Antsu ameka nu wainkam nintimrata. Tura waitnamurmesha jaimiasam nepetkata. Tura uwemratin chicham tuke etserkata. Tura ami takatrumsha mash pengker umista tajame.

⁶Uchiru, wi jakatin kintar jeatak wajasi. Turamtai Cristo chichamen pachisar winaka mantuwartatui. ⁷Wikia iwianchin nepetkau asan, tura Yuse wakeramurin miatrusnak mash umiku asan, Criston nekasampita tutanka inaisachmajai. ⁸Turamtai ii Apuri nekas pengker asa, aints ainauti takatrin jiirmastas winitata nuka: Ameka nekas pengker aa nu takakmasume tusa, tsengkruiti nekas pengker aa nunaka winasha surustinuitai. Aya winakeka suruschatnuitai, antsu chikich aints ainausha Criston aneenak: Wári tarata tinaunaka nunasha mash susartinuitai.

**Chikich aints ainaun pachis
chicham akuptukmauri**

⁹Uchiru, wári winimnawaitkumka wári jiiirita. ¹⁰Demas ju nungkanmaya aa nuna

timiá wakerau asa, winaka japrua ukurki, Tesalónica yaktanam weyi. Tura Crescentesha Galacia nungkanam weyi. Tura Titosha Dalmacia nungkanam weyi.^j ¹¹Lucasak nuke juwak wijai pujawai. Marcos eakam wína takatru yainkatin ayatrukta.^k ¹²Tíquiconka Efeso yaktanam akupkamjai.^l ¹³Ame winakum wína entsatir nuparam aa nuka, tura papi ainausha, tura nuwapen wi aarmiaja nuka Troas yaktanam Carpo jeen ukukmiaja nu takurtukta.^m

¹⁴Alejandro, jiru takakminua nuka, wína pachitas nukap pasé chichartukmiayi. Tura asamtai ii Apuri ni turamurinka yapaijkiatnuitai.ⁿ ¹⁵Ii chichamen arantak nakitau asamtai, amincha pachitmas pasé chichartukai tusam wainkata.

¹⁶Apu ainamunam chicharmamsatasan nu nangkamtaik wiki wajakmiyajai. Tura aints kichkisha: Wisha amin chicharsatjame tusarka wajakcharmiayi, antsu mash winaka ukurkiarmiayi. Tura wainiatun Yus nu aintsnaka yapaijtsuk asati tusan wakerjai. ¹⁷Tura wainiat ii Apuri Cristo wína yainkamiayi. Tura asa ni kakarmarin nintirun engketruamiayi. Tura asamtai judíochou ainausha mash Cristonam uwemratin chichaman antukarti tusan ujakarmiajai. Nunia Yuska juun apu winaka juun yawaanum akupkashti tusa surimrukmiayi. ¹⁸Yamaisha nunisang wína pasé awajtusartas wakerinaw wainiat, Yuska winaka uwemtikrurtatui. Tura iin inatmartin asa, nayaimpinam juruktatui. Aints ainau tuke mash Yusen: Ameketme juuntam tiarti. Tu ati.

Yus atumin yainmakarti timiauri

¹⁹Prisca tura Aquila tura Onesiforo weari ainausha mash chichasam: Pablo

atumin chichaman akupturmarme tusam
ujakta.^o ²⁰Erasto Corinto yaktanam
juwakmiayi. Tura Trófimo Mileto
yaktanam sungkurmak tepaun ukukmia-
jai.^p ²¹Ame winimnawaitkumka
yumchaka jeatsaing winita. Eubulo, tura

Pudentesha, tura Linosha, tura Claudia-
sha, tura Cristonu ainausha mash amin
chichaman akupturminawai.

²²Uchiru, iinu Apuri Jesucristo amijai
pujusti. Tura Yus atumin tuke mash
yainmakarti. Maaketai.

Pablo Titon Papin Akuptukmauri

Chicham aatramuri

1 ¹Wiitjai Pabloitjai. Yuse inatirinjai. Jesucristo wina chichartak: Wina chichamur etserkata tusa akuptukmiayi. Yus eakmau ainau nekasampita tiarat tusa, tura nekas chicham aa nunaka nekaawarat tusa, Yuska winaka akuptukmiayi. ²Yusnau ainau pujut nangkankashtinun jukiarat tusa, Yuska pengké waitrichu asa, yaanchuik aintsnaka najantsuk nunaka timiayi. ³Tura yamai ni chichame nekaatin kinta jeau asamtai, Yuska iin Uwemtikramratin aa nu: Ju chicham etserkata tusa akuptuk, ni chichamen iinka nekamtikramamiayi. ⁴Uchirua Titoa amin aatkun pujajme. Wi taja nuka amesha nunismek nekasampita tau asakmin, wi yajutmar-chayatnak: Ameka wina uchiruitme tajame. Yus ii Apaachiri, tura Jesucristo iin Uwemtikramratin aa nu amincha yainmakti. Tura pengker nintimsar angka pujustinasha suramsati tusan aminka aatjame.^a

Tito takatri pachis etserkamuri

⁵Wikia Yuse umirin ainau itiu pengkersha pujusarting tusan, ame nu chichamsha tenapkesam etserkata tusan, aminka Cretanam ukukmiajme, tura Cristonu ainau wainin chikich chikich yaktanmasha inaikata tusan ukukmiajme. ⁶Tura Cristonu ainau

wainunka pachisar chikich ainau: Pengke aintsuitai tiartinuitai. Tura kichik nuwentin artinuitai. Ni uchirisha Cristonu asar tunaanaka takachu, chichamnasha pengker umiu artinuitai. ⁷Cristonu ainau wainin ainauka Yuse aintsrin wainkarti tusar inaikiamu ainawai. Tura asar ni wakeramurin najantsuk, tura katuram nintimtsuk, wári kajechu nunia nampechu nunia maanichu artinuitai. Tura kuikiancha itiu nukapsha achiktajak tuuka nintimtsuk pujusartinuitai. ⁸Tura aints irastas winamtaisha, pengker nintimtusar: Juni wayaata tiartinuitai. Tura pengker aa nunaka mash wakerin artinuitai. Tura pengke nintintin asar, Yusnaka pengker awajartinuitai, tura ni wakeramurinka nepetkartinuitai. ⁹Tura nekas chichaman nuimiarmaurinka kajinmatsuk nuiniartartinuitai. Tura chikich ainaun nekas chichaman nuininau asar, pengker nintimtikartinuitai. Tura Yuse chichamenka nekaschawaitai tinauncha nekasampita tiarat tusar nuiniartartinuitai.^b

¹⁰Yuse chichamen umirchauka judío aints ainamunmasha untsuri irunui. Nuka nangkamiar chichau asar aints ainaun anangkinawai. ¹¹Nu aints ainau chikicha jeen wayaawar, kuikian nukap achikiartas wakerinak, nu jeanam pujuinaun chichaman nekaschaun nuikiartinawai. Tura asaramtai nuka itatkataram tusam chicharkata.

a 1.4 (2.Cor. 8.23; Gál. 2.3) b 1.9 (1.Tim. 3.2-7)

¹²Nunia aints ni weari ainaun pachis chichaak: “Cretanmaya ainau mash wait chichamtin irunui. Tura yukartinua nunisarang ainawai. Takakmichu ainayat tuke yuj pujuinawai,” timiayi. ¹³⁻¹⁴Nu tamauka nekasaintai. Tura asamtai Cretanmaya ainau chicharkata: Judío ainau aujmatinamunka pachischarti. Tura nekas chichaman nakitin ainia nuna chichamenka antukcharti, antsu tuke Criston nekasampita tiarti tusam chicharkata.

¹⁵Pengke nintintin ainauka Yus ni nintin japiramu asar, mash aa nuna pachisar pengker nintiminawai. Antsu Yusen nekasampita tichau ainauka pasé nintintin asar, ni nintimaurisha tuke paseetai. Tura Yusen umirchau asar, pengker aa nunaka nintiminatsui. ¹⁶Nuka nangkamiar Yusnawaitjai tinayat, pengker aa nunaka turuwartatkamawar tujjintinawai. Tura tunaarintin asar, Yusnaka nakitin ainawai. Tura asar tsuutmai ainawai.

Pengker nuikiartamu pachis etserkamu

2 ¹Uchiru, chicham pengker nuikiartakum amesha tuke etserkata. Antsu Yus tachamuka etserkaip. ²Juun ainausha tu nuiniarta: Nuka nampechu tura nakurichu pengker nintintin artinuitai. Tura Yusen nekasampita tusar pengker umirin tura aneenin artinuitai. Tura itiurkachmin pujuinaksha nepetin artinuitai tusam, juun ainauka tu nuiniarta. ³Tura nuwa juuntach ainausha ujakarta: Yus umirkuram pengker pujustaram. Tura chikich ainau tsanum-rairap, tura nampekairap. Antsu chikich ainau pengker pujusarti tusaram atumsha pengker pujustaram tusam ujakarta. ⁴Tura yamaram aishrintin ainauka: Aishrumsha tura uchirmesha aneetaram tusaram nuiniartaram. ⁵Tura waurtsuk pengker nintimin ataram. Tura atumi

jeen pujuinauka pengker wainkataram. Tura chikich ainausha wait anentrataram. Tura aishrumsha umirin ataram tusam ujakarta. Nuwa tu pujuinamtaikia, chikich aints ainausha Yuse chichamen pachisarka: Paseetai tichartinuitai.

⁶Nunia natsa ainausha ujaakum: Waurtsuk pujustaram tita. ⁷Uchiru, amesha pengke aints akumningkia, chikich aints irunusha ame pengker turamurmin waitmakar amin pachitmasar: Pengkerapi pujawa turamartinuitai. Tura nuiniakum, pengker nintimsam nakurutsuk pujusam aints ainauka nuiniarta. ⁸Nu turakminka atumin kajertamin ainauka: Nekas chichaman nuikiartinawai tusar, natsaarar atumin pachitmasar pasé chichamnaka chichaschartinuitai.

⁹Inati ainausha ujakta: Inatmin pengker umirkataram. Tura ni wakeramuri mash umirkuram aitsuk pujustaram. ¹⁰Tura kasamkairap. Antsu pengké kasamtsuk pujusrum inatmin miatrusrumek umirkataram tusam chicharkata. Nu turakminka chikich aints ainau nu aintsu inatiri nekas pengker pujaun wainkar: Yus iin uwentikramratnu chichame nekas pengkerapita tiartinuitai.

¹¹Yus aints ainautinka wait anentraramu asa, mash uwentikramratas wakerutmaji. ¹²Yuska iin wait anentraramu asa, tunau aa nuka mash inaisataram tusa, tura ju nungkanam pasé aa nuka wakerutsuk asataram tusa, antsu pengker nintimsaram ju nungkanam pujusrum, paan nintimsaram tuke Yus umirkuram pujustaram tusa iinka nuitamji. ¹³Ii Yusri nekas juun aa nu, tura Jesucristo iin Uwentikramratin aa nuna tatin kintari jeati tusaram, pengker nintimsaram wara warat nakastaram. Ni wantinkatniuri nekas pengker atinuitai. ¹⁴Cristo iin tunaanumia uwentikramratas tura ii tunaarin mash sakturmartas: Wina

aintsur ataram tusa, tura nekasrum pengker aa nuke turataram tusa ningki wakerak jarutramkamiaji.^c

¹⁵Uchiru, wi taja nuka amesha nunismek nuiniarta. Tura Yuse kakarmarijai ju chichamka aints ainau nintimtikrarta. Tura natsaamtsuk chicharkarta. Nunia aints ainau wína pachisar pasé chichartukarai tusam pengker pujusta.

Cristonu ainau umirmaurin pachis timiauri

3 ¹Uchiru, Cristonu ainau apu chichamen umikiarti tusam nintimtikrarta: Nu umirkurmeka nekasrum pengker pujustinuitrume. Nu turakrum pengker aa nuka mash takakmastinuitrume tita. ²Tura chikich ainaun pachisar pasé chichatsuk asarti tusam chicharkarta. Tura tsanumnaisuk, tura kajernaisuk, antsu mash aints ainaujai pengker nintimtinisur pujusarti tusam nintimtikrarta.

³Isha yaanchuikia nintinchau ayaji. Turasha Yus umirchau ayaji. Tura iwianchi inatiri asar, ii wakeramuring nuke nintimsar pujuyaji. Tura pasé takau ayaji. Tura chikich ainaujaisha suwirpiaku jiiisar pujuyaji. Tura asar tsuutnain ayaji. Tura chikich ainaujai pe kajernain ayaji. ⁴Antsu Yus iin Uwentikramratnuka mash aints ainautincha wait anentramak anenmau asa, ni anengkraitairin nekamtikramamiaji. ⁵Ii pengker turamuka atsau wainiat, Yuska iin wait anentramak uwentikramramiaji. Yuse Wakani ii nintin pujurtamu asa, entsanam nijarmawa nunisrik yamaram akiinawaitji. Tura asar pujut yamaram jukimiaji.^d

⁶Jesucristo iin uwentikramrau asamtai, Yuska ni Wakanin tuke iijai pujustinun

iincha suritramtsuk akupturmakmiaji.

⁷Tura iincha pengker awajtamak: Atumka Wijai pujustaram tusa, atumi tunaaringkia mash sakaruitai turammiaji. Tura tuke pujustiniun suramsatnua nuke iikia nakaji.

⁸Wi taja nuka nekasaintai. Tura asamtai Yusnau ainau pengker aa nuna takasarti tusam, tuke kajinmatsuk ju chichamka etserkata tusan wakerajai. Tura ju chichamka pengker asamtai, aints ainau mash juna wakerukartinuitai.

⁹Antsu aints ainau nangkamiar nintimtsuk chichainamunmaka pachinkaip. Tura yaanchuik juuntan pachisar nangkamiar aujmatinamtaisha nunisha pachinkaip. Tura jiyaniamunmasha pachinkaip. Tura Moisésa aarmaurin pachisar nangkamiar chichainamtaisha nunisha pachinkaip. Aints nangkamiar chichaina nuka pengker pujustinaka yaingkratinatsui.

¹⁰Aints Cristonu ainau kanakar pujusarti tusar nintimtikinamtaikia nu aintska chicharkata. Tura antinachmataisha ataksha chicharkata. Antsu pengké tujinkam, nu aintska iruntramunmaya jiiikim akupkata. ¹¹Nu aintska nekas chichamnaka inaisaru asar tuke pasé pujuinawai. Tura ningkikia: Tunaawitjai tumamtsuk pujuinawainiat, nu aints ainauka ningki wiasmamkartin ainawai tusam paan nekaamnawaitme.

Aints ainaun pachis chicham akuptukmauri

¹²Wisha Artemasan akuptuktasan nintimjai. Niin akupachunka Tiquicon akuptuktatjame. Ni jeamtai, amesha wári wína ingkunkatasam Nicópolis yaktanam winita. Yumanch winamtaikia, nuni pujuschatjash tu nintimjai.^e ¹³Papin

nekau Zenas naartin Yuse chichame
 etserin Apolosjai tsanias jeamtai, nu
 jimiar aints yaingta. Tura yuumatsuk
 wekaasarti tusam yuumamurisha
 susarta.^{f 14}Cristonu ainau nangkamiar
 pujusarai, tura chikich ainauncha
 pengker awajsarti, tura yuuminaun
 yaingtinasha nuimiararti tusan wakerajai.

Yus yainmakarti timiauri

¹⁵Wina irutkamur mash amin pengker
 pujusta tusar chichaman akupturmina-
 wai. Cristonu ainau iin anenminak
 pujuina nu pengker pujustaram tita.
 Atumnasha mash Yus yainmakarti.
 Maaketai.

Pablo Filemónkan Papin Akuptukmauri

Chicham akuptukmauri

¹Wiitjai Pabloitjai. Cristo Jesúsá inatiri asan, kársernum achikmau pujajai. Tura ii yachí Timoteosha wijai pujawai. Yatsur Filemónka, ame wijai metek Yuse takatri takakmin asam, iinu aneetiri yachiinme. Tura asakmin ju papin amin aatjame. ²Tura Cristonu ainau Yuse chichamen antukartas ami jeemin iruninauncha ju papin aaran akuptinajai. Tura ii umajin Apian, tura ii yachí Arquipon, iijai tsaniasar Yuse takatrin kakarman takakmasaru asaramtai, ju papin aaran akuptinajai. ^a ³Ii Apaachiri Yus tura ii Apuri Jesucristo atumin yainmakarti tusan, tura pengker nintimsar angkan pujustinasha suramsarti.

Filemónka wait anengkratairi

⁴⁻⁵Yatsuru, amesha ii Apuri Jesús nekasampita tinu asakmin, tura Cristonu ainausha aneau asakmin, wikia amin nintimsan wina Yusrun seaknasha tuke maaketai tajai. ⁶Tura wi Yusen seakun, chikich aints ainau ami chichamin antukar nekasar Yusen nintimsar pujusarti tusan seajai. Tura Cristo iin pengker awajtamsamijai nu mash nekamtikramati tusan Yusnaka seajai. ⁷Yatsuru, Cristonu ainau aneau asakmin wisha waraajai. Tura Cristonu ainau pengker nintimtikrau asakmin, wisha pengker nintimsan pujajai.

Pablo Onésimon pachis Filemónkan seamuri

⁸⁻¹⁰Wikia Cristo akupkamu asan, wi wakeraknaka: Nu turata timinuitjame. Antsu wi amin aneau asan, nunaka tajame: Wikia juuntach asan, tura Cristo Jesúsá inatiri asan, kársernum engkeamu pujau asan: Onésimo wait anentrata tusan seajme. Wi kársernum pujai, Onésimo juni taa, wi etsermaurun antuku asa, yamaikia Cristonuitai. Tura asa winia uchirua nunisketai.

¹¹Onésimo yaanchuikkia aminu inatiram ayat tupikiakmiyai. Tura asa amincha yainmakhamiayi. Antsu yamaikia wína yaintak pujawai. Tura asa amincha yainmaktinuitai. ¹²Tura yamaikia awangtuktatjame. Ameka wína wait anentrau asam, Onésimo wiya nunismek jeemin jukita. ¹³Wi Yusnum uwemratin chichaman etseru asan kársernum pujamtai, tura ameka arák pujau asam, winaka yainkachmin asakmin, nuka wini pujus yainkati tusan wakerimjai. ¹⁴Antsu amin ujatskeka nunaka turachmin nintimrajai. Turamtai ame wakerakmeka, amek nintimsam wait anentrakmeka: Ni amincha yainmakti tusam, Onésimoka ataksha winaka akupturkatnuitme. ¹⁵Onésimo yamaikia amijai tuke pujustin asa, jumchik kinta amincha ukurmakchamasha tu nintimsan pujajai. ¹⁶Antsu wína inatiruitai tuuka

a 1.2 (Col. 4.17)

yamaikia nintimsaip. Antsu yamaikia nuna nangkamasang wína aneamur yatsuruitme tu nintimtusta. Wisha junaka nukap aneajai. Antsu ami inatiram asamtai, tura yamaikia Yusnau asamtai, wína nangkatusmek amesha nukap aneetnuitme.

¹⁷Ameka nekasam wína yatsur akumka, wína anenme nunismek jusha ami jeemin jukita. ¹⁸Turakum tunau turamuri amataisha, akirkata tutsuk antsu wína tukumrukta. ¹⁹Turakmin nekasam akiktatjame tusan, wína uwejrui juna aarjai. Antsu ameka wína etsermaur antuku asam, tura pujut nangkankashtin jukin asakmin, tuke tumashitme timin ayatun wikia nunaka tatsujme. ²⁰Yatsuru, ame ii Apuri Cristonu asam, wait aneamur pengker nintimsam Onésimo jeemin jukim nintir waramtikrusta.

²¹Wi taja nunaka mash miatrusang umiktatui tusan, amincha aatkun pujajme. Tura wi seajme nuna nangkasmek nekasam umiktatme tusan amincha nekajme. ²²Nuniasha tajame: Atum wína Yus seatrau asakrumin, atumin wi winitnuncha Yus tsangkatruk-tatui tu nintimjai. Tura asamtai wi ani jean, pujustinur iwiarturata.

Yus yainmakarti timiauri

²³Epafras, Cristo Jesúsna asa, wijai kársernum engkeamu puja nusha: Pengker pujusti tusa chichaman akuptur-mawai.^b ²⁴Tura Marcoscha, tura Aristarcoscha, tura Demascha, tura Lucascha, wína takatrun yaintin ainia nusha: Pengker pujusti tusar amincha chichaman akupturminawai.^c

²⁵Ii Apuri Jesucristo atumniasha yainmakarti. Maaketai.

Hebreos Ainamunam Papin Akupkamuri

Yus ni Uchirijai iin chichartamkamuri

1 ¹Yus yaanchuikia ni chichame etserin ainaun untsurin niish niish yaktanam wina chichamrun etserkarti tusar akupkamu asar, ii juuntri ainaun nekamtikiawarmiayi. ²Antsu ni chichamen etserin ainaun akupak umis, inangnamunam ni nekas Uchirin iin chichartamkat tusa akupturmakmiayi. Nu nangkamtaik ni Apaachiri mash nungkanam aa nuna najanmamtikiamiayi. Tura uchirin chicharak: Ame najanamu aa nu mash inau ata timiayi. ^a ³Ni uchiri nekas Yusea nunisketai. Yus pengker asamtai, ni uchirisha nekas pengkeraitai. Tura asa ni Uchirisha aya chichasang mash najanamiayi. Tura yamaisha ni kakarmarrijai mash nunisang ati tusa wainui. Tura aints ainauti tunaarin japitramratas jarutramkau asa, ni Apaachiri untsurinini apu keemtainum keemsamiayi.

Yuse Uchiri Yuse awemamurin nangkamasang juuntaitai

⁴Yuse Uchiringkia Yuse awemamuri nayaimpinam pujuinaun nangkamasketai. Nekas Yuse Uchiri asa, Yus ni Uchirin: Mash aa nuna apuri ati tusa inaikiamiayi.

⁵Yus ni awemamuri ainaunka:

“Ameka wina nekas uchiruitme, ju kintati wina kakarmarun suajme,”

pengké tichamiayi. Tura Yus ni awemamuri ainauncha:

“Wikia ni Apaachirinjai. Tura nuka wina Uchiruitai,” tichamiayi. Antsu Uchirinak Yus nunaka timiayi. ^b ⁶Tura Yuska nekas ni Uchirin kichik amia nuna ju nungkanam akupak: “Yuse awemamuri mash niin: Ameketme juuntam tiarti,” timiayi.

⁷Tura Yuse awemamuri ainaun pachis tu aarmawaitai:

“Yuse awemamuri ni inatiri asaramtai, Yus nasea nunisang akupawai. Tura ji kapawa nunisang akupawai.” ^c

⁸Antsu Yus ni uchirin chicharak:

“Ameka tuke Yus asam, aints ainau tuke mash inawaitme. Nekasam pengker inakratin asam, aints ainau pengker inawaitme.

⁹ Ameka pengker aa nuke aneau asam, tura tunau aa nuka nakitau asakmin, ami Yusrum chikich ainau nangkamasang aminka nukap waramtikramamiayi,” tu aarmawaitai. ^d

¹⁰Tura ataksha Yuse Uchirin pachis tu aarmawaitai:

“Apuru, nu nangkamtaik nungkasha tura nayaimpisha najanamiamame.

¹¹ Nuka mai mengkakartin ainawai, antsu Ameka tuke pujustinuitme. Nungkasha tura nayaimpisha

a 1.2 (Juan 1.1-3; Col. 1.15-17; 1.Juan 1.1; Apoc. 19.13) b 1.5 (Sal. 2.7) c 1.7 (Sal. 104.4) d 1.9 (Sal. 45.6-7)

tarach arut mamuawa nunisarang mengkakartinuitai.

- ¹² Tura tarachin pijinawa nunismek turatnuitme. Tarachia nunisang nayaimpisha, tura nungkasha yapajiatnuitme. Antsu ameka yapajmiamashtinuitme. Tura asam ami pujutrumka pengké nangkankashtinuitai,” tu aarma-waitai.^e

¹³Tura Yus ni awemamuri ainaun kichkisha:

“Wína untsurunini Apu keemtainum keesam nakarsata. Ami nema-sem ainaun nepetkan, amin umirtamkarti tusan susat-jame,”

pengké tichamiayi. Antsu ni Uchirinak nunaka timiayi.^f

¹⁴Yuse awemamuri nekasar Yuse inatiri ainawai. Tura aints ukunam uwemrartin ainauka wainkataram tusa, Yus ni awemamuri ainaunka akupawai.

Uwemratin chichamka nakitrashtinuitji

2 ¹Cristo Yuse awemamuri ainaun nuna nangkamasang juun asamtai, mengkakai tusa Yuse Uchiri pachisar antukmiaji nuka pengker umirkatnuitji. ²Yus yaanchuik ni awemamuri ainaun akupak: Wina chichamrun umirtukarti tusa akupkamiayi. Tura nu chichaman akatar akupkamia nunaka aints ainau umirtsuk pujuinau asaramtai, Yus nuna wainak Ni tímia nunisarang wait wajaktiniun susarmiayi. ³Tura asamtai Yuse Uchiri iin uwemtikramratas jarutramkau asamtai čnu chicham pachiachkurkia itiu uwemratjik? Nu nangkamtaik uwemtai chichaman etserkamia nuka ii Apurintai. Nunia ni chichamen antukaru ainauka nekasaintai tusa iincha ujatmakarmiaji. ⁴Tura asamtai aints

ainau Cristo chichamen nekaawarti tusa, Yus ni kakarmarijai aints wainchati takatnasha, tura aintska turachminnasha untsuri turamiayi. Tura Yuse Wakani Yus wakera nunisang ni kakarmarin, tura ni nekamtairincha aints ainautin kichik kichik suramsamiaji. Tura asamtai aints ainau ii Apuri chichamen pachisar nekasampita tiartinuitai.

Jesucristo ii yachiiya nunisang wajasmauri

⁵Yus ni awemamuri ainaun: Nungka ukunam atinua nu inartaram tichamiayi. Antsu ni Uchirinak: Mash aa nu inarta timiayi. Iikia ukunam nungka yamaram atin pachisar chichaaji. ⁶Tura David yaanchuik Yusen chicharak tu aarmiayi:

“Aintsti mianchau arincha, čwaruka timiatcha anengkratme? Aintsti jakartin arincha čwaruka timiat-cha nintimkartusmesha pujame?^g

- ⁷ Aints ainautikia yamaik jakatin asakrin, antsu ame awemamur-meka jakashtin asaramtai, aintstin nangkamasmek pengker najanamiame. Turayatam aintstinka amea tumau najakra-tau asam, timiá pengker awajkartusmiame. Tura mash najanamuram ainaun aints ainauti inararti tusam tsangkam-kamiame.

- ⁸ Tura mash najanamuram ainau aintsti ainautin umirkarmi tusam najanamiame.” David tu aarmiayi.^h

Tu aarmau asamtai, Yus mash najanamu ainauka niin umirkartinuitai. Turayatur yamaikia nuka waitsuji.

⁹Tura ii wainkamiayi nuka Jesúsayayi. Nuka aints wajasu asamtai, Yuse awemamuri ainau jumchik musach Jesúsán nangkamasarang juun wajasarmiayi.

Tura Yus aints ainautin timiá anenmau asa, Jesús jakati tusa wakerimiayi. Tura waitnas jarutramkau asamtai, yamaikia mash ainia nuna Apuri ati tusa, Yus Jesúsán inaikiamiayi.ⁱ

¹⁰Yus: Mash najanamu ainaun wína umirtukarti tusa wakerawai. Tura ni uchiri ainaun mash ni pujutirin nayaimpinam jearti tusa wakerawai. Tura asamtai ni Uchiri Jesús mash aints ainauti uwemtikramratin aa nuna waitkasar maawarti tusa, Yus tsangkamkamiayi. ¹¹Yuse Uchiri aints ainautin: Nekasrum tunaarinchau ataram tusa iin yainmaji. Tura asamtai Yusnum akiinau asakrin, ninu ainautinka Jesúska: Wína yatsur ainawai tusa natsantramatsji. ¹²Yaanchuik David nuna pachis tu armiiayi:

Jesús ni Apaachirin chicharak: “Wína yatsur ainaun amin pachisan ujaktinuitjai. Tura amin umirtamkaru ainaujai iruntran kantan kantamruatnuitjame,” timiayi.^j

¹³Nuniasha chikich Yuse chichame etserin aarmau nintimrarmi. Jesús iiya nunisang nintimias:

“Yusen pengker nintimtustajai,” timiayi.

Nunia ataksha:

“Yus ni uchiri ainaun wína surusmia nujai wikia juni pujajai,” timiayi.^k

Yuse chichame etserin Jesúsán pachis tu armiiayi.

¹⁴Aints ainauti namangtin tura numpentin ainiaji. Tura asamtai Jesús aints wajas, ni numpesha tura ni namangkesha iiya nunisang asa, Satanásan nepetkatas jarutramkamiayi. Satanás aints ainautin tuke jatan sukartawai. Tura wainiat Jesús jakau asa, Satanásan nepetkamiayi.^l

¹⁵Aints ainau achikmawa nunisarang tuke jatan shaminawai. Turayat Jesús jatan nepetkau asamtai, yamaikia ni umirkau ainautin jatan shamtsuk pujusarti tusa angkan awajtamsamaji.

¹⁶Tura Jesús Yuse awemamuri ainaun yaingtaj tusangka tachamiayi. Antsu ii Abraham wearai asakrin, mash aints ainautin yainmaktas tarutrammaji.

¹⁷Tura asa Jesús aintstia nunisang amiayi. Tura aints wajas iin wait anentra-mau asa, tura ni Apaachirin miatrusang umirkau asa, tura ni jakamurijai aintsti tunaarin sakturmaru asa, sacerdote juuntria nunisang iin pachitmas Yusen seatramji. ¹⁸Jesús ningki wait wajaku asa, tura Satanásjai nekapnaisau asa, yamaisha Satanás iin: Tunau turataram turamkurnisha, Jesús tuke inaitamtsuk iincha yainmaktinuitji.^m

Jesúska Moisésan nangkamasang juuntaitai

3 ¹Jesús nekasampita tinu ainautirmin, Yus winar ataram tusa, iin eatmakmaji tusaram, Jesús nekasrum nintimrataram. Jesúska nekas Yus akupkamuyayi. Tura ni aintsri ainautinka tuke yainmaktas, sacerdote apuria nunisang ni Apaachiri Yusen seatramji.

²Tura asamtai Yus ni Uchirin sacerdote apuria nunisang ni aintsri ainautin yaingkiarti tusa akupturmaku asa, Jesúska Moisésa nunisang ni Apaachirin miatrusang umirkauyayi. ³⁻⁴Yaanchuik Moisés pengker awajsarmaji nuna nangkamasrik Jesúska timiá pengker awajsatnuitji. Jea jeamin nintimrarmi. Jean jeamnuka jean nangkamasang pengkeraitai. Yus mash aa nuna najanau asa, aints jean jeamnua nunisketai. Tura Jesús Yuse Uchiri asa, Moisésan nangkamasang pengkeraitai. ⁵Turamtai

Moiséska Yuse inatiri asa, Yuse aintsri ainaun pengker wainuyayi. Tura ukunam atinua nuna pachis chichaman etsernu-yayi. ⁶Antsu Cristo Yuse Uchiri asa, Moisésan nangkamasang juuntaitai. Tura Cristo tuke inaitsuk Yuse aintsri ainautin waitmin asa, Cristonu ainauti Apurintai. Tura asamtai tuke inaitsuk Cristojai tsaniasar tuke nayaimpinam pujustatjiapi tusar, ni tatintri warasar nakakur pujakri-kia, Yuse jea tumawaitji.

Yuse uchiri ainautikia ayamsartin ainiaji

⁷Tura asamtai yaanchuik Yuse Wakani tu aamtikramiayi:

“Yamaikia Yuse timiauri antukrumka,

⁸nakitsuk pengker anturkataram.

Ii juuntri ainu yaanchuik aints atsamunam wekainayat, Yuse chichamen nakitrarmia nunis-rumka nakitraitap. ⁹Tura asamtai Yus ii juuntri ainaun chicharak: Atumi juuntri ainu wina pasé awajtinak kajtukarmiayi. Tura cuarenta (40) musach aintska turachmin turai waitinayat nakitruarmiayi.

¹⁰Tura asaramtai nu aints ainaun kajerkan: Nuka tuke nintinchawa nunisarang asar, wina chichamrun umirtutan nakitinawai timiajai. ¹¹Tura kajerkan chicham yapajiachminun chicharinakun: Wi Yus asan, pengke nungkanam tuke pujustinaka tsangkatkashtatjarme, timiajai. Yus timiayi.” Tu aarmawaitai.ⁿ

¹²Yatsur ainautiram, atumka pasé nintimsaram, Yus tuke iwiaaku puja nuna umirtan inaisai tusaram aneartaram.

¹³Tura asaram chikitirmesha tunau wajasai tusaram, tura Yus kajertukai tusaram, yamaisha Yus atumi tunaarin

tsangkutramratin asamtai, tuke kintajai metek pengker nintimtunisrum pujustaram. ¹⁴Nu nangkamtaik Cristo umirkur pujusmiaji nunisrik tuke metar umirkur-kia, Nijai tuke tsaniasar pujustinuitji.

¹⁵Tura asamtai Yuse chichame tu aarmawaitai:

“Yamaikia Yuse timiauri antukrumka,

nakitsuk pengker anturkataram.

Ii juuntri yaanchuik aints

atsamunam wekainayat, Yuse

chichamen nakitrarmia nunis-

rumka nakitraitap,” tu

aarmawaitai.^o

¹⁶Turamtai Yuse chichamen antinayat,

¿Yusen kajerkan: Waketkimi tiarmia

nusha yaa aintsua armiai? Ii juuntri

ainu Moisés Egiptonmaya jikmia nu

aints armiai. ¹⁷Tura cuarenta (40)

musach Yusen umirinachu asar, Yusen

napchau nintimtikrarmiayi. Tura nu aints

ainu tunau turinachu asar, aints atsamu-

nam kajingkiarmiayi. ¹⁸Tura chichaman

yapajiachminun Yus chichaak: “Wikia

nekas Yus asan, pengke nungkanam tuke

wijai angkan pujustinaka pengké

tsangkatkashtatjarme.” Niin umirinachun

nunaka timiayi.^p ¹⁹Tura asamtai nu aints

ainauka Yusen nekasampita tinachu asar,

Yusjai pengker pujustinumka jeatatkama-

war tujinkarmiayi. Nuka paan

nekaamnawaitji.

4 ¹Tura asamtai Yus: “Pengker nintimsaram wijai angkan pujustinuitrume,” iin turamu wainiatrumek, Yusnum ayamsatnun nuwakai tusaram aneartaram.

²Yaanchuik nu aints ainaun Yusnum uwemratin chichaman ujakarmia nunisang iincha ujatmakarmiaji. Antsu nu aints ainauka nu chichaman antukaru ainayat, Yusen nintimtinachu asar uwemrarcharmiayi. ³Antsu iikia ni

chichame nintimtau asar, Yusjai angkan Nijai pengker pujusartin ainiaji. Antsu nu chichaman nintimtinachu ainaun pachis Yus chichaak:

“Wi Yus asan kajerkaran chicham yapajiachminun chicharinakun: Wi Yus asan, pengke nungkanam tuke pujustinnaka tsangkatkash-tatjarme timiajai,” timiayi.^q

Ii juuntri ainaun pachis tu aarmau wainiat, Yus nu nangkamtaik mash najana umis, angkan pengker nintimias ayamsamiayi. ⁴Ayamtai kinta pachis tu aarmawaitai:

“Yus seis (6) kinta mash aa nunaka najana umis, nunia tsawaar ayamsamiayi.”^r

⁵Nuniasha tu aarmawaitai: Yus chichaak: “Wijai tuke ayamsatnunka tsangkatkash-tatjarme,” timiayi.^s

⁶Yuse chichame tu aarmau asamtai, aints Yusnum wayaawaru ainauka tuke ayamratin ainawai. Antsu Yusnum yaanchuik uwemratin chichaman antukarmia nuka nu chichamnasha umirkacharu asar Yusnum jeacharmiayi. ⁷⁻⁸Tura asamtai Josué ii yaanchuik juuntri ainaun pengke nungkanam jeeniar, nuni ayamtikrawaitmataikia, Yus ataksha: Chikich kintati angkan pengker nintimsaram tuke ayamsatnuitrume tichau ayi, antsu nukap arus Yus Davidtan tu aarta tusa, ju chichamnaka aamtikramiayi:

“Yamaikia Yuse chichame antukrumka, nakitsuk pengker antuktaram.” Tu aarmau asamtai ¿nu chicham warina takua tawa? tusar nekaawarmi. Yus ataksha chikich ayamtai kinta ati tusa tsangkamkamiayi. Nu kintaka yamai pujaji juwaitai. ^t⁹Tura asamtai Yus mash najana umis, pengker nintimias pujumia

nunisrik iisha Yuse uchiri asar, angkan pengker nintimsar yamaikia pujustinuitji.

¹⁰Aints Yusjai pengker pujustas, Yus ayamramia nunisang ni takatrin inais ayamratnuitai. ¹¹Tura asamtai iisha nekasar Yus pujamunam jearmi tusar, Yus pengker nintimtusar kakaram wajastinuitji. Ii weari ainau yaanchuik Yuse chichamen umirkacharu asar, pengke nungkanam jearchamia nunisrik pujusai tusar, angkan pengker nintimsar Yusek umirkaru armi.

¹²Yus tuke iwiaaku asa, ni chichamesha timiá pengkeraitai, tura timiá kakarmaitai. Saapi yantari mai ere tsakamua nuna nangkamasang Yuse chichame timiá pengkeraitai. Tura asa aintsu nintin waya, ni nintimaurincha mash, tura ni wakeramurincha mash tu awai tusa paan nekantikui. ^u ¹³Tura Yus mash nekau asamtai, Ni najanamu ainautikia pengké kichkisha anumrukchamin ainiaji. Antsu Yus wainmaka mash misuya nunisrik ainiaji. Tura asamtai ii turamuringkia mash Yus ujaktinuitji.

Jesúska junia sacerdote apuria nunisketai

¹⁴Jesús Yuse Uchiri ni Apaachiri pujamunam nayaimpinam wakетки, aintsti tunaarin sakturat tusa, sacerdote apuria nunisang iin pachitmas tuke Yusen seatramji. Tura asamtai tuke inaitsuk Jesúska nekasampita tiarmi. ¹⁵Tura asamtai iwianch Jesúsán: Tunau turata tamaitiat, Jesús tunaunaka pengké turachmiayi. Iwianch iincha tunau turata turamkurnisha, Jesús yumtin pujamun-cha mash nekau asa, iincha wait anentramak tuke yainmaji. Tura asa junia sacerdote juuntri nangkamasang Jesús iin tuke wait anentramaji. ^v ¹⁶Yus tuke iin wait anentramrau asamtai, iikia pengker

nintimsar natsaantsuk Yuska searmi. Tura ii tunaarin sakturmarti tusar, tura itiurkachmin pujakrincha, iin yainmakti tusar Yuska searmi.

5 ¹Sacerdote apuri aints ainaun pachis Yusen seatit tusar, kichkimsar kichkimsar Israel ainamunam inain armiayi. Nuka Yusen seak: Aints ainau tunaarin tsangkurat tusa Yusen seatnuyayi. Tura tangku ainaun maa Yusen suyayi. ²Sacerdote apuringkia aints asar, tura aints itiurkachmin pujuinaun nekau asar, nekachu ainaun tura mengkakarua ainauncha wait anentin armiayi. ³Tura niisha tunaarinchau pujutan tujintinau asar: Wina tunaarun Yus tsangku trurat tusar, tura chikich ainauncha tunaarin tsangkurat tusar, Yusen seartas tangku ainaun maawar Yusen su armiayi.

⁴Tura aints ningki nintimias: Wikia sacerdote apuri wajastaj tichamnawaitai. Antsu Yusek: Nu ati tusa inaikiatnuitai. Tura asa Aarónkan: Sacerdote apuri ati tusa, Yus ningki inaikiamiayi. ⁵Tura asamtai Cristo: Wikia sacerdote juuntri atajai, ningki nintimsangka tichamiayi. Antsu Yus chicharak:

“Ameka wina nekas Uchiruitme. Ju kintati wina kakarmarun suajme,”

ni Uchirinak tu tinu asa, Yus ningki wakerak pengker awajas: Sacerdote apuria nunismek ata tusa inaikiamiayi. ^x ⁶Tura chikich aarmausha nuwaitai. Yus ni uchirin chicharak:

“Melquisedec nuwá eemak sacerdote amia nunismek ameka tuke sacerdote atinuitme,” timiayi. ^y

⁷Cristo ju nungkanam aints wajas, wake mesek juutkamaikiak ni Apaachirin seamiai. Tura seam Yus ni Uchiri

seamun antuk kakamtikramiayi. Nunia Yuse wakeramurin miatrusang umirkau asamtai, jakamunmaya inankimiayi. ^z

⁸Jesús Yuse Uchiri ayat, aintsua nunisang wait wajayayi. Tura wait wajau asa, ni Apaachirin umirtan nuimiarmiayi. ⁴ ⁹Tura pengké tunaarinchautiat waitnas jakau asa, niin umirnak pujuinaun: Wijai tuke nayaimpinam pujusarti tusa uwemtikramiayi. ¹⁰Tura asamtai Yus ni uchirin chicharak: “Melquisedec sacerdote juuntri amia nunismek tuke sacerdote juuntri atinuitme,” tusa inaikiamiayi.

Jesúsán umirtan inaisai tusaram aneartaram

¹¹Nu Melquisedec naartinun pachisan chichaman untsuri atumin ujakminuitjarme. Turayatrum atumi kuwishi jampekua nunisrumek pujau asakrumin, yamaikia atumin ujakatkamana yuumatajruma. ¹²Atumka Yuse chichame mash untsuri musach antuku asaram, chikich ainau nuiniartinuitruma. Turayatrum nu nangkamtaik chicham yumtichu kakarmachu jukitin aa nunaka ataksha nuiturat tusaram yuumarme. Tura asaram uchi kuwiria tumawaitruma. Kuwirach yutan yuwatatkama yumatau asa muntsunak muntsuyi. ¹³Tura Yuse chichamen antukartatkama yuumatinauka muntsun muntsuawa nunisarang ainawai. ¹⁴Antsu nampuaru ainauka yutancha yu ainawai. Nampuaru ainauka yutan yuwinawa nunisarang Criston miatrusarang umirinauka pengkernasha tura tunaunasha paan nekainawai. ^b

6 ¹Tura asamtai nampuarua nunisrik chikich yamaram chicham nuimiaru armu. Tura nu nangkamtaik Cristo pachisar yanchuk nuimiaru asar, nuka

ataksha nuimiarchatnuitji. Nu nangkam-taik nuimiarmiaji nuka nuwaitai: iikia jakawa nunisrik pujaw asar, ii nintimauri yapajiar, Yus nekasampita tinu asar, Yuse uchiri ainiaji. ²Nuniasha maaitin nekaatnusha, tura aintsu muuken achikiar Yus seatin nekaatnusha, tura jakamunmaya nantaktin nekaatnusha, tura ji kajintrashtinum wait wajaktin nekaatnusha yanchuk mash nekaamiarme. ³Tura asakrumin Yus wakeramtaikia, nuna nangkamasrik chikich chicham nuikiarturtinuitji.

⁴Tura aints Yus nintimtikramu asa, nusha chichaak: Wikia nayaimpinam Jesúsjai pujustasan wakerajai tayat, tura Yuse Wakani ni nintin engkemau wainiat, ⁵Yuse chichamen antuku asa, nuka pengkerapita tayat, tura Yus ni kakarmar-jai wainchatu takatan turamu nekatay, ⁶nunia: Jesúsán tuke ajapajai tinu asa, nuka Yuse Uchiri Jesúsán numi winangmaunum jirujai jintak maawa nunisang nintimui. Tura asa nu aintska aints antinamunam wishiak: Wikia tuke Jesúsán ajapajai tusa, Yuse Uchirin inatsaru asa, ataksha ni nintimaurin yapajiatatkama pengké tujintawai. Tura asamtai Jesús tuke ajapawairam tusan nunaka tajarme. ⁷Yus ajan chuprat tusa yumin jitumtikui. Tura aja takau ainaw yutanchara yuwaarti tusa, árak araamu pengker tsapait tusa, Yus nungkanka pengker awajui. ⁸Antsu chikich aja jangkisha, tura narasha nukap tsapau asamtai, nakitakur inaiyaji. Tura asamtai Yusen umirinaunka péngke aja nunisang Yuska pengker awajui. Antsu Yuse chichamen antinayat, Jesúsán tuke ajapajai tinawau yumingkramu ainawai. Tura jangkisha, tura narasha tsapawa nunisarang ji kajintrashtinum ajapatin ainawai.

Tuke inaitsuk Yusek umirkarmi

⁹Aneetir ainautiram, wikia tu chichaa-yatnak, atumin pengker nintimtakun: Nekasrum Cristonu asaram uwemratnuitrume tajarme. ¹⁰Turamtai atum Yus aneau asaram, Cristonu ainaw tuke yaingmiarme. Turin asaram yamaisha tuke yayaarme. Tura asakrumin, Yus pengker asa atumi takatrinka kajinmatramtsui. ¹¹Tura asamtai iwiaaku pujakrum, tuke inaitsuk pengker nintimsaram Yuska umirkataram. Tu pujakrumka nunia jakarmesha atumka mash tuke Yusnum ayamsamnuram tusar iisha wakeraji. ¹²Naki wajasairam tusan nunasha tajarme. Yuska chichaak: “Nayaimpinam wijai tuke ayamsatnuitrume,” timiau asar, Yusnau ainaw tuke Yusen nekasampita tusar, nunia jakar nayaimpinam ayamsartas wearmia nunisrumek atumsha ayamsamnuram tusar wakeraji.

¹³Tura asamtai Yus Abrahaman chicham yapajiachminun chicharak: “Wikia ami wearmin nukap arusan yujratnuitjai. Wikia Yus asan nekasam tajame,” timiayi. Yusen nangkamasang kichkisha pengké atsau asamtai ningki tumamiayi. ¹⁴Tura Abrahaman chicharak: “Amin nekasam pengker nintimtajme. Tura asan nekasam pengker awajatsat-jame. Tura asan nukap arusan ami wearmin timiá unturi yujratnuitjai,” timiayi.^c ¹⁵Yus timiau asa, Abraham nekas jaimias nakau asa, Yus timia nunaka nukap arus wainkamiayi. ¹⁶Aints ainauti chicham nekaatasar ¿waitratsuash? takurin, nekas waitratsjai tiartas: Yusjai tajai tinawai. Yus aints ainautin nuna nangkamasang juun asa, tura aintsu nintimaurin mash nekau asamtai, aints ainaw nuna tuke tu weenawai. Tu tinu

asar nuniangka ¿waitratsuash? tamauka atsawai. ¹⁷Tura asamtai Yus chichaak: “Nekas chichamrun pengké yapajiashtinuitjai tusan, aints ainau nuna nekaawarti tusan: Wikia Yus asan nekas an tajai,” timiayi. ¹⁸Tura Yus pengké waitchau asa: “Wi turatatjai,” tímia nu chichamnaka yapajiashtinuitai. Tura: “Wikia Yus asan nekas an tajai,” tímia nu chichamnasha nunisang yapajiashtinuitai. Tura asamtai Cristonu ainautikia Yus seakur: Uwemtikrurta tinu asar, pengker nintimsar shamtsuk: Yus waitchau asa, Ni tímia nunaka nekas umiktatuapi titinuitji. Tura uwemrau asar, Yusnum jear iikia ayamsatnuitji titinuitji. ¹⁹Yuse chichame pengké yapajiachmin asamtai, tura Yuscha pengké waitchau asamtai, iikia nekasar Yuse timiauri nintimsar: Jesús nayaimpinam pujau asamtai, iisha Jesúsnum achitkau asar, iincha ajaprana ukurmatsji tusar nekaatnuitji. ²⁰Jesús jintan jintamua nunisang ii pujustinun umistas, nunia iin juramkitin asa, nayaimpinam eemak wemiayi. Tura Melquisedec, yaanchuik sacerdote apuri amia nuka, Abrahaman pachis Yusen seaya nunisang Jesúscha iin pachitmas Yusen tuke seatramji.

Jesús Melquisedeca nunisang sacerdote wajasmauri

7 ¹Nu Melquisedec Salem yakta apuri ayayi. Nusha sacerdote asa, Yus nayaimpinam puja nuna umirnuyayi. Tura asamtai iinu yaanchuik juuntri Abraham ni aintsri ainaujai chikich nungkanmaya apu ainaun nepetak nunia waketki Melquisedecjai ingkiunik, Melquisedec Abrahaman Yus yainmakti tusa pengker awajsamiayi. ²Tura Abraham apu ainaun nepetak warinchu-

rin cien (100) jurukin asa, diezan (10) Melquisedecan susamiayi. Melquisedeca naari iiti chichamejaingkia: Pengker inakratin taku tawai. Tura asa ni yaktari Salem inaikiamuyayi. Nuka Angkan pengker pujuti taku tawai. Tura Melquisedec Salema apuri asa, Angkan pengker pujuti apuri taku tawai. ^d ³Ni aparisha, tura ni nukurisha, tura ni weari ainausha yáki tusar nekaachminuitji. ¿Tura warutik akiinaya? tura ¿nekasash jakaya? tusarsha nekaachminuitji. Tura jakamuri nekachu asar, tuke jakachua nunisrik nintimratnuitji. Tura Yuse Uchiri tuke aints ainau pachis sacerdotea nunisang Yusen seau asamtai, Yuse Uchirisha Melquisedeca nunisketai.

⁴⁻⁵Melquisedec timiá juun amia nu nintimrataram. Ii juuntri Abraham apu ainaun nepetkau asa, ni warinchurin jurukin asa, diez (10) Yusnau amia nunaka Melquisedecan susamiayi. Moisés chichaman akupak: “Leví weari ainau sacerdote takatrin takau asar, Yusnau aa nunaka chikich Israel ainamunmaya jukiarti,” timiayi. Tura Leví Abrahama weari waininayat, Israel ainau ni kuikiarincha, tura ni tangkurincha, tura ni ajanmaya juukmaurincha cien (100) amatai, diez (10) Yusnau asamtai, nunaka Leví weari ainaun su armiaiyi. ⁶Tura asamtai Melquisedec Leví wearinchu ayat, Yusnau aa nuna jukimiayi. Turamtai Yus Abrahaman chicharak: “Amin pengker nintimtajme. Tura asamtai nukap arusan ami wearam wína aintsur artin asaramtai, nayaimpinam yaa unturi iruna nunisnak unturi yujrartinuitjai. Tura ami wearam ainaun pengker awajsau asamtai, chikich nungkanmaya ainau ami wearmincha pengker awasartinuitai,” tu timaitiat, Abraham Melquisedecan pachis Yusen

seatchamiayi. Antsu Melquisedec Abrahaman pachis Yusen seatmiayi.

⁷Tura Melquisedec Abrahaman pachis Yusen seau asamtai, Abrahaman nangkamasang juuntaitai tusar paan

nekaatnuitji. ⁸Nuniasha Leví weari ainau Yusnau aa nuna jukiariat mash jakatin armiyai. Antsu Melquisedeca jakamiayi tu aarchamuitai. Tura asamtai tuke iwiiaakua nunisrik nintimratnuitji.

⁹⁻¹⁰Tura Leví akiintsang, Abraham Melquisedecjai ingkiunik Yusnau aa nuna susau asamtai, tura Leví Abrahama tirangki asamtai, Melquisedeca Leví nangkamasang juuntaitai. Tura Leví weari ainau sacerdote asar, Yusnau aa nuna Israel ainamunmaya jukiaru wainiat, ii yaanchuik juuntri Abraham nuwá eemak Yusnau aa nuna Melquisedecan susau asamtai, Melquisedec chikich sacerdote ainaun nangkamasang juuntaitai.

¹¹Israel ainau Yusen umirkarti tusa, Moisés Leví weari ainaun tuke sacerdote arti tusa inaikiamiayi. Yus nuná eemak Moisésan: Yachim Aarón sacerdote juuntri ati tusa chichaman akuptukmiayi. Tura asamtai nu sacerdote takatrijai tunaun nekas sakarminuitmatikia, nuniangka chikich sacerdotekia Aarónka wearinchuka inaikiachminuyayi. Turayat Jesús tuke pujau asamtai, Yus Jesús an chikich sacerdote Melquisedeca tumaun tuke nayaimpinam sacerdote ati tusa inaikiamiayi. ¹²Yus sacerdote ainaun yapajiamtaikia, nuniasha Moisés umirkatin chichamsha yapajiamnawaitai.

¹³⁻¹⁴Warina pachisna taja nuka paan nekaataram: Ii Apuri Jesús Leví wearinchutiat Israela chikich uchiri, Judá naartinu wearintai. Tura Yus Moisésan: Judá weari sacerdote arti tichamiayi. Tu tichau asamtai, Judá weari ainau sacerdote archamiayi. Tura Judá weari ainau sacerdote takatrin takakmichu

armiyai. Tura asamtai Moisés umirkatin chichamsha yapajiamnawaitai.

¹⁵Tura ii Apuri Jesús tuke puja nu Melquisedec naartinaun nunisang sacerdote asa, chikich sacerdote ainaujai pengké metekchawaitai tusar iisha paan nekaji. ¹⁶⁻¹⁷Moisés: Judá weari sacerdote arti tichamiayi. Antsu Jesús Judá weari wainiat Yus ni uchirin chicharak:

“Melquisedec nuwá eemak sacerdote amia nunismek ameka tuke sacerdote atinuitme,” timiayi.

Tu aarmau asamtai, Jesús jakayat, Yuse kakarmarijai nantakin asa, tura tuke iwiiaaku pujau asa, sacerdotea nunisang pujawai. ¹⁸⁻¹⁹Iikia Moisés umirkatin chichaman sacerdoten pachis akupturmakmia nu umirkur pujayatrik tuuka uwemrachmin ayaji. Tura asakrin Jesúska ni aintsri ainautin tunaarin sakturmaru asa, yamaikia nayaimpinam pujus aints ainautin pachitmas ni Apaachirin seatramji. Tura asamtai iikia nayaimpinam pujustatjapi tusar Yus seatnuitji. Tura asar Jesúsnu ainautikia sacerdote ainau: Yus seatrita yamaikia tatsuji.

²⁰⁻²¹Tura chicham yapajiamnunun Yus chichaak: “Wikia Yus asan, nekas an tajai: Wína uchir nekas sacerdote tuke atinuitai,” timiayi. Tura junia sacerdote ainau jakartin asaramtai, nuna pachiska tichamiayi. Antsu David tu aarmiyai:

Chicham yapajiamnunun Yus ni uchirin chicharak: “Wína nintimaurun yapajiashtatjai. Tura wi Yus asan nekas an tajame: Ameka tuke sacerdote atinuitme,” timiayi.

²²Tu timiau asamtai Jesús junia sacerdote nangkamasang juuntaitai tai. Jesús iin uwentikramratas jarutramkau asa, yamaram chichaman akupak: “Wína nekasampita takurmeka, nayaimpinam tuke wijai pujustinuitrume,” tusa chichaman akupturmakmiayi nu chicham

nekasar umiktinuitji. ²³Yaanchuik sacerdoté ainau jakaar, ni takatrin inaisaramtai chikichnasha inain armiaiyi. Tura asar untsuri armiaiyi. ²⁴Antsu Jesúska tuke jakashtin asa, ni takatrin kichnaka ukurkishtinuitai. ²⁵Tura tuke iwiaaku asa, ni Apaachirin iin pachitmas seatramu asamtai, aintsti Jesús seakur Yus chichartusta takurningkia, yamaisha tuke uwemtikramratnuitji.

²⁶Tura Jesús tuke iwiaaku pujau asa, sacerdoté apuri yuumaji nuka nuwaitai. Niisha pengké tunaarinchau asa nekas pengkeraitai. Tura tunau ainaujai pujatsui, antsu nayaimpinam Yusjai tuke pujawai. ²⁷Jesúska chikich sacerdoté apuria nuniska atsui. Junia sacerdoté apuri ainau kintajai metek tangkun Yusen susartas main armiaiyi. Turinau asar Yus ni tunaarin tura chikich aints ainau tunaarin tsangkurat tusar seu armiaiyi. Antsu Jesúska pengké tunaarinchautiat, mash aints ainautin tunaarin tsangkutramratas ningki wakerau asa, kichik jatanak jarutramkamiaji. ²⁸Moisés aints ainau tunaarintin ainau wainiat, tura jakartin ainau wainiat, sacerdoté apuri arti tusa inaikiamiyai. Antsu ukunam untsuri musach nangkamaramtai, Yus chicham yapajiachminun ni uchirin pachis chichaak: “Wi Yus asan nekasamang tajai: Uchir pengké tunaarinchau asa, tura tuke iwiaaku asa, tuke sacerdoté apuri ati,” tusa uchirin inaikiamiyai.

Jesús yamaram chichaman itamuri

8 ¹Wi taja nuka nintimraru armi. Jesús chikich sacerdoté apuri nangkamasang juun asa, nayaimpinam ni Apaachiri Yuse untsurinini pujus, iin pachitmas sacerdoté apuria nunisang ni Apaachirin seatramji. ²Tura aints ainauka Yus seatai juun jea tarach jeamkamunam Yusen

seau armiaiyi. Antsu Jesúska nayaimpinam iin pachitmas ni Apaachiri Yusen seatramji.

³Tura aints ainau chichainak: Yus tunaarun tsangkuturut tusar, tangkurin itaaramtai, sacerdoté apuri Yusen susartas tangkurin main armiaiyi. Antsu Jesúska aintsti tunaarin tsangkutramratas tangku ainaunka maachmiyai, antsu ningki wakerak jarutramkamiaji. ⁴Junia sacerdoté ainau tuke Moisés tímia nunisarang tangku ainaun Yusen susartas epeu armiaiyi. Antsu Jesús Leví wearinchu asa, ju nungkanmaka sacerdoté takatrin takaschamnauyayi. Antsu nayaimpinam pujus, sacerdoté nunisang iin pachitmas Yusen seatramji. ⁵Yus yaanchuik Moisésan nayaimpinam iruna nuna inaktus chicharak: “Ju muranam wainkame nu mash nunismek turata,” tusa akupkamu asa, Yus tímia nunisarang sacerdoté ainau jea tarach najanamunam aints ainau pachisar Yusen seatin armiaiyi. Turinau asaramtai Yus ukunam nayaimpinam ni Uchiri turatiun aints ainau nekamtikiatas wakerimiyaie.

⁶Jesús iin uwemtikramrau asa, junia sacerdoté ainau nangkamasang nukap nangkamakuitai. Tura asa aintsti tunaarin ii Apaachiri Yus tuke sakturti, Jesús tinu asamtai, yamaram chicham ukunam atiniun pachis iin chichartamji nuka arut chichaman Moisés akupkamia nuna nangkamasketai.

⁷Tura asamtai yaanchuik chichaman ii juuntri ainau umirkarti tusa, Moisés akupkamia nu umirkur uwemramnawaitmatikia, Yuska Jesúsán pachis yamaram chichaman akupkachminuyayi. ⁸Antsu nu aints ainau pengker pujuinachun wainu asa, yaanchuik Yuse chichame etserin nu aints ainau pachis tu aarmiaiyi:

li Apuri chichaak: “Ukunam chikich kinta jeamtai, wikia Israela weari ainaujai tura Judá weari ainaujai yamaram chichaman najanatnuitjai. ⁹Atumi juuntri yaanchuik pujú ainaun: Wijai wekaasataram tusan, Egipto nungkanmaya jiikiaran, wína chichamrun umirtukarti tusan, chichaman najanamiaja nunisnaka ataksha nu chichamnaka najanashtinuitjai. Wikia Moisésan chicharkun: Wína chichamrun aints ainau umirtukarti tusan timiaja nunaka tuke umikchau asaramtai, wikia ni juuntri ainaunka pachischamiajai,” Yus tawai. ¹⁰Tura ataksha Yus chichaak: “Musach untsuri nangkamaramtai, Israel ainaujai yamaram chichaman najatatatja nuka nuwaitai: Wína umirtuktin chichaman mash ni nintin paan nekamtikiawartinuitjai. Tura asan ni Yusri atinuitjai. Tura asamtai niisha wína aintsur artinuitai. ¹¹Tura mash wína nintimturinau asar, kichik kichik aints ni weari ainauncha tura ni nungkarin puju ainauncha: Yus tu awai tusarka pengké nuiniarchartinuitai. Tura wína aintsur ainausha mash, uchi ainausha, tura juun ainausha, tura mianchau ainausha, tura apu ainausha winaka nekarawartinuitai. ¹²Tura wína aintsur ainaun wait anentin asan, ni tunaarinka mash sakturan kajinmatkitnuitjai,” Yus timiayi. Tu aarmawaitai.^f

¹³Yus yamaram chichamrun najanatattjai tinu asamtai, arut chicham umirkatataka-

maram tujintau asakrumin, nu arut chichaman Moisés najanamia nuka yamaikia mengkatanak wajasi.

Yus seatai juun jea pachis nuikiartamu

9 ¹Yamaikia arut chichaman Moisés ii juuntri ainaun: Mash umirkataram tusa najanamia nuka tura Yus seatai juun jea tarach najanamunam Yusen searmia nuka yamaikia nintimrarmi. ²⁻³Yus seatai juun jea japen tesaamuyayi. Nekatkauka Pengker Tesaamu tutai ayayi. Nuni ji keemati kuri najanamu ayayi. Tura Yus inaktustin pang misanam patasmau ayayi. Tura tarachjai tesaamu nitkarin Yus timiá pengker aa nuna pujutiri inaikiamu ayayi.^g ⁴Nu tarach nenaamu ayaamas misa kurijai imairamu kungkuti kapartin kentsamu ayayi. Tura kaju juun numi najanamu yantamencha, tura nitkarinini-sha kuri nujtukmau ayayi. Nu kaju nitkarin muits tiuupich kuri najanamu ayayi. Nuni yutai nayaimpinmaya akupkamu, maná tutain engkeu armiai. Nunia Aarónka wairi kukaru wainiat, Yus tsapamtikmia nuna nuni engkeu armiai.

Nunia kaya tauwa tumau Yus umirkatin chichaman Moisésan aatramia nuna nuni engkeu armiai.^h ⁵Tura nu kaju tuntupen Yuse ayamtairi kuri najanamu ayayi. Tura Yuse paaniuri nuni wantinkatin asamtai, tura aints ainau tunaarin nuni tsangkuratin asamtai, Yuse awemamuri nanamtiniun kuri najanamun jimiar kentsamu armiai. Tura ni nanapejai Yuse ayamtairin nukú armiai. Antsu nuka mash nekau asakrumin, nuna pachisnaka yamaikia aatrashtatjarne.

⁶Nunia Yus seatai juun jean tarachin jeamkar umisar, sacerdote ainau kintajai metek tesaamu pengker tutainum wayaawar, waring achat mash wainkar, nunia aints ainaun pachisar Yusen seatin

armiyai. ⁷Antsu chikich tesaamunam, Yus nekas pengker pujamuri asamtai, musachjai metek sacerdote apuri ningki aya kichik kintanak waainuyayi. Tura ni tunaarinchau tura chikich aints ainau tunaarinchau Yus tsangkurat tusa, tangku numpen Yuse ayamtairin uwijmiartas waainuyayi. ⁸Sacerdote apuri ningki Yus timiá pengker aa nuna pujutirin wain asamtai, chikich ainautikia nuningkia wayaachminuyaji. Tura asar arut chichaman aints ainau Moisés umirkataram tusa akupkamia nuka umiriatrik, Yusjai tsaniasar iruntrachminuyaji. Aints ainautiram Yus seatai jea nitkarinka pengké wayaachminuitrume tusa, iinka Yuse Wakani nekamtikramamijai. ⁹Tura asamtai yamai pujuinautisha nuna taku tawai tusar mash nintimratnuitji. Aints Yusen susartas tangkurin main ainayat: Wína tunaarunka Yus kajinmaki pujawapi, tuuka nintimrachmin armiyai. ¹⁰Yus Moisésan chichaman akuptak yuta ainaun pachis, tura umoti ainauncha pachis, tura ii namangke nijaamartinasha pachis tímia nuna umirkaru ainayat, aintsti nintimauri yapajiachmin asamtai, Yus wína tunaarunka kajinmaki pujawapi tuuka nintimrachmin armiyai. Antsu Yusek ii nintimaurin yapajiamnawaitai.

¹¹Antsu Cristo taa, sacerdote apuria nunisang wajas, ukunam atiniun pachis yamaram chichaman ujatmakmijai. Niisha Yuse jeen aints jeamkachmaunum pujus ni takatrin takaawai. Nu jeaka ju nungkanmayanchuitai. ¹²Tura Cristo chipu numpen takuska, tura waaka uchiri numpen takuska, Yus seatai juun jeanam aints jeamkamunmaka wayaachmiyai. Antsu kichik kinta ningki wakerak numparu asa, aintstin tuke uwemtikramratas jarutramak nayaimpinam wemiayi. ¹³Nekasar chipuncha, tura waaka uchirin-

cha maawar, nuna numpejai aintsu namangken patatkenak peashmatramu asar, tura waakan maawar, namangken epeawar, yukuu yumijai pachimrar nujai aints ainaunka peashmatin armiyai. ¹⁴Antsu Cristo numpe ii tunaarin nekas sakarminuitai. Ni Wakani jakachminutiat Cristo pengké tunaarinchau ayat ningki wakerak, iin uwemtikramratas jarutramak numparmiyai. Tura asa ii tunaarinchau nekas japitramratnuitji. Tura asamtai Cristonu ainautikia: Nekasampi wína tunaarunka sakturawaita titinuitji. Tu tinu asar, Yus nayaimpinam puja nuka pengker nintimtusar angkan umirkamnatnuitji.

¹⁵Tura asamtai Cristo Yusnumia taa, yamaram chichaman najanamiyai. Moisésa chichamejaingkia Yus iinu tunaarinka tsangkutramrachmin asamtai, Cristo jaka ii tunaarin tuke akiimiatramkatas jarutramkamijai. Tura mash aintstin uwemtikramrau asa, Cristo: Nayaimpinam wijai tuke pujusmintrum tinu asamtai, nekasar nijai tuke pujustinuitji. ¹⁶Aints jatsuk pujus papin aar: Wi jakamtai aints ainau wina armaaurun ukunam jiisar nekaawarti tusa ukuu armiyai. ¹⁷Antsu nu aints iwiiaaku pujamtaikia, ni armauringkia umirkash-tinuitji. Antsu ni jakamtai: Wi wakeraja nuka umirtuktaram tusa aarmia nuka miatrusrik umirkatnuitji. ¹⁸Yus yaanchuik Moisésan umirkatin chichaman akuptak: Atumka wína seatkuram: Tunaar japitruurta tusaram, tangku numpe ukartaram timiyai. ¹⁹Moisés Yus umirkatin chicham mash umirkataram tusa aints ainaun ujakmiyai. Tura nuna umis, waaka uchirin maa tura chipuncha maa, numpen juki yumijai pachimiar, uwija ure kapantin amia nuna engkea, Yuse armaaurincha, tura aints

ainauncha mash nupaa hisopo tutaikai peashmarmiayi. ²⁰Tura chichaak: “Ju numpajai Yus chichaman najanamia nu umikminuitrume” timiayi. ²¹Tura Yus seatai juun jea nitkarincha mash nu numpajai Moisés peashmarmiayi. ²²Yus Moisésan chichaman akuptuku asamtai, tuke mash Yuse jeen amia nunasha numpajai peashmatin armiayi. Tura numpachujaingkia tunauka pengké sakarchamnawaitai.

Cristo jakamurijai tunauka sakarminuitai

²³⁻²⁴Tura asamtai Yus yaanchuik Moisésan akatar akupak: Mash najanata timiaja nuka tangku numpejai peashmarta tinu asamtai, sacerdote ainau miatrusarang umirin armiayi. Antsu Cristo ii tunaarin tuuka sakarchamin asamtai, ii tunaarin japitramratas, Yus seatai juun jeanam aints jeamkarmia nuningkia wayaachmiayi. Antsu iin pachitmas ni Apaachirin tuke seatramtas Yus pujamunam nayaimpinam wemiayi. ²⁵⁻²⁶Sacerdote apuri musachjai metek Yus seatai juun jea nitkarin wayaatin kinta jeamtai, tangku numpen yarak takus waiinuyayi. Antsu sacerdote apuringkia numparchamiayi. Antsu Cristoka ningki numparu asa, tangku numpen yarak takuska nayaimpinmaka jeachmiayi. Tura asamtai nu nangkamtaiknumia aints ainau tuke tunaarintin asaramtai, Yus aints ainau tunaarin sakartas uchirin musachjai metek waitnas jakati tichamiayi. Antsu arut chicham amukatin kinta jeamtai, Jesús aints wajas ningki wakerak: “Aints ainau tunaarin mash sakturtaj,” tusa waitnas jarutramkamiaji. ²⁷Ii jakatin kinta jeamtai, aintstisha jakatin ainiaji. Antsu nuniangka pengké jakashtinuitji. Tura jaakrincha, Yus aintsti turamunka mash nekaatnuitai. ²⁸Cristo jakatin kintari jeau asamtai, aintsti tunaarin sakturmartas jarutramka-

miaji. Nuniangka ataksha pengké jakachminuitai. Tura aintsti tunaarin akiimiatramkataska ataksha wantinkash-tinuitai. Antsu ni uwemtikrurti tusar nakainaunka tuke nayaimpinam jukitas ataksha wantinkatnuitai.

10 ¹Yus: Wina uchir aints ainau tunaarin sakartinuitai, tu nintim-rau asamtai, yaanchuik Cristo akiintsang, Moisésan akatar akupak: Musachjai metek tuke inaitsuk sacerdote ainau wina seatinak: Ame aints ainau tunaari japirata tusar, tangku ainaun maawarti tusa akupkamiayi. Tura asamtai musachjai metek tuke inaitsuk nunaka turinayat, aints ainau: Wina tunaarunka tuke sakaruapita tichau armiayi. ²Tura aintsu tunaarin Yus sakarti tusar tangku numpejai tuke sakaruitmatikia, nuniangka tangkunka maacharmin armiayi. Aints Yusen seatas tangkun mau asamtai, ni tunaarin tuke sakarchau asaramtai, wina tunaarunka tuke sakaruapita tichamin armiayi. ³Antsu musachjai metek tangkun maawaru asar, aints ainau: Wina tunaaruka tuke sakarchawaitai, tu nintimrarti tusa Yus turataram tusa nu chichaman akupkamiayi. ⁴Tura asamtai waaka uchiri maarkia, tura chipusha maarkia, nuna numpejaingkia aintsti tunaaringkia tuke sakarchamnawaitji.

⁵⁻⁶Tura asamtai Jesús ju nungkanam taa ni Apaachirin chicharak:

“Aints ainau: Tunaar tsangukurtra tusar, tangku ainaun maawar wina surusarti tusamka ameka wakeratsme. Antsu: Aints ata turutin asakmin, nunia wi jakan aints ainau tunaarinka tuke sakturtinuitjai,” timiayi.

⁷Nuniangka Apaachirin chicharak:

“Yusru, wina pachitas papinum aarmawa nunisnak, ami wakera-murmin umiktasan taawitjai

timiajai,” Jesús timiayi. Tu aarmawaitai.^k

⁸Tu aarmau asamtai, nunaka taku tawai: Moisés chichaman akupkamu aing aints ainau: Yus wína tunaarun japitrurti tusar, tangkun maawar epeu armiai. Tura wainiat Jesús ukunam ni Apaachirin chicharak: “Tangku ainaun maawar wina surusarti tusamka ameka wakeratsme,” tímia nuka yamaikia aminka tuuka pengkerka awajtamsachartinuitai, taku tawai. ⁹Nunia Jesús ni Apaachirin chicharak: “Yusru, ami wakeramurmin umiktasan taawitjai,” tu tinu asamtai, nu nangkamtaik tangkun maawar, Yusen susartas epeu armia nuna yamaikia turashtinuitai, taku tawai. Antsu Uchir atumi tunaarin sakturmartas jakau asamtai, ni umirkataram Yus tawai. ¹⁰Tura asamtai Jesucristo kichik jatan jarutramkau asamtai, Yus iinka tunaarin-chawa nunisar pujarin jiirmaji.

¹¹Sacerdote ainau mash kintajai metek Yusen umirkartas tuke inaitsuk tangku ainaun Yusen susartas main armiai. Tura wainiatrik tuuka tunaarinchawa nunisrikia pujuschamawaitji. ¹²Antsu Jesucristoka kichik jatanak jarutramkau asa, nunia nayaimpinam Yuse untsurinini apu keemtainum keemsamiayi. ¹³Tura asa wína nemasur ainaun Yus nepetkati tusa, Jesús nuna nakak pujawai. ¹⁴Tura Cristo kichik jatanak jarutramak ni aintsri ainautin tunaarin tuke sakturmar-miaji. ¹⁵⁻¹⁶Turamtai Yuse Wakani Cristo umirkau ainautinka nunasha nekamtikramamiai. Nuna pachis tu aarmawaitai. Yus chichaak:

“Nukap arusan wína aintsur ainamunam yamaram chichaman najanatatja nuka nuwaitai: Wína umirtuktin chichamrun akupkan ni nintin engketawaran paan

nintimtikrartinuitjai. ¹⁷Yaanchuik wína chichamrun umikcharu pujuarmia nuna tunaarinka mash sakturu asan kajinmatkitnuitjai,” timiayi.^l

¹⁸Tura asamtai, Cristo aintsti tunaarin tuke sakturmaru asamtai yamaikia: Wína tunaarun Yus sakturati tusarkia, tangku Yus susatasrikia maachminuitji.

Yusnum jeamnawaitji timiauri

¹⁹Tura asamtai yatsur ainautiram umaarutirmesha, Jesús jarutramak numpe numparu asamtai, iikia shamtsuk tura tunauka nintimtsuk ii Apaachiri Yuska seatnuitji. ²⁰Jesús waitnas jarutramkau asa nunia nantaki, aints jintan jintamua nunisang ni Apaachiri pujamunam wakau asamtai, iikia yamaikia wayamnawaitji. ²¹Jesús tuke iwiaaku pujau asa, sacerdote apuria nunisang Yusnau ainautin pachitmas tuke Yusen seatramji. ²²Tura Cristo ii tunaarin japitramrau asamtai, yamaikia Yus aujkurkia, nekasar pengker nintimsar: Yus nekas anturtawapi tusar, sacerdote ainau Yusen aujsartas yumi pakuichaujai ni namangken nijararmia nunisrik tunauka nintimtsuk Yus aujsatnuitji. ²³Tura Yus tímia nunisang nekas umiktuapi tusar, tuke inaitsuk tu nintimsar Yuse chichame metawaru armí. ²⁴Tura chikich ainaujai nekasar aneenimi tusar, tura pengker awajnisami tusar yainiku aarmi. ²⁵Cristonu ainautikia irunat inaisashtinuitji. Chikich ainau inainam-taisha iikia tuke irunin armí. Tura irunkur kiakanirmi. Tura Cristo tatin kinta jeatak wajasu asamtai tuke inaitsuk iruntrarmi.

²⁶Iikia Yuse chichame nekas aa nuka nekayatur, nunia iik wakerakur Criston tuke ajapajai takurningkia, zyáki ataksha

ii tunaarin sakturmarat? Nu takurningkia ii tunaarinka Cristoka pengké sakturmarchatnuitji. ²⁷Antsu Cristo tuke ajapajai takurkia shamkatnuitji. Tu pujakrikia Yus ni nakitin ainaun kajerak ji kajintrashtinum japatnuitai tusar, napchau nintimsar nu kinta jeati tusar nakastinuitji. ²⁸Yaanchuik Moisésa chichamen umirtsuk pujuinamtai, aints jimiarichiksha, tura kampatmaksha nu aints pasé turamurin wainkar, apu ainau ujakrum turataram, Yus tinu asamtai, nu aintsun wait anentsuk kayajai tukuar main armiaiyi.

²⁹¿Atumka itiur nintimrume? Aints yaanchuik Criston nernatan nangkamayat nunia: Cristo pujut yamarman mash aints ainautin suramsatas jakau wainiat: Nangkami numparmiaiyi taunka, Yuse Wakani iin pengker awajtamsatas wakera nunaka pachis tsuutajai taunka, Yuse Uchirin tuke ajapajai taunka ¿Yus itiur wait wajaktinasha susashting? Moisésa chichamen umikcharun nangkamasang nu aints ainaunka wait wajaktiniun susartinuitai.^m ³⁰Yus chichaak: “Tunau ainaun wait wajaktiniun susatnunka wiitjai tura: Wína umirtutsuk pujuinaun yapajkiatnunka wiitjai,” timiaiyi. Nunia ataksha tu aarmawaitai: “Wína aintsur ainau tunaarin nekaratnuitjai,” Yus timiaiyi. ³¹Tura Yus tuke iwiaaku puja nuka niin umirtsuk pujuinaunka nekas wait wajaktiniun susartinuitai. Tura asamtai nuka shamrumtinuitai.

³²Antsu atumka yaanchuik Cristo umirkuram pujuyarme nuka kajinmatsuk tuke nintimin ataram. Cristo paan nintimrau asaram, atum nukap wait wajayatrumeck Cristo umirat inaisachmiarume. ³³Tura Cristonu asakrumin, aints ainau wainminamunam atumin pachitmasar pasé chichasarmiaiyi. Tura atumin pasé awajtamsarmiaiyi. Nunia

Cristonu ainaun pasé awajinamtai, atumsha wait anentakrum yaingmiarume. ³⁴Turakrum kársernum engkeamu ainaun wait anentakrum yaingmiarume. Tura chikich ainau atumin kajertaminak nangkamiar atumi warinchuri jurutramkiaru wainiatrumek, atumka wake mesetsuk atumi warinchuringkia nintimsuk warasrum: Iikia Cristonu asar, tura pujut nangkankashtin jukin asar, nuka ii wariri nangkamasang timiá pengkeraitai timiarume. ³⁵Tura asamtai Cristo umirkatnuka inaisairap. Antsu Cristo tímia nunaka nekasampi umiktatua tusaram, nayaimpinam nijai tuke pujustinuitume. ³⁶Tura Yuse wakeramuri najanatasrum, tura ni tímia nuka jukitasrum, wait wajayatrum jaimiasrum pujustinuitume. ³⁷Yuse chichame etserin yaanchuik tu aarmiaiyi. Yus chichaak:

“Jumchik arus taratata nuka nekas taratnuitai, tura ni tímia nunisang nekas taratnuitai.

³⁸ Antsu wína nekasampita turutin ainauka tuke iwiaaku pujusartin ainawai. Antsu wína umirtutan inaisar pujuinauka winaka waramtikruschartinuitai,” timiaiyi.ⁿ

³⁹Antsu iikia Yuska inaitaka nakitaji. Tura asar iikia mengkaakatniunmaka wechartin ainiaji. Tura Yus nekasampita tinu asar uwemmartin ainiaji.

Yus nekas nintimtustin

11 ¹Yus nekasampita takurkia, Yuska wainchayatrik nekas pujawapi taji. Turamtai Yus: Wisha atumin pengker awajsatatjarme, tímia nunaka nekasampi umiktatua taji. ²Ii juuntri ainau Yusen nekasampita tinau asar Yusen pengker awajsarmiaiyi.

³Nu nangkamtaik nungkasha, tura nayaimpisha, waring achat ii wainji

nunaka atsau wainiat, Yuska ningki nintimias aya chichasang mash najanamiayi. Nuka tu aarmau asamtai wainchayatrik nekasampita tinu asar nekaji.^o

⁴Adánka uchiri, Abel naartin, Yusen nekasampita tinu asa ni Yusen susamuri ni yachí Caín Yusen susamuri nangkamasang pengker amiayi. Tura asamtai Yuska Abelan pachis: Nuka pengkeraitai timiayi. Tura asamtai Abel yaanchuik jakau wainiatrik, Yusen nekasampita timiayi, tu nintimtusar pujaji.^p

⁵Ii juuntri Enoc Yusen nekasampita tinu asamtai, Yus nayaimpinam iwiakmiayi. Tura Yus niin jukin asamtai wainkacharmiayi. Tura asamtai Yuse chichame tu aarmawaitai: “Enoc nayaimpinam watsuk nungká pujusang Yusen pengker awajnuayi.”^q ⁶Tura asamtai Yus nekasampita tachakrikia çitiur Yuscha pengkersha awajsatjik? Iisha: Yusjai pujustasar wakeraji takurkia, Yus nekas pujawapi titinuitji. Tura: Wi Yusen nekasam eamtaikia, winaka nekasampi pengker awajtustatua, titinuitji.

⁷Yamaikia aints Noé naartin nintimrarmi. Yumi jitatsaing: Nujang nukap nujangkruatatui, Yus Noén timiau asa, Noésha Yusen nekasampita tusa, ni wearijai uwemrarmi tusar, kanu juuntan najanawarmiayi. Tura kanun takakmak pujus, tuke aints ainaun mash chicharak: “Yus aints ainautin amutmaktatui,” tusa ujakmiayi. Yusen nekasampita tinu asamtai, Yus Noén pachis: Nuka pengkeraitai timiayi.^r

⁸Yamaikia Abraham nintimrarmi. Yus Abrahaman chicharak: “Ami nungkarminia jiinkim, chikich nungkanam wi inaktustatjame nuni weta,” timiau asa

Abraham: Tuning wetaj tusa nekachiat: Yus nu nungkancha inaktursatatuapi tusa miatrusang umirkamiayi.^s ⁹Tura Yus nu nungkanam weta timiau asa, Yus akupkamaitiat nuni jea, Yusen nekasampita tusa, iraawa nunisang jea tarach najanamunam nu nungkanmasha ninuchua nunisang pujusmiayi. Tura Isaacsha, tura Jacobsha nunisarang jea tarach najanamunam pujuarmiayi.^t ¹⁰Abraham nintimias: Wikia jakanka, Yuse yaktarin nayaimpinam aints jeamkachmaunum, antsu Yus ningki najanamunam wayaatatjapi tusa nuni wekainuyayi.^u

¹¹Abrahama nuwari Sara juunchitiat, tura kaa ayat: Yus timia nunaka nekasampi umiktatua tinu asamtai, Yus uchin jurerti tusa kakarmarin susamiayi.^v

¹²Tura Abraham juuntach asa, uchin yajutmarchamin ayat, uchin yajutmaru asamtai, nukap arus Yus tímia nunisang nayaimpinam yaa ainia timiá unturi yujramiayi. Tura juun entsa yantamen yaikmiria nunisarang nekapmarchamin unturi yujramiayi.^w

¹³Tura nu aints ainu Yus tímia nuna umiatsaing Yusen nekasampita tukamai-kiak jakarmiayi. Tura Yus tímia nuna umikchau waininayat: Ii weari ainu ukunam nukap yujarartatuapi tusar warasarmiayi. Tura nintiminak: Iikia ju nungkanmaka iraawa nunisketji tiarmiayi. ¹⁴Aints tu chichainauka: Ii pujutiringkia juningkia atsawai tusar, chikich nungkan tuke pujustinun eainawai. Nuka paan nekaamnawaitji. ¹⁵Tura ni nungkarinia yaanchuik jiinkiarminia nuni waketkiartas wakerinakka, pachitsuk waketkiarmin armiayi. ¹⁶Antsu niisha chikich nungkan nayaimpinam atinua nunak nintimtiarmiayi. Tuminam-

tai Yus ni yaktarin iwiartur nakau asa: Wikia ni Yusrinjai tutanka natsaamatsui.

¹⁷Yus Abrahaman: Nukap yujratatjame tinu ayat nekapsatas: ¿Wína miatrusang umirtukchatpiash? tusa: “Uchiram maam nunia jinam epeam wína surusta,” tinu asamtai, Abraham Yusen nekasampita tusa, ni uchirin maatnun surimkachmiayi.

¹⁸Antsu Yus Abrahaman chicharak: “Isaaca wearin nukap yujratnuitjai,” tinu asamtai, ¹⁹Abraham: “Wi uchirin maamtaisha, Yus jakamunmaya ataksha inankitnuitai,” tu nintimramiayi. Tura asa Abraham Isaacan maachiat, nekas jakamunmaya nantaknua nunisang ni jeen jukimiayi.^x

²⁰Yusen nekasampita tinu asa, Isaac ni uchirin Jacobon nunia Esaúncha ukunam atiniun pachis: “Yuska nukap yujtamrartinuitai” timiayi.

²¹Jacob juuntach asa, wajjai wekaayat, Yusen tuke nekasampita tusa maaketai timiayi. Tura jakatniuri jeatak wajasam-tai, José uchirin jimiar amia nunaka ni tirangki asaramtai: “Yuska atumin pengker awajtamsarti,” timiayi.

²²Tura Josésa Yusen nekasampita tinu asa, ni jakatniuri jeatak wajasamtai chichaak: “Israela weari ainu juningkia tukeka pujuschartinuitai. Antsu nukap arus Egipto nungkanmaya jininak, wína ukunchrunka jukiar, Canaan nungkanam iwiartusarti,” tusa akatmamak timiayi.^y

²³Nukap arus Moisés akiinamtai, apu faraón tutai Israel ainaun chicharak: “Uchi aishmang yamai akiinauka entsanam ujungtaram,” tusa chichaman akupkau waininayat, Moisésa aparisha tura nukurisha Yusen nekasampita tinu asar, apunka shamkacharmiayi. Tura asar uchiri nekas shiiram asamtai, kompatam nantu uukarmiayi.^z

²⁴Tura faraónka nawantri Moisésan tsakatmarmaitiat, Moisés juunmar Yusen nekasampita tusa: “Faraónka nawantri uchirintai turutiarai tusan wikia nakitajai,” timiayi.^a ²⁵Tura asa Egipto nungkanam pengké yuumatsuk nakuru pujuutiat, nu aints ainu Yusen umirchau asaramtai, nujai tsanias pujutan nakitmiayi. Antsu Yuse aintsri ainujai metek wait wajaktas wakerimiayi. ²⁶Tura asamtai Cristonu ainaun waitkasarmia nunisang Moisésnasha waitkasarmiayi. Turinamaitiat Moisés: Nuka timiá pengkeraitai tusa: Ukunmaka nekasnapi Yusnum pengker pujustatja, tu nintimramiayi.

²⁷Tura Moisés Yusen nekasampita tusa, apu faraón kajeramaitiat shamkachmiayi. Tura Yusen wainchayat, Yusen wainua nunisang pengker nintimias Egiptonmaya jiiinkimiayi.^b

²⁸Moisés Yusen nekasampita tusa, Pascua fiesta kinta jeamtai, Israel ainaun akatar akupak: “Uwija numpejai jea waitiri yakartaram. Nu turachkurminkia, Yuse awemamuri atumi uchiri eemkaurin maatatui,” timiayi. Moisés tu tinu asamtai, Israel ainu miatrusarang umirkarmiayi.^c

²⁹Israel ainu Yusen nekasampita tusar, juun entsa kapantin tutain Yus tesaamtai, japen nungka mujurua nunisarang kukarak katingkiarmiayi. Tura Egiptonmaya ainausha nunisarang katingkiartakamawar juun entsan kijiakar mash kajingkiarmiayi.^d

³⁰Nunia nukap arus Israel ainu Yusen nekasampita tinu asar, siete (7) kinta yakat Jericó tutain tentakni wajainamtai, Yus wenuk wenukmarmaun yumpungmiayi. ³¹Tura kungkatip Rahab naartin Yusen nekasampita tusa, Israel aints

anangkan wekaatinaun shamtsuk ni jeen pujusarti tusa uukmiayi. Tura asa Yusen umirchau ainaujaingkia jakachmiayi.^e

³²Nuniasha Yusen nekasampita tinu ainauka untsuri puju armiai. Gedeónsha, tura Baracsha, tura Sansónsha, tura Jeftéssha, tura Davidcha, tura Samuelsha, chikich Yuse chichame etserin ainaujisha Yusen nekasampita tiarmiayi. Antsu nu aints ainaun pachisnaka kinta atsau asamtai aarchatajtai. ³³Nu aints ainu Yusen nekasampita tinu asar, chikich nungkanmaya ainaun nepetkarmiayi. Tura Yuse aintsri ainauncha pengker inararmiayi. Tura Yusen nekasampita tinu asaramtai, Yus niincha: Wikia atumin yaingtajarne timiayi. Chikich aints Yusen nekasampita tinu asamtai, juun yawaa niin yuwaarai tusa Yus jangkan epetkamiayi.^f ³⁴Nuniasha chikich ainu Yusen nekasampita tinu asar, jinun epewarmaitiat Yuse kakarmarijai uwemrarmiayi. Tura chikich ainaun saapijai maawartas wakerinamaitiat uwemrarmiayi. Tura chikich ainu kakaichau ainayat, kakaram wajasarmiayi. Tura chikich ainu ni nemase ainaun nepetkar papeekarmiayi. ³⁵Nuwa ainausha, ni uchirin jakaun inankimun wainkarmiayi.

Antsu chikich ainaun Yusen umirin asaramtai, wait wajaktinasha nukap susar maawarmiayi. Tura nu aints ainaun mainatsaing: Yusen umirkashtatjai takumningkia maashtatjame tinamaitiat, Yusen nekasampita tinu asar: Iikia jakarsha nayaimpinam pujustatji tusar jakarmiayi. ³⁶Chikich aints Yusen nekasampita tinu asaramtai wishikrar awatrarmiayi, tura jirujai jingkiawar kársernum engkewarmiayi.^g ³⁷Chikich aints Yusen nekasampita tinu asaramtai,

kayajai tukuar maawarmiayi. Tura chikicha namangkencha serúchjai charukar maawarmiayi. Chikich aints Yusen nekasampita tinu asaramtai saapijai maawarmiayi. Turinamtai chikich ainu entsatiri atsau asamtai, uwija nuwapencha, tura chipu nuwapencha kachumawarmiayi. Tura asar wait wajau armiai. Tura chikich ainauncha niin pasé awajin armiai. ³⁸Yusnu ainu aints atsamunam, tura muranmasha, tura waanmasha, tura nungka taimunmasha waingkiar kanin armiai, tura tuke wekain armiai. Nu nungkanmaya ainu nu aints ainaun pachisar: Nuka paseetai tinamaitiat, nu aints ainauka timiá pengker armiai.

³⁹Tura mash Yusen nekasampita tusar pengker awajsarmiayi. Antsu Yus: Wina aintsur ainaun susartatjai, tímia nunaka wainkacharmiayi. ⁴⁰Antsu Yus iincha nayaimpinam juramkitas wakerau asa, Yuse aintsri ainu yaanchuik jakaramtaisha, arumkeka jakamunmayanka inankichmiayi. Antsu nuka iijai metek jakamunmaya nantakiartinuitai, Yus tímia nuka iikia nukap arusar wainkartinuitji.

Jesús nintimsarmi

12 ¹Tura asamtai Yuse aintsri yaanchuik jakaru ainu timiá untsuri Yusen nekasampita tinu asaramtai, iikia nu aints turamurin nekau asar, iisha nunisrik Yuska umirkatnuitji. Tura iinu tunaaringkia waring achat mash inaisar, tuke inaitsuk jaimiasar Yuska umirkaru armi. ²Tura Jesús nintimraru aarmi. Ni aintsritin nangkamasang Yusen nekasampita timiayi. Tura: Wina nekasampita turutinaunka mash uwemtikratan jakatatjai tusa, numi

e 11.31 (Josué 2.1-21;6.22-25; Mat. 1.5; Sant. 2.25) f 11.33 (Dan. 6.22)

g 11.36 (Jer. 20.2)

winangmaunum natsanpiaku jakatniunka surimiakchamiayi. Tura ukunam nukap warastin asa jarutramkamiayi. Nunia jaka nantaki, nayaimpinam waketki ni Apaachiri untsurinini apu keemtainum keemsamiayi.^h

³Tura Jesúsna tunaarinchau waininayat tunau ainau maawarmiayi. Tura asamtai atumka napchau nintimsan pujusai tusaram, Jesúsna waitnasmauri nintimrau ataram. ⁴Turaram atumka tunau nepetkatasrum Jesús numparmia nunisrumka numparchamiarume, tura tunau nakitajai takurminkia mantama-charmiayi. ⁵⁻⁶Atum Yuse uchiri asakrumin: ¿Yus atumin turama nuka kajinmakrumek pujaram? Nu aarmauka nuwaitai:

“Ii Apuri ni uchirin aneau asa, pengke aints ati tusa wait wajaktiniun susatnuitai. Tura asamtai uchiru, Apuram amin wait wajaktiniun suramsamtaisha, nunaka nakitajai tutsuk asata, tura napchauka nintimsuk pujusta.” Tu aarmawaitai.ⁱ

⁷Atum Yuse uchiri asakrumin, Yus atumin: Miatrusrumek umirtuktaram tusa, wait wajaktiniun suramataisha, napchauka nintimsuk asataram. Uchi ni aparin umirtsuk pujam, ¿apari uchirin chichartsukek puja? Atsa. ⁸Antsu Yus ni uchiri ainaun mash chicharui. Yuscha atumin chichartamsuk pujamtaikia, atumka Yuse uchirin chuitrume, antsu chikicha uchiri arume. ⁹Nuniasha iinu apari ainau nintimrarmi. Ii uchi akurningkia, anturtukat tusar awatamin armiaji. Turutmakrin umirnuyaji. Tura asakrin ii Apaachiri Yus tuke pujustinun suramsatin asamtai ¿warukarik Yuska umirtsuksha pujustajik? ¹⁰Ii apari ainau ningki nintimsar: Anturtukarat tusar

jumchik kinta iin awatamin armiaji. Tura Yuska iincha pengker awajtamsatas wakerutmau asa, wiya nunisrumek tunaarinchau pujustaram tusa iin wait wajaktiniun suramji. ¹¹Antsu iikia wait wajaktin juwakrikia waraschamawaitji. Tura wake mesekar napchau nintimsar pujustinuitji. Tura wait wajakrishia, Yus iin nuitamratas wakera nuka nuimiaru asar, angka pengker nintimsar Yuska umirkatnuitji.^j

Yuse chichamen umirtan nakitajai tiirap

¹²⁻¹³Tura Yus: Miatrusrumek umirtuktaram tusa, atumin wait wajaktiniun akupturmaku asamtai, atumin Yus nuitamratas wakera nuka nuimiaru ataram. Tura tupnik nintimsaram, tuke inaitsuk Jesús umirkataram. Tura chikich ainausha Jesúsna umirtan inaisartas wakerinamtaisha: Mengkakai tusaram, atum chicharkuram: Atumsha Jesús umirkumeka mengkakashnuitrume tusaram kiakartaram.

¹⁴Atumi tunaari waring achat mash inaisaram Yuska umirkataram. Nuna turinachuka ii Apurinka jiischartinuitai. Tura asaramtai tuke angka pengker nintimtunisrum mash aints ainaujai maanitsuk pujustaram. ¹⁵Tura Yus atumin pengker awajtamsatas wakerutmau asamtai, kichkisha Yusen umirtan inaisai tusaram aneartaram. Aints Yusen umirtan inaisaruka chikich aints ainauncha niya nunisarang tunaun turumtikiatnuitai. Tura asamtai atumka tunau wajasai tusaram wainmamkataram. ¹⁶Tura Yusnau asaram tsanirmawairap. Nuniasha Yus atumin suramsatas wakera nunaka nakitajai, tii tusaram aneartaram. Isaaca uchiri eemkauri, Esaú naartin nunaka turamiayi. Tura Yus niin ukunam susatas wakerimia nuna kichik yuta

yuwamujai yapajiamiyi.^k ¹⁷Nuniasha Esaú jumchik arus atak nintimiar juutmiayi. Tura aparin Isaacan juutkamaikiak seam, apari ayaak: “Ameka Yusjai tajai timiame nuka yapajiachminuitme,” timiayi. Atumka nusha nekarme.^l

¹⁸Atumka Cristonu asaram, Israel ainau yaanchuik mura Sinaí tutainum jearmia nunisrumka atsurme. Nu muranam ji keemiayi. Tura asa mukunit tee wajasmiai. Tura nashesha kakaram nasenmiayi. ¹⁹⁻²⁰Turamtai Yuse pupuntri kakarman pupuntramun Israel ainau antukarmiayi. Tura chichamnasha antukarmiayi. Chikich chichamsha Yus akupkama nuka nuwaitai: “Aintcha, tura tangkusha kichkisha ju muranam wekaamtaikia, kayajai tura nangkijaiasha maatarame,” tu timiaú asamtai, nu chichaman antukar shaminak Moisésan chicharinak: “Wait aneasam, amek Yuse chichame antukta. Antsu Yuska ijai chichatsuk asati,” jakai tusar tiarmiayi. ²¹Tinamtai Moisés ji keaun wainak, tura mukuntuuncha wainak kuraimiayi. Tura chichaak: “Wikia timiá shamau asan kuraajai,” timiayi.

²²⁻²³Antsu atumka Cristonu asaram, yaanchuik Jerusalén yaktanam Sión muranmasha Yusen seartas wearmia nunisrumka nintimtsurme. Antsu yamaikia Yus nayaimpinam tuke iwiaaku pujau asamtai Yusek tuke seamnawaitrume. Nayaimpinmaka Yuse awemamuri nekapmarchamin irunui. Nuningkia Yuse aintsri naari nayaimpinam aatrarmau ainawai. Tura Yuse umirkaru jakaru ainau wakani pengké tunaarinchau asar nuni ayaminawai. Tura nuningkia mash aints ainau turamurin nekamtikin aa nu pujawai. Nuka Yusetai. ²⁴Nunia Jesús yamaram chichaman najatramamiji

nuka nuni pujawai. Nuka ni numpe numparmia nujai: Wijai nayaimpinam pujusmintrum tímia nunaka mash umikuitai. Tura asamtai Abela numpe nintimrarmi. Abela numpengka aintsu tunaarinka kichkisha sakarchamnauyayi. Antsu Jesúska aintsti tunaarin mash sakturmartas jaka numparu asa, ni numpengka Abela numpen nangkama-sang pengkeraitai.^m

²⁵Tura asamtai wainkataram. Atumin chichartama nuka Jesúsketai. Ni chichame antutsuk pujusairap. Moisés ju nungkanam pujai, Yus mash umirkataram tusa, chichaman najanau asamtai, aints ainau nu chichamnasha umirtsuk pujuarmia nuka uwemrarmiai. Antsu Yus ni Uchirin nayaimpinmaya akupkau asamtai únuna chichame umirtsuk pujakrikia itiur uwemratjik? ²⁶Yaanchuik Yus ii juuntri ainan muranam chichaamtai, uuya tumaun nungkan muchkiamiayi. Antsu Yuse chichame eterin nukap arus atiniun pachis tu aarmiayi. Yus chichaak: “Wikia ataksha nungkan uuya nunisnak muchkiatnuitjai. Antsu nungkankeka muchkiashtinuitjai. Antsu nungkanmasha, tura nayaimpinmasha aa nunaka mash muchratnuitjai,” timiayi. ²⁷Ataksha muchratnuitjai, tímia nunaka: Mash najanamiaja nunaka mesratnuitjai, antsu muchkiashtin aa nunaka mesrashtinuitjai, taku timiayi. ⁿ ²⁸⁻²⁹Ii Yusri ji kapawa tumau asa, ni umirin ainautin inatmartinu pujutiri muchkiashtin asamtai, Yuska tuke maaketai tusar, pengker awajkur tunau wajasai tusar tuke umirkarmi.^o

¿Itiur Yus pengker awajsatnuitji?

13 ¹Atumka Cristonu asaram, tuke inaitsuk aneenitaram. ²Irau taamtaisha, wainchau ayatrumek pengker

awajsataram. Nuka kajinmakirap. Yaanchuik Yuse awemamuri iraaak taamtai, Yuse umirin ainau: Nuka Yuse awemamurintai tusar, nekainachiat pengker awajarmiayi.^p

³Kársernum pujuinausha kajinmatsuk wait anentratarum. Tura atum nijai kársernum engkeamua nunisrumek pengker nintimtusrum pengker awajsatarum. Tura chikich aints wait wajainamtaisha atumsha: Nu aintsua nunisnak wisha wait wajaktinuapitja tusaram wait anentratarum.^q

⁴Nuwa nuwatnaiyamuka pengkeraitai. Aints ni nuwarijai tsaning kanurtincha pengkeraitai. Antsu nuwatnaikiaru ainauka kichnaka eakchartinuitai. Tura asaramtai nuwa nuwatchayat tsanirmin ainaunka Yus wait wajaktiniun susatnuitai.

⁵Yuska iin chichartamak: “Amincha pengké inaisashtatjame. Tura amincha ajapan ukukchatajtame,” turammiaji. Tu turamin asamtai, kuik aneetsuk asataram. Tura atum tákkrume nuka pachisrum maaketai tusaram, kuik nukapka wakerutsuk asataram.^r ⁶Yus tu turamin asamtai, iisha pengker nintimsar:

“Ii Apuri wína yaintu asamtai, ¿aints turutawartata nunasha warukanak shamkataj?” timinuitji.^s

⁷Tura asakrin atumin Yuse chichamen ujatminak pujusarmia nuka nintimratarum. Nu aints ainauka Criston nekasampita tusar, atumin Yuse chichamen ujatmakaru asar, ni Criston nintimsar pujuarmia nunisrumek atumsha pujustaram.

⁸Jesucristoka tuke iwiaaku asa, yaanchuiksha tura yamaisha tuke yapajimiamsui. ⁹Chikich ainau ningki

nintimsarang atumin nuitamrartas wakerinamtaisha, nuna chichamengka anturkairap. Yus iincha pengker awajtamsatas ii nintincha kakamtikram-ratnuitji. Antsu aints yuta pachisar nuikiartinak: “Nu yuta yutsuk pujakrumka, Yuska pengker awajsatarume,” tinayat nunaka nangkamiar tinawai.

¹⁰⁻¹¹Yaanchuik sacerdote ainau tunaarintin ainau tangkurin Yusen susartas maawarmia nuna namangken yuchau armiayi. Sacerdote apuri tangkun maa, numpen yarak takus, Yus seatai juun jea nitkarin waiinuyayi. Nunia Yus aintsu tunaarin japirat tusa tangkun maawar, namangken yakta aarin jiiikiar epeu armiayi. Antsu Jesúska ii tunaarin sakturmartas jarutramkau asamtai, iikia Jesús seau asar, tangkun Yusen susartas main armia nuka pachiamsi.^t ¹²Tura tangku ainaun yakta aari jiiikiarmia nunisarang Jesúsna sha yakta aarin jiiikiar maawarmiayi. Tura asamtai aintsti tunaarin sakturmartas, Jesús jarutramak numpencha numparmiayi. ¹³Tura asamtai chikich ainau iin nakitraminak, tura wishikraminak pujuinamtaisha, Jesúsna sha nunisarang nakitrarmiayi tusar Jesús nintimraru armi. ¹⁴Ju nungkaka mash amukatin asamtai, juningkia tukeka pujuschatnuitji. Antsu Yuse pujutirin ukunmaka pujustinuapitji tu nintimraru armi. ¹⁵Yamaikia tangku ainau Yus susatasrikia maashtinuitji. Tura asar iin uwemtikramrau asamtai, tuke inaitsuk Jesús nintimtusar, ii jangkejai Yus juuntaitai tusar maaketai tiarmi.^u ¹⁶Nuniasha chikich ainau pengker awajsatarum. Tura yuuminak pujuinausha yuumamuri susatarum. Nuka

p 13.2 (Gén. 18.1-8;19.1-3; Rom. 12.13; 1.Ped. 4.9) q 13.3 (Mat. 25.36)

r 13.5 (1.Tim. 6.6-10; Fil. 4.10-13) s 13.6 (Sal. 56.3-4,11) t 13.10 (Lev. 16.27)

u 13.15 (Sal. 50.13-14,23)

kajinmakirap. Nu turakrumka Yus pengker awajrume.

¹⁷Yusnau ainau juuntri umirkataram.

Nuka: Nekasrum Yus pengker umirkataram tusar, atumin waitminak pujuinawai. Nuka Yusnau asaramtai, ni chichamengka umirkataram. Atum pengker umirmaka, nusha warasar atumin pengker waitmakartinuitai. Antsu ni umirat nakitamka, nuka wake mesekar pujusartinuitai. Tu pujuinakka ¿atumin itiurak yainmakarti?

¹⁸Yus seatritaram. Iikia tuke pengker pujustasar wakerakur nekasar angka nintimji, tu nintimsar pujaji. ¹⁹Tura Yus seakrum atumjai wainaikiatnun wári tsangkatramkat tusaram Yus seatritaram tajarme.

Yus yainmakarti timiauri

²⁰Yamaikia nunasha tajarme: Ii Apuri Jesús nekas juun aa nuka uwija wainua nunisang iin waitmaktin asa, iin pujut nangkankashtinun suramsatas jarutramak numpen numparmiayi. Yuska ni uchiri numparmaurin jiis: Yamaikia aints ainau tunaarin tuke sakturartajai, tu nintimra-

miayi. Tura Yus tuke angka pengker nintimias puja nuka ii Apuri Jesús jakamunmaya inankimiayi. ²¹Tura asamtai atumin pachisan Yusen tu sejai: Yuse wakeramuri miatrusrumek umirkataram tusan, Yus atumin tuke mash pengker awajtamsarti. Jesucristo iincha tuke pengker nintimtikramrau asa, ni wakeramurin mash umisti tusar Cristoka tuke inaitsuk: Ameketme juuntam tiarmi. Tu ati.

²²Yatsur ainautirmirina umaarutirmincha nukap aatratnuitjarme. Antsu ainchik aaru asan, chichamrun aarja junaka akatran, atumin akupaja juka wait aneasrum pengker nintimsaram anturtuktaram. ²³Ju chichamka nekaataram: Ii yachí Timoteo karsernumia jiinki angka pujawai. Ni wári winimnawaitmatikia, nijai atumin winitatjai.

²⁴Cristonu ainau juuntri ainautirmincha chichaman akuptajrume. Nunia Cristonu ainautirmincha mash chichaman akuptajrume. Nunia Italianmaya ainausha chichaman akupturminawai.

²⁵Atumnasha mash Yus pengker awajtamsarti. Maaketai.

Santiago Papin Akupkamuri

Chicham akupkamuri

1 ¹Wiitjai Santiagoitjai. Yuse inatirin-jai. Tura ii Apuri Jesucristo inatirinjai. Israela uchiri doce (12) amia nuna weari asakrumin, mash nungkanam kanakrum pujuinautirmin chichaman akuptajrume.^a

Yuse nekamtairin pachis etserkamu

²Yatsur ainautiram umaarutirmesha, waring achat itiurkachmin pujakrumsha pengker nintimsaram tuke warastaram. ³Yusnau ainau wait wajainamtai, nekas Yusen miatrusarang umirinawai tusar paan nekaawartinuitai. Tura asamtai atumsha itiurkachmin pujakrumsha, pengker nintimsar pujustincha nuimiarti-nuitrume. Atumka nusha nekarme. ⁴Antsu tu pujakrumka: Nekasan pengke aints ataj takurmeka, Yus wakera nunisnak pengker aa nunaka mash turatjai tu nintimsaram pujustaram. ⁵Atumka nekat yuumakrumka, Yus: Nekamtairam surusta tusaram seataram. Yus ni nekamtairin tuke surimtsuk sukartin asa: ¿Warukaya ataksha seatme? tutsuk, aints ainautin mash metek nekamtikramatnuitji.^b ⁶Tura Yus seakrumka, nekasampi wina surustatua, tu nintimsaram seataram. Antsu: Chaj suritruktimpiash, wisha nekatsjai, tu nintimsaram Yus seakrumka, nase

nasenmatai entsa tamparamuri mai waket mai waket wajawa nunisrumek nintimsaram searme. ⁷⁻⁸Aints yamai kintati: Nuna wakerajai tusa, antsu kashin: Nunaka wakeratsjai takungka, nekas jimieran nintimu asa, tuke nunisang pujawai. Aints tu nintimkungka: Yus nekas winaka nunaka surustatuapi tuuka nintimrashtinuitai.

⁹Yuse aintsringkia kuikiartichutiat: Wikia Yusnau asan nayaimpinam jeatatjapi tu nintimias warasminuitai. ¹⁰Tura kuikiartinka yangkur arumak mina nunisang wári mengkakatina asa: Wikia mianchawaitjai tusa Yusnau asa warasminuitai. ¹¹Tsaa wakamtai tura kakar tsanmati, nupaasha sukuam kakarmachu jajatui. Yangkursha shiiram aa nusha kakarmachu minaayi. Kuikiartinchina nunisang waririn surak pujaksha, yangkur mina nunisang mengkakatnuitai.^c

Itiurkachmin pujakrincha Yuska iinka pengker awajtsamtsatnuitji

¹²Aintsiti itiurkachmintrin miatrusrik nepetkau ainautinka Yuska chichartamak: Wina anentin ainautirminka pengker awajtsatnuitjarme turamin asa, tuke pujustinasha tsengkrutia nunisang suramsatnuitji. ¹³Aints tunau turataj, tu nintimias pujakka: Yus tunau turata turutui, pengké tichamawaitai. Yuska

a 1.1 (Mat. 13.55; Marc. 6.3; Hech. 15.13; Gál. 1.19) b 1.5 (Mat. 7.7-11; Juan 16.23-24)

c 1.11 (Isa. 40.6-8)

tunau takatnaka aintsun kichkisha nintimiktisui. Tura asamtai aintsun kichkisha: Tunau turata tatsui. ¹⁴Antsu aints ni wakeramurin najantan wakerau asa, ningki nintimias: Tunau turataj tusa, tunau turutan wakerawai. ¹⁵Tura aints pasé aa nuna najanatas wakerau asa tunaun takaawai. Tura tunau takasu asa jakatniunam weawai.

¹⁶Aneetir yatsur ainautiram umaarutir-mesha anangmamawairap. ¹⁷Nekas pengker aa nunaka mash ii Apaachiri nayaimpinam puja nuka iin akupturmaji. Ni nekas pengker asa, pengker aa nuna suramji. Niisha paaniuncha ningki mash najanamiayi. Antsu niinka teeka atsau asamtai, tuke yapaijmiamtsuk paaniunam pujawai. ^d ¹⁸Yus ningki wakerau asa, eemkaram wina uchir ataram tusa iincha najatmamiayi. Tura ningki wakerau asa, pujut nangkankashtinin suramsatas, ni nekas chichamen akupturmakmaji. ^e

Yusen nekasampita tinu ainau turamuri

¹⁹⁻²⁰Aneetir yatsur ainautiram umaarutir-mesha nusha nekaataram: Aints kajea nuka Yusnaka nekas pengkerka awajtsui. Tura asamtai aintsu chichame yaitasar nekaatnuitji, tura wárikia chichachuitji, tura wárikia kajechuitji. ²¹Tura asamtai pasé nintimtai aa nuka, tura tunau tuke iruna nusha mash inaisataram. Tura wikia miajuitjai tumamtsuk, Yuse chichame antukmiarume nuka atumi nintin ukusrum nintimrataram. Nu chichamka antuku asaram uwemratnui-trume.

²²Antsu Yuse chichame aya antukrum umirtsuk pujusairap. Aya antukrum umirtsuk pujakrumka, atumek anangmamume. Antsu Yuse chichame antuku asaram tuke umirkataram. ²³⁻²⁴Aints Yuse chichamen antayai Yusen

umirtsuk pujakka, aints ispin achik yapiin jiimiawa nunisketai. Nuka ispijai yapiin jiimias: Tumawapitja tumamtsuk wári kajinmawai. ²⁵Antsu Yusen nekas umirak pujakka, nekas pengker angka pujusminuitai. Yuse chichamengka ispiya tumau asamtai, aints ispin jiiminawai nunisang aints Yuse chichamen tuke kajinmatsuk nintimias pujakka, tura miatrusang umirak pujakka, nekas pengker pujustinuitai.

²⁶Aints Yusnawaitjai tayat, pasé chichaaka ningki anangmamui. Yuse chichamen umirchau asa nangkami: Wikia Yusnawaitjai tawai. ²⁷Ii Apaachiri Yus nekas pengker umirkatnuka nuwaitai: Mitaik ainau tura waje ainausha yaingtinuitji. Tura ju nungkan-maya ainau wakerina nuka wakerutsuk pujustinuitji.

Wait anenairatnun pachis etserkamu

2 ¹Yatsur ainautiram umaarutirmesha, ii Apuri Jesucristo nekasampita tinu asaram, kuikiartin jiisrum: Nuka pengkeraitai tiirap. Tura kuikiartichu jiisrum: Nuka mianchawaitai tiirap. ²⁻³Aints uwejnium wejtai kuri najanamun uwejak, tura wejmak shiirman entsar, atum iruntramunam wayaamtai, tura chikitcha wejmak aruchin entsar nusha nunisang atum iruntramunam wayaamtai ¿itiur nintimtarne? Wejmak pengker aa nuna entsaaru atumka chicharkuram: Juni tutang pengkernum keemita tusaram, antsu chikichka wejmak mamuruchin entsaaru wainkaram: ¿Ani wajasta antsu turachkumka, wina nawernini nungkanam pujusta timinkitrum? ⁴Tu pujakrumka, ju aintska pengkeraitai, antsu chikichka mianchawaitai, tu nintimsaram pujau asaram, pasé nintimsaram pujarme.

⁵Aneetir yatsur ainautiram umaarutir-mesha antuktaram: Yus kuikiartichu ainauncha umirtuktaram tusa, nekas pengker awajsatas wakerawai. Tura wina uchir asaram, tura wina aneetir asaram, wina pujutirun pengker pujusmintrum wini winitaram. Tura nayaimpinam jearmeka: Atum chikich aints inarmintrum tusa Yuska wakerawai. ⁶Antsu atumka kuikiartichu ainau natsan ipiatuwearme. ¿Yaachia atumin waitkarmina? ¿Tura yaachia atum kuikiartichu ainautirmin achirmakar apunam akuptamina? Kuikiartin nunaka turinawai. ⁷Atumka Jesucristo aintsiri iruntrumning, kuikiartin ainau Jesucristo naarin pachisar pasé chichainawai.

⁸Ii Apuri umirkatin chicham timiá pengker aa nuka nuwaitai: “Atumi namangke anearme nunisrumek chikich ainausha aneetaram.” Nu chicham umirkurmeka nekas pengker pujarme.^f ⁹Antsu chikich ainau mash metek ainawai tu nintimsuk pujakrumka, Yus umirkatin chicham umikchau asaram tunau wajarme.

¹⁰Yus umirkatin chichamka mash umiyatrumeke, chicham kichkisha umirtsuk pujakrumka, nekasrum umirkatin chichamka mashkia umirtsurme.

¹¹Tura Yus chichaak: “Tsanirmawairap, tura aints maawairap,” timiayi. Tura aints tsanirmatsuk pujayat, aintsun maakka, Yus umirkatin chichamnaka umitsuk pujawai.^g

¹²Tura asamtai atum chichaakrum tura takakmakrum pujakrumsha, tuke Cristo angkan pujustinun suramsatata nu nintimsaram: Winaka jiruapi tusaram, wisha ni chichamen miatrusnak umirkatasan wakerajai, tu nintimsaram pujustaram. ¹³Chikich ainaun wait anenchaunaka Yus ni kintari jeamtai,

wait anentsuk wait wajaktinnum akupkatnuitai. Antsu chikich ainaun wait anenniunka Yus niincha nunisang wait anentratnuitai.

Cristonu ainau chichakmauri tura turamuri pachis etserkamu

¹⁴Yatsur ainautiram, umaarutirmesha anturtuktaram. Aints Criston nekasampita tayat, Yuse chichamen umirtsuk pujakka ¿nekas pengkerak puja? Atsa. Yuse chichamen nekasampita tayat, umirtsuk pujakka ¿tu uwemratnukai? Atsa, tuuka uwemrashitnuitai. ¹⁵Nintimrataram. Aints Yuse nemarkin entsatiri yuumak pujau wainkaram, tura ni yutairisha pengké atsau wainiatrum, ¹⁶yutairi suachiatrum: Pengker pujusta, tura tsetsemakum sekmarta, nunia yaparakum nukap yuwata tayatrum ¿nu sutsuk pujakrumka pengkerak turaram? Atsa. ¹⁷Tura asamtai aints Yusen nekasampita tayat, ni chichamen umirtsuk pujakka nangkami: Wikia Yusen umirruitjai tawai. Tura Yusen umirruitjai tayat, Yuse chichamen umirtsuk pujau asa, jakawa nunisang pujawai.

¹⁸Aints atumin chichartamak: “Ame Cristo nekasampita tame. Antsu wikia nekasam pengker aa nuna takaajai. Tura ameka pengker aa nuka takatsuk pujayatum nangkami: Nekasam Cristo umirruitjai tame nuna wisha wainkatasan wakerajai. Antsu wikia pengkeran takaaja nuka wainkam: Nekasam Cristo umirruitme tusam nekaatnuitme,” titinuitai. ¹⁹Atumka chichaakrum: Yus kichkitai tarume nuka nekas pengkeraitai, antsu iwianch ainausha Yus kichkitai tinayat, Yusen shaminak kurainawai. ²⁰Nintimrataram. Aints pengker aa nunaka turichutiat, wikia Cristonuitjai tauka tuuka uwemrachmin asa, jakawa

nenisang pujawai. Nu nekachkurmeke nekasrum nintinchau ainiarme. ²¹Ii juuntri Abraham yaanchuik itiuurak pujuya nu nintimrarmi. Yus turata tusa akupkamu asa, ni uchirin Isaacan maa Yusen susatas tangku epetinam patasu asamtai, Yus Abrahaman pachis: Nuka nekas pengke aintsuitai timiayi. ^h ²²Nu nekau asaram nintimrataram: Abraham Yusen nekasampita tusa umirnuyayi. Tura Yusen nekasampita tinu asa, tura miatrusang umirkau asa, nekas Yusen pengker awajsamiayi. ²³Tura asamtai Abrahaman pachis Moisés tu aarmiayi: “Abraham Yusen nekasampita tinuyayi. Tura asamtai Yus Abrahaman pachis: Nekas péngke aintsuitai timiayi.” Yus tu tinu asamtai, aints ainau Abrahaman pachisar: Yuse amikrintai tiarmiayi. ⁱ

²⁴Tura asamtai aints Yusen nekasampita tayat, pengker aa nunaka takatsuk pujaunaka Yuska pengkeraitai tatsui. Antsu aints Yusen nekasampita taunaka, tura pengker aa nuna takaunaka Yuska pengkeraitai tawai.

²⁵Tura nuwa Rahab naartin nintimrarmi. Nuka yaanchuik kungkatip ayat, nunia Josué aintsri jimiari ni jeen jearamtai, nu aintsnaaka uukmiayi. Nunia: Mantamawairam atu tupikiaktaram tusa akupkamiayi. Nuna turamtai, Yus nu nuwanka pachis: Nuka pengkeraitai timiayi. ^j ²⁶Tura asamtai nunasha tajarme: Aints ni wakani ukukmiauka jakatnuitai. Tura aints Yusen nekasampita tayat, Yusen umirtsuk pujakka, iwiakutiat jakawa nunisketai.

Aintsu chichaamurin etserkamuri

3 ¹Wína yatsur ainautiram: Iisha nuikiartin atai tusarmeka, nukapka wakerukairap. Nuikiartin ainauti Yuse chichame umitsuk pujakrinkia, Yuska

iincha chikich ainaun nangkamasarang nukap wait wajaktiniun suramsatnuitji. ²Iisha mash nuwakar tunausha takau ainiaji. Antsu aints pasé chichamnasha chichatsuk pujakka, nuka nekas péngke aintsuitai. Nu aintska nekas ni jangken metau asa, nekas tunaarinchau pujustinuitai.

³Kawai nintimrarmi. Kawai inartaj tusar, aints ainau jirujai kawai jangken jingkiatinawai. Tura kawai tu jangken jingkiatawar mai japi mai japi awajmau asa aintsun umirui. ⁴Nunia kanu juun nintimrarmi. Kanu juun ayat, nase kakarman nasenmatikia, kanu anuntrutiri kawin yairach ayat: Ju weti tusa anuntramu asa nunak umirui. ⁵Ii jangkesha nunisketai. Ii jangkesha yairach ayat, tuke nampuram chichatayi. Jisha nintimrarmi: Ji tuupich ayat, epernasha mash keemaktinuitai. ⁶Tura aintsti jangkesha jiya nunisketai. Aintsti jangke mash tunau ainia nuna nangkamasang nukap tunau turin asa, aints tuke tunau chichakti tusa iinka utsutnaji. Aintsti jangke tungkurua jiri keawa nenisang asa, mash pengker aa nuna mesturmaji.

⁷Aints ainautikia kuintin ainausha, tura pachim ainausha, tura nanamtin ainausha, tura napi ainausha, tura namak ainausha nepetkatnuitji. Tura asar aints ainauti nuka mash nepetkartin ainiaji. ⁸Tura mash nepetin ainayatrik, ii jangkengka kichkisha nepetkachminuitji. Aintsti jangkengka tuke ayamtsuk tunau chichaayi. Tura aintsti jangkengka napi tseasri jataya nunisketai. ⁹Ii jangkejaingkia ii Apaachiri Yuska juuntapita taji. Tura nu jangkejaingkia aints ainau Yus niya tumaun najanamu wainiatrik pasé chicharji. ¹⁰Yatsur ainautiram umaarutir-mesha nintimrataram. Ii jangkejaingkia

Yuska juuntapita tayatrik, nunia aints ainau pachisar pasé chicharji nuka pengké turachminuitai.

¹¹⁻¹²Yumi pukuni nintimrarmi. ¿Kichik entsawach nungkaya pukuni jiiinmaunum yumi pengker nunia yapakujai pachinir jiiinuak? Atsa, nuka tumatsui. Yumi yapaku jiiinmaunum péngke yumikia jiiintsui. Yatsur ainautiram umaarutirme-sha, numi nereshan nintimrarmi. ¿Higuera nereak olivo neren nereawak? Atsa. ¿Tura uva yurangeke higon nereawak? Atsa, nunaka pengké tumatsui. Tura asamtai pengke nintintin ainauka nunisarang tunau chichamnaka chichainatsui.

Pengker nekamtikiamu pachis etserkamu

¹³Atum nekau akurmeka, Yusnumia numiaru asaram: Wisha miajuitjai tumamtsuk ¿antsu pengker aa nuna itiur takastajak? tu nintimsaram pujustaram. Turakrumin chikich aints ainausha atum pengker takaamun wainkar: Juka nekau aintsuitai turamiartinuitai. ¹⁴Antsu atumi nintijaingkia pasé nintimsaram suwirpiaku jinisrum pujakrumka, tura wikia miajuitjai, tu nintimsaram pujakrumka: Wikia pengkeraitjai tiirap. Tu pujakrumka, nekas chicham aa nuka nintimchrau asaram waitrarme. ¹⁵Nu pasé nekaatnuka Yusnumiangka winatsui, antsu junia nungkanmaya tura iwianchnumiayaintai. ¹⁶Tura aints ainau suwirpiaku jiiinisar, tura jiyaaninak pujuinauka mash paseminawai. Tura asar tunau ainia nuna mash takainawai.

¹⁷Antsu nekamtai Yus suramji nuna jukin ainauka maanitnasha maanichu ainawai, tura pengker nintintin ainawai, tura chikicha chichamencha anturin ainawai. Tura chikich ainaun wait anentin ainawai. Tura pengker aa nuna

takau ainawai. Tura aints ainaun anangtsuk tupin chichau ainawai. ¹⁸Iikia chikich aints ainaujai maanitsuk pujakri-kia, pengke arakan arainawa nunisrik angka pengker nintimsaram pujustinuitji, tura nukap juukmawa nunisrik pengker aa nuke turatnuitji.^k

Ju nungkanam ainia nuka aneeshtinuitji timiauri

4 ¹¿Atumsha waruka maaniwearme? ¿Tura waruka jiyaanisha pujuwearme? Atum pasé wakeramu nukap wakerau asaram turarme. ²Tura atumi wakeramuri najanatatkamaram tujintakrum aints maawearme. Tura kichnau aa nuka wakerayatrum, nuka jukitatkamaram tujinkaram jiyaanikrum tura maaniakrum pujarme. Tura Yus seachu asaram, atum wakerarme nuka juwatsrume. ³Tura Yuska seayatrumek, napchau nintimsaram seu asaram, tura atumi wakeramuri najanatasrum seu asaram nuka juwatsrume. ⁴Maj, atumka aints ni nuwarin ajapa kichan nuwatak pujawa nunisketrume. Yusen umirchau ainau ju nungkanam aa nuna timiá wakerina nu wakerakrumka, Yuse nemase arume. ¿Atumka nuka nekatsrumek? Tura asakrumin ju nungkanam aa nuna wakerinauka Yuse nemase ainawai.^l

⁵Yuse chichame tu aarmawaitai: “Yuse Wakani ii nintin puja nuka iincha timiá anenmau asa, aya tuke wina anentiam tusa, iin surimramaji.” ¿Yuse chichame tu aarmawa nuka nangkamikia tu aarmaukai? Atsa. ⁶Chikich aarmausha tu aarmawaitai: “Aints ningki nintimsang wikia miajuitjai taunka Yuska nakitawai. Antsu wikia mianchawaitjai tumamunka Yuska pengker awajui.” Tu aarmau asamtai: Iikia mianchawaitji takurning-

kia, Yus iincha wait anentramak nukap yainmajj.^m

⁷Tura asamtai Yus umirkuram pujustaram. Turaram Satanása wakeramuri aa nuka umirkairap. Tu pujakrumningkia, Satanáska tujintramak atumniaka ukurmaktinuitai. ⁸Tura Yus nintimraram nijai chichastaram. Nu turakrumningkia, niisha atumniaka nintimturmastinuitrume. Tunau ainautiram, atum tunau turamuka inaisataram. Atum nintimkuram: ¿Nekasnash Yusen umirkataj? ¿Antsu ju nungkanam aa nunaka wakerukchatjash? tusaram nu yapajiasrumek mai nintim wajarme nuka inaisataram. Tura asaram Yus wína nintirun japitrurti tusaram seataram. ⁹Atumka tunaarintin asaram, wake mesekrum juutkamaikiakrum atumi tunaaringkia inaisataram. Turaram wishitcha wishitsuk juutkamaikiakrum pujusrum, tura nakurutsuk pujusrum, atumi tunaari nintimraram wake mesekrum pujustaram. ¹⁰Tura Yus seakrum: Wikia tunaawitjai titaram. Takurminkia Yuska atumniaka pengker awajtamsatnuitrume.

**Cristonu ainau pachisrum
pasé chicharkairap**

¹¹Yatsur ainautiram umaarutirmesha, chikich aints pachisrum pasé chicharkairap. Cristonu ainaun pachis pasé chicharkaruka: Yus umirkatin chicham napchawaitai tawai. Tura Yus: Chikich ainau aneetaram tímia nu chichamnaka umirtsui. Atumka nu umirkatin chicham umirchau asaram: Nu chichamka napchawaitai tarume. ¹²Nu umirkatin chichaman akupauka Yusketai. Tura aintsu tunaarin jiis wait wajaktiniun susatnusha Yusketai. Tura ni aintsri ainautin uwentikramratnuka nuketai.

Tura ni umirchau ainaun mengkaktincha nuketai. ¿Tura asamtai waruka chikich aints pachisrumsha paseetai tarume?

Kashin warukatjtk tusar etserkamu

¹³Yamaikia nusha antuktaram. Atum chichaakrum: “Yamai wechanka, kashinkesha wena, chikich yaktanam wetatjai, tura nuni kichik musach pujusan, nuni warinchun untsuri sumarmakan, nunia ataksha surukan, kuikian nukap kiaungkatatjai,” tarume. ¹⁴Turayatrum kashin itiuurak tsawaartaj tusaram, nuka nekaachminuitrume. Ii pujutringkia warimpita tusaram nintimratarum. Ii pujutringkia yurangmia tumawaitai. Yurangkim yamaikikia wainmaitiat jumchik arusang mengkawai. ¹⁵Antsu nekasrum tu chichastinuitrume: Ii Apuri wakeramtaikia, tura iisha iwiaaku pujakrikia, nuka turatatjai timinuitrume.ⁿ ¹⁶Turayatrum atumka jampesrumek tuke atumi wakeramuri pachisrum: Wi wakeraknaka pachitsuk turatatjai tu chichaawearme. Antsu nuka paseetai. ¹⁷Tura asamtai tajarme: Aints pengker aa nuna turatnun nekayat, nuna umitsuk pujakka tunau wajawai.

Kuikiartin ainau ju chichaman antukarti

5 ¹Kuikiartin ainautiram antuktaram. Atumka nukap wait wajaktin asaram, kakaram juutkamaikiakrum, wake mesekrum atumi wait wajaktintri nintimratarum. ²Atumi wariringkia mamuinawai. Tura atumi entsatirisha shiiram ainia nunaka sengka mesenawai. ³Tura atumi kuririsha, tura atumi kuikiarisha ijakmaminawai. Nuka ijakmamratin wainiatrumek tuke ukuarme. Tura ju nungkanam aa nuka mash mengkakarta au wainiatrumek, atumi kuikiari nukap kiaungkamarume.

Yuse kintari jeatak wajasu asamtai, aintsu namangke jinam esawa nunisrumek atumka nukap wait wajaktinuitrume.^o

⁴Tura atumi ajarin takakmin ainau: ¿Ii takakmasmau akikrisha tuwaita? turaminawai. Antsu aints ainaun anangkuram pujarmin wainiat, Yus mash aints ainaun ina nuka nu aints chichaa-munka antawai. ⁵Atumka ju nungkanam yuumatsuk pujautirmeka, atumi wakera-muri najankuram, kuchi jaeru suruktin pujawa tumawaitrume. Tura asakrumin atum wait wajaktin kinta jeatak wajasi. ⁶Atumka péngke aints ainau tunaarin-chau wainiatrumek nangkamrum mau arumning, atumin nepetamkartatkama tujintramkarmiayi.

Tuke jaimiasar Yuska seatnuitji timiauri

⁷Yatsur ainautiram umaarutirmesha, ii Apuri tatintri pengker nintimsaram nakastaram. Aints ni ajarin arakan arakma: Nukap nerekti tusa nakawai. Tura waurtutsuk: Yumi jiturti tusa nakawai, tura nukap arus ataksha jiturti tusa nakawai. ⁸Ii Apuri tatanak wajasu asamtai, atumsha yawetsuk nakastaram. Tura pengker nintimsaram kakaram wajastaram.

⁹Yatsur ainautiram umaarutirmesha, Yuska aints ainau tunaarin jiiistin aa nuka tatanak wajasu asamtai atumka: Wait wajaktiniun surusai tusaram, napchauka aujmatnaitasuk pujustaram. ¹⁰Yatsur ainautiram, yaanchuik Yuse chichame etserin ainau ii Apurin pachisar chichasarmia nuka nintimrataram. Nuka nukap wait wajainayat, pengker nintimsar Yuse chichamen etserkarmiayi. Tura asamtai atumsha nunisrumek turataram. ¹¹Aints ainau wait wajainayat,

pengker nintimsar puju ainaun pachisar: Yus nu aints ainaun waramtiksatnuitai iikia taji. Atumsha Joba wait wajakmaurisha pachisrum antukmiarume. Tura Job pengker nintimsamusha nekarme. Ii Apuringkia tuke wait anengkratin asa, tura aints ainaun mash pengker awajin asa Jobnasha pengker awajsamiayi.^p

¹²Yatsur ainautirmin umaarutirmincha tajarme: Atum chichaakrum, Yus nayaim-pinam puja nujai tajai, nangkamrumka tiirap. Tura ju nungkanam aa nu pachisrumka, tura chikich warinchu ainau pachisrumka, nangkamrum Yuse naari pachisrum Yusjai tajai tiirap. Antsu ja ai titasrum wakerakrumsha tupnik: Ja ai titaram. Tura atsa titasrum wakera-krumsha tupnik: Atsa titaram. Nuke ati. Wikia wait wajaktiniun jurumaki tusaram, tu chichastaram tajarme.^q

¹³Atum wait wajakrumka Yuska seataram. Tura pengker nintimsaram pujakrumka, Yuska maaketai takuram Yus kanta kantamataram. ¹⁴Tura atum sungkurmakrum pujakrumka, Cristonu ainau juuntri ainau Yusen seatariat tusaram untsuktaram. Turakrumin nusha taar, ii Apuri naarin pachisar Yusen sear, jau ainautirmin namangen olivo macharijai yakatramrarti.^r ¹⁵Tura Yus nekasampi anturtawa, tu nintimsar Yusen seinamtaikia jausha tsaartinuitai. Tura jau tunaari amatikia, Yus ni tunaarinka tsangkuratnuitai. ¹⁶Tura asamtai mai nuamtak atumi tunaaringkia ujaaniktararam. Nunia Yus seatnaitaram. Turakrumka tsaartinuitrume. Aints Yusen nekasampita tusa, miatrusang Yusen umirak pujaunaka tuke nintijai Yusen seu asamtai Yuska anturui.

¹⁷Yuse chichame etserin Elías naartin nintimrarmi. Nuka iiya nunisang aints

ayat, yumi jiturchati tusa Yusen seamiayi. Tu seau asamtai, kempatam musach nunia japchirin yumikia jiturchamiayi.^s

¹⁸Nunia ataksha yumi jiturat tusa Yusen seamtai, yumi ataksha jiturmiayi. Tura yumi jitamtai, árak ainau ataksha nerekarimiayi.

¹⁹Yatsur ainautiram umaarutirmesh, aints Yuse chichamen nekas aa nuna pachisar nekasampita tinu

ainayat inaisaramtaisha, nu aintska ataksha Yuse chichamen umirkarti tusaram yaingtaram. ²⁰Aints kichik tunaarinnun: Tunaarum inaisata tusa yaingtata nuka, nu tunaarintin tuke mengkakai tusa uwemtikratnuitai. Tura nu aintsu tunaari untsuri au wainiat Yus nunaka mash tsangkuratnuitai. Nuka nekaataram tusan tajarme.^t Maaketai.

Pedro Papin Eemak Akupkamuri

Chicham akupkamuri

1 ¹Wiitjai Pedroitjai. Jesucristo akupkamuitjai. Atum Cristo umirin asaram, atumi nungkari ukukrum kanarutirmin ju papin aatjarme. Ponto nungkanam, tura Galacianmasha, tura Capadocianmasha, tura Asianmasha, tura Bitinianmasha pujuinautirmin ju papin aatjarme. ²Ii Apaachiri Yus yaanchuik atumin pachitmas: Wína uchir artatui, tu nintimturmas atumin eatmaku asamtai, Jesucristo umirkataram tusa, atumi nintin ni numpejai japitramrau asamtai, Yuse Wakani: Atumka nekasrum tunaarinchau ataram tusa, atumniaka eatmakmiarume. Yus atumin wait anentramak pengker awajtamsarti, tura angkan pengker nintimratnuncha suramsarti tusan wisha tajarme.

Yusen maaketai timiauri

³Ii Yusri ii Apuri Jesucristo Apaachiri asamtai: Ameketme juuntam tusar maaketai tiarmi. Tura Yus iin timiá wait anentramau asa: Yamai akiinawa nunisrumek pujustaram tusa, pujut yamarman suramsamijai. Ii Apuri Jesucristo jakayat jakamunmaya nantakin asamtai, iisha nunisrik tuke Yusnum iwiaakuapi pujustatji tusar nekaji.^a ⁴Nayaimpinam pujustinka tuke nangkankashtinuitai. Nuningkia tunauka pengké atstnuitai. Tura nuningkia

weamrashtinuitrume. Yuska nuni pujut nangkankashtinnaka suramsatnuitrume. ⁵Yus nekasampita tinu asakrumin, ukunam atumin uwentikramratin asa, ni kakarmarijai atumniaka waitmarme. Atumin uwentikramratniunka yanchuk umismau asamtai ukunam Yus inaktur-mastinuitrume.

⁶Tura asamtai ju nungkanam pujakrum jumchik musach itiurkachmin pujarme. Antsu yamaikia wait wajakrumsha, ukunam pengker pujustinuapitji tusaram nukap wararme. ⁷Kuri akik asamtai, aints ainau: ¿Nekas kuriashi? tusar jinum tseerar, kurichuitkungka esaatutai tusar turinawai. Yuscha nunisang atumin nekapramsatas: ¿Nekasash wina umirtina? tusa wait wajaktniun akuptur-marme. Kurikia akik ayat mengkakatnuitai. Antsu atumka nekasrum Yus nekasampita takurmeka mengkakashtinuitrume. Tura ii Apuri Jesucristo wantinturmak atumin pengker awajtamsatnuitrume. Tura atumin chichartamak: Wína nekasampita turutu asaram, nekasrum pengker nintimsaram wína pujutirun paaniunam pujustaram tusa juramkitnuitrume.

⁸Atumka Jesucristo wainchautiatrum anearme. Tura wainchautiatrum Cristo nekasampita tusaram nukap waraarme. Nu waraamuka nayaimpinam warastinua nunisketai. Antsu tu awai titatkamaram tujintarme. ⁹Tura atumka Cristo

a 1.3 (Juan 3.3-7; 1.Ped. 1.23)

nekasampita tinu asakrumin atumin uwemtikramratnuitrume. Nu uwemratin nintimsaram nukap wararme.

¹⁰Yaanchuikia Yuse chichame etserin ainau nintimsar: ¿Itiur uwemratnukitai? tusar nekaawartas wakeriar-miayi. Tuminamtai yaanchuik nekamtikiamu asar Yus atumin pengker awajtamsatniun pachisar aararmiayi. ¹¹Yaanchuik Cristo akiintsang, ni Wakani ni wait wajaktin-trin pachis, nunia ni jaka nantaktintrincha pachis, nunia nayaimpinam pujustintrincha pachis, Yuse chichame etserin ainaun aamtikramiayi. Tura asamtai ¿yáki at? tura ¿warutik wantinkat? tusar nekaawartas wakeriar-miayi. ¹²Yus ni chichame etserin ainaun yaanchuik nekamtikiamia nunaka niin pachiska aamtikrachmiayi. Antsu atumin nekamtikramratas aamtikramiayi. Tura Yus ni Wakanin nayaimpinmaya akupkau asamtai, ni kakarmarijai Yusnum uwemratin chichaman atumin etserkarmia nuke nu chichamnasha yamaisha ujatmarme. Yuse awemamuri ainausha nu etsermaun pachisar paan nekaawartas wakerinayat yuumatinawai.

Yus tunaarinchau pujastaram timiauri

¹³Yuse wakeramuri itiurak aa tusaram nekau asaram, paan nintimrataram. Tu nintimsaram pujau asaram, ii Apuri Jesucristo wantinak atumin pengker awajtamsatin yawetsuk nakastaram. ¹⁴Yaanchuik Yus itiurak aa tusaram nekachu asaram, atumi wakeramuri umirkuram pujuyarme. Antsu yamaikia Yuse uchiri asaram, atumi Apaachiri Yus umirin ataram. ¹⁵Yus wína uchir ataram tusa, atumin eatmakmia nuka pengké tunaarinchau asamtai, atumsha nunisrumek pengké tunaarinchau ataram. ¹⁶Yuse chichame tu aarmawaitai. Yus chichaak:

“Wikia pengké tunaarinchau asamtai, atumsha nunisrumek tunaarinchau ataram,” timiayi.^b

¹⁷Yus aintsti turutinka mash metek jjiirmaji. Tura asamtai atumka Yus: “Apaachia,” tau asaram iwiaaku pujakrumka, wait wajaktiniun surusai tusaram shamkataram. ¹⁸Yaanchuikia atumi juuntri nangkamiar puju armia nunisrumek atumsha pujuyarme. Tura asakrumin Yus atumin: Tu pujusairam tusa uwemtikramramiarume. Atumsha nusha nekarme. Yus kuikijaingkia, tura kurijaisha mengkakatini aa nuaingkia atumi tunaarin akiimiakka sumarmakchamiarume. ¹⁹Antsu Cristo numpejai sumarmakmiarume. Yaanchuik aints ainau tunaun turinak: Yus tunaaurun tsangkuturut tusar, uwija uchirin shiirman sungkurinchaun main armiyai. Cristosha uwija uchiriya nunisang jarutramkau asa, iinka tunaanumia uwemtikramramiayi. ²⁰Yus nungkanka najantsuk, ni Uchirin Criston aints ainaun uwemtikratas jakati tusa nintimramiayi. Tura asa yamai pujautirmin pengker awajtamsartas Cristoka wantinkamiayi. ²¹Nunia Yus ni Uchirin jakamunmaya inankin asa nayaimpinam iwiakmiayi. Tura asamtai atumsha: Wi jakamtaisha, Yus nekasampi wína inantuki nayaimpinam juruktinuita, tu nintimsaram pujau asaram Cristo nekasampita takuram, Yus tuke nintimsaram pujarme. ²²⁻²³Nintimrataram. Atumka Yuse chichame antuku asaram, tuke iwiaaku pujusmi tusaram, Yusnumia akiinawaitrume. Nu yamaram pujutnaka atumi apari, tura atumi nukurisha suramsachminuitrume. Antsu atumka Yuse chichame nekas aa nu umirkau asaram, tuke iwiaaku pujustinuitrume. Nu chichamka pengké mengkakashtinuitai.

Atumka Cristonu ainaujai nekasrum aneenisrum pujustasrum atumi tunaari inaisaram, atumi nintingkia pengker awajrume. Tura asaram tuke inaitsuk aneenin ataram.^e ²⁴Tura asamtai Yuse chichame tu aarmawaitai:

“Aints mash nupaaya nunisarang ainawai. Aints miajuitjai tinayat, yangkura nunisarang ainawai. Antsu nupaasha tura yangkursha minar mengkainayi.

²⁵ Antsu ii Apuri chichamengka pengké mengkakashtinuitai.”

Tu aarmawaitai. Nu uwemratin chichamaka atumniaka tuke ujatmakaruaitai.^d

2 ¹Tura asamtai tunau ainia nuka mash inaisaram, anangmatnusha tura tunau ayatrumek: Wikia pengkeraitjai tumamtincha, tura suwirpiaku jiiinitcha, tura chikich ainau pachisrum pasé chichat tuke inaisataram. ²⁻³Antsu ii Apuri pengkeraitai tusaram nekau asaram, uchi yama akiina muntsun kintajai metek wakera nunisrumek, Yuse chichame nekas pengker aa nu wakerin ataram. Yuse chichamejai tuke uwemrau asaram, atumi ninti kakamtikratasrum turataram.^e

Cristonu ainauka Yuse jeea tumawaitai timiauri

⁴Ii Apuringkia itiurak awa tusaram nintimratarum. Aints ainau jean kayajai jeaminak chikich kayan pengkeran wainkariat: Ju kayaka paseetai tusar, nakitinak ajapawarmiayi. Ii Apuringkia nu kaya nekas pengkera tumawaitai. Niincha tunaarinchau waininayat nakitrarmiayi. Tura wainiat Yus niin ataksha inankimiayi. Tura asa tuke iwiiaakuitai. ⁵Yus atumin tuke iwiiaaku pujustinun suramsau asamtai, atumsha

Yuse jee kaya jeamkamua nunisrumek pujarme. Nunia sacerdotea nunisrumek aints ainau pachisrum Yuska seatinuitrume. Sacerdote ainauka tangku ainoun maawar, Yusen susartas epue armiaiyi. Antsu Jesucristo atumi tunaarinka japitramrau asamtai, Yus atumniaka tunaachawa nunisrumek pujarmin jiiirmarme. Tura asamtai atumka tuke inaitsuk Yus maaketai titaram.^f ⁶Tura nuna pachis Yuse chichame tu aarmawaitai. Yus chichaak:

“Wainkataram. Wikia Sión yaktanam kaya juuntan pujsatnuitjai. Tura asamtai nu kayanka nekasampita tiartin ainauka niin umirinau asar pengké natsaarchartinuitai,” timiayi.^g

Tu aarmawaitai. ⁷Ii Apurin pachis tu aarmau asamtai, atumka ii Apuri nekasampita tinu asaram, Cristoka nekas pengkeraitai tarume. Antsu Cristo umirchau ainoun pachis Yuse chichame tu aarmawaitai:

“Jea jeamin ainau kayanka ajapawarmiayi. Antsu Yus ni Uchirin tayat nu kayanka pachis: Nuka timiá pengkeraitai,” tawai. ⁸Tura chikich armaunasha miatrusang umikmiayi. Nu aarmauka tu aarmawaitai:

“Nu kayanka tukumkar iyartartinuitai.” Cristo chichamen umirtsuk pujuinauka, kayan tukuminawa nunisarang iyaartin ainawai. Tura kayan tukumkar iyainawa nunisarang pujuinauka wina chichamrunka umirtutsuk pujuinau asar, tuke wait wajakartin ainawai Yuska tawai.^h

⁹Antsu Yuska: Winar ataram tusa, atumin eatmakmiarume. Tura asa sacerdotea nunisrumek chikich aints ainausha pachisrum wina seattiarum tusa, Yuska atumniaka inaitamkmiarume.

Tura Yus pengker turatnuka tu awai tusaram, chikich aints ainausha nekamtikiatnuitrume. Atumka teenam pujarmin wainiat, Yuska atumin chichartamak: Winia paaniur nekas pengker aa nuni pujusmintrum tusa atumniaka untsurmakmiarume. ¹⁰Atumka yaanchui-kia Yuse aintsringkia achayarume. Antsu yamaikia Yuse aintsri arume. Yaanchui-kia Yuska atumniaka waitka anentramchauyarume. Antsu yamaikia wait anentramrume.

Yuse inatiri ataram timiauri

¹¹Aneetir ainautiram, ju nungkanam tuke irawa nunisrumek pujau asakrumin atumniaka tajarme: Atumi namangke wakera nuka tsangkatkairap. Nu turakrumka atumi nintingkia pasemam-tikratnuitrume. ¹²Cristo umirchau ainaujai pachintraram pujayatrume, nekasrum pengker pujustaram. Yamaikia atumin pachitmasar: Tunau ainawai tusar pasé chichau ainayat, Yus nu aints ainau turamurin jiistin kinta jeamtai, nu aints ainauka atum pengker turamurmin wainkau asar, Yusnaka pengker awajarsatin ainawai.ⁱ

¹³Cristo atumi Apuri asamtai, apu naamkaru ainau mash umirkataram. Juun apu nuna nangkamasang atsau asamtai nusha umirkataram. ¹⁴Tura juun apu chikich apun akupkau asamtai, nu apusha umirkataram. Apu ainauka tunau takau ainaunaka achikiar kársernum akupinawai. Tura pengker takau ainaunaka pengker awajin ainawai.

¹⁵Atumka nekas pengker aa nu turataram tusa Yuska wakerawai. Nu turakrumka nintinchau ainau nekachu asar, atumin pachitmasar nangkamiar chichainau asaramtai, nekas pengker pujau asaram itatmamtkiatnuitrume.

¹⁶Atumka nekasrum angkaan pujau asaram, angkaan pujuinawa nunisrumek pujustaram. Tura wikia angkaan pujau asan, wina wakeramurnaka pachitsuk turatatjai, tuuka nintimsairap. Antsu Yuse inatiriya nunisrumek pujustaram. ¹⁷Mash aints ainau pengker awajsataram. Tura Cristonu ainauka aneetaram. Tura Yuska umirkataram. Tura juun apu pengker awajsataram tajarme.

Cristo wait wajakmauri pachisar etserkamu

¹⁸Aintsu inatiri ainautirmin tajarme: Atumi inatmin pengker awajsam tuke umirkataram. Tura atumi inatmin pengker awajtaminauk umirtsuk, antsu chikich inatmin pasé chichartaminau wainiatrumek umirkataram. ¹⁹Tura aints tunau takachu ayat, Yusen aneau asa wait wajaksha, nekas pengker nintimias wait wajakminuitai. ²⁰Antsu tunau turaram jaimiasrumek wait wajakrumka ¿Yuska pengker awajkurmek pujaram? Atsa. Antsu pengker aa nu turayatrums wait wajakrumka, jaimiasrum wait wajau asaram, nekasrum Yuska pengker awajrume. ²¹Cristo atumin pachitmas wait wajakmiayi. Tura asa: Wiya nunisrumek atumsha wait waktinuitrume tusa, atumin nuitamrau asamtai, atumsha niya nunisrumek wait waktinuitrume. ²²Cristoka tunaunaka pengké turachmiayi. Tura aintsnaka kichkisha pengké anangkachmiayi.^j

²³Tura niin pasé chicharinamsha, pajaki aikchamiayi. Tura waitkinamsha yapaijmiaktaj tichamiayi. Antsu Yus ukunam aints ainau tunaarin mash yapaijkiatin asamtai, wina Apaachir Yus jiiisti timiayi.^k ²⁴Tura asamtai atumi tunaaringkia mash inaisaram, aints jakau tunau pachiat sua nunisrumek tunaarin-chau pujustaram tusa, Cristo ningki ii

tunaarin akiimiatramkatas numinam waitnas jarutramkamiaji. Atumin uwentikramratas Cristoka awatnar-miayi.¹ ²⁵Yaanchuikia atumin waitmaktin atsau asamtai, uwija mengkakawa nunisrumek atumka pujuyarme. Antsu yamaikia Cristonam jeau asakrumin, nuka uwija wainua nunisang atumin waitmarme.^m

**¿Nuwatnaikiau ainausha itiu
pujusartinuita?**

3 ¹⁻²Aishrintin ainautiram, atumi aishri umirkataram. Atum Yus miatrusrumek umirkuram pujakrumin, atumi aishringkia Yuse chichamen nekasampita tutsuk pujuinayat, atumi pengker pujamurmin wainkar, atumka chichar-chamaitiat, atumi aishringkia Yus umirtan wakerukartinuita.ⁿ ³⁻⁴Atumka nekasrum shiirmawach wajastaj tu nintimkurmeka, iwiarmamratnuka nintimtusairap. Tura atumi intashi shiiram iwiaratnusha, tura kurijai iwiarmamratnusha, tura wejmak akik entsartinchina nintimtusairap. Antsu Yusen nekasam pengker awajsatasan shiirmawach wajastaj takurmeka, aints ainausha kajertsuk, pengker nintimtin atatjai, tu nintimin ataram.^o ⁵Yaanchuikia nuwa pengker nintintin ainau Yusen pengker awajrsartas wakeriarmia nuka ni aishrin umirinak ni nintijai pengker nintimsar pujuu armiaiyi. ⁶Tura Sarasha Abrahaman umirin asa aishrin: “Apuu” tinuyayi. Nuwa ainautiram, atumka nekas pengker aa nu turakrumka, tura shamrumtin wainiatrum shamtsuk pujakrumka, Sara nunisrumek pujustinuitume.^p

⁷Nuwentin ainautirmincha tajarme: Atumi nuwarijai pengker awajnisaram pujustaram. Nuwa ainauka aishmangtijai

metekka kakarmaka ainatsui. Antsu Yus aishmang ainautin, tura nuwa ainauncha metek wait anentramak tuke pujustinaka suramsau asamtai, atumi nuwaringkia pengker awajrsataram. Yus wi seamun anturtukat tusaram turataram.^q

**Pengker aa nuna takau ainauka wait
wajakartin ainawai**

⁸Nuniasha Cristonu ainautirmin tajarme: Mash iruntraram metek nintimin ataram. Tura wait anenain ataram. Tura pataachirmea nunisrumek anenin ataram. Tura pengker awajnisaram: Wikia miajuitjai tutsuk asataram.

⁹Atumin pasé awajtaminamtaisha, atumka yapajtsuk asataram. Tura atumin katsekraminamtaisha: Wisha yapajkiataj tiirap. Antsu Yus atumniaka pengker awajtamsatas wakerau asamtai: Wina pasé awajtinauncha Yus yaingti tusaram, yapajtsuk pengker awajrsataram.

¹⁰⁻¹²Yuse chichamesha tu aarmawaitai:

“Ii Apuri Yuska nekas pengke nintintin ainaun wainin asa, ni seamuncha anturui. Antsu tunau takau ainaunka nakitawai. Tura asamtai aints pengker nintimias wara warat pujustas wakerakka, pasé chichamnasha chichatsuk asati. Tura wait chichamnasha etsertsuk asati. Tura pasé aa nunaka mash inais, pengker aa nuna turin ati. Tura angka pengker nintimias pujutan wakerukti. Tura tu pujustas wakerau asa, tuke inaitsuk angka pengker nintimias pujusti.” Tu aarmau asamtai tuke nunisrumek pujustaram tajarme.^r

¹³Atumsha tuke inaitsuk pengker aa nu turakrumningkia ¿yáki atumnasha paseesha awajtamsarti? ¹⁴Antsu atumka pengker aa nu takau asakrumin, atumin pasé awajtaminamtaisha, Yus atumin

waramtikramsatsuirume. Atumin pasé awajtaminamtaisha shamkairap, tura napchau nintimsuk asaram.^{s 15-16}Antsu Cristo wina Apuruitai tusaram, tuke tu nintimsaram pujustaram. Tura aints atumin: ¿Warukarnea Cristosha umirume? turaminamtaisha, atumka jampetsuk Yus wina jirui, tu nintimsaram: Tuke Yusnum pujustinuapitji tusaram aimkataram. Atumka Cristonu asaram, napchauka nintimsuk nu nangkamiar aujmatramkaru ainauka inatsartasrum pengker aa nu turataram tajarme.

¹⁷Tunau takau ainau pasé turinau asar wait wajakartinuitai. Antsu atumka pengker aa nu takaayatrumek, Yus wakerau asamtai wait wajakrumka, nekasrum pengker nintimsaram wait wajaktinuitume. Nuka pengkeraitai. ¹⁸Cristo ningki wakerak, nuniangka pengké jakashtinun, ii tunaarin sakturmartas jarutramkamiiji. Tura ningkia tunaarinchautiat tunaarintin ainautin Yusnum jeekartuktas wait wajakmiayi. Tura asamtai ni namangken yanchuk jakau wainiat, Yuse Wakani ataksha inankimiayi. ¹⁹Tura ni namangke jaka tepayat, jakau wakani kársernum engkeamua nunisarang matsatmaunum Cristo Wakani chichaman etserkatas wemiayi. ²⁰Yaanchuiksha Noé juun kanun takaamta, Yus aints ainau wina umirtukarat tusa nakamiayi. Yuska nakamaitiat Noé etsermaun aints ainauka umirkacharmiayi. Tura entsa nujangkruamta, aints ocho (8) nuke uwemrarmiayi. Antsu chikich ainauka mash kajingkiarmiayi. Nu jakaru ainau wakani matsatmaunum Cristoka chichaman etserkatas wemiayi. ^{t 21}Entsa nujangkruamunam Noé uwemramia nunisrik iisha uwemratnuitji. Antsu

Cristo umirkatasar maakrikia, ii namangke pakuichau ati tusarkia maatsji. Antsu Yus seakur: Yamaram ninti pengké tunaachau aa nu surusta titasar maaji. Jesucristo jakamunmaya nantakin asamtai iisha nunisrik uwemrawaitji. ²²Cristo jaka nantaki nayaimpinam wakamiayi. Tura Yuse awemamuri ainauncha, tura ju nungkanmaya apu ainauncha, tura kakaram ainauncha mash inau asa, yamaikia Yuse untsurinini apu keemtainum pujawai.

II turaji nuka Yuse kakarmarijai turatnuitji

4 ¹Cristo ju nungkanam aints wajas wait wajakmiayi. Tura asamtai atumsha nunisrumek wait wajakrumka, paan nintimsaram: Wisha Cristoa nunisnak wait wajakminuitjai titaram. Aints Criston nintimias wait wajakka tunaunaka pachiatstui. ²Tura wina wakeramurnaka turashtatjai, antsu iwiaaku pujaknaka Yuse wakeramurinak umiktatjai, tu nintimias pujauka tunaunaka pachiatstui. ³Yusen umirchau ainu turina nuka atumsha nunisrumek yaanchuikia mash turinuyarme. Tura atumi wakeramuri takau asaram, tuke tsanirmatcha wakerinuyarume. Tura tunau nintimsaram ushu ayarme. Tura namektrum tuke shinutcha shinuyarme. Tura chikich aintsu yusri Yuschau wainiatrum: Ameketme Yusem tinuyarme. ⁴Antsu yamaikia nu turutka nakitau asakrumin, atumjai nu tunau turiamia nuka atumin kajertaminak: Maj ¿warukaya iijai tsanitan nakitinawa? tusar pasé chichartaminawai. ⁵Tura nu aints ainauka ni tunaarinja ukunam mash ujakartinuitai. Cristoka iwiaaku ainu tunaarinja, tura jakaru ainu tunaarinja mash nekau asamtai, niin ujakartin ainawai. ⁶Yaanchuik

kajingkiaru ainausha iwiaaku pujuinaing nu chichamka ujakmau armiyai. Mash aints ainau jainawa nunisarang ni namangkengka jakariat, ni wakani tuke Yusjai iwiaaku pujusarat tusa, Yusnum uwemratin chichamka ujakmau armiyai.

⁷Ju nungka amukatnuka jeatak wajasi. Tura asantai atumka paan nintimsaram pujustaram. Tura asaram Yus seat kakantrataram. ⁸Tura atum mash turarme nusha nangkamasumek aneenitarum. Tuke aneenisrum pujakrumka, chikicha tunaari untsuri wainiatrumek nuka tsangkuratnuitrume.^u ⁹Tura atumi jeen irasartas wininamtai-sha, jeasha surimshimka nintimtsuk tsangkamkataram.^v ¹⁰Yus aintstin mash pengker awajtamu asa, ii takatrinka kichik kichik suramsamijai. Tura asantai Yus wakera nunisrumek chikich ainaujai-sha yaainikrum pengker awajnisaram pujustaram. ¹¹Yuse chichame etserkur-meka, Yus tita tusa, atumin nekamtikramau asantai, Ni wakera nunisrumek etserkataram. Tura chikich ainau yayaakrumka, Yus ni kakarmarin atumin suramsau asantai, nu aints ainau yaingtaram. Mash turarme nuka aints ainau tuke mash: Yus juuntapita tiarat tusaram, Jesucristo nintimsaram turatarum. Aints ainau Jesucriston tuke inaitsuk pengker nintimtusarat tusaram tura: Ameketme kakarmam tiarat tusaram nuka turatarum. Tu ati.

Cristonu asar wait wajaktinuitji

¹²Aneetir ainautiram, Yus atumin aneachmau nekapramatai, nukap wait wajakrumka: Maj ¿warukantsuk timiá wait wajaij? tuuka nintimsairap. ¹³Antsu Cristoa nunisrumek wait wajau asaram warastaram. Yamaik nukap wait wajaya-

trum, Cristo wantinkamtaí nukap warastin asaram, atumka yamaisha warastaram.^w ¹⁴Cristo naarin pachisar atumin katsekraminamtaisha, Yuse

Wakani nekas pengker aa nuka atumin engkemturmau asantai nekasrum warastinuitrume.^x ¹⁵Mangkartin ainausha, tura kasa ainausha, tura chikich tunau turin ainausha, nunia kichnau nangkamiar chichaina nusha mash tunau asar wait wajainawai. Antsu wisha nuna turunawai tusaram atumka aneartaram. Tura atumningkia nu wait wajamuka atsuti tusaram, tunaaka turuwairap. ¹⁶Antsu Cristonu asaram wait wajakrumka, natsaamsuk wait wajaktinuitrume. Tura asaram Cristo naari pachisrum tuke Yuska maaketai titaram.

¹⁷Yuse aintsri ainauti wait wajaktin yanchuk jeayi. Tura Cristo: ¿Wína aintsur nekasash umirtina? tusa iin nekapramsatin kintaka yanchuk jeayi. Antsu nungka amuamunam Yusnum uwemratin chichaman umirtsuk pujuinauka ii wait wajaji nuna nangkamasarang nekasar nukap wait wajakartin ainawai. ¹⁸Tura Yus umirkau ainauti nukap wait wajasar uwemkurnisha, Yusen umirchau ainauka timiá tunau asar, wait wajainak: ¿Warukatnukitaj? tiartinuitai. ¹⁹Tura Yus wakerau asantai, Cristo umirkau ainauti wait wajakrishia, tuke inaitsuk nekas pengker aa nuke turatnuitji. Tura Yus iincha najatmau asa, iinka pengké japrama ukurmatsji, tu nintimsar pujustinuitji.

Cristonu ainau chicharkamuri

5 ¹Wikia Cristonu ainau juuntri asan, tura Cristo wait wajakmaurinha wainkau asan, tura Cristo ukunam

wantinkamtai, ni paaniurinha atumjai metek wainkatin asan, Cristonu ainau juuntri atumjai pujuinautirmin yamaikia ju chichaman akuptajrume. ²Uwija wainin ni uwijarin tenap wainua nunisrumek Yusnau ainau pengker wainkataram. Tura nakimtsuk antsu atumek wakerau asaram, Yus wakera nunisrumek turataram. Wi nuna turaknaka kuikian nukap jukitajapi tuuka nintimtsuk, antsu pengker nintimsaram turataram.^y ³Tura wisha Cristonu ainau juuntri asan, aints ainaun inartaj tuuka nintimtsuk, antsu nekasrum pengker pujusrum: Wiya nunisrumek pujustaram tusaram, Cristonu ainau pengker wainkataram. ⁴Tura asakrumin Cristonu ainau wainin nekas juun aa nuka, iin waitmaktas wantinturmakamtai, atumka Yusnum jearam Yuse paaniuri wainkaram, pujut nangkankashtin jukitnuitrume.^z

⁵Nuniasha natsa ainautirmincha nunasha tajarme. Cristo umirnu juuntri ainau umirkataram. Mash pengker nintimtunisrum: Wikia mianchawaitjai tusaram pengker awajnisataram. Yuse chichame tu aarmawaitai:

“Aints ningki nintimsang wikia miajuitjai taunka Yuska nakitawai. Antsu wikia mianchawaitjai tumamunka Yuska pengker awajui.”^a ⁶Yuska nekas kakaram asa, ni kintari jeamtai wina: Miajuitme turutti tusaram yamaikia: Wikia mianchawaitjai tu nintimsaram pujustaram. ⁷Yuska atumin waitmau asamtai, atumi itiurkachmintri waring achat mash pachisrum: Yuska wina yuumamurnaka surusti, tu nintimsaram pujustaram.^b

⁸Paan nintimraram aneataram. Satanás atumi nemase asa, juun yawaa

kuntinun esai yuwatas wekaawa nunisang: ¿Yanak mesrintang? tusa atumin eatmarme.^c ⁹Tura asamtai tuke Yus nekasampita takuram Satanás turutashti tusaram surimiaktaram. Atum wait wajarme nunisarang chikich nungkanmaya Cristonu ainausha wait wajainawai. Nuka kajinmakirap.

¹⁰Tura ju nungkanam jumchik kinta wait wajau asakrumin, Yuska yamaikia atumin: Tunaarinchau wajastaram tusa pengker awajtamsatnuitrume, tura kiakaatmartinuitrume, tura tuke inaitutsuk umirtuktaram tusa yainmaktinuitrume. Yuska atumin tuke anenmau asa: Jesucristojai tsaniasrum ni paaniuri tuke wainkataram tusa untsurmakmiarume. ¹¹Yusnaka aints ainau tuke mash: Ameketme kakarmam tiartinuitai. Tu ati.

Inangnamu chicham akupkamuri

¹²Ii yachi Silvano Criston miatrusang umirui, tu nintimsan pujakun, ju papin sutarchin atumin aatu asan, junaka atumin suramsati tusan akuptajrume. Ju papin aaran: Yuse nekas wait anengkraitairingkia tu awai tusan nekamtikjarme. Ju chicham antukrum, Yuse nekas anengkraitairi nintimsaram: Yus tuke aneataram tajarme.

¹³Cristonu ainau Babilonianam pujuinau Yus atumjai metek eakmau asar chichaman akupturminawai. Wina uchir Marcoscha nunisang atumin chichaman akupturmarme. ¹⁴Pengker nintimtunisrum aneenisrum: ¿Pengkerak pujaram? tunaitaram.

Cristonu ainautirmin mash Yuska pengker nintimtunisar angkaan pujustinun suramsarti. Maaketai.

Pedro Papin Ataksha Akupkamuri

Chicham akupamuri

1 ¹Wiitjai Simón Pedroitjai. Wikia Jesucristo inatiri asan, Cristo akupkamuitjai. Iijai metek Jesucristo nintimtautirmin ju papin aaran akuptaj-rume. Ii Yusri tura iin uwentikramratin Jesucristo nekas pengker asamtai, iikia ni tuke nekasampita taji. ²Ii Apaachiri Yus tura ii Apuri Jesúscha tu pujawai tusaram paan nekau asakrumin, atumin tuke wait anentraminak pengker awajtamsarti, tura angka tuke pengker pujustinnasha suramsarti tusan tajarme.

Cristonu ainau pujutri pachis timiauri

³Cristo tu pujajai tusa, iin paan nekamtikramau asa: Wína paaniursha, tura wína pengker pujutrusha wainkataram tusa, iin eatmaku asamtai, Yus wakera nunisrumek pujustaram tusa, ni kakarmarin suramsawaitji. ⁴Niisha juun asa tura tujinkachu asa, ni chichamen ukunam atiniun pachis suramsamijai. Nu chichamka nekas kakarmaitai tura pengkeraitai. Nu chichamjai atumsha atumi namangke wakeramuri nepetkaram, Yuse uchiri wajastinuitrume. ⁵Tu pujakrumka Cristo nekasampita tinu asaram, pengké tunaarinchau pujustaram. Tura asaram ¿Yuse wakeramuri itiurak aa? tusaram nekaataram. ⁶Tura nu nekaaram, atumi wakeramuri nepetkaram. Tura wait wajakrumsha jaimiasrum nepetkau ataram. Tura tu pujakrum,

Yuska nekas miatrusrumek umirkataram. ⁷Tu pujakrum Cristonu ainau pengker nintimtustaram. Tu pujau asaram mash aints aneetaram.

⁸Tura tuke inaitsuk nu turakrumka, ii Apuri Jesucristo tu pujawai tusaram, nekau asaram nangkamrumka pujuschat-nuitrume, antsu ni wakeramuri miatrusrumek umiktinuitrume. ⁹Antsu aints tu pujachuka, yanchuk ii Apuri ni tunaarin japiramaitiat, nunaka kajinmaru asa, wainmichua tumau tura paanchau wainmawa tumawaitai. ¹⁰Yatsur ainautiram umaarutirmesha, Yus atumin untsurmak eatmaku asamtai, nu chichamka tuke nintimsaram kajinmatsuk asataram. Tu pujakrumka tunauka pengké turashtinuitrume. ¹¹Tura ii Apuri Jesucristo nayaimpinam tuke puja nuka iin Uwentikramratin asa, tuke pujustinun suritramtsuk atumin ni pujutirin juramkitnuitrume.

¹²Tura asa Yus nu nekas chicham nekaataram tusa atumin nekamtikramau asamtai, nuka mash nekatratrum kajinmakiram tusan, atumin tuke inaitsuk nintimtikjarme. ¹³⁻¹⁴Tura asamtai iwiaaku pujaja juwik atumin nintimtik-ratnuitjarme tu nintimjai. Ii Apuri Jesucristo: Ami jakatniuram jeatak wajasi tusa nekamtikruau asamtai, wikia juningkia nukapka pujuschatatjai tusan nekajai. ¹⁵Tura wi jakamtai, wi aaja juka kajinmakiram tusan, paan aartasan wakerajai.

Cristo kakarmarin wainkamiaji timauri

¹⁶Ii Apuri Jesucristo kakarmari, tura ni wantinkamuri pachisar atumin etserkamiaji nu chichamka aints ainau nangkamiar etseriarmiana nuchau-yayi. Antsu ni paaniuri tura ni kakarmarisha ii jiijaisha waikau asar iisha ujakmiajrume. ¹⁷⁻¹⁸Iikia Cristojai mura pengkernum wakar, nuni pujusar nayaimpinmaya chichau antukmiaji. Ii Apaachiri Yuska paaniunmaya ni Uchirin pachis chichaak: “Juka wina Uchiruitai, wina aneetiruitai. Junaka pengker nintim-tusan pujajai,” tinu asa, ni Uchirin pengker awajsamiayi, tura ni kakarmarin iincha inakturmasmiaji.^a

¹⁹Tura yaanchuik Yuse chichame etserin ainau Cristo wantinkatnurin pachisar aarmau asaramtai, iisha ni aarmaurin aujsar: ¿Itiurak awa? tusar miatrusrik nekaatnuitji. Nu chicham nekarkia, kantijai teenam wainji nunisrik: ¿Itiur pujajai? tusar paan nekaatnuitji. Tura nu chichamka atumi nintin ukusu asaram, tsaa jiintsang angkuaji jiinua nunisang ii Apuri wantintsang, nu chichamsha warina takua tawa tusaram paan nintimratnuitrume.

²⁰⁻²¹Ju chichamka chikich chicham nangkamasrumek nintimrataram: Yuse chichame etserin yaanchuik ukunam atiniun pachisar aararmia nunaka aints kichkisha ningki nintim-sarka nekaacharmnuitai. Tura aints ningki wakerak ukunam atiniun pachis: Tu atinuitai tichamnawaitai. Antsu Yus akupkamu ainau Yuse Wakani nintimtikramu asar, Yuse chichamen tu awai tusar etserkarmiayi.

Anangkartin ainaun pachis timauri

(Jud. 4-13)

2¹Yaanchuik ii juuntri pujuinamunam wait chichaman etserin ainau wantinkarmia nunisarang wait chichaman nuikiartin ainau yamaisha wantinkartinuitai. Nu aints ainauka wait chichamnaka uukar nuikiartin ainawai. Tura asar ii Apuri waitnas jaka ii tunaarin akiimiatramkau waininayat, nuka waitaitai tusar pachinatsui. Tura aints ainaun anangkawaru asar, ni wait wajakartintri jeatak wajasi. ²Tura asaramtai nu wait chichaman nuikiartin ainau pasé turinamun wainkar, nuna umirin asar, nusha nunisarang tunau turawartinuitai. Nu aints ainauka: Yuse chichamen nuikiartinuitjai tinayat, timiá pasé turinau asaramtai, unturi aints ainau Yuse nekas chichamenka pachisar pasé chichakartinuitai. ³Nu aints ainau wait chichaman nuikiartamunam akiam kuikiartin wajastaj tu nintiminawai. Tura asar aints tu pujuinauka mengkakartin ainawai, Yus yaanchuik timiau asa, ni wait wajakartintri jukiartin ainawai.

⁴Yuse awemamuri ainausha tunau takasaramtai, Yuska pengké tsangkurachmiayi. Antsu nayaimpinmaya jiiki tee amanum akupkamiayi. Tura tee amanum jirujai jingkiar, ukunam wait wajakartintri nakasarti tusa metamu ainawai.

⁵Tura yaanchuiksha aints tunau turinaunka Yuska tsangkurachmiayi. Antsu nu aints ainaun amuktas, nujang nujangkruali tusa yumin akupkamiayi. Antsu Noé: Yus umirkataram tusa, uwemratin chichaman etsermaun antukar nekasampita tinu asar, ni weari siete (7) ainaujai uwemrarmiayi.^b

⁶Tura Sodoma yaktancha, tura Gomorra yaktancha jijai keemak yukuu

najana inaisau asa, chikich Yusen umirchau ukunam akiinawartin ainauka nuna nekaawar nintimrarmi tusa, nu yakat ainaun Yuska keemakmiayi.^c

⁷Antsu chikich aints, Lot naartin péngke aints asa, tunau timiá wakerin ainaun wainak, wake mesekmia nunaka Yuska uwemtikramiayi.^d ⁸Nu pengke aintska tunau ainamunam pachinkau asa, kashincha kashincha ni tunau turinamun wainak, tura ni tunau chichainamuncha antuk, napchau nintimias wait wajamiayi.

⁹Tura asamtai ii Apuri ni aintsri ainautinka tunaanum pachinkau arining, nu tunaanumiangka uwemtikramrat-nuitji. Tura ii Apuri ukunam taamtai, Yusen umirchau ainau tuke wait wajakartinum jeartinun wainiat yamaikikia pujas pujurui. ¹⁰Nu aints ainauka ni wakeramurinak najanin armiyai. Tura inakratin ainaun pachisar pasé chicharin armiyai. Nuka ni namangke wakeramurinak nintimsar nuke najaninak, ii Apurin umirtan nakitinau asaramtai, Yuska wait wajakartinum akupkartinuitai. ¹¹Antsu Yuse awemamuri junia aintsun nangka-masarang kakaram tura juun ainayat, nu inakratin ainaun Yus inaikiamu asaramtai, nunaka pachisar paseeka chicharinatsui.

¹²Pachim ainau nintinchau asar, aya jakatniunam akiinin asaramtai achikiar mainawai. Anangkartin ainausha pachimia nunisarang nintinchau asar, tura pasé chichau asar jakartin ainawai. ¹³Tura chikich ainaun pasé awajsaru asaramtai, Yuska nincha pasé awajarti-nuitai. Nu aints ainauka kintajai metek ni wakeramurin najaninak nakurinawai. Tura atumjai tsaniasar fiesta najanami tusar anangminak: Pengker nakuraji

tinayat, nekasar natsanpiaku aa nuna turinawai.

¹⁴Nu anangkartin ainauka nuwanka wakerutskeka jijnatsui. Tura tunau turutnaka yawetinatsui. Tura Criston umirkartatkamawar yuuminatinak pujuinauncha tunaun pachitsuk turuwarti tusar wakerumtकिनawai. Tura chikichnau ainia nunasha mash wakerinawai. Tura asar tuke mengkakartaunuitai. ¹⁵Nu anangkartin ainau uwemratin jinta tupin aa nunaka menankiarmiyai. Tura asar Beora uchiri Balaama nunisarang ainawai. Balaam yaanchuik Yuse chichamen etserin ayat, kuikian nukap wakerau asa, Yusen umirtan inais tunaun turamiayi. ¹⁶Tura tunau nintimias wekaamtai, ni burrori chichakchamnau wainiat, ni tunau nintimaurin inaisat tusa, Yus ni burrorin chichamtikiamiayi.^e

¹⁷Nu anangkartin ainauka nungka taimua nunisarang ainawai. Aints yumin shikikiartas nungkan tainayat, yumi jijnchau asamtai inainawai. Tura yurangmia nunisarang ainawai. Esat amanum yurangkim nungkan chuprat tusar, aints ainau nakainawai. Tura wainiat nase ampuam yurangmikia mengkawai. Tura nu aints ainau tuke anangkartin asaramtai, ni tuke teenam wait wajakartintri yanchuk umismawaitai. ¹⁸Nu aints ainauka: Miajuitjai tusar nangkamiar chichainawai. Tura tunau takainau asar, ni wakeramurin najaninak, chikich aints ainau yanchuk tunaarinka inaisaru waininayat, ataksha tunaun takamtiksartas wakerinawai. ¹⁹Nu aints ainauka tunau nepeteamu asar tunau inatiri ainawai. Tura asar chikich aints ainaun anangkinak: Atumsha iiya nunisrumek turakrumka, angka pujustinuitrume tinayat, niisha tuke tunau nintiminau asar angkanchau

ainawai. Tura asamtai aints ainau mash tunaun turina nuka tunau inatiri ainawai.^f

²⁰Ii Apuri Jesucristo, iin Uwemtikram-ratin aa nuka aints ainautin yaanchuik nintimtikramrau asamtai, ju nungkan-maya ainau tunau turutirinka inaisariat, ataksha wakеткиar nu tunaujai jingkiama nunisarang pujuinauka yaanchuik pasé pujuarmia nuna nangkamasarang pasé pujuinawai. ²¹Nu aints ainauka yaanchuik Yuse chichame umiktaram tamaun antukariat, ataksha tunaun waketruiaru asar, timiá pasé pujuu ainawai. Antsu nu jintan nekaawarchawaitkunga timiá pengker acharaintash. ²²Antsu aintsu timiauringkia nuwaitai: “Yawaa inukiat ataksha wákeki ni inukmaurinak yuwawai. Kuchisha pengker imaimaitiat, ataksha wakетки pakuinum maakimui.” Nu timiaujai metek nu aints ainausha nunisarang ataksha tunaun waketruiaru ainawai.^g

Ii Apuri tatintri pachis timiauri

3 ¹Aneetir ainautiram, wi yaanchuik atumin papin aatran akuptukmiaj-rume. Tura yamaikia ataksha juna aatran akuptajrume. Wi papin jimiaran aatran: Kajinmatsuk Yus umirkataram tusan, atumin nintimtikratan wakerajrume. ²Yaanchuikia péngke aints ainau Yuse chichamen etserin asar, chichaman etserkarmia nusha nintimrataram. Nunia ii Apuri iin Uwemtikramratin aa nuka, atumin ni chichamen nekamtikramatas ni nuiniatiri ainautin akupkau asamtai, ni chichamengka nintimrataram.

³Chikich chichaman nangkamasnak ju chichaman atumin nekamtikiatasan

wakerajrume. Kinta inangnamunam wishikiartin ainau ni wakeramurin tuke najanawartas: Yus wishikrami tusar taartinuitai.^h ⁴Tura chichainak: “Cristo: Wikia ataksha taratatjai tímia nuka ¿waruka taatsua? ¿Nangkami waitrak tichayawash? Ii juuntri ainau tuke waitsuk mash kajingkiarmiayi. Antsu Yus nu nangkamtaik najanamun ainauka mash tuke nunisarang ainawai,” wishikina tiartinuitai. ⁵Tura Yus yaanchuik nungkancha, tura nayaimpincha najanamia nunaka nu aints ainauka nekatan nakitinawai. Tura nungkancha juun entsanmaya tsapuimiayi. Tura juun entsasha nungkan tenteati tusa, aya chichasang Yus najanamiayi.ⁱ ⁶Nuniangka juun entsa nujangkruamta, Yus nungkancha mesramiayi. Antsu nu wishikiartin ainauka nu nekatnaka nakitinawai.^j ⁷Tura Yus tu ati tinu asa, nayaimpisha tura nungkancha yamai ainia nuka ukunam jijai epeami tusar ukusmau ainawai. Tura tunau ainau amukatin kinta jeamta, Yus nayaimpincha tura nungkancha jijai keemaktinuitai.

⁸Aneetir ainautiram nusha kajinmakirap: Ii Apuringkia kichik kintan wainiat kichik warang musachia nunisketai tu nintimui. Tura kichik warang musach kichik kinta nunisketai tu nintimui.^k ⁹Aints ainau ii Apurin pachisar chichainak: ¿Wi taratatjai, tímia nuka waruka taatsua? tu chichainau wainiat ii Apuri: Wi turatnuitjai, tímia nunaka umitsuk pujuschamnawaitai. Antsu iin anenmau asa, aints kichkisha mengkakacharti tusa, antsu mash ni nintimaurin yapajiawar wina umirtukarti tusa wakerawai.^l

¹⁰Tura kasa aints aneachmau tatinua nunisang ii Apuri kintari aneachmau

f 2.19 (Juan 8.34; Rom. 6.6-7, 16) g 2.22 (Mat. 12.43-45) h 3.3 (1.Tim. 3.5; Jud. 18) i 3.5 (Gén. 1.6-9; Sal. 24.1-2) j 3.6 (Gén. 7.11) k 3.8 (Sal. 90.3-4) l 3.9 (Eze. 33.11; Hab. 2.3)

jeatnuitai. Ii Apuri tatin kintari jeamtai, ipiamat chichaawa nunisang nayaimpinam aa nunaka mesratnuitai. Tura ju nungkasha keek, tura aintsu wariri ainausha mash keektinuitai. Tura mash esawar mengkaratnuitai.^m

¹¹Yus mash aa nunaka mesratin asamtai, atumka nekasrum tunau takatsuk, antsu Yus wakera nunisrumek pujustinuitume. ¹²Yus nayaimpinam aa nunaka jijai keemakamtai, mash aa nu uukjaj keek, timiá tsuwen asa, jiru ainausha kuwarar entsa nunisarang wajakiartinuitai. Nu kinta wári jeati tusaram, nekasrum nukap wakerau asaram nakastaram. ¹³Yuska yaanchuik chichaak: Nayaimpincha tura nungkancha mesran yamarman najanatnuitjai, tinu asamtai, Ni tímia nunisang umiktatuapi tusar iisha nakaji. Nu yamaram nayaimpinmaka, tura yamaram nungkanmaka tunauka kichkisha atsutnuitai.ⁿ

¹⁴Aneetir ainautiram, nu kinta jeati tusaram nakau asakrumin, ii Apuri taa, iincha nekasr angkan pengker nintimtu-nisar tunaarinchau pujarin, tura miatrusrik umirkur pujarin waitmakmi, tu nintimsaram pujustaram. ¹⁵Tura ii Apuri iin uwentikramratas nukap nakarmaji, tu nintimsaram pujustaram.

Yus iinu aneetiri yachi Pabloncha ni nekamtairin susamu asa, nusha nunisang ukunam atiniun pachis atumniaka aatramramiarume. ¹⁶Ni aarmia nuka mash wi taja nuna pachis chichaawai. Turayat ni aarmauri mashkia te paanka nekaachmin ainawai. Tura nekachu ainau, tura Yusen miatrusarang umirchau ainausha Yuse chichame chikich aints aarmaunasha yapajina nunisarang Pablo aarmaurincha yapajia-war niishá nuikiartinawai. Nuna turinau asar ningki wiasmaminawai, tura asar mengkakartin ainawai.

¹⁷Aneetir ainautiram, nungka amukatin kinta jeatsaing, iikia atumin ujakmau asaram, pasé nintintin ainau wína anangkruwarai tusaram aneartaram. Tura pengker nintimsaram pujayatrum, tu pujamurun inaisai tusaram aneartaram. ¹⁸Tura ii Apuri Jesucristo, iin Uwentikramratin aa nuka, atumin wait anentramau asamtai, atumsha nunisrumek chikich ainausha wait anentakrum pengker awajsataram. Tura ii Apuri itiu awa tusaram, yamai nekarme nuna nangkamasrumek nekaataram. Aints ainau mash yamaisha, tura ukunmasha tuke inaitsuk ii Apurin Jesucriston waramtikarti. Tu atí.

Juan Papin Eemak Akupkamuri

Tuke pujutan sukartin aa nu pachisar timiauri

1 ¹Yaanchuik nungkan najantsaing, Yuse Uchiringkia tuke pujuu asa, tuke pujustinun sukartinuyayi. Tura tuke pujuya nuka iin chichartamak pujamtai, iisha ni chichame antukmiaji. Tura waintasha wainkamiaji. Tura itiur pujumia nusha paan wainkau asar, ni namangesha ii uwejejai takasmiaji. Nuna pachisan atumin aatjarne. ^a ²Nu tuke pujustinun sukartin asa, ni Apaachiri Yusjai nayaimpinam pujayat, aints ainau waitkarat tusa nungka taramiayi. Ii Apaachiri Yus nu pujutnasha nekaamtikramamiaji. Turamtai nusha wainkau asar, nu pachisar chichaakur, atumnasha nu chichamnasha ujaigrume. ^b ³Tura asar iisha nekasar ii Apaachiri Yusjai, tura ni Uchiri Jesucristojaisha pengker nintimsar pujaji nunisrumek atumsha ijai pengker nintimtunisrum pujustaram tusar, ii wainkamu tura ii antukmau ujaigrume. ⁴Tura atum nekasrum nukap warastaram tusan junaka aatjarne.

Yuska paantaitai timiauri

⁵Ju chichamnaka Jesucristo iin nuitam-
rau asamtai, juka iisha antuku asar
yamaikia atumin ujaigrume. Yuska nekas
paantaitai. Tura asa niinka teeka pengké
atsawai. ⁶Antsu iisha tuke tunau turin asar,

teenam pujuinawa nunisrik pujayatrik,
Cristojai tsaniasar pujaji takurkia waitraji.
Tura wait chicham chichaakrikia, nekas
pengker aa nuka turatsji. ⁷Antsu iisha Yuse
paaniuri nintimsar pujakrikia, Yus pujawa
nunisrik iisha pujaji. Tura chikich ainaujai
iruntrar pengker nintimtunisar pujaji. Nu
turakrikia, Yuse Uchiri Jesucristo iin
jarutramak, ni numpe numparu asa, ii
tunaarin mash japitramji. ^c

⁸Iik nintimtumasar: Wikia tunaachawait-
jai takurkia nuka anangmamkur taji. Tura
asar wait chicham etserji. ⁹Antsu ii tunaari
ii ujaamka, Yus nekas pengker aa nuka ni
chichamen tuke umiu asa, ii tunaarin mash
tsangkutramji, tura ii tunau nintimaurincha
mash japitramji. ¹⁰Yus aints ainautin mash
tunau ainiarme tusa nekarmaji. Tura
wainiatrik iikia: Wina tunaaruka pengké
atsawai takurkia, Yuska waitaitai taji. Tura
nu takurningkia, ni chichamengka ii
nintinka pujurtamtsuji.

Yusen chichartamsatnuka Cristoketai

2 ¹Uchichir ainautirmin, tunau
wajasairam tusan atumin aatjarne.
Tura aneachmau tunau turakrin, iin
chichartamsatnusha pujawai. Nuka
Jesucristoketai, nekas tunaarinchawa
nuwaitai. Nuka iin pachitmas: Wisha nu
aintsu tunaarin sakartaj tusan jakamiajai
tusa, ni Apaachiri Yusnaka chichartamji. ^d

a 1.1 (Juan 1.1, 4; 1.Juan 2.13-14) b 1.2 (Juan 1.14, 18) c 1.7 (Apoc. 7.14)
d 2.1 (Rom. 6.11-13)

²Jesucristoka ii tunaarin sakturmartas jarutramkamiaji. Antsu ii tunaarinak sakturmartaska jarutramkachmiaji, antsu mash nungkanmaya ainau tunaarincha sakartas jakamiayi.

³Yus umirkatin chichaman akupkamia nu chicham umirkurkia: Yuska tuyapi pujawa tusar nekaamnawaitji. ⁴Tura aints nangkami chichaak: Yuska tuyapi pujawa tusan nekajai tayat, Yus umirkatin chichaman umitsuk pujakka waitrawai, tura asa nekas chichamnaka chichaatsui.^e ⁵Antsu aints Yus tímia nuna umirkungka, nuka Yusen miatrusang aneawai. Tura asamtai iisha Yus aneakrikia: Iikia Yusnawaitji tusar nekaji. ⁶Aints: Wikia Yusnawaitjai takungka, Jesucristo ju nungkanam pujumia nunisang niisha pujustinuitai.

Yamaram chicham etserkamuri

⁷Aneetir ainautiram, umirkatin chicham yamaram aa nunaka aatsujrume. Antsu nu nangkamtaik umirkatin chicham antukmiarume nunak aatjarne.

⁸Antsu kinta tsawaarak paantin wajamtai, nekas teeka mengkawai. Tura asamtai yamaram chichaman Cristo akupkamia nuka, tura atumsha umirume nuka nekas paan asamtai, chichaman atumin aatjarne juka yamarmaitai.^f

⁹Aints: Wikia nekas paaniunam pujajai tayat, Cristo nemarniun chikichan kajerakka paaniunmaka pujatsui, antsu tuke teenam pujawai. ¹⁰Antsu chikich ainaun aneauka nekas paaniunam pujawai. Tura asamtai chikich aints nu aintsnaaka tunaanaka pengké takamtik-tsui. ¹¹Antsu aints chikich ainaujai kajernai pujakka, tuke teenam pujawai. Tura teenam pujau asa, wainmichua nunisang tuning wekaa tusangka nekatsui.^g

¹²Uchichir ainautirmin, Jesucristo ni jakamurijai atumi tunaarinka tsangku-tramrau asamtai, atumin aatjarne.

¹³Uchirtin ainautirmin, Cristo nu nangkamtaik tuke pujuya nu: Tuyapi pujawa tusaram, nekau asakrumin atumniasha aatjarne. Natsa ainautirmin, atum iwianch nepetkau asakrumin atumniasha aatjarne.

¹⁴Uchichir ainautirmin: Ii Apaachiri Yus tuyapi pujawa tusaram, nekau asakrumin atumin aatramiajrume. Uchirtin ainautirmincha, Cristo nu nangkamtaik pujumia nu: Tuyapi pujawa tusaram nekau asakrumin atumniasha aatramiajrume. Natsa ainautirmincha, atum kakaram wajasrum, Yuse chichame atumi nintin ukusu asaram, tura iwianch nepetkau asakrumin atumniasha aatramiajrume.

¹⁵⁻¹⁶Ju nungkanmaya ainau wakerina nuka Yusnumianchuitai, antsu ju nungkanmayaintai. Tura asamtai ju nungkanmaya ainau aneena nuka aneenirap. Ju nungkanmaya ainau aneetiringkia nuwaitai: Ni namangke wakerana nuna tura ni jijjai wainmaan wakerina nuna tura miajuitjai tu nintimtumina nuna ju nungkanmaya ainau aneenaawai. Tura asar nuna aneena nuka ii Apaachiri Yusnaka aneena-tsui. ¹⁷Ju nungkanam aa nuka mash mengkakatnuitai. Tura ju nungkanmaya ainau timiá wakerina nuka mash mengkakatnuitai. Antsu Yuse wakeramur-in najaninak pujuinauka tuke iwiaaku pujusartinuitai.

Nekas chicham tura wait chicham pachisar etserkamu

¹⁸Uchichir ainautiram, nungka mesertin kinta jeatak wajasi. Atumka Cristo nemase tatatui tamausha

antukmiarume. Yamaikia Cristo nemase untsuri wantinkaru asaramtai, nungka mesertin kinta jeatak wajasi tusar iisha nekaji.^h ¹⁹Nu aints ainau iijai iruntrar pujuinayat, nekasar Criston umirchau asar jiinkiarmaiya. Antsu Criston umirka-ruitkungka, iijai tuke iruntrar pujuscharayash. Tura Criston umirinachu asar, iiniangka jiinkiaru asaramtai, iisha nuka paan nekaji.

²⁰Cristo atumin Yuse Wakanin suramsau asamtai, mash paan nekarme.ⁱ ²¹Atumka nekachuitrume tu nintimsanka atumniaka aatsujrume. Antsu chicham nekasa aa nu nekau asakrumin aatjarme. Tura asamtai chicham nekasa aa nuna chichainauka wait chichamnaka chichainatsui. Atumsha nusha nekarme. ²²¿Jesúsán pachisar wait chichaman etserin ainauka warintinawa? Nu aints ainauka: Jesúska Yus akupkachmawaitai tinawai. Nuka Criston nakitinak: Yuse Uchirinchoitai tinau asar ni nemase ainawai. Tu tinau asar Yusnasha pachinatsui. ²³Jesúska Yuse Uchirinchoitai tauka nuka Yuse uchirinchoitai. Antsu Jesús Yuse Uchirinchoitai tauka nuka Yuse uchirinchoitai.^j

²⁴Tura asamtai chicham nu nangkamtaik antukmiarme nu tuke atumi nintin ukustaram. Nu turakrumka Yuse Uchirijai, tura ni Apaachiri Yusjaisha tsaniasrum pujustinuitrume. ²⁵Jesucristo iin chichartamak: Pujut nangkankashtinun nekasan susatnuitjarme turammiaji.

²⁶Aints atumin anangkraminak pujuinaun pachisan ju chichamnaka aatjirme. ²⁷Antsu Yus ni Wakanin atumin akupturmakmia nu atumi nintin tuke pujurtamu asa, mash aa nuna atumin nuitamrume. Yuse Wakani nuikiarta nuka nekasantai. Antsu wait chichamnaka

atumniaka nuitamtsurme. Tura atumin nuitamu asamtai, chikich aints wina nuiturat tusarmeka yuumatsrume. Tura asaram Yuse Wakani atumin nuitamr-
mia nu nintimsaram Cristojai tuke tsaniasrum pujustaram.

²⁸Uchichir ainautiram nawantrutirms-
sha, Cristojai tsaniasrum pujustaram. Nu turakrumka, Cristo wantinmatai, iisha natsaamtsuk pengker nintimsar Nijai ingkiunikitinuitji. ²⁹Atumsha Jesucristo nekasa pengkeraitai tusaram nu nekakrumka, aints pengker aa nuna tuke turinauka nekasa Yuse uchiri ainawai tusaram nekarme.

Yuse uchiri ainaun pachis etserkamu

3 ¹Nintimratarum. Ii Apaachiri Yus iin timiá anenmau asa: Wina uchiruitrume turamji. Iin turamu asamtai, nekasa Yuse uchiri ainiaji. Tura asakrin ju nungkanmaya ainauka Yusen nekainachu asar iinka: Juka Yuse uchiriyampita tusarka nekaminatsji.^k ²Aneetir ainautiram, yamaisha Yuse uchiri ainiaji. Tura ukunmasha warukatnukitaiju nuka yamaikikia nekatsji. Antsu Cristo wantinkamtai, warukuita tusar paan wainkau asar, iisha Niya tumau atinuitji. Iisha nusha nekaji.^l ³Tura Jesucristo pengké tunaarinchau asamtai, ni tatintrin nakainak pujuinausha Cristo pengké tunaarinchau pujawa nunisarang pujusartas ni tunaarinka ukuinawai.

⁴Aints tunau takauka Yuse akupamurinka umirtsui. Tura Yuse akupamurin umirchauka tunaun turawai. ⁵Jesucristo aints ainauti tunaarin tuke mash sakturmartas ju nungkanam taramiayi. Tura Cristoka pengké tunaarinchauyayi. Atumsha nusha nekarme.^m

⁶Aints Criston nintimias pujakka, tunaunumka tukeka pujatsui. Antsu aints

tuke tunau takauka: Cristo tu awai tuuka nintimsuk pujawai, tura Cristosha itiu pujawa tusangka pengké nekatsui.

⁷Uchichir ainautiram, aints kichkisha atumin anangkramawarai tusan nunasha tajarme: Cristo nekas pengker asamtai, aints pengker aa nuna takauka pengkeraitai. ⁸Antsu Yus aints ainaun najantsaing, Satanás tuke tunaarintin pujuyayi. Tura asamtai aints tuke tunau takauka Satanásnawaitai. Tura wainiat Yuse Uchiri Satanása takatrin mengkaaktas taramiayi.ⁿ

⁹Yuse uchiri ainu Yusnumia akiinuu asar, tunaanumka tukeka pujuinatsui. Tura Yuse uchiri asar, tunaanumka tukeka pujuschartin ainawai. ¹⁰Tura asamtai ¿yaachita Yuse uchirisha, tura yaachita Satanása uchirisha? tusar nekaatnuitji. Pengker aa nuna turichuka, tura chikich ainaun aneechuka nekas Yuse uchirinचितai tusar nekaatnuitji.

Aneenimi timiauri

¹¹Chicham nu nangkamtaik antukmia-rume nuka nuwaitai: Aneenimi.^o ¹²Antsu aints Cafn naartin yaanchuik pujumia nunisrikia acharmi. Nuka Satanásnau asa yachiin maamiayi. ¿Tura warukang maaya? Ni yachí Yusen miatrusang umirak pengker aa nuna takau asamtai, antsu ningkia tunau takau asa, yachiinka kajerak maamiayi.^p

¹³Yatsur ainautiram, ju nungkanmaya ainu atumin kajertaminamtaisha: Maj ¿warukantsuk iincha kajertaminai? tuuka nintimsuk asataram. ¹⁴Yaanchuikia jakawa nunisrik pujayatrik, yamaikia Yus umirkurkia, tuke Yusjai iwiaaku pujustinuitji. Iikia Cristonu ainu aneau asar nuka nekaji. Antsu chikich ainu

aneetsuk pujuinauka tuke jakawa nunisarang pujuinawai. ¹⁵Aints chikich ainaun kajernuka mangkartin aintsua nunisketai. Tura aintsun maatas wakerauka pujut nangkankashatinaka nintimias pujuschamnawaitai. Atumka nusha nekarme. ¹⁶Jesucristo iin jarutram-kau asamtai, ni anengkratairisha nekaji. Iin timiá anenmau asamtai, iisha nunisrik Yusnau ainu aneau asar, ni iwiaaku pujusti tusar iisha jakatnuitji.^q ¹⁷Aints ni yutairin tura ni entsatirin takakiat, ni yachí waitnas pujau wainiat, wait anentachkungka ¿itiur Yusnasha ni nintijaisha aneeting? ¹⁸Wina uchichir ainautiram, aya chichasrikia: Aneajme tutsuk asarmi. Antsu nekasar pengker aa nu turakur yainikmi tajarme.

Natsaamtsuk Yuska seatnuitji timiauri

¹⁹⁻²¹Aneetir ainautiram, ii nintijai: Tunaawitjai tutsuk pujakrikia, natsaamtsuk Yuska seatnuitji. Tu pujakrikia, Yuse chichame nekas aa nu umiruitji titinuitji. Tura asakrin Yus mash nekau asa, ii nintincha nekarmaji. Tura Jesús aints ainaun aneemia nunisrik aneetatkamar yuumataji tusar, napchau nintimsar pujarin wainiat, Yus ii nintincha nekau asa nekas iincha paan nintimtikramji, tu nintimsar pujustinuitji.^r ²²Yus tu seakrin-kia Yus: Wina chichamur umirtuktaram tusa akupturmakmijai nu umiru asar, tura ni wakeramurisha umiru asakrin ii seaji nunaka mash suramsatnuitji.^s ²³Yus ni chichamen: Umirtuktaram tusa, akupturmakmijai nuka juwaitai: Wina Uchir Jesucristo nekasampita titaram, tura wi chichaman akuptukmiajrume nunisrumek aneenitaram.^t ²⁴Aints Yuse chichamen umirak pujakka, nuka Yusjai

tsanias pujawai, tura Yuscha nijai tsanias pujawai. Tura asar mai kichkia nunisarang ainawai. Tura Yuse Wakani ii nintin pujurtamu asantai, Yuska iijai pujawai tusar nekaji.^u

Yuse Wakani tura Cristo nemase wakani pachisar etserkamu

4 ¹Aneetir ainautiram, ju nungkanam wait chichaman etserin untsuri irunui. Tura nuka: Wisha Yus akupkamuitjai nangkamiar tinu ainawai. Tura asaram nekachiatrumek: Nekas Yus akupkamuitai tiirap. Antsu ¿Nekasash Yuse Wakanijai chichaa? tusaram nekaataram. ²Nu nekaatasrum wakera-krumka tu nekaatnuitrume. Aints Jesúsán pachis: Nuka Yuse Uchirintiat, nekas aints wajas junia aintsua nunisang akiinamiayi, tu chichaakka, Yuse Wakanijai chichaawai. ³Antsu aints Jesúsán pachis tu chichachuka Yuse Wakani ni nintinka pujatsui. Antsu Cristo nemase wakani ni nintin pujawai. Tura Cristo nemase wakani tatinuitai tamauka antukmarume. Nu wakantrintin yanchuk ju nungkanam taawitai.^v

⁴Uchichir ainautiram, atumka Yusnau asaram, Yuse Wakani atumi nintin pujawai. Antsu ju nungkanmaya ainau nintin iwianch pujawai. Antsu atumi nintin puja nuka timiá kakaram asantai, atumsha nu wait chichaman etserin ainau nepetkawaitrume. ⁵Nu wait chichaman etserin ainau ju nungkanmaya asar, aya nungkanmaya aa nuna pachisar chichainawai. Turinamtai ju nungkanmaya ainau nuna chichamenka pengker anturinawai. ⁶Antsu iikia Yusnawaitji. Tura asakrin Yusnau ainauka iinu chichamen anturtaminaji. Antsu Yusen

umirchau ainau iinu chichamenka anturtaminatsji. Tura asaramtai ¿yaachia Yuse Wakani nekas aa nuna umirua? tura ¿yaachia anangkartutai wakan aa nuna umirua? tusar nekaamnawaitji.^w

Yuska tuke anengkratui timiauri

⁷Aneetir ainautiram, aneeniamuka Yusnumia winau asantai, iisha aneenimi. Yusen aneenauka Yuse uchiri ainawai. Tura asar Yus tuyapi pujawa tusar nekainawai. ⁸Yuska tuke anengkratnuitai. Antsu chikich ainaun aneetsuk pujauka: Yus tuyapi pujawa tusangka nekatsui. ⁹Yus iin timiá anenmau asa: Atum wina Uchirjai tuke iwiaaku pujusmintrum tusa, ni Uchirin kichik amia nuna ju nungkanam akupturmakmijai. Tura asa ni anengkratairin paan nekamtikramamijai.^x ¹⁰Yuse anengkratairingkia nuwaitai: Iikia Yuska aneachmaitiat, Yus aints ainautinka timiá anenmau asa, ii tunaarin sakturmartas ni Uchirin akupturmakmijai.

¹¹Aneetir ainautiram, Yus iin timiá anenmau asantai, iisha nunisrik mai aneeni wajarmi. ¹²Yuska pengké wainchawaitiatrik iisha mai aneeni wajakrikia, Yus ii nintin pujurtamji. Tura asantai Yusjai metek anenin atinuitji.^y

¹³Yus ni Wakanin iin suramsau asantai, Yus iijai tsanias pujawai, tura iisha Nijai tsaniasar pujaji tusar nekaji.^z ¹⁴Ii Apaachiri Yus mash nungkanmaya ainautin uwemtikramratas ni Uchirin akupturmaku asantai, iikia nu nekau asar, nu chichamsha aints ainau ujaaji. ¹⁵Aints: Jesús nekas Yuse Uchirintai tauka Yusjai tsanias pujawai. Turamtai Yuscha nijai tsanias pujawai.^a

¹⁶Tura asantai Yuska iincha nekasampi anenmaji tusar iikia nekaji. Yuska tuke

anengkratnuitai. Tura asamtai aints chikich ainaun tuke aneauka Yusjai tsanias pujawai. Tura asamtai Yuscha nijai tsanias pujawai. ¹⁷Tura asamtai nekas aneenit nuimiaru asar, iisha Jesucristo ju nungkanam pujumia nunisrik pujaji. Tura asar Cristo aints ainau tunaaurin jiistas winamtai, iikia natsaamsuk tura shamtsuk pujustinuitji. ¹⁸Nekas aneniamunmaka shamamuka atsawai. Iikia nekasar anenisar pujakrinka sapijkia mengkawai. Antsu ii tunaarijai wait wajaktin asar shamkatnuitji. Tura asar nangkamrik shamakur pujakriki anengkratsuji.

¹⁹Yus eemak iin anenmau asamtai, iisha ni aneaji. ²⁰Tura aints: Wisha Yusen aneajai tayat, chikich ainaun kajeruj pujakka waitrawai. Nekas chikich aints ainaun aneachusha ðitiur Yusen wainchausha aneeting? ²¹Yus iincha ju chicham umirtuktaram tusa akupturmakmiaji: Yusen aneauka chikich ainauncha aneeti turammiaji.^b

Ju nungkanam ainia nuka nepetkatnuitji

5 ¹Aints chichaak: Jesúska nekas Yus akupkamuitai ta nuka Yuse uchirintai. Tura asamtai ii Apaachiri Yus aneakriki, ni uchiri ainausha aneetnuitji. ²Ii Apaachiri Yus aneakur, tura ni chichamen umirkur pujakur, Yuse uchiri ainausha nekasar aneaji tusar nekaji. ³Yus nekasar aneakriki, ni chichame: Nu umiktaram tusa iin akupturmakmiaji nu umiaji. Tura Yus aneakriki ni chichame umirkatnuka yumtichuitai.^c ⁴Nekasar tunau ju nungkanam ainia nu nepetkatariki, tu nepetkatnuitji: Yus nekasampita tusar nintimta asar, ju nungkanam ainia nuka mash nepetkatnuitji. ⁵¿Yaachia ju nungkanam ainia nuna nepetkatnuita?

Aints nekas Jesús Yuse Uchirintai tu nintimias pujauka ju nungkanam pasé aa nunaka mash nepetkatnuitai.

Yuse Uchiri pachisar etserkamuri

⁶Jesucristo ju nungkanam taamtai, entsa imiaamunam Yus chichaak: Juka wina Uchiruitai timiayi. Nunia Jesús jaka, ni numpenka numparmiayi. Jesús entsa main asamtai, nuke nekau asar Yuse Uchirintai tatsuji. Antsu iin jarutramak ni numpe numparu asamtai, Jesúska Yuse Uchirintai tusar nekaji. Tura Yuse Wakanisha tuke nekas chicham aa nunaka nekamtikiartin asa, Jesucristo Yuse Uchirintai tusa iincha nekamtikramji. ⁷⁻⁸Yuse Wakani nunia Jesúska imiaimuri, nunia ni numpe numparmauri kampatam aa nuka mash metek ainawai tusar, Jesús Yuse Uchirintai tusar nekaji. ⁹Aints ujatmakakrincha, nu antukriki nekasainta tuweaji. Tura Yuse etsermauri nuna nangkamasang nekas waitchau asamtai, ni Uchirin pachis ta nuka antuku asar nekasampita titinuitji.^d ¹⁰Aints Yuse Uchirin nekasampita tusa, ni nintijai tuke nekasampita tawai. Antsu Yusen nintimti-chuka Yus ni Uchirin pachis tímia nunaka nekaschawaitai tau asa: Yuska waitaitai tawai. ¹¹Tura Yus ni Uchirin pachis iin ujatmaji nuka nuwaitai: Wina Uchir tuke iwiaaku pujau asamtai, atumsha nijai tuke tsaniasrum iwiaaku pujustinuitrume iinka turamji. ¹²Yuse Uchirin nintimsar pujuinauka tuke Yusnum iwiaaku pujusartin ainawai. Antsu Yuse Uchirin nintimsuk pujuinauka tuke Yusnum iwiaakuka pujuschartin ainawai.^e

Inangnamu chicharkamuri

¹³Yuse Uchiri nekasampita tusaram nintimtusrum pujau asaram, tuke

Yusnum iwiaaku pujustinuitrume. Nu nekaataram tusan, ju chichamnaka atumin aatjarme.^f

¹⁴⁻¹⁵Ni wakeramurijai metek iikia Yus seakrinka, niisha anturtamji. Tura asamtai Yus wi seamka mash anturtawapi tusar nekaji. Nu nekau asar, wi seaja nunaka Yus nekas surustatuapi tu nintimsar seaji. Nu nekau asar Yuska pengker nintimtaji.^g

¹⁶Aints jatan jurumakchatatiat tunaun takauka, tuke mengkakatnunan wechau asamtai, Yus ni tunaarin tsangkurat tusaram seattiarum. Turakrumningkia Yuska nu aintsun pujut nangkankashtinun susatnuitai. Antsu chikich aints jatan jurumaktias tunaun takauka tuke mengkakatn asamtai, nu aints pachisrum Yus seattiarum tusanka tatsujrume. ¹⁷Yus umirtsuk pujakur turutisha mash

tunaawitai. Tura chikich tunau tuke jakatniunam wechatnusha ainawai.

¹⁸Yuse uchiri ainautisha Yusnumia akiinau asar, tunaanumka tukeka pujatsji. Tura asakrin iwianch iincha takarmaschamnawaitji tusar nekaji. ¹⁹Yuse aintsri ainautikia Yusnawaitji. Tura mash nungkanmaya Yusen umirchau ainauka Satanásnau ainawai. Iisha nusha nekaji.

²⁰Yuse Uchiri Jesucristo yaanchuik ju nungkanam taa: Yus nekas puja nuka tu pujawai tusa nekantikramamiaji. Tura asar Jesucristo nekas Yuse Uchiri aa nujai tsaniasar pujaji. Niisha tuke pujuu asa, iincha pujut nangkankashtinun suramji tusar nekaji.^h ²¹Uchichir ainautiram: Yuschau wainiatrum warí timiá anearme nuka atumi yusrintai. Tura asamtai chikich yuska atsuti tusaram wainkatarum. Maaketai.

f 5.13 (Juan 20.31) g 5.14 (Mat. 7.7-11; Juan 14.13-14;15.7,16;16.23-24; 1.Juan 3.21-22)
h 5.20 (Juan 17.3)

Juan Papin Ataksha Akupkamuri

Nekas chichaman tura anenitnasha pachis etserkamu

¹Wiitjai Cristonu ainau juuntrinjai. Ju papinasha Yuse uchiri iruntrar pujuinamunam akupajai. Cristo atumin eatmaku asamtai, wisha nekas anamin aneajrume. Antsu wikikia aneatsjarne. Antsu chikich ainausha nekas chicham aa nuna nekainauka atumniasha anenminawai. ²Nekas chicham aa nuka ii nintin ukusmau asamtai, tura iijai tuke pujustin asamtai, wisha atumniasha aneajrume. ³Ii Apaachiri Yus tura ni uchiri Jesucristo nekas chichaman atumin nekamtikramau asa, ni anengkratairi atumniasha nekamtikramawarti tusan, tura atumniasha wait anentramrarti tusan, tura pengker nintimsaram angka pujustinnasha suramsarti tusan aatjarne.

⁴Ii Apaachiri Yus nekas chicham aa nuka umirtuktaram tusa, iin akupturmakmiaji nuna aints atumjai pujuinauka umirinawai. Tura asaramtai wikia nuna nekaan nukap warasmajai. ⁵Yamaikia yatsur ainautirmin umaarutirmincha tajarme: Wait aneasrum aneenitaram. Chichaman akupaja juka yamarmachuitai. Antsu nu nangkamtaik antukmiaji nuketai. ⁶Nekasar Yus aneakrikia: Wina akupamur umirtuktaram tusa, Yus akupturmakmiaji nu umirkur pujustinuitji. Tura nu chichamka nu nangkamtaik antukmiarume nuka juwaitai: Nekasrum aneenisrum pujustaram.^a

Anangkartinun pachis etserkamu

⁷Ju nungkanam anangkartin untsuri irunui. Nuka Jesucristo aintsua nunisang akiinamiayi tinatsui. Aints tu pujuinauka aints ainaun anangkinau asar Cristo nemase ainawai.^b ⁸Yus atumin takatan suramsamia nuna mengkatrukai tusaram wainkataram. Antsu Yusnum tuke pujustaj tusaram aneartaram.

⁹Aints Cristo nuikiarturmaurin inais: Nuna nangkamasnak nekajai tauka Yusjaingkia pujatsui. Antsu aints Cristo nuikiarturmaurin tuke umirak pujakka, nuka ii Apaachiri Yusjai tura ni Uchirijai tsanias pujawai. ¹⁰Aints Cristo chichamen nuikiartichutiat wait chichaman atumin nuitamrartas wininamtaikia: Iijai pujusmi tiirap. ¹¹Nu aints: Iijai pujusmi takurmeka ni pasé nuikiartamuri pachisrum: Nuka pengkeraitai titinuitrume. Turakrumka nu aintsua nunisrumek tunau wajastinuitrume.

Inangnamu chicham akupkamuri

¹²Chichaman untsuri atumin ujaktasan wakerayatun, ju papinumka mashkia aatrashtatjarne. Antsu wiki atumin jiiistan nintimjai. Tura atumjai jinum ingkiunisar wainaikiar chichaakur warastinuitji.

¹³Yuse uchiri ainau Yus eakmau asar chichaman akupturminawai. Maaketai.

a 1.6 (Juan 13.34; 14.15,23-24;15.12,17; 1.Juan 5.3) b 1.7 (Mat. 7.15; 1.Juan 2.18;4.1-3)

Juan Papin Ukunam Akupkamuri

Gayon pachis pengker chichasmauri

¹Wiitjai Cristonu ainau juuntrinjai. Gayoa, ameka wína aneetir amikur asakmin ju papin aatjame. Wisha nekas an amin aneajme.^a

²Ameka wína aneamur yatsur asakmin, wikia amin pachisan Yusen seatkun: Tuke pengker pujusat tusan, tura sungkurmitsuk pujusat tusan tura tuke Yusen nintimias pujusat tusan Yusen seatjame. ³Cristonu ainau juni irasartas taar, ame nekas chicham umirmaun pachisar ujatkarantai, nuna antukan nukap warasmajai. ⁴Cristonu ainau wi etsermaurun antuku asar, Yuse uchiri wajasarmia nuka wína uchirua nunisarang ainawai. Tura asar nuka nekas chichaman umirinal pujuinamtai nukap waraajai. Nuna nangkamasnak timiá warasmintruka pengké atsawai.

⁵Ameka wína aneamur yatsur asakmin, Cristonu ainau tuke pengker wainuyame. Tura chikich yaja nungkanmaya Cristonu ainau taaramtaisha nunismek pengker wainuyame. ⁶Nu aints ainau juni taar amin pachitmasar: Iincha anenmau asa, pengker yainmakmaji tusar, Cristonu ainau iruntramunam etserkarmayi. Tura nuka ataksha amin jearamtai, ni yuumamuri susam akupkarta. Nu turakum Yus pengker awajsatatme. ⁷Nu aints ainauka Jesucristo inatiri asar, Yuse chichamen etserinawai. Tura asar Yusen umirchau ainau kuikiarlan jurutan

nakitrarmayi. ⁸Tura asaramtai nekas chicham aa nuna angka etserkarti tusar, Cristonu ainautikia yainiktinuitji, tura ni yuumamurisha susatnuitji.

Aints pasé turamuri pachis etserkamu

⁹Wikia Cristonu ainaun mash papin aatran akuptukmiajai. Tura wainiat Diótrefes chikich ainaun inartas wakerau asa, iinu chichamenka pachiatui. ¹⁰Tura asamtai wi winaknaka, ni turamurinja pachisan chicharkatatjai. Iin pachitmas waitrak tsanumu weawai. Tura Cristonu ainau Yuse chichamen etserkartas irainak taaramtaisha, juni wayaataram tatsui. Nuna turin asa chikich ainau: Iijai pujusmi tina nunasha turuwairap tusa surituweawai. Tura iijai pujusmi tinu ainaunka: Cristonu ainau iruntramunmaya jiinkitaram tawai.

¹¹Aneamur yatsuru, nu turamuka amesha nuimiaraip. Antsu pengker aa nuna turina nu nuimiarta. Pengker aa nuna turauka Yusnawaitai. Antsu tunau turauka Yusnaka nintimtsui.^b

¹²Aints ainau mash Demetron pachisar: Pengke aintsuitai tinawai. Nu tinamuka nekasaintai. Iisha nunisrik Demetron pachisar: Pengke aintsuitai takurin, amesha nuka nekasaintai tusam nekame.

Inangnamu chicham akupkamu

¹³Amincha nukap titasan wakerayatun, ju papinumka mashkia aatrashtatjame.

¹⁴Antsu wári amin jiistan wakerau asan

a 1.1 (Hech. 19.29; Rom. 16.23; 1.Cor. 1.14) b 1.11 (1.Juan 2.29;3.6, 9-10)

nuni jean, amijai jinum ingkunan
chichastasan wakerajme.

¹⁵Yatsuru, angka pengker nintimsam
pujusta. Ami amikrum juni pujuinau

amincha chichaman akupturminawai. Ii
amikri amijai pujuinaun kichkin kichkin
wisha chichaman akuptinajai.
Maaketai.

Judas Papin Akupkamuri

Chicham akupkamuri

¹Witjaj Judasaitjai. Jesucristo inatirinjai. Tura Santiago yachiinjai. Ju papin aaran akuptajrume. Ii Apaachiri Yus: Wína aintsur ataram tusa atumin anenmarme. Tura Jesucristojai tuke pujustaram tusa atumniaka waitmarme.^a ²Yus atumin wait anentramak pengker nintimsaram angka justinun tura ni anengkratairincha tuke suramsarti tusan tajarme.

Anangkartin ainaun pachis timiauri

(2 Pedro 2.1-7)

³⁻⁴Aneetir ainautirmin, Yus atumniaka uwemtikramrau asamtai, tura winasha uwemtikruru asamtai, nuna pachisan atumin nukap aatratasan wakerukmiajai. Antsu tunau ainau atumin anangkraminak: Yuska timiá anengkratin asamtai, pachitsuk tunauka turamnawaitji tinu asaramtai, nunaka yamaikia aatrashtatjarme. Nu aints ainauka ii Apuri Jesucristoncha pengké umirinatsui. Tura asaramtai yaanchuik nu aints ainaun pachis: Tu wait wajakartin ainawai, Yuse chichame tu aarmau asamtai, yamaikia tajarme: Yuse chichame pengké yapajiachmin aa nuka Yuse aintsri ainautin suramsawaitji. Tura asamtai nu chichaman yapajiawarai tusaram surimkatararam tusan tajarme.

⁵Yaanchuik Yus ni aintsri ainaun Egipto nungkanmaya jilkmiau ainayat,

ukunam Yusen umirkacharu asar jakarmiayi. Nusha yanchuk mash nekau arumning nu kajinmakiram tusan ataksha aatjarme. ⁶Yuse awemamuri ainausha yaanchuik Yusen umirkariat, ni pujutirin nayaimpinmaya jiinkiaru asaramtai, Yus niincha jirujai jingkia, tee amanum tuke jiinkichminnum engkea, ni kintari jeamtai, ni wait wajaktrintrin susartinutai. ⁷Tura Sodoma yaktasha, tura Gomorra yaktasha, chikich yaktasha arakchichu armia nusha nintimrataram. Yuse awemamuri tunaun turawarmia nunisarang nu yaktanmaya ainau tunau turin asar, nuwan nuwatinachiat tuke tsanirmin armiaiyi. Tura mai aishmangtaksha tsanirmin armiaiyi. Tura asaramtai aints mash nintimrarat tusa, Yus nu yaktancha tuke mengkakarti tusa, jijai keemakmiayi. Yamaisha nu aintsua nunisarang Yusen umirtsuk pujuinauka ji kajintrashminnum wait wajakartin ainawai.^b

⁸Tura asar nu aints ainausha atumin winiarmia nuka Sodoma yaktanmaya aintsua nunisarang ainawai. Nuka karamrajai tinawai. Tura ni namangken pachitsuk pasemamtikinawai. Tura Yusnasha umirtan nakitinawai. Tura apu ainaun pachisar pasé chichainawai.

⁹Antsu Yuse awemamuri juuntri, Miguel naartin nunaka turachmiayi. Antsu Moisés jakamtai, ni namangken jukitas wakerayat, iwianchi apuri Satanás

a 1.1 (Mat. 13.55; Marc. 6.3) b 1.7 (Gén. 19.1-24)

suritamu asa jukitatkama tujinkamiayi. Tura suritamaitiat Miguel Satanásan jiyakchamiayi. Antsu chicharak: Yus aminka chichartamkati timiayi.^c ¹⁰Tura nu aints ainauka nekainachiat pachitsuk pasé chichainawai. Tura junia nungkanam aa nunak nekainau asar, tangku nintinchawa nunisarang ainawai. Tura tangkua nunisarang ni namangken ningki mesmaminawai.

¹¹Maj, nu aints ainau Caín ni yachiin kajerak maamia nunisarang mengkakar-tin ainawai. Tura Balaama nunisarang kuikian wakerinau asar mengkakar-tin ainawai. Tura aints Coré naartinua nunisarang apu ainaun umirtan nakitinau asar mengkakar-tin ainawai.^d

¹²Atumka aneenimi tusaram, iruntra-ram fiesta najankurmeka, nu anangkartin ainau natsaamsuk nakunakut nukap yuwinawai, tura nukap uminawai. Tura Yuse chichamen etsernuitjai tinayat, Yuse aintsri ainaunka waininat sui. Tura mukunit yumi jiturchatatit nase nasentak mukuntiu juwawa nunisarang, nu aints ainausha nangkamiar chichaj pujuwenawai. Tura numi neretiri jeau wainiat, neretsuk waja nunisarang nangkamiar pujuwenawai. Tura asar numi kangkaptuk jaka kukarua nunisarang ainawai. ¹³Nu anangkartin ainauka juun entsa tamparamuria nunisarang ainawai. Tura tuke natsanpiaku aa nuna turin asar, entsa tamparak sauran entsa yantamen ajapa ukukmiawa nunisarang japnatin ainawai. Tura yaa nayaimpinmaya teenam ayaarua nunisarang tuke mengkakar-tin ainawai.

¹⁴Nu nangkamtaik Yus Adánkan najanamiayi. Nunia Adánka weari

yajutmaki yajutmaki siete (7) amia nuka Enoc ayayi. Enocsha nu anangkartin ainaun pachis yaanchuik etsermia nuka nuwaitai: “Ii Apuri ni umirin untsuri warang ainaujai taratnuitai.”^e ¹⁵Tura tunau ainau Yusen nakitinak tunau takatan tuke inaitsuk turinau asar, tura Yusen pachisar tuke pasé chichainau asaramtai, ii Apuri nu aints ainaun wait wajaktiniun susatas taratnuitai,” Enoc etserak timiayi. ¹⁶Nu anangkartin ainauka mash ainia nuna pachisar pasé chichainawai. Tura ni namangke wakera-murinak najanin ainawai. Tura wikia miajuitjai tumaminawai. Tura wina pengker nintimtusarat tusar, chikich ainaun anangkawartas: Ameka pengke aintsuitme tinawai.

Cristonu ainaun chicham akatramuri

¹⁷Atumsha aneetir ainautiram, ii Apuri Jesucristo nuiniatiri ainau chichaman eemkar etserkarmia nu nintimrataram. ¹⁸Nusha atumin chichartaminak: “Nungka meseatsaing, aints ainau Yusen wishikinak pujusar, ni wakeramurin najanawartin ainawai,” tiarmiayi.^f ¹⁹Nu aints ainau atumin metekchau nintimtik-raminawai. Tura Yuse Wakani ni nintin engkemtuachmau asar, ju nungkanam aa nunak nintiminawai.

²⁰Antsu atumka, aneetir ainautiram, Yus nekasampita tusaram tuke inaitsuk kakaram wajastaram. Tura Yuse Wakani kakarmarijai Yus seataram. ²¹Tura Yuse anengkratairi tuke nintimsaram pujustaram. Turakrumin ii Apuri Jesucristo atumin wait anentramak pujut nangkankashtinun suramsatin kinta jeati tusaram nakastaram.

²²Tura chikich ainau tuke Criston nekasashi tinauka nekasampita tiarat

c 1.9 (Deut. 34.6; Dan. 10.13, 21; Zac. 3.2; Apoc. 12.7) d 1.11 (Gén. 4.3-9; Núm. 16.1-35; Hebr. 11.4; 1.Juan 3.12; Apoc. 2.14) e 1.14 (Gén. 5.18, 21-24) f 1.18 (2.Tim. 3.1-5; 2.Ped. 3.3)

tusaram wait anentraram. ²³Chikich ainau tunaunum pujuinau jinum epenau wakentasrum wakerarme nunisrumek tunaanumia uwentikrataram. Antsu aintsu entsatiri pakui maatrau tsuutarme nunisrumek nu aintsu tunaari nakitau asaram: Iisha tunaanum jeai tusaram, chikich aints wait anentraram.

Inangnamu Yus maaketai timiauri

²⁴⁻²⁵Yuska kichkitai. Tura mash nekawaitai. Tura asa Yus iin Uwentik-

ramratin aa nu: Tunaunum jeairam tusa, ni kakarmarijai atumin yainmaktinuitrume. Tura ni pujamunam pengké tunaarinchau pujustaram tusa, atumin nukap waramtikramsatnuitrume. Tura asamtai ii Apuri Jesucristo pachisar Yuska pengker awajsarmi. Tura asar: Ameketme juuntam tura Ameketme kakarmam, tura Ameketme Apum tiarmi. Yaanchuiksha, tura yamaisha tuke mash aa nuna inakratnuitai. Tu atí.

Jesucristo Juankun wantintukmauri (El Apocalipsis)

Jesucristo ni chichamen nekamtikiamuri

1 ¹Wiitjai Juankuitjai. Jesucristo inatirinjai. Ii Apaachiri Yus Jesucriston ukunam atin aa nuna nekamtikiamu asa, niisha: Wína umirtin ainau nekaawarat tusa, ni awemamurin akupak, wina ju chichamnaka nekamtikruami. ²Tura ni chichamen Jesucristo winaka nekamtikruau asamtai, wi wainkamja nunaka mash nekasaintai tajai.

³Yus ju chichaman wári umiktin asamtai, aints ainau ju chichaman ukunam atiniun pachisar aujina nuka nekasar warasartinuitai. Tura ju chichaman antinauka, tura ju aarmau-naka mash umirinauka warasartinuitai.

Juan siete yaktanmaya ainaun aatramuri

⁴⁻⁵Wiitjai Juankuitjai. Asia nungkanam siete (7) yaktanam Cristonu ainau iruntraram pujautirmin chichaman akuptajrume. Yus yaanchuik tuke pujumia nuka yamaisha pujawai. Tura tuke pjuwitai. Nuka ni siete (7) Wakani-jai, tura ni Uchiri Jesucristojai atumin nekas pengker awajtamsarti. Tura angkan pengker nintimratnuncha suramsarti tusan tajarme. Jesucristo chichaman umiu aa nuka ni Apaachiri chichamen nekamtikramamiaji. Nunia jakayat,

chikich ainaun nangkamasang nuwá eemak jakamunmaya nantakmiayi. Tura tuke jakashtin asa, junia apu ainaun inartinuitai. Tura iin anenmau asa, waitnas jaka numpar, ni numpejai ii tunaarinka japitramramiaji. ^a ⁶Tura wína aintsur asaram, wijai metek aints ainau inartinuitrume turamiaji. Tura wína Apaachiru Yuse inatiri asaram, sacerdotea nunisrumek nijai chichastinuitrume turammiaji. Tura asamtai tuke inaitsuk Jesucristoka: Ameketme kakarmam tusar pengker awajsatnuitji. Tu atí.

⁷Antuktaram. Cristoka yurangmijai taratnuitai. Turamtai aints ainau mash niin wainkartinuitai. Tura Criston maawarmia nusha niincha wainkartinuitai. Tura mash nungkanmaya Yusen umirchau ainau niin wainkar, wait wajaktintrin shaminak juutiartinuitai. Nekas turunatnuitai. ^b

⁸Ii Apuri chichartak: “Wikia nu nangkam-taik mash najanamiajai. Tura nungka amuamunmasha tuke mash inartinuitjai. Wikia Yus asan tuke tujinkachuitjai. Yaanchuik pujumiaja nunisnak tuke pujajai. Tura tuke pujustinuitjai,” turutmiayi. ^c

**Juan karanma nunisang
Criston wainkamuri**

⁹Wikia Jesúsnu asan atumi yachiinjai. Atumsha Jesucristonu asaram, wait

a 1.4 (Col. 1.18) b 1.7 (Zac. 12.10; Mat. 24.30; Marc. 13.26; Luc. 21.27; Juan 19.34-37; 1.Tes. 4.17) c 1.8 (Isa. 41.4; Apoc. 1.17;2.8;22.13)

wajarne nunisnak wisha wait wajajai. Tura ukunam iruntrar Jesúsnum pujusar chikich aints ainaun inartinuitji. Tura ni tati tusar, iisha nakaji. Jesucristo Yuse chichamen wína nekamtikruamia nuna etseru asantai, isar Patmos tutainum achikmau pujajai. ¹⁰Tura ii Apuri kintari Yuse Wakani wína nintirun piatruku asantai, tuntuprunini pupun pupuntra-mua tumaun kakarman untsunum antukmajai. ¹¹Tura untsunum antukmaja nuka nuwaitai: “Ame wainme nu papinum aarta. Tura Cristonu ainu siete (7) yakat ainamunam mash aatram akuptukarta. Nu yakta naaringkia nu ainawai: Efeso, nunia Esmirna, nunia Pérgamo, nunia Tiatira, nunia Sardis, nunia Filadelfia, nunia Laodicea,” turutun antukmajai.

¹²Turutmatai: ¿Yáki turuta? tusan, tuntuprunini pajasan jiihkaman, ji keaun kuri najanamun siete (7) aun wainkamjai. ¹³Tura jafen wajaun aintsutiat nayaim-pinmaya akupkamua tumaun wainkamjai. Tura wejmakam sarman nawejai metek entsar, tura kachumtain kuri najanamun netsepejai metek pea wajaun wainkamjai. ^d ¹⁴Ni intashisha uruchia tumau nekas puju aun wainkamjai. Tura ni jiiha ji kapawa tumaun wainkamjai. ¹⁵Tura nawesha jiru jinum jiyamua nunisang newar wajaun wainkamjai. Tura ni chichamesha túna uutua tumaun antukmajai. ¹⁶Tura ni untsur uwejejai yaa tumaun siete (7) aun achik takakun wainkamjai. Tura saapia tumau yantamen mai ere tsakamun jangkenia jiinun wainkamjai. Yapiisha tsaa tupin wajas tsantua tumaun wainkamjai. ^e

¹⁷Tura wikia timianun wainkan, jakawa nunisnak ni nawen yaamsan iyaarmajai. Turamtai ni untsur uwejejai wína

achirak: “Shamrukaip. Wiitjai. Wikia nu nangkamtaik tuke pujuyajai. Nungka mash amukamtaisha, wikia tuke pujustinuitjai. ¹⁸Wikia tuke iwiaakuitjai. Wikia jakayatnak nantakin asan, yamaikia tuke iwiaaku pujajai. Tura jakar matsamsartin ainaun yawirinka wi takakjai. ¹⁹Tura asantai ame wainme nuka mash aarta. Tura yamai atata nusha, nunia ukunam atinua nusha mash aarta.

²⁰“Yamaikia chicham nekaachmin aa nuna amin nekamtikiatjame. Yaa siete (7) ainia nuna wína untsur uwejejai achikian takakai waitkame nuka nuwaitai, nunia ji keau siete (7) wainkame nusha nuwaitai tusan yamaikia nekamtikiatjame. Yaa siete (7) ainia nuka wína aintsur ainu wainin siete (7) ainia nuwaitai. Tura ji keau siete (7) ainia nuka wína aintsur ainu mash iruntrar siete (7) yaktanam pujuina nuwaitai,” turutmiyai.

Siete yakat ainamunam chicham akupkamu Efesonam chicham akupkamu

2 ¹“Wína aintsur ainaun wainin Efeso yaktanam puja nuka ju chichaman nekaati tusam aarta: Ni untsur uwejejai yaan siete (7) takaka nuka, tura ji keaun siete (7) kuri najanamunam jafen wekaa nuka tawai tita: ²Wikia atumi turamurin mash nekajai. Tuke inaitsuk atumi takatrin kakaram takakmakrum pimpiayatrum pengker nintimsaram takakmarme nunasha nekajai. Tura aints pasé aa nuna takainauka iijai iruntrar-chati tusaram suritkarumeme. Tura aints nangkamiar: Wikia Cristo akupkamuitjai tinau wainiatrumek: Nangkamiar tinawai tusaram nusha nekaamarume. ³Tura nekasrum winar asaram, tuke inaitsuk winaka nemartusmarume. Tura wait

wajayatrumek, yawetsuk pengker nintimsaram wína umirtutka tukeka inaituschamarume. ⁴Tura wainiatun nunasha tajarme: Nu nangkamtaik winaka miatrusrumek anenkuram pujumiarme nunisrumka yamaikia winaka anentsurme. Tura asakrumin winaka miatrusrumek nintimtursaram pujarme tatsujrume.

⁵“Tura asamtai aneartaram. Turaram nu nangkamtaik wína anenkuram pujumiarme nunisrumek ataksha pujustaram. Turachkurminkia wikia atumin jean, atumi yaktarinia ji keaa nunaka juruktatjarme. Tura asamtai wína umirtuku ainau atumi yaktarin iruntrachartinuitai. Antsu atumi ninti yapajiarame, ataksha miatrusrumek wína anenkurminkia nunaka turashtinuitjarme. ⁶Tura atumi pengker turamurmincha nekajai. Nicolaítas turamuri atum nakitarme nuna wisha nunisnak nakitajai. ⁷Yuse Wakani ta nuna wína aintsur ainau antinauka nintimrarti. Tunau nepetkaru ainaun numi tuke pujutan sukartin Yuse pujutirin waja nuna neren yuwarti tusan tsangkakatnuitjai. Tura nuna yuwinak nijai tuke pujusartinuitai, tawai tusam aarta,” turutun antukmajai.^f

Esmirna yaktanam chicham akupkamu

⁸“Wína aintsur ainaun wainin Esmirna yaktanam puja nuka ju chichaman nekaati tusam aatrata: Nu nangkamtaik tuke pujumia nuka, tura nungka amukamtaisha, tuke pujustata nuka jakayat ataksha nantakin asa, yamaikia tuke jatsuk puja nuka tawai tita:^g ⁹Wikia nekajrume. Atumka wína umirtuku asaram wait wajarme. Tura asaram kuikiartichu ayatrumek, nekasrum kuikiartin ainau nangkamasrumek nayaimpinam yuumsatuk pujustinui-

trume. Tura aints judío ainayat, judíochoa nunisarang Yuse chichamen umirtsuk pujuinauka, atumin pachitmasar pasé chichainau asar, nu aints ainauka Satanásjai iruntrar pujuinawai. ¹⁰Atumka wait wajaktin aa nuka shamkairap. Anturtuktaram. Satanás atumin mash nekaprumsartas atumnia yaankesha achikiar kársernum engkewartinuitai. Turamtai atum diez (10) kinta wait wajaktinuitrume. Atumin mantaminamtai jaachkurmeka winaka inaitusairap. Tu pujakrumningkia, tuke pujustinun tsengkrutin susatnuitjarme. ¹¹Yuse Wakani ta nuna wína aintsur ainau antinauka nintimrarti. Tunau nepetkaru ainau jakar, ataksha jakatniunmaka wait wajakchartinuitai, tawai tusam aarta,” turutun antukmajai.

Pérgamo yaktanam chicham akupkamu

¹²“Nunia wína aintsur ainaun wainin Pérgamo yaktanam puja nuka ju chichaman nekaati tusam aarta: Saapia tumaun yantamen mai eren tsakamun takakua nuka tawai tita: ¹³Atumka tunía pujarme nunasha wikia nekajai. Satanás ni aintsrin inartas puja nuni atumka pujarme. Nunia wína nekas pengker umirtin, Antipas naartin atumjai pujus wína pachitas chichaman etsermia nunaka maawaru wainiatrumek, atumka tuke wina umirtakrum pujuyarume. Tura wína tuke umirtutka inaituschamarume. ¹⁴Turin ayatrumek atumnia aints yaanchuik Yuse chichame etserin Balaam pasé nuikiarturmaun tuke metawar umirinawai. Nusha Israel ainaun tunaun turuawarat tusa, tangku namangken Moaba yusrin susamu yuwaarat tusa, apu Balacan nuiniarmiayi. Nuniasha tsanirmatnasha nuiniarmiayi. Atumi irutramuri nu tunaun turuwaru asaram-

tai, atumi turamuri mash pengkeraitai tatsujrume.^h

¹⁵“Tura atumnia aints ainau Nicolaítasa nuikiarturaurin wikia nakitaja nuna inaitan nakitinawai. ¹⁶Tura asaram nintimaorum wári yapajiatarum. Tura nu aints ainaujaingkia iruntrairap. Turach-kurminkia wikia atumin wári werin, saapia tumau wína jangkernia jiina nujai maaniktatjai. ¹⁷Yuse Wakani ta nuna wína aintsur ainau antinauka nintimrarti. Tunau nepetkaru ainaun yutan maná tutain nayaimpinam uukmau aa nuna yuratnuitjai. Tura wína aintsur ainaunaka kayawach pújun susatnuitjai. Nu kayanam yamaram naaringkia aarmawai-tai. Nuna naarinka kichkisha nekainatsui. Antsu ningki juwinak nekaawartin ainawai, tawai tusam aarta,” turutun antukmajai.ⁱ

Tiatira yaktanam chicham akupkamu

¹⁸“Nunia wína aintsur ainaun wainin Tiatira yaktanam puja nuka ju chicham-nasha nekaati tusam aarta: Yuse Uchiri jiingkia ji kapawa tumau jiimiaj puja nuka, nawesha jiru jinum jiyamua nunisang newar waja nuka tawai tusam aatrata:^j ¹⁹Atumi turamurinha wikia mash nekajrume. Tura atumi anengkra-tairincha nekajrume. Tura wína nekasampita turutu asaram, wína umirtakrum pujarme. Tura yuuminak pujuinausha pengker yayaarme. Tura wait wajayatrume pengker nintimsaram pujarmin nekajrume. Tura nu nangkam-taik pengker turamiarume nuna nangkamasrume yamaikia timiá pengker turarme tusan nekajrume. ²⁰Turin ayatrumek nuwa Jezabel naartin atumjai pujusti tusaram tsangkatarme. Nuka atumin anangkramak: Wikia Yuse

chichamen etsernuitjai, ta nuka wina umirtinak pujuinaun tsanirmatnuncha nuiniawai. Tura Yuschau waininayat, tangku namangken ni yusri susamu yuwaarti tusa nuiniawai. Atumka nu turati tusaram, tsangkatkau asakrumin, atumi turamuri mash pengkeraitai tatsujrume.^k

²¹“Tura asan nu nuwaka ni tunaarin inaisati tusan nukap nakasmajai. Turamaitiat ni tunaarinka tuke inaiyatsui. ²²Anturtuktaram. Nu nuwanka peaknum tepesti tusan sungkuran susatatajai. Tura nijai tsanirmaun ainauncha nijai metek nukap wait wajakarti tusan sungkuran susatatajai. Antsu ni tunaarin inaisaram-taikia turashtatajai. ²³Tura nu nuwa tunaarin takainaunaka ni uchiria nunisarang asaramtai, nunaka maatnuit-jai. Wi turamtai wína aintsur ainau iruntrar pujuinauka nunasha nekaawarti-nuitai. Aints ainau nintin nekarnunka wiiitjai. Tura asan atumi pasé turamurijai metek wait wajaktinnasha susatatarjarme.^l ²⁴Antsu Tiatira yaktanmaya ainautirmin, nu nuwa nemartsuk pujautirmin, tura Satanás uukmau aa nuka nekachu asakrumin, chikich chicham umirkataram tusanka tatsujrume. ²⁵Tura atum umirume nuka wi taatsaing tuke metaram umirkataram.

²⁶Tunau nepetkaru ainaun, tura wi taatsaing wína wakeramurun tuke umirtin ainaun mash nungkanmaya ainau apuri arti tusan inaikiatnuitjai. ²⁷Tura wína Apaachir winasha: Apu ata tusa, inaitukmia nunisnak apu ainaun inaikiar-tinuitjai. Turamu asar aints jirujai muitsan awatiar tsainawa nunisarang wína umirtinak pujuinauka wína kakarmarjai mash nungkanmaya ainaun inarartinuitai.^m ²⁸Tura tsaa tsapuatsaing,

angkuaji eemak tsapuawa nunisnak wikia tatsuk, wina ainsur ainaun wina tatintrun nekawarti tusan nekamtairun susartinuitjai. ²⁹Yuse Wakani ta nuna wina ainsur ainau antinauka nintimrarti, tawai tusam aarta,” turutun antukmajai.

Sardis yaktanam chicham akupkamu

3 ¹“Nunia wina ainsur ainaun wainin Sardis yaktanam puja nuka ju chichaman nekaati tusam aarta. Yuse Wakani siete (7) akupa nuka, tura yaa tumaun siete (7) aa nuna inawa nuka nunasha tawai tita: Atum turamurmin itiu awa tusan mash nekajume. Atumek nintimtasrumka iwiaakuitji tarumning, wikia atumniaka jakawa nunisrumek pujarmin jiiajrume. ²Tura atumi turamurijainkia Yuska pengkerka awajtsuk pujarmin jiiajrume. Tura atum kanurua nunisrumek pujau asaram shintartaram. Tura asaram Yuska pengker awajsataram. Aints wina umirtukchau asar, jakaartas ainawa nunisarang pujuinauka wina umirtutan tuke inaisarai tusaram kiakartaram. ³Tura wina chichamur eemkaram antukmiarme nu chicham nintimram metataram. Antsu atumi tunaaringkia inaisataram. Turachkurminkia kasa aneachmau winawa nunisnak wisha atumin winitin asamtai ¿warutik tat? tusarmeka nekaarachminuitrume.ⁿ ⁴Antsu atumi yaktarin Sardisnum aints untsurinchu wina umirtukaru asar, wejmak pakuichau entsarina nunisarang ainawai. Tura asar wijai metek wejmak nekas pujun entsasar pujusartinuitai. ⁵Tunau nepetkaru ainauka wejmak nekas pujun entsasar wijai pujusartinuitai. Tura nuna naaringkia wina papirun aatramu asaramtai pengké sakturchatnuitjai. Tura asan wina Apaachirnasha, tura ni awemamuri ainauncha: Juka wina ainsur

ainawai titinuitjai.^o ⁶Yuse Wakani ta nuna wina ainsur ainau antinauka nintimrarti, tawai tusam aarta,” turutun antukmajai.

Filadelfia yaktanam chicham akupkamu

⁷“Nunia wina ainsur ainaun wainin Filadelfia yaktanam puja nuka ju chichaman nekaati tusam aatrata: Nekas tunaarinchawa nu, tura nekas chichaman chichaa nu apu Davidta yawirin takaku asa, Yusnum wayaantnun urainamtaikia chikich ainauka pengké epenchamnawaitai. Tura Yus epeniamaikia chikich ainauka uraichminuitai, ta nuka tawai tusam aarta:

⁸“Atumi turamuri itiu awa tusan mash nekajai. Atumka jumchik ayatrume, atumi kakarmarisha atsau wainiatrumek, wina chichamur miatrusrumek umirtukmiarume, tura wikia Cristo umirkachuitjai tichamarume. Tura asakrumin atumin waaitinka uratinuitjarne. Nuna urainamtaikia, aints kichkisha epenchamnawaitai. ⁹Antuktararam. Aints waitrinak judío aintsuitjai tinayat, iwianchi apuri Satanásan umirinawai. Nuka atumsha waintrumning, winaka tikishmatruwarat tusan nunaka itatnuitjai. Wi atumin aneau asan, aints ainausha nekaawarti tusan turatnuitjai. ¹⁰Atum wi timiaja nu tuke inaitsuk pengker nintimsaram umirtuku asakrumin, wisha nukap wait wajaktinumka uwentikratnuitjarne. Mash nungkanmaya ainau nu wait wajaktiniun wainkartinuitai. Tura nekasash wina umirtina tusan nekapsatnuitjai. ¹¹Wikia wári taratnuitjai. Tura asamtai tsengkruutin Yus atumin suramsamia nuna iwianch atantruki tusaram, wina tuke inaitutsuk umirtuktaram. ¹²Tunau nepetkaru ainauka wina Yusru jeen painia

nunisarang tuke jiintsuk nuni pujusartin ainawai. Tura wína Yusrú naarincha ni namangken aatratnuitjai. Tura wína Yusrú yaktarin Jerusalén yamaram aa nuka nayaimpinmaya taratnua nuna naarincha ni namangken aatratnuitjai. Tura wína naarun yamaram aa nuna ni namangkencha aatratnuitjai. ¹³Yuse Wakani ta nuna wína aintsur ainau antinauka nintimrarti, tawai tusam aarta,” turutun antukmajai.

Laodiceanam chicham akupkamu

¹⁴“Nunia wína aintsur ainaun wainin Laodicea yaktanam puja nuka ju chichaman nekaati tusam aarta: Nekas chichaman tuke chichaa nuka, ni chichamen paan nekamtikiartin asa, nu nangkamtaik Yus mash najanamia nuna apuri asa tawai tita:^p ¹⁵⁻¹⁶Wikia atumi turamuri itiur awa tusan mash nekajrume. Atumka winaka tukeka inaituschamarume. Turayatrum wína chichamruka miatrusrumka umirtats-rume. Tura asaram yumi japapachikia tumawaitrume. Michatnasha michachu, tura tsuwertancha tsuwerchau pengké tsuutmai umurchamnawa tumawaitrume. Tura asakrumin aints yumi japapachik tseekmaun umur tsuutak inuktas wakerawa nunisnak wikia atumin japatasan wakerajrume. Antsu tsuwer akurmeka, turachkurmesha micha akurmesha timiá pengker achaintrumeash. ¹⁷Atumka chichaakrum: Wikia kuikiartinuitjai. Tura asan warinchun untsurin takakjai. Tura asan pengké yuumatsuk pujajai tayatrum, wínaka umirtutsuk pujau asaram, kuikiartin ayatrumek, nekasrum yuumakrum pujarme. Tura nekasrum pengkerka pujatsrume. Tura wainmichua nunisru-

mek, tura misu wajawa nunisrumek pujarme. Antsu nuka nekapmamtsurme. ¹⁸Tura asamtai nekasrum yuumatsuk pujustasrum wakerakrumka, wína seatkuram: Aints kurin jinum jiyamun sumawa nunisrumek tuke pujustin winaka seattiarum. Tura misu kuimiakan natsaarai tusaram, wína seatkuram tarachin nekas pujun entsarartas suminawa nunisrumek tunaarinchau wajastaram. Tura wainmichua nunisrumek pujau asaram, aints pengker wainmaktas, jii engketi irimin sumawa nunisrumek wína seattiarum. ¹⁹Wína aneetir ainaun mash chicharkun: Chichamur miatrusrumek umirtuktaram tusan, wína umirtutsuk pujuinauncha wait wajaktinasha suajai. Tura asamtai atumi nintimauri yapajiarum, miatrusrumek umirtuktaram tajarme.^q ²⁰Anturtuktaram. Wikia aints irastas taa, waitinam wajas untsumua nunisketjai. Tura asamtai aints wi untsumaurun antuk waitin uraawa nunisang: Nintirun wayaata tamatikia wikia wayaatatjai. Tura aints yutan yuwinawa nunisnak iruntratatajai. Tura wisha nijai tsaniasan pujustatjai. ²¹Wisha tunaun nepetkau asan, wína Apaachirjai tsaniasan aints ainaun inartasan, apu keemtainum pujaja nunisarang tunau nepetkaru ainauka wijai tsaniasar aints ainaun inarartas keemtsarti tusan tsangkatkatnuitjai.^r ²²Yuse Wakani ta nuna wína aintsur ainau antinauka nintimrarti tawai tusam aarta,” turutun antukmajai.

Nayaimpinmaka Yusen pengker awajinawai

4 ¹Nu nangkamaramtai pangkain jiiimkaman nayaim uraniun wainkamjai. Tura nunia kakaram

untsumaun antukmajai. Nu nangkamtaik pupun pupuntramua tumaun antukmaja nunisnak ataksha antukmajai. Tura wina chichartak: “Juni wakata. Turakmin ukunam atinua nuna inaktustatjame,” turutmiayi.

²Tura Yuse Wakani wina nintirun piatruku asamtai, arutsuk karanma nunisnak Yuse keemtairin nayaimpinam wainkamjai. Tura nu keemtainum ketun wainkamjai. ³Tura nu keemtainum ketun wainkan, kaya akik wincha jitsumir jaspe tutai, nuniasha kaya kapantin akik aa nuna wainkamjai. Nunia tsengkiangkua tumau, antsu kingkia kaya esmeralda tumau Yuse keemtairin tenteaun wainkamjai. ⁴Yuse keemtairin tentakar apu keemtairin veinticuatro (24) ainaun wainkamjai. Nu keemtainum juun ainu veinticuatro (24) ketinaun wejmakam pujun entsarinaun, nuniasha tsengkrutin kuri najanamun tsengkrakinaun wainkamjai. ⁵Apu keemtairinia charpia tumau jininuun wainkamjai. Tura nasea tumaun uutun, tura ipiamtasha ipiamtarun antukmajai. Tura Yuse keemtairin ayamas kantii keawa tumaun siete (7) ainaun wainkamjai. Nuka Yuse Wakani aa nuwaitai. ⁶Nunia Yuse keemtairin ayamas juun kucha ispiya tumau wincha miamian aun wainkamjai.

Nuniasha iwiaaku ainu cuatro (4) ama nu juun apu keemtairin tentainun wainkamjai. Tura netsepeninisha, tura tuntupeninisha jii untsuri ainuujui jiiimiam wajainuun wainkamjai. ⁷Kichik juun yawaaya tumaun wainkamjai. Tura kichka waaka uchiria tumaun wainkamjai. Tura kichnasha aintsu yapiya tumaun wainkamjai. Tura kichka kukui nanamua tumaun wainkamjai. ⁸Tura nu iwiaaku ainu nanamtin asar, ni nanapesha seis (6) ainaun wainkamjai. Tura kichik

kichik ni netsepeninisha jiisha untsuri, tura tuntupeninisha nunisarang jiisha untsuri aun wainkamjai. Tura tsawaisha tura kashisha tuke inaitsuk chichainak:

“Apu Yus mash aa nuna nangkamasang nekas kakarmaitai. Tuke pujuya nuka yamaisha nunisang pujawai. Tura tuke iwiaakuitai. Nekas pengkeraitai, nekas pengkeraitai, nekas pengkeraitai,” tinaun antukmajai. ^t

⁹Tu chichainak apu keemtainum tuke iwiaaku puja nuna pachisar: Ameketme juuntam tusar, maaketai tinaun antukmajai. ¹⁰Turinamtai juun ainu veinticuatro (24) ainia nuka juun apu keemtairin tentakar pinakumrurar tepersar, tuke iwiaaku puja nuna pachisar: Ameketme juuntam tiartas, ni tsengkrutin kuakiar tukar Yusen chicharinak:

¹¹“Ameketme Apum. Ameketme Yusem. Ameka iwiaaku ainu mash najanamiame. Tura ame wakerau asakmin, mash iwiaaku ainawai. Tura asamtai amincha tuke mash pengker awajtamsarti. Tura: Ameketme pengkeram turamiarti. Tura: Ameketme kakarmam turamiarti,” tinaun antukmajai.

Papi aarmaun pachis timauri

5 ¹Nunia juun apu keemtainum ketu papi mai yantamen aarmaun penuarman ni untsur uwejejai takus ketun wainkamjai. Nu papinka urakarai tusar, senta kantsejai siete (7) nujtukmaun wainkamjai. ²Tura Yuse awemamuri nekas kakaram aa nu chichaun antukmajai. Nuka kakar chichaak: “¿Yaa miajuk ju papi kantsejai nujtukmaun urakainta?” tu inintraun antukmajai. ³Turamaitiat nayaimpinmasha, tura nungkanmasha, tura jakau ainamunmasha, timiá juunka kichkisha atsau

asantai, nu papi urakmin tura aujsamnaunaka wainkachmajai. ⁴Tura nu papi urakminiun tura aujsamniun wainkachusan, nukap juutniajai. ⁵Wi juutu pujamtaí, kichik juun nuni ketun wainkamja nu wína chichartak: “Juutsuk asata. Anturtukta. Judánmaya ainau juun yawaaya nunisarang kakaram asaramtaí, Cristo Judá weari asa, tura Apu Davidta weari asa, ni nemase ainaun mash nepetak, Yuse wakeramurin tuke mash miatrusang umikmia nuka, ju papi kantsejai nujtukmaun siete (7) aa nuna urak aujsamnawaitai,” turutun antukmajai.⁴

⁶Tamati wikia jiihkaman, juun apu keemtainum ayaamas Uwija Uchiri maamutiat iwiaaku wajaun wainkamjai. Nuka japen wajamtaí, cuatro (4) iwiaaku ainau, tura veinticuatro (24) juun ainausha niin tentakarun wainkamjai. Uwija Uchiriya tumau nuna antiri siete (7) aun wainkamjai. Tura ni jiisha siete (7) aun wainkamjai. Nuka Yus ni Wakanin mash nungkanmaya ainaun jiiisat tusa, akupkama nuwaitai tusan nekaamjai.⁷ Tura Uwija Uchiri juun apu keemtaírin weri, papin untsur uwejejai takus nuni ketun papirin juraun wainkamjai. ⁸Tura papin juramtaí, cuatro (4) iwiaaku ainau, tura veinticuatro (24) juun ainau Uwija Uchirin: Ameketme juuntam tiartas tikishmatinaun wainkamjai. Juun ainau kichik kichik kitarra tumaun takusar, tura piningkia tumaun kuri najanamun tákakinaun wainkamjai. Nu pining ainamunam kungkuti keeminaun wainkamjai. Nu kungkutikia Yuse aintsri Yus seamuri taku tawai.⁹ Nunia juun ainau yamaram kantan kantaminak:

“Ameketme timiá juunmeka. Tura asam ju papi jukim papi nujtuk-

maurisha uraktinuitme. Amincha mantamawaru asamtaí, jakam ami numpemsha numparmiame. Tura asam mash nungkanmaya ainau, niish niish chichau ainasha mash Yusnum jearti tusam jakamiame.^x ¹⁰Tura iincha: Wína aintsur asaram, wijai metek aints ainau inartinuitrume tukartimiame. Tura Yuse inatiri asaram sacerdotea nunisrumek Yusjai chichastinuitrume tukartimiame. Tura asaram mash nungkanmaya aints ainau inau atinuitrume tukartimiame,” tu kantamrinaun antukmajai.^y

¹¹Tura ataksha pangkain jiihkaman, Yuse awemamuri untsuri juun apu keemtaírin tentakar, tura iwiaaku ainau tentakar, tura juun ainausha tentakar kantamrinaun antukmajai. Tura timiá untsuri millón asaramtaí, pengké nekamarchamin iruntrarun wainkamjai. ¹²Nuka kakar chichainak:

“Uwija Uchiri maamutiat timiá juun asa, tura timiá kakaram asa, nantaki mash aa nunaka inakratnuitai. Tura mash aa nuna nekau asamtaí: Ameketme juuntam tusar, timiá pengker awajarti-nuitji. Tura maaketai titinuitji,” tinaun antukmajai.^z

¹³Turamtaí Yus najanamu ainau mash nayaimpinmasha, tura nungkanmasha, tura nungka nitkarin pujuinausha, tura juun entsanam pujuinausha chichainak:

“Juun apu keemtaírin keta juka Uwija Uchirijai metekaitai. Ni tuke maaketai timinuitji. Tura tuke: Ameketme juuntam timinuitji. Tura: Ameketme kakarmam tusar, tuke inaitsuk

pengker awajsarminuitji,” tinaun antukmajai.

¹⁴Tura cuatro iwiaaku ainau: “Tu atí,” tinaun antukmajai. Tinamtai veinticuatro (24) juun ainausha tuke iwiaaku puja nuna tikishmatrar maaketai tinaun wainkamjai.

Papi nujtukmauri siete urakmaun wainkamuri

6¹⁻²Nunia Uwija Uchiri papi nujtukmaun kichik urakun wainkamjai. Tura urakamtai, nu cuatro iwiaaku ainamunmaya kichik ipiamta nunisang kakar chichartak: “Winim jiita,” turutun antukmajai. Tamati wisha jiikman, kawai pujun wainkamjai. Tura kawainum ketu tishimkun takakun wainkamjai. Tura ni nemase ainaun nepetkatin asamtai, tsengkrutincha suwaun wainkamjai. Tura tuke nepetmaktas jiinkinun wainkamjai.

³Nu kawai jiiinmatai, Uwija Uchiri chikich papi nujtukmaun jimiar ama nuna urakun wainkamjai. Nuna urakamtai chikich iwiaaku aa nuka chichartak: “Winim jiita,” turutun antukmajai. ⁴Turutmati wisha jiikman, chikich kawain kapanniun wainkamjai. Nu kawainum ketu mash nungkanam wekaas, aints ainau mesetan najanmam-tikiat tusa akupkamuitai. Turamtai aints ainau mash pengker nintimtunitsuk kajernaikiar maaniawarti tusa, kawainum ketun saapi sarman suwaun wainkamjai.

⁵Nu kawai jiiinmatai, Uwija Uchiri chikich papi nujtukmaun kempatam (3) ama nuna urakamtai, chikich iwiaaku chichaun antukmajai. Nuka chichartak: “Winim jiita,” turutmatai wikia jiikman, chikich kawain shuwinun wainkamjai. Tura nu kawai jiiinmatai, kawainum ketu kilo nekapmati takakun wainkamjai.

⁶Tura nu cuatro (4) iwiaaku ainamunmaya chichaamun antukmajai. Nu chichaamuka nuwaitai: “Yutai nukap

akik atin asamtai, aints ainau tsukajai wait wajakartinuitai. Kichik kinta takakmasmaunum kuikian juwawa nu kuikijajai trigon kichik kilon nunak sumakartinuitai. Nuna sumachkusha nu kuikijajai cebada pang najantai kempatam (3) kilon nunak sumakartinuitai. Antsu olivo macharisha tura uva yumirisha mesrai tusam, tenapkesam wainkata,” turutun antukmajai.

⁷Nunia Uwija Uchiri chikich papi nujtukmaun cuatro (4) ama nuna urakamtai, chikich iwiaaku chichaun antukmajai. Nuka chichartak: “Winim jiita,” turutun antukmajai. ⁸Tamati wikia jiikman, kawain yangkutakun wainkamjai. Tura nu kawainum ketu jatan sukartin inaikiamuyayi. Tura nuna ukurin winauka aints ainaun juki, jakaru ainau matsatmaunum juyayi. Tura mash aints ainau iruntramunam aints cuatro (4) irunar pujuina nuni kichkin maati tusa kakarmarin susamuitai. Tura aints ainaun mesetjai, tura tsukajaisha, tura sungkurjaisha, tura pachim ainaujaisha jakrami tusa kakarmarin susamuitai.

⁹Nunia Uwija Uchiri chikich papi nujtukmaun cinco (5) ama nuna urakamtai wikia jiikman, Yuse chichame etserin ainaun maawarmia nuna wakanin wainkamjai. Nuka tuke inaitsuk: Cristonuitji tinau asaramtai niincha maawarmiayi. Nu jakaru ainau wakanin misa kungkuti keemaktin aa nuna wamketinini ayaminak pujuinaun wainkamjai. ¹⁰Nuka kakarar untsuminak: “Apuu, ameka nekasam tunaarinchau asam, ame tame nuka tuke umiame. Tura asam ¿warutam arusmek iin mantamaru ainausha mash nungkanam pujuinausha yapaijkiatam?” tinaun antukmajai.

¹¹Tinamtai Yuse awemamuri niincha wejmak pujun sarman suwinak: “Atumea nunisarang chikich Cristonu ainauncha

maawartin ainawai. Nuna umisarti tusaram jumchik nákakrum ayamrataram,” tinaun antukmajai.

¹²Nunia Uwija Uchiri chikich papi nujtukmaun seis (6) ama nuna urakamtai, wisha jiiikman uu kakarman uurun wainkamjai. Tura tsaasha tsantsuk tarach shuwinua tumau ketun wainkamjai. Nantusha numpa tumaun kapantin ketun wainkamjai. ^a ¹³Yaa ainausha kakeenaun wainkamjai. Numí kanawe nase kakarman nasentak peeam, unuts kuwirach nungkanam kakeenawa nunisarang yaa ainau yakiya nungkanam kakeenaun wainkamjai. ^b ¹⁴Tura nayaim-pisha papi penuarar juwamua nunisang mengkakaun wainkamjai. Tura mura ainausha, tura isar ainausha muchitkar yaja pujnasarun wainkamjai. ¹⁵Tura mash nungkanmaya apu ainausha, tura kuikiartin ainausha, tura suntara apuri ainausha, tura kakaram ainausha, tura aintsu inatiri ainausha, tura aintsu inatirinchu ainausha mash shaminak muranam waa amanum, nunia pampa juunum anuminaun wainkamjai. ¹⁶⁻¹⁷Tura anumkar, mura ainaun tura pampa ainauncha chicharinak: “Mura ainautiram, tura pampa ainautirmesha anturtuktaram. Yus nekas wait wajaktiniun akupkatin kinta jeau asamtai çyamaikia yáki uwentikramrataij? Tura asamtai Yuse keemtairi keta nu iin waitmakai tusaram, tura Uwija Uchiri iin wait wajaktiniun suramsai tusaram, yakiya yumpunkaram iin uukratkataram,” tinaun antukmajai. ^c

Israel ainau nijajin aatramuri

7 ¹Nunia ataksha pangkain jiiikman, Yuse awemamurin cuatro (4) aun wainkamjai. Kichik tsa taakmaunuma-

nini wajaun, tura kitcha pajeninisha wajaun, tura kitcha atu pajeninisha wajaun, tura kitcha tsa jeatinmanini wajaun wainkamjai. Tura nungkanam, nunia juun kuchanam, nunia numi wajamunam nase umpuini tusar suriminak wajainaun wainkamjai. ²Nunia chikich Yuse awemamuri tsa taakmaunumanini winaun wainkamjai. Nuka Yus tuke pujawa nuna inatiri ainau nijajin aatratnun takus winaun wainkamjai. Tura chikich cuatro (4) Yuse awemamurin nungkancha, tura juun entsancha mesrartin ainaun kakar chicharak. ³“Yuse inatiri ainau nijajin Yuse naari aatsrining, nungkasha tura juun entsasha, tura numi ainausha mesrairap,” tusa akatar akupaun antukmajai.

⁴Tamati Yuse inatiri Israela weari ainau nijajin Yuse naarin aatratin ainau çwarutmak awa? tu iniam: Ciento cuarenta y cuatro mil (144,000) ainawai taun antukmajai.

⁵Tura asamtai Judá weari doce mil (12,000) ainawai. Nunia Rubénka weari doce mil (12,000) ainawai. Nunia Gada weari doce mil (12,000) ainawai. ⁶Nunia Asera weari doce mil (12,000) ainawai. Nunia Neftalía weari doce mil (12,000) ainawai. Nunia Manasésa weari doce mil (12,000) ainawai. ⁷Nunia Simeónka weari doce mil (12,000) ainawai. Nunia Leviya weari doce mil (12,000) ainawai. Nunia Isacara weari doce mil (12,000) ainawai. ⁸Nunia Zabulónka weari doce mil (12,000) ainawai. Nunia José weari doce mil (12,000) ainawai. Nunia Benjamínka weari doce mil (12,000) ainawai, taun antukmajai. Tura nu aintsu ainau nijajin Yuse naarin aatramun wainkamjai.

**Yuse aintsri ainau
nekapmarchamnaun wainkamuri**

⁹Nunia ataksha pangkain jiiikman, aints timiá untsuri pengké nekapmarchamnaun wejmak pujun entsasar, nunia chapi nukea tumaun takusar, Uwija Uchirin naka wajatinaun wainkamjai. Nu mash nungkanmaya ainau ¹⁰metek kakarar untsuminak:

“Ii Apaachiri Yus juun apu keemtairin keta juka ni Uchirijai, Uwija Uchiriya tumau aa jujai, ii tunaun sakturmartas jarutramkau asamtai iin uwentikramramiaji,” tinaun antukmajai.^d

¹¹Tinamtai Yuse awemamuri ainau Yuse keemtairin tentakar, juun ainauncha tentakar, nunia nu cuatro (4) iwiaaku ainauncha tentakar Yusen: Ameketme juuntam tiartas, pinakumrar nungka tepesar, Yusen pengker awajarsar-tas ¹²chicharinak:

“Tu atí: Ii Yusrin tuke inaitsuk pengker awajarsarmi. Tura ningkitai nekas nekau, tura ningkitai nekas kakaram, tura ningkitai nekas inakratin, tura ningki pengker asamtai, tuke inaitsuk maaketai tiarmi. Tu atí,” tinaun antukmajai.

¹³Tu tinamtai juun ainamunmaya kichik wina chichartak: “¿Pujun entsarina ausha warí aintsua ainawa? ¿Tura tuniaya kaunkarma? ¿Ameka nekamek?” ¹⁴Turutmatai, wi ayaakun: “Atsa juunta, ame nekau asam ujakata,” tama ni chichartak: “Ju aints ainauka Yusen umirkaru asar, nukap wait wajakar jakarmiayi. Tura asaramtai Uwija Uchiria tumau aa nuka aints ainaun mash

uwemtikratas jaka, numpe numparmia nuka ni nintin japiramu asar, ni entsatiri nekas puju aa nuna entsasar, yamai nijarmawa nunisarang pengké tunaarin-chau ainawai.^e

¹⁵ “Tura asar Yuse keemtairin tentakar nakasar pujuinawai. Tura tsawaisha, tura kashisha Yus seatai juun jean waininak Yusen maaketai tinawai. Tura asaramtai Yus ni keemtairin keta nuka tuke niin wainui.

¹⁶⁻¹⁷ “Uwija Uchiri juun apu keemtairi japen puja nuka uwija wainua tumawaitai. Nuka uwijari ainaun entsa kanajin yumin aartas ayaakua nunisang ni aintsri jakaru ainaun wainak, tuke pujustinasha susatnuitai. Tura tuke juutsuk pujusarti tusa, Yus ni aintsri ainau neaikirin mash japiratnuitai. Turamtai tuke wait wajatsuk, tsukamtancha pengké tsukamtsuk, tura kitamtancha pengké kitamtsuk pujusartinuitai. Nuningkia tsaasha pengké sukuashtinuitai, tura seekijaisha waitka wajakchartinuitai,” turutun antukmajai.^f

Chikich papi nujtukmausha urakmauri

8 ¹Nunia Uwija Uchiri chikich papi nujtukmaun siete (7) ama nuna urakamtai, nayaimpinam japchiri ura pengké kichkisha chichaamuka atumi. ²Antsu nu nangkamaramtai, nayaimpinam Yuse awemamuri siete (7) aa nu Yuse keemtairin nakainak wajainaun wainkamjai. Tura Yuse awemamuri siete (7) wajarma nuna kichik kichik pupunan suwaun wainkamjai. ³Nuniasha Yuse awemamuri taa, kungkuti engketin kuri

najanamun takus, misa kungkuti keematinam naka wajaun wainkamjai. Tura kungkutin nukap keemaktas wajaun wainkamjai. Tura juki, misa kungkuti keematinam kuri najanamunam kentsamu kungkuti keemamun wainkamjai. Nu kungkutikia Yuse aintsri ainau seamurintai taku tawai. Nu misa kungkuti keematingkia Yuse keemtairi ayamas aun wainkamjai.⁸ ⁴Yuse aintsri ainau Yusen seainamtai, Yuse awemamuri kungkuti engketi uwejejai takus, kungkutin keemakarmia nuna mukuntuirin Yusnum waakun wainkamjai. ⁵Nunia Yuse awemamuri kungkuti engketin kuri najanamun ataksha achik, nunia misa kungkuti keematinam we, ji kaparun nuna kairin kungkuti engketinam chumpia, ji nungkanam ayaarti tusa nangkimun wainkamjai. Turamtai uutmausha uutun antukmajai, tura ipiamtasha charpijai nukap patinaun antukmajai. Tura uusha uurun wainkamjai.^h

Pupun pupuntramun pachis timiauri

⁶Nunia Yuse awemamuri siete (7) ama nu kichik kichik pupunan pupuntruwartas amiinaun wainkamjai.

⁷Yuse awemamuri kichik pupunan pupuntramtai, micha kaya tumaun, tura ji kapaun numpajai pachimramun nungkanam nangkimun wainkamjai. Turinamtai mash nungka ainau kempatam amanum kichik keaun wainkamjai. Tura numi kempatam ainamunam kichik keaun wainkamjai. Tura chirichrisa mash kapainaun wainkamjai.

⁸⁻⁹Nuniasha chikich Yuse awemamuri jimiara ama nu pupunan pupuntramtai, juun mura jiya tumau kapaun juun entsanam nangkimia unjungkarun

wainkamjai. Turamtai juun entsa kempatam amanum kichik numpa najanarun wainkamjai. Turamtai juun entsanam mash iwiaaku ainau kempatam ainamunam kichik kajingkiarun wainkamjai. Tura kanu kempatam ainamunmasha kichik meserun wainkamjai.

¹⁰Nuniasha chikich Yuse awemamuri kempatam ama nu pupunan pupuntramtai, nayaimpinam yaan juuntan yakiiya ayaarun wainkamjai. Nuka kantiya tumau kapau entsa ainamunam, tura entsa kanaji kempatam ainamunam chikichnum ayaarun wainkamjai. ¹¹Nu yaa naaringkia Yapawaitai. Tura nu yaa entsa ainamunam iyaaramtai, entsa kempatam ainamunam kichik yapau najanaru asamtai, aints ainau nu entsanmaya yumin umurar untsuri jinaun wainkamjai.

¹²Nunia chikich Yuse awemamuri cuatro (4) ama nu pupunan pupuntramtai, tsaasha tura nantusha, tura yaa ainausha kempatam ainamunam kichik meseru asamtai, yaa ainausha tenap tsantinachun wainkamjai. Tura tsaasha mushatmar tsawai wainiat tenap tsanchaun wainkamjai. Tura kashi wainiat nantusha tenap tsanchaun wainkamjai.ⁱ

¹³Turamtai pangkain jikman, Yuse awemamuri kukuiya tumau nanaaki winaun wainkamjai. Nuka kakar chichaak:

“Maj, yamaisha chikich Yuse awemamuri kempatam pupunan pupuntrinamtai, aints nungka mash matsatinau yaanchuik wait wajakarmia nuna nangkamasarang nukap wait wajakartin ainawai,” taun antukmajai.

9 ¹Tura chikich Yuse awemamuri cinco (5) ama nu pupunan pupuntramtai, yaa kichik nayaimpinmaya nungka

ayaarun wainkamjai. Tura nu yaa ayaarun yawin susa, waa juuntan jiitamran kuna ama nuna tektutirin urakti taun antukmajai. ²Tamati jiitamran waan urakamtai, nunia mukunit nekas shuwín jiinun wainkamjai. Tura mukunit jiinua nuka eper keemamua nunisang timiá shuwín jiinkin asamtai, tsaasha mushatmarun wainkamjai. ³Nuniangka nu mukuntiumaya ijukratin manchia tumaun nekas juuntan jiinuaun wainkamjai. Tura jinkiar titing aints ainaun ijuinawa nunisarang aints ainaun ijuarti tusa kakarmarin susamuitai. ⁴Tura Yuse awemamuri surimiak: Chirichrisha, tura nupaa samek ainausha, tura numi ainausha mesrairap. Antsu aints Yuse naarin ni nijajin aatrachmau ainau nuke ijutaram. ⁵Tura ijuayatrumekek aints maatka maawairap, antsu cinco (5) nantuk aints titing ijum najaiminawa nunisarang najaimiawarti tusaram ijutaram, tu chichaun antukmajai.

⁶Nu wait wajaktin kinta jeamtai, aints ainau jakartas wakerinayat jakartatkamawar tujinkartinuitai.

⁷Nu manchia tumaun wainkamja nuka nekasar kawai mesetnum wetasar umismawa tumaun wainkamjai. Tura tsengkruti kuri najanamua tumaun tsengkrakinaun wainkamjai. Tura yapiincha aintsu yapiiya tumaun wainkamjai. ⁸Intashincha nuwa intashia tumaun wainkamjai. Antsu naingkia juun yawaa naiiya tumaun wainkamjai. ⁹Tura wejmak jiru najanamun entsarinaun wainkamjai. Tura nanamtin asar nanamnaksha kawai mesetnum weenak, kárrun japinam teteer wajainawa tumaun antukmajai. ¹⁰Tura jukencha titingki jukea tumaun wainkamjai. Nu jukejai aints ainaun cinco nantu ijuar waitkawartin ainawai. ¹¹Nu manchi waanam

matsamnu apuri naaringkia hebreo chichamejaingkia Abadón naartinuitai. Tura griego chichamejaingkia Apolión naartinuitai. Nuka ii chichamejaingkia “meskartin” taku tawai.

¹²Kichik wait wajakmauka yanchuk nangkamaruitai. Antsu chikich jimiar wait wajaktinka ataksha awai.

¹³Nunia chikich Yuse awemamuri seis (6) ama nu pupunan pupuntramtai, misa kungkuti keemaktin kuri najanamu tsakarin cuatro (4) ama nunia chicham jiinun antukmajai. ¹⁴Yuse awemamuri chichaak: “Entsa nampuram Eufrates tutainum Satanása awemamuri cuatro (4) jingkiamu pujuu ainau atiam akupkata,” taun antukmajai. ¹⁵Turamtai nu horati, tura nu kintati, tura nu nantuti, tura nu musachti Satanása awemamuri jiinkiertin asaramtai, aints ainau mash irumramu kempatam ainaun kichik maawarti tusar, jiiikiar akupkarun wainkamjai. ¹⁶Tura ¿suntar kawainum entsamkaru ainau warutmak iruna? tu iniam: Jimia pachak millón (200’000,000) ainawai tinaun antukmajai.

¹⁷Tura karanma nunisnak kawai ainauncha, tura kawainum ketinauncha wainkamjai. Kawainum ketinau wejmakri jiru najanamu kapantin, nunia kingkia, nuniasha takum ainaun wainkamjai. Tura kawai muuken juun yawaa muukea tumaun wainkamjai. Tura kawai jangkenia jiisha, tura mukuntiusha, tura azufresha timiá tsuwer keenak jiinuaun wainkamjai. ¹⁸Tura jiijaisha, tura mukuntiujaisha, tura azufrejaisha, nu kempatam wait wajamujai aints kempatam ainamunam kichik jakarun wainkamjai. ¹⁹Tura nu kawai ainau jangkenia wait wajaktiniun akupinaun wainkamjai. Tura kawai juké ainausha napia nunisarang aints ainaun esainaun wainkamjai.

²⁰Tura waininayat nu wait wajamunam jakacharu ainau ni tunaarin inaitsuk, tuke tunau takainaun wainkamjai. Tura iwianch ainaun tuke ameketme juuntam tinaun antukmajai. Tura ni yusri ainau kuri najanamusha, tura kuik najanamusha, tura jiru najanamusha, tura kaya najanamusha, tura numi najanamusha, wainmatnasha wainminachu, tura antutnasha antinachu, tura wekaatancha wekainachu waininayat tuke inaitsuk: Ameketme Yusem tinaun antukmajai.^k ²¹Tura mangkartutnasha inaitsuk, tura wawekratancha inaitsuk, tura tsanimatnasha inaitsuk, tura kasamtancha inaitsuk tuke turinaun wainkamjai.

Yuse awemamuri papichin itamun pachis etserkamu

10 ¹Nunia chikich Yuse awemamuri nekas kakaram aa nuna yurang-minam pachinak, nayaimpinmaya taarun wainkamjai. Tura tsengkrutin tungkiangkua tumau ni muuken tenteaun wainkamjai. Tura yapiisha tsaa tsantua timianun tsantun wainkamjai. Tura kujapesha ji keawa tumaun wainkamjai. ²Wi wainkamja nu papichin urakmaun takus, untsur nawejai juun entsanam najama, tura mena nawejai kukarnum najama wajaun wainkamjai. ³Tura juun yawaa shinawa tumaun kakar untsun antukmajai. Tura untsunmati, ipiamtancha siete (7) chichaun antukmajai. ⁴Ipiamat siete (7) chichau asaramtai, wi antukmaja nuna aartasan wakerukmajai. Tura aartatkaman nayaimpinmaya chichaun antukmajai. Nu chichamka nuwaitai: “Ipiamat siete (7) chichakara juka aatsuk asata. Tura aints kichkisha ujakaip,” turutun antukmajai. ⁵Tura Yuse awemamuri chikich nawejai juun entsanam wajas, tura chikich nawejai kukarnum wajama nu untsur

uwejen nayaimpinmanini takuinun wainkamjai. ⁶⁻⁷Tura chichaak: “Yus tuke iwiaaku puja nuka nayaimpincha, tura nungkancha, tura juun entsancha najanamiayi. Tura wi umiktatjai timia nunaka yamaikia miatrusang mash umiktatui. Tura Yuse awemamuri siete (7) ainia nu inangnamunam chikich pupunan pupuntramtai, Yuse chichame etserin ainau Yuse inatiri asar, aints ainau nekaachminun tiarmia nunaka yamaikia ukunam atinnaka mash umiktatui, Yusjai tajai” taun antukmajai.

⁸Nayaimpinmaya wina chichartak: Nuka aatsuk asata turutmia nu ataksha wina chichartak: “Yuse awemamuri juun entsanam najama, tura atu nawejai kukarnum najama waja au werita. Turam papin urak takaka au jurukta,” turutun antukmajai.

⁹Turutmatai Yuse awemamuri wajamunam werin: Ju papiwach surusta, tusan seamjai. Tu seam wina chichartak: “Pai jukita turam yuwata. Ju yuwamka apaam jangkemin wapasa tumau yumin wajatramkitatui. Antsu wakemin engkema yapau wajatramkitatui,” turutun antukmajai.

¹⁰Turutmatai Yuse awemamurinia papichin jukin yuwamjai. Tura ni turutmia nunisang jangerun yumin wajatrukmayi. Antsu yuwan umisan wakerun engkema yapau wajatrukmayi. ¹¹Wi yuwan umisamtai Yuse awemamuri ainau ataksha chichartinak: “Ataksha waketkim, untsuri nungkanmaya ainau, niish niish chichau ainau, tura apu ainausha untsuri pachisam Yuse chichame etseruta,” turutinaun antukmajai.^l

Jimiar Yuse chichame etsernun pachis etserkamu

11 ¹Nunia nekapmatin wachia tumaun wina surusar chichartinak: “Wajakim Yus seatai juun jea

¿warutam sarmaita? tura tangku epetisha ¿warutam sarmaita? tusam nekapmarta. Tura aints Yusen pengker awajsartas nuni kaunina nuka ¿warutmak ainia? tusam nekapmarta. ²Antsu Yus seatai juun jea aarin Yusen umirchau ainau nuni pujusartin asaramtai nuka nekapmaraip. Nu aints ainau nekas pengker yaktancha Jerusalén tutain cuarenta y dos (42) nantu nuni pujusar mesartinuitai.

³Turinamtai wina pachitsar chichaman etserkatnun jimieran akupkatnuitjai. Wi akupkamu asar nuka jakmarar entsatin entsarar, aints ainau ni tunaarin inaisarat tusar, kichik warang nunia jimia pachak nunia sesenta (1,260) kinta wina pachitsar chichaman etserkartinuitai,” turutinaun antukmajai.

⁴Nu Yuse chichame etserin jimiar ainauka ju nungkanam ii Apuri chichamen etserin asar, olivo machari keemati asamtai, numi olivo tutaiya tumau ainawai. ⁵Tura aints niin pasé awajsartas wakerinaunka ni jangkenia jiin akuptinawai. Tura nu jijai ni nemase ainaun amuinaun wainkamjai. Tura asaramtai aints niin pasé awajsartas wakerinauka jakartinuitai. ⁶Nuniangka Yus ni chichame etsernun jimieran ni kakarmarin susamu asar, Yuse chichame etserinak pujuinau yumi jiturchati tusar surimkartinuitai. Tura entsa ainauka numpa najanartinuitai. Tura ni wakerinak aints ainaun wait wajakartiniun pachitsuk susartinuitai.^m

⁷Tura Yuse chichame etsertan umisaramtai, páchimia tumau nekas kakaram aa nuka Satanás akupkamu asa, juun waanmaya jiinki mesetan najanak, Yuse chichame etsernun mai nepetak maatnuitai.ⁿ ⁸Tura maawaramtai, juun

yaktanam ii Apurin numi winangmanum maawarmia nuni nu jimiar aints maamu namangken tungkajin jintanam tuksartinuitai. Nu yaktanmaya ainau Yusen umirtan nakitinau asaramtai Sodoma tumawaitai. Tura nu yaktanam Yuse aintsri wait wajainau asaramtai, Egiptoa tumawaitai. ⁹Tura kempatam kinta japchiri nu jakau namangken tungkajin jintanam tepaun mash nungkanmaya ainau niish niish chichau ainausha wainkartinuitai, antsu iwiarawarai tusar surimkartinuitai. ¹⁰Tura nu jimiar aints Yuse chichamen etserinak mash nungkanmaya ainau waitkasmau asar jakaramtai, tunau ainauka mash warasartinuitai. Tura warainak waririn sunaisartinuitai.

¹¹Antsu kempatam kinta nunia japchiri nangkamaramtai, Yus nu mai jakaru wakanin ataksha engketamu asar, jakamunmaya nantakiar iwiaku wajasaramtai, aints ainau nuna wainkar nukap shamkarun wainkamjai. ¹²Turinamtai Yuse chichame etserin mai nayaimpinmaya: Juni wakataram, tusar untsuinamun antukarmayi. Tura antukar, ni nemasengka jiimiaj wajainai, yurangminam wakarun wainkamjai.^o ¹³Ni wakaramtai, uu kakarman uurun wainkamjai. Tura uurak jea diez (10) amaunum kichik yumpunkaun wainkamjai. Tura jea yumpunmaunum siete mil (7,000) aints jakarun wainkamjai. Tura timiá untsuri jakaramtai ampintrau ainau shaminak: Yus nayaimpinam puja nuka timiá juuntaitai tinaun antukmajai.^p

¹⁴Jimiar wait wajamu nangkamaramtai, chikich wait wajaktincha wári jeatatu.

Yus mash aa nunaka inartinuitai timiauri

¹⁵Nunia chikich Yuse awemamuri siete (7) ama nu pupunan pupuntraun

antukmajai. Ni pupuntruamtai nayaimpinam kakar chichaun antukmajai. Tura wi antukmaja nuka nuwaitai.

“Ju nungkanmaya inamu ainia nuka yamaikia ii Yusrinuitai, tura ii apuri Cristonuitai. Nuka tuke inaitsuk mash ainia nunaka inartinuitai,” taun antukmajai. ¹⁶Nunia veinticuatro (24) juun ainauka ni keemtairin Yusnumanini naka ketiarmia nu pinakumrar tepesar, Yusen maaketai tinaun antukmajai. ¹⁷Tura chicharinak:

“Apu Yus, ameka timiá kakaram asam pengké tujinkachuitme. Yaanchuiksha, tura yamaisha, tura tuke iwiaaku pujuwitme. Tura asam ami kakarmarmijai mash aa nuka inamat yamaikia nangkamame. Tura asakmin maaketai taji.

¹⁸ “Mash nungkanmaya amin kajertamin ainauka ame kajerkatin kinta jeayi. Tura jakaru ainau inankim, ni turamuri jiistin kinta jeayi. Tura ami inatiram ainau, amin pachitmasar chichaman etserkarmia nu pengker awajsatin kinta jeayi. Tura ami aintsrum ainau aminak umirtaminak pujuarmia nusha mianchau ainausha, tura apu ainausha pengker awajsatin kinta yamaikia jeayi. Tura ju nungka pasemamtikin ainau ame amuktin kinta jeayi.” tinaun antukmajai.

¹⁹Nunia Yus seatai juun jea nayaimpinam aa nuka ningki urankaun wainkamjai. Tura Yuse chichamen kayanam aarmau kajunam engkeamun wainkamjai. Tura uutmausha, tura charpisha, tura ipiamtasha patinaun antukmajai. Tura uusha uurun wainkam-

jai. Tura micha kaya tumaun juun yakiiya kakeenaun wainkamjai.^q

Nuwa uchi jerermaun pachis etserkamu

12 ¹Tura nayaimpinmanini jiikman nuwan wainchatin wainkamjai. Nu nuwa entsatiri tsaaya nunisang wincha jiiitsumir aun wainkamjai. Tura nu nuwaka nantunam tarimi wajaun wainkamjai. Tura yaa nayaimpinam doce (12) ketinaun tsengkrutia nunisarang ni muuken tenteawarun wainkamjai. ²Nu nuwaka jamtin asa uchin jatema kakar juutun antukmajai. ³Nunia pangkain jiikman, chikich wainchatin nayaimpinam wajaun wainkamjai. Wi wainkamja nuka juun pangkiya tumaun, turayat nawentin kapanniuun wainkamjai. Tura siete (7) muuktinun kichik kichik muuken apu tsengkrutiria tumaun tsengkrakinaun wainkamjai. Turayat antiri diez (10) aun wainkamjai. ⁴Ni juken waikmi yaa nayaimpinam ainia nuna kempatam ainamunam kichik nungkanam ujuarun wainkamjai. Nuniangka nuwa uchin jatemaun wainak, yamai uchi akiinamtai yuwataj tusa nuwan naka wajatun wainkamjai. ⁵Turamtai nu nuwaka uchin aishmangkun jurerun wainkamjai. Nu aishmangka juun wajas nangkin jiru najanamun takus, mash nungkanmaya ainaun inaun wainkamjai. Tura nu nuwaka uchin jureru asamtai, uchin achikiar Yus pujamunam Yuse keemtairin iwiakarun wainkamjai.^r ⁶Turuawaramtai nu nuwanka aints atsamunam pujusti tusar, tura Yuse awemamuri niincha kichik warang nunia jimia pachak nunia sesenta (1,260) kinta yurawarti tusa, aints atsamunam tupikiaki nuni uukti tusa nuwan iwiakarun wainkamjai.

⁷Nunia nayaimpinam maaninaun wainkamjai. Yuse awemamuri juuntri

Miguel naartin chikich Yuse awemamuri ainaujai iruntrar Juun Pangkijai, tura ni inatiri ainaujai iruntrar maaninaun wainkamjai.^s ⁸Tura maaninak Juun Pangkincha, tura ni inatiri ainauncha nepetkarun wainkamjai. Tura asar nepetkar nayaimpinmaya jiikiarun wainkamjai. ⁹Tura nu Juun Pangki nawentin nu nangkamtaik napia tumau wantinkamia nuka juun iwianchitai, tura Satanás naartinuitai. Nuka mash nungkanmaya ainaun tsanukratin asamtai, nayaimpinmaya jiikiar ni inatiri ainaujai mash nungkanam ujuarinaun wainkamjai.^t

¹⁰Nunia nayaimpinmaya kakarman untsumun antukmajai. Nu untsumauka nuwaitai:

“Satanás tuke inaitsuk tsawaisha, tura kashisha ii yachí ainaun pachis Yusen: Nuka tunau ainawai, ta nunaka nungkanam ujuaruitai. Tura asamtai yamaisia ii Yusringkia ni kakarmarijai iin uwemtikramraji. Tura Yus ni Uchirin Criston pachis: Mash aa nuna inarti tinu asamtai, yamaisia mash aa nunaka inawai.

¹¹ “Tura Uwija Uchiriya nunisang Cristo jaka numpen numparu asamtai, Cristonu ainau Cristo numpejai Satanásan nepetkarmiayi. Tura Cristo naarin pachisar aints ainaun ujaku arasar jatancha shamtsuk mantinaksha mantuwarti tusar, tuke nekas chichaman etserinak Satanásan nepetkar armiai.

¹² “Tura asamtai nayaimpinam pujuinautirmeka warastaram. Antsu juun iwianch nungkanam ujuarmau asa, ni pujustintri jumchik atin asamtai, nunaka

nekau asa, nungkanam pujuinautirmin, tura juun entsanam wekautirmincha nukap kajertamau asamtai wait anentajrume,” taun antukmajai.

¹³Nunia Juun Pangki nungkanam ujuarmau asa, nuwa aishmangkun jurerun papeaun wainkamjai. ¹⁴Turamtai nu nuwaka aints atsamunam ni pujustintrin nanami jeati tusa, Yus kukui nanapea tumaun jimiaran susamu asa, nujai ni pujustintrin jeatas nanaaki weaun wainkamjai. Tura nuni kempatam musach nunia japchiri yurmaru asa uwemrawaitai. ¹⁵Turamtai Juun Pangki jangkenia entsa nujangkruati tusa yumin inaun wainkamjai. Tura entsa nukap nujangkrak nu nuwanka amur jukiti tusa wakerukmayi. ¹⁶Antsu entsa nuwan amurai tusa, nungka urani entsa Juun Pangki jangkenia jiiun mash kuyuaun wainkamjai. ¹⁷Tura Juun Pangki nuwan kajerak, ni weari ampintrau ainaujai maanias weaun wainkamjai. Nu nuwa wearingkia Yus umirkatin chichaman umirinak, Jesucristo chichamenka tuke inaitsuk nekasampita tusar umirinawai.

Jimiar pachim pachisar etserkamu

13 ¹Nunia Juun Pangki juun entsa yantamen naikminam wajaun wainkamjai. Tura juun entsanmaya Juun Yawaaya Tumaun wainchati jiiinkinun wainkamjai. Ni muukesha siete (7) aun tura antiri diez (10) aun wainkamjai. Tura kichik kichik antirin apu tsengkrutirin tsengkrakinaun wainkamjai. Tura kichik kichik muuken Yusen pachis pasé chicham aarmaun wainkamjai.^u ²Tura wi wainkamja nuka juun yawaaya tumau wajaun, nawe chayuwawa tumaun wainkamjai. Antsu jangken juun yawaawajaun wainkamjai. Nunia Juun

Pangki aa nuka Juun Yawaaya Tumaun ni kakarmarin susa, niya nunisang aints ainaun inarti tusa, juun apun inaikiaun wainkamjai. ³Tura chikich muukenka akakmawa tumautiat ataksha tsaarun wainkamjai. Tura tsaaru asamtai, mash nungkanmaya ainau nukap shaminak Juun Yawaaya Tumaun nemarkarun wainkamjai. ⁴Tura Juun Pangkingkia Juun Yawaaya Tumaun ni kakarmarin susau asamtai, Juun Pangkincha aints ainau: Ameketme juuntam tinaun antukmajai. Tura nu Juun Yawaaya Tumauncha: Ameketme juuntam tusar: “¿Yáki jujai metek kakarmai? ¿Tura yáki jujaisha maanikminuit?” tinaun antukmajai.

⁵Tura Juun Pangki Juun Yawaaya Tumaun ni kakarmarin susa, cuarenta y dos (42) nantu: Wikia miajuitjai tusa, Yusen pachis pasé chichasti tusa tsangkatkaun wainkamjai. ⁶Turamu asa Juun Yawaaya Tumau ama nu Yusen pachis pasé chichaun antukmajai. Tura Yuse naarincha pachis, tura Yuse jeencha pachis, tura nayaimpinam pujuinauncha pachis pasé chicharun antukmajai. ⁷Tura Cristonu ainaujai maanikiat tusa, tura niincha nepetkat tusa, tura mash nungkanmaya ainauncha niish niish chichau ainauncha inarat tusa, Juun Pangkingkia nu Juun Yawaaya Tumaunka ni kakarmarin suwaun wainkamjai. ^v ⁸Turamtai mash nungkanmaya ainau Juun Yawaaya Tumaun: Ameketme juuntam tinaun antukmajai. Antsu Yus nungkana najantsaing, tuke pujustinun aintsu naari papinun aatramu ainauka Juun Yawaanaka: Ameketme juuntam tinachun wainkamjai. Uwija Uchiri jakayat nantakmia nuka, nu papinka takakui. ^w

⁹Aints ju chichaman antinauka nintimrarti: ¹⁰“Kársernum engkekratin

ainaunka niincha kársernum engkewartin ainawai. Tura aints saapijai mangkartau-naka, niincha saapijai maawartin ainawai.” Tura asaramtai Juun Yawaaya Tumau Yusen umirin ainaujai mesetan najaninamtai, Yuse aintsri ainauka wait wajainayat Yusen nintimsar: Yus jiisti tusar, pengker nintimsar pujusartin ainawai.

¹¹Nuniasha chikich pachim nungkanmaya jiinun wainkamjai. Nuka uwija uchiriya nunisang antirin jimiar aun wainkamjai. Turayat nu Juun Pangki chichawa nunisang nampurman chichaun antukmajai. ¹²Tura nu pachim nungkanmaya jiinki Juun Yawaaya Tumau aa nuna ni kakarmarin suaun wainkamjai. Tura asamtai Juun Yawaaya Tumaun maamaitiat tsaarma nuna: Ameketme Yusem tiarat tusa, mash nungkanmaya ainaun inaun wainkamjai. ¹³Tura Nungkanmaya Pachim iwianchi kakarmarirjai wainchatai takatnasha turaun wainkamjai. Tura aints jiiminamunam nayaimpinmaya ji keaun nungkanam ujuarun wainkamjai. ¹⁴Tura Juun Yawaaya Tumau wajamunam Nungkanmaya Pachim wainchatai takatan turati timiau asa, mash nungkanam pujuinaun anangkak, nu Juun Yawaaya Tumau muuken saapijai akarkamaitiat, ataksha iwiaaku pujuma nuna nakumkamuri najanawarti tusa, aints ainaun inaun wainkamjai. ^x ¹⁵Tura nu Juun Yawaaya Tumau nakumkamurin chichamtikias mayatairin engketati tusa, Nungkanmaya Pachim ni kakarmarin suaun wainkamjai. Tura nu nakumkamun: Ameketme Yusem tutsuk pujuinaunka maawarti tusa kakarmarin suaun wainkamjai. ¹⁶Tura Nungkanmaya Pachim mash aints ainaun, mianchau ainauncha, tura apu ainauncha, tura kuikiartin ainauncha,

tura kuikiartichu ainauncha, tura aintsu inatirinchu ainauncha, tura aintsu inatiri ainauncha untsur uwejen aatrarti tusa, tura nijajin aatrarti tusa, inaun wainkamjai. ¹⁷⁻¹⁸Tura aints: ¿Nu aarmauka itiurak ainta? tusa nekaatas wakerakka, nukap nekatan yumiartinuitai. Juun Yawaaya Tumau número rin nekau ainauka nekaawarti: Seiscientos sesenta y seis (666) aintsu número rintai. Nu númeroka aintsu nijajin tura uwejen aarchamu ainauka, tura nu páchimia naari ni uwejen tura ni nijajin aarchamu ainauka sumatnasha sumakchartinuitai, tura surutnasha surukchartinuitai tusa, Nungkanmaya Pachim nu aints ainaun surimiaun wainkamjai.

Uwemraru ainau kantamatnurin etserkamu

14 ¹Nuniangka ataksha jii mkaman, Uwija Uchirin Jerusalénnum, mura Sión tutainum wajaun wainkamjai. Tura nijai tsaniasar aints untsuri ciento cuarenta y cuatro warang (144,000) wajainaun wainkamjai. Nu aints ainau nijajin Uwija Uchiri naari, tura ni Apaachiri naari aatrarmaun wainkamjai. ²Tura nuna wainkan, túna untsuri uutinawa tumaun, tura ipiamtasha kakarman patawa tumaun nayaimpinmaya antukmajai. Tura wi antukmajai nuka aints ainau kitarran tuntuinawa tumaun antukmajai. ³Tura Yuse keemtarin ayamsar cuatro (4) iwiaaku ainauncha tura veinticuatro (24) juun ainauncha naka wajatsar, ciento cuarenta y cuatro mil (144,000) ainau yamaram kantan kantaminaun antukmajai. Tura nu kantanka aints kichkisha nuimiarchamin armiayi. Antsu mash nungka ainamunmaya nu ciento cuarenta y cuatro mil (144,000) aints Yus uwemtikramu asar, nu yamaram kantanka nuimiaru armiayi.

⁴Nu aints ainauka nuwajai tunaun takascharu asar pengker ainawai. Tura asar Uwija Uchiri tuni wekaawa nunisha niincha nemarsar wekajinawai. Nu aints ainauka ju nungkanmaya uwemraru asar, nuwá eemkar Yusnau tura Uwija Uchirinu armiayi. ⁵Nuka wait chichaman pengké chichascharu asaramtai, nu aints ainaun pachisar: Tunaachawaitai tiartinuitai.

Kampatam Yuse awemamuri pachisar etserkamu

⁶Nunia kichik Yuse awemamurin nayaimpinam nanaaki wekaun wainkamjai. Nuka mash nungkanmaya ainaun, niish niish chichau ainaun Yusnum uwemratin chichaman tuke etserkatin aa nuna etserkatas nanaaki wekaun wainkamjai. ⁷Tura etserak kakarman chichaak: “Yus aints ainau tunaarin jii stin kinta jeau asamtai, Yus shamakrum pengker awajsataram. Tura asaram Yus nayaimpincha, tura nungkancha, tura juun entsancha, tura entsa kanaji ainauncha mash najanau asamtai, pengker awajsataram” taun antukmajai.

⁸Tamati chikich Yuse awemamuri eemak nanaaki weaun nuna nemaras chichaak: “Babilonia yakat nekas juun aa nuka yanchuk yumpungmawaitai. Mash nungkanmaya ainau ni namangke wakerina nunak turuawarti tusa, tura ni umutirin umurar nampekarti tusa, pasemamtikin asamtai yumpungmawaitai, tuke yumpungmawaitai,” taun antukmajai. ^a

⁹Nunia chikich Yuse awemamuri kampatam ama nuka, eemak nanaaki weaun nuna nemaras kakarman chichaak: “Aints ainau Juun Yawaan tura ni nakumkamurincha: Ameketme Yusem tinauka, ni naarisha, tura ni número risha

ni nijajin, tura ni uwejencha aamtikramu asaramtai, ¹⁰nu aints ainau Yusen timiá nakitinau asaramtai, Yus kakarman kajerkatnuitai. Tura ni awemamuri ainauti wajamunam, tura Uwija Uchiri wajamunam, ji azufrejai tuke keamunam nukap wait wajaktinnun akupkartinuitai.^b ¹¹Nu ji kapauka kajintsuk tuke mukuntiwai. Tura asamtai aints ainau Juun Yawaaya Tumaun Yuschau waininayat: Ameketme Yusem tinu ainauka, tura ni nakumkamurinha: Ameketme Yusem tinu ainauka ni naari ni uwejencha, tura ni nijajincha aatramu ainauka tsawaisha, tura kashisha ayamsuk wait wajakartin ainawai,” taun antukmajai. ¹²Tura asaramtai Yusnau ainauka ni chichamen umirkar Jesúsane tuke nemarkinau asar, tuke inaitsuk pengker nintimsar wait wajakartin ainawai.

¹³Nuniasha nayaimpinmaya chichaman antukmaja nuka nuwaitai: “Ju aarta. Ii Apurin umirnak yamai jakaru ainaunka, tura ukunam jakartin ainauncha Yus waramtikartinuitai,” taun antukmajai.

Tamati Yuse Wakani chichaak: “Nekasaintai. Yusen umirkaru asar, ni pengker turamurinka Yuska kajinmatsui. Tura Yuse takatrin takakmasaru asar ayamsartinuitai,” taun antukmajai.

**Ju nungkanmaya ainaun juuktin
kinta pachis etserkamu**

¹⁴Nunia jiimkaman yurangmin pújun wainkamjai. Tura yurangminam ketun wainkamjai. Nuka Yus ni awemamurin akupkau wainiatun, aintsua tumaun wainkamjai. Tura ni muuken tsengkrutin kuri najanamun tsengkrakun wainkamjai. Tura kuchín eren turayat tseengkan takakun wainkamjai. ¹⁵Tura chikich Yuse awemamuri nayaimpinmaya Yuse jeenia jiinun wainkamjai. Nuka yurangminam

keemas nunia kakar untsuak: “Nungkanam árak yanchuk tsamaku asamtai, juuktin kinta jeayi. Tura asamtai kuchírumjai charukam juukta,” taun antukmajai. ¹⁶Tamati yurangminam ketun wainkamja nuka ju nungkanmaya aints arakan kuchíjai charur juwawa nunisang juwaun wainkamjai.

¹⁷Nunia chikich Yuse awemamuri Yuse jeenia nayaimpinam wainkamja nunia jiinun wainkamjai. Nusha nunisang kuchín eren tseengkan takakun wainkamjai. ¹⁸Nunia chikich Yuse awemamuri kungkuti keematinmaya jiinun wainkamjai. Nuka jiin akupnuyayi. Tura chikich Yuse awemamuri kuchí tseengkan ére aa nuna takakun kakar untsuak: “Nungkanam uva nere yanchuk tsamaku asamtai, kuchírum ere takakme nunajai charuram juukta,” taun antukmajai.

¹⁹⁻²⁰Tamati Yuse awemamuri nungkanam tari ni kuchírijai uva neren charuk juwaun wainkamjai. Tura uva yumiri juukartas, yakta aarin uva nere irumtainum chumpiamu asamtai, uva neren nájainaun wainkamjai. Tura uva yumiri jiinun wainkatatkaman, numpa jiinun wainkamjai. Tura numpa entsa tumaun kempatam pachak (300) kilómetros pajamar kawai jangkejai metek kuna wajasun wainkamjai. Wi wainkamja nuka aints Yusen umirtan nakitin ainaunka Yus kajerak amuktinuitai taku tawai.^c

**Inangnamu wait wajaktinuin
pachis etserkamu**

15 ¹Tura ataksha jiimkaman, chikich siete (7) Yuse awemamurin nekas shamrumtinun wainkamjai. Tura ataksha inangnamunam siete (7) wait wajaktinun nekas shamrumtinun wainkamjai. Nu wait wajaktin nangkamaramtai, nuniangka Yuska aints ainaunka kajerkashtinuitai.

²Nunia jiimkaman, juun entsa winchaan miastian ispiya tumaun, turayat jiya tumau keaun wainkamjai. Tura nuni aints ainau kitarra tumaun Yus susarma nuna takusar wajainaun wainkamjai. Nu aints ainauka iwianch Juun Yawaaya Tumauncha, tura ni nakumkamurinja: Ameketme Yusem ticharu asar, tura Juun Yawaaya Tumau naarisha, tura númeroisha ni nijajinja, tura ni uwejencha aatrachmau asar nuni wajainaun wainkamjai. ³Tura Yuse inatiri Moisésa kantarin, tura Uwija Uchiri kantarin kantaminaun antukmajai. Nu kantaka nuwaitai:

“Apuu Yus, Ameka mash tujinka-chuitme. Ami kakarmarmijai najanamiamie nuka nekas shiirmaitai, tura nekas pengkeraitai. Ameka nekasam mash nungkanmaya ainau Apurinme, tura pengker aa nuke turau asam ameka nekasainme.^d

⁴ “Apuu Yus çyaachik amincha shamramtsuksha: Ameketme juuntam turamtsuksha inaitam-sarti? Ameka pengké tunaarinchau asakmin, ame pengker turamurmin wainkaru asar, mash nungkanmaya ainau amin kautramkar: Ameketme juuntam turamartinuitai,” tu kantaminaun antukmajai.^e

⁵Nunia jiimkaman, nayaimpinam Yuse jeen nekas juun amia nuna uranniun wainkamjai. Yaanchuik Yuse ayamtairi tesaamu amia nu nayaimpinam aun wainkamjai. ⁶Nunia siete (7) Yuse awemamuri Yuse jeenia jininaun wainkamjai. Nuka wejmakan lino tutain najanamun entsarinaun wainkamjai. Tura ni wejmakrincha pakuichau wincha ainaun wainkamjai. Tura kachumtai kuri

najanamun netsepea miai kachumawar wajainaun wainkamjai. Nuka siete (7) wait wajaktiniun akupkartin ainawai. ⁷Nunia cuatro (4) iwiaaku ainaun nu nangkamchakun wainkamja nuna ataksha kichkin wainkamjai. Nuka Yuse awemamuri siete (7) ainia nuna piningkia tumau kuri najanamun kichik kichik suaun wainkamjai. Tura nu piningkia tumaunum Yus tuke iwiaaku puja nuna siete (7) wait wajaktintrin akupkatin aa nu engkeamun wainkamjai. ⁸Nunia Yus paaniunam puja nuka timiá kakaram asamtai, ni jeen mukunit piakun wainkamjai. Turamtai nu siete (7) Yuse awemamuri wait wajaktiniun ukarar amuinatsaing, Yuse jeenka wayaachminu-yayi.^f

Siete wait wajaktiniun pachis etserkamu

16 ¹Nunia chichaman kakarman Yuse jeenia Yuse awemamuri siete (7) ainia nuna akupkatas chicharun antukmajai. Nu chichama nuwaitai: “Yuse kajekmauri siete (7) piningnum engkeamu ainau nungkanam ukartaram,” taun antukmajai.

²Tu akatramu asa, Yuse awemamuri kichik we, piningnum engkeamun nungkanam ukaun wainkamjai. Nuna ukaramtai aints ainau Juun Yawaaya Tumau naarincha tura númeroincha aamtikramu ainau, tura Juun Yawaaya Tumau nakumkamurin: Ameketme Yusem tinu ainauka kuchap pasé najamin ainaujai wait wajainaun wainkamjai.^g

³Nunia chikich Yuse awemamuri, jimiar aa nu, piningnum engkeamun juun entsanam ukaun wainkamjai. Nuna ukaramtai, juun entsaka aints maamua nunisang numpa najanarun wainkamjai. Tura asamtai juun entsanam mash iwiaaku ainausha jakarun wainkamjai.

⁴Nunia chikich Yuse awemamuri, kampakam aa nu, piningnum engkeamun ukaramtai, entsa ainausha tura entsa kanaji ainausha numpa najanarun wainkamjai.^h

⁵⁻⁶Nunia Yuse awemamuri entsan wainin aa nuna chichamen antukmajai. Nuka Yusen chicharak:

“Apuru Yus, yaanchuiksha tuke pujuyame. Tura asam yamaisha tuke iwiaakuitme. Ameka pengké tunaarinchau asam, tunaarintin ainau aitkamame nuka nekas pengkeraitai tajame. Aints ainau ami aintsrum ainauncha maawaru asaramtai, tura ami chichamin etserin ainauncha nunisarang maawaru asaramtai, nu aints ainauka numpan umura-rat tusam, wait wajaktincha suame,” taun antukmajai.

⁷Nunia kungkuti keematinmaya chicham jiinun antukmajai. Nu chichaman chichauka Yusen chicharak:

“Apuru Yus, Ameka pengké tujinka-chuitme. Ameketme nekasam. Ameketme pengkeram. Tura asam tunau ainauka wait wajaktin suame” taun antukmajai.

⁸Nunia chikich Yuse awemamuri, cuatro (4) aa nu, tsaá sukuam aints ainau seekijai wait wajakarti tusa, piningnum engkeamun tsaanam ukaun wainkamjai.

⁹Turamtai aints ainau tsaá sukuam timiá wait wajainayat, ni tunaarinka inaisacharun wainkamjai. Tura Yusnaka:

Juuntaitme tutsuk, antsu Yus nu wait wajaktiniun susarmaitiat, Yusen pasé chicharinaun antukmajai.

¹⁰Nunia chikich Yuse awemamuri, cinco (5) aa nu, piningnum engkeamun Juun Yawaaya Tumaun keemtairin ukarun wainkamjai. Turamtai Juun Yawaaya Tumaun umirkaru ainau

pujamurin tee wajakinun wainkamjai. Turamtai nu aints ainauka nukap wait wajainau asar, inajin esainiar pujuinaun wainkamjai.ⁱ ¹¹Tura timiá najaiminaun asar, tura kuchaprukar wait wajainau asar, Yus nayaimpinam puja nuna pachisar pasé chicharinaun antukmajai. Tura ni tunau turamurincha pengké inaisacharun wainkamjai.

¹²Nunia chikich Yuse awemamuri, seis (6) aa nu, piningnum engkeamun entsa nampuram Eufrates tutainum ukarun wainkamjai. Tura ukaramtai tsaá taakmaunumanini apu ainau ni suntarijai winiarat tusa, entsa kuyua mujukash wajaknun wainkamjai.

¹³Nunia jiimkaman, Juun Pangki jangkenia, tura Juun Yawaaya Tumaun jangkenia, tura Nungkanmaya Pachim anangkartutai chichaman etsernu jangkenia kampakam pasé wakantrintin parungkachia tumaun jiininaun wainkamjai. ¹⁴Nu pasé wakantrintin wainchati takatnasha turinak, mash nungkanmaya ainau apuri: Yusjai maaniataram tiartas jiininaun wainkamjai. Nu maaniatin kinta jeamtai, Yus nekas kakaram asa nu apu ainaun nepetkatnuitai.

¹⁵⁻¹⁶Nunia mash nungkanmaya ainau apuri iruntrarar tusa, kampakam pasé wakantrintin ainau nungka Armagedón tutainum iruntrarun wainkamjai. Nu nungkaka hebreo chichamejai tu inaikiamuitai.

Nunia Cristo chichamen antukmajai. Nu chichamka nuwaitai: “Anearum pujustaram. Nukia kasa aintsua nunisnak aneachmau winitnuitjai. Tura asamtai aints kanutsuk ni entsatirin pengker wainua nunisang pujauka nekas warastinuitai. Tura ni entsatirin pengker wainu asamtai kasarkacharti-

nuitai. Tura misu wajachu asa natsaarchatnuitai,” taun antukmajai.^j

¹⁷Nunia chikich Yuse awemamuri siete (7) aa nuka piningnum engkeamun nasenam ukaun wainkamjai. Tura nasenam ukaram, Yuse jeen nayaimpinam amia nuna keemtairinia kakarman untsumun antukmajai. Nu untsumauka nuwaitai: “Wait wajaktinka yanchuk umismawaitai.” ¹⁸Nu chichaman wi antukamtai, uutmausha uutun antukmajai. Tura charpisha, tura ipiamtasha patinaun antukmajai. Nunia uu nekas kakarman uurun wainkamjai. Aints nu nangkamtaik pujuinausha, tura yamai pujuinausha timiá kakaram uurunka pengké wainkacharmiyai.^k ¹⁹Timiá kakarman uurmatai, juun yakat kempatam kanakarun wainkamjai. Tura chikich nungkanmaya yakat ainausha yumpuninaun wainkamjai. Tura juun yakat Babilonia tutain Yus timiá kajerau asa, ni nukap wait wajaktintrin akuptukun wainkamjai. ²⁰Timiá kakarman uurmatai, isar ainausha, tura mura ainausha mengkakarun wainkamjai.^l ²¹Nunia micha kaya tumau mermari cuarenta (40) kilo jeatak nayaimpinmaya aints ainamunam iyaarinaun wainkamjai. Tura micha iyaaramtai, aints timiá wait wajainayat, Yusen kajerinak tuke pasé chicharinaun antukmajai.^m

Babilonia pachisar etserkamu

17 ¹Nunia siete (7) Yuse awemamuri wi wainkamja nuna ataksha kichik wainkamjai. Tura wi wainkam chichartak: “Winita. Juun kungkatip unturi entsa ainamunam keta nuna wait wajaktintrin amin inaktustasan wakerajme. ²Unturi nungkanmaya apu ainau nu nuwajai nekasar tunaun turin

armiyai. Tura unturi nungkanmaya ainau nu nuwa tunaarin wakerinau asar, ni umutiri vino tutajai nampekarua nunisarang puju armiyai,” taun antukmajai.

³Tura Yuse Wakani nintirun piatruku asamtai, karanma nunisnak Yuse awemamuri aints atsamunam wina jurukin asamtai, nuwan ni entsamtairin kapanniunam entsamkaun wainkamjai. Tura ni entsamtairi namangken Yusen pachis pasé chicham aarmaun wainkamjai. Tura entsamtairi siete (7) muuktinun wainkamja nuna antirisha diez (10) aun wainkamjai.ⁿ ⁴Tura nu nuwa wejmakrin yamakijai engkermawa tumaun, tura kapantin akik aa nuna entsar, kuri akiknasha tura kaya akiknasha, tura shaak akiknasha iwiarmamar, pining kuri najanamun takakun wainkamjai. Nu piningnum ni aintsjai tunau turutiri piakun wainkamjai. ⁵Tura ni nijajin ni naaringkia aarmaun wainkamjai. Nu aarmauka nuwaitai: “Juun yakat Babiloniaka kungkatip ainau nukurintai. Tura mash nungkanmaya tsuutmai turin ainau nukurintai.” ⁶Nu nuwaka Yuse aintsri ainauncha, tura Jesúsua chichamen etserkaru ainauncha mau asa, ni numpen umur nampekua tumaun wainkamjai.

Tura nuna wainkan nukap nintimramjai. ⁷Wi nintimramtai, Yuse awemamuri wina chichartak:

“¿Waruka timiatcha nintimrame? Ju nuwaka ni entsamtairi siete (7) muuktin tura diez (10) antirintin aa nuka warimpita tusan, chikich ainaunka nekamtikiachmin ayatun, aminka paan nekamtikiatjame. ⁸Ju nuwa entsamtairi wainkame nuka yaanchuik pujuya nuwaitai. Tura yamaikia juningkia pujachiat, nungka amumanum tuke

jasuk waa juunumia jiinkitnuitai. Tura jiinkiamtai, Yuse umirchau ainau ni naari nayaimpinam Yuse papirin nu nangkam-taik aatrachmau asar, nu nuwa entsamtairin wainkar nukap nintimrarti-nuitai. Ju nuwa entsamtairingkia yaanchuik pujuutiat yamaikia atsawai, antsu ataksha wantinkatnuitai.⁹

⁹“Nekas nekau ainauka ju chichamna-sha nintimrarti. Nu nuwa entsamtairi muuke siete (7) aa nuka siete (7) mura tumawaitai. Nu nuwa tumau aa nuka siete (7) muranam matsatui. ¹⁰Nu nuwa entsamtairi muuke wainkame nuka siete (7) apua tumawaitai. Antsu siete (7) apu ainayat, cinco (5) apu ainauka yanchuk mengkakarua ainawai. Tura kichik yamaikia pujayat, kichka wantintsui. Antsu ni taasha jumchik arus mengkakatnuitai. ¹¹Tura Juun Yawaaya Tumau yaanchuik pujumia nuka, nunia mengkamia nuka chikich seis (6) apu ainaujai mash irumram siete (7) apu ainawai. Tura ataksha wantinak tuke mengkakatanunam wetinuitai.

¹²“Nunia antiri diez (10) wainkame nuka diez (10) apu ainawai. Nuka aintsun inatnaka nangkaminatsui. Tura aints inatan nangkamawar, Juun Yawaaya Tumaujai aints ainaun jumchik kintachik inartinnuitai. ¹³Nu apu ainau mash metek nintimrar: Juun Yawaaya Tumau iincha mash inatmarti tusar wakeriartinuitai. ¹⁴Tura Uwija Uchirijai maanikiartinuitai. Tura wainiat Uwija Uchiri mash juun ainau juuntri asa, tura mash apu ainau apuri asa, ni aintsri ainaujai tsanias nu apu ainauncha nepetkartinuitai. Tura Uwija Uchirijai tsaniasar pujuinauka Yus: Wina umirtuktaram tusa untsukmau asar, Criston miatrusarang umirinawai,” turutun antukmajai.^p

¹⁵Nunia ataksha Yuse awemamuri wina chichartak: “Juun kungkatip untsuri entsa ainamunam ketu wainkame nuningkia nu juun entsa ainauka nuwaitai tusan nekamtikiatjame. Nuka untsuri nungkanmaya aints ainawai. Tura untsuri asar, niish niish chichainawai. ¹⁶Tura nu diez (10) antirintin wainkame nuka diez (10) apu asar, nu juun kungkatpin nakitrar, ninu aunaka mash atankiar jurukiar, misu kuimiakua nunisarang ukukiartinuitai. Tura ni namangken yuwar, nuniangka epewartinnuitai. ¹⁷Tura Yus timia nunaka mash umiatsaing, nu apu ainau mash iruntrar metek nintimsar: Juun Yawaaya Tumau iin inatmin ati tusar wakerukartinuitai. ¹⁸Tura nuwa tumau ame wainkame nuka nekas juun yaktaitai. Nu juun yaktanam pujuinau mash nungkanmaya apurin inaminawai,” turutun antukmajai.

Babilonia yakat yumpungmauri

18 ¹Nunia jiimkaman, chikich Yuse awemamurin nayaimpinmaya taarun wainkamjai. Ni kakarmari nukap au asamtai, nungkasha nukap paan wajaknun wainkamjai. ²Tura kakar untsamak:

“Babilonia yakat juun aa nuka mash yumpungmawaitai, tuke yumpungmawaitai. Tura iwianchi jee najanari. Tura pasé wakani pujutiri najanari. Tura asamtai nanamtin pasé ainau tura tsuutmai ainau nuni pasungminawai.⁴

³ Mash nungkanmaya ainau Babilonianmaya ainaujai metek tunau takainau asar, ni umutirijai nampekarua nunisarang nintinchau wajau armiayi. Tura chikich nungkanmaya apu ainau

nu yaktajai tsanirmawarua
nunisarang puju armiyai.
Tura nu yaktanmaya warinchun surin
ainau
nu yaktanmaya warinchurin surukar
kuikiartin wajau armiyai,”
taun antukmajai.

⁴Nunia chikich chichaman nayaimpin-
maya chichaun antukmajai. Nu
chichamka nuwaitai:

“Wína aintsur ainautiram,
nu yaktanmaya tunau jurumakrum
wait wajakairam tusan
jiinkitaram tajarme.

⁵ Nu yaktaka tunau piaku asamtai,
tunaarintin ainau timiá untsuri asar,
ni tunaari nayaimpin antingkoa
nunisarang ainawai.

Tura asaramtai Yus ni tunaarinka
kajinmatsui,” taun antukmajai.

⁶Nunia Yuse awemamuri ainaun
chicharak:

“Chikich ainaun wait waktaginiun
susarmia nuna nangkamasrumek
nu aints ainau nukap wait wajakarti
tusaram yapaijkiataram.

Tura chikich aints ainaun
tunau timiá takamtiksaru asaramtai,
nuna nangkamasarang nukap wait
wajakarti tusaram wenataram.”^r

⁷ Nuka ningki nintimtumasar:
Wikia apu nuwaria nunisnak yuuma-
tsuk pujajai.

Tura wajechuitjai.

Tura asan waitka wajakchatatjai.

Tura wikia miájuitjai tu nintimsar
pujuinayat,

ni pasé turamuri wararsarmia nujai
metek wait wajakartin susataram.

⁸ Aints timiá tunau asaramtai,
apu Yus timiá kakaram asa,
kichik kintatik wait waktaginiun
susatnuitai.

Tura asa jatancha,
tura nukap wait waktinnasha,
tura tsukancha akupkatnuitai.

Nunia ni yaktarinka jijai keemakti-
nuitai,” taun antukmajai.

⁹Turamtai mash nungkanmaya apu
ainau nu yaktanmaya aintsua nunisarang
tunau takainau asar, tura tuke ni wakera-
murin najaninau asar, nu yakat keaun
jiisar juutinak:

“Chaj ¿Warukaya nu yaktasha timiá
shiiram aa nusha keawa?

¿Iisha warukatnukitai?” tiartinuitai.

¹⁰Tura mash nungkanmaya ainau apuri
nu wait waktaginiun shaminak arák
wajasar:

“Chaj, juun yakat Babilonianmaya
ainautirmin

wait anentajrume. Atum wait
wajamuri aneachmau jeartamin
asamtai,

kichik urajaing jeartamniurme,”
tiartinuitai.

¹¹Nunia juun yaktaka keemamu
asamtai, mash nungkanmaya ainau
waririn surin ainauka wake mesekar
juutkamaikiak: “¿Yamaikia yáki ii waririn
sumakarat?” tiartinuitai. ¹²Babilonia
yaktanam itau armia nuka nuwaitai:
Kurin, nunia kuikian, nunia kaya shiiram
ainia nuna, nunia shaak shiiram ainia
nuna, nunia tarach akik lino tutain, nunia
tarach kapantaku tura kapantin ainia
nuna, nunia tarach seda tutain, nunia
numi kungkuram ainia nuna, nunia
irijánti nain akik aa nuna, nunia numi
akik ainia nuna, nunia jirun, nunia jiru
yangku ijakmamchau aa nuna, nunia kaya
mármol tutai aa nuna itau armiyai.

¹³Nunia yutai pachimtai ishping
najanamun, nunia chikich yutai pachimtai
kungkuram ainia nuna, nunia shirikip
kungkuram aa nuna, nunia kungkuti mirra

tutain, nunia perfume akik aa nuna, nunia vinon, nunia olivo macharin, nunia pang najantain, harina tutain, nunia trigon, nunia warinchu entsau ainaun, nunia uwija ainaun, nunia kawai ainauncha, nunia kawai japitin kárru tutain, nunia aintsnasha chikich ainamunam surukmi tusar itau armiai. ¹⁴Tura nu yaktanmaya ainaun pachisar chichainak:

“Yurang ainaun wakerin armia nuka yamaikia atsuinawai.

Tura ni kuikiarisha, tura timiá shiiram ainia nuka tuke mengkakarú asaramtai, yamaikia pengké wainkachartinuitai,” tiartinuitai.

¹⁵Tura nu yaktanam wariri untsurin surukar kuikiartin wajasaruka nu wait wajaktiniun shaminak arák wajasar wake mesekar juutiartinuitai. ¹⁶Tura chichainak:

“Chaj, nekas juun yaktanmaya ainauka shiirman iwiarmamrartas tarach akik lino tutain sumakar, tura tarach kapantakun tura kapantin aa nuna entsasar pujú armiai. Tura kurijaisha, tura kaya timiá shiirmajaisha, tura shaak akik ainia nujaisha shiirman iwiarmamin armiai.

¹⁷ Turayat kakarmachu ni kuikiari mash mengkakayi,” tinaun antukmajai.

Tura juun kanu apuri ainausha, tura juun kanunam wekain ainausha, tura kanunam takakmin ainausha, tura kanurtin ainausha mash arák wajasar, ¹⁸juun yakat keamtai, mukuntuirin jiisar juutinak:

“¿Tu yaktak ju yaktajaisha meteksha at? Ju yaktajai metekka kichkisha atsuyi,” tinaun antukmajai.

¹⁹Timiá wake mesemar pujuinak, nungka juyurin jukiar, muuken yukuuminak kakarar juutinak:

“Chaj, ju yaktaka timiá juun ayat yumpuunkayi. Juun kanurtin ainauka juun entsanam wekajinau asar, waririn akik ainia nuna ju yaktanam jukiar kuikiartin wajasarmiai. Turayat yamaikia kakarmachu mengkakayi,” tinaun antukmajai.

²⁰Nunia ataksha nayaimpinmaya chichaun antukmajai. Nu chichamka nuwaitai:

“Nayaimpinam pujuinautiram, tura Yus akupkamu ainautirmesha, tura yaanchuik Yuse chichame etserin ainautirmesha, tura Yusnau ainautirmesha, ju yakat meseru asamtai mash warastaram.

Nu yaktanmaya ainau atumin pasé awajtamsaru asaramtai, Yus ni wait wajakartiniun susa yapaijkiau asamtai warastaram,” taun antukmajai.

²¹Nunia chikich Yuse awemamuri nekas kakaram aa nuka, kaya juuntan merman juki, juun entsanam ujung chichaak:

“Ju kayaka juun entsanam ujungmawa nunisang juun yaktasha Babilonia tutai mengkakatnuitai. Tura asamtai atakka pengké wainkachatnuitai.

²²⁻²³ Nu yaktanmaya ainau wariri surin mash nungkanmaya apuri ainayat, wishin asar nu yaktanam pujuinau mash nungkanmaya ainaun anangkawaru asaramtai, yamaikia kitar tuntuyamuncha, tura nampeamuncha, tura nangku umpuamuncha,

tura pupun pupuntramuncha,
tura jiru takainamuncha,
tura trigo neketai shinamuncha
pengké kichkisha antukchartinuitai.
Tura nu yaktanmaka kantiin
kichkisha keemachartinuitai.
Tura aints ainu nakurinamuncha
pengké antukchartinuitai.

²⁴Nu yaktanam yaanchuik
Yuse chichame etserin ainaun,
tura Yuse aintsri ainauncha
tura chikich nungkanmaya ainauncha
nangkamiar maawaru asaramtai,
nu yaktaka mengkakatnuitai,” taun
antukmajai.

19 ¹Nunia nayaimpinam aints
untsuri kakarar chichainau
antukmajai. Wi antukmaja nuka
nuwaitai:

“Ii Yusringkia paaniunam puja nuka
ni kakarmarijai iin uwentikram-
rau asamtai,
maaketai tiarmi.

²Yuska nekas tunaarinchau asa
tupin nintimias,
tunaarintin ainaun ni tunaarijai
metek wait wajaktiniun suawai.
Tura asa nu yaktanmaya ainausha
juun kungkatpia nunisarang
tuke mash nungkanmaya ainaun
tunau takamtiksaru asaramtai,
ni wait wajaktintrin susayi.
Tura Yuse inatiri ainaun
maawaru asaramtai,
niisha jakaarat tusa yapaijkiayi,”
tinaun antukmajai.

³Nunia ataksha chichainak:
“Nu yakta mukuntiuiri
tuke nangkantsuk
yakí wakatin asamtai,
Yuska maaketai titaram,” tinaun
antukmajai.

⁴Nuniangka veinticuatro (24) juun
ainau nayaimpinam wainkamja nuka,
tura cuatro (4) iwiaku ainau nayaimpi-

nam wainkamja nujai tsaniasar, Yus ni
keemtairin keta nunak: Ameketme
juuntam tiartas pinakumrar tepesar: “Tu
atí. Yus maaketai titaram,” tinaun
antukmajai.

⁵Nunia Yuse keemtairinia chichaman
antukmajai. Wi antukmaja nuka
nuwaitai:

“Yuse inatiri ainautiram,
uchi ainautirmesha tura juun
ainautirmesha,
ni umirkuram pujau asaram,
mash iruntraram Yus pengker awajsa-
taram,” taun antukmajai.

Uwija Uchiri nuwa nawantan nuwatkamuri

⁶Nuniangka aints untsuri chichainawa
tumaun antukmajai. Ni chichaamuringkia
túna untsuri uutinawa tumaun tura
ipiamat kakarman chichawa tumaun
antukmajai. Nuka chichainak:

“Ii Apuri Yuska pengké tujinkachui-
tai.

Nekas mash aa nunaka inartinun
nangkamau asamtai,
Yuska maaketai tiarmi.

⁷ Uwija Uchiri nuwenatin kintaka
yanchuk jeayi.
Tura asamtai ni nuwaringkia
yanchuk mash umisi.

Tura asamtai yamaikia warasarmi.
Tura nukap warasar
Yuska pengker awajsarmi.

⁸Tura uwija Uchiri nuwari
entsatiri lino tutain wincha
pakuichaun entsarti tusa,
Yuska tsangkatkayi.
Nu tarach akik lino najanamuka
Yuse aintsri ainu pengker turamuri
ainawai
taku tawai,” tinaun antukmajai.

⁹Nunia Yuse awemamuri wina chichar-
tak: “Jusha aarta, Uwija Uchiri
nuwenmaunum untukmau ainaun Yuska
waramtiksartinuitai,” turutun antukma-

jai. Nunia ataksha chichartak: “Ju chichamka nekasar Yuse chichame ainawai,” turutun antukmajai.

¹⁰Turutmatai ni wajamunam: Ameketme juuntam titasan tikishmatram-jai. Turamaitiat wina chichartak: “Aitkarawaip. Antsu Yusek: Ameketme juuntam tita. Wisha amea nunisnak Jesúsá inatiri asan, ni chichamen etserina nujai metek Yuse inatirinjai. Yuse chichame etserin ainau Jesús tímia nuna antukaru asar, nusha nunisarang etserinawai,” turutun antukmajai.

**Kawai pujunam entsamkaun
pachis etserkamu**

¹¹Nunia jiimkaman nayaimpin uranniun wainkamjai. Tura kawai pújuncha wainkamjai. Tura kawainum entsamkaun wainkamjai. Ni naaringkia Yuse Chichamen Umirin tura Nekas Aa Nuna Turin naartinuitai. Tura mash aa nuna inakratin asa, tura tunaarinchau asa, ni umirchau ainaujai mesetan najanui. ¹²Ni jiingkia nekas ji kapawa tumaun wainkamjai. Tura ni muuken tsengkrutin untsurin tsengkrakun wainkamjai. Chikich naarisha aatramun wainkamjai. Antsu warina takua tawa nunaka ningki nekawai. ¹³Ni entsatiri numpajai engkermaun kapanniun entsarun wainkamjai. Tura ni naaringkia Yuse Chichamentai.^s ¹⁴Tura ni suntari ainau nayaimpinmaya tariar, entsatiri pújun lino tutai najanamun pakuichaun entsarar, kawai pújunam keemsar nemarinaun wainkamjai. ¹⁵Tura saapi yantamen mai ere tsakamua tumaun nuwik wainkamja nuna jangkenia jiinun wainkamjai. Nu saapijai mash nungkanmaya ainau nepetkatnuitai. Tura nangki jiru najanamujai mash nungkanmaya ainau inartinuitai. Yuska timiá kakaram

asa, tura tunaarintin ainau turamurin pengké nakitau asa, nu aints ainaun wait wajaktiniun nukap susatas akupkau asamtai, aints uva yumirin juuktas, nawejai yurangken najawa nunisang, Yusen umirchau ainau wait wajaktiniun suawai.^t ¹⁶Tura ni wejmakrin tura ni makuincha chikich naari aarmaun wainkamjai. Nu aarmauka nuwaitai: “Mash Apu Ainau Apurintai. Tura Mash Juun Ainau Juuntrintai.”^u

¹⁷Nunia Yuse awemamuri tsaanam wajaun wainkamjai. Nuka nanamtin ainau yakí nanaminaun kakar untsuak: “Yus atum yuwatniunka umisu asamtai kaunkataram.

¹⁸ Apu ainau namangkesha, tura suntara apuri namangkesha, tura mangkartin ainau namangkesha, tura kawai ainau namangkesha, tura kawainum keemsaru namangkesha yuwamnuram kaunkataram. Jakaru ainau namangkesha, tura inatichu ainau namangkesha, tura inati ainau namangkesha, tura mianchau ainau namangkesha, tura apu ainau namangkesha mash yuwitaram,” tusa untsuaun antukmajai.

¹⁹Nunia Juun Yawaaya Tumaun mash nungkanmaya apuri ainaujai, nunia ni suntarijai mash iruntrar Cristo kawai pújunam keemsau aa nujai, tura nuna suntarijai mesetan najanawartas iruntrarun wainkamjai. ²⁰Nunia Juun Yawaaya Tumaun achikiar, nunia Anangkartin Chichaman Etsernu Juuntrincha achikiar, mai iwiaaku waininayat, kucha jiiya tumaun azufrejai keemunam ujungkarun wainkamjai. Nu Anangkartin Chichaman Etsernu Juuntringkia Juun Yawaaya Tumaun wajamunam wainchati takat turamujai

aints ainaun anangkaw asamtai, Juun Yawaaya Tumaun naaringkia aints ainau nijajin, tura ni uwejencha aattrarun wainkamja nuwaitai. Tura Juun Yawaaya Tumaun nakumkamurin: Ameketme juuntam tinaun antukmaja nuwaitai. Tura aintsun untsurin anangkawaru asaramtai, kucha jiya tumau azufrejai keamunam mai ujungkarun wainkamjai.^v
²¹Antsu chikich aints ainau kawai pújunam keemsaujai maaniawaru asaramtai, saapijai ni jangkenia jiinua nujai mash amuaun wainkamjai. Turamtai nanamtin ainau nu jakaru ainau namangken yuwaar tutuararun wainkamjai.

**Kichik warang musach
Cristo aints ainaun inartintri**

20 ¹Nunia chikich Yuse awemamurin nayaimpinmaya taarun wainkamjai. Nuka waa jiiamran yawirin takus, tura cadenan sarman takus taarun wainkamjai. ²Tura nu Juun Pangki Nawentin nu nangkamtaik napia tumau wantinkamia nuka, iwianchi apuri Satanás naartinun ataksha wainkamjai. Nunia Yuse awemamuri Satanásan achik cadenajai jingkia, ³waa jiiamranam engkea, nunia tektutirijai tektuk, yawijai yawikun wainkamjai. Turamtai mash nungkanmaya ainaun anangkawai tusa, kichik warang musach nuni engkeamu pujustinuitai. Tura kichik warang musach nangkamaramtai, ataksha jumchik kinta atíá akupkatnuitai.^w

⁴Nunia apu keemtairi ainamunam nuni ketinaun wainkamjai. Yus: Aints ainau turamuri atumka nekaataram tusa kakarmarin susamuitai. Nuningkia Jesúsua umirin Yuse chichamen etserkaru asar, jachajai muuken akarkar maamu ainau

wakanin wainkamjai. Nuka Juun Yawaaya Tumaun, tura ni nakumkamurincha: Ameketme juuntam ticharu ainawai. Tura Juun Yawaaya Tumaun naaringkia ni nijajincha, tura ni uwejencha aatrachmau ainawai. Nu aints ainau maamaitiat ataksha iwiaaku wajasar, Cristojai kichik warang musach aints ainaun ínaunaun wainkamjai.^x ⁵Nuka nekasar nuwá eemkar nantakiartinuitai. Antsu kichik warang musach nangkamaramtai, Cristo umirchau ainauka ukunam nantakiartinuitai. ⁶Nuwá eemkar nantakiartin ainauka Yuse aintsri asar nukap warasartinuitai. Tura ataksha pengké jakachartinuitai. Tura sacerdotea nunisarang Yushasha, tura Cristoncha pengker awajartinuitai. Tura kichik warang musach Cristojai tsaniasar aints ainaun inartinuitai.^y

Iwianchi apuri tuke mengkakatniuri

⁷Nunia kichik warang musach nangkamaramtai, Satanás ni achikmau pujamurinia ataksha jiikir akupamu atinuitai. ⁸Nunia mash nungkanmaya ainaun anangkatas jiinkitnuitai. Nu nungka apuringkia Gog naartinuitai. Tura ni aintsri ainau Magog naartinuitai. Nu aints ainau juun entsa naikmiria timiá untsuri asar, nujai mash iruntrar mesetan najanawartas jiinkartinuitai.

⁹Tura Satanás waanmaya jiinkin asamtai, mash nungkanmaya ainau timiá untsuri kaunkar, paka nungkancha netkar mura wakaar, Yuse aintsri ainau pujutirin tentakar, Yuse aneetiri yaktancha Jerusalénasha tentakarun wainkamjai. Tura Yus nayaimpinmaya jiin akupak nu aints ainaunka mash amukun wainkamjai. ¹⁰Numiangka Satanás aints ainaun tuke anangmia nuka kucha ji azufrejai keamunam ujungmawaitai. Nuni

Juun Yawaaya Tumausha, tura Anangkartin Chichaman Etsernu Juuntrisha tsawaisha, tura kashisha tuke nangkantsuk wait wajakarti tusar ujungkarun wainkamjai.

**Juun keemtainum pújunam
ketun wainkamu**

¹¹Nuniangka jiihkaman Yuse keemtairi juuntan nekas pújun wainkamjai, tura nu keemtainum ketun wainkamjai. Nu keemtainum keemsamtai, nungkasha tura nayaimpisha mengkakarun wainkamjai. Antsu nuniangka ataksha pengké wainkachmajai.

¹²⁻¹³Nuniangka jiihkaman, juun entsanam jakaru ainaun tura nungkanam iwarsamu ainausha jiihkiarun wainkamjai. Aints tuning jakaria nuni ataksha nantakiar namangtuk wajainaun wainkamjai. Nuniangka papi ainaun urakmaun wainkamjai. Chikich papisha Yusnum tuke pujustin ainu naari aarmau aa nuna urakmaun wainkamjai. Chikich papinum aints ainu turamurisha mash aarmau asamtai, Yus nu aarmauncha jiis, apu ainausha tura mianchau ainausha Yuse keemtairin naka wajainamtai, ni tunaarijai metek wait wajakartintr tu awai tusar nekamtikun wainkamjai. ¹⁴⁻¹⁵Nuniangka jakatin, tura jakaru ainu matsamtairincha ji kucha tumau keamunam ujungmaun wainkamjai. Tura tuke Yusnum iwiaku pujustin papinum nu aints ainu naari aatrachmau asar, kucha jiya tumau keamunam ujuinaun wainkamjai. Nu aints ainuka Yusnum pengké jeachartin asar, antsu ji kajintrashtinnun tuke wait wajakartin asar, jimia jakatnua nunisarang ainawai.^z

**Nayaimpisha tura nungkasha
yamaram atinuitai**

21 ¹Nunia jiihkaman, nayaimpisha tura nungkasha arut armia nuka

mengkakaru asamtai, nayaim yamarman tura nungkancha yamarman wainkamjai. Antsu juun entsaka atsau asamtai nunaka wainkachmajai.^a

²Wikia yamaram yakat Jerusalén tutain Yus nayaimpinmaya akupkau asamtai, nekas pengker aa nuna wainkamjai. Nuwa aintsun ninumkatas shiirman iwiarmamrawa nunisang nu yaktaka nekas pengker aun wainkamjai.^b ³Nunia nayaimpinmaya kakarman untsun antukmajai. Nu untsunauka nuwaitai: “Jiista. Yamaikia Yuska aints ainamunam pujawai. Tura níjai tuke pujustin asamtai, ni aintsri artinuitai. Tura ni aintsri asaramtai, ni Yusrijai tuke iruntrar pujusartinuitai.^c ⁴Tura asa aintsu neaikirin mash japiratnuitai. Yaanchuik amia nuka mash mengkaku asamtai jatasha atsutnuitai. Tura wake mesekar pujamusha, tura wait wajamusha, tura najaiamamusha pengké atsutnuitai.”^d

⁵Nunia juun keemtainum ketuka wína chichartak: “Jiista, wikia mash aa nunaka yamarman najanuitjai. Ju chicham wi taja nuka nekas asamtai nuna pachisar nekasampita tiartinuitai. Tura asamtai jusha aatrurta,” turutun antukmajai.

⁶Nunia ataksha wína chichartak: “Wi timiaja nuka mash umismawaitai. Wikia nu nangkamtaik tuke pujuyajai. Tura nungka mash amukamtaisha, wikia tuke pujustinuitjai. Yumi akikchaujai suwina nunisnak aints kitaminawa nunisarang pujuinaunka wijai tuke iwiaku pujusarti tusan surittsuk susatnuitjai.^e ⁷Tunau nepetkaruka wi pujaja nunisarang pujusartinuitai. Tura wikia ni Yusri atinuitjai. Wi turau asamtai nusha wína uchir artinuitai. ⁸Antsu wait wajaktiniun shaminak wína umirtutan inaisaru

z 20.14 (Mat. 25.41; Apoc. 21.8) a 21.1 (2.Ped. 3.13) b 21.2 (Gál. 4.26; Apoc. 3.12;19.7-8)
c 21.3 (Lev. 26.11-12) d 21.4 (Apoc. 7.16-17) e 21.6 (Isa. 55.1-2; Juan 4.10-14; 7.37-39; Apoc. 22.17)

ainauka, tura winaka nekasampita turutsuk pujuinausha, tura tuke tunau nintimsar pujuinausha, tura mangkartin ainausha, tura pachitsuk tsanirmin ainausha, tura wishin ainausha, tura Yuschau waininayat waring achat mash: Nuka wína Yusruitai tinu ainausha, tura wait chichaman etserin ainausha, kucha ji azufrejai tuke keamunam wait wajakar-tinuitai. Nu kuchaka jiya tumau keamunam ujungmau ainauka jimia jakawa nunisarang artinuitai,” turutun antukmajai.^f

Yamaram Jerusalén pachisar timiauri

⁹Nunia Yuse awemamuri siete (7) aa nuka inangnamu wait wajaktiniun piningnum engkeamun takakun wi nuwik wainkamja nuka ataksha wína chichartak: “Winita. Uwija Uchiri nuwarin inaktustasan wakerajme,” turutun antukmajai. ¹⁰Nunia Yuse Wakani karanma nunisang wína jiiimtikrusma nuka nuwaitai: Yuse awemamuri mura juunnum iwiarak, nekas pengke yaktan Jerusalén tutain Yus nayaimpinmaya akupkamun inaktursami. ¹¹Yus nuni tuke pujau asamtai, ni paaniringkia kaya akik jaspe tutaiya tumaun wincha aun wainkamjai. ¹²Nu yakta wenukri juuntan, tura sarmancha wainkamjai. Tura wenuknum waiti doce (12) aa nuna wainkamjai. Tura Yuse awemamurin waitijai metek wajatinaun wainkamjai. Tura Israela uchiri doce (12) amia nuna naaringkia waitijai metek aatramun wainkamjai. ¹³Tura kichik kichik yantamen kempatam waiti aun wainkamjai, tsaa taakmaunumaninisha kempatam, tura pajeninisha kempatam, tura tu pajeninisha kempatam, tura tsaa jeatinmaninisha kempatam aun wainkamjai. ¹⁴Nu yakta wenukrin kaya

juun doce (12) puusamuitai. Tura Uwija Uchiri nuiniatiri ainau doce (12) amia nuna naaringkia nu kayajai metek aatramun wainkamjai.

¹⁵Tura Yuse awemamuri wijai chichama nuka nu yakta waitirincha, tura wenukrincha nekapmartas, nekapek kuri najanamun takakun wainkamjai. ¹⁶Nu nekapkejai yakta aarin esantirin, tura wangkantirincha, tura yakiirincha jimia warang nunia jimia pachak (2,200) kilómetro metek waakchaun nekapmarun wainkamjai. ¹⁷Nunia yakta wenukrin nekapmar yakiri sesenta y cuatro (64) metro jeaun nekapmarmayi. Nu yaktanka Yuse awemamuri nekapmarma nuka aintsti nekapma weaji nunisang nekapmaun wainkamjai.

¹⁸Nu yakta wenukrin kaya wincha jaspe tutajai wenuurmaun wainkamjai. Tura nu yaktaka kuria tumau jeamkamun ayat, nekas mutia tumaun winchaan wainkamjai. ¹⁹Nu juun kaya doce (12) yakta wenukrin puusamun wainkamja nuka kichik kichik kaya shiiram akikjai iwiaramun wainkamjai. Nu doce (12) kaya naaringkia nu ainawai: Jaspe, zafiro, ágata, esmeralda, ²⁰ónice, cornalina, crisólito, berilo, topacio, crisoprasa, jacinto, amatista nu ainawai.

²¹Nu yakta waitiri doce (12) kichkin kichkin wainkan, kichik kaya juun entsanmaya jukimu, nekas akik najanamun wainkamjai. Tura nu yaktanam tungkajin junta kuria tumau najanamutiat, nekas mutia tumaun winchaan wainkamjai.

²²Tura jiiimkaman, nu yaktanam Yus nekas kakaram aa nuka Uwija Uchirijai nuni tuke pujuinau asaramtai, nu yaktaka Yuse jeea tumawaitai. Antsu Yus seatai juun jeaka nuni jeamkachmau asamtai nunaka wainkachmajai. ²³Nu yaktanma-

sha Yuse paaniurijai mash paantin atin asamtai, tura Uwija Uchiri paaniurisha nukap atin asamtai, tsa tsanmauncha tura nantu tsanmauncha yuumakchartinuitai.^g ²⁴Mash nungkanmaya uwemraru ainau nu paaniunam wekainawai. Tura Yus apu ainaun ju nungkanmayan uwemtikramu asar, nekas apu ainayat nu yaktanam Yusen umirinak pujusartin ainawai. ²⁵Nu yaktanmaka tee atsau asamtai, tsawaisha yakta waitiri pengké epenchartinuitai. ²⁶Tura mash nungkanmaya uwemraru ainau pengker nintintin asar, nuni wayaawar warasartinuitai. ²⁷Tura pasé nintintin ainau, tuke tunau nintimsar pujuinausha, tura wait chichaman etserin ainausha kichkisha nuningkia pengké wayaachartinuitai. Antsu tuke pujustin ainau naari Uwija Uchiri papirin aatramu asar nu yaktanmaka wayaawartinuitai.

22 ¹Nunia Yuse awemamuri entsa winchaan nekas pakuchaun inaktursami. Nu entsaka tuke iwiaaku pujustinun sukartawai. Nu entsanka Yus Uwija Uchirijai ketinamunmaya jiinun wainkamjai. ²Nu entsaka tungkajin jinta yantamen wearun wainkamjai. Tura nu entsa mai yantamen numi tuke pujutan sukartin wajaun wainkamjai. Nu numi ainauka doce (12) nantujai metek nerekartin ainawai. Tura nu numi nukéjaingkia mash nungkanmaya ainau tsuwamarartinuitai.^h ³⁻⁴Tura Yus paseetai tauka nu yaktanmaka pengké atsutnuitai. Tura Yuse juun keemtairin, tura Uwija Uchiri keemtairin aa nunaka nu yaktanam wainkartinuitai. Tura Uwija Uchiri yapiincha waitkartinuitai. Tura ni naaringkia Jesúsá inatiri nijajin aatramu artinuitai. Turamtai nuni ni inatiri ainau Uwija Uchirin pengker awajsartinuitai. ⁵Nu yaktanmaka teeka atsutnuitai. Tura

Apu Yuse paaniurijai nekas paantin asamtai, kantiinaka yuumakchartinuitai. Tura Yuse inatiri ainau tuke nuni apua nunisarang pujusartin ainawai.

Jesucristo tatintringkia jeatak wajasi

⁶Nunia Yuse awemamuri wína chichartak:

“Ju chichamka wi amin aamtikramjame nuka nekasaintai. Tura asamtai juni mash aarmawa nunaka pachisar nekasampita tiartinuitai. Apu Yus ni chichame etserin ainaun nintimtikramia nuka ni inatiri ainaun ukunam atiniun pachis nekamtikiatas: Wári umistajai tusa, ni awemamurin akupkami,” turutun antukmajai.

⁷Nunia Jesucristo chichamen antukmajai. Nu chichamka nuwaitai:

“Wikia wári winitatjai. Ju papi aarmawa juna umirkaru ainaunka nekas waramtikstartajai,” turutun antukmajai.

⁸Witjai Juankuitjai. Wiki ju chichamnaka mash antuku asan, tura waintancha mash wainkau asan, Yuse awemamuri mash aa nunaka winaka inaktursau asamtai, ni wajamunam: Ameketme juuntam titasan pinakumran tepesmajai.

⁹Turamaitiat nuka wína chichartak:

“Aitkarawaip. Yusek ameketme juuntam tita. Wisha amea nunisketjai. Tura chikich Yuse inatiri ainau ni chichamen etserina nujai metekaitjai. Tura ju papi aarmaun umirkaru ainaujai metek Yuse inatirinjai,” turutun antukmajai.

¹⁰Nunia ataksha wína chichartak:

“Ju papi aarmau aa nuka wári umiktin asamtai, ju chichamka uutsuk aints ainau mash nekamtikiata. ¹¹Ju chichaman umitsuk pujuinauka, tuke tunau turuwarti tusam tsangkatkata, tura pasé

nintimsar pujuinauka tuke pasé nintimsar pujusarti tusam tsangkatkata. Antsu pengke aints ainauka tuke pengker pujusarti tusam tsangkatkata. Tura Yusen umirin ainauka tuke Yusen umirkarti tusam tsangkatkata,” turutun antukmajai.

¹²Jesucristo ataksha chichaak:

“Nekasan wári winitatjai. Tura aints kichkin kichkin ni turamurijai metek tunau takau ainaunka pasé awaj sartatjai. Tura pengker aa nuna takau ainaunka pengker awaj sartatjai.ⁱ ¹³Wikia nu nangkamtaik tuke pujuyajai. Tura nungka mash amukamtaisha, tuke nunisnak pujustinuitjai.^j

¹⁴“Aints ni entsatirin pakuichau ati tusar, tenap nijainawa nunisarang pengké tunaarinchau pujuinaunka Yuska waramtikartinuitai. Tura Yuse yaktari waitirin wayaawartinuitai. Tura numi tuke pujutan sukartinu neren yuwarti tusa Yus tsangkatkatnuitai.^k ¹⁵Antsu Yusen umirchau ainauka, tura wishin ainausha, tura pachitsuk tsanirmin ainausha, tura mangkartin ainausha, tura Yuschau waininayat, waring achat: Nuka wína yusruitai tinu ainausha, tura aintsun anangtan wakerin ainausha, tura wait chichaman tuke etserin ainauka nu yaktanmaka pujuschartinuitai.

¹⁶ “Wikia Jesúsaitjai. Ju armaunaka wína aintsur ainaun nekam-tikiawarti tusan, wína awemamurun akupkamjai. Wikia Davidta wearinjai. Tura tsawaatsaing angkuaji tsantua

nunisnak wína aintsur ainaun wína paan waitkarti tusan wantintuktinuitjai,” taun antukmajai.

¹⁷Tura Yuse Wakani tura Uwija Uchiri Nuwarisha: “Winitaram,” tinawai. Tinamtai ju chichaman antukaru ainausha chikich ainauncha untsukar: “Winitaram,” tiarti. Tura kitaminawa nunisarang pujuinausha winiarti. Tura wakerinakka, yumi tuke iwiaaku pujustinun sukarta nunaka akikchaujai umurarti.^l

¹⁸Ju papi Yuse chichame aarmawa juna antukartin ainaun nunasha tajai: Pe wainkataram. Yuse chichame ju papin aarmaun aints ningki nintimias chikich chichaman patatkamtaikia, Yus ju papinum wait wajaktiniun pachis aarmawa nunaka niin susatnuitai. ¹⁹Tura aints ningki nintimias, Yuse chichame ju papin aarmaun wainiat, jumchiksha mengkaramtaikia, pengker yaktan ju papinum pachis aarmawa nuningkia wayaashti tusa Yuska suritkatnuitai. Tura nu yaktanam numi tuke pujustinun sukarta nuna neren yuwái tusa suritkatnuitai.

²⁰Jesucristo ju armaunaka pachis: Nekas juka wína chichamruitai ta nuka: “Nekasan wári winitatjai,” tawai.

Tamati wisha: “Tu atí, Apuru Jesúsá. Nekasam wári winita,” tajai.

²¹Ii Apuri Jesucristo mash aints ainautirmin yainmakarti. Nuke atí. Maaketai.

Chicham yumtin ainia nu tenap nekaatin

Aakmakmau fiesta (*Juan 7.2*)

Judío ainau aakmakmauri pachis fiestaitai. Yaanchuik judío juuntri Egipto nungkanmaya jiinkiar cuarenta (40) musach aints atsamunam wekaasar jeanka jeamtsuk, pusu jea nuwap najanamunam pujuu armiai. Ni yaanchuik juuntri tu pujuu asaramtai, musachjai metek nu nintimrarmi tusar, trigo juukmaurin mash umisar, tura sebada juukmaurincha mash umisar, judío ainau mash Jerusalénnum kaunkar, aakmakar fiestan najanin armiai.

Abadón (*Apocalipsis 9.11*)

Hebreo chichamentai. Abadón waa juuntan jii tamran kuna aa nuni pujuinau apurintai. Griego chichamejai.

Apolión naartinuitai. Nu ii chichamejaingka meskartin taku tawai.

Areópago (*Hechos 17.19-34*)

Atenas yaktanam mura Areópago tutainum nu yaktanmaya juuntri ainau tuke irunin armiai. Tura nuni tuke irunin asaramtai, Atenas yaktanmaya juuntri ainaun pachisar: Areópago tinu armiai.

Armagedón (*Apocalipsis 16.16*)

Nu nungkaka tuning aa tusarkia paanka nekaachminuitji. Israela nungkari nungka Armagedón inaikiamu irunui. Nuni nungka amutanak wajasamtai, mash

nungkanmaya apuri ainau Yusjai maanikiartinuitai.

Ayamtai kinta (*Mateo 12.1-8*)

Nu chichamka griego chichamejai “sábbaton” tutai “sábado” taku tawai. Yaanchuik judío ainau viernes kinta tsaa akaamunam nangkamawar sábado kinta ayamin armiai. Tura chikich fiesta kinta ainausha sábadochu waininayat, ayamtai kinta asaramtai, hebreo chichamejai “shabbáth” tinu armiai.

Beelzebú (*Mateo 12.24*)

Iwianchi apuri naarintai. Chikich naari Satanásaitai.

Cástor Poluxjai (*Hechos 28.11*)

Romano ainau ni yusri Cástor nunia Polux naartinun ii kanuri wainkarmi tusar, ni yusri nakumkamurin kanu nujiin nujkar wekajin armiai.

César (*Mateo 22.21*)

Romano ainau juun apurintai.

Chipu (*Mateo 24.32*)

Chipu ainau Israela nungkarin nukap yajau armiai. Tura Yus turataram tinu asamtai, Yus aints ainau tunaarin tsangkurarti tusar, chipun jimiaran achikiar, Yus seatai juun jeanam itaaramtai, sacerdote apuri kichik chipun maa epeu armiai. Antsu kichnaka maatsuk, chipu muuken jimia uwejejai takas, aints ainau tunaarin mash Yusen ujauyayi. Turamtai chikich aints un chipun juki aints atsamunam akupunuyayi. *Levito 16.7-22*)

Cristonu ainau wainin*(1.Timoteo 3.2-7; Tito 1.5-9)*

Cristonu ainau ni wainurin umirkar-tinuitai. Cristonu ainau wainin nekas péngke aints atinuitai. Nuka kichik nuwentin, chichamnasha antin, péngke nintintin, aints ainauncha pengker nuinin atinuitai. Tura nampechuitai, maanitnasha maanichuitai, tura kajechuitai, tura jiyaanichuitai, tura kuikianka aneetsuk ni jeen pujuinauncha pengker inartinuitai.

Denario *(Mateo 20.1)*

Romano kuikiarintai. Kichik kinta takakmasmaunum nu kuikian akiu armiyai.

Epicuro *(Hechos 17.18)*

Griego aints Epicuro naartin aints ainaun nuiniak: “Ju nungkanam nekas naku nakut pujustinka timiá pengke-raitai. Nuna nangkamaska pengker pujustinka pengké atawai,” timiyai.

Estoicos *(Hechos 17.18)*

Estoicos ainau griego aints ainaun nuinin asar chichainak: “Ju nungka-nam nakurinak pujuinaunka pengké pachischatnuitai. Tura wait wajakria, wait wajamuka pengké pachischatnuitai,” tu nuinin armiyai.

Fariseo *(Mateo 15.6)*

Fariseo ainau Moisésa aarmaurin tenapkesar nekaawar miatrusarang umirkartas wakerin armiyai. Antsu chikich umiktin chichaman untsuri Yus akupkachmau waininayat, ningki nintimsar akupin armiyai.

Genesaret *(Mateo 14.34)*

Galilea nungkanam juun kucha aa nuna naarintai. Tura nu kucha kaanmatkarincha tuke Genesaret nungka tinu armiyai.

Griego *(Juan 19.20; Hechos 21.37)*

Mateo, nunia Marcos, nunia Lucas, nunia Juan, nunia Pablo, nunia

Pedro, nunia Santiago, nunia Judas Yuse chichamen aararmia nuna mash irumramu “Yamaram Chicham” tu weaji nuka griego chichamejai aarmauyayi. Jesús Israel nungkanam pujai, nu nungkanmak tura chikich untsuri nungka ainamunam griego chichamen chichau armiyai.

Hebreo *(Hechos 21.40)*

Israel ainau chichamentai. Tura hebreo chichamen chichainau asar, Israel ainauncha hebreo aints tinu armiyai. Jesucristo Israel nungkanam pujai, nunia aints ainau mash chikich chichaman “arameo” tutai chichau armiyai. Antsu niish chichai-nayat, nunaka tuke hebreo chichamejai tu inain armiyai.

Higuera *(Mateo 21.19; Marcos 13.28; Juan 1.48)*

Higuera numitai. Nuna nere higo tutai yutaintai. Israela nungkari nu numikia nukap iruninau asaramtai, Yuse chichame etserin ainau tuke Israela nungkarin pujuinaun pachisar higuera nunisarang ainawai tinu armiyai.

Iglesia Ju chicham griego chichamea tumawaitai. Antsu griegojai tu aarmawaitai “ekkleisia”. Cristo nemarkin ainau kichik yaktanam matsatinau tura mash nungkanam matsatinauncha mash irumram “iglesia” inaikiararmiyai. Antsu jea jeamkamunka iglesiatai ticharmiyai. *(Mateo 16.18; 18.17; Hechos 2.47; Romanos 16.5; 1.Corintonam 10.32; 2.Corintonam 8.1,23; Gálatas 1.13; Efesonam 5.23,27; Filiposnum 3.6; Colosasnum 1.18; 3.Juan 10; Apocalipsis 1.4)*

Israel *(Génesis 32.28)*

Yuse awemamuri Isaaca uchirin Jacobon Israel inaikiamiyai. Tura asamtai Israela weari mash Israel aints tinu armiyai.

Judío (*Juan 4.9*)

Nu nangkamtaika Israela uchiri Judá naartinu wearin mash judío tinu armiyai. Nunia Judá nungkarin pujuinauncha mash pachitsuk tu inain armiyai. Nukap arusar Judea nungkanam pujuinauncha mash Judá wearin chu waininayat judío tinu armiyai.

Kárser (*Mateo 14.3*)

Tunau takau ainaun achikiar metawar jea kárser tutainum engkeu armiyai. Tura yawikmau asamtai, nunia pengké jinchau armiyai.

Levita (*Lucas 10.32*)

Levita ainau sacerdote yaintri armiyai. Nuka Israela uchiri Leví weari asar, tuke Yus seatai juun jeansam takau armiyai.

Maná (*Juan 6.31; Exodo 16.14-27*)

Yutai nayaimpinmaya akupkamuitai. Israel ainau Egiptonmaya jiinkiar, cuarenta (40) musach aints atsamunam wekaasar, yurumak nayaimpinamaya akupamu maná tutain yu armiyai. Nu yurumkaka fariña tumaun nungkanam tepaun wainkar nunia painkar, pang wapasjai pachimramua tumaun nekaprarmiyai. Nu yutanka Yus akupamu asamtai, kintajai metek juu armiyai. Antsu ayamtai kinta atsaun wainkarmiyai.

Mesías (*Juan 1.41*)

Yus akupkamu hebreo chichamejai Mesías tinu armiyai. Antsu griego chichamejai Cristo tutayi. Yus yaanchuik ni chichamen etserin ainaun nekamtikiamu asar: Yus iin uwentikramratnun akupturmaktinuitji tiarmiyai. Tu tinu asaramtai Israel ainau: Yus nekasampi iin uwentikramratnun akupturmaktatji tusar nakau armiyai.

Mirra (*Mateo 2.11*)

Shirikip mirra tutai kungkuram ayi. Tura akik ayi. Nujai kungkutin najanin armiyai.

Moisésa chichame nuikiartin

(*Mateo 2.4*)

Nu aints ainau Moisésa aarmaurin miatrusarang nekainau asar, chikich aints ainaun tura uchi ainauncha nekamtikin armiyai.

Mostaza (*Mateo 13.31*)

Yuta pachimtai mostaza tutai ajanam nekas juun tsakaayi. Antsu jingkiaji pengké tuupich ayi.

Nardo (*Juan 12.3*)

Arak nardo tutainumia kungkutin nekas kungkurman juu armiyai. Nuka nekas akik ayi.

Nicolaítas (*Apocalipsis 2.6*)

Nicolaítas ainau aints Nicolás naartinu nemarnuri armiyai. Nu aints ainau ni yusrin ningki najanamun Yuschau waininayat: Iinu yusrinme tusar seau armiyai.

Nuwap najanamu (*Mateo 9.17*)

Israel nungkanmaya ainau chipu nuwapen aparmau muitsa nunisarang ni umutirin, vino tutain, tura yuminya yarakar entsau armiyai. Antsu kitaawai tusar kantsejai kantseu armiyai.

Olivo Mura (*Mateo 21.2*)

Olivo Mura Betfagé yaktanam yaatkauyayi. Numi olivo tutai nekas pengker ayi. Nuna neré wiakcha chichamejai “aseituna” tutai macha asa pengkeraitai. Tura nuna macharin juukar keemin armiyai.

Olivo machari (*Mateo 25.1-4*)

Israela nungkarin olivo machari nukap yuumin armiyai. Irimi atsaun asamtai, nujai jau ainaun tsuwau armiyai. Charumakmaunum nujtukar, esaamunmasha nujtukar tsuwau armiyai. Tura yutairincha

olivo macharijai pachimin armiaiyi.
Tura namparingjai keemin armiaiyi.

Pascua (*Mateo 26.17-19*)

Israel ainau musachjai metek Pascua fiesta tutain najanin armiaiyi. Yus ni aintsri ainaun Egipto nungkanmaya jiikiartas uwija uchirincha, tura chipu uchirincha shiirman maawar, nuna numpejai jea waitiri yakartaram timiaiyi. Nunia kashi japen uwija namangken tura chipu namangkencha ampitsuk yuwataram timiaiyi. Yus tu tinu asamtai, Israel ainau miatrusarang umirkarmiaiyi. Turinau asaramtai Yuse awemamuri ni jeen waaitsuk nangkamakmiyai. Antsu Egipto ainau numpajai ni jeen yakarchau asaramtai, Yuse awemamuri nuni waya, uchi eemkaurin tura tangku eemkaurincha mash maamiyai. Turamtai Yus ni aintsri ainaun ayamruk, Egipto nungkanmaya jiikin asa: Nu kintaka kajinmatsuk tuke fiesta najanataran tinu asamtai, Israel ainau tuke nu kintati uwija uchirin maawar, tura chipu uchirincha maawar yu armiaiyi. (*Exodo 12.3-14*)

Pengker Tesaamu (*Hebreo 9.2-12; Mateo 27.51*)

Yus seatai juun jea japen tesaamuyayi. Nuni juun aparmau nenaamuyayi. Tura juun aparmau nitkarin Yuse paaniuri wantinuyayi. Tura asamtai Yus timiá pengker aa nuna pujutiri inaikiamuyayi. Nuningkia aints kichkisha pachitskeka wayaachminuyayi, antsu jakai tusar shamin armiaiyi. Antsu musachjai metek sacerdote apuri nuni wayaatin kinta jeau asamtai, chipun maa, nunia Yus ni tunaarin mash sakturat tusa Yusen sea, nunia chipu numpen Yuse ayamtairin uwijmiartas ningki wayaamiyai.

Pentecostés (*Hechos 2.1*)

Pascua fiesta cincuenta (50) kinta nangkamaramtai, judío ainau chikich fiestan Pentecostés tutain inangkin armiaiyi. Trigo juukmaurin pachisar, ni nekas yutairi asamtai, nu kintati inangkinak warasarmiaiyi. Tura asar judío ainau mash nungkanmaya Jerusalénnum kaunkar fiestan inangkin armiaiyi.

Romano (*Juan 11.48*)

Romano ainau Roma yaktanam pujusar, nunia jiinkiar untsuri nungkanmaya apuri ainaun nepetkarmiaiyi. Israel ainauncha nepetkaru asar, nu nungkanmasha puju armiaiyi. Antsu judiochu asaramtai, judío ainau niin tsuutrarmiaiyi. Tura nepetmaku asar, romano apurin tuke kuikian akiu armiaiyi. Nunia tuke romano apurin umirin armiaiyi.

Sacerdote (*Lucas 1.8-10*)

Sacerdote ainau Yus seatai jea wainin asar, aintsu tunaarin pachisar Yusen seau armiaiyi. Tura waaka uchiri ainaun, tura chipu ainauncha, tura uwija uchiri ainauncha, tura yampits ainauncha maawar, Yusen susartas epeu armiaiyi.

Sacerdote apuri (*Mateo 26.57; Hebreos 4.14,15*)

Sacerdote apuri musachjai metek Yus seatai juun jeanam chikich tesaamunam Pengker Tesaamu tutainum ningki waya Yuse ayamtairin tangku numpen uwijmin armiaiyi. Sacerdote apuri chikich sacerdote ainau wainuyayi. Tura judío juuntri ainaujai iruntramunam chicham nekaami tusar sacerdote apuri tuke chichau armiaiyi. (*Hebreos 9.7*)

Saduceo (*Mateo 22.23*)

Saduceo ainau fariseo aintsua nunisarang sacerdote wajasarmiaiyi.

Antsu fariseo ainaujai metekchau nintimin armiaiyi. Tura asar jakau ainau ataksha pengké nantakcharti-nuitai tinu armiaiyi.

Shaak wawiknumia jukimu

(Mateo 13.45; Apocalipsis 21.21)
Shaak wawiknum irunui. Tura juun entsanmaya jukimu asar nekasar akik ainawai. Nuka chapuk, tura puju, tura nekas shiiram ainawai. Wiakcha chichamejai “perla” tutayi.

Tiberias *(Juan 21.1)*

Tiberias yaktaka Galilea kucha kaanmatkarin ayayi. Tura asamtai Galilea kuchan waininayat, Tiberias kucha tinu armiaiyi.

Uva *(Mateo 21.28)*

Uva tutai yurangkentai. Israel ainau uva yarangken araawar nunia juu armiaiyi.

Uwija *(Mateo 9.36)*

Cristonu ainau uwijaya tumau asaramtai, Yuse chichame aarmaun uwija tinu armiaiyi.

Uwija uchiri *(Apocalipsis 5.6-8)*

Uwija ainau Israela nungkarin nukap yujau armiaiyi. Tura Yus: Turataram tusa akupkau asamtai, Israel ainau tuke ni tunaarin etserkar, uwija uchirin maawar Yusen su armiaiyi. Tura fiesta Pascua tutainum Yusen maaketai tusar, uwija uchirin eemkaurin shiirman maawar Yusen su armiaiyi. Nunia Jesucristo aints ainautin tunaarin mash sakturmartas jarutramkau asamtai, Juan karanma nunisang Jesúsán uwija uchiriya tumaun wainkamiyai.

Uwija wainin *(Juan 10.11-16)*

Jesucristo uwija wainua tumau ni aintsri ainaun wainkau asamtai: “Wikia uwija wainin nekas pengker aa tumawaitjai,” tummamiyai. Nunia Cristonu ainau wainiun pachisar uwija wainin tinu armiaiyi. Wiakcha chichamejai “pastor” tutayi.

Vino *(Mateo 9.17; Juan 2.3)*

Israel ainau uva yumirin vino tutain jukiari, nuna tuke umin armiaiyi.

Yukuu *(Mateo 11.21)*

Judío ainau tunau turinau asar; Wikia tunaawaitjai tusar, ni namangken yukuumin armiaiyi. Tura ni wearisha tura ni apurisha jakaramtai nunisarang turin armiaiyi. Tura ni namangken yukuuwai yakarar, jakau iwiartai entsatirin entsau armiaiyi.

Yuschau waininayat ni yusrin ningki najanamuri *(1. Corintonam 8.1-10)*

Yaanchuik aints ainau ningki nintim-sar: Ii yusri najanami tusar kurincha, tura kuikiancha, tura numincha, tura jiruncha, tura kayancha ni yusrin ningki najanin armiaiyi. Nuniasha tikishmarar, Yuschau waininayat seuu armiaiyi, tura maaketai tiartas, ni tangkurin maawar, nuna namangkencha yu armiaiyi. Tu pujuinamtai Yus: Turuwairap tusa pengké surimkau asa, nu aints irunun pengké nakitnuyayi. Tura asamtai iikia nuka turatsji. Antsu wari timiá aneaji nuka ii yusri atinuitai. Nuka wiakcha chichamejai “idolo” tutayi.

Yuse ayamtairi *(Hebreos 9.5)*

Nuka kaju juun ayayi. Nu kaju yantamencha tura nitkarincha kuri nujtukmau ayayi. Nu kaju nitkarin kaya tauwa tumau umirkatin chichaman Yus Moisésán aamtikramia nu engkeamuyayi. Nunia un kaju tuntupe Yuse ayamtairi ati tusar kuri najanamuyayi. Tura Yuse awemamuri nanamtin nakumkamu kuri najanamu nuni kentsamuyayi.

Yuse chichamen etserin *(Mateo 2.5)*

Yaanchuik Jesús akiintsang Yuse chichame etserin ni akiinatniurin, tura ni wait wajaktinrincha, tura ni jakatniurincha pachisar chichaman aarmiaiyi. Tura Yus tita tusa

akupkamu asar, Yuse chichamen
aints ainaun ujau armiai.

Yus inaktustin pang (*Mateo 12.4*)

Yus seatai juun jeanam Yus inaktus-
tin pang puusamu tuke Yus susamu
asamtai, aints ainauk pachitskeka
yuchau armiai. Antsu sacerdote
ainau nuke nu pangkan yu armiai.
Tura tumingjai metek pangkan

yamarman najanawar, Yuse jeen
jukiar nuni pujin armiai.

Yus seatai juun jea (*Mateo 4.5; Marcos
13.1-2; Juan 2.20*)

Yus seatai juun jeaka cuarenta y seis
(46) musach jeamkamuyayi. Nunia
Jesúsa jakamuri setenta (70) musach
nangkamaramtai, romano suntari
ainau yumpungkarmiai.